

Lerérún Búngiu To
Lánina Iséri Darádu



New Testament in Garifuna (HO:cab:Garifuna)

Lerérun Búngiu To Lánina Iséri Darádu

New Testament in Garifuna (HO:cab:Garifuna)

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Garifuna

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022
df8e4807-f4f9-5f4a-ab14-d1f7ffe98b0a

Contents

SAN MATEO	1
SAN MARCOS	61
SAN LUCAS	99
SAN JUAN	161
HECHOS	207
ROMANOS	261
1 CORINTIOS	286
2 CORINTIOS	311
GÁLATAS	328
EFESIOS	338
FILIPENSES	346
COLOSENSES	352
1 TESALONICENSES	358
2 TESALONICENSES	363
1 TIMOTEO	366
2 TIMOTEO	373
TITO	378
FILEMÓN	381
HEBREOS	383
SANTIAGO	402
1 PEDRO	408
2 PEDRO	415
1 JUAN	419
2 JUAN	425
3 JUAN	426
JÚDAS	427
APOCALIPSIS	429

UGÁNU BUÍTI LE LABÜRÜJABEI MATÉO LUÁGU JESÚSU

*Linébaanfaangu Jesúsu
(Lc 3.23-38)*

¹ Niján jíri linébaanfaangu Jesucrístu le jádaangiñebei meja ladügawagun Davíd lúma Abrahám.

² Abrahám lúguchibei Isáac, Isáac lúguchi Jacób, Jacób lúguchi Judá jáu lamúlenu, ³ Judá lúguchi Fáres lúma Zára, Tamar tugúya jáguchu, Fáres lúguchi Esróm, Esróm lúguchi Arám, ⁴ Arám lúguchi Aminadáb, Aminadáb lúguchi Naasón, Naasón lúguchi Salmón, ⁵ Salmón lúguchi Booz, Raháb lúguchu, Booz lúguchi Óbed, Rut lúguchu, Óbed lúguchi Isái, ⁶ Isái lúguchi urúei Davíd, urúei Davíd túma tó meja lúmari Urías, jagía lagübürigubaña Salomón.

⁷ Salomón lúguchibei Roboám, Roboám lúguchi Abías, Abías lúguchi Ása, ⁸ Ása lúguchi Josafát, Josafát lúguchi Jorám, Jorám lúguchi Uzías, ⁹ Uzías lúguchi Jótam, Jótam lúguchi Ácaz, Ácaz lúguchi Ezequías, ¹⁰ Ezequías lúguchi Manasés, Manasés lúguchi Amón, Amón lúguchi Josías, ¹¹ Josías lúguchi Jeconías jáu lamúlenu lídan dan le janáanwagunbei Israelítagu adáürawagua Babilónia.

¹² Lárigiñe le, Jeconías lúguchibei Salatiél, Salatiél lúguchi Zorobabél, ¹³ Zorobabél lúguchi Abiúd, Abiúd lúguchi Eliaquím, Eliaquím lúguchi Azór, ¹⁴ Azór lúguchi Sadóc, Sadóc lúguchi Aquím, Aquím lúguchi Eliúd, ¹⁵ Eliúd lúguchi Eleázar, Eleázar lúguchi Matán, Matán lúguchi Jacób, ¹⁶ Jacób lúguchi José le túmari María, tugúyati lúguchuboun Jesúsu le gíribei Crístu.

¹⁷ Catoúrusuñanu lubeíti linébaanfaangu Jesúsu lúmagiñe Abrahám lúmoun Davíd, catoúrusu lúmagiñe Davíd lúmoun janáanwagúniwa Israelítagu Babilónioun, catoúrusu lúmagiñe dan ligía lúmoun lagüriajóun Crístu.

*Lagüriajóun Crístu
(Lc 2.1-7)*

¹⁸ Ítara líña ligáburi lagüriajóun Jesucrístu. María to lúguchu, gadáraduñoun lúma José lun tamárieidun lúma, lubáragiñeti jaganóun jámagua, lubáragiñe lasúbudirunun quei würi, ába tadáriragun túngua láu dagáñu tíña lan láu lubáfu Sífiri Sándu. ¹⁹ Quei ában lubeí wügüri buídu tigáburi José le tadári, májati lasúbudirúniwa le asúseredubei tun María, busénrügüti lígirunun, míchugunga tidúnrun. ²⁰ Dan le niján lubeí arítagua luágu cátei le, ligía larúfudagun ában láni Wabúreme Búngiu ánjeli lúngua lun lídan luwénedi, ába laríñagun lun.

—José, ladügawagun Davíd, manúfudebá lun berésibirunun María queísi búmari, ladüga irájü le lúnbei tagáraüduni, lúmagiñe Sífiri Sándu líábin. ²¹ Tagáraüduba ában irájü, ábame bíchuguni líri Jesúsu. Ítara lúba líri ladüga lasálbarubaña lan lumútuniña lídaangiñe jafígoun.

²² Lasúseredunbei sun cátei le lun lagúnfulirun dimúrei le laríñagubei Wabúreme Búngiu liyúmulugugiñe proféta.

²³ Tadágeinaduba ában irájü, ábame tagáraüdun ában irájü, Emanuél, ligiaba líri, líla íri ligía, “Búngiu wáma”.

²⁴ Dan le lagágudunbei José lídaangiñe uwénedi ligía, ába ladügüni le lubeíbei ánjeli ligía lun, ába lerésibirunun María queísi lúmari, ²⁵ masúbudirúngaloún queísi würi darí tagüriajani furúmiñeti tiraü, ába líchuguni líri Jesúsu.

2

Jachüürün chu táu aríjei Jesúsu

¹ Lídan fulásu le gíribei Belén, lumúanrugu Judéa, ñi lagüriajouá Jesúsu dán meja le Heródes lan urúeíbei lídan jageíra juríu. Ábati jachüürün fiú wügüriña chu táu ubúrugin Jerusalén lueígiñe oúbaü le ñígiñe lubeí laboucha wéyu. ² Ába jálügüdajan.

—¿Jageísan jarúeite juríu le agüriajouébei? Aríja wamáaru luwáruguman le ñígiñe lubeí láfuara wéyu, wayábiñati lun wájuduragun lun.

³ Dan le lagáambuni urúei Heródes cátei le, ába medéraguagüdünjaali lan, jáu sun Jerusalénna. ⁴ Ábati lagúarun joun sun jábutigu fádirigu lídan jafíñen juríu, jáma ja arúfudajabalin lilúrudun Moisés joun gürígia, ába lálügüdaguñiña jalíabei lan libíti fulásu lagüriajouá Crístu. ⁵ Ába jaríñagun lun.

—Belén, le lumúanrugubei Judéa, ladüga ítara líña labürüdüni proféta.

⁶ Amürü Belén, lumúanruguna Judéa, amürü ában lídaangiñe ubúrugu weírigutimaati lídan múa le, láu sun biñúraü, ladüga láfuriduba ában ábuti bídaangiñe le lúnbei loúnigiruniña numútuniña ja Israelítagu.

⁷ Ábati lagúarun Heródes joun chu táu arámudaguarügü, ába lálügüdüniña luágutima dan le tarúfudaguagüle warúguma túngua joun. ⁸ Ábati loúnajaniña Belén, laríñaga joun.

—Jeíba, ábame jáluajani irájü le buídu, dánme le darí jumaali, jawísaraname, ñüdüñ námuga gíñe ájuduragua lun.

⁹ Lárígiñe jagáambuni chu táu lerérun urúei, ába jouédin. Warúguma bugáti to jaríjuboun le ñígiñe lubeí láfuara wéyu, ába tídin jabá jabá, darí taráramun lougiñe fulásu le ñí lubeí irájü le. ¹⁰ Dan le jaríjinun chu táu ja warúguma, ába jagúndaaragun sarágu. ¹¹ Dánti le jebélurun tídon múna, ába jaríjini irájü le túma lúguchu to María. Ábati jájuduragun, ába jabúluchagun lun. Ába jánjunrenchunun jagáfun, ába jedéweejan gólu lúma cupáli jémeti lun, lúma ában luwúyeri árani gífiti. ¹² Lárígiñe, ába jawísarúniwa lídan jawénedi lun magíribudun jamá ñígiñe lubeí Heródes, ába jagíribudun jageíroun lídaangiñe ámu úma.

Anúrajani lun Ejíptoun

¹³ Lárígiñe jouédin chu táu jagía, ába larúfudagun ába láni Búngiu ánjeli lúngua lun José lídan luwénedi, ába laríñagun lun.

—Sarába, barúbei irájü le táu sun lúguchu, anúrabá Ejíptoun, ábame beréderun ñi daríme nawíсарunibu, ladüga láluaajaali Heródes irájü le lun láfaruni jilágubei.

¹⁴ Ábati lásaarun José, ába lanügüni irájü táu sun lúguchu áriebu ligía, ába lídin jáu Ejíptoun. ¹⁵ Ába jeréderun ñi darí loúnwen Heródes. Lasúseredunbei sun le lun lagúnfulirun le laríñagubei Búngiu liyúmulugugiñe proféta. “Sagá numuti Niraü Ejíptogiñe.”

Láfaraguágüdüniña Heródes irájüñü

¹⁶ Dan le ladáriragun Heródes lúngua luágu yéegua jamá lan chu táu, ába lagañidun, ába loúnajan áfaraguaña sun irájüñü ja biáma tíña irúmu jáu lun ünabun, ja aganoubaña Belén lúma sun fulásu geyéguá láu, según dan le jariñagubei chu táu luágu lagüriajouñiwa irájü ligía. ¹⁷ Ítara líña lagúnfulirun le labürüjabei proféta Jeremías.

¹⁸ Agaambúati lagúarajan ában umálali Ramá láu oúnwenbun igárigu, umálali ligía tumálali Raquél, to ayájuboun járigi tirájüñü, mabúseeruntu lun támalijoun ladüga jiláguá jamá.

¹⁹ Lárigiñe loúnwen Heródes, ába liábin ába láni Búngiu ánjeli lun José lídan luwénedi yágüta Ejípto, ába laríñagun lun.

²⁰ —Sarába, barübei irájü le táu sun lúguchu, giríbu jumá jageíroun Israelítagu ladüga jiláguá ja abúseerubaña meja jáfaruni irájü le.

²¹ Ába lásaarun José, ába lanügüni irájü táu sun lúguchu jageíroun Israelítagu. ²² Dan le lasúbudiruni José luágu Arqueláo lan agúmadijabei Judéa lewéñegua Heródes le lúguchi, ába lanúfudedun lídin ñíjin, ába laríñawagúniwa lun lídan uwénedi lun lídin Galiléoun. ²³ Lachülürün ñi, ába lídin agánawa lídan fulásu le giríbei Nazarét, le lumúanrugubei Galiléa. Lasúseredunbei sun cátei le lun lagúnfulirun le jariñagubei proféta gu luágu Nazarétna lan Jesús.

3

Lapúrichijan Juan le abásteragüdjabei lídan fulásu mageírawati

(Mr 1.1-8; Lc 3.1-9, 15-17; Jn 1.19-28)

¹ Lídoun dan ligía, ába liábin Juan le abásteragüdjabei apúrichija lídan fulásu mageírawati, Judéa, ² ába laríñagun lídan lapúrichijan.

—Sáansi jumei jóuserun, ladüga yaráfaali larúeijan Búngiu.

³ Juan le, ligía le uágubei meja labürüja proféta Isaías ítara. Agaambúati lumálali ában güri-gia agúaraja lídan fulásu mageírawati ítara. “Aráanse jumouñ janígi lubá liábin Wabüreme, queísi ladárarúniwa üma surúti.”

⁴ Lanáangun Juan, láutu lúra caméyu, liábin lagürüga liránaagua, guéru, chigángaru leígubaña lúma síruudu le áraabuna. ⁵ Ábaja jayábin ubúrugugiñe Jerusalén, lúma Judéagiñe, lúma lubádugiñe dúna Jordán agáambe lapúrichijan, ⁶ dántija le jagúfesaruni jafígoun, ába labásteragüdüniña lídan dúna le giríbei Jordán.

⁷ Dan le laríjin Juan luágu sarágu jáña lan güri-gia lídaangiñetiña jadámurin fariséogu jáma saduséogu ñübintiña lun jabásterun, ába laríñagun joun.

—¡Jarásan jéwe jugúya le! ¿Ca awísarubadün lun janúrajan lueí lanátime afáyeiragülei luágu figou le lúnbei liábin? ⁸ Oúsera jumá buídu, arijúa lámuga furáangu luágu sáansigua lan ligáburi jóuserun. ⁹ Mapántajan jugúyame, aríñaga jídaangua. “Linébaanfaangu Abrahám wagía”, ladüga naríñajare jun luágu gayára lan ladügün Búngiu linébaanfaangu Abrahám lídaangiñe dübü le. ¹⁰ Madíseeli lagúnfulirun le laríñagubei Búngiu, luágu yaráfaali

lan lidáani abeichúni luágu figou, aráanseeru jaráwa lun lánchujouún wéwe, áni sun wéwe le mabuídunti lin, chaünwati, ába lagudún. ¹¹ Áu, láu dúna nabásteragüdaün, arúfudei luágu sáansi jumáli lan ligáburu jouúserun, ánjeinti le lúnbei liábin nárigi, labásteragüdübadün láu Sífiri Sándu, áni lafáyeiragüdübadün luágu figou queisi láu wátu geméti. Gabáfuti nuei darí lun madüna nan ni lun narágachunun ligeidin. ¹² Nújeinjaru lichóbulin lújaburugu, larúmadagüdübei türígu, ábame lanúadiruni lídaangiñe sagádi mábeijali. Ábame lareiduni türígu, ábame láguduni sagádi le mábeijali lídan wátu geméti le méñeguchadibei.

Labásterun Jesúsu

(Mr 1.9-11; Lc 3.21-22)

¹³ Dan le liábin Jesúsu Galiléagiñe, ába lachülürün luágun dúna le gírubei Jordán le ñi lubei Juan lun labásteragüdüni. ¹⁴ Májati yebéti Juan labásteragüdüni, ába laríñagun lun Jesúsu.

—Nugúya lúnbei babásteragüdünina, çamürü lubei ñübin nun lun nabásteragüdüniibu?

¹⁵ Ába laríñagun Jesúsu lun.

—Ítara lúba guetó, ladüga lúnti wadügüni le lubeibe Búngiu.

Ába labásteragüdüni Juan Jesúsu, ¹⁶ lárigiñe labásterun Jesúsu, ába láfuridun dúnarugugiñe. Sódini ába lánjunrenchagun siélu, ába laríjini Jesúsu Sífiri Sándu larárirun camá ában únjun liábin luágun. ¹⁷ Ába lagaambún ába umálali siélugiñe le aríñagubei.

—Niraü le jínsiñebei nun le, le áubei oúnwenbun lan nugúndan.

4

Louçhaguni Máfia Jesúsu

(Mr 1.12-13; Lc 4.1-13)

¹ Ába lanügüni Sífiri Sándu Jesúsu lídoun fulásu mageírawati lun louçhaguni Máfia.

² Lárigiñe leréderun Jesúsu bián-wein wéyu lúma bián-wein áriebu meíginga, ába lalámachun. ³ Ábati liábin Máfia lubádun, ába laríñagun lun lun louçhaguni.

—Ánjein liraü bubei Búngiu, salíguagüdebei dübü le feínme.

⁴ Ába loúnabun Jesúsu.

—Taríñajare Lerérun Búngiu. “Mámarügübei táu fein labágarida gürígia, labágariduba giñe láu sun dimúrei le laríñagubei Búngiu.”

⁵ Ábati lanügüni Máfia Jesúsu Jerusaléoun, ubúruge le sándubei joun juríu, ába laweinragüdüni tábulugun témpulu, ⁶ ába laríñagun lun.

—Ánjein liraü bubei Búngiu, chubába yágiñe lun ünabun, ladüga taríñajare Lerérun Búngiu.

Laríñaguba Búngiu joun lání ánjeligu lun jóunigirunibu.

Janügübadibu jájaburugu lun machúgeragun lan bugúdi luágu dübü.

⁷ Ába loúnabuni Jesúsu.

—Aríñagatu giñe Lerérun Búngiu. “Mouçhaguabeí Babúreme Búngiu.”

⁸ Ába lanügüni Máfia Jesúsu luágun ában wübü íñuti, ába larífuduni sun arúejani le ubouágubei lun, lúma buri luweírigin, ⁹ ába laríñagun lun.

—Níchugubei sun le bun ánjabu ájuduragua nun.

10 Ábati lariñagun Jesúsu lun.

—¡Beíba nueí, Máfia! ladüga tariñajare Lerérun Búngiu. “Lúnrüğüba Babúreme Búngiu bájuduragua, lúnrüğüba giñe besériwida.”

11 Ábati ladísedun Máfia lueí, ába jayábin ánjeligu esériwídeí.

Lagúmeseruni Jesúsu luwádigimari, Galiléa

(Mr 1.14-15; Lc 4.14-15)

12 Dan le lagáambunbei Jesúsu luágu níjein lan Juan furísunrugu, ába lídin lárigoún Galiléoun. 13 Merédeti Nazarét, ába lídin agánawa Capernaúm, ában fulásu le lárubei dúna lídan jageíra rása le Zabulón lúma Neftalí.

14 Lasúseredunbei sun le lun lagúnfulirun le labürüjabeí meja Isaias, lé meja proféta.

15 Lageíra Zabulón lúma Neftalí,

lídan úma lubádu barána, lueígiñe oúbaü le ñígiñe lubeí láfuara wéyu libítí Jordán,

Galiléa le ñí lubei jagánawa ja mámabaña juríu.

16 Jugúya lé meja lídaanbei lubúriga aríjaadün ában oúnwenbun larúgounga, jugúya lé meja lídaanbei lamúñounga le lánina oúweni, jarúgoungagüdawaali jáu.

17 Lúmagiñe dan ligía, ába lagúmeserun Jesúsu apúrichija ñí ítara.

—Sáansi jumeí jigáburi, ladüga yaráfaali larúeijan Búngiu.

Lagúarun Jesúsu joun gádürü esénijatiña lun lánime disípulugu

(Mr 1.16-20; Lc 5.1-11)

18 Eíbugeina líña Jesúsu láru láru dúna Galiléa, ligía laríjin bián gamúlenuguátiña, ában jádaangiñe, Simón le méme giríbei Pédro, le ában, Andrés. Esénijani jabágaríbei, jáguruñati. 19 Ábati lariñagun Jesúsu joun.

—Falá jumana, ábame mesénijanjadün lan úduraü, anáajarügaadünme güriña nun lun nánigume.

20 Furése furése ába jígirunun jasénin, ába jóúdin lúma.

21 Lubáruaguoun mémeraü Jesúsu, ábaya laríjin bián gamúlenuguátiña, Jacóbo lúma Juan, lirájüñü Zebedéo. Tídaañanu ában ugúnein lúma jáguchi arámadañoun jasénin. Ába lagúarun Jesúsu joun lun lánime disípulugu,

22 lídan óra ligía ába jígirunun ugúnein, ígira jáguchi, ába jóúdin lúma Jesúsu.

Larúfudajan Jesúsu joun sarágu güriña

(Lc 6.17-19)

23 Ábajeí leíbuguni Jesúsu sun Galiléa arúfudajeina tídan buri jalígílisin juríu to lídaanboun ságü fulásu. Ábaja lapúrichijani ugánu buítí luágu larúeijan Búngiu, areídaguagüda ligía sun luwúyeri sándi le jawáguti güriña. 24 Ába lagaambúniwa luágu Jesúsu lídan sun Síria, ába janügüniña sun ja asúfurirubaña láu ámuñegueinarügü sándi, igárigu, ja gawágubaña lagübüri espíritu, ja goúwejadibaña, jáma ja derégüdaaña úgubu, ába lareídaguagüdüniña. 25 Sarágu jáña güriña afálaruti Galiléagiñe, lídaangiñe buri fulásu Decápolisna, Jerusaléngiñe, loúbawagugiñe Judéa, lúma lueígiñe oúbaü le ñígiñe lubeí labouúcha wéyu libítí Jordán.

1 Dan le laríjnbaliña Jesúsu sun gürígia jagía, ába laweínrun luágun ában wübü, ába lañúurun ñi. Ábati jóundaragun láni disípulugu geyégua láu, ² ába lagúmeserun arúfudaja joun ítara.

3 —Fuleíseiwatün jugúya le asúbudirubalin luágu mégei jumáni lídejan Búngiu lun jadügüni le labúseerubei, ladüga méreengunbei jun lun jebélurun lídoun larúeijan Búngiu siélu.

4 ‘Fuleíseiwatün jugúya le jírupei, ladüga líchuguba Búngiu gurásu jun.

5 ‘Fuleíseiwatün jugúya le ünabugubei, ladüga jerésibirubei le uágubei laríñaga Búngiu luágu líchugubei lan jun.

6 ‘Fuleíseiwatün jugúya le weírubei jabúseerun lúaradagun jabágaridun, ladüga líderagubadün Búngiu lun jadügüni.

7 ‘Fuleíseiwatün jugúya le gudémebabubei, ladüga gudémebadün gíñe lun Búngiu.

8 ‘Fuleíseiwatün jugúya le jarúmabei anígi, ladüga jaríjubei Búngiu.

9 ‘Fuleíseiwatün jugúya le áfaagubei lun jámalijan sun cátei, ladüga lagúarubadün Búngiu queísi lirájüñü.

10 ‘Fuleíseiwatün jugúya le asúfurirubei eíbaajoúni luágu lúaragun jibágari, ladüga jebéluruba lídoun larúeijan Búngiu siélu.

11 ‘Fuleíseiwatün dan le janábagonün gürígia, eíbaaja jamaün, aríñaga jagía sun luwúyeri iyéeni juágu, nueígíñe. ¹² Gúndaañu jumá, ladüga jerésibiruba ában oúnwenbun fáyeiti siélu, ítara líñá meja gíñe jeíbaajoúniwa profétagu ja ñübinbaña jubáragíñe.

Ítara jíña queísi sálu lúma lámpu lun ubouú
(Mr 9.50; Lc 14.34-35)

13 Ába lasígirun Jesúsu aríñaga.

—Ítara jíña quei sálu joun lílana ubouú le lun jeréderuniña luei jagádeirun, ánjein leféridira sálu lubásuan, ¿cábagi un ju lan? Úaalime ju lan ni ca un lueídügüya lun lágurúniwa, ábame jadügüraguni gürígia.

14 Ítara jíña quei lámpu joun lílana ubouú le. Ában ubúruugu le luáguti ában wübü siñáti larámudagun, furáanguti larijoúniwa. ¹⁵ Mebedúnti gíñe ában lámpu lun líchugúniwa tábugíñe ában gáfu, luágu dábula líchugúa lun larúgoungadágüdün jáu sun ja múnadabaña. ¹⁶ Ítara jumá gíñe, durúnguagüda jumei jilámpun jádan gürígia, lun dánme lan jaríjini buíti le jadügübei, ábame gíñe jadímurejan buíti luágu Wáguchi Búngiu le siélubei.

Larúfudajan Jesúsu luágu lilúrudun Moisés

17 ‘Marítagua jumátia luágu niábiña lan agídarei lilúrudun Moisés, ni le jarúfudajabei profétagu, máma niábiña agídarei, niábiña arúfudei líla le tímátimaati. ¹⁸ Ninárün lubeíti jáu luágu njeingua rügáli ligía lan siélu lúma ubouú, magídarúnwabei ni ában púntu, ni ában létüra lídaangiñe lilúrudun Moisés daríme suséreeli le lúnbei lasúseredun. ¹⁹ Ligía, le lubei íchuguti mebéreseni luágu furúmierügü gumádi lídaangiñe lúrudu, íbini le lan ñúraütimaabei lídaangiñe, arúfudaja ligía joun gürígia lun jadügüni líbe le ladügübei, ñúraüraübei lanügüniwa yágüta siélu lídan larúeijan Búngiu. Ánjeinti le ñüdünbei láu sún buri gumádi lídan lúaragun, ítara gíñe larúfudajan, weírubei lanügüniwa yágüta siélu. ²⁰ Nariñajare jun luágu ánjein lan mabuídun ligáburi jóuserun sarágu weíyaasu jawei arúfudajatiña lilúrudun Moisés, jáma fariséogu, mebélubadün lídoun larúeijan Búngiu siélu.

Larúfudajan Jesúsu luágu igáñi
(Lc 12.57-59)

²¹ ‘Agáamba jumáli luágu aríñawagúa lán meja joun binádu jagübürigu lun máfarajan jamá, ladüga furúmieguaügü lan le áfarajati, lagúseragüdüwaba. ²² Wel, naríñajare jun luágu furúmieguaügü lan le agáñiduti lúma gürígia líledi lagúseragüdüwaba. Le anábuti gürígia líledi lagúseragüdübei luweírín-ágei lúrudu, le aríñaguti lun gürígia líledi, “ibídiougua táu”, luáguñein üma lun máfiougatin. ²³ Ítara líña lubeíti, ánjein banüga bedéweejan luágun lání Búngiu latárü, báu ñi ába barítagni luágu níjein lan cátei lídan furúmieguaügü gürígia bubá, ²⁴ Ígirabei le lúnbei bedéweejani ñi ligíbugiñe latárü, ábame bídin aráandara lúma gürígia ligía. Lárigiñemeti, gayárajalíme bagíríbudun luágun latárü íchigei bedéweejan.

²⁵ ‘Ánjein abúseera ában gürígia lanügünibu ligíbugiñoun lúrudu, belúba lídoun úarani lúma luágu jeíbuguniwagu lueí ledégerunibu lun agúseragüdüti, ledégerabume agúseragüdüti lun polisía, ábame badaürün. ²⁶ Ninárün báu, máfuridunbadibu ñigiñe darí bafáyeiruni lagúmujoún gáwanün.

Larúfudajan Jesúsu luágu adultériu

²⁷ ‘Agáambaadün luágu aríñawagúa lán meja. “Magámarida jumá jámari ámu, adultériu líra.” ²⁸ Áu naríñajare jun luágu furúmieguaügü lan le awámadirutu ában würi, adügaali adultériu túma tídan lanígi.

²⁹ ‘Ánjabu lubeíti lafígoungüda bágu le lueígiñebei boúnwenren, sagábei, fíbei díse, buítimaati lun beféridirun ában lídaangiñe umégeguni le buágubei sügü láu bídin láu sun búgubu máfiougatin. ³⁰ Ánjein bújabu lubeí le boúnwenren afigoungüdübadibu, dürübei, fíbei díse, buítimaati lun leféridirün ában lídaangiñe umégeguni le buágubei sügü láu bídin láu sun búgubu máfiougatin.

Larúfudajan Jesúsu luágu ígiraguni
(Mt 19.9; Mr 10.11-12; Lc 16.18)

³¹ ‘Aríñawagúati meja giñe luágu furúmieguaügü lan le ígirutu lúmari lúnti líchugun gárada lánina ígiraguni tun. ³² Áu naríñajare jun luágu furúmieguaügü lan wügüri ígirutu lúmari, ánjein máma lubeí ladüga tagámaridun ligíbuagun, ába taganoún lúma ámu wügüri, adügaüda lumútu furúmiñeti wügüri adultériu. Le giñe agámaridutu würi ígiraguaaru ladügüña giñe adultériu.

Larúfudajan Jesúsu luágu áfiñuruni

³³ ‘Agáambaadün giñe luágu aríñawagúa lán meja joun binádu agübürigu lun jagúnfulirun láu le jaríñagubei láu áfiñuruni ligíbugiñe Búngiu. ³⁴ Áu naríñajare jun luágu moún lumuti lan jáfiñurun ni ca uágu—ni luágu siélu ladüga ñi lan lañúura Búngiu, ³⁵ ni luágu múa ladüga ñi lan líchigei Búngiu lugúdi, ni luágu Jerusalén ladüga ligía lubúrugutebei Warúeite Búngiu le weírigubei, ³⁶ ni luágu jichügü ladüga siñáti ni jájarudagüdüni jáuridagüdüni ában ídiburi. ³⁷ Aríñagarügü jumá “ánja” o “uá”, máfiñurunga ni ca uágu, ámu cátei lueí líra lúmagiñeti Máfía.

Larúfudajan Jesúsu luágu láguyugüdüniwa wuríbani
(Lc 6.29-30)

³⁸ ‘Agáambaadün luágu aríñawagúa lán meja. “Águu luágu águu, ári luágu ári.” ³⁹ Áu nariñajare jun lun máguyugüdün jumá wuríbani luágu wuríbani, lubáragiñe líra, ánjein íchiga mútu agúfudein luágu ában louba jigíbu, rúya jumei le ában oubaü lun. ⁴⁰ Le áluguti lanügünün ligíbugiñoun lúruđu tueigiñe jisímisin, ígira jumei lun giñe lanügünun jabíte. ⁴¹ Ánjaün lafósura ában gürígia lun janügün ában anügüni ában máili, barüjumei bián máili. ⁴² Furúmieguaügü le amúriajati ában cátei júma, rújumei lun, míchiga jumei giñe janágan luágun le afúredeijati júma.

Ísiñejabuni joun áganiñu
(Lc 6.27-28, 32-36)

⁴³ ‘Agáambaadün giñe luágu aríñawagúa lán meja. “Jínsiñelá bumáda bun, liyéeregudame bágani bun.” ⁴⁴ Áu nariñajare jun. Jínsiñe jamá jáganiñu jun, buidulá jayúmajan jabá ja wuríbabei jayúmajan jubá, adüga jumá buíti joun ja iyéerejabúbaña jun, ayúmuragua jumá lun Búngiu jawágu ja anábagubadün, ja wuríbabei ouserunün. ⁴⁵ Ítara lúba jagáburiduña lan queísi lirájüñü Júguchi Búngiu le siélubei, ligía oúnaja lumúti wéyu joun buítiña jáma wuríbatíña, oúnajaleí júya dándu joun múaraantiña queísi joun úaratiña. ⁴⁶ Ánjein já rügübaña lubei jínsiñejabúbaña jun ínsiñeda jun, ¿cábago fáyeiti jerésibira luágu líra? Adüga jamúti giñe ja agúburajabalin liseínsuna gumádi itara. ⁴⁷ Ánjein jóun rügüñein lubei jumádagu jayoúragua, ¿ca buíti jadügübei láu líra? Íbini ja ibídiñejabubaña lun Búngiu adüga jamúti líra. ⁴⁸ Úaragua jumá le gumúti queísi úaragua lan Júguchi Búngiu le siélubei.

6

Larúfudajan Jesúsu luágu ladügiñ cátei buíti

¹ Ába lasígirun Jesúsu arúfudaja joun gürígia wübüwaügügiñe, laríñaga. —Touñigi jumá lueí jadügün cátei buíti jagíbugiñe gürígia lúnrügü jaríjinün. Ánjein jadüga itara, míchubei Júguchi Búngiu le siélubei fáyeiti buíti jun. ² Ligía, dánme lubei jíderagun ában gudémeti, masúbudiragüda jumei lun sun ubou quei jadüga ja biánguabaña igíbu ligílisirugu lúma úmadarugu. Jagía, jadügüni líra lúnrügü jadímurejan gürígia buíđu jawágu. Ninárün jáu luágu láu lan jadügüni líra, ibíja jamáali jafáyeiruája. ³ Dan le jíchugun ában cátei lun gudémeti, masúbudiraleí ni lubuídun-ágei jumáda, ⁴ adüga jumei lábugiñe libídiñewa. Júguchi Búngiu le aríjubalin le jadügübei lábugiñe libídiñewa, líchuguba jafáyeiruája.

Larúfudajan Jesúsu luágu ligáburu ayúmuraguni lun Búngiu
(Lc 11.2-4)

⁵ ‘Dan giñe le jayúmuragun lun Búngiu, mítaran jumá quei ja biánguabaña igíbu ja jínsiñebeí joun lun jayúmuragun rára tídan jalígílisin juríu lúma lídan legéyedun úma lun jaríjiniña gürígia. Ninárün jáu luágu láu lan jadügüni líra ibíja jamáali jafáyeiruája. ⁶ Dan le jayúmuragun lun Búngiu, belújuma jirúmurugun, darú jumeíme jubéneri, ábame jayúmuragun lun Júguchi Búngiu le lábuguabei júma ñi. Júguchimeti Búngiu, le aríjubalin le jadügübei lídan límanin, líchuguba jafáyeiruája. ⁷ Lídan le jayúmuragun, máguyuguagüda jumá luágu dimúrei le málati quei jadüga ja ibídiñejabubaña lun Búngiu, jarítaguatiñati luágu lagáambubaña lan Búngiu ladüga líbe jadímurejan.

8 Mítaran jumá lubeíti quei jagía, ladüga lubáragiñe jayúmuragun lun Búngiu subúdi láali ca lan jabúseerubei. 9 Ítara lúba lubeíti jayúmuragun.

Wáguchi Búngiu le siélubei,
inébewalá bíri.

10 Nübinlá bidáani lun barúeijan ya ubouágu,
adügüwalá bugúndan ubouágu quei ladügüniwa bugúndan siélu.

11 Rúba fein buídurügütu woun lun wéyu le ugúñebei,

12 ferúdnabei wuríbati le adüga wamáalibei quei ferúduna wamániña ja
adügübaña wuríbati woun.

13 Mígira báwa lun wáburujan lídoun wuríbani,
dísegüdarügü báwa lueí,

ladüga amürü le arúejabei, amürü le Súntibei Gabáfu, amürü le weírigubei
lun sun dan. Ítaralá.

14 Ítara líña lubeíti, ánjaña ferúduna jumá ámu luágu wuríbati le adüga
jamáalibei jun, ferúduna lubádün giñe Júguchi Búngiu le siélubei, 15 ánjein
úa ferúduna jumá ámu, úabei giñe ferúduna láani Júguchi Búngiu jífigoun.

Larúfudajan Jesúsu luágu ayúnaruni

16 Ába laríñagun Jesúsu.

—Jugúya, dánme le jayúnarun, marúfuda jumá lírun igíbu quei jadüga
biángua tigíbu, jagía jadügünbalin ítara lun jaríjini gürígia luágu jayúnaruña
lan. Ninárün jáu luágu láu lan jadügüni líra ibíja jamáali jafáyeiruája.

17 Ánjein jugúya, dan le jayúnarun, amúriga jumeí jídiburi, chibá jumeíme
jigíbu, 18 meféen jamámuga gürígia luágu jayúnaruña lan. Júguchirügüba
Búngiu le júmabei ñi geféen luágu jayúnaruña lan, ábameti líchugun
jafáyeiruája.

Irisini siélu

(Lc 12.33-34)

19 Moúndaragua jumá irisini ya ubouágu le ñi lubei gayára lan jájüchün
jamútiri áni gayára ligía lagájüdüñ ámu luwúyeri irisini, le giñe ñíjin lubeí
gayára lan jebélurun jíwerutiña lun jíwerujan. 20 Oúndaragua jumá irisini
siélu, le ñi lubei siña lan jájüchün jamútiri, magájüdadadi ni cáta, mebélú
jagía jíwerutiña íweruja ñi. 21 Le ñi lumuti jirisin, ñíñoun giñe janígi.

Lilámpun úgubu

(Lc 11.34-36)

22 Ítara líña bágu quei ában lámpu lun búgubu, ánjein lubeíti buídu lubeí
bágu, aríja ligía luágun irisini siélu, camá jamuga jarúgoungabei giñe láu
sun búgubu, áni buídubei giñe sun bigáburi. 23 Ánjein sándi lubeí bágu,
aríja ligía luágun irisini ya ubouágu, camá jamuga lídaanbei lubúriga sun
búgubu, áni wuríbabei giñe bigáburi. Ánjein nübin larúgounga le bídaanbei
lun lubúrigame, ¡luweírín méfuna líwurin lubúriga ligía!

Búngiu lúma seínsu

(Lc 16.13)

24 Úati ni ában gayáraati lesériwidun joun biáma iyúbudirigu, ladüga
lísiñeduba ában jádaangiñe lun, liyéreegudáme le ában lun, úaraguabei lúma
ában jádaangiñe, líchigame mebéreseni luágu le ában. Siñáti lesériwidúniwa
lun Búngiu lúma lun seínsu.

*Touñigi lumútiña Búngiu lirájüñü**(Lc 12.22-31)*

²⁵ ‘Nariñajare lubeíti jun, madíjeri jumá luágu cába lan jeíga o cába lan játa lun jabágaridun, ni tuágu anáanguni to lúnboun jadáürunun. ¿Máfunagi gebégitimaati ibágarí sügü láu eíginí, gebégi úgubu sügü táu anáanguni?

²⁶ Aríja jumá joun dunúru ja ájamajabaña garábalirugu. mábunagun jáña, malúbajan, mareídun jameí alúbajani lídan lágei, láu sun líra, rúti Júguchi le siélubei eíginí joun. ¡Sarágu gebégitima jumá sügü jáu dunúru!

²⁷ ¿Cáteigi jídaangiñe gayáraabei líchugun bián ugúdi lánwoun lúgubu, ca lan lanárimebei láfaagun luágu?

²⁸ ¿Ca uágu jadíjerida tuágu anáanguni? Aríja jumá ída líña lan laweinamudun fulúri. láu sun mawádigimari lan, madügün ligía gamísa,

²⁹ ni méja urúei Salomón láu sun luwéndegun, mawéndentí meja ladáüragun quei fulúri. ³⁰ Anjeinti daúguagüda lubálin Búngiu jíduru ítara le ugúñebei lájúcha, jarúgabei yebe lagudúña, ¿gúbumesan líderaguajün loúgua taffínen jugúya le?

³¹ Madíjerida jumá lubeíti aríñaga. “¿Cába weíga?” o “¿Cába wáta?” o “¿Cába wadáura?” ³² Gürígia ja lánigu ubou le, luágu rügüñeín buri cátei le jarítagua, ánjein jugúya, níjein júguchi Búngiu siélu le subúdijabúbei cátei lan jemegeirubei. ³³ Seríwi jumá lun Búngiu furúmiñe, áluaja jumeí ibágarí surúti le áubei lagúndaara, ábame líchuguni sun le jemegeirubei jun. ³⁴ Madíjerida jumá lubeíti luágu jarúga, ladúga barü lumuti giñe jarúga lidíjeridüna lúmagua. Ságu ában wéyu gibeti cátei lun.

7*Míchiga jumá jadúnrun ámu**(Lc 6.37-38, 41-42)*

¹ Ába lasígirun Jesúsu aríñaga joun gürígia wübüwaügügiñe.

—Míchiga jumá jadúnrun ámu, míchugun lámuga giñe Búngiu jidúnrun, ²ladúga quei ligáburí jíchugun jadúnrun ámu, ítara lúba giñe líchugun Búngiu jidúnrun, le áubei jamísuraja, láuba giñe lamísurajaün Búngiu. ³ ¿Ída lubásan gayára lan jaríjini liraúraü ífei le lídaanbei lágu jamúlen áni masándi jumúti durúsu le lídaanbei jágu? ⁴ ¿O ída lúba gayára lan jaríñagun lun jamúlen. “Sagáneí liraúraü ífei le lídaanbei bágu,” áni níjein ában durúsu lídan jágu?

⁵ ¡Biángua tigíbu jugúya le! Sagájumei durúsu le lídaanbei jágu furúmiñe, ítara lúba gayára lan jaríjin buídu lun jaságaruni liraúraü ífei le lídaanbei lágu jamúlen.

⁶ Míchiga jumeí arúfudajani luáguti asálbaruni joun gürígia ja gáñitiña, garábagua jáñein juágun quei oúnli lun jágürünün. Míchiga jumeí giñe arúfudajani ligía le gebégibeí sarágu joun gürígia ja büürjuduátiña, dügúgua jañálin.

*Agáamba lumúti Búngiu wamúriajan lúma**(Lc 11.9-13, 6.31)*

⁷ Jamúriaja lúma Búngiu, ábame líchugun jun, jáluaja, ábame jadárirun, daünjuma luágu béna, ábame lánjunrenchún jun. ⁸ Ladúga le amúriajati, abíjati, le áluguti, daríti, le adaünjati luágu béna, jurénwati lun.

⁹ ¿Níjein funági ában jídaangiñe gayáraati líchugun ában dübü lun lisáni dan le lamúriajan fein lúma? ¹⁰ ¿o líchugun lan ában jéwe lun dan le lamúriajan úduraü lúma? ¹¹ Anjein lubeíti láu lubeí sun wuríba jumá,

gíchigaditün cátei buíti joun jisáanigu, igúbuméti líchiga Júguchi Búngiu le siélubei cátei buíti joun ja amúriajatiña lúma!

¹² ‘Súnwandanlá lubeíti jadügün joun ámu quei le jabúseerubei lun jadügüni jun, ladüga ligía laríñagubei lilúrudun Moisés túma jalíburun profétagu.

*Bürüraüti lubéneri siélu
(Lc 13.24)*

¹³ ‘Belújuma lídaangiñe béna le бүрүрәүбәи. Béna lúma üma le anügübei gürígia lídoun féridi, tuléburi líña, gabáranouga ñi, áni sarágu jáña ebélurutiña lídaangiñe. ¹⁴ Ánjeinti béna lúma üma le anügübei gürígia lídoun íbágari le magúmuchaditi, бүрүрәү líña, murúgua, míbetiñati adáriruti.

*Luágu cátei le wadügübei lasúbudirúa cátawa lan
(Lc 6.43-44)*

¹⁵ ‘Toúnigi jumá jawéi yéetiña ja aríñagubaña luágu lerérun lan Búngiu jadímureja. Jayábin jun quei mudún bougudigiñe jabíti, ánjein múnadagiñe, ítara jáña quei anímaalu gáñitiña. ¹⁶ Jugúya, gayáraabei jasúbudiruniña luágu le jadügübei, malúbajoúntu beíbei lídaangiñe jíyu, ni ígo lídaangiñe guríbiyuwa. ¹⁷ Sun lubeíti wéwe le buíti, buíti lin, wéwe le wuribati, wuribati lin. ¹⁸ Wéwe le buíti, siñáti wuríba lan lin, wéwe le wuribati, siñáti giñe buídu lan lin. ¹⁹ Sun wéwe le mabuíduntí lin, chaúnwati, ába lágudúniwa. ²⁰ Jasúbudirubaña lubeíti yéetiña jagía luágu le jadügübei.

*Másubaña ebélura lídoun arúejani le siélubei
(Lc 13.25-27)*

²¹ ‘Máma sun ja aríñagutiña nun. “Nabúreme, Nabúreme,” jebéluruba lídoun arúejani le siélubei,’ líña Jesús. ‘Ja rügübaña adügübalin lugúndan Núguchi Búngiu le siélubei ebélura. ²² Dánme lachülürün wéyu lánina agúseragüdüni, sarágubaña aríñagutiña nun. “Wabúreme, Wabúreme, apúrichijatiwa mejátia luágu bíri, sagá wagía espíritugu wuríbatíña lídan bíri, adüga wagía sarágu miláguru lídan bíri.” ²³ Ábamei naríñagun joun. “Íbídiñegubeiñadün nun, díse jumá nueí, jugúya le adüga jumáalibeí le wuríbabeí.”

*Jawúyeri gürígia ja agáambubalin lerérun Búngiu
(Lc 6.47-49; Mr 1.22)*

²⁴ ‘Le agáambutina, adügaleí le nubeíbei, ítara líña quei ában wügüri gunfaráandati le adügübei lúban ligíbuagu dübü. ²⁵ Ába liábingua júya, ába liñúrun dúna, fúgua garábali tuágun múna tugúya, meíguaduntu ladüga luáguñein lan dübü tuágaburi. ²⁶ Ánjeinti le agáambutina, madügün lumúti le nubeíbei, ában wügüri íbídiouguwa táu ligía, le ábunagubei ligíbuagu ságoun. ²⁷ Ába liábingua júya, iñúra dúna, fúgua garábali tuágun múna tugúya, jma lanárimé táburujan!

²⁸ Dan lásurun ladímurejan Jesús, jma luweírin janígi gürígia láu le larúfudajabei! ²⁹ ladüga láu lan ubáfu larúfudaja, máma quei arúfudajatiña lilúrudun Moisés.

8

*Lareídaguagüdüni Jesús ában gawáguti gumeín le mareídaguadibeí
(Mr 1.40-45; Lc 5.12-16)*

¹ Dan le larárirunbei Jesúsu lueígiñe wübü, sarágu jáña gürígia afálaruti.

² Ába liábin ában wügüri gawáguti gumeín le mareídaguadibei, ába lájuduragun ligíbugiñe Jesúsu, ába laríñagun lun.

—Nabúreme, ánjabu busén, gayáraati bareídaguágüdünina.

³ Ábati lagúurun Jesúsu luágu láu lújabu, aríñageina ligía.

—Buséntina, areídaguagüda numútibu.

Quei laríñagun ítara, ába lareídagun sánditi ligía. ⁴ Ába laríñagun Jesúsu lun.

—Maríñaga beítia ni ca un, ñüdünrügübá arúfudagua búngua lun fádiri, rubeíme edéweejani le uágubei laríñaga Moisés, lun jaríjini gürígia luágu areídaguadibu lan.

Lareídaguagüdüni Jesúsu lumúsun ában gumándan Rómana
(Lc 7.1-10)

⁵ Dan le lebélorun Jesúsu lídoun fulásu le gíribei Capernaúm, ába liábin ában gumándan Rómana lubároun, ⁶ ába layúmuragun lun ítara.

—Nabúreme, níjein numúsun roun láu sándi le derégüdaü, lúma sarágu gáriti luágu.

⁷ Ába laríñagun Jesúsu lun.

—Neíbuga agáranija lun.

⁸ Ába loúnabun gumándan.

—Nabúreme, madúnatina lun bebélorun núbiñoun, aríñagarügübeí dimúrei, ábame lareídagun numúsun. ⁹ Naríñagubaalin líra ladüga nugúya lábugiñeñadina gíñe gumádi le íñutimaati, áni añájein gíñe sudaara lábugiñe nagúmadijan. Dan le naríñagun lun ában jádaangiñe lun lídin, ñüdünti, dan le naríñagun lun ában lun liábin, ñübinti, dan le naríñagun lun numúsun lun ladügün furúmieguarügü cátei, adüga lumúti. Ítara lúba, luágu berérun mósu lídin sándi lueí numúsun.

¹⁰ Dan le lagáambunbalin Jesúsu le laríñagubei gumándan ligía ába laweíridun lanígi, ába laríñagun joun ja afálarubalin.

—Nínárün jáu luágu madárigidina lan wügüri weíri tafíñen ni jádan numútuniña Israelítagu quei wügüri le. ¹¹ Naríñajare jun luágu sarágujaba lan já meja ibídiñejabubaña lun Búngiu ñübintiña lueígiñe oúbaü le ñígiñe lubeí labouúcha wéyu, jáma le ñígiñe lubeí lálüda, ábame jañúurun eíga lúma Abrahám, Isáac lúma Jacób lídan arúejani le lánina siélu. ¹² Ánjeinti já yebe lúnbaña lídan jamá arúejani ligía jaságarúba bougudín, ábame jádarúniwa lídoun luweírín-ágei lubúriga, ábame jayájuajan, ábame lacünrinjan jári le luweírín jagárigu.

¹³ Ába laríñagun Jesúsu lun gumándan ligía.

—Beíba búbiñoun, le uágubei bafíñera, ladügüba bun.

Ába lareídagun músu ligía lídan óra ligía.

Lareídaguagüdünun Jesúsu límenidi Pédro
(Mr 1.29-31; Lc 4.38-39)

¹⁴ Ába lídin Jesúsu lúbiñe Pédro, ába ladárirunun límenidi Pédro roun láu abíruaü. ¹⁵ Ába lagúurun luágu tújabu, ába lagídarun abíruaü tueí, ába tásaarun, ába tagúmeserun eseríwidaña.

Lareídaguagüdünn Jesúsu sarágu sánditiña
(Mr 1.32-34; Lc 4.40-41)

16 Dan le lagúñedunbei, ába janügün sarágu gürígia ja gawágutiña espíritugu wuríbatiña lun Jesúsu, ába laságajaniña espíritugu wuríbatiña jagía jawei láurügü ában dimúrei, areídaguagüda láña sun ja sándibaña. 17 Lasúseredunbei sun le lun lagúnfulirun lé meja uágubei ladímureja proféta Isaías dan le laríñagunbei luágu Jesúsu. “Barü lumuti wadébilin, gidálei wasándigu.”

Já yebe abúseerubaña jafálaruni Jesúsu
(Lc 9.57-62)

18 Dan le laríjin Jesúsu luágu sarágu jáña lan gürígia geyégu láu, ába líchugun dimúrei lun jájiñuragun ligía jáma láni disípulugu loubáfurugun dúna. 19 Ába layárafadun ában arúfudajati lilürudun Moisés lun Jesúsu, ába laríñagun lun.

—Maésturu, buséntina nafálarunibu le ñíjin lumúti bídin.

20 Ába loúnabuni Jesúsu.

—Darítiña gasígamu júyu lun jaganouñ ñi, gádibutiña gríñe dunúru, ánjeinti áu le Wügüri Garaüwarügüti, madáritina ni jalába lan nabálachagüdei nichügü.

21 Laríñaga ában jádaangiñe láni disípulugu lun.

—Nabüreme, buséntina nafálarunibu, lárigiñeme loúnwen nüguchi, buná neíme, ábame nafálarunibu.

22 Ába loúnabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburu.

Lagálumaruni Jesúsu garábali lúma lugúdi barána
(Mr 4.35-41; Lc 8.22-25)

23 Ába ládinin Jesúsu tídoun ugúnein, ába jóúdin láni disípulugu lúma. 24 Sódini ába láfuragun ában garábali jéreti, ába lebélujan lugúdi barána tídoun ugúnein. Larúmuguñati Jesúsu. 25 Ába jagágudajani láni disípulugu, ába jaríñagun lun.

—¡Wabüreme, séfu báwa! ¡Wadíbiragua!

26 Ába loúnabuniña,

—¿Cásan uágu janúfudeda? ¡Loúgua tafíñen jugúya le!

Ába lásaarun, ába ladeíñan lun garábali lúma barána, ába lagálumadun.

27 Ába laweíridun janígi, ába jaríñagun.

—¿Cáteisan wügüri le, agáamba lubálin garábali lúma barána?

Laságarun Jesúsu espíritugu wuríbatiña jádaangiñe bián wügüriña Gadárana
(Mr 5.1-20; Lc 8.26-39)

28 Dan le lachülürün Jesúsu loubáfurugu dúna, jageíroun Gadárana, ába jáfuridun bián wügüriña lídaangiñe buri umúajaü achigíti luágu dübü, ába jayábin luágun. Biángubei jagía, jáuñanu espíritugu wuríbatiña áni janárimetiti jagáñi darí lun siñá lan jásügürün gürígia lídaangiñe üma ligía.

29 Ábati jagúarajan ítara.

—¿Cásan uágu bemétera wámoun, Jesúsu Liraü Búngiu? ¿Biábiña asúfuriragüdawa lubáragiñe dan le lánina asúfuriruni?

30 Ñíñanu sarágu büüruju eíga madíse ñígiñe, 31 ába jayúmuragun espíritugu wuríbatiña ja lun Jesúsu, jaríñaga lun.

—Ánjawa baságara, ígirabá lun webélurun jádoun büüruju ja.

32 Ába laríñagun Jesúsu joun.

—Jelbati jádoun!

Ába jáfuridun espíritugu wuríbatíña jagía jádaangiñe wügüríña jagía, ába jebélurun jádoun büüruju, ába jáguragun büüruju jagía jóungua lueígiñe ában gudúungu, ába jáburujan dúnarugun, ába jañáradagun.

³³ Ába janúfudedagun ja óunigirubaliña büüruju, ába jeíbaagun, jachülün aüdübü, ába jabájüdaguni le asúseredubei joun büüruju lúma joun wügüríña já buga jáubaña espíritugu wuríbatíña. ³⁴ Abati jayábin sun lílana fulásu ligía lúmoun Jesúsu, ába jayúmuragun lun lun láfuridun jageiragiñe.

9

Lareídaguagüdüin Jesúsu ában wügüri derégüdaali
(Mr 2.1-12; Lc 5.17-26)

¹ Abati ládinun Jesúsu tídoun ugúnein tugúya, ába lánjiñuragun loubáfurugun dúna, ába lachülürün lageíroun. ² Ába janügün ában wügüri derégüdaali lun, roun tídan lubárari. Dan le laríjinbalin Jesúsu luweírin jafíñen, ába laríñagun lun sánditi ligía.

—Ragüba gurásu, niraü, ferúdunawati bifígoun.

³ Níñanuti jádaangiñe arúfudajatiña lilürudun Moisés, aríñagutiña jóunguarügü. “Lanábaguñeigan wügüri le Búngiu láu dimúrei le laríñagubei.” ⁴ Queíti subúdi lubálin Jesúsu le uágubei jasáminara, ába laríñagun joun.

—¿Cásan uágu luríbanbei jisáminan ítara? ⁵ ¿Cátimasan ménreengúnbei laríñawagúniwa. “Ferúdunawati bifígoun”, ódi “Sarába, beíbuga”? ⁶ Narúfudaaliti jun luágu gabáfu nan, áu le Wügüri Garaüwarügüti, lun ferúduna nan figóu.

Ába laríñagun lun sánditi ligía.

—Sarába, budáboun bubárari, beíba búbiñoun.

⁷ Ába lásaarun sánditi ligía, ába lídin lúbiñoun. ⁸ Dan le jaríjinbaalin gürígia cátei le, ába laweíridun janígi, ába jadímurejan buíti luágu Búngiu luágu líchuguni ubáfu le joun wügüríña.

Lagúarun Jesúsu lun Matéo lun lánime disípulu
(Mr 2.13-17; Lc 5.27-32)

⁹ Ába lídin Jesúsu ñígiñe, ába laríjinina, áu le giríbei Matéo, le abürüjabarun líburu to. Agúburajatina meja liseínsuna gumádi, ñun níña lídan nubára lánina agúburajani wéyu ligía dán le lásügürünbei Jesúsu ñígiñe. Ába laríñagun nun.

—Falábana, queímoun núma queísi náni disípulu.

Ába násaarun, ába nafálaruni.

¹⁰ Lárigiñe, ñun líña Jesúsu eíga, sarágu jáña giñéti ja agúburajabalin liseínsuna gumádi jáma ámu gafígountiña eíga lúma úara jáma láni disípulugu. ¹¹ Dánti le jaríjini fariséogu cátei le, ába jaríñagun joun láni Jesúsu disípulugu.

—¿Ída liñásan leíginbei jumáesturun jáma agúburajatiña liseínsuna gumádi lúma jáma ámu gafígountiña?

¹² Ába lagáambuni Jesúsu, ába laríñagun joun.

—Ja magádiebaña mabúseeruntiña surúsia, ja sándibaña, jagía busénbaña surúsia. ¹³ Furéndeí jumeí ca lan laníchigubei le uágubei laríñaga Búngiu tídan Lerérun. “Buséntina lun gudémejabu jumá, máma lun jadágaragüdüin

anímaalu nun.” Mára níabiña álujajaña ja magádiebaña ligíbugiñe Búngiu, níabiña álujajaña gafígountiña lun jasáansiruni ligáburi jóuserun.

Jálügüdüni Jesúsu libügürü ayúnaruni
(Mr 2.18-22; Lc 5.33-39)

¹⁴ Ábati jayábin ja láni Juan le abásteragüdejabei disípulugu, ába jaríñagun lun Jesúsu.

—¿Ánsan wagía jáma fariséogu ayúnara wabeí sarágu, ánjaña báni disípulugu mayúnaruntiña?

¹⁵ Ába líchuguni Jesúsu jémpulu le joun luágu iséri larífudajan lúma binádu, laríñaga.

—¿Gayáraati funági jírúñu jamá ja amísurajoúbaña lídoun ában maríei dan le niján lan adári jáma ñi? Lachülürüba wéyu lun lúadun adári jáma, ligíaalime jayúnarun.

¹⁶ ‘Siñáti táfadajóun gamísa ñulújaru táu murúsun to derégiru ladüga dánme le tacháwaragun to derégiruboun ábame tajeíridagun to ñulújaruboun, ábatimámeti laweíridun jeíríti. ¹⁷ Siñáti gíñe léserúniwa bínu le isérigili lídoun guéru le binádujali, ánjein adügüwa ítara, ábame lafaüñchün guéru dánme le líñúrún bínu, fériwiwa ligíameti guéru, fériwiwa bínu. Ligía lúnti lubeí léserúniwa bínu iséri lídoun guéru iséri, ítara lúba lesériwidun biángubei.

Liraiü Jáiro túma würi to agúurubarun lanáangun Jesúsu
(Mr 5.21-43; Lc 8.40-56)

¹⁸ Dan ñíñein lan Jesúsu arífudajei sún buri cátei le, ligía liábin ában ábuti jádaangiñe juríu, ába lájuduragun ligíbugiñe, ába laríñagun lun.

—Sun líña toúnwen nisáani, ánjabu ñüdüun lun bíchuguni bújabu tuágu, táguyuguba.

¹⁹ Ába lásaarun Jesúsu, ába lídin lúma ñi jáma láni disípulugu. ²⁰ Níñiñounti ában würi ümada sánditu, dúusu irúmu táu láu lésejan jítaü tídaangiñe, ába tayárafadun lun Jesúsu lanáangiñe, ába tagúurun luágu táru lanáangun, ²¹ taríñaga túnguarügü. “Láurügü nagúurun tuágu lanáangun nareídaguba.”

²² Ába lagáraragun Jesúsu, ába laríjinun, ába laríñagun tun.

—Ragüba gurásu niraü, areídaguaadibu ladüga baffíñen.

Lúmagiñe óra ligía ába tareídagun.

²³ Dan le lachülürün Jesúsu lúbiñoun buga ábuti ligía, dan le laríjiniña íñaajatiña aráanseña lun ábunajani, añája gürígia areíncha, ²⁴ ába laríñagun joun.

—Furíjuma yágiñe, moúnwengiru irájü to, tarúmuguña.

Ába jéjerajan láu. ²⁵ Dan le furígüda láaña sun gürígia, ába lebéllurun, ába lárügüdüni tújabu irájü tugúya, ába tásaarun. ²⁶ Ába labúruchagun luágu le asúseredubei lídan sun fulásu ligía.

Lareídaguaqudüun Jesúsu bián maríjintiña

²⁷ Dan láfuridun Jesúsu ñígiñe, ába jóudin bián wügüríña maríjintiña lárigi, agúarajeina ítara.

—¡Gudéme wamá bun, amürü le ladügawagun Davíd!

²⁸ Dan lebéllurun Jesúsu múnadoun, ába jachülürün maríjintiña jagía lúmoun, ába laríñagun joun.

—¿Afíñetün luágu gayára lan nareídaguaqudüünün?

Ába jaríñagun.

—Ánja, afíñetiwa, Wabúreme.

²⁹ Ába lagúuruni Jesúsu jágu, ába laríñagun joun.

—Ítaralá quei ligáburi jafíñen.

³⁰ Ába léfegechun jágu, ába léredun Jesúsu jawágu lun jouchun lun masúbudirúniwa lan luágu ligía lan agáranijabei joun.

³¹ Quei jáfuridun ñígiñe, ába jabájüdaguni le ladügübei Jesúsu lídan sun fulásu geyégua láu.

Lareídaguagüdüñ Jesúsu ában meréngaditi

³² Dan le áfurideina jamá, ligía jayábin fiú gürígia láu ában wügüri meréngaditi, gawáguti ában espíritugu wuríbati, ába jayábin láu lun Jesúsu.

³³ Lárigiñe laságaruni Jesúsu espíritugu wuríbati ligía lueí meréngaditi ligía, ába lagúmeserun adímureja. Ába laweíridun janígi gürígia, ába jaríñagun.

—Maríjinañágidiwa líbe le jageíra Israelítugu.

³⁴ Jaríñagaídan sun fulásu geyégua ti fariséogu luágu láu lan lubáfu Máfia le jábuti espíritugu wuríbatiña laságaja Jesúsu espíritugu wuríbatiña.

Lugúdemejabu Jesúsu joun gürígia

³⁵ Eíbuga lumúti meja Jesúsu sun fulásu arúfudajeina tídan jalígilisin juríu, apúrichijeí ugánu buíti luáguti arúeijani le lánina siélu, areídaguagüdeina sun luwúyeri sándi lúma gáriti. ³⁶ Dan laríjiniña gürígia, ába jagúdemedagun lun, ladüga nidíjeri jamá, magúraasun jagía, camá mudún ja mouñiritiña. ³⁷ Ába laríñagun joun láni disípulugu jabügürü gürígia jagía.

—Sarágu jáña gürígia buséntiña jagáambuni ugánu luáguti asálbaruni, ítara jáña quei nádü lun lalúbajoún, áni louguatiña ñadágimeintiña. ³⁸ Lúnti lubeíti jamúriajan lúma Labúreme nádü lun louñajan ñadágimeintiña lun japúrichijan joun.

10

Láni Jesúsu dúusu disípulugu

(Mr 3.13-19; Lc 6.12-16)

¹ Ába lagúarun Jesúsu joun dúusu láni disípulugu, ába líchugun ubáfu joun lun gayára lan jaságajan espíritugu wuríbatiña jaweí gürígia lúma lun jareídaguagüdüñ sun luwúyeri sándi lúma gáriti. ² Niján jíri dúusu láni Jesúsu disípulugu jagía. Furúmiñeti, Simón le méme gíribei Pédro, lúma Andrés le lamúlen, Jacóbo lúma Juan le lamúlen—lirájüñü Zebedéo, ³ Felípe, Bartolomé, Tomás, núma, áu Matéo le agúburajabei meja liseínsuna gumádi, Jacóbo le liraü Álfeo, Lébeo, le méme gíribei Tadéo, ⁴ Simón—ában meja wügüri áfaaguti lun jawáanserun juríu, lúma Júdas Iscarióte, le alúgurubalin Jesúsu.

Louñajaniña Jesúsu disípulugu apúrichija

(Mr 6.7-13; Lc 9.1-6)

⁵ Dan louñajabaliña Jesúsu dúusu ja apúrichija, ába laríñagun joun ítara.

—Mídin jumá le ñí jamuti ja mámabaña juríu, mebélu jugúyame lídoun buri fulásu le láni Samária, ⁶ jabügürülá gürígia féridijaña ja Israelítugu jídin. ⁷ Jeíba, apúrichijeina luágu yaráfaali lan larúeijan Búngiu. ⁸ Areídaguagüda jumáña ja gawágutiña gumeín luágu jára, jáma ja gawágutiña ámu luwúyeri sándi, sarágüda jumá jiláaña, sagá jumáña espíritugu wuríbatiña. Mafáyeijántün lun jibíjini ubáfu le, magúburaja jumá gíñe luágu.

⁹ ‘Manüga jumá seínsu, ¹⁰ manügün jugúyame lágei ni cáta. Ábanrügütá simísí janüga, manügün jugúyame sabádu ni bádun, ladüga le ñadágimeinbei garíchatí lun leígin lídaangiñe luwádigimari.

¹¹ ‘Dánme le jachülürün lídoun ában ubúruğu o ában lan liraüraü fulásu, ábame jálugun gürígia ja ánjatiña lun jerésibirunün ñi, ábame jeréderun jáma jábiñe darí jídin. ¹² Dánme jebélurun tídoun ában múna, ábame jabúsurun, ayúmuragueina magádiei jawágu tílana múna tugúya. ¹³ Ánjaün jerésibira tílana múna tugúya, ígira jumeí jabúsurun jáma, ánjaün merésibirun jamá, giríbugüda jumeí busúguaü ligía lun úa lan magádiei joun. ¹⁴ Ánjaünti merésibirun jamá, mája jagía jagáambunün, ábame jáfuridun tídaangiñe múna tugúya o lídaangiñe lan fulásu ligía, ábame jáfuruduni calíqui lueígiñe jugúdi lun jarúfuduni luágu mabuídun lan jagáburi gürígia jagía, ígira jumáña quei jadáriragun jóungua. ¹⁵ Ninárün jáu luágu dánme lan le lachülürün wéyu lánina agúseruni, weíritimaabei jasúfurirun lílana fulásu ligía sügü láu jasúfurirun lílana Sodóma lúma Gomórra.

Eíbaajoúni le lúnbei jasúfuriruni lání Jesúsu disípulugu

¹⁶ ‘Noúnajaadüntia quei mudún jagánaguóun anímaalu gáñitiña. Aráanseñu jumá lubeiti ítara quei jéwe, áni ítara jumá quei únjun madügünga wuríbani. ¹⁷ Toúnigi jumá ladüga j juríu. ¹⁸ Janügüwaba jagíbugiñoun gumádimatiña lúma jagíbugiñoun urúeigu lueígiñe jesériwidun nun, ítara lúba gayára lan jadímurejan nuágu jagíbugiñe, lúma jagíbugiñe ja mámbaña juríu. ¹⁹ Dánme le jedéregerúniwa joun lúrudugu, májüchüra jumá luágu cába lan jaríñaga o ída lúba lan jaríñaguni, ladüga dánme lachülürün óra lun jadímurejan, líchugubei Búngiu le lúnbei jaríñaguni jun. ²⁰ Mámaba jugúya adímureja, lání Júguchi Búngiu Espíritu, ligíaba adímureja jídaangiñe.

²¹ ‘Jalúgurubaña wügüriña jabíriña guánarü lun jafarún jilágubei, alúgura jamáñame agübürigu jasáanigu, garábagua jagíame isáanigu jawágun jagübürigu lun jáfaragüdüniña. ²² Jeyéreegudúba lun sun ubou nueígiñe, áni le derégüdaguati darí lúmoun lagúmuchun libágari, lebéloruba siélun. ²³ Dánme le jeíbaajoún lídan ában fulásu, ábame janúrajan lídoun ámu, ninárün jáu, niábinyaba, áu le Wügüri Garaüwarügüti, lubáragiñe jeíbuguni sún buri jabúrugute Israelítagu.

²⁴ ‘Úati disípulu íñuguti lueí lumáesturun ni músu lueí liyúbudiri, ánjana asúfurira, lúnti giñe jasúfurirun. ²⁵ Lúnti gúndan lan disípulu láu lachülürün ítara da quei lumáesturun, lúma músu quei liyúbudiri. Ánjein aríñawagúa lubei nuágu luágu jábutiná máfianu, gúbume janábawagua ja afálarubalina.

Cába lan ueí lanúfudedúa

(Lc 12.2-9)

²⁶ ‘Ligía manúfueda jumá lubei jawei gürígia,’ líña Jesúsu joun lání disípulugu lubáragiñe loúnajaniña apúrichija. ‘Úati cátei darúguati láu lun machülaagunbei lan, úa ni cáta le arámudagúati lun masúbudirúnwabei lan. ²⁷ Le naríñagubei jun lídan lubúriga aríñaga jumeí lídan larúgounga, le naríñagubei jun ibídiñoun joun ámu, wágu jumeí íñugiñe tibíti múna. ²⁸ Manúfueda jumá jawei ja gayáraabei jáfaruni úgubu jilágubei áni siñáti jáfarunun uwáni, Búngiu le gayáraabei lasúfuriragüdüni úgubu túma uwáni máfiogati lun sun dan, ligía lúnbei janúfudedun lueí.

²⁹ ‘¿Malúgurúntiña funági bián jarájüñü dunúru luágu ában liraüraü seínsu? Áni máburujantu ni ában jádaangiñe múarugun ánjein mabúseerun lubei Júguchi Búngiu. ³⁰ Ásta ídiburi le jábulugubei, abájüdüwati ában ában. ³¹ Manúfude jumá lubeiti, gebégitün sügü jáu dunúru.

*Ja mayéedagúnbaña láu Jesúsu jagíbugiñe gürígia
(Lc 12.8-9)*

³² ‘Sun ja arúfudagutiña jóungua jagíbugiñe gürígia luágu númagiñeñánu lan, naríñaguba giñe ligíbugiñe Núguchi Búngiu le siélubei luágu nánigu jamá. ³³ Ja ayéedagutiña náu jagíbugiñe gürígia, nayéedaguba giñe jáu ligíbugiñe Núguchi Búngiu le siélubei.

*Le busénbei lun lafálaruni Jesúsu
(Lc 12.51-53, 14.26-27)*

³⁴ ‘Marítagua jumátia luágu niábiña lan lúnrügü níchugun gáluma uboúagu, máma niábiña íchiga gáluma, niábiña íchiga wuríbu. ³⁵ Láu niábin, jafánreinraguba ja mafíñebaña nuágu jáma ja afíñebaña nuágu, lawúribujaba wügüri lúma lúguchi, isáani túma túguchu, ídiñu túma tágürü, ³⁶ lagáganiraguba cáda ában jáma lidújeñu.

³⁷ ‘Le jínsiñejabuti lun lúguchi o lúguchu sügü láu nísiñe lun, madüna lumúti nánigu lan, le jínsiñejabuti joun lirájüñü sügü láu nísiñe lun, madüna lumúti giñe nánigu lan. ³⁸ Le mawándunti asúfuriruni líbe lasúfurirúniwa luágu gurúwa lun lafálarunina, madüna lumúti nánigu lan. ³⁹ Le busénbei leséfuragun lúngua ya uboúagu lefériDIRUBEI íbágarí le magúmuchadibeí síélu, ánjein le ánjabeí lefériDIRAGUN lúngua ya uboúagu nueígiñe, libíjubeí íbágarí magúmuchaditi síélu.

*Ja lúnbaña jerésibiruni jafáyeiruaaja lúmagiñe Búngiu
(Mr 9.41)*

⁴⁰ ‘Le erésibirutün resíbi lumútina, le erésibirutina resíbi lumúti le oúnajabalina. ⁴¹ Le erésibiruti ában proféta ladüga liábin láu líri Búngiu, lerésibirubeí afáyeiruaajaü le libíjubeí ában proféta, le erésibiruti ában wügüri buíti ladüga lubuídun, lerésibirubeí afáyeiruaajaü le lerésibirubeí ában wügüri buíti. ⁴² Furúmiegurügü le íchuguti ában wéru dúna dílíti lun ában jádaangiñe únabugutiña ja ladüga nánigu jamá, libíjuba lafáyeiruaaja lúmagiñe Búngiu.

11

*Ja loúnajabaña Juan le abásteragüdañe adímureja lúma Jesúsu
(Lc 7.18-35)*

¹ Dan le lásurunbei laríñaguni Jesúsu le lúnbei jadügüni láni dísiPULUGU, ába lídin ñígiñe lun larúfudajan, apúrichija ligíame lídan buri fulásu geyéuga láu ubúru le Capernaúm.

² Dan ligía, furísunruguñein Juan, ába lagáambun luágu sun le ladügübeí Crístu. ³ Ába loúnajan bíama jádaangiñe láni dísiPULUGU aríjeí Jesúsu lun jálügüdüni ítara.

—¿Amúrü Crístubeí le lúnbei liábin ódí lúnti wagúrabajan ámu?

⁴ Ába laríñagun Jesúsu joun.

—Jeíba jariñageime le jaríjubeí lúma le jagáambubeí lun Juan. ⁵ Jabájüdagúame lun luágu aríjaaña lan já meja maríjinbaña, eíbuga já meja meíbunbaña, areídagua jagía já meja gawágubaña gumeín luágu

jára, agáamba já meja magáambubaña, sará jagía jiláaña, apúrichijoua luágu ugánu buíti le lánina asálbaruni joun gudémetiña. ⁶ Áni fuleíseiwati le meféridirunbalin lafiñen nuágu.

⁷ Dan le jóudin, ába lagúmeserun Jesúsu adímureja joun gürígia luágu Juan, ába laríñagun.

—¿Cásan jídinbei meja aríja lídan fulásu le mageírawati? ¿Ában wügüri le medéraguagüdünti laritagun queísi ában mabúru le lánjingichun garábali?

⁸ Ánjein máma lubei líña, ¿cáti jídinbei aríja? ¿Ában wügüri wéndeti ladáuragun? Subúsiti jun luágu ja lan wéndebaña adáuragun, tídaañanu lan jában urúeigu. ⁹ ¿Cáteiti jídinbei aríja? ¿Ában proféta? Ánja, ligía, áni ában wügüri weíriguti sügü láu ában proféta Juan. ¹⁰ Ligía le uágubei tariñaga Lerérun Búngiu.

Nóunajañein nóunagüle bubáragiñe,
lun laráansejani úma bubá.

¹¹ Ninárün jáu, jádan sun gürígia, úgili ni ában weíriguti luei Juan le abásteragüdjabei, láu sun líra, le únabutimaabei lídan arúejani le siélubei weíritimaati luei le anügarügübalin ugánu luágu arúejani ligía.

¹² Lúmagiñe dan le liábinbei Juan le abásteragüdjabei darí lúmoun dan le, murúgu jáña gürígia áluga jebélurun lídoun larúejan Búngiu. Ja ebélurubaña, ragü jamuti jabára ñi queísi ában cátei le gebégiti sarágu. ¹³ Lilúrudun Moisés jáma sun profétagu, adímurejatiñá meja luágu larúejan Búngiu, láu liábin Juan, ába lagúmeserun jerérun profétagu jagía luágu larúejan Búngiu agúnfulira. ¹⁴ Ánjeinti busén jubei jafiñerun, Juan ligía proféta Elías lé meja lúnbei liábin lubáragiñe liábin arúejani ligía. ¹⁵ Ja garígeirugubaña lun jagáambun, agáamba jamá.

¹⁶ ¿Cábasan úma núradaguágüdaña gürígia ja lánina dan le? Magúndaatiña ni ca áu, ítara jáña quei irájüñü ja añúurubaña adibirija mágidirugu, ába jagúarajan joun jibirigu ítara. ¹⁷ “Íñaajatiwa fídu jun, mabínajantün, erémuja wagía urému jírutu jun, mayájuntün.” ¹⁸ Ladüga liábin Juan meígin líña buídu quei leígin furúmiegurügü, mátun, ába jariñagun luágu níjein lan espíritu wuríbati lídan. ¹⁹ Láriñe, ába niábin, áu le Wügüri Garaüwarügüti, jou áu quei leígin furúmiegurügü, gurá, ába jariñagun luágu geígadi nan, gátadi, jamáda áu gafigountiña jáma agúburajatiña liseínsuna gumádi. Wel, ja chúbaña áu, subúdi jamúti luágu buídu lan le ladügubei Búngiu láu lichú láu.

*Lilana buri fulásu ja magáambadibaña
(Lc 10.13-15)*

²⁰ Ábati lagúmeserun Jesúsu adeínja joun gürígia lídan fulásu buri le ñi lubei meja ladügei líbe-ágei lání miláguru, ladüga masáansirun jamágili lan jóuserun. Ába laríñagun.

²¹ —¡Fugiábu jugúya Corazínna! ¡Fugiábu jugúya Betsáidana! Lun jamúga lídan lan ubúru le gíribei Tíro lúma Sidón ladügüwa miláguru buri le adügübei jagánagua, binárü jamúga lasáansiragua jagáburi lílana, ába jamúga jarúfuduni láu jadáuragun lúdu lúma balígi. ²² Nariñajare jun luágu dánme lan lachülürün wéyu lánina agúseraguni, weíritimaabei jabeichún sügü jáu ja Tírobaña jáma ja Sidónbaña. ²³ Amürüti ubúru le Capernaúm, ¿jarítaguatibu luágu weírigubadibu lan queísi siélu? Maweírigúnbadibu ítara quei maweírigun lan máfiougati. Ladüga lun jamúga lídan lan ubúru

Sodóma ladügüwa miláguru le adügübei bídan, njeingua jamúga fulásu ligía lúmoun dan le. ²⁴ Nariñajare jun luágu lídan lánme wéyu lánina agúseraguni, weíritimaabei jabeichún sügü jáu Sodómana.

Jigoúgu lun Jesúsu, eméraqua jumámuga
(Lc 10.21-22)

²⁵ Lídan dan ligía, ába lariñagun Jesúsu lun Búngiu.

—Adímurejatina buíti buágu, Núguchi le Labúremebei siélu lúma ubouú, ladüga barámuduni buri cátei le jaweí chu táu jáma gunfaráandatiña, ába barúfuduni joun ja mafúnrendeirungiñábaña queisi irájüñü. ²⁶ Ánja, Núguchi, ladüga ítara líña lan babúseeruni.

²⁷ ‘Derége láali Núguchi sun cátei nun. Ibídiñeti Búngiu Irájü ni ca un buídu buídu lueídügüya lun Búngiu Úguchili, ibídiñeti gíñe Búngiu Úguchili ni ca un buídu buídu lueídügüya lun Búngiu Irájü jáma ja únbaña labúseera Búngiu Irájü lasúbudiragüdüni. ²⁸ Jigoúgu númoun, sun jugúya ja bucháañabaña uágu lárige juwádigimari lúma lijürü janügün, eméraquagüda námugaün. ²⁹ Resíbi jumeí narúfudajan, furéndeí jugúyame númagiñe, láu gagúraasun nan, ñulú tugúya nanígi, ábame jadárirun eméraquni tun juwáni. ³⁰ Ménrengunti lun jesériwidun nun, juáliti gíñe anügüni le níchugubei jun lun janügüni.

12

Játünjan disípulugu türígu lídan wéyu le eméraquagülei
(Mr 2.23-28; Lc 6.1-5)

¹ Luágu ában wéyu le eméraquagülei eíbugeina líña Jesúsu jáma láni disípulugu labádinagua nádü. Ába jalámachun láni disípulugu, ába játünjan lílewe türígu, ába jeígini líla. ² Dan le jaríjini fariséogu cátei le, ába jaríñagun lun Jesúsu.

—Añájatia báni disípulugu adüga wadágimanu le moún lumuti ladügün lídan wéyu le eméraquagülei.

³ Ába lariñagun joun.

—¿Malíjangidün luágu lé meja ladügübei David luágu ában dan, dan le lálámachunbei, ligía jáma ja úrabaña lúma? ⁴ Ába lebélorun tídoun lúban Búngiu, ába leígin tídaangiñe fein to sagraúboun to moun luboún yebe leíginun, ni ligía ni ja úrabaña lúma, fádírige rügüñanu lun jeíginun fein tugúya según lilúrudun Moisés, áni mámati figou le ladügübei David ligíbugiñe Búngiu. ⁵ ¿Ódi malíjangidün lídan lilúrudun Moisés luágu ñadágimein jamá fádírige tídan lúban Búngiu lídan wéyu le eméraquagülei áni máma figou? ⁶ Nariñajare jun luágu njein lan ában weíriguti sügü táu lúban Búngiu ya, áu. ⁷ Jugúya, úgili gunfaráanda jumáni le lariñagubei Búngiu tídan Lerérun. “Jímein numúti lun gudémejabu jumá sügü láu jadágaragüdün anímaalú nun.” Lun jamúga gunfaráanda jumáni, madímurejaantün jamúga wuríbati jawágu gürígia ja madügünbaña ni cáta wuríbati. ⁸ Gabáfutina gíñe, áu le Wügüri Garaüwarügüti, lun nariñagun cába lan gayára ladügüniwa lídan wéyu le eméraquagülei.

Wügüri le jiláalibeí ában lújabu
(Mr 3.1-6; Lc 6.6-11)

⁹ Ába lídin Jesúsu ñígiñe, ába lebelurun tídoun jalígílisin juríu. ¹⁰ Ñíñein ában wügüri jíláali ában lújabu, queíti busén jamá fariséogu jáma arúfudajatiña lilúruden Moisés jadárirun lichára Jesúsu, ába jaríñagun lun.

—¿Gayáraatisan lagáranijoún lun ában sánditi lídan wéyu le eméraaguagülei?

¹¹ Ába laríñagun Jesúsu joun.

—¿Ca jídaangiñe, ánjein galügün lubei ában mudún, ába teíguadun lídoun ában wélu wéyu le eméraaguagülei, lun mídinbei lan aságaroun? ¹² ¡Ma gebégitimaati ában wügüri sügü táu ában mudún! Gayáraati lubeíti ladügün buíti lídan wéyu le eméraaguagülei.

¹³ Ába laríñagun lun wügüri ligía.

—Tulébei bújabu.

Dan le látuleruni, ába lareídagun quei le ában. ¹⁴ Ába jáfuridunga fariséogu, ába jagúmeserun áluaja ída lúba lan jáfaruni Jesúsu jilágubei.

Lé meja laríñagubei Isaías luágu Jesúsu

¹⁵ Dan lasúbudirunbalin Jesúsu cátei le, ába lídin ñígiñe, ába jafálaruni sarágu güriquia, ába lareídaguagüdüniña sun sánditiña. ¹⁶ Ábaja laríñagun joun lun maríñagun jamáni cáteiñein lan. ¹⁷ Lasúseredunbei líra lun lagúnfulirun lé meja laríñagubei proféta Isaías.

¹⁸ Niján numútun le nanúadirubei lun lesériwidun nun, le jínsiñebei nun, le áubei nagúndaara, líña Búngiu.

Níchugubei náni Espíritu luágu,

ábame larúfudajani joun ja mámabaña juríu ída lúba lan gayára lan júaradun niglbugiñe.

¹⁹ Mageíndagunbei, magúaragun,

mareínjabei úmada.

²⁰ Gudémejabubei joun güriquia ja gudémebaña queísi ában mabúru le barúguaali, lúma joun ja débilibaña lídan jafiñen queísi ában lámpu le ñegúmemeeli.

Ítara méme lúba daríme adüga láali larúeijan le úaraguabei.

²¹ Ábame jíchuguni ja mámabaña juríu jeménigi luágu.

*Laríñawagún luágu lubáfu lan Máfia lúmabei Jesúsu
(Mr 3.19-30; Lc 11.14-23, 12.10)*

²² Ábati lanügüniwa ában wügüri lun Jesúsu, maríjin líña, madímurejan, láuñein ában espíritu wuríbati. Ába laságaruni Jesúsu espíritu wuríbati lídaangiñe, ába laríjin, adímureja ligía. ²³ Ába laweíridun janígi sun ja ñibaña, ába jaríñagun.

—¿Niján funásan ladügawagunbei David?

²⁴ Dan le jagáambunbalin fariséogu cátei le, ába jaríñagun.

—Wügüri le, láu lubáfu Beelzebú, le Máfia, le jábuti espíritugu wuríbatiña laságajaña.

²⁵ Quei subúdi láani Jesúsu le jarítagubei, ába laríñagun joun.

—Furúmiegurügü arúeijani le afánreinraguti lun jageíndagun jámagua, lagúnrinchaguba, ánjaña giñe afáreinragua lílana ában ubúru o ában lan famíliá ladüga wuríbu, siñábei jadúrarun. ²⁶ Ítara líña giñéti, ánjein laságara Máfia máfia guánarügü, ligía guánarügü afánreinragubei, áni zída lubáti ladúrarun lubáfu ítara? ²⁷ Jugúya, aríñagatün luágu láu lan lubáfu Beelzebú, o Máfia, nasága espíritugu wuríbatiña, ánjein ítara líña lubei, ¿cáti íchugubei

ubáfu joun ja jánigu jugúya lun jaságajaniña, Máfia ódi Búngiu? Jagía guánarügü arúfuda jamúti luágu bulíeigua jumá. ²⁸ Áu, láu lubáfu láni Búngiu Espiritu naságaja espíritugu wuríbatíña. Arúfuda lumúti líra luágu chúlújali lan larúeijan Búngiu jídoun.

²⁹ ‘¿Ída lubági gayára lan lebélorun ában gürígia lúbiñoun ában wügüri jéreti lun lanügüni lílagu ánjein magúragun lan furúmiñe? Ítara rügüñein lun gayára lan lanügüni lílagu.

³⁰ ‘Le mámabei númagiñe, náganiñein, le míderagun lumútina, güríngua lumúti le nadügübei.

³¹ ‘Jugúya aríñagatün luágu láu lan lubáfu Máfia naságaja espíritugu wuríbatíña, áni láu lubáfu Sífiri Sándu naságajaña. Ligía nariñagunbei jun luágu gayára lan ferúdunawa lan sun figou luma sun wuríbati le jaríñagubei gürígia, ánjein lun jadímurejan wuríbati luágu Sífiri Sándu, siñábei ferúdunawa lan figou líra. ³² Furúmiegurügü giñe le aríñaguti furúmiegurügü cátei wuríbati nuágu, áu le Wügüri Garaüwarügüti, gayáraati ferúdunawa lan, ánjeinti le adímurejati wuríbati luágu lubáfu Sífiri Sándu le nídaanbei, úabei ferúdunawa lan ni lídan ubou le, ni lídan le ában.

*Luágu lin ídibu lasúbudirúa ca lan luwúyeribeí
(Lc 6.43-45)*

³³ ‘Ánjein buídu lubeí ídibu, buídubei giñe lin, ánjein mabuídun lubeí ídibu, mabuídunbei giñe lin. Luágu lin ídibu lasúbudirúa ca lan luwúyeribeí. ³⁴ ¡Jarásan jéwe jugúya le! Siñáti jadímurejan cátei buíti, wuríbatúngan. Cátei le buínbei tídan anígi, ligía lariñagubei iyúmaü. ³⁵ Wügüri le buídubei, cátei buíti lariñagubei ladüga tídaañein lan lanígi ubuíduni, wügüri le wuríbabei, cátei wuríbati lariñagubei ladüga tídaañein lanígi wuríbani. ³⁶ Nariñajare jun luágu dánme lan lachülürün luwéyuri agúseruni, sun gürígia geféenbaña luágu sun dimúrei málati le jaríñagubei, ³⁷ ladüga luáguba le baríñagubei bagúseragüdüwa, ligíaba arúfudei ánjein gadúnrun bubeí lúmoun madúnrun ban.

*Jamúriajan gürígia wuríbatíña seíni láuti miláguru
(Mr 8.12; Lc 11.29-32)*

³⁸ Ába jaríñagun jádaangiñe fariséogu jáma arúfudajatiña lilúrudun Moisés lun Jesúsu.

—Maésturu, buséntiwa waríjin badügün ában seíni le láuti miláguru luágu lúmagiñe lan Búngiu biábin.

³⁹ Ába lariñagun Jesúsu joun.

—Gürígia wuríbatíña áni magúnfuliruntiña amúriajatiña seíni láuti miláguru, míchugünbei ámu seíni joun lueí le asúseredubei lun proféta Jonás. ⁴⁰ Ladüga queí leréderun Jonás ürüwa wéyu ürüwa áriebe lurágeirugu údu, itara lúba giñe neréderun, áu le Wügüri Garaüwarügüti, lídan numúaja ürüwa wéyu, ürüwa áriebe, según ligáburi jabájüdüni juríu dan. ⁴¹ Já meja aganóubaña Nínive jásaaruba lídan luwéyuri agúseruni dánme jagúseragüdüniwa gürígia ja lánina dan le, ábame jíchugun jadúnrun ladüga saánsiguati jagáburi Nínivena dan le lapúrichijanbalin Jonás lugánute Búngiu joun, áni anája áu, ában weíriguti sügü láu Jonás, áni májatün jagáambunina. ⁴² Tásaaruba giñe lurúeitena Súru lídan luwéyuri agúseruni dánme le jagúseragüdüniwa gürígia ja lánina dan le, ábame tíchugun jadúnrun, ladüga núbintu lídaangiñe lidíse-ágei ubou lun tagáambuni

lichú láu Salomón, áni anája áu, ában weíriguti sügü láu Salomón, áni májatün jagáambunina.

Espíritu wuríbati le agíribuduti

(Lc 11.24-26)

⁴³ ‘Dan le láfuridun ában espíritu wuríbati lídaangiñe ában gürígia, ába eíbugañaja lan lídan fulásu mábeiti áluaja leméraagun, dan madári láani, ába laríñagun lúnguarügü. ⁴⁴ “Nagíribuda tídon núban to ñígiñe lubei náfurida.” Dan le lagíribudun, ába ladáriruni gürígia buga ligía queísi ában muna to málalu, abuídajouáaru, aráanserúa. ⁴⁵ Ábati lídin, ába liábin jáu sédü espíritugu wuríbatimaatiña sügü láu, ába jebélurun sun jagía agánawa lídan gürígia ligía, wuríbatimájaliti le gádaanbalin sügü láu meja furúmiñe. Ítara lúba giñéti lasúseredun joun gürígia wuríbatíña ja lánina dan le.

Lúguchu Jesúsu jáma lamúlen

(Mr 3.31-35; Lc 8.19-21)

⁴⁶ Ñígili Jesúsu adímureja joun gürígia, ligía tiábin lúguchu jáu lamúlen. Ábajeréderun bougudi, buséntiña yébe jadímurejan lúma. ⁴⁷ Ába laríñawagún lun Jesúsu.

—Nuján búguchu jáma bamúleni ya bougudi, buséntiña jadímurejan búma.

⁴⁸ Ába laríñagun Jesúsu lun le awísarubalin.

—¿Ca nóguchuboun, ca namúlenubaña?

⁴⁹ Ába larífudun jawágun láni disípulugu, ába laríñagun.

—Añája nóguchubaña, jagía giñe namúlenubaña, ⁵⁰ ladüga furúmieguarügü le adügüti lugúndan Nóguchi le siélubei, ligía namúlenbei, nítu, nóguchu.

13

Jémpulu luáguti ábunaguti

(Mr 4.1-9; Lc 8.4-8)

¹ Wéyu ligía, ába láfuridun Jesúsu múnadagiñe, ába lañúurun láru dúna. ² Quei jagíbedagun gürígia le ní lubei, ába ládinun tídon ában ugúnein, ába lañúurun, ába jeréderun sun gürígia láru dúna. ³ Ába larífudajan sarágu cátei joun láu jémpulu, ába laríñagun.

—Ñíñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láburiyan lídaangiñe luágun üma, ába jayábin dunúru, ába jeígini. ⁵ Líbiri, ába láburiyan labádinaguoún dübü le ní lumuti úa lan sarágu múa, ába labouchun furése ladüga majúlilin lan múa. ⁶ Dan le lásüdün wéyu, ába lásaurün queíti málagüle lan, ába louñwen. ⁷ Líbiri ílaü, ába láburiyan labádinaguoún jíyu, ába laweinamudun jíyu úara lúma, ába láfaruni. ⁸ Ñíñein lídaangiñe, áburujati lídoun múa buíti, alúbajouáti buídu, níjein lídaangiñe, íchuguti san águu luágu cáda ában águu, líbiri rúti ürüwa-wein, líbiri daráandi. ⁹ Jugúya le garigeirugubei lun jagáambun, agáamba jumána.

Ca lan laníchigubei jémpulu le

(Mr 4.10-12; Lc 8.9-10)

¹⁰ Ábati jayábin disípulugu, ába jaríñagun lun Jesúsu.

—¿Cásan uágu badímureja joun gürígia láu jémpulu?

¹¹ Ába laríñagun joun.

—Jugúya, subúdigüda láali Búngiu sun cátei arámudaguati le lánina larúeijan jun, ánjein jagía, siñáti jasúbudiruni. ¹² Le agúnfuliruti lúma inárüni le lagáambubei, líchugúba lánwoun lun, ánjein le maténirunti lun, gidáwarügübei murúsun larúgounga le lúmabei lueí. ¹³ Ligía nadímurejanbei joun láu jémpulu ladüga aríja jamáni le nadügübei, ába jeréderun camá maríjintiña, agáamba jamei le naríñagubei, ába jeréderun úaga gunfaráanda jamá camá jamuga magáambuntiña. ¹⁴ Jawágu lagúnfulira lé meja laríñagubei proféta Isaías dan laríñagunbei.

Jugúya, jagáambuba, úabei gunfaráanda jumá, jaríjuba, ibídiñebei jun ca lan lílabei le jaríjubei,

¹⁵ ladüga deréeru janígi,

wuríbaaliti jagáambun,

murúñu líña jágu,

lun maríjin jumá láu,

magáambun láu jarígeirugu,

úa gunfaráanda jumá táu janígi,

magáragun jugúyame nun lun nareídaguagüdünün.

¹⁶ ‘Ánjeinti jugúya le nánigubei, fuleíseiwatün ladüga aríjatün láu jágu, agáamba jugúya láu jarígeirugu. ¹⁷ Ninárün jáu, sarágu jañá meja profétagu jáma ámu güri-gia gúnfulitiña lúma Búngiu abúseerutiña jamúga jaríjinina quei jaríjinina jugúya guetó, maríjin jamútina, buséntiña jamúga meja jagáambuni le jagáambubei jugúya, magáambun jamúti.

Lafünraanguagüdüni Jesúsu jémpulu luáguti ábunaguti
(Mr 4.13-20; Lc 8.11-15)

¹⁸ ‘Agáamba jumeíti le lílabei jémpulu luáguti ábunaguti. ¹⁹ Ja agáambubalin ugánu luáguti arúeijani le lánina siélu áni úati gunfaráanda jamáni, ítara jáña quei úma le ídounbei láburuja lídaangiñe líla nádü, ába líabin Máfia, ába laságaruni ugánu buíti le ábunúbei tídaangiñe janígi. ²⁰ Dübü le ñíjin lubeí láburuja ílaü, ítara líña quei güri-gia ja agáambubalin ugánu, ába jerésibiruni láu ugúndani, ²¹ quei márügüdün lubeí buídu tídan janígi, madúratí jádan. Dánti le lachülürün dan lun jóuchawagún lúma jeíbaajoún lueígiñe ugánu ligía, ába leíguadun jarúna. ²² Jíyu le ñíjin lubeí láburuja ílaü, ítara líña quei güri-gia ja agáambubalin ugánu, weíritimaati jafúudun luágu cátei le lánina íbágari le, ába leyéeduniña írisini. Sun le, ába láfaruni ugánu tídaangiñe janígi, mígiruntiti lun lalúbajoún jádan güri-gia jagía. ²³ Múa buíti le ñíjin lubeí láburuja ílaü, ítara líña quei güri-gia ja agáambubalin ugánu, ába gunfaráanda jamáni, ába jíchugun ában alúbajoúni buíti. Añájein, ítara jáña quei ílaü le íchugubei san águu luágu ában, jíbiri quei le íchugubei ürüwa-wein, jíbiri quei le íchugubei daráandi.

Jémpulu luáguti jíduru wuríbati labádinagua türígu

²⁴ Ábaya líchuguni Jesúsu jémpulu le joun.

—Arúeijani le lánina siélu, ítara líña quei ában wügüri le ábunagubei ílaü buíti lídan lufúlasun, ²⁵ dan añája lan sun ja ñibaña arúmuga, ába lebélorun ában lágani labúreme fulásu ligía, ába lábunun jíduru wuríbati labádinagua türígu, ába lídin. ²⁶ Dan le laweínamudun türígu ába legélewejan, ába giñe lachúlaagun jíduru wuríbati. ²⁷ Ába jóudin músu, ába jaríñagun lun jayúbudiri. “Wayúbudiri, ánjein buídu lubeí ílaü le bábunagubei bumúanrugu, ¿jalíagiñésan lasálira jíduru wuríbati le?” ²⁸ Ába laríñagun

iyúbudiri joun. “Ladüga ában ágani le.” Ábati jariñagun músu lun. “¿Buséntibu lun wájulajani jíduru wuríbati le?” ²⁹ Ába lariñagun joun. “Uá, ladüga dánme jájulajani jíduru wuríbati, julá jíñein lin giñe türígu úara lúma. ³⁰ Ígiragubei jumeí lun laweínamudun úara daríme lidáani alúbajani, ábame nariñagun joun ñadágimeintiña lun jájulajani jíduru wuríbati furúmiñe, ábame jagúraguni lun lágudúniwa, lárigiñeme, ábame jareíduni türígu títan lágei.”

Jémpulu luáguti tla mostása

(Mr 4.30-32; Lc 13.18-19)

³¹ Rúlumuti giñe Jesúsu jémpulu le joun.

—Ítara líña arúejiani lánina siélu quei ában tla mostása le lábunubei ában wügüri lufúlasunrugu. ³² Tla mostása, ligía ílaü ñúraütimaabei lídaangiñe sun ílaü, áni dan labouchun, ligía weírítimaabei lídaangiñe sun nádü, ába líábin lun ábanbei lan wéwe weíríti darí lun jayábin dunúru adüga jádibu luágu lílímun.

Jémpulu luáguti ísi

(Lc 13.20-21)

³³ Rúlumuti giñe jémpulu le joun.

—Ítara líña arúejiani le lánina siélu quei ísi le tagúbudubei ában würi títan ürüwa líburu fulúwaaru, ába terésirun sun fulúwaaru tugúya.

Ca lan lébunabei líchuguni Jesúsu jémpulu buri le

(Mr 4.33-34)

³⁴ Láu jémpulu lariñagei Jesúsu sun cátei le joun güri-gia, maríñagunti ní cáta joun mayúsurunga jémpulu. ³⁵ Sun cátei le, lun lagúnfulirun le lariñagubei meja Búngiu liyúmulugugiñe proféta.

Nadímurejaba láu jémpulu jun, nafúnraanguagüdübei cátei lé buri meja arámudaguabei jun lúmagiñe nadügüni ubou.

Lafúnraanguagüdüni Jesúsu jémpulu le luáguti jíduru wuríbati labádinagua türígu

³⁶ Ába louñajaniña Jesúsu güri-gia jábiñoun, ába lebélorun múnadoun, ába jayábin láni dísipulugu, ába jariñagun lun.

—Furáanguagüdabei jémpulu le luáguti jíduru wuríbati woun.

³⁷ Ába lariñagun Jesúsu joun.

—Áu le Wügüri Garaüwarügüti, áu le ábunagubalin ílaü buíti, ³⁸ múa, ligía uboubei, ílaü buíti, jagía güri-gia ja lílana larúejian Búngiu, jíduru wuríbati, jagía güri-gia ja lánigu Máfia, ³⁹ áganiti le ábunubalin jíduru wuríbati, Máfia méme, alúbajani, ligía lagúmuchunbei ubou, ja alúbajabaña, ánjeligu. ⁴⁰ Ítara quei labúdajouñiwa jíduru wuríbati ába lágurún wáturugun lun lágudun, ítara lúba giñe lasúseredun dánme lagúmuchun ubou, ⁴¹ áu le Wügüri Garaüwarügüti, nouñajabaña náni ánjeligu aságaraña sun ja afígoungüdübaña ámu, jáma ja adügübaña wuríbati, lídaangiñe narúejian, ⁴² ábame jácharaguniña lídoun wátu geméti lánina máfiougati. Ábame jayájuajan ñi, ábame lacünrinjan jári. ⁴³ Jámeti adügübalin le lubeíbei Búngiu, ábame jámiridun quei wéyu lídan larúejian Wáguchi Búngiu. Agáamba jumána, jugúya le garígeirugubei lun jagáambun.

Jémpulu luáguti irísini le arámudúañubei

44 ‘Ítara líña arúejiani le lánina siélu quei irisini le arámudúañubei lábugiñe múa. Ladárierei ában wügüri irisini ligía, ábaya larámuduni ñi méme, le luweírin lugúndan, ába lídin, ába lalúguruni sun le lúmabei, ába lagáñijani fulásu ligía.

Jémpulu luáguti pérla le weíribei ebégi

45 ‘Ítara líña giñe arúejiani le lánina siélu quei ában alúgurajati le eíbugañajabei áluaja pérla finuti, 46 dánti ladárirun ában le weíríti lebégi, ába lídin, ába lalúguruni sun le lúmabei, ába lagáñijani pérla ligía.

Jémpulu tuáguti séni

47 ‘Ítara líña giñe arúejiani le lánina siélu quei ában séni to agurúboun baránaja, ába tañúgun sun jawúyeri úduraü. 48 Dan tabuíñchun, ába jacháwarunun esénijatiña lárún béya, ába jañúurun ñi anúadajaña úduraü, ába jareíduniña ja buídubaña, ába jachágaruniña ja wuríbabaña. 49 Ítara lúba dánme lagúmunchun uboú, jayábiba ánjeligu lun jafánreinruniña ja buídubaña jádaangiñe ja wuríbabaña. 50 Ábame jádaruniña ja wuríbabaña lídoun wátu geméti lánina máfiougati, ñíba lubei jayájuaja, acünrijame jári.

Írisini buri iséri lúma binádu

51 Ábati lálügüdüniña Jesúsu, laríñaga joun.

—¿Gunfaráanda jumútisan sun cátei le?

Ába jaríñagun.

—Ánja, Wabúreme.

52 Ábati laríñagun joun.

—Dan le liábin ában arúfudajati lilúrudun Moisés lun gunfaráanda láni luáguti arúejiani le lánina siélu, ába ítara lan quei ában iyúbudiri le gaságaraditi cátei iséri buri lúma cátei binádu buri lídaangiñe lirísín lun líchuguni joun tílana lúban dan le jemégeiruni, queígubeirügü, gayáraati larúfudajan joun gürígia luágu lilúrudun Moisés lúma giñe luágu cátei le narúfudajabei, áu le Jesúsu.

Jesúsu lídan fulásu le gíribei Nazarét

(Mr 6.1-6; Lc 4.16-30)

53 Dan lagúmunchunbei líchuguni Jesúsu jémpulu buri le, ába lídin ñígiñe, 54 ába lachülürün lageíroun. Ába lagúmeserun arúfudaja tídan jalígílisin juríu to lídaanboun fulásu ligía, ába laweíridun janígi gürígia, ába jaríñagun.

—¿Jalíasan lafúnrendeirei wügüri le sun lichú áu le? ¿Ída liñásan gayára láani miláguru buri le adüga? 55 Liraüga saráfangei le, María lúguchuboun, líbugaña Jacóbo, José, Simón lúma Júdas, 56 ya giñe jagánawa lamúleno jáma lítunu wádan. ¿Jalíagiñeti lasúbudirei sun le?

57 Ába jamájarun lun jerésibiruni. Ába laríñagun Jesúsu joun.

—Sun gürígia jínsiñeti ában proféta joun, mámarügaali ligía lídaangiñeti fulásu le ñí jabei o tílana lan jában.

58 Madügüntiti sarágu miláguru ñi ladüga mafíñen jamá luágu.

Loúnwen Juan le abásteragüdjabei

(Mr 6.14-29; Lc 9.7-9)

14

1 Lídan dan ligía, ába lagáambun Heródes, le gumándan lídan fulásu le gíribei Galiléa, luágu Jesúsu, 2 ába laríñagun joun ja lúmabaña.

—Juan le abásteragüdajabei le, sará jádaangiñe jiláaña, ligía gabáfu lubeí lun ladáagun miláguru.

³ Lé meja susérelibei, daülumuti meja Heródes Juan, ába lagüraguagüdüni láu güringüri tueígiñe Heródias tó meja lúmarí Felipe, le lamúlen. ⁴ Aríñagaalí meja Juan lun Heródes luágu moun láni lagámaridunun lúmarí lamúlen, madügünti Heródes gásu láu.

⁵ Busénti yebéti Heródes láfaruni Juan jilágubei, ladüga lanúfude jaweí güriquia, madügun lumúti ladüga sun lan güriquia afíñetiña luágu proféta lan Juan. ⁶ Dánti le efédujani luágu lagúnfulirun Heródes irúmu, ába tiábin tiraü Heródias, ába tabínajan jagíbugiñe amísurajóutiña, léti línsiñe tabínajan lun Heródes, ⁷ ába laríñagun tun láu fiñún luágu líchugubei lan furúmieguarügü cátei le tamúriajan lúma tun. ⁸ Ábati taríñagun túguchu tun lun tamúriajani lábulugu Juan le abáste jilágubei, ladüga, lun jíchuguni tun lídan ában asiedu, ába tamúriajani lúma itara.

⁹ Ába lírudagun Heródes lueígiñe cátei le, quei aríñaga láali lan láu fiñún, agáamba jameí amísurajóutiña, ába laríñagun lun líchugúniwa tun. ¹⁰ Ábati laríñagun lun ladürürúniwa lábulugu Juan furísunrugu, ¹¹ ába janügüni lídan ában asiedu, ába líchugúniwa tun irájü tugúya, ába tíchuguni tun túguchu.

¹² Ábati jayábin l-íñagun tun láu fiñún luágu lanigu Juan, ába janügüni lúgubu, ába jábununi, lárigiñe, ába jóúdin awísarei Jesúsu.

*Líchugun Jesúsu eígini joun seíngü mílu wügüríña
(Mr 6.30-44; Lc 9.10-17; Jn 6.1-14)*

¹³ Dan lagáambuni Jesúsu cátei le, ába lídin nígiñe jáurügü láni disípulugu tídan ában ugúnein lídoun ában fulásu mageírawati. Ába jasúbudiruni güriquia, ába jáfuridun lídaangiñe buri aüdü, ába jóúdin lárigi, eibu. ¹⁴ Dan larárirun Jesúsu tídaangiñe ugúnein, ába laríjin luágu sarágu jaña lan güriquia jagía, ába jagúdemedagun lun, ába lareídaguagüdüniña ja sándibaña jádan. ¹⁵ Queíti agúñedeinaali lubeí, ába jaríñagun láni Jesúsu disípulugu lun.

—Dárüjalitia áni úatiña güriquia aganoútiña lídan fulásu le. Oúnaja báña güriquia ja, ñüdüñ jamámuga lídoun buri lirájüñü fulásu yaráfa agáñija eígini lun jeigin.

¹⁶ Ába laríñagun Jesúsu joun.

—Mídinbaña, rújuma eígini joun.

¹⁷ Ába jaríñagun lun.

—Seíngü rügüñoun fein wáma ya, jáma bián úduraü.

¹⁸ Ába laríñagun Jesúsu joun.

—Barüjumoun nun ñájoun.

¹⁹ Ába laríñagun joun güriquia lun jañúurun luágu jíduru. Ába lanügünun seíngü fein jáma bián úduraü jagía lújaburugu, ába laríjin siélun, ába leteíngiruni Búngiu tuágu. Ábati lagúbachagunun fein, ába líchugunun joun láni irun Jesúsu tídaangiñe ugúneidisípulugu, ába jafánreinjanun jádan güriquia. ²⁰ Sun jagía jóútiña quimúle, lárigiñe, ába jabuínchagüdüñ dúusu faniñe táu to ígiragutu. ²¹ Seíngüñanu mílu wügüríña eígitiña, mabájüdünga würíña jáma irájüñü.

*Leíbugun Jesúsu ligíbuagu dúna
(Mr 6.45-52; Jn 6.16-21)*

²² Ába loúnajaniña Jesúsu láni disípulugu lubá tídan ugúnein tugúya lun jánjiñuragun loubáfurugun sun niján lan oúnajaña gürígia águyu. ²³ Lásun loúnajaniña, ába laweínrun lábugua luágun wübü ayúmuragua lun Búngiu. Dan le lagúñedunbei, ñíñein Jesúsu lábugua, ²⁴ sun núnguran tan ugúnein lamídan dúna. Ába láfarajan lugúdi barána tuágu ugúnein ladúga tubárouñein lan garábali. ²⁵ Ába liábin Jesúsu jawágun lubá larúgan, eíbugeina ligíbuagu dúna. ²⁶ Dan jaríjini láni disípulugu eíbugeina ligíbuagu dúna, ába janúfudedagun, ába jagúaragun láu anúfudei.

—jÚfiaü!

²⁷ Ába ladímurejan Jesúsu joun, ába laríñagun joun.

—jRagújuma anígi, áu le, manúfueda jumá!

²⁸ Ába laríñagun Pédro lun.

—Nabúreme, ánjein amürü lubeí, eíbugagüda bána gíñe ligíbuagu dúna chülü le ñí bubei.

²⁹ Ába laríñagun Jesúsu lun.

—Jigábuti.

Ába larárirun Pédro tídaangiñe ugúnein, ába lagúmeserun eíbuga le ñíjin lubeí Jesúsu ligíbuagu dúna. ³⁰ Dan le lasándiruni lére garábali ába lanúfudedagun, ába lagúmeserun abúlucha, ába lagúaragun.

—jSéfu bána Nabúreme!

³¹ Ába lárügüdüni Jesúsu lújabu, ába laríñagun lun.

—jLouguati gíñe bafíñen! ¿Ca uágu lalouguada bafíñen?

³² Dan jádinun tídoun ugúnein, ába lagálumadun garábali. ³³ Játi buga tídaanbaña ugúnein, ába jájuduragun ligíbugiñe Jesúsu, ába jaríñagun.

—Inárüni luágu Liraü ban Búngiu.

*Lareidaguagüdüniña Jesúsu sánditiña Genésaret
(Mr 6.53-56)*

³⁴ Ába jánjiñuraguni dúna, ába jachülürün Genésaret. ³⁵ Dan le jíchugunbei lílana fulásu fe luágu Jesúsu lan, ába jabúrchaguagüdüni lídan sun fulásu ligía, ába janügüniña sun sánditiña le ñíjin lubeí. ³⁶ Ába jayúmuragun lun lun lígirun lúnrügu jagúuruni táru lanáangun, sun ja agúurubarun, areidaguátiña.

15

*Cátei le marúmadagüdünbaliña gürígia ligíbugiñe Búngiu
(Mr 7.1-23)*

¹ Ába jayábin fiú fariséogu jáma arúfudajatiña lilúrudun Moisés, ñübintiña ubúrugugiñe Jerusalén lúmoun Jesúsu, ába jaríñagun lun.

² —¿Ánsan jájalachagunbalin báni disípulugu binádu jagáburi weíyaaña mútu? Magúnfuliruntiña láu lachibúniwa újabu lubá eígini, según wagáburi.

³ Ába laríñagun Jesúsu joun.

—¿Ánti gíñe jájalachagunbalin lerérun Búngiu lun jafálaruni binádu jigáburi? ⁴ Laríñajare Búngiu. “Inébe jamá bagübürigu bun, le anábagubaliña lagübürigu, jílala.” ⁵ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu. “Siñáti níderagunibu ladúga sun le núbabei, aríñagaadina luágu lun lan níchuguni lun Búngiu”, ⁶ luágu furúmiegurügü lan le aríñaguti itara, mámaali lan lúnti líderaguniña lagübürigu. Láu líra mebégigüda jumáli lagúmadijan Búngiu

lun jafálaruni binádu jigáburi. ⁷ ¡Biángua tigíbu jugúya le! Linárün proféta Isaías laríñagunbei juágu ítara.

⁸ Jayumárurügü gürígia ja jíchiga inébesei nun, líña Búngiu, ánjein tídan janígi, mebéresentiña náu.

⁹ Málati jájuduragun nun, ladüga le rügüñein jagúmadijan wügüriña jarúfudaja.

¹⁰ Ábati lagúarun joun gürígia, ába laríñagun joun.

—Agáamba jumá, gunfaráanda jugúyame. ¹¹ Máma eígini le leígubei gürígia adügübalin lun marúman lan ligíbugiñe Búngiu, dimúrei wuríbati le laríñagubei wügüri, ligía adügübalin lun marúman lan.

¹² Ábati jayábin disípulugu lúmoun Jesúsu, ába jaríñagun lun.

—¿Subúditisan bun luángiu lun jafálaruni binádu jiggu wuríba lan láburujan dimúrei le baríñagubei joun fariséogu?

¹³ Ába laríñagun joun.

—Furúmieguarügü nádü to máma lábunun Núguchi Búngiu le siélubei, lájulúba láu sun lílagüle. ¹⁴ Ígira jumáña, maríjintiña ja adúndejetiña maríjintiña jáledi jagía. Áni ánjein adúndeja ában maríjinti ában maríjinti líledi, jeíguaduba biángubei jagía lídoun ában júyu.

¹⁵ Ábati laríñagun Pédro lun Jesúsu.

—Furáangüdüdabei jémpulu le woun.

¹⁶ Ába laríñagun Jesúsu.

—¿Úati gíñe gunfaráanda jumá? ¹⁷ ¿Úati gunfaráanda jumá luágu sun lan le ebélurubei lídoun iyúmaü, ába lídin lídoun urágei, lárigiñe ába láfuridun lídaangiñe úgubu? ¹⁸ Ánjein dimúrei le áfuridubei lídaangiñe iyúmaü, tídaangiñe anígi liábin, ligíati adügübalin wügüri lun marúman lan ligíbugiñe Búngiu, ¹⁹ ladüga tídaangiñe anígi láfurida samínaü wuríbati, áfarajani, adultériu, salúfuri, íweru, iyéeni, marásualugu. ²⁰ Ligía buri cátei le adügübalin wügüri lun marúman lan, ánjeinti leigíniwa machibúnga újabu según jagáburi juríu marúmadagüdün lumúti ligíbugiñe Búngiu.

*Ában würi teréncha to afíñeruboun luágu Jesúsu
(Mr 7.24-30)*

²¹ Ába láfuridun Jesúsu ñígiñe, ába lídin lídoun buri fulásu geyégua láu fulásu le Tíro lúma Sidón. ²² Níñoun ában würi jádaangiñetu Cananítagu aganoúti lídan fulásu ligía, ába tiábin luágun Jesúsu agúarajeina.

—¡Nabúreme, ladügawagun Davíd, gudémená bun! Níjein ában espíritu wuríbati tuágu nisáani, weíriri tasúfurirun lurúma.

²³ Moúnabun lumútu Jesúsu. Ábati jayábin disípulugu, ába jayúmuragun lun, ába jaríñagun.

—Adügabei le tamúriajabei búma, ladüga nuteíntia agúarajeina wárigi.

²⁴ Ába laríñagun Jesúsu.

—Joun rügüñein gürígia féridijaña ja Israelítagu loúnajana Búngiu lun níderaguniña.

²⁵ Ába tiábin würi tugúya, ába tájuduragun ligíbugiñe, ába taríñagun.

—¡Nabúreme, íderagua bána!

²⁶ Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jaweí isáanigu lun tíchugúniwa joun oúnli.

27 Ába taríñagun.

—Ánja, Nabúreme, láu sun líra, gayáraati jeígini oúnli ífei le áburujati lueígiñe jadábulan jabúriña.

28 Ábati laríñagun Jesúsu tun.

—Würi, ¡weiriti giñe bafíñen! Susérelá le babúseerubei.

Lúmagiñe óra ligía, ába tareídagun tisáani.

Lareídaguagüdüin Jesúsu sarágu sánditiña

29 Ába láfuridun Jesúsu ñígiñe, ába lachülürün lárún dúna Galiléa, lárigiñe, ába laweínrun luágun ában wübü, ába lañúurun ñi. 30 Ába jayábin sarágu gürígia le ñíjin lubeí barúina jagía meíbuguntiña, maríjintiña, maríñaguntiña, danímaati jarüna, jáma sarágu jawúyeri sánditiña. Ába jíchuguniña lubádu lugúdi Jesúsu, ába lareídaguagüdüniña. 31 Ába laweíridun janígi gürígia láu jaríjin adímurejaña jamá já meja maríñagadibaña, areídagua ja danímaabaña arüna, eíbuga ja meíbuguñajabaña, aríja ja maríjijnajabaña. Ába jagúmeserun adímureja weírigu luágu Jabúngiute Israeelitagu.

Líchugun Jesúsu eígini joun gádürü mílu wügüríña
(Mr 8.1-10)

32 Ábati lagúarun Jesúsu joun láni disípulugu, ába laríñagun joun.

—Gudémetiña gürígia ja nun ladüga ürüwaali wéyu jáu núma ya áni úaali ni cáta jáma lun jeígin. Mabúseeruntina noúnajaniña jábiñoun meíginga, dagá líñein falálaü jawágu ümada.

33 Ábati jaríñagun láni disípulugu lun.

—¿Ída lubáti wadárirun eígini joun sarágu gürígia ya lídan fulásu le ñí lumuti úa jamá aganóutiña?

34 Ába lálügüdüniña Jesúsu.

—¿Átiriñoun fein júma?

Ába jaríñagun.

—Sédü, jáma biánraü úduraü.

35 Ába laríñagun joun gürígia lun jañúurun múarugu, 36 ába lanügünun sédü fein jáma úduraü jagía lújaburugu, ába leteíngiruni Búngiu. Ába lagúbachagunun fein, ába líchugunun joun láni disípulugu jáu sun úduraü, ába jafánreinjanun joun gürígia. 37 Jóutiña súngebui quimúle, buíngüda giñe sédü faníñe táu to ígiraguboun. 38 ¡Gádürüñanu mílu wügüríña eígitiña, mabájüdünga würíña jáma irájüñü! 39 Lárigiñe, ába loúnajaniña Jesúsu gürígia ágyu, ába ladinun tídoun ugúnein, ába lídin loúbawagun Mágdala.

16

Jamúriajan fariséogu jáma saduséogu ában seíni le láuti miláguru
(Mr 8.11-13; Lc 12.54-56)

1 Ába jóudin fariséogu jáma saduséogu aríjei Jesúsu. Lun jáburügüdüni tídoun sádara, ába jaríñagun lun lun larúfudun ában seíni láuti miláguru le siélugiñeti joun, afíñe jamámuga luágu lúmagiñe lan Búngiu liábin. 2 Ába laríñagun joun.

—Rábounwéyu, ába jaríñagun. “Buídubei dan ladüga funáti siélu.”

3 Bináafin, ába jaríñagun. “Wuríbabei dan ugúñe ladüga funáñu líña siélu áni jamúñounga.” ¡Biángua tigibu jugúya le! Subúdi luáguti ligáburi

dan jun, áni ibídiñeti jun luágu chülŷjali lan lidáani asálbaruni. ⁴ Gürígia wuríbatiña, múaraantiña ja, amúriajatiña seíni láuti miláguru lun jaffñerun luágu áu lan anúgübei asálbaruni joun gürígia. Wel, marúfudúnbei ámu seíni joun luei liseíni Jonás.

Ába lígiriñiña, ába lídin.

Ítara líña jarúfudajan fariséogu quei ísi

(Mr 8.14-21)

⁵ Dan le jájiñuragunbei disípulugu lúma Jesúsu loubáfurugun dúna, bulíei jamúti janŷgŷn fein. ⁶ Ábati laríñagun Jesúsu joun.

—Toúnigigua jumátia júngua luei jísite fariséogu jáma saduséogu.

⁷ Ába jagúmeserun disípulugu aríñaga jámaga.

—Ladŷgatia manŷgŷn wamá fein laríñagunbei ítara.

⁸ Ába lasúbudiruni Jesúsu, ába laríñagun joun.

—¿Ca uágu jadíjerida luágu úa tan fein júma? ¡Louguati gíñe jafiñen!

⁹ ¿ŷagili gunfaráanda jumá, marítangun jugúya tuágu seíngŷ fein to nafánreinjaboun jádan seíngŷ mílu wŷgŷriña lúma átiriñein lan faníñe táu ígiragutu? ¹⁰ ¿Bulíeiguatŷn funásan tuágu sédŷ fein to nafánreinjaboun jádan gádŷrŷ mílu wŷgŷriña lúma átiriñein lan faníñe táu ígiragutu? ¹¹ ¿Ída líñági meféen jubei luágu máma lan tuágu fein nadímureja dan le naríñagunbei jun lun jounigiragun júngua luei jísite fariséogu jáma saduséogu?

¹² Ába gunfaráanda jamáni luágu máma lan luágu tísitena fein laríñaga joun, luei lan arúfudajaní le jáni fariséogu jáma saduséogu lawéridiraña.

Laríñaguni Pédro luágu Jesúsu lan Crístubei

(Mr 8.27-30; Lc 9.18-21)

¹³ Dan le lachŷlŷrŷn Jesúsu ubúругu Cesaréa le Filípo ába lálŷgŷdŷniña láni disípulugu.

—¿Cátanasan lídan jarítangun gürígia, áu le Wŷgŷri Garaŷwarŷgŷti?

¹⁴ Ába jaríñagun.

—Añájein aríñagutiña luágu Juan lan lé meja abásteragŷdajabei amŷrŷ, jíbiri aríñaga luágu Elías ban, añájeingua aríñagutiña luágu Jeremías ban o ámu lan proféta.

¹⁵ Ábati laríñagun joun.

—Ánti jugúya, ¿cátanati lídan jarítangun?

¹⁶ Ába laríñagun Simón Pédro lun.

—Crístu le Liraŷ Bŷngiu le wínwanbei amŷrŷ, le ñŷbinbei asálbaraña gürígia ubouágu.

¹⁷ Ába laríñagun Jesúsu lun.

—Fuleíseiwatibu Simón, liraŷ Jonás, ladŷga máma lasúbudirágŷdŷn ni ába gürígia cátei le bun, lasúbudiragŷdŷn Nŷguchi Bŷngiu le siélubei bun. ¹⁸ Naríñajare bun luágu Pédro lan amŷrŷ, líla íri ligía, “dŷbŷ”, luáguba ébuu le nábuguoun nilígilisin, áni ni íbini ouweni mabáfubei tuágu. ¹⁹ Níchugubei ligélen arŷejani le lánina siélu bun, le cátei le uáguti baríñaga luágu moun lan jadŷgŷni affñetiña, ligía gíñe uágubei laríñaga Bŷngiu luágu siñá lan ladŷgŷniwa, le cátei le uáguti baríñaga luágu gayára lan ladŷgŷniwa, ligía gíñe le uágubei laríñaga Bŷngiu luágu gayára lan ladŷgŷniwa.

²⁰ Ábati laríñagun Jesúsu joun láni disípulugu lun maríñagun jamá ni ca un luágu ligía lan Crístubei.

*Ladímurejan Jesúsu luágu loúnwen**(Mr 8.31–9.1; Lc 9.22-27)*

²¹ Lúmagiñe dan ligía, ába lagúmeserun Jesúsu aríñaga joun láni disípulugu furáangu luágu lúnti lan lídin Jerusalén, luágu giñe jasúfuriragüdúbei lan wügüríña weirigutiña lídan jafiñen juríu, jáma jábutigu jafádirigun juríu, jáma arúfudajatiña lilúrudun Moisés. Aríñagati joun luágu láfarúba lan jilágubei, áni lásaaruba lan luágu lürüwan wéyu. ²² Ába ladíñurun Pédro láu Jesúsu ñígiñe murúsun, ába laríñagun lun táu sun lanígi.

—¡Mabúseeraleí Búngiu líra, Nabúreme! ¡Siñáti lasúseredun cátei le bun!

²³ Ába lagáraragun Jesúsu, ába laríñagun lun Pédro.

—¡Dísebá nueí, Máfia! Babúseerúña beréderuni ladügüniwa lugúndan Búngiu. Masáminaruntibu quei Búngiu, basáminarun quei wügüri.

²⁴ Ábati laríñagun Jesúsu joun láni disípulugu.

—Le busénti lafálarunina, bulíeileí cáteiñein lan, awándaleí sun luwúyeri asúfuriruni le lúnbei liábin lun nueígiñe queísi lanügüni ában wügüri lugúruwan, falálana. ²⁵ Ladüga le abúseeruti leséfuragun lúngua ya ubouágu leféridirubei ibágari le magúmuchaditi, ánjein le ánjabei leféridiruni libágari ya ubouágu nueígiñe, libíjubei ibágari le magúmuchaditi siélu. ²⁶ ¿Cági ju lan lun gürígia lagáñeiruni sun le lánina ubou le, leféridireime lubára siélu? Úati ni cáta lánina ubou le áuti gayára lan lagáñijan gürígia ubáraü siélu. ²⁷ Nagíribuduba, áu le Wügüri Garaüwarügüti, úara jáma náni ánjeligu, niábinba láu uweiriguni le meme láni Nüguchi. Ábameti nafáyeiruniña gürígia quei ligáburi le adüga jamáalibeí. ²⁸ Ninárün jáu luágu añájein lan jádaangiñe ja yábaña guetó, moúnwenbaña daríme jaríjini liábin narúeijan, áu le Wügüri Garaüwarügüti.

17*Lámuñedagun laríjín Jesúsu**(Mr 9.2-13; Lc 9.28-36)*

¹ Sísi wéyu lárigiñe, ába lanügüniña Jesúsu Pédro, Jacóbo, lúma Juan le lamúlen Jacóbo, ába lídin jáu luágu ában wübü íñuti, jagía rügüñanu ñi. ² Ába lámuñedagun laríjín Jesúsu ñi jagíbugiñe, ába lámiridun ligíbu quei wéyu, ába tájarudun lanáangun quei larúgounga. ³ Sódini ába jaríjini Moisés lúma Elías (já meja abágaridubaña lídan dan le sügüjalibeí) ayánuja lúma Jesúsu. ⁴ Ába laríñagun Pédro lun Jesúsu.

—Nabúreme, ¡lídan dan awánja lan ya! Ánjabu busén, adüga wagíame ürüwa dibásein ya, ában bun, ában lun Moisés, ában lun Elías.

⁵ Dan niján lan Pédro adímureja, ába liábin ában juánriñu miríti, ába loúburaguniña, ába lagaambúniwa ában umálali lídaangiñe juánriñu ligía le aríñagubei.

—Niján niraü le jínsiñebei nun, le aúbei oúnwenbun lan nugúndan, adüga jumeí le lubeíbei.

⁶ Dan jagáambuni disípulugu, ába jabúluchagun láu jagíbu múarugu le luweírín janúfude. ⁷ Ába liábin Jesúsu jawágun, ába lagúrurun jawágu, ába laríñagun joun.

—Sarájuma, manúfudeda jumá.

⁸ Dan le jaríjinbei, maríjinjaña ámu lueídügü Jesúsu.

⁹ Dan le arárireina jamáni wübü, ába laríñagun Jesúsu joun.

—Mabájudagua jumeítia cátei le aríja jumáalibei lun ni ában daríme saráadina, áu le Wügüri Garaüwarügüti, lídaangiñe ouweni lúnya nabágaridun.

¹⁰ Ábati jaríñagun disípulugu lun Jesúsu.

—Guetó subúdi wamáali luágu amürü lan Crístubei. Quei ítara líña lubeí, ¿cáti uágu jaríñaga arúfudajatiña lilúrudun Moisés luágu lúnti lan liábin Elías lubáragiñe liábin Crístu?

¹¹ Ába laríñagun Jesúsu joun.

—Inárüni luágu liábinba lan Elías, ábame líchugun sun cátei lídoun lubúdubu, ¹² áni naríñajare jun luágu ñübinjali lan Elías, masúbudirun jamúti gürígia, adügarügü jamúti sun le jabúseerubei láu. Ítara lúba giñe jasúfuriragüdüna, áu le Wügüri Garaüwarügüti.

¹³ Ábati jasúbudiruni disípulugu luágu Juan lan lé meja abásteragüdjabei, ligía lan Elíasbei le uágubei ladímureja Jesúsu.

Lareídaguagüdüni Jesúsu ában irájü goúwejaditi
(Mr 9.14-29; Lc 9.37-43)

¹⁴ Dan le jachülürünbei le ñíjin jabei gürígia, ába liábin ában wügüri lúmoun Jesúsu, ába lájuduragun ligíbugiñe, ába laríñagun lun.

¹⁵ —Nabúreme, gudemelá nisáani bun, goúwejaditi, weírititi lasúfurirun, níjein dan jeíguati wáturugun, níjein dan dúnarugun. ¹⁶ Barü numuti ñájoun joun báni disípulugu, siñá jamuti areídaguagüda.

¹⁷ Ába loúnabun Jesúsu.

—¡Gürígia mafíñeradiña, gürígia wuríbatíña! ¿Átiribeísan dan lun neréderuni júma lubá gayára lan jafíñerun nuágu? ¿Ídame lagúmucha mafíñeni le jídaanbei? Barüjumei irájü ligía ñájoun.

¹⁸ Ábati ladeínjan Jesúsu lun espíritu wuríbati ligía, ába láfuridagüdüni lídaangiñe lúmagiñe óra ligía, ába lareídagan irájü le.

¹⁹ Lárigiñe, ába jadímurejan disípulugu lúma Jesúsu jábugua, ába jálügüdüni.

—¿Cásan uágu siñá wabalin espíritu wuríbati ligía aságara?

²⁰ Ába laríñagun Jesúsu joun.

—Ladüga liloúguan jafíñen. Ninárün jáu luágu ánjein lan ibíja jubeí fe íbini ñúraúraü lan quei ában tágu mostása, jaríñaguba lun wübü le. “Gidába yágiñe, beíba lídoun ámu fulásu”, ábame lagídarun wübü ligía. Úabei ni cáta jásiñerun ánjein ibíja jubeí fe le tímatimaati. ²¹ Ánjeinti jíbe espíritugu ja, láu rügüñein ayúmuraguni lun Búngiu lúma ayúnaruni gayára lan jaságarúniwa.

Ladímurejaanya Jesúsu luágu loúnwen
(Mr 9.30-32; Lc 9.43-45)

²² Dan le eíbugeina jamá úara loúbawagu Galiléa, ába laríñagun Jesúsu joun luágu ledéregerúaba lan, ligía le Wügüri Garaüwarügüti, jájaburugun wügüriña wuríbatíña, ²³ ábame jáfaruni jilágubei, áni lásaaruba lan lídaangiñe ouweni luágu lürüwan wéyu. Ába jírudagun sarágu dan le jagáambuni cátei le.

Lafáyeirúniwa tiseínsuna témpulu

²⁴ Dan lachülürün Jesúsu jáma láni disípulugu Capernaúm, ába jóúdin ja agúburajabalin tiseínsuna témpulu to Jerusalénboun lúmoun Pédro, ába jaríñagun lun.

—¿Mafáyeijantisan jumáesturun tiseínsuna témpulu?

²⁵ Ába louñabun Pédro, ába laríñagun lun.

—Afáyeijati.

Dánti lebélorun Pédro múnadoun, ába lálügüdüni Jesúsu Pédro lubáragiñe gayára lan ladímurejan.

—¿Ída líña baríjin lun líra, Simón? ¿Cátaña jagúburajabaña urúeigu ja lánina ubou le, jásan lílana fulásu ódi ja teréncha?

²⁶ Ába laríñagun Pédro lun.

—Ja teréncha.

Ába laríñagun Jesúsu lun.

—Játi lílana fulásu jáledi mouñ lumuti lubeíti jafáyeijan, áu le Li-raü Búngiu, mouñ lumuti nafáyeijan tiseínsuna lúban Nóguchi. ²⁷ Lun magáñidagüdüñ wamá ni ában, beíba, ábame bachürunun bürünjüre dúnarugun, ábame badígini furúmiñeti úduraü le eígiti bun. Badáriruba ában seínsu liyúmulugu úduraü ligía, buídurügübei lun bafáyeijan wawougua láu, ábame bafáyeiruni.

18

¿Cáteisan weírigutimaabei lídan larúeijan Búngiu?

(Mr 9.33-37; Lc 9.46-48)

¹ Lídan dan ligía, ába jayábin disípulugu lúmoun Jesúsu, ába jálügüdüni.

—¿Cáteisan weírigutimaabei lídan larúeijan Búngiu?

² Ába lanügün Jesúsu ában irájü, ába líchuguni jamídan jámagua, ³ ába laríñagun.

—Nínárün jáu luágu ánjaün lan mayábin lun jítaradun quei irájüñü, mebélubadün lídoun larúeijan Búngiu. ⁴ Ítara líña lubeíti, le ñúraüti lanáangun lúngua, ñübin ligía lun ítarabei lan quei ában irájü, ligía weírigutimaabei lídan arúeijani le lánina siélu. ⁵ Gürígia gíñe le erésibiruti ában irájü lídan níri resíbi lumútina gíñe.

Luríban lafíngüngüdüñiwa ában gürígia

(Mr 9.42-48; Lc 17.1-2)

⁶ Furúmieguarügü le afíngüngüdüti ában jádaangiñe ja isérigiñabaña lídan jafíñen nuágu, buítimaati jamúga lun lun lagurúniwa baránajoün láu ában oúnwenbun dübü le amúligüleí güráñu luágu ligína sügü láu ladügüni cátei líra. ⁷ ¡Wuríbati lun ubou, níjein lán buri cátei le afíngüngüdübaliña gürígia! Súnwandan ñíbei lan, áni ¡fugíabu le wügüri le lébunabei!

⁸ Ligía ánjein lubeí lafíngüngüdübadi bu lubeí bújabu o bugúdi lan, dūrūbei, fíbei díse buáriu, buítimaati lun bebélurun siélun májabuga o magúdiga, sügü láu badarún láu biángubei bújabu lúma biángubei bugúdi máfiougatin le ñí lubei wátu le méñeguchadibei. ⁹ Ánjein bágu lubeí afíngüngüdübadi bu, sagábei, fíbei díse buáriu, buítimaati lun bebélurun siélun máguga sügü láu badarún láu biángubei bágu máfiougatin.

Jémpulu tuáguti mudún to eféridiruboun

(Lc 15.3-7)

¹⁰ Manüga jumá ni ában jádaangiñe ja ünabugububaña ja quei ni cáta. Naríñajare jun luágu ligíbugiñeñanu lan Nóguchi Búngiu le siélubei ánjeligu ja aríjubaña jáu afíñetiña ja súnwandan. ¹¹ Ladüga asálbarei le féridijalibei yebe niábin, áu le Wügüri Garaüwarügüti.

12 ¿Ída líña jaríjin lun? Ánjein añájein lubei san mudún lúma ában wügüri, teféridira ában jádaangiñe, ¿ma lígirubaña jíbiri luágu wübü, ábame lídin áluajoun to ayúridaguboun? 13 Ánjounti ladárira, choúruti luágu gúndaabei lan táu sügü jáu ja mayúridagunbaña. 14 Ítara líña giñéti, mabúseerunti Júguchi Búngiu le siélubei lun leféridirun ni ában jádaangiñe ünabugutiña ja.

*Ligáburí ferúdunawa jamá idújeñu lueígiñe Jesucristu
(Lc 17.3)*

15 Ánjein adüga bidúje ában wuríbani bun, badímureja lúma jábuguarügü, ábame basúbudiragüdüni lidúnrun lun. Ánjein adüga gásu báu, gamádaguayáadün. 16 Ánjein madügün gásu báu, ábame banügün ában o bián güriá jánwoun lun sun lan le aríñawagüti, añájein jamámuga ámu geféentiña luágu. 17 Ánjein madügün gásu jáu, ábame baríñaguni lun jadámurin afíñetiña, ánjein madügün gásu láu adámurini, ábame banügüni quei ában mafiñeti luágu Búngiu o quei lan ában agúburajati liseínsuna gumádi, gayára lámuga lasáansiruni luríban ligáburí.

18 Ninárün jáu luágu le lan cátei le uáguti jaríñaga jugúya disípulugu luágu moun lan jadügüni afíñetiña, ligía giñe uágubei laríñaga Búngiu luágu siñá lan ladügüniwa, le cátei le uágubei jaríñaga luágu gayára lan ladügüniwa, ligía giñe le uágubei laríñaga Búngiu luágu gayára lan ladügüniwa.

19 Naríñajare giñe jun luágu ánjaña lan úarada biáma jádaangiñe ya uboúagu lun jamúriajan ában cátei lúma Búngiu le siélubei, lichugubei jun, 20 ladüga le ní jamuti biáma o ürüwa oúndaragu lídan níri, anájein ní jamídaangua.

21 Ába layárafadun Pédro lun Jesúsu, ába laríñagun lun.

—Nabúreme, ¿átiribeísan weíyaasu ladügün nibíri ában wuríbani nun lun ferúduna méme náani? Darí sédü weíyaasu?

22 Ába laríñagun Jesúsu lun.

—Maríñaguntina bun luágu darí lan sédü weíyaasu lúnti ferúduna báani, darí ürüwa-wein-díisi weíyaasu sédü.

Jémpulu luáguti músu le májabei ferúduna lan

23 Ligía ítara líña lubei arúejani le lánina siélu quei ában urúei le ñübinbei lun laráansejan luágu seínsu jáma lumúsuníña. 24 Lagúmesera adügei, ába janügün ában le adúweirubalin sarágu míñun fiádürü, 25 quei maseínsun lan lun lafáyeijan, ába laríñagun urúei lun lalúgurúniwa idámunime táu sun lúmari, lirájüñü, lúma sun le lúmabei lun lafáyeiruni ladúweijan. 26 Ába lájuduragun músu ligía ligíbugiñe urúei, ába layúmuragun lun ítara. “Nabúreme, gagúraasunbá nubá, nafáyeirubei sun le nadúweirubei bun.” 27 Ába lagúdemedagun lun urúei, ába ferúduna láani ladúweiruni, ába lígiragüdüni. 28 Quei láfuridun músu ligía ñígiñe, ítara ladúnragun lúma ában músu líledi le adúweirubalin átiri fiádürü. Ába lárügüdüni lueígiñe ligíña, ába lagúmeserun achócorei, ába laríñagun lun. “Fáyeibeí le badúweirubalina.” 29 Ábati lájuduragun ligíbugiñe, ába layúmuragun lun ítara. “Gagúraasunbá nubá, nafáyeirubadibu.” 30 Májati le ában, ñüdünrügü ligía ába ládaruni furísunrugun darí lafáyeiruni ladúweijan. 31 Dan le jaríjinbaalin ja jíbiri músu cátei le, ába lagáridun joun sarágu, ába jóúdin, ába jabájüdaguni

lun urúei. ³² Ába loúnajan urúei ougei, ába laríñagun lun. “¡Músu wuríbatí! Ferúduna numúti sun badúweijan ladüga bayúmragun nun. ³³ Lúnti yebe gíñe gudéme lan bouba bun quei bagúdemedun nun.” ³⁴ Ába lagáñidun urúei sarágu, ába líchugun dimúrei lun jasúfuriragüdüni daríme lafáyeiruni sun ladúweijan.

³⁵ Ába lásurun Jesúsu aríñageina.

—Ítara lúba gíñe ladüga Nüguchi Búngiu le siélubei jun ánjaün úa ferúduna láani cáda ában jídaangiñe libíri tídaangiñe lanígi.

19

Larúfudajan Jesúsu libügürü ígiraguni
(Mr 10.1-12; Lc 16.18)

¹ Lárigiñe laríñaguni Jesúsu sun cátei le, ába lídin Galiléagiñe lun loúbawagun Judéa le lueígiñebei oubaü le ñígiñe lubei laboucha wéyu libíti Jordán. ² Sarágu jáña gürígia afálaruti, ába lareídaguagüdüniña sánditiña ñi.

³ Ábati jayábin fiú fariséogu lúmoun Jesúsu áluga jáburugüdüni tídoun sádara, ába jálügüdüni.

—¿Según barítagun, gayáraatísan lígirunun gürígia lúmari lueígiñe furúmieguaügü cátei?

⁴ Ába loúnabun Jesúsu.

—¿Malíjangidün tídan Lerérun Búngiu luágu lúmagiñe lan furúmiñeti dan, dan le ladügünbaliña Búngiu gürígia, adüga lumúti wügüri, adüga würi? ⁵ Aríñagati gíñe. “Ligía lígirubei lubei wügüri lüguchi túma lüguchu lun laganouñiwa túma lúmari, ábame jeréderun quei ábanrügü.” ⁶ Mámaaña lubeíti bíama, ábanrügaaña. Ligía mouñ lubei lafánreinraguni wügüri le ladúnraguagüdübei Búngiu.

⁷ Ábati jálügüdüni.

—¿Cáti uágu laríñaga lilúrudun Moisés lun lan tíchugúniwa gárada lánina ígiraguni tun würi lun tigrún?

⁸ Ába laríñagun Jesúsu joun.

—Ladüga tidére janígi lánjarunbei Búngiu lun jígiragun jáma júmarigu, máma líña meja furúmiñe. ⁹ Naríñajare jun luágu furúmieguaügü lan le ígirutu lúmari ába lagámaridun ámu, ladügüña adultériu, mámarügaali ligía ladüga tagámaridun ligíbuagun, le gíñe agámariduti würi to ígiraguaaru, ladügüña gíñe adultériu.

¹⁰ Ábati jaríñagun láni disípulugu lun.

—Ánjein ítara líña lubei luáguti wügüri túma lúmari, buítimaati lubei lun magámaridun jamá gürígia.

¹¹ Ába laríñagun Jesúsu joun.

—Másutiña gayára jabágaridun mámariga, ja rügüñanu únbaña rújali lan Búngiu ubáfu. ¹² Ámuñegueinarügüti lébuna magámaridun jamá wügüriña, añájein, ítaragubeíñanu lúmagiñe jagüriajoún, jíbiri, adügüwarügüti joun, jíbiri, reídeitiña magámaridunga lun jederegeragun joúngua le gumúti lun jesériwidun lun Búngiu. Le gabáfubei lun magámaridun lan, magámaridalá.

Labíniruniña Jesúsu irájüñü
(Mr 10.13-16; Lc 18.15-17)

¹³ Ába janügüniwa irájüñü lun Jesúsu lun líchuguni lújabu jawágu lúma lun layúmuragun lun Búngiu jawágu, ába jagúmeserun disípulugu adeínja joun ja anájabaliña. ¹⁴ Ába laríñagun Jesúsu joun.

—Ígira jumá lun jayábin irájüñü nun, mamájara jumá, ladüga ja jarúmabaña afíñe quei irájüñü, jagía lílana arúejani le lánina siélu.

¹⁵ Ába líchuguni lújabu jawágu irájüñü jagía, lárigiñe, ába lídin lídaangiñe fulásu ligía.

*Ladímurejan ában wügüri ñúraügili lúma Jesúsu
(Mr 10.17-31; Lc 18.18-30)*

¹⁶ Ába lídin ában wügüri ñúraügili aríjei Jesúsu, ába laríñagun lun.
—Maésturu buíti, ¿cásan cátei buíti lúnbei nadügüni lun nibíjini ibágari le magúmuchaditi?

¹⁷ Ába laríñagun Jesúsu lun.

—¿Ca uágu baríñaga nun “buíti”? Ában rügüñein buíti, Búngiu. Ánjein busén bubei bibíjini ibágari magúmuchaditi, gúnfulibá lúma gumádi.

¹⁸ Ába laríñagun wügüri ligía lun.

—¿Cáteigi buri?

Ába laríñagun Jesúsu lun.

—Máfarajabá, magámaridabá würi gámaritu, míwerujabá, madímurejabá iyéeni luágu ni ában, ¹⁹ inébe jamá bagübürigu bun, jínsiñe jagíame gürígia bíledigu bun quei bínsiñegua búngua.

²⁰ Ába laríñagun lun.

—Gúnfuli numúti sun le lúmagiñe ñúraügidina, ¿cági ámu nemégeirubei?

²¹ Ába laríñagun Jesúsu lun.

—Ánjein busén bubei buídu ban le gumúti, alúgurabeí sun le búmabei, ábame bíchuguni lebégi joun gudémetiña, ábame bibíjin irisini siélu, ábameti biábin, ábame bafálarunina.

²² Dan lagáambunbalin wügüri ligía cátei le, májati, ladüga weíribalin Jesúsu cába lan ladügti lirísini, ába lídin láu íruni.

²³ Ábati laríñagun Jesúsu joun láni disípulugu.

—Nínárün jáu luágu jénreengu lan lun lebélorun ában rísiti lídoun arúejani le lánina siélu. ²⁴ Aríñagaya numúti jun luágu ménreenguntima lan lásügürün ában caméyu lídaangiñe lujúyun ában agúsa, sügü láu lebélorun ában rísiti lídoun arúejani le lánina siélu.

²⁵ Dan jagáambuni disípulugu cátei le, ába laweíridun jan-balin Jesúsu cába lan ladügigi sarágu, ába jálügüdagun jámagua.

—¿Cáteiti gayáraabei lasálbarun?

²⁶ Ába laríñaguniña Jesúsu, ába laríñagun joun.

—Siñáti jasálbaragun gürígia jóungua, ánjein Búngiu, gayára lumúti sun cátei adüga.

²⁷ Ábati laríñagun Pédro lun.

—Nabúreme, wagía, ígira wamáali sun lé meja wámabei lun wafálarunibu. ¿Cábasanti wabíja?

²⁸ Ába laríñagun Jesúsu joun.

—Nínárün jáu luágu lídan lánme dan ligía dánme iséri lan sun cátei, dánme le nañúurun, áu le Wügüri Garaüwarügüti luágu nála yágüta siélu lun narúejan láu sun nuweírigun, jugúya le afálarubalina jañúuruba gíñe luágu dúusu jalaü lun jagúseragüdüniña dúusugubei láni Israél türíbu.

²⁹ Súnti ja ígiraañábaña jában, o jamúleno, o játono, o jagübürigo, o jasáanigo, o jamúan, nuágu, jerésibiruba san weíyaasu lánwoun, resíbi jameíme ibágarí magúmuhaditi. ³⁰ Áni sarágu jáña ja furúmiñetiñábaña guetó, jagíaba agúmujóuni, sarágu ja agúmujóunibaña guetó, jagíaba furúmiñe.

20

Jémpulu jawáguti ñadágimeintiña

¹ Ába laríñagun Jesúsu.

—Ítara líña arúejani le lánina siélu quei ában labúreme ichári le áfuridubei bináafingua áluaja ñadágimeintiña lun talúbajoún linádirigu. ² Ába ladügün darádu jáma ñadágimeintiña lun líchugun fiádürü joun luágu wéyu, ába loúnajaniña ñadágimein líchárirugu. ³ Lárigiñe, ábaya láfuridun quei buri ladaünrún néfu bináafin, ábaya ladárirun ámu wügüríña mafísiutetiña, mágidirugu. ⁴ Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” Ába jóudin. ⁵ Ábaya láfuridun amídirugu, furí ligía ladaünrún ürüwa rábounwéyu, ligía méme ladüga. ⁶ Quei buri ladaünrún seíngü rábounwéyu, ábaya lídin mágidirugu, ábaya ladárirun wügüríña mafísiutetiña ñi, ába laríñagun joun. “¿Cásan uágu yá jubei sun wéyu mawádigimariga?” ⁷ Ába jaríñagun lun. “Úgali ni ában álugutiwa.” Ába laríñagun joun. “Jeíba gíñe ñadágimein nichárirugu, ábame nafáyeiruni lebégi juwádigimari jun.” ⁸ Dan le lagúñedunbei, ába laríñagun labúreme ichári lun jábuti ñadágimeintiña. “Wába joun ñadágimeintiña, fáyei bámugaña, bagúmeserame jámagiñe ja atátirubaña agúmujóuni, bagúmuhame jáma ja atátirubaña furúmiñe.” ⁹ Ábati jayábin ja atátirubaña ñadágimein quei buri ladaünrún seíngü rábounwéyu, ába jíbjin fiádürü cáda ában. ¹⁰ Lárigiñe, dan le lachülürün jadáani ja atátirubaña furúmiñe, ába jarítangun luágu gíbetimaabei lan jabjín. Ába gíñe jabjín fiádürü cáda ában. ¹¹ Dan le jerésibiruni jaseínsun, ába magúndan jamá lúma labúreme ichári, ¹² ába jaríñagun. “Ja ñübinbaña agúmujóuni, ában rügüñein óra jawádigimari, ában lábu bafáyeiruniña quei wagía, wagía le awándubalin wadágimanu lúma lísuga sun wéyu.” ¹³ Ába loúnabun labúreme ichári, ába laríñagun lun ában jádaangiñe. “Numáda, máma nadügüña ni murúsun maríchaü jun. ¿Ma funági luágu ában fiádürü jadüga darádu núma? ¹⁴ Barújumei jiseínsun, jeíba. Nafáyeiruñanu ja atátirubaña agúmujóuni quei nafáyeirunün ladüga ítara líña lan nabúseerun. ¹⁵ ¿Maríchatina funági lun nadügüni le nabúseerun láu niseínsun? ¿Ódi gimúgatün ladüga nubuídun?” ¹⁶ Ítara líña lubeíti, sarágu jáña ja agúmujóunibaña guetó, jagíaba furúmiñetiña, sarágu jáña gíñe ja furúmiñetiñábaña guetó, jagíaba agúmujóuni. Ladüga sarágu jáña agúarútiña áni míbetiña anúadirútiña.

Ladímurejaanya Jesúsu luágu loúnwen

(Mr 10.32-34; Lc 18.31-34)

¹⁷ Dan le niján lan Jesúsu luágu üma lun Jerusaléoun, ába ladíñurun jáu láni dúusu disípulugu jaweí ja jíbiri gürígia ja luágubaña üma úara jáma, ába laríñagun joun.

¹⁸ —Quei lubeí jaríjini, aweínreina wáña Jerusaléoun le ñüba lubeí nedéregerúa, áu le Wügüri Garaüwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasíadirunína lun

noúnwen. ¹⁹ Ábame jedéregerunina joun ja mámabaña juríu lun jéjerajan náu, áfara jamáname, ábame jádaragunina luágu gurúwa, áni násaaruba lídaangiñe oúweni luágu lürüwan wéyu.

Le tamúriajabei jáguchu Jacóbo láu Juan lúma Jesúsu
(Mr 10.35-45)

²⁰ Ábati tiábin jáguchu Jacóbo láu Juan, ja lisáanigu Zebedéo, lúmoun Jesúsu jáu tisáanigu, ába tájuduragun lun tamúriajan ában fuleisei lúma.

²¹ Ába laríñagun tun.

—¿Ca babúseerubei?

Ába taríñagun lun.

—Aríñagabá lun jañúurun bián nisáanigu ja, ában lueígiñe boúnwenren, ában lueígiñe bubaúna yágüta lídan barúeijan.

²² Ába laríñagun Jesúsu joun.

—Íbidiñeti jun ca lan jamúriajabei. ¿Gayáraati jawánduni luweírín igárigu le lúnbei nawánduni, gayára ligíame júaradun núma lídan nasúfurirun?

Ába jaríñagun.

—Gayára wabeí.

²³ Ába laríñagun joun.

—Inárüni, lúnti jawánduni igárigu le lúnbei nawánduni, úara jugúyame núma lídan nasúfurirun, ánjeinti lun jañúurun lueígiñe noúnwenren lúma lueígiñe nubaúna, máma áu lúnbei níchuguni, líchugúaba joun ja ubáabaña laráanserei Búngiu.

²⁴ Dan le jagáambunbalin jíbiri díisi disípulugu cátei le, ába jagáñidun jáma bián amúlenugu jagía. ²⁵ Ába lagúarun Jesúsu joun, ába laríñagun joun.

—Queísi jasúbudiruni, ja agúmadijabaña jádan ja mámabaña juríu arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ²⁶ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ²⁷ Furúmieguaügü jídaangiñe le abúseeruti lun ligíaba lan furúmifñeti, lúnti idámuni lan joun jíbiri ²⁸ ítara quei máma lan niábiña, áu le Wügüri Garaüwarügüti, lun nesériwidúniwa, niábiña lun nesériwidun lúma lun níchuguni nibágari lebégame jasálbarun sarágu.

Lareídaguagüdüñ Jesúsu bián maríjintiña
(Mr 10.46-52; Lc 18.35-43)

²⁹ Dan le áfurideina jabeí Jesúsu jáma láni disípulugu Jericógiñe, sarágu jáña güriía afálaruti Jesúsu. ³⁰ Níñanu bián maríjintiña ñun lárú úma, dan le jagáambun luágu Jesúsu lan le ásügürübei, ába jagúaragun.

—¡Wabúreme, ladügawagun Davíd, gudéme wamá bun!

³¹ Ába jadeínjan güriía joun lun jámanichun, ligíatima jagúaragun.

—¡Wabúreme, ladügawagun Davíd, gudéme wamá bun!

³² Ába leréderagun Jesúsu, ába lagúarun joun, ába laríñagun joun.

—¿Ca jabúseerubei nadügün jun?

³³ Ába jaríñagun lun.

—Wabúreme, buséntiwa waríjin.

³⁴ Ába jagúdemedagun lun Jesúsu, ába lagúurun luágu jágu. Lúmagiñe óra ligía ába jaríjin, ába jafálaruni.

21

Lebélorun Jesúsu Jerusaléoun

(Mr 11.1-11; Lc 19.28-40; Jn 12.12-19)

¹ Dan le yaráfaaña lubei lun Jerusalén, ába jachülürün ligíbugiñe fulásu le gíribei Betfajé, le ünabubei libíti wübü le Olívos, ² ába lariñagun Jesúsu joun biáma jádaangiñe láni disípulugu.

—Jeiba lídan liraüraü fulásu le wagíbugiñebei, jadáriruba ában burigü güráñu ñi láu ában liraüraü burigü túma, ábame jafáragaduniña, ábame janügüniña nun. ³ Ánjein ñi adímurejati jun lueigiñe jadügüni, ábame jariñagun lun luágu busén lániña Jesúsu, luágu láguyugüdübaña lan.

⁴ Lasúseredunbei líra lun lagúnfulirun lé meja lariñagubei proféta dan le labürüjanbei ítara.

⁵ Aríñaga jumá lun ubúruğu Sión.

“Niteín Burúeite bun láu ünabuni,

waríñu lanágawagu ában burigü,

waríñu luágu ában liraüraü burigü, anímaalu anáajati ílaü.”

⁶ Ába jóudin disípulugu, ába jadügüni quei lariñaguni Jesúsu joun. ⁷ Ába janügünun burigü tugúya láu sun tiraü, ába jíchugunun janáangun jawágu, ába lawárirun Jesúsu. ⁸ Sarágu jañáti gürígia, ába jábudunun janáangun luágu üma, jíbiri, ába jáchajuan tilímun wéwe, ába jíchaajani luágu üma. ⁹ Dáundu gürígia ja ubáraübaña quei ja árigibaña, ába jagúmeserun agúaraja.

—¡Uweíríguni lun ladügawagun urúei Davíd! ¡Biniwati wügüri le ñübinbei lídan líri Wabúreme Búngiu! ¡Uweíríguni lun Búngiu!

¹⁰ Dan lebélorun Jesúsu ubúrugun Jerusalén, ába jafúudun sun ja ñíbaña, ába jariñagun sarágu.

—¿Cáteisan gürígia le?

¹¹ Ába jariñagun gürígia.

—Jesúsu le, le Nazarétna, fulásu le lídaanbei Galiléa. Ligía ában proféta.

Larúmadagüdünnun Jesúsu témpulu

(Mr 11.15-19; Lc 19.45-48; Jn 2.13-22)

¹² Lárigiñe, ába lebélorun Jesúsu tídoun láni Búngiu témpulu, ába labúgaguniña sun alúgurajatiña jáma agáñijatiña ja ñíbaña. Ába lagáragaguni dábula buri le jadábulan asáansijabaña seínsu ñi joun gürígia, lúma jála ja alúgurajabaña únjun.

¹³ Ába lariñagun joun.

—Lariñajare Búngiu tídan Lerérun. “Núban fulásu le ñí lubei gayára lan jayúmuragun gürígia nun”, ánjein jugúya, barü jumaaru quei jában jíwerutiña.

¹⁴ Ába jayábin fiú maríjintiña jáma danímaatiña lúmoun Jesúsu ñi témpulurugu, ába lareídaguagüdüniña. ¹⁵ Dan le jariñbaalin jábutigu fádirigu jáma arúfudajatiña lilúrudun Moisés miláguru buri le ladáagubei, lúma dan le jagáambuni jagúarajan irájüñü témpulurugu. “¡Uweíríguni lun ladügawagun urúei Davíd!”, ába jagáñidun. ¹⁶ Ába jariñagun lun Jesúsu.

—¿Agáamba bumútisan le jariñagubei ja?

Ába lariñagun Jesúsu joun.

—Ánja, agáamba numúti. ¿Malíjan jumágili tídan Lerérun Búngiu le ñí lubei lariñawagüa lun Búngiu.

Adügaadibu lun jerémujan ñübürigiña jáma irájüñü ja machülaagiña,

cátei buíti buágu?

¹⁷ Ába lígíruniña, ába lídin ubúrugugiñe lun Betánioun, ába lásügürüni áriebu ñi.

Líñaragunun Jesúsu tídibu ígo to múnboun

(Mr 11.12-14, 20-26)

¹⁸ Larúgan bináafin, dan le lagíribudun Jesúsu ubúrugun, ába lalámachun.

¹⁹ Ába laríjin ában tídibu ígo láru úma, ába lídin tuágun, madáriti ni cáta tuágun lueídügüya ubánaü. Ába laríñagun tun tídibu ígo tugúya.

—¡Magíindadügüyabá!

Lídan óra ligía ába tásaürün. ²⁰ Dan jaríjini disípulugu cátei le, ába laweíridun janígi, ába jaríñagun lun Jesúsu.

—¿Ída liñásan tásaürübei tídibu ígo to ítara oufun?

²¹ Ába laríñagun Jesúsu joun.

—Nínárün jáu, ánjaün afiñe le gumúti, mámarügübei líbe le nadügübei tun tídibu ígo to gayára jumá adúga, gayáraabei jaríñagun lun wúbü le. “Gidába yágiñe, dabúba baránajoun”, ábame lasúseredun. ²² Súnme giñe cátei le jamúriajan lúma Búngiu, ánjein afiñe jubei, jibíjubei.

Lubáfu Jesúsu

(Mr 11.27-33; Lc 20.1-8)

²³ Ábati lebélorun Jesúsu témpulurugun, dan niján lan arúfudaja ñi, ába jayábin jábutigu fádírigo jáma wügüríña ábutigu lídan jaffínen juríu, ába jaríñagun lun.

—¿Aríñagabei woun ca lan biríchabei lun badügüni cátei le? ¿Ca íchugubalin ubáfu le bun?

²⁴ Ába laríñagun Jesúsu joun.

—Nálügüdaadün giñe ában cátei, ánjein jóunaba nun, ábame naríñaguni jun ca lan áu ubáfu nadügei buri cátei le. ²⁵ ¿Ca óúnajabalin Juan abásteragüdaja? ¿Búngiu, ódi wügüríña?

Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan óúnajabalin, laríñaguba woun ca lan uágu mafínerun wabei lun. ²⁶ Ánjawa aríñaga luágu jóúnajan lan wügüríña, jóuserubadiwa gürigia wuriba ladúga súngebuei affíñetiña luágu proféta lán.

²⁷ Ábati jaríñagun lun Jesúsu.

—Íbídiñeti woun.

Ába giñeti laríñagun joun.

—Maríñagun nubei giñeti jun ca lan áu ubáfu nadügei buri cátei le.

Jémpulu jawáuti bián isáanigu

²⁸ Ába laríñagun Jesúsu joun.

—Nabájüdagua ában cátei jun, jaríñageime nun ída líña lan jaríjin lun. Ñíñein ában wügürí, biámañanu lisáanigu. Ába laríñagun lun ában jádaangiñe. “Niraü, beiba ñadágimein ugúñe lídan talúbajoún ninádirigu.”

²⁹ Ába laríñagun lisáani lun. “Mabúseeruntina nídin.” Lárigiñe, ába lasáansiragun larítangun, ába lídin ñadágimein. ³⁰ Lárigiñe, ába lídin úguchili aríjei le ában, aríñageinaléi le méme laríñagubei buga lun le furúmiñeti lun. Ába loúnabun le. “Ánja, nídiba.” Mídinti. ³¹ Aríñaga jumei nun, ¿cági jádaangiñe biángubei adügübalin le labúseerubei úguchili?

Ába jaríñagun.

—Le furúmiñebei.

Ábati laríñagun Jesúsu joun.

—Nínárün jáu luágu chouúrutima lan jebélurun agúburajatiña liseínsuna gumádi jáma jórugu lídoun larúeijan Búngiu sүgү jáu, ³² ladüga ñübinti Juan le abásteragüdajabei arúfudaja jun ida lúba lan ligáburí jabágaridun, maffíneruntün lun, ánjañati ja agúburajabaña liseínsuna gumádi jáma jórugu, affíñeratiña lun. Jugúya, láu sun aríja jumáni sun líra, masáansiragunti jigáburí lun jaffíñerun lun.

Jémpulu jawáguti ñadágimeintiña ja wuríbabaña

(Mr 12.1-12; Lc 20.9-19)

³³ ‘Agáamba jumeí ábaya jémpulu le. Luáguti ában wügürí labúreme ában ichári, ában lábunagun tídibu beíbei lichárirugu, ába ladügün baríeru láu, adüga ligía ában ágei lun laríñagun tira beíbei lídoun lúma ában wáyelesi lun gayára lan loúnigiruni sun cátei.

‘Ába lájayajani ichári joun ñadágimeintiña, ába lídin adüga weíyaasu. ³⁴ Dan le lachülürün dan lun alúbajani, ába loúnajan jádaangiñe lumúsuniña amúriajei lufánran jámagiñe ñadágimeintiña. ³⁵ Ábarüga járügüdüniña ñadágimeintiña músu jagía, buleísei jameí ában, áfara jameí ában jilágubei, rúgua jagía dübü luágu le ában. ³⁶ Ábaya loúnajan labúreme ichári gíbetimaajaña sүgү jáu ja loúnajabaña furúmiñe, ligía méme jadüga ñadágimeintiña joun.

³⁷ ‘Agúmujóuni, ába loúnajani liraü, ába laríñagun lúnguarügü. “Inébebei niraü joun.” ³⁸ Dan le jaríjinbaalin ñadágimeintiña liraü, ába jaríñagun jámagua. “Nijánba le erésibirei alágan, wáfaraali jilágubei, reídei wamámuga láu alágan.” ³⁹ Ábati járügüdüni, ába jaságaruni lídaangiñe ichári, ába jáfaruni jilágubei.

⁴⁰ Ába lálügüdajan Jesúsu.

—Dánmeti liábin labúreme ichári, ¿cábagi ladüga jáu ñadágimeintiña ja?

⁴¹ Ába jaríñagun lun.

—Láfaragubaña wuríbatiña jagía jilágubei, magúdemedagúnbaña lun, ábame lájayajani ichári joun ámu ñadágimeintiña ja lúntiña jedéregeruni lufánran lun lídaangiñe alúbajani lídan dan.

⁴² Ábati laríñagun Jesúsu joun.

—¿Malíjañaja jumágiru Lerérun Búngiu? Taríñajare nuágu.

Le meja dübü le mabúseerun jabeí ábunagutiña, ligíaali furúmiñeti.

Wabúreme Búngiu adügübalin lun furúmiñebei lan, áni aríja wamúti quei ában cátei weíriguti.

⁴³ Ligía naríñagunbei jun luágu lagídarúaba lan larúeijan Búngiu jueí, jugúya le weírigubei lídan jaffíñen juríu, ábame líchugúniwa joun gürígia ja edéregeruti alúbajani le láni larúeijan Búngiu. ⁴⁴ Ánjeinti áu, le dübü ligía, furúmieguarügü le eíguaduti nuágun lañaürudagúba, léti uáguti leíguada nigáñi, lagúmuchaguagüdübei. Ligíaba asúsereda joun gürígia ja májabaña nun.

⁴⁵ Dan le jagáambunbalin jábutigu fádirigu jáma fariséogu jémpulu buri le líchugubei Jesúsu, ába jasúbudiruni luágu jawágu lan ladímureja. ⁴⁶ Ábati jabúseerün yebe járügüdüni, madügün jamúti ladüga janúfude jaweí gürígia, ladüga affíñe jamá gürígia luágu proféta lan.

22

Jémpulu luáguti maríei

¹ Ábaya lagúmeserun Jesúsu adímureja joun láu jémpulu, ába laríñagun joun.

² —Nijánya ában jémpulu luáguti arúejani le lánina siélu. Níñein ában urúei adügüti ában fédu lubá lamárieidun lisáani. ³ Ába loúnajaniña lumúsuniña oúgaña amísurajoútiña, májatiña amísurajoútiña jayábin. ⁴ Ábaya loúnajan ámu músu, ába laríñagun joun. “Aríñaga jumá joun amísurajoútiña luágu aráanseeli lan eígini. Áfaragüda náaña bágasu jáma nilügüniña anímaalugu dibúnetiña, aráanseeli sun cátei, lun jayábin maríeirugu.” ⁵ Madügüntiña amísurajoútiña gásu. Ába lídin ában jádaangiñe lichárigu, ññdün ában adüga ámu wadágimanu, ⁶ ja jíbiri, ába járügüdüniña lumúsuniña urúei, ába jóuseruniña wuríba, ába jáfaraguniña jilágubei. ⁷ Ábati lagáñidun urúei sarágu, ába loúnajaniña lisúdaaranigu áfaraguaña gáfarajatiña jagía jilágubei lúma águdei jageíra. ⁸ Ába laríñagun joun lumúsuniña. “Aráanseeli sun cátei lun maríei, áni amísurajoútiña jagüra madúnamatiña lun jamísurajoúniwa. ⁹ Jeiba lubeiti luágu buri larígei úma, ábame jamísurajaniña sun ja úmatiña jadúnragua.” ¹⁰ Ába jóúdin músu luágu buri úma, ába jóúndaruniña sun ja úmabaña jadúnragua, buitiña jáma wuríbatíña, ába tabuínchun múna jáu gürígia.

¹¹ “Ábati lebélorun urúei aríjaña amísurajoútiña, ába laríjin ában wügüri le madáüragunti quei lun ában maríei ñi. ¹² Ába laríñagun lun. “Numáda, ¿ída liñági bebélorunbei ññjoun madáüragunga quei lun ában maríei?” Maní ligía. ¹³ Ába laríñagun urúei joun ja eténirubaña lún buri dábula. “Gürágua jumei lugúdi lúma lújabu, fíjumei lídoun lubúriga le bougudíbei, le ñíba lubei layájuaja, acúnrijame lári.” ¹⁴ Ába laríñagun Jesúsu joun ja agáambubalin.

—Gíbetiña agúarútiña lun jebélorun lídoun larúejan Búngiu, míbetiña anúadiruña.

Luáguti lafáyeirun liseínsuna gumádi
(Mr 12.13-17; Lc 20.20-26)

¹⁵ Ába jóúdin fariséogu, ába júradun aríja cába lan gayára lan jadügün lun jaríñagagüdüni Jesúsu cátei le uáguti gayára lan jadárirun lidúnrun. ¹⁶ Ábati jóúnajan jádaangiñe jánigu úara jáma jádaangiñe lánigu Heródes, aríñaga lun Jesúsu.

—Maésturu, subúdi wamúti luágu inárüni lan baríñagubei, luágu gíñe arúfuda báani lémeri Búngiu láu inárüni, manúfudeiga luei ni ában, ladüga ni cáta lan luweírigan gürígia bun. ¹⁷ Rúbei lubeiti barítangun woun. ¿Buitisan lun lafáyeirúniwa seínsu lun urúei Rómana ódi mabuídunti?

¹⁸ Ariágu líña Jesúsu lun luríba jayúmajan, ába laríñagun joun.

—¿Bíángua tigíbu jugúya le! ¿Ca uágu jíchaaja sádara nubá? ¹⁹ Arúfuda jumei seínsu le áubei lafáyeijoúa liseínsuna gumádi nun.

Ába janügün ában seínsu le denáriu lun. ²⁰ Dan laríjini, ába lálügüdüniña.

—¿Ca iyáwa le luágubei seínsu le, lúma íri le bürüwañubei luágu?

²¹ Ába jaríñagun lun.

—Láni urúei Rómana.

Ábati laríñagun Jesúsu joun.

—Rújumeiti láni urúei lun urúei, rújumeime láni Búngiu lun Búngiu.

22 Dan jagáambunbalin le, ába laweíridun janígi, ába jígiruni, ába jóúdin.

Álügüdjani libügürü ásaaruni lídaangiñe ouweni
(Mr 12.18-27; Lc 20.27-40)

23 Wéyu méme ligía, ába jóúdin fiú saduséogu aríjei Jesúsu. Jaríñajare saduséogu luágu úa lan ásaaruni lídaangiñe ouweni. Ábati jaríñagun lun Jesúsu.

24—Maésturu, aríñagatí meja Moisés luágu ánjein lan ouwe ában wügürí le maríeiti masáaniguga táu lúmari, lúnti lan lamárieidun lamúlen túma würi to ueíboun louwe, lun gasáanigu lan táu lun líbugaña le ouwebei. 25 Wel, ñíñanu méjati sédü gamúlenuguátiña ya wádan, ába lamárieidun le furúmiñeti, ába louñwen. Quei masáanigu lubeí táu lúmari, ába lígirunun lun lamúlen. 26 Ligía méme suséreti lun jabíaman, lárigiñe lun jürüwan darí lúmoun jasédün. 27 Lárigiñe, ába gíñe touñwen würi. 28 Dánmeti jásaarun lídaangiñe ouweni, ¿cábati úmari würi tugúya jádaangiñe sédü gamúlenuguátiña ja, lárigiñe maríeí jamá sun jagía túma?

29 Ába laríñagun Jesúsu joun.

—Bulíeiguatün ladüga libídiñe tuáguti Lerérun Búngiu jun, ni luáguti lubáfu Búngiu. 30 Dánme le jásaarun jiláaña lúnya jabágaridun, ámujalime jabágarí, magámaridun jába, míchugun jamáñame jasáanigu lun maríeí, queísi magámaridun jamá ánjeligu siélu. 31 Ánjeinti luágu sará jamá jiláaña lúnya jabágaridun, ¿malíjan jumágili le laríñagubei Búngiu gúanarü jun? Ítara líña laríñagun. 32 “Áu Lubúngiutebei Abrahám, Lubúngiute Isáac, Lubúngiute Jacób.” Ítara líña lubeíti, ánjein jamúga jiláañu jáña lubeí wügüríña jagía lun sun dan, maríñagunti jamúgati Búngiu luágu Jabúngiute lan, ladüga máma Jabúngiute jiláguaaña Búngiu, Jabúngiute winwangíña.

33 Dan jagáambunbalin gürígia cátei le, ába laweíridun janígi láu le larúfudajabei.

Gumádi le weírigutimaabei
(Mr 12.28-34)

34 Dan le jasúbudirunbalin fariséogu luágu manígüda láaña lan Jesúsu saduséogu, ába jóúndaragun, 35 ñíñein ában jádaangiñe le arúfudajati lilúrudun Moisés, abúseeruti laríjin lábun Jesúsu, ába laríñagun lun.

36—Maésturu, ¿cásan gumádi weírigutimaabei lídan lilúrudun Búngiu?

37 Ába laríñagun Jesúsu lun.

—“Jínsiñelá Babúreme Búngiu bun táu sun banígi, táu sun buwáni, láu sun bisáminan.” 38 Niján gumádi weírigutimaabei, furúmiñeti gíñe lídaangiñe sun lugúmadin Búngiu. 39 Áni le libíaman lídan uweíriguni lenége le, ítara líña. “Jínsiñe jamá bíbirigu bun quei bínsiñegua búngua.” 40 Bián gumádi le, ligía ébuubei lun sun lilúrudun Moisés lúma jarúfudajan profétagu.

¿Ca adügawagun Crístu?
(Mr 12.35-37; Lc 20.41-44)

41 Sun añája lan fariséogu oundaragu, 42 ába laríñagun Jesúsu joun.

—¿Cásan jarítagubei libügürü Crístu le lanúadirubei Búngiu lun lasálbaruniña gürígia? ¿Cásan adügawagun?

Ába jaríñagun lun.

—Ladügawagun Davíd.

43 Ábati laríñagun Jesúsu joun.

—¿Ída liñáti lagúarunbalin David quei Abúremein, láu lubáfu Sífiri Sándu? Aríñagatiga David.

44 Laríñajare Búngiu lun Nabúreme.

“Ñurúba núma lueígiñe nouñwenren daríme níchuguniña báganiñu bújaburugun.”

45 ¿Ída lubáti ladügawagun lan David Crístu ánjein wá lubali David guánarü Crístu Nabúreme?

46 Úati ni ában gayáraati louñabun ni ában dimúrei, lúmagiñeti wéyu ligía, manígiti ni ában lun liábin álügüdagei.

23

Líchugun Jesúsu jadúnrun fariséogu jáma arúfudajatiña lilúrudun Moisés (Mr 12.38-40; Lc 11.37-54, 20.45-47)

1 Ábati laríñagun Jesúsu joun láni disípulugu jáma jíbiri gürígia ja ñibaña.

2 —Gabáfutiña arúfudajatiña lilúrudun Moisés jáma fariséogu lun jafúnraanguagüdüni líla lilúrudun Moisés. 3 Agáamba jumáña lubeíti, adüga jumeíme sun le jaríñagunbei jun, le jadügübei, mafálara jumeí ladüga aríñagatiña ában cátei, jadüga ámu. 4 Rújamuti gumádi joun gürígia queisi anügüni jürüti le siñábei lanügüniwa, ánjein jagía, madügüntiña ni cáta lun jíderaguniña gürígia luágu buri anügüni lánina lúrudu le jíchugubei jawágu. 5 Jadügüni sun cátei lun jaríjiña gürígia. Jínsiñeti joun lun jíchugun tirájüñü gáfu táu Lerérun Búngiu jeréberugu lúma luágu buri jarúna, lúma lun jadáuragun anánguni to durúrutu. 6 Buséntiña jarügüdüni lubuídun-ágei ubáraü lídan eígini lúma jalaü le jála weírigutiña tídan jalígilisin. 7 Buséntiña lun jabúsurun gürígia joun láu sarágu inébesei úmada, lun giñe lagúarúniwa joun, “maésturugu”.

8 ‘Ánjein jugúya, mígira jumá lun laríñawagúniwa jun, “maésturugu”, ladüga sun jugúya ában jáu, áni ában rügüñein giñe Jumaésturun, áu le Crístubei. 9 Mariñaga jumá giñe “núguchi” lun ni ában wügüri ubouágu lídan ligáburi jagúaruni Búngiu le siélubei “Núguchi”. 10 Mígirun jugúyame lun laríñawagúniwa jun “ábutigu” ladüga Crístu rügüñein Jábuti. 11 Le esériwidubei joun jíbiri, ligía weírigutimaabei jídan, 12 ladüga le anánguti lúngua weíri, lúnabudagüdüwaba, ánjein le anánguti lúngua únabu, laweíridagüdüwaba.

13 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! ladüga darú jumuti lubéneri arúejani le lánina siélu lueí jebélurun ámu, mebélú jugúyati, mígirun lun jebélurun ja busénbaña jebélurun.

14 ‘¡Fugiábugu jugúya, arúfudajatiña lilúrudun Moisés jáma fariséogu! ¡Biángua tigíbu! Gídá jumutu jában würíña ja jiláaña úmari jaweí, lúnti ibídiñewa lan, ába jadáagun ayúmraguni lun Búngiu le migínaguti. Ligía weíritimaabei lubeí jasúfurirun lueígiñe.

15 ‘¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Eíbuga jumúti múa, áfayaja jumeí barána áluaja gürígia lun jánigume, dánti le ibíja jumáali le jabúseerubei, ába jadügüniña gürígia jagía bián weíyaasu lúntima joudin máfiougati sügü jáu.

16 ‘¡Fugiábugu jugúya, adúndejatiña maríjintiña! Aríñagatün luágu le lan gürígia íchuguti dimúrei, ánjein áfiñura tuágu témpulu mála lan líra, áni

ánjein lan áfiñura luágu tigóluna témpulu, aná lan líra, lúnti lan lagúnfulirun. ¹⁷ ¡Ibídiougua líña jáu, maríjin! ¿Cági weírigutimaabei, gólu ódi témpulu to adügüboun lun sagráubei lan gólu? ¹⁸ Ariñagatün giñe luágu ánjein lan íchiga gürígia dimúrei lun láfiñurun luágu latárü, mála lan líra, áni ánjein lan áfiñura luágu cátei le adágaragüdüwabei luágu latárü, aná lan líra, lúnti lan lagúnfulirun. ¹⁹ ¡Ibídiougua líña jáu, maríjin! ¿Cági weírigutimaabei, cátei le luágubei latárü ódi latárü le adügübalin cátei ligia lun sagráubei lan? ²⁰ Le áfiñurubei luágu latárü, máma rügüñein luágu latárü láfiñurun, láfiñuruña giñe luágu sun le ligíbuagubei latárü. ²¹ Le giñe áfiñurubei tuágu témpulu, máma rügüñein giñe tuágu témpulu láfiñura, láfiñuruña giñe luágu Búngiu le aganoúbei tidan. ²² Le giñe áfiñurubei luágu siélu, láfiñuruña giñe luágu lála Búngiu, lúma giñe luágu Búngiu le añúurubei luágu jalaü ligía.

²³ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adügatün díisi fáreinti láu jíduru le ménta, anísi, lúma comíno lun jíchugun ában fáreinti lun Búngiu, áni mebéresentün láu arúfudajani le weírigutimaabei lídan lilúrudun Búngiu, quei buri lun jadügüni sun cátei láu úraguni, lúma lun jagúdemedun gürígia jun, lúma lun jagúnfulirun lúma Búngiu. Ligía buri cátei le lúnbei jadügüni, mígirunga jumeíme jadügüni le líbiri. ²⁴ ¡Jugúya, adúndejatiña maríjintiña jugúya le, áseija jumúti ában minímíni áni julútün ában caméyu!

²⁵ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Adügatün lun jarítagnun gürígia luágu buídu lan jigáburí. Ítara jíña quei wéru lúma asiedu le jachíbubei bougudigiñe libíti, ánjein múnadagiñe jibíti, buin jíña láu buri luweínamu-águu lúma íweruni. ²⁶ Fariséogu maríjintiña. jarúmagüda jumeí wéru lúma asiedu lurágeirugugiñe furúmiñe, ábame giñe larúmadun bougudigiñe libíti.

²⁷ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Ítara jíña quei umúajaü le afeíndijóuti láu jarúti bougudigiñe libíti, buídumeraüti larijín, ánjein lurágeirugugiñe, buín líña láu jábu jiláaña lúma sun luwúyeri iwíyei. ²⁸ Ítara jíña, bougudigiñe jibíti, ma lubúidun jarijíníwa jagíbugiñe gürígia, ánjein múnadagiñe, buín jíña láu iyéerejabuni lúma wuríbani.

²⁹ ¡Fugiábugu jugúya arúfudajatiña lilúrudun Moisés jáma fariséogu! ¡Biángua tigíbu! Rújumuti dübü arítaguagüleime luágu jamúaja profétagu, wéndegüda jumeí umúajaü le jáni gürígia já meja buídubaña. ³⁰ Ábati jariñagnun. “Lun jamúga meja awánjeinjadiwa lan le jadáani binádu wagübürigu, mideragnun wamútiña jamúga áfaraguaña profétagu.” ³¹ Láu líra, subúdiguatün júngua luágu jádaangiñetün lan ja áfaragubaliña profétagu jagía. ³² ¡Gumújumeiti jadügüni lé meja jagúmeserubei binádu jagübürigu adüga!

³³ ¡Jéwegu! ¡Jarásan jéwegu! ¿Ída lubásan jeséfurun lueí asúfuriruni le lánina máfiougati? ³⁴ Ligía nóúnajaba lubeí profétagu, jáma ja chúbaña áu, jáma arúfudajatiña, jun. Áni jugúya, jáfaragubaña jádaangiñe, dágua jumáñame jíbiri luágu gurúwa, bei jumáñame jíbiri tidan jalígilisin juríu, eíbaaja jumáñame lídan sun fulásu. ³⁵ Ítara lúba láburujan dúru juágun luágu sun jítaü le áwiyurubei jádaangiñe sun wügüriña buitiña ja jáfarawagübaña, lúmagiñe meja Abéi le richáguabeí darí lúmoun Zacarías, liraü Berequías lé meja jáfarubei tabádinagua témpulu lúma latárü. ³⁶ Ninárün jáu luágu

láburuja lan dúru jawágun gürígia ja lánina dan le luágu buri sun cátei le.

Layájun Jesúsu jawágu lílana Jerusalén

(Lc 13.34-35)

³⁷ ¡O jugúya Jerusalénna! ¡Áfaragua jumáaña profétagu, chügua jugúya dübü jawágun ja louñajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarüna, májatün! ³⁸ Ígira láadün Búngiu, ³⁹ áni nariñajare jun luágu maríjindügüya jumáadina lan queişi jasálbaragüle daríme lachülürün dan lun jaríñagun. “Biníwati le ñübinbei lídan líri Wabúreme Búngiu.”

24

Lariñagun Jesúsu luágu tagünrinchawagúba lan témpulu

(Mr 13.1-2; Lc 21.5-6)

¹ Dan le láfuridun Jesúsu témpulurugugiñe, leíbuga yebe, ligía jayábin lání disípulugu lúmoun, ába jarífudun tuágun témpulu lun. ² Ába lariñagun Jesúsu joun.

—¿Aríja jumútu sun to? Ninárün jáu luágu merédebei lan ni ában dübü ligíbuagu dübü, tagünrichawagúba sun to.

Seíni buri lubáragiñe lagúmuchun ubouú

(Mr 13.3-23; Lc 21.7-24, 17.22-24)

³ Ábati jóudin luágu wübü Olívos, dánti ñun lan Jesúsu ñi, ába jóudin lání disípulugu agülülüja lúma, ába jaríñagun lun.

—Buséntiwa lun baríñaguni woun ídaba lan tagünrinchawagúba témpulu. ¿Cába liseíni bagríbudun ubouúagun, lúma lagúmuchagüle?

⁴ Ába lariñagun Jesúsu joun.

—Touñigi jumá lun úa lan ayéedutün, ⁵ ladüga sarágujaba ñübintiña aríñageina. “Áu Crístubei”, áni sarágujaba jayéedun. ⁶ Jugúya jagáambuba lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá. Lúnti ítara lan, mámagilíme lagúmuchagüle ubouú líra. ⁷ Lageíndaguba ában ageíraü lúma ában, lawúribujaba ában fulásu lúma ában, ñíbei ilámaü, sándi, járabaganáli lídan sarágu fulásu. ⁸ Sun líra lagúmesejarügügili le lúnbei lasúfurirúniwa.

⁹ ‘Jugúyati, jederegerúaba lun lúrudu lun jasúfurirawagüdün, lun gíñe jáfarawagúniwa jilágubei, jiyéeregudúba lun sun ubouú nueígiñe. ¹⁰ Lídaanme dan ligía, sarágujaba eféridiruti jafíñen nuágu, ábame jeyéeregudún jóuniwagua, ábame jalúguragun jóuniwagua. ¹¹ Jachúlaaguba sarágu yéetiña aríñaga luágu profétagu jamá áni sarágujaba gürígia jayéedun. ¹² Ñíbei sarágu wuríbani daríme lun jeféridiruni sarágu jádaangiñe lánigu Búngiu ínsiñejabuni jádaangua. ¹³ Le asígiruti derégüdagu darí lúmoun lagúmujoún, lasálbarúba. ¹⁴ Lapúrichijoúba ugánu buíti le luáguti larúeijan Búngiu lídan sun ubouú lun lasúbudirúniwa lídan sun fulásu, ligíaalímeti lagúmuchun ubouú.

¹⁵ ‘Abürüjatí meja proféta Daniél luágu cátei iyéereguti le gagünrinchaguagüdadibeí, dánme le jaríjin chülüjali lan cátei le lídoun fulásu le sánduti—le alíjabeí, gunfaráandalá —, ¹⁶ jámeti Judéabaña, lúntime janúrajan luágun buri wübü. ¹⁷ Léme tábulugubei lúban wéyu ligía, marárialá aságara ni cáta múnadagiñe, ¹⁸ le áraabubei, magríbudalá

ni abúdoun lanáangun. ¹⁹ ¡Fugiábugume würiña ja dageínatiña o ja lan gasáanigutiña ja guráigiña lídounme wéyu ligía! ²⁰ Amúriaja jumá lúma Búngiu lun máma lan lídan lidíliga ni lídan luwéyuri eméraaguni janúraja. ²¹ Ladüga ñíbei sarágu súfuri le úagili líbe lúmágiñe lagúmeserun ubou, úabei gíñe lárigiñe. ²² Lun jamúga madúraagun lubei lan Búngiu dan ligía, úati jamúga ni ában asálbaruti, ladúraagubei jawágurügü ja lanúadirubaña lun lánigu jamá.

²³ ‘Ánjein lubeíti aríñawagua jun. “Niján Crístu” o “Ningítan lan”, maffínera jumá, ²⁴ ladüga jayábinba ayéejatiña lun jarúfudagun jóungua camá Crístu, camá buri profétagu, áni jadáaguba oúnwenbun buri seíni lúma miláguru lun jeyéedaguniña ja anúadira láañabaña Búngiu ánjaña gayára. ²⁵ Ariñaga náali le jun lubáragiñe lasúseredun, ²⁶ ligía lubeíti, ánjein aríñawagua jun. “Níjein Crístu yára lídan fulásu le mageírawati”, mídin jumá ñi, ánjaña aríñaga jun. “Niján ya rúmurugu”, maffínera jumá. ²⁷ Quei laríjiniwa labírichagun lueigiñe ában oúbaü libíti siélu lun luágun le ában, ítara lúba dánme le niábin, aú le Wügüri Garaüwarügüti. ²⁸ Ábame láburujan ligáñi Búngiu jawágun gafígountiña quei wadúbi luágun úgubu jiláali.

*Seíni buri lubáragiñe lagíribudun Crístu ubouagun
(Mr 13.24-37; Lc 21.25-33, 17.26-30, 34-36)*

²⁹ ‘Lárigiñerügüme lásügürün wéyu buri lánina súfuri ligía, ábame labúrigadun wéyu, marúnjalime játi, ábame jeíguadúnga warúguma ja siélubaña, ábame ladádagarun sun siélu. ³⁰ Ábameti jaríjini niseíni siélu, súnme gürígia wuríbatiña ubouagu, jayájuajaba láu jaríjini niábinya, áu le Wügüri Garaüwarügüti, lídan juánriñu siélugiñe láu oúnwenbun ubáfu lúma uweíríguni. ³¹ Dánme línwirúniwa fidu rein, ábame nouñajaniña náni ánjeligu ja siélubaña lun jóundaruniña nánigu ja anúadira náañabaña lídaangiñe gádürü larígei ubou.

³² ‘Furéndei jumei jémpulu le tuáguti tídibu ígo. Dan le ñulúgili tilímun, ába labouchun tubána, subúdi jumúti luágu yaráfaali lan lubáchouga. ³³ Ítara méme, dánme gíñe jaríjini sún buri cátei le, subúdi jumei luágu yaráfaali lan niábin. ³⁴ Ninárün jáu, luágu lagünrinchawagúba lan sun ubúrgu le Jerusalén lubáragiñe jóüwegun gürígia ja lánina dan le. ³⁵ Lagúmuchaguba siélu lúma ubou, ánjein nerérun, merédebei magúnfulirúnga.

³⁶ ‘Ánjeinti luágu wéyu lúma óra le lúnbei nagíribudun ubouagun, ibídiñeti ni ca un, ni joun ánjeligu ja siélubaña, ni nun, áu le Liraü Búngiu, Búngiu rügüñein Úguchili asúbudirei.

³⁷ ‘Ítara quei meja lasúseredun lídan meja lidáani Noé, ítara lúba gíñe dánme le niábin, áu le Wügüri Garaüwarügüti. ³⁸ Lídan meja dan ligía, lubáragiñe ladíbirun ubou, jerédera meja gürígia eíga, áta, amárieidagua, íchaajaña jasáanigu lun maríei, darí wéyu le lebélorunbei Noé tídoun ugúnein. ³⁹ Meféentiña, darí ladíbirun ubou, ába jañáradagun súngubei. Ítara lúba gíñe dánme niábinya, áu le Wügüri Garaüwarügüti ubouagun. ⁴⁰ Lídaanme dan ligía, ñibaña bián wügüriña áraabu, lanügüba ában, igirúame le ában según jafíñen nuágu. ⁴¹ Ñibaña bián würiña amúlija, tanügüba ában, igirúame to ában.

⁴² ‘Agágudúañu jumá, ladüga ibídiñeti jun cába lan óra niábin, áu le Jabúreme. ⁴³ Subúdi jumei le, luágu ánjein lan jamúga lasúbudira tabúreme ában múna cába lan óra liábin jíweruti áriebu, leréderuña jamúga

marúmugunga, mígirunti jamúga lun lebélorúniwa íweruja lúbiñe. ⁴⁴ Ligía aráanseñu jumá lubeí, ladúga léme óra magáradajan jumá, ligíame niábin, áu le Wügüri Garaüwarügüti.

Músu le úraguabei, lúma le múragúnbei
(Lc 12.41-48)

⁴⁵ ‘Ítara jumá queisi músu úraguati, gunfaráanda ligía, le lígirubei liyúbudiri lun laríjin jáu ja lúbiñebaña lun líchugun éigini joun lídan dan. ⁴⁶ Gúndaabei músu le dánme le liábin liyúbudiri ánjein ladárira agúnfulira lúma lifisiute. ⁴⁷ Ninárün jáu luágu líchugubei lan liyúbudiri lun laríjin láu sun lumégen. ⁴⁸ Ánjein ában lubeí wügüri wuríbati músu ligía, ábame larítagn luágu lügili lan liábin liyúbudiri, ⁴⁹ ábame lagúmeserun ouserañña jíbiri músu wuríba, reidei ligíame eíga lúma áta jáma bacháruatiña, ⁵⁰ ábame liábin liyúbudiri lídan wéyu le magúraban láani, lídan óra le ibídiñeti lun. ⁵¹ Ábame líchuguni luweírin-ágei abeichúni luágu, lasíadireime lun máfiougatin úara jáma biángua tigíbu, ábame layájun, acünrijame lári.

25

Jémpulu jawáguti dísi würiña irájüñü

¹ Ába laríñagnun Jesúsu.

—Ítara lubáti arúejani le lánina siélu quei dísi würiña irájüñü ja anügübaña jalámpun le gálati gási, ába jáfuridun lun jadúnragun lúma adári, ñüdün jamámuga úara lúma maríeirugun. ² Seíngü jádaangiñe, maráanseruntiña, seíngü aráansetiña. ³ Ja maráanserunbaña, dan le janügünbalin jalámpun, manügüntiña ámu gási lueí le lídaanbei jalámpun, ⁴ ánjañati ja aráansebaña, barútiña jabúdein láu gási bougudin lueí le lídaanbei jalámpun. ⁵ Queísiti ladárasarun adári, ába ladábudunga jágu súngubei, ába jarúmugun. ⁶ Queí buri luágu amídi áriebe, ligía lagaambúniwa agúraguni. “Niteín adári, furíjuma adúnraguei.” ⁷ Sun würiña irájüñü jagía, ába jásaarunga, ába jagúmeserun aráansejei jalámpun. ⁸ Ába jaríñagnun ja maráanserunbaña joun ja aráansebaña. “Rújuma murúsun lídaangiñe jigásin woun, ladúga léñeguchuña walámpun.” ⁹ Ába jaríñagnun ja aráansebaña joun. “Siñáti, ladúga louguabei woun, louguame jun. Jeíbagubei le ñí lubei lalúgurajoúa agáñija jumámuga júngua.” ¹⁰ Léti añángüra lan ja maráanserunbaña agáñija gási, ligía liábin adári. Játi aráansebaña, ába jebélorun lúma maríeirugun, ába ladaurúniwa béna. ¹¹ Lárigiñe, ligía jachúlürün jíbiri würiña irájüñü jagía, ába jaríñagnun. “¡Wabúreme, wabúreme, darábei béna wabá! ¹² Ába laríñagnun joun. “Ninárün jáu, ibídiñetün nun.”

¹³ Ábati laríñagnun Jesúsu joun.

—Agágudúañu jumá, ladúga ibídiñeti jun cába lan wéyu, ni cába lan óra nagíribudun, áu le Wügüri Garaüwarügüti, ubouágun.

Jémpulu luáguti seínsu

¹⁴ ‘Ítara líña arúejani le lánina siélu quei ában wügüri le dan lébei laráansejan lun ladügün weíyaasu lídoun ámu fulásu, ába lagúarun joun lumúsuniña, ába líchuguni liseínsun lábugiñoun jaríaaan.

¹⁵ ‘Lun ában jádaangiñe, rúti queí buri seíngü-mílu fiádürü, queí buri bián-mílu lun ában, queí buri mílu lun ában. Lafánreinjani joun quei

jabáfu lun jawádigimariduni. Ábati lídin luágu luweíyasun. ¹⁶ Le músu le erésibirubei seíngü-mílu fiádürü, ába luwádigimariduni, ába lagáñeirun seíngü-mílu fiádürü ligíbuagun. ¹⁷ Ítara méme le erésibirubei bián-mílu, gáñeiti bián-mílu lánwoun. ¹⁸ Ánjeinti le erésibirubei mílu, ába lídin, ába lachígin ában júyu, ába larámuduni liseínsun liyúbudiri ñi.

¹⁹ ‘Sarágu dan lárigiñe, ába lagíribudun iyúbudiri, ába lagúmeserun aráanseja jáma luágu seínsu. ²⁰ Furúmiñe, ába liábin le erésibirubei seíngü-mílu fiádürü, ába ledéregeruni lun liyúbudiri láu seíngü-mílu le lagáñeirubei ligíbuagun, ába laríñagun lun. “Niyúbudiri, seíngüñein-mílu fiádürü bíchugun nun, niján seíngü-mílu nagáñeirun ligíbuagun.” ²¹ Ába laríñagun iyúbudiri lun. “Buíti, ában músu buíti amürü, úaragua, quei úaragua bubei lídan le murúsunrügüti, níchiga gíbetimaati lábugiñe baríajaan. Queímoun, gúnda amürüme úara núma.” ²² Lárigiñe, ába liábin le erésibirubei bián-mílu fiádürü, ába laríñagun. “Niyúbudiri, biámañein-mílu fiádürü bíchugun nun, niján bián-mílu nagáñeirun ligíbuagun.” ²³ Ába laríñagun liyúbudiri lun. “Buíti, ában músu buíti amürü, úaragua, quei úaragua bubei lídan le murúsunrügüti, níchiga gíbetei lábugiñe baríajaan. Queímoun, gúnda amürüme úara núma.” ²⁴ Ligía liábin le erésibirubei mílu fiádürü, ába laríñagun lun liyúbudiri. “Niyúbudiri, subúdigubei numúti luágu wügüri ban jéreguti, alúbaja ban le ñí lumuti mábunagun ban, abúdaja amürü le ñí lumuti machágarun ban ni cáta. ²⁵ Ligía nanúfudedunbei, ába nídin arámudei biseínsun lábugiñe múa. Niján le báni.” ²⁶ Ába laríñagun iyúbudiri lun. “Músu wuríbati, moúnti. Subúdigubei bíñein luágu alúbaja nan le ñí lubei mábunagun nan, abúdaja áu le ñí lubei machágajan nan ni cáta. ²⁷ Ligía lúnti lubei jamúga bíchuguni niseínsun bāncürugun lun dan lan jamúga nagíribudun, nerésibiruni le náni láu agáñeiruni.” ²⁸ Ába laríñagun joun ja ñíbaña. “Gidájumei seínsu le lúmabei lueí, rújumei lun le láubei díisi-mílu, ²⁹ ladüga le adügübei buíti láu le lúmabei, líchugúba lánwoun lun, ábanme lígiragun lun, ánjein le madügübei buíti láu murúsun le lúmabei, lagídarúaba lueí. ³⁰ Músuti moúnti le, fíjumei lídoun lubúriga le bougudibe, le ñiba lubei layájuaaja, acúnrijame lári.”

Jagúseragüdüniwa sun güri-gia

³¹ ‘Dánme nagíribudun, áu le Wügüri Garaüwarügüti, ubouagun, niábinba quei urúei geyégu ánjeligu náu, ábame nañúurun luágu nála láu uweírighuni lun nagúseragüdüniña sun güri-gia. ³² Ábame jóundaragun güri-gia ja lílana sun fulásu nigíbugiñe, ábame nafánreinraguniña jawáriuagua quei lafánreinraguniña jóuniri mudún, mudún jádaangiñe gábara. ³³ Ja richáguabaña ligíbugiñe Búngiu, ábame níchuguniña lueígiñe nouñwenren, ja wuríbabaña ligíbugiñe Búngiu, lueígiñebaña nubaüna. ³⁴ Naríñagame joun ja lueígiñebaña nouñwenren. “Jigoúgu, jugúya le biní laalíbei Nüguchi, resíbi jumei arúejani le aráanserúbei jubá lúmagiñe ladügüni Búngiu ubou. ³⁵ Ladüga dan le nalámachunbei, rütün eígini nun, dan le namágürabudunbei, rütün dúna nun, dan le eíbugañaja nubei quei chülüdügüti, rütün múna nun. ³⁶ Dagáti manáanguni nuágu, rütün anáanguni nun, dan le nasándirunbei, ñüdüntün aríjana, dan le nadaürünbei, ñüdüntün aríjana.” ³⁷ Ábamei jaríñagun richáguatiña jagía nun. “Wabúreme, ¿ida bugagí waríjabu láu ilámaü, ába wíchugun eígini bun? ¿ida bugagí waríjabu láu mágürabu, ába wíchugun dúna bun?

38 ¿Ída bugagí waríjabu quei chülüdügüti, ába wíchugun múna bun? ¿o manáangunga, ába wíchugun anáanguni bun? 39 ¿Ída bugagí waríjabu láu sándi o furísunrugu, ába woúdin aríjabu?” 40 Ábame naríñagun joun. “Nínárün jáu, furúmieguaügü cátei le jadügübei lun ában jádaangiñe namúleno, ca lan lúnabunbei, nun méme jadügei.”

41 ‘Naríñagame ti joun ja lueigiñebaña nubaúna. “Díse jumá nueí, jugúya le lúnbei jasúfurirun lun sun dan, jeiba lídoun wátu geméti le méñeguchadibeí, le aráanserúbei lubá Máfia jáu lánigu. 42 Ladúga dan le nalámachunbei, míchutün eígini nun, dan le namágürabudunbei, míchutün dúna nun. 43 Eíbugatina quei chülüdügüti, míchutün múna nun, mégeitina anáanguni, míchutün nun, sánditina, daúwa áu, míditün aríjana.” 44 Ábame jaríñagun wuríbatiña jagía nun. “Wabúreme, ¿ída bugagí waríjabu láu ilámaü o mágürabu, o quei chülüdügüti, o manáangunga, o láu sándi, o furísunrugu, míderagun wamútibu?” 45 Naríñagame joun. “Nínárün jáu, luágu furúmieguaügü lan cátei le madügün jubeí joun gürígia, ca lan lúnabunbei, madügün jumúti giñe nun.” 46 Ábame ti jóúdin ja máfiougatin lun jasúfurirun ñi lun sun dan, jámeti richáguabaña ligíbugiñe Búngiu, ábame jóúdin siélun lun jagúndaarun ñi lun sun dan.

26

*Aráansejani lun lárügüdüniwa Jesúsu
(Mr 14.1-2; Lc 22.1-2; Jn 11.45-53)*

1 Dan aríñaga láali Jesúsu sun cátei le, ába laríñagun joun láni disípulugu.

2 —Quei jasúbudiruni, bián wéyu lárigiñe le, ligíame fédu le páscua, áni nedéregerúaba, áu le Wügüri Garaúwarügüti, lun nádarawagün luágu gurúwa.

3 Ába jóúdaragun jábutigu fádirigu, arúfudajatiña lilúrudun Moisés, jáma wügüriña weirigutiña lídan jafiñen juríu tigíbugiñe lúban Gáifasi, fádiri le íñutimaabei. 4 Ñi jaráanseja luágu Jesúsu lun jarügüdüni láu yéguau, lun jáfaruni jilágubei. 5 Jaríñagati.

—Máma látia fédurugu lueí jachágaragun gürígia.

*Tájuduraguni ában würi lálbulugu Jesúsu
(Mr 14.3-9; Jn 12.1-8)*

6 Betániañein Jesúsu, lúbiñe Simón lé meja gawágubei gumeín luágu sun lúra, 7 ába tiábin ában würi luágun, gámeina tugúya ában lágei ibíñei le weíriti lisérun. Dan luáguñein lan dábula Jesúsu, ába téseruni ibíñei ligía lálbulugun.

8 Dan jaríjinbaalin disípulugu cátei le, ába jamágun darun, ába jaríñagun.

—¿Cámesan leféridirúa le itara? 9 Gayáraati jamúgagu lalúgurúniwa le luágu sarágu seínsu lun jíderawagün gudémetiña.

10 Ába lagáambuni Jesúsu le jaríñagubei, ába laríñagun joun.

—¿Ca uágu jañáwurija tun würi to? Cátei buíti le tadügübei. 11 Súnwandan yábaña lan gudémetiña júma, ánjein áu, mámaba súnwandan júma nan. 12 Le tadügübei würi to láu téseruni ibíñei le nuágun, taráanseruñádina lubá nábunúniwa. 13 Nínárün jáu luágu le lan ñi lumuti lapúrichijóua ugánu luáguti asálbaruni lídan sun ubou, labájüdawagúaba giñe le tadügübei würi to, lun larítawagün tuágu.

*Lalúguruni Júdas Jesúsu
(Mr 14.10-11; Lc 22.3-6)*

14 Ába lídin ában jádaangiñe dúusu disípulugu, le gíríbei Júdas Iscarióte, adímureja jáma jábutigu fádirigu. 15 Ába laríñagun joun.

—¿Atiríbei jíchugun nun ánjein nedéregera Jesúsu jun?

Ába jíchugun darándi murúsun pláta lun. 16 Lúmagiñeti óra ligía, ába láluajan Júdas ída lúba lan luwúyeri ledéregeroni Jesúsu joun.

Lagúmujoún leígin Jesúsu jáma lánigu

(Mr 14.12-25; Lc 22.7-23; Jn 13.21-30, 1 Co 11.23-26)

17 Le furúmiñeti wéyu lídan fédu le ní lubei teigúa fein magánatu ísi, ába jayábin disípulugu lúmoun Jesúsu, ába jaríñagun lun.

—¿Jalía babúseera waráanserun lun ñíba lan wadúgei eígini le lánina páscua?

18 Ába laríñagun joun.

—Jeíba ubúru, lúbiñe ítaga wügüri, ábame jaríñagun lun. “Ítara líña laríñagun Maésturu. Yaráfaali nórate, búbiñeba nefédujei páscua jáma nání disípulugu.”

19 Ába jadügüni disípulugu quei laríñaguni Jesúsu joun, ába jaráanseruni eígini le lánina páscua.

20 Dan le lagúñedunbei, ába lañúurun Jesúsu luágu dábula jáma lání dúusu disípulugu, 21 súnti añája lan eíga, ába laríñagun joun.

—Nínárün jáu luágu lalúgurubadina lan ában jídaangiñe.

22 Ábati jajírudagun, ába jagúmeserun álügüdei ában ában.

—Nabúreme, ¿nugúya funásan?

23 Ába laríñagun joun.

—Le éderutu leígan fein núma lídan asíedu, ligiába alúgurana. 24 Nídiña, áu le Wügüri Garaüwarügüti, luágu üma le uágubei taríñaga Lerérun Búngiu, áni ífugíabutia wügüri le alúgurutina! Buítimaati jamúga lun magúriajóúagubei lan.

25 Ábati ladímurejan Júdas, ába lálügüdajan.

—Maésturu, ¿nugúya funásan?

Ába laríñagun Jesúsu lun.

—Ánja, bugúya.

26 Dan añája lan eíga, ába lanügünun Jesúsu fein lújaburugu, ába leteíngiruni Búngiu tuágu, lásun lagúbachagunun, ába líchugunun joun lání disípulugu, aríñageina.

—Jóújuma, núgubu le.

27 Lárigiñe, ába lárügüdün ában wéru buin táu diweín lújaburugu, ába leteíngiruni Búngiu tuágu, ába lásügüragüdüni joun, aríñageina.

—Gurájuma lídaangiñe le, sun jugúya. 28 Níta le, le añúuragüdúbalin iséri darádu, le gíñe áwiyrubei joun sarágu gürígia lun ferúdunawa lan jafígoun.

29 Nariñajare jun luágu mátundügüyaadina lan diweín daríme wéyu le lúnbei nátunun iséri tuwúyeri diweín júma lídan larúeijan Nüguchi Búngiu yágüta síélu.

Laríñaguni Jesúsu luágu leyéedaguba lan Pédro láu

(Mr 14.26-31; Lc 22.31-34; Jn 13.36-38)

30 Lárigiñe jerémujani urému luágu Búngiu, ába jóúdin luágu wübü Olívos.

31 Ába laríñagun Jesúsu joun lání disípulugu.

—Sun jugúya, jasándiraguba júngua láu magúraasuni nuágu árieibu le, ladüga laríñajare tídan Lerérun Búngiu. “Náfarubei jóúniri mudún jílágubei,

ábame jeréderun mudún chagágu.”³² Lárigiñeme násaarun lídaangiñe ouweni lúnya nabágaridun, ní diba Galiléa jubáragiñe.

³³ Ába laríñagun Pédro lun.

—Gayáraati járügüdün sún gubei magúraasuni buágu, nugúya no.

³⁴ Ábati laríñagun Jesúsu lun.

—Nínárün báu luágu árie bu méme lan le, lubáragiñe layúgurujan gáyu, beyéedaguba náu ürüwa weíyaasu.

³⁵ Ába laríñagun Pédro lun.

—Gayáraati noúnwen búma, meyéedagunbadina báu.

Ligía méme giñe jariñaga sun disípulugu.

Layúmuragun Jesúsu lun Búngiu, Getsemaní

(Mr 14.32-42; Lc 22.39-46)

³⁶ Ábati lachülürün Jesúsu jáu láni disípulugu lídoun ában fulásu gíriti Getsemaní, ába laríñagun joun.

—ñurújuma ya, neíbuga ayúmuragua lun Búngiu yára.

³⁷ Ába lanügüni Pédro jáma bián lirájüñü Zebedéo lúmagua, ába jagúmeserun asándira íruni lúma tigári anígi.³⁸ Ábati laríñagun joun.

—Sandítina ában íruni le lánina ouweni tídan nuwáni. Reídei jumá ya, agágudúañu jugúyame núma.

³⁹ Ábati lídin Jesúsu lubáruaguóun mémeraü, ába lájuduragun láu ligíbu múarugun, ába layúmuragun lun Búngiu ítara.

—Núguchi, ánjein gayára lubei, adügabá lun masúfurirun náani cátei le lúnbei nasúfuriruni, mámalá quei nabúseerun, queilá babúseerun.

⁴⁰ Ábati lagíribudun le ñijin jabeí láni disípulugu, ába ladáriruniña arúmuga, ába laríñagun lun Pédro.

—¿Siñátisán buga jeréderun agágudúañu núma ni ában óra?

⁴¹ Agágudúañu jumá, ayúmuragua jugúyame, máburujan jumámuga lídoun ínhajoüni lun jeféridiruni jafiñen nuágu. Inárüni luágu ánja tan juwáni lun cátei le buídubei, ánjeinti júgubu, débiliti.

⁴² Ábaya lídin luágu libíaman weíyaasu, ába layúmuragun ítara.

—Núguchi, ánjein siñá lubei masúfurirun náani le lúnbei nasúfuriruni, adügüwalá bugúndan.

⁴³ Ábaya lagíribudun, ábaya ladáriruniña láni disípulugu arúmuga ladüga weírjiali lidábu jágu.⁴⁴ Ába lígiruniña, ábaya lídin ayúmuragua luágu lürüwan weíyaasu, aríñageina méme dimúrei ligía.⁴⁵ Ábati lídin le ñijin jabeí láni disípulugu, ába laríñagun joun.

—¿Jarúmugüña mémesan, eméraagua jugúya? Chülüjiali óra lun nedéregeruníwa, áu le Wügüri Garaüwarügüti, jájaburugun gafígountiña.

⁴⁶ Sarájuma, queímoun lubároun le lúnbei lalúgurunina, níteeli.

Janügüni Jesúsu adáüra

(Mr 14.43-50; Lc 22.47-53; Jn 18.2-11)

⁴⁷ Ñígili Jesúsu adímureja, ligía liábin Júdas, le ábanbei jádaangiñe dúusu disípulugu, jáu sarágu gürígia táu efein lúma wéwe. Jayábin lueígiñe jóubadina jábutigu fádirigu jáma wügüriña weírigutiña lídan jafiñen juríu.

⁴⁸ Aríñagaaliti buga Júdas joun.

—Le nachúurun, ligía, járügüdeime.

⁴⁹ Ábati layárafadun lun Jesúsu, ába laríñagun.

—¡Buíti guñoun, maésturu!

Ába lachúuruni. ⁵⁰ Ába laríñagun Jesúsu lun.

—Numáda, ¿ca bálugubei?

Ábati jayábin, ába járügüdüni Jesúsu, ába janügüni adáüra.

⁵¹ Ábati laságarunun ában jádaangiñe láni Jesúsu disípulugu lefeínte, ába láchuguni ában larígei lumúsun fádiri le íñutimaabei. ⁵² Ába laríñagun Jesúsu lun.

—Areídaboún befeínte, ladüga sun ja áfarajatiña táu efeín, táuba giñe efeín jáfarúa. ⁵³ ¿Ibidiñeti bun luágu ánjana lan jamúga busén, gayára lan namúriajan ürüwa-wein-díisi-mílu jádaangiñe láni Nüguchi ánjeligu, áni loúnajañanu lan jamúga? ⁵⁴ Lun jamúga nadügüni ítara, ¿ída lubági lagúnfulirun le tídaanbei Lerérun Búngiu to aríñaguboun luágu lúnti lan lasúseredun le ítara?

⁵⁵ Ábati laríñagun Jesúsu joun mútu jagía.

—¿Jiábin táu efeín lúma wéwe lun járügüdünina camá jamuga jíwerutina? Ságüñaja wéyu nañúurun témpulurugu jagánagua arúfudaja, madaü jumútina. ⁵⁶ Wel, lasúseredunbei sun le lun lagúnfulirun le jaríñagubei profétagu tídan Lerérun Búngiu.

Ábati jígiruni sun disípulugu Jesúsu lábugua, ába janúrajan.

Jesúsu ligíbugiñe líñun-ágei lúrudu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Ja adáürübalin Jesúsu, ába janügüni ligíbugiñoun Gáifasi, fádiri le íñutimaabei, le ní lubei adámurigu jamá arúfudajatiña lilúrudun Moisés jáma wügüríña weírigutiña lídan jafiñen juríu. ⁵⁸ Ánjeinti Pédro, falá lumuti disegiñe darí túbürürurugun lúban fádiri le íñutimaabei le ñíjin lubei lebélera, ába leréderun ñun jáma oúnigirutiña témpulu lun laríjin jalíaba lan lébeda cátei le.

⁵⁹ Jáluajati jábutigu fádirigu, jáma sun jíbiri líñun-ágei lúrudu lidúnrun Jesúsu láu iyéeni lun gayáraabei lan jasiádiruni lun loúnwen, ⁶⁰ madáritiña, láu sun sarágu jáña lan gürígia ñüdüntiña aríñaga iyéeni luágu. Agúmujoúni, ligía jayábin biáma yéetiña íchiga fe luágu, ⁶¹ ába jaríñagun.

—Aríñagati wügüri le luágu gayára lan lagúnrichagunun láni Búngiu témpulu, ábaya lánme laráramagüdúnun lídan ürüwa wéyu.

⁶² Ábati laráramun fádiri le íñutimaabei, ába laríñagun lun Jesúsu.

—¿Moúnabuntíbusan ni cáta? ¿Cáteigi le, le aríñawagúbei buágu?

⁶³ Reídeiti Jesúsu maníñu. Ábati laríñagun fádiri le íñutimaabei lun.

—Luágu líri Búngiu le wínwanbei báfiñura lun baríñaguni inárüni. Aríñagabei woun ánjein amürü lubei Crístubei le Liraü Búngiu, le lanúadirubei Búngiu lun lasálbaruniña gürígia uboúagu.

⁶⁴ Ába laríñagun Jesúsu lun.

—Ánja, áu, quei baríñaguni. Aríñagatina giñe jun luágu jaríjubadina lan, áu le Wügüri Garaüwarügüti, ñun lueígiñe loúnwenren Búngiu le Súnti Gabáfu, jaríjubei giñe niábin lídan juánriñu siélugiñe.

⁶⁵ Ábati lajeíridagunun fádiri le íñutimaabei lanáangun, le ligáñi, ába laríñagun.

—¡Anába láali wügüri le Búngiu láu lerérun! Mabúseerunjadiwa ámu lun líchugun fe luágu, agáamba jumáali anábuni le laríñagubei, ⁶⁶ ¿ída líña jaríjin lun?

Ába jaríñagun.

—Gadúnrunti, lúnti loúnwen.

⁶⁷ Ábati jásuerauni ligíbu, buleísei jameí, jíbiri, ába jagáyuajan ligíbuagun,
⁶⁸ ába jaríñagun lun.

—Quei amürü lan Crístubei, jaríñaga beígia ca lan agáyuajabei buágu!
Jaríñagunbei lun ítara ladüga gürágu líña lan lágu.

Laríñagun Pédro luágu ibídiñe lan Jesúsu lun

(*Mr 14.66-72; Lc 22.56-62; Jn 18.15-18, 25-27*)

⁶⁹ Súnti lasúseredun sun cátei le, ñun líña Pédro bougudi túbürürugug
lúban fádiri le íñutimaabei, ába tiábin ában esériwijatu luágun, ába taríñagun
lun.

—Bugúya, lúmañadibútia giñéñaja Jesúsu le Galiléana.

⁷⁰ Ába leyéedagun Pédro jagíbugiñe súngubei, ába laríñagun.

—Ibídiñeti nun ca lan uágu badímureja.

⁷¹ Leíbuga yebe Pédro luágun béna, ligía taríjini ábanya, ába taríñagun joun
ja ñíbaña.

—Eyéri le, lúmañajañein gíñe Jesúsu le Nazaréta.

⁷² Ábaya leyéedagun Pédro láu fiñún, ába laríñagun.

—Ibídiñeti wügüri ligía nun.

⁷³ Murúsun lueígiñe, ába jayábin ja ñíbaña lúmoun Pédro, ába jaríñagun
lun.

—Inárüni luágu ában lan jádaangiñe amürü, arijúati luágu ligáburi
badímurejan.

⁷⁴ Ába lagúmeserun íñaragua lúngua aríñaga láu fiñún.

—¡Ibídiñeti gürígia ligía nun!

Lídan méme óra ligía, ába layúgurujan ában gáyu. ⁷⁵ Ábati larítangun
Pédro luágu le laríñagubei Jesúsu lun. “Beyéedaguba náu ürüwa weíyaasu
lubáragiñe layúgurujan gáyu.” Ába láfuridun Pédro ñígiñe, ába layájuajan láu
igárigu.

27

Ledéregerúniwa Jesúsu lun Piláto

(*Mr 15.1; Lc 23.1-2; Jn 18.28-32*)

¹ Dan larúgadunbei, ába jadámuridagun sun jábutigu fádirigu jáma
wügüríña weírigutiña lídan jafíñen juríu aríja cába lan jadüga lun
lasíadirúniwa Jesúsu. ² Ába janügüni gürágu, ába jedéregeruni lun Póncio
Piláto le gumádimati.

Loúnwen Júdas

³ Dan le laríjinbei Júdas, le alúgurubalin Jesúsu, luágu siádi jamáli lan
Jesúsu lun loúnwen, ába laságürijan, ába láguyugüdüni darándi murúsun
pláta ligía joun jábutigu fádirigu lúma joun wügüríña weírigutiña, ⁴ ába
laríñagun joun.

—Afígounjaadina láu nedéregerun ában wügüri madúnrunti lun loúnwen.

Ába jaríñagun lun.

—¿Cámege le warúma? ¡Bugúya lun baríjini líra!

⁵ Ába lachágaruni Júdas seínsu ñi témpulurugu, ába lídin átigiragua lúngua.

⁶ Ába jabúduni jábutigu fádirigu seínsu ligía, ába jaríñagun.

—Siñáti wíchuguni seínsu le tídoun gáfu to lágei liseínsuna Búngiu ladüga lebégi oúweni.

⁷ Ába júaradun lun lagáñijóun lufúlasun ában wügüri le adágubei barámbi láu seínsu ligía lun jábunajoún teréncha ñi. ⁸ Ligía Lufúlasun Jítaü lubeí líribei fulásu ligía chülü lúmoun dan le. ⁹ Ítara líña lagúnfulirun lé meja laríñagubei proféta Jeremías. “Barü jamuti darándi murúsun pláta ligía, ebégi le jíchugubei Israelítagu luágu wügüri ligía, ¹⁰ ába jagáñijani lufúlasun ában wügüri le adágubei barámbi láu, quei laríñaguni Nabúreme nun.”

Jesúsu ligíbugiñe Piláto

(Mr 15.2-5; Lc 23.3-5; Jn 18.33-38)

¹¹ Barüwati Jesúsu ligíbugiñoun gumádimati, le gíribei Piláto, le álügüdúbalin.

—¿Amürüsan Jarúeitebei Jurú?

Ába laríñagun Jesúsu lun.

—Ánja, áu quei baríñaguni.

¹² Dán buriti jíchugun jábutigu fádirigu jáma wügüriña weírigutiña lidúnrun, moúnabuntija Jesúsu ni cáta. ¹³ Ábati laríñagun Piláto lun.

—¿Magáambun bumútisan le jaríñagubei buágu?

¹⁴ Moúnabunti Jesúsu ni cáta, ábati laweíridun lanígi gumádimati.

Lasiádirín Jesúsu lun loúnwen

(Mr 15.6-20; Lc 23.13-25; Jn 18.38–19.16)

¹⁵ Gagáburi lumúti mejáti gumádimati lígiragüdün ában adaürüti joun güriáa lídan fédu, furúmieguarügü adaürüti le jamúriajan lúma. ¹⁶ Níñeinti ában adaürüti, díseti leíbaajan líri, gíruti Barabási, ¹⁷ dánti le adámuriñujaña lan sun güriáa, ába lálügüdüniña Piláto.

—¿Ca jabúseerubei nígiragüdün jun, Barabási, ódi Jesúsu le únbei laríñawagua Crístu?

¹⁸ Líridubalin gíñe Jesúsu ladüga subúdi láali lan luágu ladüga lan jagímugan lun jedéregerei.

¹⁹ Sun ñun lan Piláto luágu lála le lánina agúseruni, ába toúnajan lúmari aríñaga lun. “Madügabá ni cáta láu güriáa úaraguati le, ladüga gewéneditina buga ában uwénedi wuríbati áriebu buga ladüga güriáa le.”

²⁰ Ába jádaruni jábutigu fádirigu jáma wügüriña weírigutiña jádoun güriáa lun jamúriajan lun láfuridun Barabási, lun lafarún Jesúsu. ²¹ Ábaya ladímurejan gumádimati joun sun güriáa jagía, ába laríñagun joun.

—¿Ca jádaangiñe biángubei jabúseerubei lun nígiragüdüni jun?

Ába jaríñagun.

—Barabási.

²² Ába laríñagun Piláto joun.

—¿Cábatí nadüga láu Jesúsu le únbei laríñawagúa Crístu?

Ába jóunabun súngubei.

—¡Dáguabeí luágu gurúwa!

²³ Ába laríñagun Piláto joun.

—¿Cáti wuríbati ladügübei?

Ábatima jagúaragun.

—¡Dáguabeí luágu gurúwa!

24 Dan le laríjnbalin Piláto luágu siñá lan ladügün ni cáta lueídügüya chagáguau, ába lamúriajan dúna, ába lachíbuni lújabu jagíbugiñe güriá, aríñageina.

—Máma áu lúnbei naríjin láu loúnwen wügüri madúnrunti le, jugúya lun jaríjini ñi.

25 Ába jaríñagun sun güriá.

—¡Wagía jáma warájüñü, wanügüba furúmieguarügü dúru wawoúguoun luágu loúnwen!

26 Ábati lígiragüdüni Piláto Barabási, ába loúnajan abeíchei Jesúsu, ába ledéregeruni lun ládarawagún luágu gurúwa.

27 Lárigiñe, ába janügüni lisúdaaranigu gumádimati Jesúsu tídoun lúban Piláto, ába jóundaraguagüdüniña sun súdeara geyéguá láu. 28 Ába jarágachunun lanáangun, ába jíchugun ában anáanguní funátu luágu, 29 ába jíchugun ában rídi láuti jíyu lálbulugu, lúma ában mabúru lújaburugu le loúnwenren. Ábati jájuduragun ligíbugiñe, ába jéjerajan láu, ába jaríñagun lun.

—¡Gabágarilá Jarúeite Juríu!

30 Ába gíñe jásuereguni, janügeija mabúru ligía, jíchaaguei lálbulugu. 31 Lárigiñe jéjerajan láu ítara, ába jagídarunun anáanguní funátu lueí, ába jadáürünun lanáangun luágu. Ába janügüni lun ládarawagún luágu gurúwa.

Ládarawagún Jesúsu luágu gurúwa

(Mr 15.21-32; Lc 23.26-43; Jn 19.17-27)

32 Dan le áfurideina jáña lan, ába jadúnragun lúma ában wügüri Cirénena, gíriti Simón, ába jafósuruni lun lanügüni lugúruwan Jesúsu.

33 Ítara líña jachülürün lídoun ában fulásu gíriti Gólgota, líla líra, Lufúlasun Lábu Ichügü. 34 Ñi jíhiga diweín láu árani tídan lun Jesúsu lun látunun, jóucharügü lumútu, mátun lumútu.

35 Dan le dáguá jamáali luágu gurúwa, ába jájurerun súdeara ubúnuruni lun jafánreinjanun lanáangun Jesúsu jádaangua. Ítara líña lagúnfulirun lé meja labürújabei proféta. “Ájureratiña ubúnuruni lun jaríjin cába lan jádaangiñe erédera táu nanáangun.” 36 Ába jañúurun ñi lun jóúnigiruni. 37 Ába jíchugun ában abürjóuni lougíñe lichügü le ñi lubei laríñaga ca lan lidúnrunbei. Abürjóuni ligía ítara líña. “Jesúsu le, le jarúeitebei juríu.”

38 Dáwaguatiña gíñe bián jíwerutiña luágu gurúwa lúma, ában lueígiñe loúnwenren, ában lueígiñe lubaúna. 39 Já buriti ásügürübaña ñigiñe, ába janábuni, ába jánjingichuni jachügü, 40 aríñageina.

—Bugúya le gayáraabei bágurunun témpulu ábaya baráramagüdünun lídan ürüwa wéyu, sálbaguabá búngua. Ánjein Liraü bubei Búngiu, raríba lueígiñe gurúwa.

41 Ítara líña gíñe jéjerajan jábutigu fádirigu jáma arúfudajatiña lilúrudun Moisés, fariséogu, jáma wügüriña weírigutiña, láu, ábaja jaríñagun jámagua.

42 —Sálbati ámu, ánjein lúngua, siñáti lasálbaragun. Ánjein ligía lubeí Jarúeitebei Israelítagu, raríla lueígiñe gurúwa, afíñe wamámuga luágu. 43 Rúlaali laffínen luágu Búngiu, sálbaleíti Búngiu guetó ánjein inárüni lubeí luágu jínsiñe lan lun, quei aríñagaali lan woun luágu Liraü lan Búngiu.

44 Anába jamúti gíñe jíwerutiña ja dáwaguñubaña luágu jagúruwan úara lúma.

*Loúnwen Jesúsu**(Mr 15.33-41; Lc 23.44-49; Jn 19.28-30)*

⁴⁵ Ábati labúrigadun sun fulásu lúmagiñe amídirugu darí ladaünrún ürüwa rábounwéyu. ⁴⁶ Quei buri óra méme ligía, ába lagúaragun Jesúsu jére. —Elí, Elí, ¿láma sabáctani? —líla líra. Nubúngiute, Nubúngiute, ¿cásan uágu bígirana?

⁴⁷ Ñíñanu agáambuti jádaangiñe ja ñíbaña, ába jaríñagun.

—Lagúajaña wügüri le lun proféta Elías.

⁴⁸ Ába lídin ában jádaangiñe eíbaagueina anüga ában mudúsi, lárigiñe ladüdúragüdüni táu diweín garújütu ába líchuguni luágu ában wéwe, ába línchunun lun lun lachúrunun. Ába lachúrunun. ⁴⁹ Ába jaríñagun ja jíbiri.

—Ígirabeí, waríja ánjein ñübin Elías asálbareí.

⁵⁰ Ábaya ladügün Jesúsu ában agúaraguni jéreti, ábati loúnwen. ⁵¹ Lídan óra ligía, ába tajeíridagun tubélun témpulu lídan bián murúsun, íñugiñe lun ünabun. Ába ladágarun ában járabaganáli, ába láwarajan dübü. ⁵² Ába lánjunrenchúnga umúajaü, águyuguatiña sarágu jádaangiñe afíñetiña luágu Búngiu já meja jiláguaañábaña. ⁵³ Ába jáfuridunga lídaangiñe jamúaja lárigiñe lásaarun Jesúsu lídaangiñe ouweni. Ába jebélurun lídoun ubúругu Jerusalén le biníwabei, le ñí lubei jaríjaña sarágu gürigia.

⁵⁴ Léti jábuti súdaara jáma súdaara ja oúnigirubalin Jesúsu, dan jasándirubalin járabaganáli lúma dan jaríjinbaalin líbiri buri cátei le asúseredubei, ába janúfudedagun sarágu, ába jaríñagun.

—Inárüni, Liraü Búngiu wügüri le.

⁵⁵ Ñíñanu sarágu würíña aríagua dísegiñe, ja afálarubalin Jesúsu lúmagiñe Galiléagiñe íderagua jameí. ⁵⁶ Ñíñoun María Magdaléna jádan, María to lúguchu Jacóbo lúma José, túma jáguchu lirájüñü Zebedéo.

*Labunúniwa Jesúsu**(Mr 15.42-47; Lc 23.50-56; Jn 19.38-42)*

⁵⁷ Dan le agúñedeina líña lubeí, ába liábin ában wügüri rísiti gíríti José, lídaangiñeti fulásu le gíríbei Arimatéa, jádaangiñeti giñe ja afálarubalin Jesúsu. ⁵⁸ Ábati lídin aríjei Piláto, ába lamúriajani lúgubu Jesúsu lúma. Ábati laríñagun Piláto lun líchugúniwa lun, ⁵⁹ ába lanügüni José, ába loúburaguni tídan ában gamísa jarúmatu. ⁶⁰ Ába líchuguni lídoun lumúaja iséri lé yebe lachígagüdübei lubárua luágu dübü. Lárigiñe ladáuruni umúajaü láu ában dübü weíríti luágu lubéneri, ába lídin. ⁶¹ Ñíñounti María Magdaléna túma to ában María ñun ligíbugiñe umúajaü.

Oúnigirutiña ligíbugiñe lumúaja Jesúsu

⁶² Larúgan, lárigiñe aráansejani lubá luwéyuri eméraaguni, ába jóudin jábutigu fádirigu jáma fariséogu aríjei Piláto, ⁶³ ába jaríñagun lun.

—Wábuti, jarítagua wamúti luágu aríñaga lán meja yéeti ligíra dán meja mouñwengili luágu lásaaruba lan luágu lürüwan wéyu lárigiñe loúnwen. ⁶⁴ Oúnajagubeibá achóururei umúajaü daríme lürüwan wéyu, mayábin jamámuga láni disípulugu áriebe íwerujei lúgubu, ábame jaríñagun joun gürigia luágu saráali lan. Weírítimaajalímeti lagúmujoún iyéeni le sùgü láu le furúmiñeti.

⁶⁵ Ába laríñagun Piláto joun.

—Barüjuma fiú súaara, jeíba chouuru jumeí umúajaü le lubuídun-ágei juáraati.

⁶⁶ Ábati jóúdin, ába jachouúruruni dübü le luágubei umúajaü, ába jígiruniña súaara lun jóúnigiruni.

28

*Lásaarun Jesúsu lídaangiñe oúweni
(Mr 16.1-8; Lc 24.1-12; Jn 20.1-10)*

¹ Dan le lásügürünbei luwéyuri eméraaguni áni arúgadeina líña dimáasu, ába jóúdin María Magdaléna túma to ában María aríjei umúajaü. ² Sódini, ába ladágarun ában járabaganáli jéreti óra ligía láu larárirun ában láni Wabúreme ánjeli siéluigiñe, ába liábin luágun umúajaü, ába lagídaruni dübü le áubei ladaurúa, ába lañúurun luágu. ³ Miríti ánjeli ligía quei ában labírijanoúga, tiábin lanáangun, jarú jarú. ⁴ Dan le jaríjinbalin súaara, ába jadádagarun láu anúfudei, ába jeréderun camá jiláguaaña. ⁵ Ábati lariñagun ánjeli ligía joun würiña jagía.

—Manúfude jumá. Subúsiti nun luágu jáluajañein lan Jesúsu le ádarawagúbei luágu gurúwa. ⁶ Úati ya, saráli quei lariñaguni. Jigoúgu jarijei fulásu le ñíjin lubei líchugúa, ⁷ ábame jídin furése, ábame jariñagun joun láni disípulugu luágu saráli lan, luágu níngiran lan jubá jubá Galiléoun, ñíba jarijei. Niján ugánu lé buga lúnbei nariñaguni jun.

⁸ Ába jóúdin würiña jagía oúfudageina, láu anúfudei lúma sarágu ugúndani, ába jóúdin eíbaageina aríñagei joun disípulugu. ⁹ Súnti añája lan luágu ũma, ligía larúfudagun Jesúsu lúngua joun, ába labúsurun joun. Ábati jayárafadun lun, ába jájuduragun lun, ába jóúburuni lugúdi. ¹⁰ Ába lariñagun joun.

—Manúfude jumá. Jeíba awísaraña nánigu lun jóúdin Galiléoun, luágu ñíba lan jarijana.

Cátei le jabájüdagubei súaara

¹¹ Dan le jóúdiña lubei würiña, ligía jóúdin jádaangiñe súaara ja oúnigirubaña, ába jóúdin ubúrgu, ába jabájüdaguni le asúseredubei joun jábutigu fádirigu. ¹² Ába jóúdin ábutigu ja adímureja jáma wügüriña weírigutiña lídan jafiñen juríu lun jebélurun jáma lídoun ában úarani, ába jíchugun sarágu seínsu joun súaara, ¹³ ába jariñagun joun.

—Jariñagame luágu dan lan le anjünja lan arúmuga áriebe, ába lan jayábin láni Jesúsu disípulugu, ába jíwerujani lúgubu. ¹⁴ Ánjein lasúbudira gumádimati cátei le, wadímurejaba luágu jáni fuleísei lúma lun madügün lan ni cáta jáu.

¹⁵ Ábati jerésibiruni súaara jagía seínsu, ába jóúdin adúgei le uágubei lariñawagúa joun. Ítara liñáti jariñaguni juríu chülü lúmoun dan le.

*Líchugun Jesúsu jadásin disípulugu
(Mr 16.14-18; Lc 24.36-49; Jn 20.19-23)*

¹⁶ Ába lubeíti jóúdin únsu disípulugu Galiléoun luágu wübü lé meja uágubei lariñaga Jesúsu joun lun jóúdin. ¹⁷ Dánti le jaríjinbalin Jesúsu, ába jájuduragun lun, láu sun añájein lan jádaangiñe, louguati jafiñen luágu ligía lan. ¹⁸ Ába liábin Jesúsu jawágun, ába lariñagun joun.

—Rúaali sun ubáfu nun siélu lúma ubouágu. ¹⁹ Jeíbati jabügürü gürígia ja lílana sun fulásu, adüga jumáña nánime disípulugu, badíseigüda jumáña lídan líri Búngiu Úguchili, Búngiu Irájü, lúma líri Sífiri Sándu. ²⁰ Arúfudaja jugúyame joun lun gagáambadi jamá lun sun le uágubei naríñaga jun. Subúdi jumeí luágu anájein lan júma ságü wéyu daríme lagúmuchun ubou. Ítaralá.

UGÁNU BUÍTI LE LABÜRÜJABEI MÁRCOS LUÁGU JESÚSU

Lapúrichijan Juan

(Mt 3.1-12; Lc 3.1-9, 15-17; Jn 1.19-28)

¹ Niján ugánu buíti luágu Jesucrístu, le Liraü Búngiu, ² latátira láu lagúnfulirúniwa dimúrei lé meja labürüjabei proféta Isaías, laríñaga.

Niján nouñagüle, líña Búngiu, nouñajañein bubáragiñe, amürü le Niraü, lun laráansejanun janígi gürígia lubá biábin.

³ Lagúarajaba lídan fulásu mageírawati.

“Aráanse jumoún janígi lubá liábin Wabúreme, queísi ladárarúniwa úma surúti.”

⁴ Lun lagúnfulirúniwa dimúrei ligía liábinbei Juan lídoun fulásu mageírawati, ábaja laríñagun joun gürígia ja ñübinbaña lun luágu lúnti lan jasáansiruni ligáburu jóuserun lun ferúdunawa lan jafígoun, badísei jagíame. ⁵ Ábatija jayábin lídaangiñe sun Judéa lúma sun Jerusalén agáambeí lapúrichijan. Dántija le jagúfesaruni jafígoun, ábajeí labásteragüdüniña Juan lídan dúna le gíribei Jordán.

⁶ Mebégitu lanáangun Juan, láutu lúra caméyu, lagürüga lamídan, guéru, chigángaru leígibaña lúma síruudu le áraabuna. ⁷ Laríñagaja joun gürígia lídan lapúrichijan.

—Liábinba ában le gabáfutimaati nárigiñe, weíriti lubáfu nueí darí lun madúna nan ni lun nélemuchun afáragadei tagürüga ligeídin. ⁸ Áu, láu dúna nabásteragüdaün, ánjein ligía, labuínchagüdübadün láu lubáfu Sífiri Sándu.

Labásterun Jesúsu

(Mt 3.13-17; Lc 3.21-22)

⁹ Lídoun buga dan ligía, ába lídin Jesúsu Nazarétgiñe, fulásu le lídaanbei lumúan Galiléa, ába labásteragüdüni Juan lídan dúna le Jordán. ¹⁰ Dan le láfuridunbei dúnarugugiñe, ába lánjunrenchagun siélu lun, ába laríjini Juan larárirun Sífiri Sándu luágu Jesúsu queí jamúga ában únjun. ¹¹ Ában lagaambúniwa ában umálali siélugiñe aríñaguti.

—Amürü niraü le jínsiñebei nun, gúndaatina báu.

Loúchaguni Máfia Jesúsu

(Mt 4.1-11; Lc 4.1-13)

¹² Lárigiñe, ába lanügüni Sífiri Sándu Jesúsu lídoun fulásu mageírawati, ¹³ ába leréderun Jesúsu bián-wein wéyu ñi jagánagua anímaalugu janárimetiña. Sun dan le láubei ñi, ába loúchaguni Máfia, lárigiñe, ába jayábin ánjeligu lun jeténirun lun.

Lagúmeseruni Jesúsu luwádigimari lídan fulásu le gíribei Galiléa

(Mt 4.12-17; Lc 4.14-15)

¹⁴ Lárigiñe ladaürúniwa Juan, ába lídin Jesúsu Galiléa apúrichijeí ugánu buíti lúmagiñeti Búngiu. ¹⁵ Ába laríñagun.

—Chülújali dan lun lagúmeserun larúeijan Búngiu, sáansi jumeí ligáburu jóuserun, afíñe jumá luágu ugánu le lánina asálbaruni lídaangiñe figou.

Lagúarun Jesúsu joun gádürü esénijatiña lun jafálaruni

(Mt 4.18-22; Lc 5.1-11)

¹⁶ Luágu ában wéyu, eíbugeina líña Jesúsu láru láru dúna le gíribei Galiléa, ába laríjini Simón lúma Andrés le lamúlen. Esénijani lubeígia jawádigimaribei, jáguruñati óra ligía. ¹⁷ Ába laríñagun joun.

—Jigoúgu nárigi, falá jumana, madíajanjadünme úduraü, gürígiajañame jadíaia nun.

¹⁸ Ába jígirunun jasénin furése furése, ába jóúdin lúma.

¹⁹ Ábati leíbugun Jesúsu murúsunraüya, ába laríjini Jacóbo le liraü Zebedéo, láu sun Juan le lamúlen, tídaañanu ában ugúnein arámada joun jasénin. ²⁰ Ába lagúarun joun, ába jígiruni jáguchi tídan ugúnein jáma ja íderagubaliña, ába jóúdin lúma Jesúsu.

Ában gürígia gawáguti ában espíritu wuríbatí

(Lc 4.31-37)

²¹ Ába jachülürün lídoun fulásu le gíribei Capernaúm lídan wéyu le eméraaguagülei, ába lebélorun Jesúsu tídoun jalígílisin juríu, ába lagúmeserun arúfudaja joun. ²² Weírítí janígi gürígia láu sun le laríñagubei Jesúsu joun ladüga larúfudajan joun láu ubáfu, máma quei arúfudajatiña lilúrúdon Moisés. ²³ Níñein ában wügüri tídan ligílisi tugúya láu ában espíritu wuríbatí, ába lagúaragun.

²⁴ —¿Cámesan bemétera wámoun, Jesúsu Nazarétna? ¿Biábiñasan lun bagünrichaguníwa? Subúdi numúti cátabu lan, láu amürü lan Búngiu Irájü le sándubei.

²⁵ Ába ladeínjan Jesúsu lun espíritu wuríbatí ligía, ába laríñagun lun.

—¡Maníba, furíba lídaangiñe gürígia le!

²⁶ Ába louwe jagüdüni espíritu wuríbatí gürígia ligía, ába láfuridun lídaangiñe, wágueina. ²⁷ Sun ja ñíbaña, ába laweíridun janígi, ába jálügüdagun jámaga.

—¿Cáteisan le? ¿Cáteisan iséri arúfudajani le? ¿Gürígia le, gabáfuti lun gíñe lagúmadiruniña espíritu wuríbatíña áni agáamba jamúti!

²⁸ Ába lagaambúniwa luágu Jesúsu lídan sun Galiléa furése.

Lareídaguagüdünnun Jesúsu límenidi Simón Pédro

(Mt 8.14-15; Lc 4.38-39)

²⁹ Dan le jáfuridunbei tídaangiñe ligílisi tugúya, ába lídin Jesúsu lúma Jacóbo láu Juan jábiñe Simón lúma Andrés. ³⁰ Roun tiñátí límenidi Simón, tabíruajaña, ába jaríñagun lun Jesúsu luágu sándiñoun lan. ³¹ Ábati lídin tuágun, ába lárügüdüni tújabu, ába liñúrágunun, lídan meme óra ligía ába tareídagun, ába tásaarun, ába teténirun joun.

Lareídaguagüdünnun Jesúsu sarágu sánditiña

(Mt 8.16-17; Lc 4.40-41)

³² Dan le lálüdün wéyu, gúñeeli, ába janügüniwa sun sánditiña jáma sun ja gawágubaña espíritugu wuríbatíña lun Jesúsu, ³³ ába jóúndaragun sun lílana fulásu lubádu béna. ³⁴ Areídaguagüdati Jesúsu sarágu sánditiña ja láutiña ámuñegueinarügü luwúyeri sándi, sagá ligía sarágu espíritugu wuríbatíña jawei gürígia. Mígiruntjati lun jadímurejan espíritugu jagía, ladüga subúdi jamáni cáteiñein lan.

*Lapúrichijan Jesúsu Galiléa**(Lc 4.42-44)*

³⁵ Lubá larúgan, dan le búrigagili, ába lásaarun Jesúsu, ába láfuridun bougudin luei ubúruгу lídoun ában fulásu le mageírawati lun layúmuragun lun Búngiu ñi. ³⁶ Ába lídin Simón jáma líbirigu áluajei. ³⁷ Dan le jadáriruni, ába jaríñagun lun.

—Añájeintia sarágu gürígia áluajabu.

³⁸ Ába laríñagun joun.

—Queímoun lídoun buri líbiri fulásu le yaráfabei, apúrichija námuga gíñe ñi, ladüga lun napúrichijan lídan sun fulásu niábin ubouágun.

³⁹ Ítara líña lubeíti eíbuga lumúti Jesúsu sun Galiléa apúrichijeina tídan buri jalígilisin juríu lídan sun fulásu, aságajeina ligía espíritugu wuríbatíña jawei gürígia.

*Lareídaguagüdüni Jesúsu ában gawáguти gumeín luágu sun lúra**(Mt 8.1-4; Lc 5.12-16)*

⁴⁰ Ába liábin ában gürígia sánditi láu gumeín luágu sun lúra, ába lájuduragun ligíbugiñe Jesúsu, ába layúmuragun lun, laríñaga.

—Gayáraati bareídaguagüdüniña ánjabu busúen.

⁴¹ Ába lagúdemedagun lun Jesúsu, ába lagúuruni láu lújabu, ába laríñagun.

—Láu sun nugúndan, areídaguabá.

⁴² Quei laríñagun ítara, ába lareídagun sánditi ligía. ⁴³ Ábati louñajani Jesúsu ñígiñe láu ában furése, aríñageina lun.

⁴⁴ —Mabájüdagubeitia lun ni ában, ñüdünrügübá arúfudagua búngua lun jafádirin juríu, ábame bíchuguni badágaragüdüni luágu barúmadun queísi laríñaguni lilúrudun Moisés. Ítara lúba jaríjini gürígia luágu areídaguadibulan.

⁴⁵ Ábarüga lídin, ába labájüdaguni sun le asúseredubei lun joun sun gürígia, ligía lébubei siñá lan leréderun Jesúsu furáangu lídan ni ában fulásu, ába leréderun le ñí lumuti úa jamá gürígia. Láu sun lúra, ñübin mémetiña lídaangiñe sun fulásu aríjei.

2*Lareídaguagüdüni Jesúsu ában wügüri le derégüdaali lúgubu**(Mt 9.1-8; Lc 5.17-26)*

¹ Átiri wéyu lárigiñe, ába lagíribudun Jesúsu Capernaúm, ába jagáambun gürígia luágu giríbujali lan. ² Ába jóundaragun sarágu gürígia darí lun mabáraaña lan ni bénabu, ába lapúrichijani ugánu buíti lúmagiñeti Búngiu luágu jasálbarun joun. ³ Níñein apúrichija, ligía jayábin gádürü wügüriña barúina jagía ában wügüri le derégüdaali lúgubu. ⁴ Queisiti siñá lubei jachúlürün le ñí lubei Jesúsu ladüga jibe gürígia, ába jagídarun murúsun lueígiñe tábulugu múna lougiñe le ñí lubei Jesúsu, ába jarárigüdüni sánditi ñígiñe tídan lubárari. ⁵ Dan le laríjinbalin Jesúsu jafíñen, ába laríñagun lun le sándibei.

—Niraü, ferúduñawaali bífigoun.

⁶ Níñanu jádaangiñe arúfudajatiña lilúrudun Moisés ja ñünbaña ñi, ába jasáminarun. ⁷ “¿Cásan uágu ladímureja gürígia le ítara? Lanábaguñeiga le Búngiu, ladüga úati ni ában gayáraati ferúduña lan figou lueídügüya Búngiu.” ⁸ Subúdi lumúti Jesúsu le jasáminarubei, ába laríñagun joun.

—¿Cásan uágu jasáminara ítara? ⁹ ¿Cáteitimasan ménreengunbei laríñawagún lun sánditi le. “Ferúdunawaali bífígoun”, o laríñawagún lun. “Sarába, budáboun bubárari, beíba”? ¹⁰ Narúfudaaliti jun luágu gabáfu nan, áu le Wüğüri Garaüwarügüti lun ferúduna nan figóu.

Ába laríñagun lun sánditi.

¹¹—Sarába, budáboun bubárari, beíba águyu.

¹²Ába lásaarun sánditi lídan óra ligía, ába labúdunun lubárari, ába láfuridun ñígiñe, aríagu sun ja ñíbaña lun. Weíriti janígi ja ñíbaña luágu cátei le, ába jíchugun uweíríguni lun Búngiu, aríñageina.

—¡Maríjiñajágidiwa cátei ítara buriti!

Lagúarun Jesúsu lun Leví lun lánigume
(Mt 9.9-13; Lc 5.27-32)

¹³Ñígiñe, ábaya lídin Jesúsu láru dúna, dan le jayárafadun sarágu güri-gia lubádun, ába larúfudajan joun. ¹⁴Lásun larúfudajan joun, ába lasígiruni leíbugun, ába laríjini Leví, le liraü Álfeó, ñun líña le ñí lubei lagúburajoúa liseínsuna gumádi. Ába laríñagun lun.

—Falábana, queímoun núma queísi náni disípulu.

Ába lásaarun Leví, ába lafálaruni.

¹⁵Murúsun óra lárígíñe, ñíñein Jesúsu eíga lúbiñe Leví, ñíñanu gíñeti sarágu agúburajatiña liseínsuna gumádi, jáma ámu gafígountiña ñun luágu dábula úara lúma, jáma láni disípulugu, ladüga sarágu jáña afálaruti. ¹⁶Ja arúfudajatiña lilúrudun Moisés, jáma fariséogu, dan le jaríjinbalin eíga jáma sun wuríbatíña jagía (según jagía), ába jaríñagun joun láni disípulugu.

—¿Ída liñásan leíginbei jumáesturun áni gurá ligía jáma agúburajatiña liseínsuna gumádi lúma jáma ámu gafígountiña?

¹⁷Dan le lagáambunbalin Jesúsu cátei le, ába laríñagun.

—Ja magádiebaña mabúseerúntiña surúsia, ja sándibaña, jagía busénbaña surúsia. Máma lubeíti niábiña áluaja güri-gia buítiña ligíbugíñe Búngiu, niábiña áluajaña ja gafígounbaña lun lasáansirún jouserun.

Jálügüdüni Jesúsu luágu ayúnaruni
(Mt 9.14-17; Lc 5.33-39)

¹⁸Luágu ában wéyu, dan le jayúnarun lánigu Juan jáma jánigu fariséogu lun jagúnfulirun lúma Búngiu, ába jayábin fiú güri-gia álügüdei Jesúsu.

—¿Cásan uágu jayúnara lánigu Juan jáma jánigu fariséogu lun jagúnfulirun lúma Búngiu, ánjaña báni disípulugu mayúnaruntiña?

¹⁹Ába louñabun Jesúsu láu jémpulu luágu iséri larúfudajan lúma binádu, laríñaga.

—¿Gayáraati funági jayúnarun amísurajoútiña lídan ában maríei dan le njein lan adári ñi jáma? Ánjein njein lubeí adári ñi, siñáti jayúnarun, lúnti jeígin. ²⁰Lachülürüba dan lun lanügüniwa adári jámagíñe, ligíameti jadáani lun jayúnarun.

²¹Máfadajoúntu anánguni binádujaru táu gamísa to macháwaragungiru, ladüga le méme tífe gamísa to macháwaragungiru tajeíridagoubon to binádujaraboun dánme le tacháwaragun, laweíridatimaabati jeíruti. ²²Meserúnwati gíñe bínu le isérigili lídoun ában ágei guéru le binádujali ladüga labouçhagubei bínu iséri guéru binádu dánme le liñúrun. Féridimeti bínu, féridi guéru. Bínu iséri lúnti leserúniwa lídoun guéru iséri.

Játüjan disípulugu türígu lídan wéyu le eméraaguagülei
(Mt 12.1-8; Lc 6.1-5)

²³ Ában wéyu le eméraaguagülei, eíbugeina líña Jesúsu jáu láni disípulugu labádinagua bunáguau, ába játüjan láni disípulugu türígu dan le jáségürün.

²⁴ Ába jaríñagun fariséogu lun Jesúsu.

—¡Aríjabá joun bánigu! ¿Cásan uágu jadüga wadágimanu le moún lumuti ladügüniwa lídan wéyu le eméraaguagülei?

²⁵ Ába laríñagun joun.

—¿Malíjangidün luágu le ladügübei David luágu ában dan, dan le lálámachunbei, ligía jáu sun líbirigu? ²⁶ Ába lebélorun ligílisirugun dan le Abi-atár lan fádiri le íñutimaabei, ába leiginun fein to sagraúboun, to majouáboun jeiginun ámu güri-gia jaweidügüya fádorigu según lílúrudun Moisés, áni ru ligía joun güri-gia ja lúmabaña. Mámami figoú le ladügübei David ligíbugiñe Búngiu.

²⁷ Ába giñe laríñagun Jesúsu joun.

—Lun wügüri ladügüwa wéyu le eméraaguagülei, máma wügüri adügüwabei lun wéyu ligía. ²⁸ Ligía gabáfutina giñe, áu le Wügüri Garaüwarügüti, lun naríñagun cába lan gayára ladügüniwa lídan wéyu le eméraaguagülei.

3

Ában wügüri jiláali ában lújabu
(Mt 12.9-14; Lc 6.6-11)

¹ Ábaya lebélorun Jesúsu tídoun ában jalígílin juríu, ñíñeinti ában wügüri jiláali ában lújabu. ² Jaríjati ja ñíbaña ánjein lagáranijaba lubei Jesúsu lun lídan wéyu le eméraaguagülei, lun jadárirun lidúnrun. ³ Ába laríñagun Jesúsu lun le jiláalibeí újabu.

—Sarába, ráramabá ya jagíbugiñe súngubei.

⁴ Ába lálügüdüniña ja jíbiri.

—¿Cátei lúnbei ladügüniwa lídan wéyu le eméraaguagülei, lun jíderawagüniwa güri-gia ódi lun ladügüniwa wuríbatí joun, lun leséfurúniwa jabágari ódi lun jígirúniwa lun jóunwen?

Sun jagía, ába jámanichun. ⁵ Ábati laríaguniña Jesúsu láu igáñi lúma íruni ladüga tidére janígi. Ába laríñagun lun wügüri ligía.

—Tulébei bújabu.

Ába látuleruni, ába lareídagun. ⁶ Ába jáfuridun fariséogu, ába jagúmeserun adímureja jámagua jáma giñe lánigu Heródes ída lúba lan jáfaruni Jesúsu jilágubei.

Sarágu güri-gia lárú dúna

⁷ Ába lídin Jesúsu jáu láni disípulugu lárún dúna, ába jafálaruni sarágu güri-gia Galiléana. ⁸ Dan le lagaambúnbei luágu oúnwenbun buri cátei le ladügübei, ába jayábíngua güri-gia Judéagiñe, Jerusaléngiñe, Iduméagiñe, loubáfurugugiñe dúna le Jordán, Tírogiñe, lúma Sidóngiñe lun jaríjini. ⁹ Ligía laríñagunbei Jesúsu joun láni disípulugu lun aráanseñu jamá ában ugúnein lubá luei jámuruduni sarágu güri-gia jagía, ¹⁰ ladüga queí gíbeeña lan lareídagugüdün, sun sánditiña, ába jáguragun jóungua luágun lúnrügü jagúuruni lun lareídagugüdüniña. ¹¹ Dántija le jaríjini

ja gawágubaña espíritugu wuríbatíña, ábaja jájuduragun ligíbugiñe, ába jagúaragun espíritugu jádaangiñe.

—Liraũ Búngiu amürü.

¹² Ába lewéridiruniña Jesúsu lun maríñagun jamá cáteiñein lan.

Lanúadiruniña Jesúsu dúusu apóstolugu

(Mt 10.1-4; Lc 6.12-16)

¹³ Lárigiñe, ába lamúdeirun Jesúsu luágun ában wübü ní lubei lagúara joun ja labúseerubaña queísi loúnagülegu, ába jayábin lun. ¹⁴ Ába lanúadirun dúusu jádaangiñe lun lúmabaña lan súnwandan lúma lun japúrichijani ugánu buíti lánina asálbaruni. ¹⁵ Ába líchugun ubáfu joun lun jareídaguagüdün sánditiña lúma lun jaságajan espíritugu wuríbatíña. ¹⁶ Niján jiri dúusu wügüríña jagía. Simón, le únbei lagúaja Jesúsu Pédro, ¹⁷ Jacóbo láu Juan le lamúlen, ja lirájüñü Zebedéo, ja únbaña lagúaja Jesúsu Boanérges—míni lan líra, Lirájüñü Wayújururu, ¹⁸ Andrés, Felípe, Bartolomé, Matéo, Tomás, Jacóbo le liraũ Álfeo, Tadéo, Simón—ában meja wügüri le áfaaguti lun jawáanserun juríu, ¹⁹ lúma Júdas Iscarióte le alúgurubalin Jesúsu.

Aríñagatiña luágu lubáfu lan Máfia lúmabei Jesúsu

(Mt 12.22-32; Lc 11.14-23, 12.10)

Lárigiñe, ába jagíribudun járiñoún, ába jebélurun tídoun ában múna, ²⁰ ábaya joúndaragun sarágu gürígia ñi darí lun madáni jamá ni lun jeigin. ²¹ Dan le jasúbudirunbalin lidújeñu Jesúsu ca lan ásügürübei, ába jayábin lún yebe janügüni, ladüga jaríñagun gürígia luágu wuríbaali lan lichügü.

²² Níñanu arúfudajatiña lilúrudun Moisés ja achülürübaña Jerusaléngiñe, ába jaríñagun.

—Wügüri le, níjein Beelzebú, le Máfia, le jábuti espíritugu wuríbatíña, lúma, láu lubáfu Máfia laságaja espíritugu wuríbatíña.

²³ Ábati lagúarun Jesúsu joun lun jayárafadun lubádun, ába líchugun ában jémpulu joun, ába laráñagun.

—¿Ída lúba gayára lan laságaruni Máfia Máfia guánarügü? ²⁴ Furúmieguarügü arúejani le afánreinraguti lun jageíndagun jámagua, lagünrinchaguba, ²⁵ áni ánjein fánreingujaña lubei idújeñu ladüga wuríbu jádaangua, siñábei jadúrarun idújeñu jagía queísi idújeñu. ²⁶ Ánjein lubei jamúgati afáreinragua Máfia, lageíndaguame lúmagua, siñábei ladúrarun, lagúmuchagülerügübei le.

²⁷ Úati ni ában lun lebélurun lúbiñoun ában wügüri le jéreti lun lanügüni lílagu ánjein magúragun lan wügüri jéreti ligía furúmiñe. Ítara rügüñein gayára lan lanügüni lílagu.

²⁸ Láu sun ninárün naríñagun jun luágu gayára lan ferúdnawa lan sun figou lúma sun wuríbani le laráñagubei gürígia, ²⁹ lueidügüya lun jadímurejan wuríbati luágu Sífiri Sándu, siñábei ferúdnawa lan figou líra, leréderuba lidúnrun lun sun dan.

³⁰ Laríñagunbalin Jesúsu líra, ladüga jaríñagun luágu lubáfu lan Máfia lubáfu Sífiri Sándu le luágubei.

Lúguchu Jesúsu jáma lamúlenu

(Mt 12.46-50; Lc 8.19-21)

³¹ Lárigiñe, ába tachülürün lúguchu Jesúsu jáu lamúlenu tubádun múna to ní lubei Jesúsu, ába jeréderun bougudi, ába joúnagüdün luágu. ³² Játi ñúnbaña geyégu láu Jesúsu, ába jaríñagun lun.

—Nurántia búguchu jáu bamúlenu bougudi, jáluajañádibu.

³³ Ába laríñagun joun.

—¿Cági nóguchuboun jáu namúlenu?

³⁴ Ába laríagun jawágun ja ñunbaña geyégu láu, ába laríñagun.

³⁵ —Añája nóguchu jáu namúlenu, ladüga furúmieguarügü ja adügüti lugúndan Búngiu, jagía namúlenubaña, nítunu, nóguchu.

4

Jémpulu luáguti ábunaguti
(Mt 13.1-9; Lc 8.4-8)

¹ Ábaya lagúmeserun Jesúsu arúfudaja láru dúna, ába jóundaragun sarágu gürígia le ñi lubei. Quei gíbeyaaña lan gürígia ñi, ába ladinun Jesúsu tídoun ában ugúnein to ñíboun dúnarugu. Ába lañúurun ñi, ába jeréderun sun gürígia láru béya. ² Ábati larúfudajan sarágu cátei joun láu jémpulu, laríñaga joun.

³ —Agáamba jumána. Ñíñein ában ábunaguti, ába láfuridun ábunagua. ⁴ Lídan afúrujeina láani líla nádü, ába láburiyan murúsun lídaangiñe luágun úma, ába jayábin dunúru, ába jeígini. ⁵ Líbiri, ába láburiyan labádinaguóun dúbü le ñi lumuti úa lan sarágu múa, ába laboučhun furése ladüga majúlilin lan múa. ⁶ Dan le lásüdün wéyu, ába lásaürün, queíti málagüle lan, ába loúnwen. ⁷ Líbiri ílaü, ába láburiyan labádinaguóun jíyu, ába laweínamudun jíyu úara lúma, ába lañáradaguagüdüni, magínduntiti nádü ligía. ⁸ Níjeinti lídaangiñe, áburujati lídoun múa buíti, ába laboučhun, ába laweínamudun, jma lubuídun alúbajoüti lídaangiñe! Níjein lídaangiñe, íchuguti darándi águu luágu cáda ában águu, líbiri rúti úrúwa-wein, líbiri, san.

⁹ Ábati laríñagun joun.

—Ja garígeirugubaña lun jagáambun, agáamba jamá.

Le lébubei larúfudajan Jesúsu joun gürígia láu jémpulu
(Mt 13.10-17; Lc 8.9-10)

¹⁰ Lárigiñe, dan le leréderunbei Jesúsu lábugua, ába jayábin lání dúusu disípulugu jama jíbiri lánigu, ába jálügüdüni ca lan lílabei jémpulu le. ¹¹ Ába laríñagun joun.

—Jugúya, subúdigüda láali Búngiu cátei arámudaguati le lánina larúeijan jun, ánjaña ja mebéresenbaña láu lerérun, láu jémpulu laríñawagúa cátei luáguti larúeijan joun, ¹² lun dánme lan jaríjin, íbídiñe lámuga joun ca lan laníchigubei cátei le jaríjubei, dánme jagáambun, úa lámuga gunfaráanda jamá, lun lásiñerun jagíribudun lun Búngiu lun ferúdnawa lan jafígoun.

Lafúnraanguagüdüni Jesúsu jémpulu luáguti ábunaguti
(Mt 13.18-23; Lc 8.11-15)

¹³ Ába laríñagun joun.

—¿Úatisan gunfaráanda jumáni le? ¿Ída lubági gunfaráanda jumáni líbiri jémpulu? ¹⁴ Le ábunagubalin líla nádü, ítara líña quei le apúrichijabalin Lerérun Búngiu. ¹⁵ Añájein gürígia, ítara jáña quei úma le uágunbei láburiya lídaangiñe líla nádü, ába jagáambuni Lerérun Búngiu, lárigiñe jagáambuni, ába liábin Máfia, ába lagídaruni dimúrei le abunúbei tídan janígi. ¹⁶ Jíbiri gürígia, ítara jáña quei dúbü le abádinaguóunbei láburiya lídaangiñe líla nádü, ába jagáambuni Lerérun Búngiu, ába jerésibiruni láu ugúndani. ¹⁷ Quei márügüdüñ lubei Lerérun Búngiu tídan janígi buídu, madúрати jádan, dánti le larijiniwa jábun, o jeíbaajoúniwa lan lueígiñe Lerérun Búngiu,

magúraasuntiña. ¹⁸ Jayábin jíbiri, ítara jáña quei jíyu le abádinaguounbei láburuja lídaangiñe líla nádü, ába jagáambuni Lerérun Búngiu, ¹⁹ weíritimaati jafúudun luágu cátei le lánina ibágari le, ába leyéeduniña irisini. Sun le, ába láfaruni Lerérun Búngiu tídaangiñe janígi, mígiruntiti lun lalúbajoún jádan gürígia jagía. ²⁰ Añájein giñe gürígia, ítara jáña quei múa buíti le ídounbei láburuja lídaangiñe líla nádü, ába jagáambuni Lerérun Búngiu, ába jerésibiruni, alúbajoúati cátei buíti jádaangiñe. Buíti jagáburi quei líla nádü le íchugubei darándi águu luágu ában, o ürüwa-wein, o san.

Jémpulu luáguti lámpu
(Lc 8.16-18)

²¹ Ába laríñagun joun.

—¿Béwati funági ában lámpu lun líchugúniwa tábugiñe ában gáfu o tábugiñe lan gabána? ¡Uá! Luágu dábula líchugúa lun larúgoungadágüdün múnada. ²² Úati lubeíti ni cáta le arámudaguati lun mafúnraangudúnbei lan, úa ligía ni cáta le ibídiñewati lun masúbudirúnwabei lan. ²³ Agáamba jumána, jugúya le garígeirugubei lun jagáambun.

²⁴ Aríñagati giñe joun.

—Tóunigi jumátia lun jagúnfulirun lúma inárüni le jagáambunbei. Láuba jagúnfuliruni, gunfaráandatima jumáni le naríñagubei jun. ²⁵ Ítara líña, gürígia le aténirubei buídu lun nerérun, gunfaráandatima lumúti, ánjeinti le meténibeilun, labúlieidubei sun le agáamba lálalibeilun.

Jémpulu luáguti nádü le aweíridubei

²⁶ Aríñagati giñe Jesúsu.

—Ítara líña larúeijan Búngiu quei le asúseredubei lun ában wügüri le ábunubei líla nádü lábugiñe múa, ²⁷ áriebu buri lúma wéyuagu lídan le larúmugun ábunaguti ligía, sará ligía quei léchun, chülü dan ába labouúchun nádü, ába laweíridun, ibídiñeti lun ábunaguti ída líña lan lasúseredun. ²⁸ Múa guánarügü aráandarati, furúmiñe ába láfuridun ídibu, ñígiñe ába legélewejan, ñígiñe ába labuínchun ílewei láu ílaü. ²⁹ Dánti le funáli líla nádü, ába látüjouniwa ladúga chülújali lan dan lun lalúbajoún.

Jémpulu luáguti tíla mostása
(Mt 13.31-32; Lc 13.18-19)

³⁰ Aríñagati giñe Jesúsu.

—¿Cásan lenégebei larúeijan Búngiu, o ca jamúga jémpulu gayáraabei wíchuguni lúmoun? ³¹ Ítara líña quei ában tíla mostása le abunúti lábugiñe múa. Tíla mostása, ligía ában lídaangiñe ílaü le ñúraütimaabei ubouágu, ³² dan le labunún, ába laweíridun, ligía weíritimaabei tídaangiñe sun nádü, weínamuti lilímun darí lun gayára lan jeméraagun dunúru lábugiñe lamúñounga le líchugubei.

Layúsuruni Jesúsu jémpulu
(Mt 13.34-35)

³³ Ítara líñájei larúfudajan Jesúsu luágu larúeijan Búngiu joun láu sarágu jémpulu líbe le darí le ñí lumuti gayára lan gunfaráanda jamá. ³⁴ Marúfudajaanti ni cáta joun luágu larúeijan Búngiu mayúsurunga jémpulu. Ába lafúnraanguagdüni sun jémpulu joun lání disípulugu dan le jagíarügü lan lúma.

Lagálumaruni Jesúsu garábali lúma lugúdi barána

(Mt 8.23-27; Lc 8.22-25)

³⁵ Wéyu méme ligía, dan le lagúñedunbei, ába lariñagun Jesúsu joun láni disípulugu.

—Queímoun loubáfurugun dúna.

³⁶ Ábati jígiruniña bürübünu gürígia jagía, ába janügüni Jesúsu tídan ugúnein to gádaanbaliña. Níñoun buri giñe ámu ugúnein úara jáma. ³⁷ Ába láfuragun ában garábali jéreti, ába lebélujan lugúdi barána tídoun ugúnein darí lún yebe tabuínchun láu dúna. ³⁸ Larúmuguñati Jesúsu tiyúna ugúnein baláñu tuágu ában ichügübarari. Ába jagágudajani, ába jariñagun lun.

—¡Maésturu! ¿Mebéreseguntibusan láu wadíbiragua lan?

³⁹ Ába lásaarun Jesúsu, ába ladeínjan lun garábali, ába lariñagun lun barána.

—¡Maníba! ¡Derégüdaguabá!

Ába lagálumadun garábali, ába darángila lan sun cátei. ⁴⁰ Ábati lariñagun joun láni disípulugu.

—¿Cásan uágu luweírinbei janúfude? ¿Cásan uágu mafíñen jubeí?

⁴¹ Ába jeréderun láu luweírin janígi, ába jálügüdagun jámagua.

—¿Cátei funásan le, garábali lúma barána ñüdüntiña láu le lubeíbei?

5

Ában wügüri Gadárana le gawágubei máfianu

(Mt 8.28-34; Lc 8.26-39)

¹ Ába jachülürün loubáfurugun dúna lídoun fulásu le gíribei Gadára. ² Lárigiñerügü láfuridun Jesúsu tídaangiñe ugúnein, ába liábin ában gürígia lídaangiñe ában umúajaü achigíti luágu dübü luágun, wügüri ligía gawáguti ában espíritu wuríbati. ³ Lídan jabára jiláaña lagánoua áni úati ni ában gayáraati lagüraguni, ni láu güríngüri. ⁴ Güráguañája jamáli láu güríngüri luágu lugúdi lúma luágu lújabu, súnwandan látumuraguni, úati ni ában gayáraati lámuruduni. ⁵ Súnwandanja leíbugun áriebu wéyuagu agúarajeina luágu buri wübü lúma buri lídan jabára jiláaña íbiagua lúngua láu dübü. ⁶ Dan le lariñinbalin gürígia ligía Jesúsu dísegiñein, ába leíbaagun lubároun, ába lájuduragun ligíbugiñe, ⁷ ába lagúaragun lun.

—¿Cásan uágu bemétera númoun, Jesúsu Liraü Búngiu le Íñutimaabei? Ayúmuraguatina bun luágu líri Búngiu lun masúfuriragüdün bánina.

⁸ Lariñagunbei ítara ladüga guméseeli lan Jesúsu aríñaga lun.

—¡Espíritu wuríbati, ígirabeí gürígia le!

⁹ Ába lálügüdüni Jesúsu.

—¿Ca bíri?

Ába louñabun.

—Lejión níña ladüga gíbetiwa.

¹⁰ Ába jayúmuragun espíritugu jagía lun Jesúsu lun moúnajan láníña bougudin lueí fulásu ligía. ¹¹ Queíti ñíñanu lan sarágu büüruju eíga ñi luágu wübü, ¹² ába jayúmuragun espíritugu wuríbatiña jagía lun.

—Oúnaja háwa jádoun büüruju jára, rúba úma woun lun webélurun jádoun.

¹³ Ábati líchugun Jesúsu úma joun, ába jáfuridun lueí gürígia ligía, ába jebélurun jádoun büüruju. Níñanu jawára bián-mílu büüruju. Ába jáguragun

büüruju jagía jóungua lueígiñe ában gudúungu, ába jáburujan baránajoun, ába jañáradagun.

¹⁴ Ábati janúfudedagun ja oúnigirubaliña büüruju jagía, ába jeíbaagun abájüdaguei le asúseredubei ubúругu lúma áraabu. Ába jayábingua gürígia aríjei ca lan asúseredubei. ¹⁵ Dan le jachülürünbei le ñí lubei Jesúsu, ába jaríjini gürígia lé meja gawágubei espíritugu wuríbatíña ñun líña, táuñein giñe lanáangun, areídaguuali, ába janúfudedagun. ¹⁶ Játi aríjubalin, ába jabájüdaguni le asúseredubei lun gürígia lé buga gawágubei espíritugu wuríbatíña lúma jawáguati büüruju, joun. ¹⁷ Ábati jayúmuragun lun Jesúsu lun láfuridun lídaangiñe jageíra.

¹⁸ Dan le ládinun Jesúsu tídoun ugúnein, ába layúmuragun wügüri lé buga gawágubei espíritugu wuríbatíña lun lun lídin lúma, ¹⁹ májati Jesúsu, aríñagarügüti lun.

—Beíba júbiñoun jámoun bidújeñu, ábame babájüdaguni sun le ladügübei Babúreme Búngiu báu, ída líña lan bagúdemedun lun.

²⁰ Ába lídin, ába lagúmeserun abájüdaguei sun le ladügübei Jesúsu láu lídan sun fulásu Decápolis, ába laweíridun janígi súngubei.

*Liraiü Jáiro, túma würi to agúurubarun lanáangun Jesúsu
(Mt 9.18-26; Lc 8.40-56)*

²¹ Dan le lagíríbudunbei Jesúsu tídan ugúnein loubáfurugun dúna, ába jayábingua бүрүбүну gürígia le ñíjin lubei, ába leréderun ñi láru dúna.

²² Ábati liábin ában jádaangiñe tábuti jalígílisin juríu, gírítí Jáiro. Dan le laríjínbalin wügüri le Jesúsu, ába lájuduragun lubádu lugúdi, ²³ ába layúmuragun lun ítara.

—Nújein niraü touwe, queímoun bíchigei bújabu tuágu, areídagua támuga, mouñwen támuga.

²⁴ Ába lídin Jesúsu lúma, sarágu jáña gürígia afálarutiña, ába burítí jámurudaguni Jesúsu. ²⁵ Jádaanti sarágu gürígia ja, ñíñoun ában würi sánditu, dúusu irúmu táu láu lésejan jítaü tídaangiñe. ²⁶ Súfurijaru sarágu jámagiñe surúsiagu áni gásta táali sun le túmati, mareídaguntu, gáwoun gueíñarügü.

²⁷ Ligía tagáambun ladímurejóun luágu Jesúsu, ába tíabin lanáangiñe jádan sarágu gürígia, ába tagúurunun lanáangun, ²⁸ ladüga taríñagun túnguarügü. “Láurügüme nagúurunun lanáangun nareídaguba.” ²⁹ Lídan óra ligía, ába leréderun lésejan jítaü tuei, ába tasándiragun túngua luágu areídaguuaaru lan.

³⁰ Ábati lasándiruni Jesúsu luágu areídaguagúdaali lan gürígia láu lubáfu, ába lagáraragun jawágun gürígia ja lanáangiñébaña, ába lálügüdjagan.

—¿Ca agúurubei tuágu nanáangun?

³¹ Ába jaríñagun láni disípulugu lun.

—Ariágu biñátia lun jíbe gürígia ya luágu murúgu jáña lan, ¿álügüdjágídibu ca lan agúurubei buágu?

³² Ába laríaajan Jesúsu áluaja ca lan agúurubei luágu. ³³ Ába tíabin würi tugúya adádagareina láu anúfudei, subúdiñutei le asúseredubei tun, ába tájuduragun ligíbugiñe, ába taríñaguni sun inárüni lun. ³⁴ Ába laríñagun Jesúsu tun.

—Niraü, areídaguuaadibu ladüga bafiñen. Beíba láu darángilaü, areídaguuañu lídaangiñe bisándi.

³⁵ Ñígili Jesúsu adímureja, ligía jayábin lúbiñegiñe wügüri lé buga ñüdüñbei óugei luágu tisándi liraü, ába jaríñagun lun túguchi irájü tugúya.

—Jilátia biraü, ¿ca uágu bebéreseja lun maésturu guetó?

³⁶ Agáamba lumúti Jesúsu le jaríñagubei, ába laríñagun lun wügüri ligía.

—Manúfudedabá, afíñerügübá.

³⁷ Májatiti jóudin ámu lúma lueídügüya Pédro, Jacóbo lúma Juan le lamúlen Jacóbo. ³⁸ Dan le lachülürünbei lúbiñoun wügüri ligía, ába laríñini chagáguau jáma güriúa ja ayájubaña, agúaraja. ³⁹ Ába lebélorun, ába laríñagun joun.

—¿Cásan uágu jareíncha, ayájua buri jugúya ítara? Moúnwentutia irájü to, tarúmuguña.

⁴⁰ Ába jéjerajan láu. Ábati láfuridagüdüniña Jesúsu súngubei ñigiñe, ába lanügüni túguchi irájü túma túguchu jáma ja ñüdünbaña lúma, ába lebélorun le ñijin tubei irájü. ⁴¹ Ába lárügüdüni tújabu, ába laríñagun tun.

—Talíta, cúmi—lila líra. Niraü, sarába.

⁴² Lídán óra ligía, ába tásaarun irájü tugúya, ába teíbugun. Weíyaraüjaru, dúusu irúmu táu. Ába laweíridun janígi güriúa ja ñibaña. ⁴³ Ába líchugun Jesúsu dimúrei derégudati joun lun mabájüdagun jamáni ni ca un, ába laríñagun joun lun jíchugun eígini tun.

6

*Jesúsu lídan fulásu le Nazarét
(Mt 13.53-58; Lc 4.16-30)*

¹ Ába lídin Jesúsu ñigiñe, ába lagíribudun lageíroun, ába jóudin láni disípulugu lúma. ² Dan lachülürün wéyu le eméraguagülei, ába larúfudajan tídan jalígílisin juríu, sarágu jáña güriúa agáambe, ába laweíridun janígi láu larúfudajan, ába jaríñagun.

—¿Jalía funásan lafúnrendeirei güriúa le sun le? ¿Cáteisan lichú áu le luágubei? ¿Ída liñásan gayára lubei ladáagun miláguru? ³ Saráfangeiga le tiraü María le, líbugaña Jacóbo, José, Júdas, lúma Simón, ñañanu gíñe lítunu wáma.

Ába jíchugun mabájüdüni luágu. ⁴ Ába laríñagun Jesúsu joun.

—Sun güriúa, gúndaatiña láu ában proféta jaweídügüya ja lupaísanun jáma lidújeñu, jáma ja tílana lúban, jagía rügüñanu íchiga mabájüdüni luágu.

⁵ Ligía lásiñerunbei ladügün ámu miláguru ñi lueídügüya líchugun lújabu jawágu biñáraü sánditiña, ába lareídaguagüdüniña. ⁶ Weírititi lanígi láu mafiñen jamá. Láriigiñe, ába leíbuguni lirájüñü fulásu, arúfudajeina.

*Loúnajaniña Jesúsu láni disípulugu apúrichija
(Mt 10.5-15; Lc 9.1-6)*

⁷ Ába loúnajan jawágu láni dúusu disípulugu lun lagúmeserun oúnajaña bián bián, ába líchugun ubáfu joun lun gayára lan jaságarun espíritugu wuríbatiña. ⁸ Rúti dimúrei joun lun manügün jamá ni cáta luágu jeíbugun lueídügüya bádun, moún lumuti janügün ni fein, ni ságü, ni seínsu, ⁹ lun geídi tan jasábadun, lun mabíaman tan jasímisin. ¹⁰ Ába gíñe laríñagun joun.

—Dánme le jebélorun lídoun ában fulásu apúsaraja, reídei jumá ñi tídan ában méme múna darí jáfuridun lídaangiñe fulásu ligía. ¹¹ Ánjaünti merésibirúniwa lídan ában fulásu, mája jagía jagáambunün, furíjuma ñigiñe, ábame jáfuruduni calíqui lueígiñe jugúdi, liseínime magúndani jáu lílana fulásu ligía, ígira jumáña quei jadáriragun jóungua. Le ninárün jáu luágu dánme lan lachülürün luwéyuri Búngiu lun lagúseragüdüniña sun güriúa,

maweíríbeí jabeichúniwa Sodómana jáma Gomórrana quei lílana fulásu le merésibirunbalún.

¹² Ábati jáfuridun, ába japúrichijan joun gürígia luágu lúnti lan jasáansiruni ligáburi jóuserun. ¹³ Sagátiña gíñe sarágu espíritugu wuríbatíña jaweí gürígia, jurúgua jagía aílí jawágu sarágu sánditiña, ába jareídaguagüdüniña.

Loúnwen Juan le abásteragüdjabeí

(Mt 14.1-12; Lc 9.7-9)

¹⁴ Queíti eíbaajali lubeí luáguti Jesúsu lídan sun fulásu, ába gíñe lachülürün lábun lagáambun urúei Heródes. Sarágu jáña aríñagutiña.

—Saráya Juan le abásteragüdjabeí lídaangiñe oúweni, ligía luweírínbeí lubáfu.

¹⁵ Jaríñaga jíbiri.

—Elías lé meja proféta le.

Jíbiri aríñaga.

—Ában proféta quei ja binádu.

¹⁶ Dan le lagáambunbalin Heródes sun le, ába laríñagun.

—Juan le, le nadürüragüdübei ichügü, saráaya lídaangiñe oúweni.

¹⁷ Lé meja asúseredubei, oúnajali meja Heródes adáürei Juan, ába lagüraguni láu güríngüri furísunrugu tadüga Heródias. Würi tugúya, lúmari meja Felípe, le lamúlen Heródes, ába lanügünun Heródes lúmarime. ¹⁸ Ába meja laríñagun Juan lun Heródes.

—Moún lumuti bagámaridunun lúmari bamúlen.

¹⁹ Ába liyéreegudun Juan tun Heródias, ába tabúseerun táfaruni jilágubei, ²⁰ siñá tumuti ladüga subúdi lan lun Heródes luágu ában lan wügüri le eíbuguti buídu lúma Búngiu Juan, áni ában lan wügüri esériwiduti lun Búngiu, janúfudetiti lueí. Ligía mája lubeí lun tadügün ni cáta láu. Láu sun úa lan gunfaráanda láani Heródes le laríñagubei Juan lun buídu, agáamba lumúti láu ugúndani. ²¹ Ába tadáriruni Heródias ticháansin dan le lagúnfulirun Heródes irúmu, ába ladügün fédu joun gumádimatiña jáma jábutigu súdeara jáma ámu buri gürígia weírigutiña ja Galiléabaña. ²² Ába tebélorun tiraü Heródias ñí lubeí fédu le, ába tabínajan, gúndaatiti Heródes jáma sun ja ñíbaña eíga lúma láu tabínajan irájü to, ába laríñagun tun.

—Amúriajabeí le babúseerun núma, níchugubei bun.

²³ Rúlumuti lerérun tun luágu líchugubei lan furúmiegurügü cátei le tamúriajan lúma tun, gayára lan lamídan lan fulásu le ñí lubeí larúeijan tamúriaja. ²⁴ Ába táfuridun, ába taríñagun tun túguchu.

—¿Cábasan namúriaja lúma?

Ába taríñagun tun.

—Amúriajabeí lábulugu Juan le abásteragüdjabeí lúma.

²⁵ Ába tebélorun irájü to furése le ñíjin lubeí urúei, ába taríñagun lun.

—Buséntina lun bíchuguni lábulugu Juan le abásteragüdjabeí nun lídan ában asíedu guelé guelé.

²⁶ Ába lajírudagun urúei sarágu, quei rúlaali lan lerérun áni agáambagu jáña amísurajóutiña lun, májati lun míchu lubeí lan le tamúriajabeí lúma tun. ²⁷ Furése furése, ába loúnajan urúei ában súdeara láu dimúrei lun lanügüni lábulugu Juan lun. ²⁸ Ába lídin súdeara ligía furísunrugu, ába ladürürüni lábulugu Juan, ába lanügüni lídan ában asíedu. Ába líchuguni tun irájü tugúya, ába tíchuguni tun túguchu.

29 Dan le jagáambunbalin lánigu Juan, ába jayábin lun janügüni lúgubu, ába jabununi.

Leigagüdüin Jesúsu seíngü mílu wügüríña
(Mt 14.13-21; Lc 9.10-17; Jn 6.1-14)

30 Lárigiñe jagíribudun láni Jesúsu apóstolugu, ába joúndaragun lúma, ába jabájüdaguni sun le jadügübei lúma le jarúfudajabei, lun. 31 Ába laríñagun Jesúsu joun.

—Jigoúgu, queímoun weméraagua lídan ában fulásu le mageírawati.

Laríñagubaalin líra ladüga ñíñanu sarágu gürígia, jíbiri ñüdü, jíbiri ñübin, darí lun madáani lan Jesúsu jáma láni disípulugu ni lun jeígin.

32 Ába joúdin tídan ába ugúnein lídoun ában fulásu mageírawati. 33 Sarágu jáña aríjiti joúdin, dan le jasúbudiruni luágu níjein lan Jesúsu jádan, ába jeibaagun geyégua láu lagúnu lídaangiñe sun lirájüñü fulásu, ába jachülürün lubáragiñe lachülürün Jesúsu jáu láni disípulugu. 34 Dan le larárirunbei Jesúsu tídaangiñe ugúnein, ába laríjin sarágu gürígia jagúrabajañein, ába jagúdemedagun lun ladüga ítara jáña lan quei mudún ja moúniritiña. Ába lagúmeserun arúfudaja sarágu cátei joun. 35 Dan le dárüjali, ába jayábin láni disípulugu, ába jaríñagun lun.

—Dárüjalitia áni úatiña aganoútiña lídan fulásu le. 36 Oúnaja báña gürígia ja lun joúdin lídoun buri lirájüñü fulásu le yaráfabei lun jagáñijan fein, ladüga úati ni cáta ya lun jeígin.

37 Ába laríñagun Jesúsu.

—Rújuma eíginí joun.

Ába jaríñagun lun.

—¿Gayáraati funági woúdin agáñija fein joun? Busénwati jamúga lebégi bián-san wéyu wadágimanu lun wabíjini seínsu lun wíchugun fein joun súngubei.

38 Laríñaga Jesúsu joun.

—¿Átiriñoungi fein júma? Jeíba aríjoun.

Dan le jaríjinun, ába jaríñagun lun.

—Seíngü fein jáma bián úduraü.

39 Ába lañúragüdüniña gürígia sagádirugu. 40 Ába jañúurun san san lúma dimí dimí san, queísi laríñagun joun. 41 Ába lanügünun Jesúsu seíngü fein to lújaburugu jáma bián úduraü ja, ába laríjin siélun, ába leteíngiruni Búngiu tuágu, ába lagúbachagúnun, lárigiñe, ába lamúrusujanun lun líchugunun joun láni disípulugu lun jafánreinjanun jádan gürígia jagía, fánrein jamáña giñe bián úduraü jagía jádan súngubei. 42 Joútiña sun jagía químule. 43 Lárigiñe, ába jabuínchagüdüin dúusu faníñe láu tife fein lúma lúma úduraü ígiragúti. 44 Seíngüñanu mílu wügüríña eígitíña, mabájüdünga würíña jáma irájüñü.

Leíbugun Jesúsu ligíbuagu dúna
(Mt 14.22-27; Jn 6.16-21)

45 Ába ladinagüdüniña Jesúsu láni disípulugu tídoun ugúnein lun jánjiñuragun lubá lun jachülürün Betsáida, sun niján lan ayoúragua joun gürígia. 46 Dan le ñüdüñaña, ába lídin luágu wübü ayúmuragua lun Búngiu.

47 Dan le lagúñedunbei, lamídaanjaru dúna ugúnein jáu disípulugu, Jesúsu rugáali lábugua múarugu. 48 Ába laríjin luágu jénreenguja lan joun lun jénjunjan ladüga jabárouñein lan garábali. Lubá larúgan, ába lídin Jesúsu

jawágun eíbugeina ligíbuagu dúna, lásügürá yebe jáu. ⁴⁹ Dan le jaríjini eíbuga ligíbuagu dúna, ába jarítangun luágu úfiaü lan, ába jagúaragun, ⁵⁰ ladüga sun jagía aríja jamúti, ába janúfudedagun. Ába ladímurejan joun, ába laríñagun.

—¡Ganígi jumá! ¡Manúfude jumá, áu le!

⁵¹ Ába ládinun tídoun ugúnein jámoun, ába lagálumadun garábali. Ába laweíridun janígi láu, ⁵² ladüga úgali lan gunfaráanda jamáni miláguru le ladügübei táu fein, luágu gabáfu lan lun sun cátei, derégili jachügü.

Lareídaguagüdüniña Jesúsu sánditiña Genésaret
(Mt 14.34-36)

⁵³ Ába jánjiñuraguni dúna, ába jachülürün Genésaret, ába jagürünun ugúnein láru dúna. ⁵⁴ Quei jaráriragun tídaangiñe ugúnein, ítara jasúbudiruni lílana fulásu luágu Jesúsu lan. ⁵⁵ Ába jeíbaagun lídoun sun fulásu aríñaga luágu chülújali lan, ába jagúmeserun gürígia anáaja sánditiña tídan jabárari le ñíjin lubei jagáamba luágu níjein lan Jesúsu ñi. ⁵⁶ Súnti fulásu ñíjin lumúti lebélera, ubúругu yebe, lirájüñü yebe fulásu, áraabu yebe, ába jíchaajoún sánditiña úmada, ába jamúriajan lúma lun lígiruniña lúnrügü jagúurun sánditiña jagía luágu táru lanáangun. Súnti ja agúurubaña luágu, areídaguatiña.

7

Cátei le adügübalin gürígia lun marúman lan ligíbugiñe Búngiu
(Mt 15.1-20)

¹ Ába jayábin fariséogu jáma jádaangiñe arúfudajatiña lílürudun Moisés ja ñübinbaña Jerusaléngiñe, luágun Jesúsu. ² Ába jaríjin luágu añájein lan jádaangiñe disípulugu machíbun jamúti jájabu lubá jeígin según jagáburi juríu. ³ (Falá jamuti fariséogu jáma jíbiri juríu binádu jagáburi binádu jagübürigu lun meígin jamá, machíbunga jamei jájabu sarágu weíyaasu. ⁴ Dan le jayábin mágidirugugiñe, meíginbaña magúnfulirunga jagía láu jachíbuni jájabu. Níjein buri giñe sarágu luwúyerigu igáburi jafálarun, quei buri lachibúniwa wéru, soúdiéru, boúlu, asíedu.) ⁵ Abati jálügüdüni fariséogu jáma arúfudajatiña lílürudun Moisés jagía, Jesúsu.

—¿Cásan uágu mafála jabálin báni disípulugu binádu jagáburi binádu wagübürigu, jeíginbei láu líwíye jájabu?

⁶ Ába loúnabuniña Jesúsu.

—Linárün proféta Isaías, dan le laríñagunbei juágu luágu ámu lan jigáburi luei le áubei jarúfudagua júngua. Aríñagati.

Gürígia ja, jayumárurügü jíhiga inébesei nun, líña Búngiu, ánjein tídan janígi, mebéresentiña náu.

⁷ Málati jájuduragun nun,

ladüga lé rügüñein jagúmadijan wügüriña jarúfudaja.

⁸ Ába laríñagun Jesúsu.

—Ígira jumáali lagúmadijan Búngiu lun jafálaruni binádu jagáburi binádu gürígia. lachibúniwa soúdiéru, wéru, lúma cátei líbeina líra. ⁹ ¡Maésturugu giñe buítiña jugúya, ígira jumúti lagúmadijan Búngiu lun jafálaruni binádu jigáburi! ¹⁰ Aríñagati meja Moisés. “Inébe jamá bagübürigu bun, le anábagubaliña lagübürigu, jílála.” ¹¹ Ánjeinti jugúya, aríñagatün luágu gayára lan laríñagun ában gürígia lun lúguchi o tun lúguchu. “Siñáti níderagunibu ladüga sun le númabei, aríñagaadina luágu lun lan níchuguni

lun Búngiu”, ¹² luágu furúmieguarügü lan le aríñaguti ítara, mámaali lan lúnti líderaguniña lagübürigu. ¹³ Láu líra, mebéigigüda jumáli lagúmadijan Búngiu lun jafálaruni binádu jigáburu, adüga jugúya sarágu cátei líbeina líra.

¹⁴ Ábaya lagúarun Jesúsu joun gürígia ja ñibaña, ába laríñagun joun.

—Agáamba jumána, sun jugúya, gunfaráanda jumáname. ¹⁵ Úati ni cáta ebéluruti lídoun gürígia lun laríbadagüdüni ligíbugiñe Búngiu, le áfuridubei tídaangiñe lanígi gürígia, ligía aríbadagüdübalin ligíbugiñe Búngiu. ¹⁶ Jugúya le garígeirugubei lun jagáambun, agáamba jumána.

¹⁷ Dan le lígiruniña Jesúsu gürígia jagía, ába lebélorun múnadoun, ába jálügüdüni láni disípulugu luágu jémpulu le. ¹⁸ Ába laríñagun joun.

—¿Úati lubei gíñe gunfaráanda jumá? ¿Úati gunfaráanda jumáni luágu sun lan le ebélurubei bougudigiñe lídoun gürígia siñá lan laríbadagüdüni ¹⁹ ladüga mebélu ti doun lanígi, lurágeirugun lebélura, ñígiñe ábaya láfuridun lídaangiñe?

Láu líra laríñaguña luágu sun lan eígini, jarúmati. ²⁰ Aríñagati gíñe.

—Le áfuridubei lídaangiñe gürígia, anáti líra, wuríbagüda lumúti, ²¹ ladüga lídaangiñe gürígia o tídaangiñe lanígi láfurida lagübüri samínaü, adultériu, salúfuri, áfarajani, ²² íwerujaní, wámajabúni, iyéreejabúni, iyéeni, marícharagun lan íbágari, gimúgaü, marásualugú, anáanguni únguaü, medéraaguaguduni. ²³ Sún buri cátei wuríbati le, tídaangiñe lanígi gürígia líabin, ligíati mabuídndagüdübalin ligíbugiñe Búngiu.

*Ában würi teréncha to afñeruboun luágu Jesúsu
(Mt 15.21-28)*

²⁴ Ába lídin Jesúsu ñígiñe loubawagun Tíro lúma Sidón. Ába lebélorun tídoun ában muna áni mabúseerunti yebe lun lasúbudiruni ni ában. Siñáti larámudagun, ²⁵ furése, ába tagáambun ában würi luágu, túguchu ában irájü gawágotu ában espíritu wuríbati. Ába tiábin, ába tájuduragun ligíbugiñe Jesúsu. ²⁶ Würi tugúya, máma juríu, Síro-Feniciána. Ába tamúriajan lúma Jesúsu lun laságaruni espíritu wuríbati le tuei tiraü. ²⁷ Ába laríñagun Jesúsu tun.

—Lúnti níderaguniña numútuniña ja juríu furúmiñe, mabuídunti lun tagídarúniwa fein jawei isáanigu lun tíchugúniwa joun oúnli.

²⁸ Ába touñabuni.

—Ánja Nabúreme, oúnli ja lábugiñebaña dábula gayáraati gíñe jeígin tídaangiñe tífe fein to jágujaboun isáanigu.

²⁹ Ábati laríñagun Jesúsu tun.

—Adímurejadibu buídu, gayáraajali bídin, furíja espíritu wuríbati tídaangiñe biraü.

³⁰ Dan le tachülürün múnada, ába tadárirunun irájü tídan gabána, furíjali espíritu wuríbati tídaangiñe.

Lareídaguagüdüni Jesúsu ában magáambaditi, maríñagadi

³¹ Ába láfuridun Jesúsu loubawagugiñe Tíro, ába lásügürün Sidóngiñe lúma lídaangiñe buri fulásu lánina Decápolis, ába lachülürün luágun barána Galiléa. ³² Ñi janüga ában wügüri magáambaditi, dagádaga lerérun lun, ába jamúriajan lúma lun líchuguni lújabu luágu lun lareídaguagüdüni. ³³ Ába ladíñurun Jesúsu ñígiñe láu jawei gürígia, ába ládaruni bián lirájüñü lújabu

larígeirugun, ába lásuerun, ába lájurudunun liñéñe láu arürei. ³⁴ Ába laríjin siélun, ába lawáragun, ába laríñagun.

—¡Efata! —míni lan líra. ¡Junrénba!

³⁵ Ába lánjunrenchun larígeirugu magáambaditi ligía, ába tánjingichun liñéñe lun ladímurejan buídu. ³⁶ Ába laríñagun Jesúsu joun lun mabájüdagun jamáni ni ca un, létima laríñagun joun lun mabájüdagun jamáni, ligíatima jabájüdaguni. ³⁷ Ábatí buri laweíridun janígi sarágu, ába jaríñagun.

—Adüga lumúti sun cátei buídu, darí lun lagáambagüdüniña magáambaditiña, adímuregüda láña maríñagaditiña.

8

Leígagüdüñ Jesúsu gádürü mílu gürígia
(Mt 15.32-39)

¹ Lídan dan ligía, ábaya jóundaragun sarágu gürígia áni úati ni cáta jáma lun jeígin. Ába lagúarun Jesúsu joun láni disípulugu, ába laríñagun joun.

² —Gudémetiña gürígia ja nun ladüga ürüwa wéyu jáu núma ya áni úaali ni cáta jáma lun jeígin. ³ Ánjaña nouñaja águyu meíginga, ladágaruba falálaü jawágu ümada, ladüga añájein jádaangiñe, díseti ñígiñe lumúti jayábin.

⁴ Ába jóunabuni láni disípulugu.

—¿Ída lubáti jeígagüdüniwa ya lídan fulásu le mageírawaguti?

⁵ Ába lálügüdüniña Jesúsu.

—¿Átiriñoun fein júma?

Ába jaríñagun lun.

—Sédü.

⁶ Ába lañúuragüdüniña gürígia múarugu, ába lanügünun sédü fein tugúya lújaburugu, ába líchugun eteíngiruni lun Búngiu. Ába lagúbachagunun, ába lamúrusujanun, ába líchugunun joun láni disípulugu, ába jafánreinjanun jádan gürígia jagía. ⁷ Níñanu gíñe átiri jarájüñü úduraü jáma, ába líchugun eteíngiruni jawágu, ába lafánreinragüdüniña. ⁸ Jouítiña sun jagía químule, buíngüdagíña sédü faniñe táu tífe to ígiraguboun. ⁹ Yaráfañanu joun gádürü mílu wügüríña. Ába louñajaniña Jesúsu águyu, ¹⁰ ába ládinun tídoun ugúnein jáma láni disípulugu, ába jóudin Dalmanutoún.

Jamúriajan fariséogu miláguru lúma Jesúsu
(Mt 16.1-4; Lc 12.54-56)

¹¹ Ába jayábin fariséogu, ába jagúmeserun asígeneja lúma Jesúsu. Lúnti jaríjin lábun, ába jamúriajan lun larúfudun ában miláguru joun, siéluigiñe.

¹² Ába lawáragun Jesúsu weíri, ába laríñagun.

—¿Cásan uágu jamúriaja gürígia ja lánina dan le ában miláguru? Ninárün jáu luágu marúfudúnbei lan miláguru jun.

¹³ Ába lígiruniña Jesúsu, ábaya ládinun tídoun ugúnein, ába lídin loubáfurugun dúna.

Jarúfudajan fariséogu quei ísi
(Mt 16.5-12)

¹⁴ Buliei jamútiti disípulugu janügün eígin, ában rügüñoun fein jáma tídan ugúnein. ¹⁵ Ába lewéridiruniña Jesúsu, laríñaga joun.

—Toúnigi jumátia lueí jísite fariséogu lúma lísite Heródes.

16 Ába jaríñagun disípulugu jádaangua.

—Ladügatia meigan wamá fein laríñagubei ítara.

17 Ába lasúbudiruni Jesúsu jarítangun, ába laríñagun joun.

—¿Ca uágu jaríñaga luágu meigan jumá fein? ¿Úagili gunfaráanda jumá, mefeen jugúya? ¿Ítara lidere jichügü? 18 ¿Maríjintün láu jágu, magáambun jugúya láu jarígeirugu? ¿Marítangun jumáali? 19 Dan le nafánreinjanbarun seingü fein jádan seingü mílu wügüríña, ¿átiriñoun faníñe táu tífe jabúdun?

Ába jaríñagun.

—Dúusu.

20 —Ángi dan le nafánreinjanun sédü fein jádan gádürü mílu, ¿átiriñeingi faníñe buin jabúdun?

Ába jaríñagun.

—Sédü.

21 Ába laríñagun joun.

—¿Úagili gunfaráanda jumá luágu máma lan tuágu fein nadímureja?

Lareidaguagüdüin Jesúsu ában maríjinti Betsáida

22 Lárigiñe, ába jachülürün Betsáidoun, ába lanügüniwa ában maríjinti lun Jesúsu, ába jayúmuragun lun lun lagúurun luágu. 23 Ítara líña lárügüdüni Jesúsu maríjinti ligía, ába lanügüni bougudín lueí fulásu ligía. Ába lájurudagun arürei luágu lágu, ába líchuguni lújabu luágu, ába lálügüdüni ánjein gayáaraaü lubeí laríjin. 24 Ába laríjin, ába laríñagun.

—Aríja numútiña wügüríña, naríjiniña quei tídibu wéwe, eíbugeina.

25 Ábaya líchuguni Jesúsu lújabu luágu lágu, ába laríjin güriquia ligía láu goúnigi, ába lareidagun, ába laríjini sun cátei furáangu. 26 Ába loúnajani Jesúsu águyu, aríñageina lun.

—Mebélurabátia ubúrugin, maríñagunbeíme lun ni ában ñi.

Laríñaguni Pédro luágu Jesúsu lan Crístubei

(Mt 16.13-20; Lc 9.18-21)

27 Lárigiñe, ába lídin Jesúsu jáu láni disípulugu lídoun buri lirájüñü fulásu le geyéguabei láu ubúrugu Cesaréa le Filípo. Úmada, ába lálügüdüniña láni disípulugu, laríñaga joun.

—¿Cátanasan jaríñagun güriquia?

28 Ába jóúnabun.

—Añájein aríñagutiña luágu Juan lan le abásteragüdejabei lan amürü, jíbiri aríñaga proféta Elías ban, añájeingua aríñagutiña luágu ámu lan proféta amürü.

29 Ába laríñagun.

—Ánti jugúya, ¿cátanati lídan jarítangun?

Ába laríñagun Pédro lun.

—Amürü Crístubei, le loúnajabei Búngiu lun lasálbaruniña güriquia lídaangiñe jafígoun.

30 Ába laríñagun Jesúsu joun lun maríñagun jamáni lun ni ában.

Ladímurejan Jesúsu luágu loúnwen

(Mt 16.21-28; Lc 9.22-27)

31 Ába lagúmeserun Jesúsu, le Wügüri Garaúwarügüti, arúfudaja joun luágu lúnti lan lasúfurirun sarágu, luágu weíribei lan jíchugun wügüríña

weirigutiña lídan jafiñen juríu mebéreseni láu, ítara lúba gíñe jouseruni jábutigu fádirigu jáma arúfudajatiña lilúrudun Moisés. Aríñagati joun luágu láfarúaba lan jilágubei, áni lásaaruba lan lídaangiñe ouweni lúnya labágaridun luágu lürüwan wéyu. ³² Furáanguti lariñaguni le joun. Ábati lanügüni Pédro Jesúsú ñígiñe, ába lagúmeserun adeínja lun. ³³ Ába lagáragun Jesúsú, ába larijin jawágun láni disípulugu, ába lébechuni Pédro, ába lariñagun lun.

—¡Díseba nueí, Máfial Bugúya, masáminaruntibu quei Búngiu, basáminarun quei wügüríña.

³⁴ Ábati lagúarun Jesúsú joun láni disípulugu jáma jíbiri gürígia lun jayárafadun lun, ába lariñagun joun.

—Le busénti lafálarunina, bulílelé cáteíñein lan, awándaleí sun luwúyeri asúfuriruni le lúnbei liábin lun nueígiñe queísi lanügüni ában wügüri lugúruwan, falálana. ³⁵ Ladüga le abúseeruti leséfuragun lúngua ya ubouágu lefériDIRUBEI IBÁGARI le magúmuchaditi, ánjeinti le ánjabei lefériDIRUNI LIBÁGARI ya ubouágu nueígiñe, libíjubei IBÁGARI le magúmuchaditi siélu. ³⁶ ¿Cági ju lan lun gürígia lagáñeiruni sun le lánina ubouú, lefériDIREIME LUBÁRA SIÉLU?

³⁷ Úati ni cáta lánina ubouú le áuti gayára lan lagáñijan gürígia lubára siélu. ³⁸ Le anügüti busíganu nuágu lúma luágu nerérun jagíbugiñe gürígia múaraantiña áni gafígountiña ja, nanügüba gíñe busíganu láu, áu le Wügüri Garaüwarügüti, dánme le niábin siélu giñe láu luweirigun Núguchi, geyégu jáu ánjeligu ja sándubaña.

9

¹ Aríñagati gíñe Jesúsú joun.

—Nínárün jáu, luágu añájein lan jádaangiñe ja yábaña guetó, mouñwenbaña darí jaríjini lachülürün larúeijan Búngiu láu ubáfu.

Lámuñedagun larijin Jesúsú

(Mt 17.1-13; Lc 9.28-36)

² Sísi wéyu lárigiñe, ába lanügüni Jesúsú Pédro, Jacóbo, lúma Juan, ába lídin jáu luágu ában wübü íñuti le ní lumuti gayára lan jábugua jamá, ába lámuñedagun larijin ñi jagíbugiñe. ³ Ába támiridun lanáangun jarú quei jeméreedu, weíríti tjarun chülü lúmoun úa jamá ni gürígia ubouágu gayáraati jachíbun gamísa lun tájarudun ítara. ⁴ Ába jaríjini Elías lúma Moisés ayánuja lúma Jesúsú, ⁵ ába lariñagun Pédro lun Jesúsú.

—Maésturu, ¡lídan dan awánja lan ya! Adüga wamá ürüwa dibásein, ában bun, ában lun Moisés, ában lun Elías.

⁶ Lariñagubaalin líra ladüga janúfude disípulugu, áni ibídiñeti lun Pédro ca lan lariñagubei. ⁷ Ába larárirun ában juánriñu le ñíjin jabei, ába ladáuragun jáu, ába lagaambúniwa ában umálali lídaangiñe juánriñu ligia le aríñagubei.

—Niján Niraü le jínsiñebei nun, jeíba láu le lubeíbei.

⁸ Lídan óra ligía, dan le jaríjin geyégu ñi, maríjinjaña ámu ñi lueídügüya Jesúsú.

⁹ Dan le arárireina jamá lueígiñe wübü, ába léredun Jesúsú jawágu lun mabájüdagun jamáni le jaríjibeí lun ni ában daríme saráli lídaangiñe ouweni lúnya labágaridun, ligia le Wügüri Garaüwarügüti. ¹⁰ Ligia jareidunbalin jádaangua, álügüdajárügütiña jámaga cátei lán funa ásaarunibeí lídaangiñe ouweni. ¹¹ Ábati jálügüdüni Jesúsú.

—¿Cásan uágu jaríñaga arúfudajatiña lilúrudun Moisés luágu lúnti lan liábin Elías furúmiñe lubáragiñe liábin le Crístubei?

¹² Ába loúnabuniña.

—Inárüni le jaríñagubei luágu Elíasba lan ñübin furúmiñe áni laráanserubei lan sun cátei. ¿Cági tariñagubei Lerérun Búngiu nuágu, áu le Wügüri Garaüwarügüti? Aríñagatu luágu nasúfuriruba lan sarágu áni mabájüdünbadina lan. ¹³ Naríñajare jun luágu ñübinjali lan Elías, ába jadügüni gürígia sun le jabúseerunbei láu, quei tariñaguni Lerérun Búngiu luágu ítara lúba lan lasúseredun lun.

Lareídaguagüdün Jesúsu ában irájü gawáguti espíritu wuríbati
(Mt 17.14-21; Lc 9.37-43)

¹⁴ Lárigiñe, ába jagíribudun le ñíjin jabeí jíbiri disípulugu, ába jaríjin sarágu gürígia geyégu jáu. Ñíñanu gíñe arúfudajatiña lilúrudun Moisés asígeneja jáma. ¹⁵ Dan le jaríjinbalin Jesúsu, ába laweíridun janígi láu jaríjini ñi, ába jeibaagun abúsura lun. ¹⁶ Ábati lálügüdüniña, laríñaga joun.

—¿Ca uágu jasígeneja jáma?

¹⁷ Ába loúnabun ában jádaangiñe ja ñíbaña, ába laríñagun.

—Maésturu, niján niraü nanügün bun, níjein ában espíritu wuríbati luágu, merérunjali ladüga. ¹⁸ Ñi lumuti lárügüdei espíritu wuríbati ligía, lájuchuruni múarugun, ába láfurijan jacútaü liyúmulugugiñe, ába lacünrinjan lári. Ledébilidüñati ítara. Amúriajaadina jáma báni disípulugu lun jaságaruni espíritu wuríbati le lueí, siñá jamuti.

¹⁹ Ába loúnabun Jesúsu, ába laríñagun.

—¿Gürígia maffíneraditiña! ¿Átiribeísan dan lun neréderuni júma lubá gayára lan jafiñerun nuágu? ¿Ídame lagúmucha maffíneni le jídaanbei? Barüjumei irájü ligía ñájoun.

²⁰ Ába janügüni lun. Dan le laríjinbalin espíritu wuríbati ligía Jesúsu, ába louwejugüdüni irájü ligía, ába leiguadun múarugun, ába lagárabajan, ába láfurijan jacútaü liyúmulugugiñe. ²¹ Ába lálügüdüni Jesúsu lúguchi, ába laríñagun lun.

—¿Átiri dan lueígiñe ítara lan?

Ába laríñagun lúguchi.

—Lúmagiñe ñúraügili. ²² Gíbeeli weíyaasu lájuchuruni espíritu wuríbati ligía wáturugun o dúnarugun lan lún yebe láfaruni jilágubei. Ánjein lubeíti níjein lubeí gayára bumúti adüga, gudéme wamá bun, íderagua báwa.

²³ Ába laríñagun Jesúsu lun.

—¿Ca uágu baríñaga ítara? Inárüni luágu gayára lan nadügüni. Sun cátei gayáraati lun le affínebei.

²⁴ Ába lagúaragun lúguchi irájü ligía.

—¿Affíñetina, íderagua bána lúntima nafiñerun!

²⁵ Dan le laríjinbei Jesúsu luágu furésetimájali lan jagíbedun gürígia, ába ladeñjan lun espíritu wuríbati ligía, ába laríñagun.

—Espíritu magáambaditi, maríñagadi, aríñagatina bun lun báfuridun, ígirabeí irájü le áni mebéluradügüyabá lídoun.

²⁶ Ába lagúaragun espíritu, ábaya louwejugüdüni irájü ligía, ába láfuridun, ába leréderun irájü ligía camá jiláali. Sarágu jáña aríñagutiña luágu jilá lan.

²⁷ Ába lárügüdüni Jesúsu lueígiñe lújabu, ába liñúrugini, ába laráramun.

²⁸ Ábati lebélorun Jesúsu múnadoun, ába jálügüdüni láni disípulugu dan le jábuguarügaña lúma, ába jaríñagun lun.

—¿Cásan uágu siñá wabalin espíritu wuríbati ligía aságara?

²⁹ Ába laríñagun joun.

—Ladüga líbe espíritu le, láu rügüñein ayúmuraguni lun Búngiu lúma ayúnaruni gayára lan láfuridun.

Ladímurejaanya Jesúsu luágu loúnwen

(Mt 17.22-23; Lc 9.43-45)

³⁰ Dan le jóudin ñígiñe, ába jásügürün Galiléagiñe, ³¹ mabúseruntiti Jesúsu lun lasúbudirúniwa jalíñañein lan ladüga larúfudajaña lan joun láni disípulugu, aríñageina ligía luágu ledéregerúaba lan, ligía le Wügüri Garaúwarügüti, jájaburugun wügüriña wuríbatiña áni jáfarubei lan jilágubei, ábame lásaarun lídaangiñe oúweni luágu lürüwan wéyu lúnya labágaridun. ³² Úati gunfaráanda jamáni le laríñagubei joun, áni janúfudetiña lun jálügüdüni.

¿Cátima weírigubei?

(Mt 18.1-5; Lc 9.46-48)

³³ Ába jachülürün ubúругu Capernaúm, múnada, ába lálügüdüniña Jesúsu.

—¿Cásan buga uágu jadímureja le eíbugeina jumá?

³⁴ Ába jeréderun maníñu ladüga úmada adímurejeina jañá buga luágu ca lan jádaangiñe weírigutimaabei. ³⁵ Ábati lañúurun Jesúsu, ába lagúarun joun dúusugubei disípulugu lubádun, ába laríñagun joun.

—Le abúsueruti ligía lan furúmiñeti, lúnti agúmujóuni lan jádan súngubei, lun gíñe lesériwidun joun súngubei.

³⁶ Ába lanügün ában irájü, ába líchuguni jamídaangua, ába lanügüni lújaburugu, ába laríñagun joun.

³⁷ —Gürígia le erésibiruti ában irájü quei le lídan níri, resíbi lumútina, áni máma rügüñein áu lerésibira, resíbi lumúti gíñe Núguchi le oúnajabalina.

Le mámabei wágani, wámagiñeñein

(Lc 9.49-50; Mt 10.42)

³⁸ Ába laríñagun Juan lun.

—Maésturu, aríjatiwa ában wügüri aságajati espíritu wúríbatiña lídan bíri, quei máma lan wámañein, ába wawéridiruni lun madügüdüngüya láani.

³⁹ Ába laríñagun Jesúsu.

—Mawéridira jumeí, ladüga úati ni ában le adügüti miláguru lídan níri lun ladímurejan wuríba nuágu. ⁴⁰ Le mámabei wágani, wámagiñeñein. ⁴¹ Ninárün jáu luágu furúmieguarügü lan le íchuguti ában wéru dúna jun lídan níri ladüga láni jumá Crístu, libíjuba afáyeyruajaü buíti.

Goúnigi lueí leíguadúniwa lídoun figóu

(Mt 18.6-9; Lc 17.1-2)

⁴² Furúmieguarügü le afíguongüdüti ában jádaangiñe ja isérigiñabaña lídan jafíñen nuágu, buítimaati jamúga lun lun lágurúniwa baránajoún láu ában oúnwenbun dübü le amúligüleí güráñu luágu ligíina sügü láu ladügüni cátei líra. ⁴³ Ánjabu lafíguongüda bújabu guánarü, buítimaati jamúga lun báchuguni, ladüga buítimaati jamúga bídin siélun láurügü ában újabu sügü láu jamúga badarún láu biángubei bújabu máfiougatin, ⁴⁴ ní lubei moúnwen jamá jéweraü ja eígibalin jágubu jiláaña, méñeguchadi wátu. ⁴⁵ Ánjabu

gíñe lafígoungüda bugúdi guánarü, buítimaati jamúga gíñe lun báchuguni, ladüga buítimaati jamúga bebélurun siélun láu ában ugúdi sügü láu badarún máfiougatin láu biángubei bugúdi, ⁴⁶ le ní lubei moúnwen jamá jéweraü, méñeguchadi ligía wátu. ⁴⁷ Ánjabu gíñe lafígoungüda bágu, buítimaati lun baságaruni, ladüga buítimaati jamúga bebélurun lídoun larúejan Búngiu láu ában águu sügü láu jamúga badarún máfiougatin láu biángubei bágu, ⁴⁸ le ní lubei moúnwen jamá jéweraü, méñeguchadi ligía wátu.

⁴⁹ ‘Sun gürígia ja lánigubaña Búngiu, jouchúaba quei lau wátu geméti jawágu lun jarúmadagüdúniwa, queísigubeirügü líchugúniwa sálu luágu cátei adágaragüdúwati lun Búngiu, arúfuda lámuga luágu jarúma lan, buídu ligía lun lareidúniwa. ⁵⁰ Buíti sálu, ánjein leféridira lubásuan, ¿cábagi un ju lan? Ítara líña lubeíti, awánda jumeí sun ouchúni lubá jarúmadun ligíbugíñe Búngiu, lídan jumá úaraguni júmagua.

10

Larúfudajan Jesúsu luágu ígiraguni
(Mt 19.1-12; Lc 16.18)

¹ Ába láfuridun Jesúsu Capernaúmgíñe, ába lídin loubawagun Judéa lúma luágun oubaü le ñígíñe lubeí láfuacha wéyu libíti dúna le Jordán. Ábaya joundaragun gürígia le ní lubei, ábaya larúfudajan joun queñíaja ligáburi. ² Ábati jayábin jádaangiñe fariséogu luágun Jesúsu áluga járügüdúni títan jasádarán láu jálügüdúni ánjein maríban lubeí lun lafánreinragun wügüri túma lúmari. ³ Ába laríñagun Jesúsu joun.

—¿Cá mejagi laríñagubei Moisés jun?

⁴ Ába jaríñagun lun.

—Aríñagati Moisés luágu gayára lan tíchugúniwa gárada lánina ígiraguni tun úmari.

⁵ Ába laríñagun Jesúsu joun.

—Líchugunbaalin Moisés gumádi líra jun ladüga tidére janígi. ⁶ Ánjein méja, dan le ladügünbalin Búngiu sun cátei, “adüga lumútiña wügüri túma würi”. ⁷ “Ligía lígirubei lubeí wügüri lúguchi túma lúguchu lun laganouniwa túma lúmari, ⁸ ábame jeréderun quei ábanrügü.” Mámáña lubeíti biáma, ábanrügaaña. ⁹ Ligía moún lubei lafánreinraguni wügüri le ladúnraguagüdúbei Búngiu.

¹⁰ Dan le múnada jamá, ábaya jálügüdúni disípulugu luágu cátei le, ¹¹ ába laríñagun Jesúsu joun.

—Le ígirutu lúmari, ába lagámaridun ámu, ladügüña adultériu. ¹² Ánjein gíñe tígira würi túmari, ába tagámaridun ámu, tadügüña gíñe adultériu.

Labíniruniña Jesúsu irájüñü
(Mt 19.13-15; Lc 18.15-17)

¹³ Ába janáajan gürígia irájüñü lun Jesúsu lun lagúurun jawágu, ába jagúmeserun disípulugu adeínja joun ja anájabaliña. ¹⁴ Dan le laríjini Jesúsu, magúndaati láu, ába laríñagun joun.

—Ígira jumá lun jayábin irájüñü númoun, mamájara jumá, ladüga ja jarúmabaña afíñe quei irájüñü, jagía lílanabaña larúejan Búngiu. ¹⁵ Ninárün jáu luágu le lan marúfuduntí ában igáburi únabugubuti queísi ában irájü, siñábei lebélurun lídoun larúejan Búngiu.

¹⁶ Ába lanügüniña lújaburugu, ába labíniruniña láu lújabu jawágu.

Ladímurejan ában rísiti lúma Jesúsu

(Mt 19.16-30; Lc 18.18-30)

¹⁷ Dan le lasígirunbalin Jesúsu luweíyasun, ába liábin ában wügüri eíbaagueina lubároun, ába lájuduragun ligíbugiñe, ába lálügüdüni itara.

—Maésturu buíti, ¿cásan cátei buíti lúnbei nadügüni lun nibíjini ibágari le magúmuchaditi?

¹⁸ Ába laríñagun Jesúsu lun.

—¿Ca uágu bariñaga nun “buíti”? Ában rügüñein buíti, Búngiu.

¹⁹ Subúditi gumádi bun. “Maganouábá túma ában gámaritu ámu, máfarajabá, míwerujabá, madímurejabá iyéeni luágu ni ában, mayéeda báña gürígia, inébe jamá bagübürigu bun.”

²⁰ Ába laríñagun wügüri ligía.

—Maésturu, gúnfulitina láu sun le lúmagiñe ñúraügídina.

²¹ Ába lariáguni Jesúsu láu ínsiñeni, ába laríñagun lun.

—Ában cátei mégebei lun badügüni. beíba, alúgurabei sun le búmabei, ábame bíchuguni lebégi joun gudémetiña, ábame bibíjin irísini siélu. Ábame bagiribudun, ábame bafálarunina.

²² Dan le lagáambunbalin gürígia le cátei le, ába lírudagun, ába lídin láu íruni ladüga rísiti buídu. ²³ Ába laríjin Jesúsu geyégu jawágun súngubei, ába laríñagun joun láni disípulugu.

—jénreenguti lun jebélurun rísitiña lídoun larúejan Búngiu!

²⁴ Ába laweíridun janígi disípulugu láu le laríñagubei, ábaya laríñagun joun.

—Nirájüñü, jénreenguti lun jebélurun ja íchubalin jafiñen luágu jarísin lídoun larúejan Búngiu! ²⁵ Méreenguntimaati lun ában caméyu lun lásügürün lídaangiñe lujúyun ában agúsa sügü láu lebélorun ában rísiti lídoun larúejan Búngiu.

²⁶ Dan jagáambunbalin cátei le, ába laweíridun janígi, ába jálügüdagun jámagua.

—¿Cáteiti gayáraabei lasálbarun?

²⁷ Ába lariáguniña Jesúsu, ába laríñagun joun.

—Siñáti jasálbaragun gürígia jóungua, ánjein Búngiu, gayáraati, ladüga úati ni cáta siñáti lun Búngiu.

²⁸ Ábati laríñagun Pédro.

—Wabúreme, wagía, ígira wamáalitia sún meja le wámabei lun wafálarunibu.

²⁹ Ába laríñagun Jesúsu.

—Nínárün jáu luágu furúmieguaügü lan le ígirutu lúban, o lamúlenu, o líbugañanu, o lítunu, o lúguchi, o lúguchi, o lirájüñü, o lufúlasun nueígiñe o lueígiñe lan ugánu le lánina asálbaruni, ³⁰ Ierésibiruba san weíyaasu sügü láu guetó lídan uboú le. múná, amúlenu, íbugañanu, ítunu, úguchurunu, isáanigu, lúma fulásu, láu sun leíbaajoúniwa, resíbi ligíame ibágari magúmuchaditi siélu. ³¹ Sarágu jáña ja furúmiñetiñábaña guetó, jagíaba agúmujoúni yágüta siélu, áni sarágu ja agúmujoúnibaña, jagíaba furúmiñetiña.

Ladímurejaanya Jesúsu luágu loúnwen

(Mt 20.17-19; Lc 18.31-34)

³² Luágüñanu úma lun Jerusaléoun, Jesúsu jabá jabá láni disípulugu, láuñanu luweírín anígi, áni jíbiri gürígia ja afálarubaliña, láuñanu anúfudei.

Ábayati ladiñurun Jesúsu jáu láni dúusu disípulugu jaweí jíbiri gürígia, ába lagúmeserun aríñagei le lúnbei lasúseredun lun joun. ³³ Ába laríñagun joun.

—Quei lubeí jaríjini, luáguñadiwa ũma lun Jerusaléoun, le ñíba lubeí nedéregerúa, áu le Wügüri Garaüwarügüti, joun jábutigu jafádirigun juríu lúma joun arúfudajatiña lilúrudun Moisés, ja lúnbaña jasiadirunina lun noúnwen. ³⁴ Ábame jedéregerunina joun ja mámabaña juríu lun jéjerajan náu, jabeichubadina, jásuerağubadina, ábame jáfarunina jilágubei, luágume lürüwan wéyu, ábame násaarun lídaangiñe oúweni lúnya nabágaridun.

Jamúriajan Jacóbo lúma Juan ában fuleísei

(Mt 20.20-28)

³⁵ Ábati jayábin Jacóbo lúma Juan, ja lirájüñü Zebedéo, ába jaríñagun lun Jesúsu.

—Maésturu, buséntiwa lun badügün ában fuleísei woun.

³⁶ Ábati laríñagun joun.

—¿Cági jabúseerubei lun nadügün jun?

³⁷ Ába jaríñagun lun.

—Lun dánme lan barúeijan láu sun buweírigan, lun bañúuragüdúniwa, ában lueígiñe boúnwenren, ában lueígiñe bubaüna.

³⁸ Ába laríñagun Jesúsu joun.

—Ibidiñeti jun ca lan jamúriajabei. ¿Gayáraabei jawánduni luweírin igárigu le lúnbei nawánduni, gayára ligíame júaradun núma lídan nasúfurirun?

³⁹ Ába jóúnabun.

—Gayára wabeí.

Ába laríñagun joun.

—Lúnti jawánduni igárigu le lúnbei nawánduni, úara jugúyame núma lídan nasúfurirun, ⁴⁰ ánjein lun jañúurun ában lueígiñe noúnwenren, ában lueígiñe nubaüna, máma áu lúnbei níchuguni, líchugúba joun ja ubáabaña laráanserei Búngiu.

⁴¹ Dan le jagáambunbalin ja jíbiri díisi disípulugu, ába jagáñidun lúma Jacóbo láu Juan. ⁴² Ába lagúarun Jesúsu joun súngubei lubádun, ába laríñagun joun.

—Quei jasúbudirun, ja agúmadijabaña jádan ja mámabaña juríu, arúfudaguatiña jóungua camá jamuga jabúriña lílana fulásu ligía, játi weínamubaña jádan, arúfuda jamúti jabáfu. ⁴³ Ánjein jídan, máma lúba, le abúseeruti lun weíri lan jídan, lúnti lesériwiduniña jíbiri. ⁴⁴ Furúmieguaügü jídaangiñe le abúseeruti lun ligíaba lan furúmiñeti, lúnti idámuni lan joun jíbiri, ⁴⁵ ítara quei máma lan niábiña, áu le Wügüri Garaüwarügüti, lun nesériwidúniwa, niábiña lun nesériwidun lúma lun níchuguni nibágari lebégame jasálbarun sarágu gürígia.

Lareídaguağüdüni Jesúsu Bartiméo, le maríjinbei

(Mt 20.29-34; Lc 18.35-43)

⁴⁶ Ábati jachülürün Jericó. Dan le áfurideina lan Jesúsu lídaangiñe fulásu ligía jáu láni disípulugu jáma sarágu gürígia, ñíñein ában maríjinti gíriti Bartiméo, liraü Timéo, ñun láru ũma amúriaja seínsu. ⁴⁷ Dan le lagáambunbei luágu yaráfaali lan Jesúsu le Nazarétna, ába lagúmeserun maríjinti ligía agúaraja.

—¡Jesúsu, ladügawagun Davíd, gudémená bun!

48 Sarágu jáña adeínjatiña lun lun lámanichun, ligíatima lagúaragun.

—¡Ladügawagun David, gudémená bun!

49 Ába leréderagun Jesúsu, ába laríñagun.

—Wájuma lun lun liábin nun.

Ába jagúarun lun maríjinti ligía, ába jaríñagun lun.

—Ragüba gurásu, sarába, lagúajaña bun.

50 Ába lachüurunun labíte, ába ladügün ában chubaü, ába layárafadun lun Jesúsu. 51 Ába lálügüdüni Jesúsu.

—¿Ca babúseerubei nadügün bun?

Ába loúnabun maríjinti ligía.

—Maésturu, buséntina naríjin.

52 Ába laríñagun Jesúsu lun.

—Gayáraati bídin, areídaguaadibu ladüga afíñeedibu nuágu.

Lídan óra ligía, ába gayára lan laríjin maríjinti ligía, ába lídin lárigei Jesúsu.

11

Lebélorun Jesúsu Jerusaléoun

(Mt 21.1-11; Lc 19.28-40; Jn 12.12-19)

1 Dan le yaráfaaña lubei lun Jerusalén, ába jachülürün ligíbugiñe fulásu buri le Betfajé lúma Betánia, le ünabubei libíti wübü le Olívos, ába laríñagun Jesúsu joun bíama jádaangiñe láni disípulugu.

2 —Jeíba lídan liraüraü fulásu le wagíbugiñebei, dánme le jachülürün ñi, jadáriruba ában burígü güráñu le maweinjoungili ni ában weíyaasu. Jafáragadeíme, ábame janügüni ñájoun. 3 Ánjaün álügüdüwa ca lan uágu jadügei le, jaríñagame lun luágu busén láni Jesúsu, luágu láguyugüdübei lan furése.

4 Ába jóudin, ába jadáriruni burígü ligía güráñu lubádu ában béna, bougudi lídan üma, ába jafáragaduni. 5 Ába jaríñagun jádaangiñe ja ñíbaña úmadarugu joun.

—¿Ca jadügübei? ¿Cáme jafáragadei burígü le?

6 Ába jóunabuniña quei laríñaguni Jesúsu joun, ába jígiruniña lun jóudin láu. 7 Ába janügüni burígü lun Jesúsu, ába jíchugunun jabíte luágu burígü ligía, ába laweínruni Jesúsu. 8 Sarágu jáña átulerutu jabíte luágu üma, jíbiri, ába jánchuján tilímun wéwe, ába jachágajani luágu üma lubá lásügürün Jesúsu ligíbuagugiñe.

9 Ja ubáraübaña jáma ja árigibaña, ába jagúmeserun agúaraja.

¡Glória! ¡Biníwati wügüri le ñübinbei lídan líri Wabúreme Búngiu!

10 Biníwati arúejani le ñübinbei, le lúnbei ítara lan queísi meja larúejan wáguchi David.

¡Uweíriguni lun Búngiu lídan líñun-ágei siélu!

11 Lárigeiñe, ába lebélorun Jesúsu Jerusaléoun, belú ligía témpulurugun, lárigeiñe laríjini sun cátei, ába lídin Betánia jáu dúusu disípulugu ladüga dárüjali lan.

Líñaraguni Jesúsu tídibu ígo to múnboun

(Mt 21.18-19)

12 Larúgan, dan le jáfuridunbei Betániagiñe, ába lalámachun Jesúsu.

13 Dísegiñe, ába laríjin ában tídibu ígo gabánatu. Ába lídin aríja ánjein gin

tubei, ubánaü rügüñein ladárra tuágu ladüga mámagili lan tidáni ígo.
 14 Ábati laríñagun Jesúsu lun tidibu ígo ligía.

—Magíindadügüyabá.

Ába jagáambuni láni disípulugu.

Larúmadagüdüinun Jesúsu témpulu
 (Mt 21.12-17; Lc 19.45-48; Jn 2.13-22)

15 Láriñe, ába jachülürün Jerusaléoun, ába lebélorun Jesúsu témpulurugun, ába laságajaniña ja alúgurajabaña jáma ja agáñijabaña ñi. Ába lagárabajani jadábulan ja asáansijabaña seínsu joun gürígia lúma jála ja alúgurajabaña únjun. 16 Mígirun lumútu témpulu lun ümame. 17 Ába laríñagun lídan larúfudajan joun.

—Laríñajare Búngiu tidan líburu to Lerérun. “Núban, fulásu le ñí lubei gayára lan jayúmuragun sun gürígia nun, ánjein jugúya, barü jumaaru quei jában jíwerutiña.”

18 Ába jagáambun jábutigu fádirigu jáma arúfudajatiña lilúrudun Moisés luágu le laríñagubei, ába jagúmeserun áluaja ída lúba lan jáfaruni jilágubei, ladüga janúfudetiña luei, quei sun lan gürígia weíruti janígi luágu le larúfudajabei. 19 Dan le lagüñedunbei, ába láfuridun Jesúsu fulásurugüñe.

Tídibu ígo to ásaurüboun
 (Mt 21.20-22)

20 Larúgan bináafin, sügüti Jesúsu jáma láni dúusu disípulugu lueígiñe méme üma ligía, ába jaríjinun tidibu ígo saüja lúmagiñe tilagüle. 21 Ába larítaguni Pédro, ába laríñagun lun Jesúsu.

—Maésturu, jaríjabá tun tidibu ígo to bíñaraguboun gúñaarü, saüja!

22 Ába laríñagun Jesúsu joun súngubei.

—Afiñe jumá luágu Búngiu. 23 Ninárün jáu luágu furúmieguarügü lan le aríñaguti lun wübü le. “Gidába yágiñe, dabúba baránajoun”, ánjein úa lubei liloúguan afiñeni tidan lanígi áni afiñe ligía luágu lagúnfuliruba lan le laríñagubei, ítara lúba. 24 Ligía naríñagunbei jun luágu sun lan le jamúriajan lúma Búngiu, ánjein afiñe jubei luágu resíbi jumáali lan, ítara lúba. 25 Dan le jayúmuraguña lan lun Búngiu, ánjein níjein lubei ladüga ában gürígia jun le mísifeti jun, ferúduna jumei lun gíñe ferúduna lánün Júguchi Búngiu le siélubei. 26 Ánjein úa ferúduna jumá, úabei gíñe ferúduna láani Júguchi Búngiu le siélubei jifígoun.

Lugúmadin Jesúsu
 (Mt 21.23-27; Lc 20.1-8)

27 Ába jagíribudun Jerusaléoun. Dan le eibugeina lubei Jesúsu témpulurugu, ába jayábin jábutigu fádirigu, arúfudajatiña lilúrudun Moisés, jáma ámu wügüriña ja weírígutiña lídan jafíñen juríu, 28 ába jálügüdüni.

—¿Cáteisan birichabei lun bádaragun búngua lídoun cátei le tánina témpulu? ¿Ca íchugubalin ubáfu le bun?

29 Ába loúnabuniña Jesúsu, aríñageina ligía joun.

—Nálügüdaadün gíñe ában cátei, ánjana jóunaba, naríñagubei jun ca lan áu gumádi nadügei buri cátei le. 30 ¿Ca óunajabalin Juan abásteragüdaja? ¿Búngiu, ódi wügüriña?

31 Ába jagúmeserun adímureja jámagua, ába jaríñagun.

—Ánjawa aríñaga luágu Búngiu lan ouñajabalin, laríñaguba woun ca lan uágu maffínerun wabeí lun Juan. ³² ¿Ódi waríñaguba funági luágu jóunajan lan wüğüriña?

Lun jamúga jóunabun ítara, janúfudetiña jaweí güriǵia, ladüga subúdi jamáni sun güriǵia luágu proféta lán Juan. ³³ Ábati jaríñagun lun Jesúsu.

—Ibidiñeti woun.

Ábati giñe laríñagun Jesúsu.

—Mariñagun nubeí giñe jun ca lan áu gumádi nadügei cátei le.

12

Jémpulu jawáguti ñadágimeintiña wuríbatíña

(Mt 21.33-46; Lc 20.9-19)

¹ Ábati lagúmeserun Jesúsu adímureja joun güriǵia ja ñíbaña láu jémpulu, ába laríñagun joun.

—Ñíñein meja ában wüğüri, ábunaguti tídibu beíbei lufúlasunrugu. Ába ladügün baríeru láu, adüga ligía ában ágei lun laribichawagún tíra beíbei lídoun lúma ában wáyelesi lun gayára lan loúnigiruni sun cátei.

Ába lájayajani lichári joun ñadágimeintiña, ába lídin adüga weíyaasu. ² Dan le lachúlürünbei dan lun alúbajani, ába loúnajan ában lumúsun amúriajei lufánran jámagiñe ñadágimeintiña. ³ Ábarüga járügüdüni músu ligía, ába jabúleiseiruni, ába jóunajani lárigoún, míchutiña ni cáta lun. ⁴ Ábaya loúnajan labúreme ichári ábanya músu, ába jíchaagun dübü luágu, bougua jameí lábulugu, anába. ⁵ Ábaya loúnajan labúreme ichári ábanya, ába jáfaruni jilágubei. Lárigiñe, ába loúnajan sarágu, ában lárigi ában, buleísei jamáña jíbiri, áfaragua jíbiri jilágubei.

⁶ Níjeinguati ában lun loúnajani, ában liraü jínsiñeti lun buídu, lagúmujóun óra ába loúnajani, ába larítagun luágu inébebei lan joun ladüga liraü lan.

⁷ Ába jaríñagun ñadágimeintiña jámagua. “Niján le lúnbei libíjini alágan, wáfaraali jilágubei, wagía lámuga labúriña sun cátei.” ⁸ Ábati járügüdüni, ába jáfaruni jilágubei, ába jaságaruni lúgubu lídaangiñe fulásu ligía.

⁹ Ábati lálügüdajan Jesúsu.

—¿Cábatí ladüga labúreme ichári? Líábinme, ábame láfaraguniña ñadágimeintiña jilágubei, ábame líchuguni ichári joun ámu.

¹⁰ ¿Malíjjan jumágilisan le taríñagubei Lerérun Búngiu nuágu? Taríñajare. Lé meja dübü le mabúseerun jabeí ábunagutiña, ligíaali furúmiñeti.

¹¹ Wabúreme Búngiu adügübalin lun furúmiñetibeí lan, áni aríja wamúti quei ában cátei weíriguti.

¹² Ába jabúseerún yebe jadáürüni Jesúsu ladüga jasúbudiruni luágu jawágu lan layúsurei jémpulu le. Quei janúfudebei jaweí güriǵia, ába jígiruni lúngua, ába jóúdin.

Luáguti lafáyejóun seínsu lun gumádi

(Mt 22.15-22; Lc 20.20-26)

¹³ Lárigiñe, ába jóunajoúniwa jádaangiñe fariséogu jáma jádaangiñe lánigu Heródes lúmoun Jesúsu lun jaríñagagüdüni som cátei le lúnti gayára lan jíchuguni lidúnrunme. ¹⁴ Ába jayábin, ába jaríñagun lun.

—Maésturu, subúdi woun luágu aríñaga báani inárüni, manúfudeiga lueí ni ában ladüga ni cáta lan luweírigun güriǵia bun, áni barúfudajani

lémeri Búngiu láu inárüni. Árínagabá ában cátei woun. ¿Buítisan lun lafáyeijoún seínsu lun warúeite le Rómana ódi mabuídunti?

¹⁵ Subúdi lumúti Jesúsu luágu biánguañein lan jagibu, ába larínagun joun. —¿Cámesan jíchaajan sádara nubá? Barújuma ában lídaangiñe seínsu ligía nun, aríja námugei.

¹⁶ Ába janügüni lun. Dan le laríjini, ába lálügüdüniña.

—¿Cági iyáwa lúma íri le luágubei?

Ába jarínagun lun.

—Láni urúei Rómana.

¹⁷ Ába larínagun joun.

—Rújumeiti láni urúei lun urúei, rújumeime láni Búngiu lun Búngiu.

Ába laweíridun janígi láu ligáburu loúnabuniña.

*Álügüdjani libügürü ásaaruni lídaangiñe oúweni
(Mt 22.23-33; Lc 20.27-40)*

¹⁸ Ába jóúdin fiú saduséogu aríjei Jesúsu. Afíñetiña saduséogu luágu úa lan ásaaruni lídaangiñe oúweni. Ába lubeíti jarínagun lun.

¹⁹ —Maésturu, arínagatí meja Moisés luágu ánjein lan ouwe ában wügüri le maríeti masáaniguga táu lúmari, lúnti lan lamárieidun lamúlen túma würi to ueiboun loúwe, lun gasáanigu lan táu lun líbugaña le oúwebei.

²⁰ Níñanu mejati sédü gamúlenuguátiña, le furúmiñeti, ába lamárieidun, ába loúnwen marájüñüga. ²¹ Le jabíaman, ába lamárieidun túma würi tó buga lúmari líbugaña, ába giñe loúnwen marájüñütiña, ligía méme asúsereda lúma le jürüwan. ²² Maríetiña sédügubei jagía túma, úati ni ában garaúti táu. Lagúmujoún óra, ába giñe toúnwen würi tugúya. ²³ Niján le uágubei wálügüdjaja. Dánme le jásaarun jiláaña lídaangiñe oúweni lúnya gabágarí jamá, ¿cábagi úmari würi tugúya jádaangiñe sédü gamúlenuguátiña ja, larígiñe maríei jamá sun jagía túma?

²⁴ Ába larínagun Jesúsu joun.

—Bulíeiguatün ladüga libídiñe tuáguti Lerérun Búngiu jun, ni luáguti lubáfu Búngiu. ²⁵ Dánme le jásaarun jiláaña lúnya jabágaridun, amujalime jabágarí, magámaridun jába, míchugun jamáñame jasáanigu lun maríei, queísi magámaridun jamá ánjeligu siélu. ²⁶ Ánjeinti luágu sará jamá jiláaña lúnya jabágaridun, ¿malíjan jumágiru lilíburun Moisés luágu ladímurejan Búngiu lun lídaangiñe ában búbugati durúngu umúti? Laríñajare lun. “Áu Lubúngiutebei Abrahám, Lubúngiute Isáac, Lubúngiute Jacób.” ²⁷ Ítara líña lubeíti, ánjein jamúgati jiláañu jáña wügüriña jagía lun sun dan, maríñagunti jamúga Búngiu luágu Jabúngiute lan, ladüga máma Jabúngiute jiláguaaña Búngiu, Jabúngiute wínwangiña. Ítara líña lubeíti, jugúya weíríti jabúleidágun.

*Gumádi le weírigutimaabei
(Mt 22.34-40)*

²⁸ Níñein ában jádaangiñe arúfudajatiña lilúrudun Moisés le agáambubalin jadímurejan, queíti subúdi láani luágu oúnaba lániña Jesúsu buídu, ába liábin lubároun, ába lálügüdüni.

—¿Cáteisán lídaangiñe lilúrudun Búngiu weírigutimaabei?

²⁹ Ába larínagun Jesúsu lun.

—Niján le weírigutimaabei. “Agáamba jumána, jugúya Israelítagu, Wabúreme Búngiu, ligía rügũñein Abúremein. ³⁰ Jínsiñelá lubeíti Babúreme Búngiu bun táu sun banígi, táu sun buwáni, láu sun bisáminan, láu sun bére.” Ligía gumádi le weírigutimaabei, ³¹ áni le libíaman lídan uweíriguni lenége le furúmiñeti. “Jínsiñe jamá bíbirigu bun quei bínsiñegua búngua.” Úati ámu gumádi weíriguti lueí biáma le.

³² Ába laríñagun arúfudajati ligía lun.

—Buíti baríñaguni, maésturu. Binárün luágu ában rügũñein lan Búngiu, luágu úa lan ámu, ³³ áni lúnti jínsiñe lan Búngiu woun táu sun wanígi, láu sun wasáminan, táu sun wawáni, láu sun wére, lun giñe jínsiñe jamá wíbirigu woun queísi wínsiñegua woúngua. Gebégiti sun líra ligíbugiñe sũgũ láu sun wadágaragüdün lun lúma sun cátei le agudúbei luágu latárü.

³⁴ Dánti le lagáambun Jesúsu louñabun láu lichú áu, ába laríñagun lun.

—Madíseedibu lueí lílana ban larúeijan Búngiu.

Manígijaña lun jálügüdajan.

¿Ca adügawagun Crístu?

(Mt 22.41-46; Lc 20.41-44)

³⁵ Larúfudajaña Jesúsu témpulurugu, laríñaga.

—¿Ída liñásan jaríñagunbei arúfudajatiña lilúrudun Moisés luágu ladügawagun lan David Crístu? ³⁶ David guánarügü láu lubáfu Sífri Sándu aríñagati ítara.

Laríñajare Abúremein lun Nabúreme.

“Ñurúba núma lueígiñe noúnwenren daríme níchuguniña báganiñu bújaburugun.”

³⁷ ¿Ída lubáti ladügawagun lan David Crístu ánjein wa lubálin David guánarü Crístu, “Nabúreme”?

Ába jagáambuni bürübünu gürígia jagía láu ugúndani.

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Lc 11.37-54, 20.45-47)

³⁸ Ábaja laríñagun Jesúsu joun lídan larúfudajan.

—Tóunigi jumátia jaweí arúfudajatiña lilúrudun Moisés, jínsiñeti joun lun jeíbugun táu anáanguni durúrutu lúma lun labúsurúniwa joun úmada láu sarágu inébesei. ³⁹ Áluaja jamúti jalaü le jala weírigutiña tídan jalígilisin juríu, lúma lubuídun-ágei ubáraü lídan eígini. ⁴⁰ Gidá jamutu jában wúriña ja jiláaña úmari jaweí, lúnti jadáuragun láu sun líra, ába jadügün afúrieiduni le migínaguti. Weíribei jasúfurirun luágu sun le jadügübei.

Tedéweejan fugiábu würi to jiláali túmari, lun Búngiu

(Lc 21.1-4)

⁴¹ Luágu ában wéyu, ñun líña Jesúsu témpulurugu tigíbugiñe gáfu to lágei seínsu, aríaguei jíchaajan gürígia seínsu tídoun. Gibetiña rísitiña íchugutiña sarágu seínsu. ⁴² Ligía tiábin ában fugiábu würi to jiláali túmari, ába tíchugun bián gáwanün tídoun gáfu tugúya. ⁴³ Ába lagúarun Jesúsu joun láni disípulugu lubádun, ába laríñagun joun.

—Nínárün jáu luágu gibetima lan tíchugun würi to sũgũ jáu sun ja íchugubaña seínsu tídoun gáfu to, ⁴⁴ ladúga sun jagía, lídaangiñe le ígiragubei jáma jíchiga, ánjoun tugúya, láu tugúdemegun rútumuti sun lé túmabei lun tawínwandun.

13

Lariñagun Jesúsu luágu tagünrinchawagúba lan témpulu
(Mt 24.1-2; Lc 21.5-6)

¹ Dan le láfuriduña lan Jesúsu témpulurugugiñe, ába lariñagun ában jádaangiñe láni disípulugu lun.

—¡Maésturu, aríjabá tun tubuídun watémpulun lúma buri dúbü le áubei tadügüwa! ¡Máma tanárima buri!

² Ába loúnabuni Jesúsu.

—¿Ariágu jíña tun tanárima témpulu to? Merédebeítia ni ában dúbü ligíbuagu ában, lagünrinchaguba sun le.

Seíni buri lubáragiñe lagúmunchun ubou
(Mt 24.3-28; Lc 21.7-24, 17.22-24)

³ Ábati jóudin luágu wübü le gíribei Olívos le tigíbugiñebei témpulu. Dánti le ñun líña lan Jesúsu ñi, ába jayábin Pédro, Jacóbo, Juan lúma Andrés, ába jariñagun lun, jagiaguariñgü.

⁴ —Buséntiwa lun baríñaguni woun ídame lan lasúsereda sun le tun témpulu to. ¿Cábasan seíni luágu chülújali lan dan lun lagúnfulirun sún buri cátei le?

⁵ Ába lariñagun Jesúsu joun.

—Tounigi jumá, mayéedagualaún ni ában, ⁶ladüga sarágujaba ñübbintiña, jariñagame. “Áu Crístubei”, áni sarágujaba jayéedun.

⁷ ‘Jugúya, dánme le jagáambuni lamúri wuríbu yaráfa jun lúma ugánu luágutí buri wuríbu díseti jueí, manúfudedagua jumá, ladüga ñíbei wuríbu súnwandan, mámagili lagúmunchun ubou líra. ⁸ Lageíndaguba ában fulásu lúma ában, awúribuja ligíame ában ageíraü lúma ámu. Níbei járabaganáli lídan sarágu fulásu, ilámaü, chagáguau, áni súnme buri cátei le, lagúmesejarügügilime le lúnbei lasúfurirúniwa.

⁹ ‘Tounigigua jumá júngua ladüga jedéregerúaba lun lúrudu, ábame jabúleiseirunün tidan buri jalígilisin juríu, janügüba lun jagúseragüdüniwa jagíbugiñe gumádimatiña lúma jagíbugiñe urúeigu, nueígiñe, itara lúba gayára lan jadímurejan nuágu, jagíbugiñe. ¹⁰ Lubáragiñe lagúmunchun ubou, lapúrichijouba ugánu luágutí asálbaruni lídan sun fulásu. ¹¹ Dánmeti le janügüniwa lun jedéregerúniwa joun lúrudugu, magíbedalá jarítangun luágu cába lan jaríñaga, masáminaragubei jumeí. Aríñaga jumeí le lariñagun Búngiu jun lídan óra ligía, ladüga mámaba jugúya adímureja, Sífiri Sándu, ligíaba adímureja. ¹² Jedéregerubaña wügüriña jamúlenu jáma jábugaña lun jáfarúniwa jilágubei, deréga jamáñame agübürigu jasáanigu, jagáraabaguba isáanigu jawágun jagübürigu lun jedéregerúniwa lun jáfaruniwa jilágubei. ¹³ Jiyéereguduba lun sun ubou nueígiñe, le asígiruti úaragu darí lúmoun lagúmujoún, lasálbaruba.

¹⁴ ‘Abürüjati proféta Daniél luágu cátei iyéereguti le gagünrinchaguagüdadibei, dánme le jaríjini cátei ligía le ní lubei moun lan lun ñi lan —le alíjabei, gunfaráandalá— jámetia Judébaña, lúntimétia janúrajan luágun wübü. ¹⁵ Le gürígia le bougudibei, mebélura látia múnadoun aságara ni cáta, ¹⁶ le áraabubei, magíribudalá águyu ni anügoun lanáangun. ¹⁷ Fugiábugume würiña ja dageínatiña lídoun wéyu ligía jáma ja garájüñütíña ja gurágiña. ¹⁸ Amúriaja jumá lúma Búngiu lun máma lan lídan lidáani lidíliga jeíbaagua, ¹⁹ ladüga lidáanibei asúfuriruni quei le masúseredungili lúmagiñe ladügüni Búngiu ubou, masúseredundügüyaalime

giñe lárigiñe. ²⁰ Ánjein jamúga madúraagun lánme Jabúreme Búngiu dan ligía, úabei jamúga ni ában eséfuruti, ladúraagubei luágu jínsiñe lánigu lun, ja anúadaja láañabaña.

²¹ ‘Ánjeinti aríñawagua jun. “Aríja jumá, niján Crístubei”, o “Nirán”, mafiñera jumá, ²² ladúga jayábiba eyéejatiña aríñaga jawouúga luágu Crístu lan jagía, jíbiri, aríñaga jagíame luágu profétagu jamá, áni jayéeni. Jadügüba seiñi lúma miláguru lun jayéedaguniña ásta ja anúadaja láañabaña Búngiu ánjein gayára. ²³ Aráanseñu jumá, rúnaadün luágun jugúdi.

Ída lúba lan ligáburi lagíribudun Crístu ubouúgun

(Mt 24.29-35, 42-44; Lc 21.25-36)

²⁴ Lídounme wéyu ligía, lárigiñeme dan ligía le lánina asúfuriruni, ábame labúrigadun wéyu, marúnidunjálime játi. ²⁵ Jeíguaduba warúguma siélugiñe, ábame ladádagarun sun siélu. ²⁶ Ábameti naríjiniwa, áu le Wügüri Garaúwarügüti, niábin lídan juánriñu láu oúnwenbun ubáfu lúma uweiriguni, ²⁷ ábame nouñajaniña ánjeligu oúndaraña sun ja nanúadajabaña lídaangiñe gádürü larígei ubouú, lúmagiñe lidíse-ágei ubouú darí lúmoun lidíse-ágei siélu.

²⁸ ‘Gunfaráanda jumei jémpulu le tuáguti tídibu ígo. Dan le ñlúgüli tilímun, ába labouúchun tubána, subúdi jumúti luágu níteeli lan lidáni lubáchouga. ²⁹ Ítara meme, dánme giñe jaríjini sún buri cátei le, subúdi jumei luágu yaráfaali lan niábin. ³⁰ Ninárün jáu, luágu lagünrinchawagúba lan sun ubúrugü le Jerusalén lubáragiñe jouwegun güriñia ja lánina dan le. ³¹ Lagúmuchaguba siélu lúma ubouú, ánjein nerérun, merédebei magúnfulirunga.

³² ‘Ánjeinti wéyu lúma óra le lúnbei lasúseredun sun cátei le, ibídiñeti ni ca un, ni joun láni Búngiu ánjeligu ja siélubaña, ni lun Liraú, Búngiu rügüñein le Úguchili asúbudirei.

³³ Lúnti lubeíti agágudúañu jumá, aríaaja, ayúmuragua lun Búngiu, ladúga ibídiñeti jun ídame lan lachúlüra óra ligía. ³⁴ Ítara lúba quei ában wügüri le ñdünbei luágu ában weíyaasu díse, lubáragiñe láfuridun líbiñegiñe, ába líchuguni sun cátei jájaburugun lumúsuniña áni ru ligía jawádigimari, aríñaga ligía lun le luágubei béna lun loúnigirun. ³⁵ Áu queisi tabúreme muna tugúya, furésebei nagíribudun. Agágudúañu jumá lubeíti, ladúga ibídiñeti jun cába lan óra nachúlüra, ánjein güñounba lubei lúmoun áriebuba lan, o lubá lan larúgan o bináafin lan, ³⁶ ñübindügü níñein sódini, ábame nadárirunün arúmuga. ³⁷ Le naríñagubei jun aríñaga numúti joun súnugubei. Agágudúañu jumá.

14

Lalédawagúniwa lubá Jesúsu

(Mt 26.1-5; Lc 22.1-2; Jn 11.45-53)

¹ Bián rügáali wéyu lubá fédu le arítaguagülei luágu meja dan le lásügürünbei láni Búngiu ánjeli áfaraguáña jarájüñü Ejíptona, máfarawaguntiña jarájüñü Israelítagu, lidáni giñe fédu le ñi lubei teigüa fein to magánatu ísi. Ábanti jáluajan jábutigu fádorigu jáma arúfadajatiña lilúruden Moisés ída lúba lan járügüdüni Jesúsu láu eyéerawaguni lun jáfaruni jilágubei. ² Ába jaríñagun.

—Márügüda wamei fédurugu luei jafúudun güriñia.

Tájurudaguni ában würi Jesúsu
(Mt 26.6-13; Jn 12.1-8)

³ Betániañein Jesúsu lúbiñe Simón lé meja gawágubei gumeín luágu lúra, dánti le ñun líña lan luágu dábula, ába tiábin ában würi láu ában budeín buin láu ibíñei le jémeti, le séruti. Ába tájalachuni ligíina budeín, ába téseruni ibíñei lábulugun Jesúsu. ⁴ Ába jagáñidun jádaangiñe ja ñíbaña, ába jaríñagun jámagua.

—¿Cámesan leferidirúa ibíñei jémeti le? ⁵ Gayáraati jamúgagu lalúgurun luágu sügü láu lebégi ában irúmu wadágimanu, lun jíderawagün gudémetiña.

Ába jébechunun, ⁶ ába laríñagun Jesúsu.

—Ígira jumouñ. ¿Ca uágu jañáwurija tun? Ában cátei buíti le tadügübei nun. ⁷ Súnwandan ñíbaña lan gudémetiña júma lun jíderaguniña dan le jabúseerun, ánjein áu, mámaba súnwandan júma nan. ⁸ Adüga táali würi to le tíaraabei, jurúguaaru ibíñei luágu núgubu lubá nábulanajoñ, ⁹ áni ninárün jáu luágu lídan lan furúmieguarügü fulásu lídan sun ubou le ñí lumuti lapúrichijoúa ugánu le lánina asálbaruni labájüdawagúba gíñe le tadügübei würi to lun jarítangun tuágu.

Lalúguruni Júdas Jesúsu
(Mt 26.14-16; Lc 22.3-6)

¹⁰ Ábati lídin Júdas Iscarióte, le ában jádaangiñe dúusu láni Jesúsu disípulugu, adímureja jáma jábutigu fádirigu lun ladügün darádu jáma lun ledéregeruni Jesúsu joun. ¹¹ Dan le jagáambubalin, ába jagúndaaragun, ába jaríñagun lun luágu jíchuguba lan seínsu lun. Ába lagúmeserun Júdas áluaja ída lúba lan ledéregeruni Jesúsu joun.

Lagúmujoñ leígin Jesúsu jáma lánigu
(Mt 26.17-29; Lc 22.7-23; Jn 13.21-30, 1 Co 11.23-26)

¹² Le furúmiñeti wéyu lídan fédu le ñí lubei teigúa fein to magánatu ísi, luwéyuri lafarún mudún le lánina fédu le páscua, ába jálügüdüni disípulugu Jesúsu.

—¿Jalíagi babúseera lun wouñdin aráansera wabárúa lun weígini eígini le lánina fédu?

¹³ Ába louñajan biáma jádaangiñe láni disípulugu, ába laríñagun joun lubáragiñe joúdin.

—Jeíba ubúrugua, jadúnraguba lúma ában wügüri ñi táu ában dináa láu dúna, ¹⁴ jídinme lárigi le ñíjin lumúti lebélera, ábame jaríñagun lun tabúreme múna. “Ítara líña maésturu, ¿jagoún nege rúmu to lúnboun ñi lan leígei eígini le lánina fédu jáu láni disípulugu?” ¹⁵ Ábame larúfudun ában rúmu weírítu jun, tougíñegua múna, to aráanseñu tíña, ábame jaráanseruni eígini woun ñi.

¹⁶ Ába jáfuridun disípulugu, ába jachülürün ubúrugun, ába jadáriruni súngubei quei laríñaguni Jesúsu joun, ába jaráanseruni eígini lánina fédu ñi.

¹⁷ Dan le lagúñedunbei, ába lachülürün Jesúsu jáu dúusu disípulugu. ¹⁸ Dánti le luágu jamá dábula eíga, ába laríñagun joun.

—Ninárün jáu luágu lalúgurubadina lan ában jádaangiñe le eígibeí núma.

¹⁹ Ábati jajírudagun, ába jagúmeserun álügüdaguei ában ában.

—¿Áu funásan?

²⁰ Ába laríñagun Jesúsu joun.

—Ában jídaangiñe jugúya dúusu le éderutu leígan fein lídan asiedu.
 21 Anángüraadina lubeíti, áu le Wügüri Garaüwarügüti, luágu üma le uágubei tariñaga Lerérun Búngiu, áni jfugiábutia wügüri le alúgurutina! Buítimaati jamúga lun wügüri ligía lun magúriajouñiwa lan.

22 Dan le añája lubeí eíga, ába lanügünun Jesúsu jeígan fein lújaburugu, ába leteíngiruni Búngiu tuágu, lárigiñe lagúbachagunun ába líchugunun joun, ába laríñagun joun.

—Joujúma, nógubu le.

23 Lárigiñe, ába lanügün ában wéru táu diweín lújaburugu, lárigiñe leteíngiruni Búngiu tuágu, ába líchugunun joun, ába játun sun jagía tídaangiñe diweín tugúya. 24 Ába laríñagun joun.

—Níta le, le añúuragüdúbalin iséri darádu, le gíñe áwiyurúabei joun sarágu gürígia lun ferúdunawa lan jafígoun. 25 Ninárün jáu luágu mátundügüyaadina lan diweín daríme wéyu le lúnbei nátunun iséri tuwúyeri diweín lídan larúeijan Búngiu siélu.

Laríñaguni Jesúsu luágu leyéedaguba lan Pédro láu
 (Mt 26.30-35; Lc 22.31-34; Jn 13.36-38)

26 Lásun jerémujani urému luágu Búngiu, ába jouúdin luágun wübü le gíribei Olívos. 27 Ábati laríñagun Jesúsu joun.

—Sun jugúya janúrjaba, ígira jumáname áriebu le, ladüga tariñajare Lerérun Búngiu. “Náfarubei jouniri mudún jilágubei, ábame jeréderun mudún chagágu.” 28 Lárigiñeme násaarun lídaangiñe ouweni lúnya nabágaridun, nídiba Galiléa jubáragiñe.

29 Ábati laríñagun Pédro lun.

—Gayáraati jígirunibu sun ja, nugúya, mígirun nubádibu.

30 Ába laríñagun Jesúsu lun.

—Ninárün báu, áriebu meme le, lubáragiñe layúgurujan gáyu bián weíyaasu, ürüwaalime weíyaasu baríñagun luágu ibídiñe nan bun.

31 Ába laríñagun.

—Ni ánjein lun lubeí nouñwen búma, maríñagubadina luágu ibídiñe ban nun.

Ligía méme gíñe jariñaga súngubei.

Layúmuragun Jesúsu lun Búngiu, Getsemaní
 (Mt 26.36-46; Lc 22.39-46)

32 Ábati jachülürün lídoun ában fulásu gíriti Getsemaní, ába laríñagun Jesúsu joun láni disípulugu,

—Ñurújuma ya, neíbuga ayúmuragua lun Búngiu.

33 Ába lanügüniña Pédro, Jacóbo, lúma Juan lúmagua. Ába ladíjeridun larítagn buídu, sandí ligía ában igárigu weíriti tídan lanígi. 34 Ába laríñagun.

—Sandítina ában íruni weíriti le lánina ouweni tídan nuwáni. Reídei jumá ya, áni agágudúañu jumá.

35 Ábati lídin Jesúsu lubáruaguouñ mémeraü, ába labúluchagun múarugun, ába lamúriajan lúma Búngiu ánjein gayára lubeí masúfurirun láani le lúnbei lasúseredun lun lídan óra ligía. 36 Ába laríñagun lídan layúmuragun.

—Núguchi, gayára bumúti sun cátei, séfu bána lueí nasúfuriruni cátei le, máma quei nabúseerun, quei babúseerun.

37 Ába lídin, ába ladáriruniña disípulugu arúmuga, ába laríñagun lun Pédro.

—Simón, ¿barúmuguñasan? ¿Siñátisán buga beréderun ni ában óra agágudúañu? ³⁸ Agágudúañu jumá, ayúmuragua jugúyame lueí jeíguadun lídoun ínchajouñi lun jeféridiruni jafiñen nuágu. Inárüni luágu benéfa lan jáni espíritu lun le buídubei, ánjein júgubu, débiliti.

³⁹ Ábaya lídin ayúmuragua lun Búngiu, aríñageinaleí méme dimúrei le lariñagubei furúmiñe. ⁴⁰ Dánya lagíribudun, ábaya ladáriruniña arúmuga ladúga luweírín lidábu jágu. Ibídiñetiti joun cába lan jounabagüle lun. ⁴¹ Ábaya lídin lürüwan weíyaasu, ába lariñagun joun.

—¿Jarúmuguña mémesan, eméragua jugúya? Buidürügaali, chülüja óra lun nedéregerúniwa, áu le Wügüri Garaüwarügüti, jájaburugun gafígountiña. ⁴² Sarájuma, queímoun, niteeli le lúnbei ledéregerunina.

Janügüni Jesúsu adáüra

(Mt 26.47-56; Lc 22.47-53; Jn 18.2-11)

⁴³ Nígili Jesúsu adímureja, ligía lachülürün Júdas, le ában jádaangiñe dúusu disípulugu, liábin jáu sarágu mútu táu efeín lúma wéwe. Jounajan jábutigu fádorigu, arúfudajatiña lilúrudun Moisés, jáma ámu wügüriña weírigutiña lídan jafiñen juríu. ⁴⁴ Aríñagalíti buga Júdas joun ítara.

—Le wügüri le nachúurun, ligía, ábame járügüdüni, ábame janügüni, jounigireime buídu.

⁴⁵ Ítara líña lubeíti, dan le lachülürünbei, ába layárafadun Júdas lun Jesúsu, ába lariñagun lun.

—Maésturu.

Ába lachúuruni. ⁴⁶ Ábati járügüdüni Jesúsu, ába janügüni adaürüwa.

⁴⁷ Níñein ában jádaangiñe ja ñíbaña, ába láluguchunun lefeínte, ába líbuguni ában larígei lumúsun fádiri le íñutimaabei. ⁴⁸ Ábati lariñagun Jesúsu joun mútu jagía.

—¿Jiábin táu efeín lúma wéwe lun janügünina adáüra, camá jamuga jíwerutina? ⁴⁹ Ságüñaja wéyu júma nan témpulurugu arúfudaja jun, madaü junútina. Wel, lasúseredunbei le lun lagúnfulirun Lerérun Búngiu.

⁵⁰ Ábati jígiruni sun disípulugu Jesúsu lábugua, ába janúrajan.

Wügüri ñüraügili le anúrajabei

⁵¹ Níñein ában wügüri ñüraügili afálaruti Jesúsu, darúgu lougua táurügü ában sídi, ában járügüdüni. ⁵² Ába lasáfarun jaweí, ába leíbaágun surúsu, ígira sídi.

Jesúsu ligíbugiñe líñun-ágei lúruðu

(Mt 26.57-68; Lc 22.54-55, 63-71; Jn 18.12-14, 19-24)

⁵³ Ábati janügüni Jesúsu ligíbugiñoun fádiri le íñutimaabei, ába joundaragun sun jábutigu fádorigu jáma arúfudajatiña lilúrudun Moisés, jáma ámu wügüriña ja weírigutiña lídan jafiñen juríu. ⁵⁴ Ábati lafálaruni Pedro Jesúsu dísegiñe chülü tübüürürugun lúban fádiri le íñutimaabei, ába leréderun ñun jáma oúnigirutiña témpuru abácharagua larügürügü wátu.

⁵⁵ Jáluajati jábutigu fádorigu lúma sun líñun-ágei lúruðu lidúnrun Jesúsu lun gayáraabei lan jasiadiruni lun láfarúniwa jilágubei, madáritiña lidúnrun. ⁵⁶ Sarágu jáña yebe adímurejatiña iyéeni luágu, múaradúntiña láu le jariñagubei. ⁵⁷ Níñanu yéetiña ásaarutiña aríñaga.

58 —Agáambatiwa laríñagun. “Nagünrinchaguboun témpulu to, to jadügüboun wügüríña, ábame naráramagüdün ában témpulu lídan ürüwa wéyu to máma jadüga wügüríña.”

59 Ni ítara, múaradúntiña láu le jaríñagubei.

60 Ábati lásaarun fádiri le íñutimaabei jádaangiñe sun jagía, ába laríñagun lun Jesúsu.

—¿Moúnabuntíbusan ni cáta? ¿Cáteisan le, le jaríñagubei buágu?

61 Ába leréderun Jesúsu maníñu, moúnabunga ni cáta. Ábaya lálügüdüni fádiri íñutimaati.

—¿Amürüsan Crístubei le Liraü Búngiu, le lúnbei lasálbaruniña gürígia lídaangiñe jafígoun?

62 Ába laríñagun Jesúsu lun.

—Ánja, áu. Áni jugúya, jaríjubadina, áu le Wügüri Garaüwarügüti, ñun lueígiñe loúnwenren Súnti Gabáfu, aríja jumeíme niábin lídan juánriñu siéluigiñe.

63 Ábati lajeíridagunun fádiri íñutimaati lanáangun, le ligáñi, ába laríñagun.

—¿Ca ámu wabúseerubei lun líchugun fe luágu guetó? 64 Agáamba jumúti lanábaguni Búngiu láu lerérun. ¿Ída líña jaríjin lun líra?

Ába jabúdujan súngubei lun láfarúniwa jilágubei.

65 Ábati buri jagúmeserun jíbiri ásueraguei, adáuragua láu ligíbu, abúleiseirei, jaríñagati.

—¡Aríñaga beígia cátei lan áfarubalibu!

Ába buri jagáyuajan súdeara luágu.

*Laríñagun Pédro luágu ibídiñe lan Jesúsu lun
(Mt 26.69-75; Lc 22.56-62; Jn 18.15-18, 25-27)*

66 Ñíñein Pédro bürürüru, ligía tiábin ában lumúsun fádiri le íñutimaabei.

67 Dan le taríjini abácharagua larügürügü wátu, ába taríaguni, ába taríñagun lun.

—¿Ma giñe buga lúmañadibu Jesúsu le Nazarétna?

68 Ába leyéedagun Pédro, laríñaga.

—Ibídiñeti gürígia ligía nun, ibídiñegubeíti nun ca lan uágu badímureja.

Ába lígiruni fulásu le ñí lubei labácharagua lun yaráfa lan lun lebéneri baríeru, ábati layúgurujan ában gáyu. 69 Ábaya taríjini músu tugúya, ába taríñagun joun ja ñibaña.

—Ába giñétia jádaangiñe lánigu Jesúsu le.

70 Ábaya leyéedagun. Murúsun óra lueígiñe, ábaya jaríñagun ja ñibaña lun Pédro.

—Inárüni, amürü ában jádaangiñe, ladüga Galiléana amürü, ítara líña badímurejan quei jagía.

71 Ába líñaragun Pédro lúngua ánjein máma lubei inárüni le laríñagubei. Ábaya laríñagun.

—Ibídiñeti gürígia le uágubei jadímureja nun.

72 Lídan óra ligía, ába layúgurujan gáyu libíaman weíyaasu. Ábati larítagun Pédro luágu le laríñagubei buga Jesúsu lun. “Lubáragiñe layúgurujan gáyu bián weíyaasu, beyéedaguba náu ürüwa weíyaasu.” Dánti le larítagun luágu, ába layájun.

15

Jesúsu ligíbugiñe Piláto

(Mt 27.1-2, 11-14; Lc 23.1-5; Jn 18.28-38)

¹ Larúgan bináafin, ába jóundaragun jábutigu fádirigu jáma arúfudajatiña lilúrudun Moisés, jáma ámu wügüríña ja weírigutiña lídan jafíñen juríu lúma sun líbiri líñun-ágei lúrudu, aríja cába lan jadüga lun lasíadirúniwa Jesúsu. Ába janügüni gürágu, ába jedéregeroni lun Piláto. ² Ába lálügüdüni Piláto Jesúsu.

—¿Amürü Jarúeitebei Juríu?

Ába loúnabun Jesúsu.

—Ánja, ítara líña quei baríñaguni.

³ Ába buríti jíchugun jábutigu fádirigu sarágu lidúnrun. ⁴ Ábayati lálügüdüni Piláto, ába laríñagun lun.

—¿Moúnabuntibusan ni cáta? ¿Aríjabá átiriñein lan bidúnrun íchuguti?

⁵ Moúnabun mémeti Jesúsu ni cáta, ába laweíridun lanígi Piláto láu líra.

Lasíadirúniwa Jesúsu lun ouweni

(Mt 27.15-31; Lc 23.13-25; Jn 18.38-19.16)

⁶ Jéchutiti Piláto ígiragüda ában adaürüti ságü fédu le lánina páscua, le jamúriajan gürígia jádaangiñe adaürütiña. ⁷ Níñeinti ában adaürüti gíriti Barabási úara jáma ámu ja áfarajabaña gürígia jilágubei lídan inñuraguni luágu gumádi. ⁸ Ábati jayábin gürígia, ába jaríñagun lun Piláto lun ladügüni queíñaja ladüga. ⁹ Ába lálügüdüniña.

—¿Buséntün lun nígiragüdüni Jarúeite Juríu?

¹⁰ Laríñagubaalin Piláto líra ladüga busén lán yebe lígiragüdüni Jesúsu, subúdi lumúti luágu ladüga lan gimúgaü jedéregerei jábutigu fádirigu. ¹¹ Fügüda jamáña jábutigu fádirigu gürígia, jaríñaga joun lun jamúriajan lun lígiragüdüni Barabási, máma Jesúsu. ¹² Ábati laríñagun Piláto.

—¿Cáti jabúseerubei nadügün láu le uágubei jaríñaga Jarúeite Juríu?

¹³ Ába jagúaragun.

—¡Dáguabeí luágu gurúwa!

¹⁴ Ába laríñagun Piláto joun.

—¿Cáti wuríbati ladügübei?

Ábaya jagúaragun.

—¡Dáguabeí luágu gurúwa!

¹⁵ Queíti busúen lan Piláto leréderun buídu jáma gürígia, ába lígiragüdüni Barabási, lárígíñeti loúnajan abeíchei Jesúsu, ába ledéregeroni lun ládarawagún luágu gurúwa.

¹⁶ Ábati janügüni súdaara lídoun tübürürü lúban urúei, ába jóundarúniwa sun súdaara. ¹⁷ Ába jadáüraguagüdüni táu ában anáanguni funátu, ába jadügün ában rídi láuti jíyu, ába jíchuguni leréberugu. ¹⁸ Ába jagúmeseron agúaraja lun.

—¡Gabágarilá Jarúeite Juríu!

¹⁹ Ába jagáyuajan lálbulugun láu ában wéwe, ába jásuéraguni, ába jájuduragun abúsura lun. ²⁰ Lárígíñe jéjerajan láu ítara, ába jarágachunun anáanguni to jadáürüboun luágu lueí, ába jadáürünun lanáangun luágu. Ába jaságaruni lun jádaraguni luágu gurúwa.

Ládarawagún Jesúsu luágu gurúwa
(Mt 27.32-44; Lc 23.26-43; Jn 19.17-27)

²¹ Níñein ában wügüri Cirénena, gíriti Simón, lúguchi Alejandro lúma Rúfo, liábiña áraabugiñe, dan le lásügürün ñigiñe, ába jafósuruní lun lanügüni lugúruwan Jesúsu.

²² Ába janügüni Jesúsu lídoun ában fulásu gíriti Gólgota, míni lan líra, Lufúlasun Lábu Ichügü. ²³ Ába jíchugun diweín láu ában luwúyeri árani gíriti mírra tídoun lun, mátun lumútu. ²⁴ Ábati jádaraguni luágu gurúwa, ába jájurerun súdeara ubúnuruní lun jaríjin cába lan jádaangiñe erédera táu lanáangun.

²⁵ Ladaünrún néfu bináafin, ligía jádaraguni luágu gurúwa. ²⁶ Ába labürüdüniwa lidúnrun ñi. “Jarúeite Juríu.” ²⁷ Dáguatiña giñe bián jíwerutiña luágu gurúwa úara lúma, ában lueígiñe loúnwenren, ában lueígiñe lubaúna. ²⁸ Láu líra lagúnfulira le tariñagubei Lerérun Búngiu. “Abájüdüwati jáma wuríbatíña.”

²⁹ Dan le buríti jásügürün gürígia, ába jájinjani jachügü láu, ába janábuni, jaríñaga.

—jBugúya le aríñagubei luágu fibounme lan témpulu, ábaya lánme baráramagüdünnun lídan ürüwa wéyu, ³⁰ séfuguabá búngua, raríba lueígiñe gurúwa!

³¹ Ába giñe jéjerajan jábutigu fádirigu jáma arúfudajatiña lilúrudun Moisés láu, ába jaríñagun jámagua.

—jSéfuti ámu, ánjein ligía, siñáti leséfuragun lúngua! ³² jRaríla Crístu, Jarúeite Israelítagu, lueígiñe gurúwa guetó wagíbugiñe, afíñe wamámuga luágu!

Ja dáwaguñubaña luágu gurúwa úara lúma, anába jamúti giñe.

Loúnwen Jesúsu
(Mt 27.45-56; Lc 23.44-49; Jn 19.28-30)

³³ Amídirugu, ába labúrigadun sun ubou darí ladaünrún ürüwa rábounwéyu. ³⁴ Ligía lagúaragun Jesúsu.

—Eloí, Eloí, ¿láma sabáctani? —míni lan líra. Nubúngiute, Nubúngiute, ¿cásan uágu bígirana?

³⁵ Níñanu jádaangiñe ja ñíbaña agáambuti, ába jaríñagun.

—Agáamba jumá, lagúajaña lun proféta Elías.

³⁶ Ába leíbaagun ában jádaangiñe, ába ladüdüragüdünnun ában mudúsi táu diweín garüjütu, ába líchuguni luágu ában wéwe, ába línchuni lun Jesúsu lun lachúurunun, ába lariñagun.

—Ígira wameí guetó, waríja ánjein ñübin Elías aráriragüdei.

³⁷ Ábati ladügün Jesúsu ában agúaraguni jéreti, ába loúnwen. ³⁸ Ába tajeíridagun tubélun témpulu lídan bián murúsun íñugiñe lun únabun.

³⁹ Dan lagáambuni jábuti súdeara Rómána le rárabei ligíbugiñe Jesúsu lagúaragun, aríjaleí ída líña lan loúnwen, aba lariñagun.

—Inárüni luágu Liraü lan Búngiu wügüri le.

⁴⁰ Níñanu giñe würiña, aríagutiña dísegiñe, ñíñoun María Magdaléna, María to lúguchu Jacóbo le ñúraütimagilíbei, lúguchu giñe José, ñíñoun giñe Salomé. ⁴¹ Würiña ja, falá jamuti Jesúsu áni íderagua jamúti dán meja le Galiléañein lan. Níñanu giñe sarágu ámu würiña ja ñübinbaña Jerusaléoun úara lúma Jesúsu.

*Lábunajoún Jesúsu**(Mt 27.57-61; Lc 23.50-56; Jn 19.38-42)*

⁴²⁻⁴³ Lubáragiñe lálüdün wéyu, ába liábin José, ában wügüri inébewati jádaangiñe líñun-ágei lúrudu, le agúrabajabaalin lagúmeserun larúeijan Búngiu táu sun lanígi, lílana fulásu le gíríbei Arimatéa. Queíti luwéyuri lubei lan aráansejani, le ában wéyu lubá wéyu le eméraaguagülei, ába lebélorun le ñíjin lubei Piláto amúriajei lúgubu Jesúsu, úouga ni murúsun anúfudei lídan. ⁴⁴ Ába laweíridun lanígi Piláto dan le lagáambun luágu jilá lan Jesúsu, ába louñajan luágu ában jábuti súdeara lun lálügüdüni ánjein inárüni lubei luágu jilá lan. ⁴⁵ Dan le lariñagunbei lun luágu inárüni lan, ába líchuguni Piláto lúgubu Jesúsu lun José. ⁴⁶ Ábati lagáñijian José ában gamísa fínutu, ába larárigüdüni lúgubu Jesúsu lueígiñe gurúwa, ába louburaguni táu. Ába líchuguni lídoun ában umúajaü achigiti luágu dübü, ába ladáuruni láu ában dübü. ⁴⁷ Ába tídin María Magdaléna túma María to lúguchu José aríjei fulásu le ñí lubei labunúa Jesúsu.

16*Lásaarun Jesúsu lídaangiñe ouweni**(Mt 28.1-10; Lc 24.1-12; Jn 20.1-10)*

¹ Dan le lásügürünbei wéyu le eméraaguagülei, ába jagáñijian María Magdaléna, María to lúguchu Jacóbo, túma Salomé ibíñei lun jóúdin ájurudei luágu lúgubu Jesúsu. ² Dimáasu, láfunaduña larúgan, ába jóúdin luágu lumúaja, ³ ábati jariñagun jámagua.

—¿Cábasan agídarei dübü lueígiñe lubéneri umúajaü?

⁴ Dan le jaríjinbei, úaali ouñwenbun dübü ligía lídan lilúgaarun. ⁵ Ába jebélorun lídoun umúajaü, ába jaríjin ában wügüri ñúraügili ñun ñi lueígiñe louñwenren táu ában goúnu jarútu. Ába janúfudedagun, ⁶ ába lariñagun joun.

—Manúfudedagua jumá, jáluajañein Jesúsu le Nazarétna le ádarawagúbei luágu gurúwa, úati ya, sará lídaangiñe ouweni. Aríja jumeísan fulásu le ñí lubei líchugúa. ⁷ Jeíba, jariñagame joun láni disípulugu, lúntima Pédro, luágu níngiran lan luágu úma lun Galiléoun jubáragiñe. Jaríjibe ñi quei lariñaguni jun.

⁸ Ába jóúdin würiña jagía anúrajeina ñígiñe ladüga lebélorun ában luweírin anúfudei joun. Mariñaguntiñati ni cáta ni ca un ladüga janúfude.

*Larúfudagun Jesúsu lúngua tun María Magdaléna**(Jn 20.11-18)*

⁹ Lárígiñe lásaarun Jesúsu lídaangiñe ouweni, dimáasu bináafin, ába larúfudagun lúngua furúmiñe tun María Magdaléna, to méja ueíboun laságara sédü espíritugu wuríbatíña. ¹⁰ Ába tídin, ába tawísaruniña ja eíbugubaña meja lúma. Dan le tadárirunbáliña, jayájuajaña ladüga lanárime íruni jádan luágu louñwen. ¹¹ Dan le jagáambun luágu wínwanya lan, luágu aríja táani, maffíñetiña.

*Larúfudagun Jesúsu lúngua joun biáma jádaangiñe disípulugu**(Lc 24.13-35)*

¹² Lárígiñe, ába larúfudagun Jesúsu lúngua joun biáma jádaangiñe já meja eíbugubaña lúma, jóúdiña áraabun. Ibídiñeti yebe joun luágu Jesúsu lan.

¹³ Ába jóúdin, ába jawísaruniña ja jíbiri, ni jagía, maffíñetiña.

Líchugun Jesúsu jadásin disípulugu
(Mt 28.16-20; Lc 24.36-49; Jn 20.19-23)

¹⁴ Lárigiñe, ligía larúfudagun Jesúsu lúngua joun únsu disípulugu jagía dan le ñun jamá luágu dábula, ába celadeínjan joun luágu liloúguan jafiñen lúma lidére jachügü, ladüga mafiñen jamá joun ja aríjubalin lárigiñe lásaarun.
¹⁵ Ába laríñagun joun.

—Jeíba lídan sun fulásu apúrichija jumeí ugánu le luáguti asálbaruni joun sun gürígia. ¹⁶ Ja afíñerutiña luágu, badísei jagíame, jasálbaruba, ja mafiñetiña, jeféridiruba lídaanme luwéyuri agúseragüdüni. ¹⁷ Niján cátei le lúnbei jarúfuduni ja afíñebaña nuágu, lun lasúbudirúniwa luágu Búngiu lan oúnajabaliña. Jaságaruba espíritugu wuríbatiña jaweí gürígia lídan níri, jadímurejaba ámu dimúrei lueí jerérun, ¹⁸ ánjaña árügüda jéwe jájaburugu o ánjaña lan áta cátei le gáfarajati, madügünbei wuríbani joun, lánwoun sun líra, jíchugubei jájabu jawágu sánditiña, ábame jareídagun.

Lamúdeirun Jesúsu siélnun
(Lc 24.50-53)

¹⁹ Lárigiñe ladímurejan joun, ába líñurúniwa Jesúsu siélnun, ába lañúurun lueígiñe loúnwenren Búngiu. ²⁰ Ába jáfuridun disípulugu, ába japúrichijani ugánu le lánina asálbaruni lídan sun fulásu. Jesúsu méme íderagua lumútiña, áni choúrügüdaleí ugánu le japúrichijabei láu miláguru lé burí jadügübei.

UGÁNU BUÍTI LE LABÜRÜJABEI LÚCAS LUÁGU JESÚSU

Labürüjani Lúcas lé meja asúseredubei

¹ Lun Teófilo le weírigubei. Gíbeeña gürígia oúchutiña jabürüjani cátei lé buri luáguti wasálbarun lé meja asúseredubei wagánagua lídan lúaragun, ² áfaaguatiña jabürüjani ítara quei jarúfudajani ja aríjubalin buri cátei ligía lúmagiñe lagúmeserun, apúrichija jagía luágu, woun. ³ Áu giñe, álügüdaaadina giñe buídu buídu libügürü sun cátei le asúseredubei lúmagiñe lagúmeserun, áni afiñetina luágu mariban lan lun nabürüjanun gárada to bun quei lubúdubu, ⁴ subúdi bámugei linárün cátei le arúfudúaalibei bun buídu buídu. Niján le asúseredubei.

Lasúbudiragüdüni ában ánjeli luáguti lagüriajoun Juan le abásteragüdjabei

⁵ Dán meja le Heródes lan urúeibeí Judéa, ñíñein meja ában fádiri lánina jaffínen juríu, gíriti Zacarías, jádaangiñeti fádirigu ja lánigu Abías. Elisabét tíribeí lúmari, jádaangiñetu giñe ladügawagun Aarón. ⁶ Biángubei jagía, richáguatiña ligíbugiñe Búngiu, gúnfulitiña lúma, adüga jameí sun le lubeíbeí darí lun siñá lan laríñawagún ni cáta wuríbati jawágu. ⁷ Masáanigutiña ladüga siñá lan tagáragüdüni Elisabét, áni derébugugaaña giñe jagía biángubei.

⁸ Luágu ában wéyu, lídan lidáani jesériwidun lánigu Zacarías quei fádirigu ligíbugiñe Búngiu, ⁹ ába jabúdujan según jagáburi fádirigu juríu, lun jasúbudiruni cába lan ebélura lídoun fulásu le sándutimaabei témpulurugu águdaja cupáli ligíbugiñe Búngiu, ába láburujan luágun Zacarías. ¹⁰ Sun niján lan cupáli águdajoúa, añája gürígia bougudi ayúmuragua lun Búngiu. ¹¹ Ábati lasálriragun ában láni Wabúreme ánjeli lun Zacarías, rára lueígiñe loúnwenren latárü le ñí lubei cupáli. ¹² Dan le laríjini Zacarías ánjeli ligía, ába laweíridun lanígi, ába lebélorun anúfudei lídoun. ¹³ Ába laríñagun ánjeli ligía lun.

—Manúfudebá, Zacarías, ladüga agáamba láali Búngiu bayúmuragun, tagáraúduba búmari ában irájü, ábame bíchuguni líri Juan. ¹⁴ Tabuínchuba banígi láu ugúndani luágu, áni sarágujaba giñe agúndaarutiña láu lagüriajoun, ¹⁵ ladüga weírigubei biraü ligíbugiñe Búngiu. Mátunbei diweín ni bínu, áni ñíbeí Sífiri Sándu lúma lúmagiñe lubáragiñe lagüriajoun lun ladúndejeani lídan sun cátei. ¹⁶ Ladügüba lun jagíribudun sarágu jádaangiñe Israelítagu lun jagáambuni Jabúngiute, ¹⁷ lesériwiduba lun Búngiu láu sarágu ubáfu quei meja ladügüni Elías. Laráansejaba lubá Jesúsu láu laráandaragüdüniña agúbüriagu jáma isáanigu, láu giñe larúfudajan joun ja magáambadibaña lun Búngiu lun júaradun lúma queísi gürígia richáguatiña. Ítara lúba laráanseruniña lubá jerésibiruni Jabúreme Jesúsu.

¹⁸ Ába laríñagun Zacarías lun ánjeli ligía.

—¿Ída lubági nachoúrui cátei le? Áu táu sun númeri, derébugugaadiwa.

¹⁹ Ába laríñagun ánjeli ligía lun.

—Gabriél áu, áni nesériwiduña lun Búngiu, ligía oúnajabalina adímureja bun lun níchuguni ugánu buíti le bun. ²⁰ Guetó, quei maffínerun bubeí

luágu le naríñagubei bun, berédera merérunga, siñábei badímurejan daríme lagüriajóun biraü. Lagúnfuliruba cátei le lídan lidáani.

²¹ Sun dan le, añájeti buga güriía bougudi agúrabajei Zacarías, weírititi janígi luágu lílü témpulurugu. ²² Dan le láfuridunbei, siñá ladímurejan joun, ábati jasúbudiruni luágu salíga lan som cátei lun, témpulurugu. Ladímurejati joun láu seíni, meréngadijaali.

²³ Dan le lagúmuchun dan le lúnbei lesériwidun Zacarías témpulurugu, ába lídin lúbiñoun. ²⁴ Lárigiñe cátei le, ába tadágeinadun Elisabét, to lúmari, ába máfuridun tan jábiñegiñe luágu seíngü játi, teréngati túnguarügü. ²⁵ “Ladügüñein Búngiu lubuídun cátei le nun guelé lun lagídaruni nibúsigari jagíbugiñe güriía.”

Lásúbudiragüdüni ában ánjeli luáguti lagüriajóun Jesúsu

²⁶ Sísi játi lárigiñe, ába loúnajani Búngiu ánjeli Gabriél lídoun ában ubúru gu láni Galiléa, gíríti Nazarét, ²⁷ lun lídin bisídoun ában würi irájügi ru, gírítu María. Würi tugúya, gadáraduñoun lúma ában wügüri gíríti José lun tamárieidun lúma, wügüri ligía, linébaanfan urúei Davíd. ²⁸ Ába lebéllurun ánjeli ligía le ñjin tubeí, ába laríñagun tun.

—¡Báfaguagüle, María! Níjein Búngiu búma, binílaadibu sügü jáu sun würiña.

²⁹ Dan le tagáambuni ánjeli ligía, ába tájüchürün láu le laríñagubei, ába tálügüdagun túngua ca lan uágu labúsura tun ítara. ³⁰ Ábati laríñagun ánjeli ligía tun.

—Manúfudebá María, fuleísei láadibu Búngiu, ³¹ badágeinada, ábame bagüriaajan ában irájü, ábame bíchuguni líri Jesúsu. ³² Weírigubei, Liraü Búngiu le íñubei lúba lagúarúniwa, áni larúeigüdübei Wabúreme Búngiu quei larúeigüdüni Davíd, le binádu lidúje. ³³ Lagúmadirubei linásiñun Israél lun sun dan, áni magúmuchadibei lagúmadijan.

³⁴ Ábati taríñagun María lun ánjeli ligía.

—¿Ída lubági lasúseredun cátei le, mámarigidinagu?

³⁵ Ába laríñagun ánjeli tun.

—Liábinba Sífiri Sándu buágun, ábame loúburagunibu lubáfu Búngiu. Ligía sándubei lubeí irájü le lúnbei bagüriaajani, Liraü Búngiu lúba lagúarún. ³⁶ Tiábin bidúje to Elisabét, dageínaaru giñe lau sun weíyaaru lan, tagáraüdüba ában wügüri irájü, ítara líña lubeíti, tó meja uáguboun jaríñaga luágu siñá lan tagáraüdü, níjein sísi játi dageinaü tuágu. ³⁷ Úati ni cáta siñáti lun Búngiu.

³⁸ Ábati taríñagun María.

—Lidámun Nabúreme Búngiu nugúya, adügalei le baríñagubei náu. Lárigiñe, ába lídin ánjeli.

Tidin María bisídoun Elisabét

³⁹ Lídoun dan ligía, ába tidin María furése lídoun ában ubúru gu le labádinaguabei buri wübü Judéa, ⁴⁰ ába tebéllurun lúbiñoun Zacarías, ába tabúsurun tun Elisabét. ⁴¹ Dan le tagáambuni Elisabét tabúsurun, ába lánjingichagun tiraü turágeirugu, ába liábin Sífiri Sándu tuágun. ⁴² Ábati taríñagun láu umálali le jéreti.

—Binílaadibu Búngiu sügü jáu sun jiñáriñu, binílaali giñe biraü. ⁴³ ¿Cátanañadina lun tiábin lúguchu Nabúreme bisídana? ⁴⁴ Láu nagáambuni babúsurun, ába lánjingichagun niraü nurágeirugu láu ugúndani.

45 Gúndaatibu bugúya le afiñerubei, luágu lagúnfuliruba lan cátei le laríñagubei Wabúreme bun.

46 Ábati taríñagun María.

Rútu nuwáni uweíriguni lun Nabúreme,

47 gúndaagua tugúya nanígi luágu Búngiu le Nasálbaragüle,

48 lugúndun gudémejabujaali nun, nugúya le lidámun.

Lúmagiñe guelé, jaríñaguba sun gürígia luágu fuleíseiwaadina lan,

49 ladúga adúgaali Búngiu, le Súnti Gabáfu, cátei weínamuti nun, sánduti líri.

50 Súnwandan gudémebaña lan ja inébejabúbaña lun, lun.

51 Adúgaali oúnwembun buri cátei,

adúgaali lun ni cáta jamá ja barúguabaña jóungua.

52 Gídálaaña ja gabáfubaña lídaangiñe jaweírigun,

ja ünabubaña, ába ladügüniña lun weírigu jamá.

53 Já buga lamábaña, quimúlegüda lumútiña,

ánjeinti ja rísibaña, míchugunti ni cáta joun.

54 Íderagua lumútiña linásiñun Israél, ja esériwidubaña lun,

mabúlieidun lumúti lun gudémejabu lan,

55 queí meja lidáradun jáma binádu wagübürigu—

Abrahám jáma ladügawagun—lun gudémejabu lan joun lun sun dan.

56 Ába teréderun María ürúwa játi ñi, lárigiñe, ába tagíribudun jábiñoun.

Lagüriajóun Juan le abásteragüdajabei

57 Ába lagúnfulirun dan lun tagüriañan Elisabét, ába tagüriañan ában wügüri irájü. 58 Dan le jagáambun tubésinanigu jáma tidújeñu luágu lubuídun cátei le ladügübei Búngiu tun, ába jagúndaarun úara túma. 59 Luágu liwídun wéyu, ába lerésibiruni circuncisión, le liseíni luágu láni lan Búngiu irájü ligía. Buséntiña yebéti jíchuguni líri lúguchi luágu, le Zacarías, 60 ába taríñagun lúguchu.

—Uá, Juánba líri.

61 Ába jaríñagun tun.

—¿Cági uágu? Úati ni ában jádaangiñe binébaanfaangu gíriti Juan.

62 Ába jálügüdüni lúguchi irájü láu seíni ca lan íri labúseerubei líchugun luágu. 63 Ába lamúriañan ában murúsun fuláansu, ába labürüdün luágun.

“Juan líribei.” Ába laweíridun janígi súngubei láu cátei le. 64 Lídan méme óra ligía, ába gayáraajaali lan ladímurejan Zacarías, ába líchugun uweíriguni lun Búngiu. 65 Ába laweíridun janígi besínagu láu cátei le, ába labájüdawagún cátei le lídan sun fulásu geyégua jáu. 66 Sun ja agáambubalin, ába jeréderun asáminara, ába jálügüdagun jámagua, jaríñaga.

—¿Cáteibeí funasan irájü le?

Ladúga biní lumútija Búngiu le tímatimaati.

Lerémujan Zacarías

67 Ába liábin Sífiri Sándu luágun Zacarías, le lúguchi irájü ligía, ába ladímurejani Zacarías dimúrei le laríñagubei Búngiu lun, ába laríñagun.

68 Buídulá ladímurejóun luágu Wabúreme le Jabúngiutebei gürígia ja Israelítagu,

ladúga ñübinjali woun, wagía le lánigu, áni sálba láadiwa.

69 Rújali ában Asálbaragülei le gabáfuti woun jádaangiñe linébaanfaangu David, lé meja esériwidubei lun.

70 Ítara líña meja lariñaguni Búngiu jádaangiñe láni profétagu ja edéregeragubaña jóungua lun, lúmagiñe meja binádu dan,

71 luágu lasálbarubádiwa lan jaweí wáganiñu lúma jaweí sun ja iyéreejabúbaña woun.

72 Ítara líña gudémejabu lan Búngiu joun binádu wagübürigu, arúfudaleí luágu mabúlieidagun lan lueí lidáradun le sándubei jáma.

73 Niján lé meja lariñagubei lun wáguchi Abrahám.

74 luágu leséfurubádiwa lan jaweí wáganiñu,

lan gayáraabei lan wesériwidun lun manúfudeiga,

75 láu úarani, derégeguñu wagía woúngua lun, sun dan le wabágaridubei.

76 Áni bugúya nisáaniraü, láni Búngiu le íñubei proféta lúba bagúarúniwa, ladüga baráansejaba lubá Wabúreme,

77 subúdi lámuga üma lánina asálbaruni joun lánigu,

le áubei ferúdnawa lan jafígoun.

78 Wabúngiute, láu lísiñejabu lúma lugúdemejabu,

loúnajabei Cristu wámoun siélugiñe

79 lun larúgoungadágüdün jáu ja lídaanbaña lubúriga lúma jáu ja luágubaña üma le ouwenibeí lébeja,

lúma lun ladúndejani wapásun lídoun üma le anügüwaliwa lídoun darángiläü.

80 Aweírdeina ligíati irájü ligía, afáragadagueina gíñe lídan láni espíritu. Ába laganouñ lídan fulásu mageírawati darí lúmoun wéyu le lagúmeserun luwádigimari lun Búngiu jagánagua lumútuniña Búngiu ja Israelítagu.

2

Lagüriajouúniwa Jesúsu

(Mt 1.18-25)

¹ Lídoun buga dan ligía, ába lariñagun urúei Augústo lun jabájüdün sun gürígia ja Rómabaña. ² Furúmiñe meja jadügüni cátei le, dán meja le Cirénio lan agúmadijabei Síria. ³ Súnti gürígia mósu jóudin jageíra lun ñi lan jabájüdüwa. ⁴ Ligía láfuridunbei José Nazarétgiñe, loúbawagugiñe Galiléa, ába lídin loúbawagun Judéa lídoun fulásu le gíribeí Belén, le ñi lubei lagüriajouúa David, quei linébaanfan lubeí David José. ⁵ Ába lídin Belén lun labájüdün úara túma María to gadáradunboun lúma lun jamárieidun, áni dageínañoun. ⁶ Dánti le añája lan ñi Belén, ába lachülürün dan lun tagüriajan María. ⁷ Ába tagüriajani furúmiñeti tiraü ñi, ába touburaguni tídan lágei, ába tarouñragüdüni ñi tídan jában anímaalu ladüga úati ubáraü joun tídan jában chülüdügütiña.

Ánjeligu jáma ouñigirutiña mudún

⁸ Lídan áraabu bougudi lueí Belén, ñiñanu jóuniri mudún, bou larúgan jáu ouñigiraña jalügüniña mudún. ⁹ Sódini, ába lasáliragun ában láni Wabúreme Búngiu ánjeli siélugiñe joun, ába jarijin ában ouñwenbun larúgounga le lánina Búngiu geyégu jáu, ába janúfudedagun. ¹⁰ Ába lariñagun ánjeli ligía joun.

—Manúfueda jumá, ladüga njein ugánu buíti nanügün jun, lébunabei sarágu ugúndani joun sun gürígia. ¹¹ luágu agüriajouúali lan ában

asálbaragülei jun ugüñe, lageíra Davíd, Crístu le Jabúreme. ¹² Jadárirubei irájü ligía jóuburagu tídan lágei, roun tídan jában anímaalu.

¹³ Lídan óra ligía, ába jasálriragun sarágu ánjeligu lubádu furúmiñeti ánjeli, ába jíchugun uweíríguni lun Búngiu, jaríñaga.

¹⁴ ¡Uweíríguni lun Búngiu lídan líñutima siélu, darángilaü múarugu jádan gürígia ja ibíjubalin lufúleisein!

¹⁵ Dánti le jagíríbudun ánjeligu járigoún siélu, ába jaríñagun jóúniri mudún jámagua.

—Queímoun Belén aríjei cátei le asúseredubei, le uágubei lasúbudiragüda Wabúreme Búngiu woun.

¹⁶ Ába jóúdin furésegueina, ába jadárirunun María lúma José, lúma irájü roun tídan jában anímaalu. ¹⁷ Dan le jaríjinbalin, ába jabájüdaguni le laríñagubei ánjeli joun libügürü le. ¹⁸ Súnti ja agáambuliña, weíríti janígi láu le jaríñagubei. ¹⁹ Áni María, areídañu tíñein sun cátei le tídan tanígi, arítagua luágu. ²⁰ Ábati jagíríbudun jóúniri mudún, adímurejeina weíri luágu Búngiu, luágu sun le jagáambubei lúma le jaríjibe, ladüga suséreti ítara quei laríñawagúniwa joun.

Larúfudúniwa Jesúsu témpulurugu

²¹ Luágu liwidún wéyu, ába lerésibiruni circuncisión, ába jíchuguni líri Jesúsu, íri méme le líridubei ánjeli tun María lubáragiñe tadágeinadun.

²² Dan le lagúnfulirunbei lidáani jarúmadun lagübürigu Jesúsu según igáburi lídan lilúrudun Moisés, ába janügüni irájü ligía ubúrugun Jerusalén lun jederegeruni lun Búngiu. ²³ Jadügünbalin líra ladüga laríñajare tídan lilúrudun Búngiu. “Sun furúmiñeti wügüri irájü agúriajóuti lúnbei Búngiu.”

²⁴ Ába lubeíti jóúdin adágaragüda le uágubei laríñaga lilúrudun Búngiu. bián wagúgua o bián lan únjun.

²⁵ Lídan meja dan ligía, ñíñein meja ában wügüri Jerusalén gíriti Simeón. Wügüri ligía ában wügüri buíti, weíríti lederegeragun lúngua lun Búngiu, áni agúraba lumúti liábin Crístu, le lúnbei lasálbaruniña Israelítagu. Ñíñein Sífiri Sándu lúma Simeón, ²⁶ áni arúfuda láali lun luágu moúnwenbei lan maríjingaleí Crístu le lúnbei loúnajani Wabúreme Búngiu. ²⁷ Ába lídin wügüri ligía témpulurugun, ladúndejan Sífiri Sándu. Dánti le janügünbalin lagübürigu Jesúsu Jesúsu témpulurugun lun jadügüni le laríñagubei lúrudu láu, ²⁸ ába loúyuajani Simeón, ába líchugun eteíngiruni lun Búngiu, aríñageina ligía.

²⁹ Nabúreme, gayáraajali bígirunina lun nouñwen láu darángilaü, nugúya le esériwidubei bun,

ladüga gúnfuli báali le baríñagubei nun.

³⁰ Arija náali Wasálbaragüle láu nágu,

³¹ Asálbaragülei le boúnajabei joun sun gürígia.

³² Ítara lúba queísi ában lámpu lun larúfuduni inárüni joun ja mámabaña juríu,

ru ligíame uweíríguni joun Israelítagu, ja bánigu.

³³ Ába laweíridun lanígi José táu sun María láu le laríñagubei Simeón luágu irájü le. ³⁴ Ábati labíniruniña Simeón, ába laríñagun tun María, to lúguchu Jesúsu.

—Írájü le, lébunabei achúgeraguni joun sarágu Israelítagu, lébunabei gíñe asálbaruni joun jíbiri. Ítara lúba queísi ában seíni le lúnbei gíbe jamá májatiña

jerésibiruni. ³⁵ Ítara lúba lasúbudirúniwa le larítagubei cáda ában tídan lanígi luágu Crístu. Áni ítara lúba sun cátei le bun quei ában efeín to ácharurutu tuágu buwáni.

³⁶ Ñíñoun gíñe ában wúri proféta, gírítu Ána, wúri tugúya liraü Fanuél, jádaangiñe ladügawagun Áser. Weíriyaaru wúri tugúya, ñúraügiru meja tamárieidunbei, sédüñein irúmu táu lúma túmari, ába louñwen, ³⁷ guetó, gádürü-weín-gádürü irúmu táu. Máfuriduntuti témpulurugugiñe, terédera ñi esériwida lun Búngiu áriebu wéyuagu, ayúnara lúma ayúmuragua lun Búngiu. ³⁸ Ába tiábin Ána jawágun María, José, lúma Jesúsu lídan méme óra ligía, ába teteíngiruni Búngiu luágu irájü ligía, adímureja tugúya luágu Jesúsu joun sun ja agúrabajabaalin lasálbarún Jerusalén.

Agíribuduni Nazarétün

³⁹ Lárigiñeti jagúnfulirun láu sun le laríñagubei lilúrudun Búngiu, ába jagíribudun María, José, lúma Jesúsu Galiléoun lídoun jabúrugute le Nazarét. ⁴⁰ Aweírdeina ligíati irájü le, éredeina ligía, afáragadagueina lídan lichú áu, biní lumútijati Búngiu sarágu.

Jesúsu témpuluru

⁴¹ Ságüja irúmu jóudin lagübürigu Jesúsu ubúruugu Jerusalén lubá fédu le páscua, ⁴² áni dan le lagúnfulirunbei Jesúsu dúusu irúmu, ába jóudin súngebui Jerusalén quei le jagáburi lídan fédu ligía. ⁴³ Dánti le jagíribudun lárigiñe lagúmchagun fédu, ába leréderun irájü ligía Jerusalén, ibídiñoun tun lúguchu ni lun José, ⁴⁴ jarítagún yebe luágu niten lan jádan gürígia ja jámarigubaña luágu üma. Ítara líña jadügün ában wéyu eíbuguni, dan le jáluajani jádan jadújeñu lúma jádan jasúbudiraagun, ⁴⁵ madári jamúti. Ábati jagíribudun ubúrugun Jerusalén áluajei ñi.

⁴⁶ Ürüwa wéyu lueígiñe, ligía jadáriruni témpuluru ñun jádan arúfudajatiña lilúrudun Moisés, agáambajaña, álügüdaguaña. ⁴⁷ Súnti ja agáambubalin, weírítu janígi luágu lichú láu lúma luágu buri louñabagüle. ⁴⁸ Dan le jaríjnbalin lagübürigu, ába laweíridun janígi, ába taríñagun lúguchu lun.

—¿Cáme badügei cátei le woun, niraü? Nugúya lúma búguchi, wáluajañadibutia láu idíjeri.

⁴⁹ Ábati laríñagun Jesúsu joun.

—¿Cági uágu jáluajana? ¿Ibídiñeti jun luágu lúnti lan neténirun lun cátei le láni Nüguchi?

⁵⁰ Úati gunfaráanda jamáni le laríñagubei joun.

⁵¹ Ábati lagíribudun jáma, Nazarétün, ába lasígirun láu meme lagáambadi joun. Ábati buri tareíduni lúguchu sun cátei le tarítangunrugun. ⁵² Niján mémeti Jesúsu aweírdeina dándu lúgubu queisi lisáminan, áni buítiti dándu ligíbugiñe Búngiu quei jagíbugiñe gürígia.

3

Lapúrichijan Juan le abásteragüdjabei, lídan fulásu mageírawati (Mt 3.1-12; Mr 1.1-8; Jn 1.19-28)

¹ Lídan liqueínsin lirúmoduri lagúmadijan Tibério César, Póncio Piláto ligía meja gumándanbei Judéa, Heródes gumándan Galiléa, Felípe, le lamúlen, ligía gumándan Itúrea lúma Traconíte, Lisanías gumándan Abilínia, ² Anás

lúma Gáifasi, jagía fádirigu iñutimáabaña lídan jafiñen juríu. Ábati líchugun Búngiu ában ugánu lun Juan, le liraü Zacarías, lídan fulásu mageírawati, ³ ába leíbuguni Juan sun fulásu buri le lubádubei dúna le Jordán, aríñagueina joun gürígia luágu lúnti lan jaságürijan luágu jafígoun, sáansi jameíme jagáburi lun ferúdnawa lan jafígoun, badísei jagíame. ⁴ Suséreti cátei le itara queí meja labürüdüni proféta Isaías, laríñaga.

Agaambúati lumálali ában agúarajati lídan fulásu mageírawati ítara.

“Aráanseja jumóun janígi lubá liábin Wabúreme, queísi ladárarúniwa üma surúti.

⁵ Labuínchagüdüwaba sun gudúungu,

sun wübü, lagurúaba,

üma buri le segéti, lásururuba,

üma buri le múaragunti, lúwaradaguba.

⁶ Larijúbei sun ubou Wasálbaragüle, le loúnajabei Búngiu woun.”

⁷ Nübintiña sarágu gürígia lun Juan lun labásteragüdüniña, ába laríñaga joun.

—jJarásan jéwe jugúya le! ¿Ca awísarubalün lun jeibaagun lueí lanárimelafáyeiragüle figou le yaráfaalibe? ⁸ Ígira jumeí binádu jigáburi, abágarida jumá lun gayára lan laríjin buídu luágu sáansiguuali lan jigáburi. Maríñaga jumá jídaangua. “Linébaanfaangu Abrahám wagía”, ladüga quei naríñaguni jun, gayáraati ladügün Búngiu linébaanfaangu Abrahám lídaangiñe buri dübü le. ⁹ Yaráfaali dan lun jafáyeijan luágu jifígoun queísi taráanserún jaráwa lun tánchuguni tídibu wéwe. Sun ídibu le mabuídunti lin lánchugúba, ábame lagudún.

¹⁰ Ábati jaríñagun gürígia jagía lun.

—¿Cáteiti lúnbei wadügüni?

¹¹ Ába laríñagun Juan joun.

—Le biámabei isímisin, lúnti líchugun ában lun le úaboun ni ában lúma, le geíginbei, lúnti lafanreinraguni lúma le meíginbei.

¹² Nübintiña gíñe agúburajatiña liseínsuna gumádi lun jabásterun, ába jaríñagun lun.

—Maésturu, ¿ca cátei lúnbei wadügüni?

¹³ Laríñaga Juan joun.

—Magúburaja jumá lougiñe le uágubei laríñaga lúrudu.

¹⁴ Aríñagatiña gíñe fiú súaara lun.

—Ángi wagía, ¿cági lúnbei wadügüni?

Laríñaga joun.

—Magídara jumá ni cáta ni ca ueí, ni láu siádi, ni láu jíchugun lidúnrun mútu le madügün lumúti, gufúruma jumá láu jafáyeiruaja.

¹⁵ Añájati gürígia madéraguagüdünja arítagua luágu fágua lan Juan Crístubei, ¹⁶ ába laríñagun Juan joun sùngubei.

—Áu, láu dúna nabásteragüdaün, nítenei ában le lúnbei labásteragüdünnün láu Sífiri Sándu lúma láu queísi wátu geméti, ligía Crístubei. Gabáfutimaati nueí darí lun madüna nan ni lun nafáragaduni tagürüga ligeidin. ¹⁷ Dánme liábin, jafánreinrúaba gürígia ja lánigubaña jádaangiñe ja wuríbabaña queísigubeirügü lagídarúniwa ífei lídaangiñe türígu buíti, ába loúndarün türígu buíti tidoun lágei, ába lagudún ífei lídan wátu geméti le méñeguchati.

¹⁸ Láu igáburi le lúma láu buri ámu ewéridijani líchigei Juan ugánu buíti joun gürígia luágu wasálbaragüle. ¹⁹ Erérati giñe lun gumándan Heródes luágu laganouñ túma Heródias, to lúmari Felípe, le lamúlen, lúma luágu ámu buri cátei wuríbatí le ladügübei. ²⁰ Lubáragiñe ladügün Heródes gásu láu, adúgarügü ligía ában cátei wuríbatímaati. ládaruni Juan furísunrugun.

Labásterun Jesúsu

(Mt 3.13-17; Mr 1.9-11)

²¹ Lubáragiñe ladaürüniwa Juan, dan le labásteragüdüniña gürígia, badíseiti giñe Jesúsu. Dánti le niján lan Jesúsu ayúmuragua lun Búngiu, ába lánjunrenchagun juánriñu, ²² ába larijiniwa larárirun Sífiri Sándu luágun camá jamuga ában únjun, ába lagaambúniwa laríñagun ában umálali siélugiñe.

—Amürü Niraü le jínsiñebei nun, gúndaatina báu.

Linébaanfaangu Jesúsu

(Mt 1.1-17)

²³ Queí burí darándi irúmu láu Jesúsu dan le lagúmeserunbalin luwádígimari le uágubei loúnajei Búngiu. Jarítawagúati luágu liraü lan José, José, liraü Elí, ²⁴ Elí, liraü Matát, Matát, liraü Leví, Leví, liraü Melquí, Melquí, liraü Jána, Jána, liraü José, ²⁵ José, liraü Matatías, Matatías, liraü Amós, Amós, liraü Nahúm, Nahúm, liraü Eslí, Eslí, liraü Nagái, ²⁶ Nagái, liraü Maat, Maat, liraü Matatías, Matatías, liraü Semeí, Semeí, liraü José, José, liraü Judá, ²⁷ Judá, liraü Joána, Joána, liraü Résa, Résa, liraü Zorobabél, Zorobabél, liraü Salatiél, Salatiél, liraü Néri, ²⁸ Néri, liraü Melquí, Melquí, liraü Adí, Adí, liraü Cosám, Cosám, liraü Elmodám, Elmodám, liraü Er, ²⁹ Er, liraü Josué, Josué, liraü Eliézer, Eliézer, liraü Jorím, Jorím, liraü Matát, ³⁰ Matát, liraü Leví, Leví, liraü Simeón, Simeón, liraü Judá, Judá, liraü José, José, liraü Jonán, Jonán, liraü Eliaquí, ³¹ Eliaquí, liraü Meléa, Meléa, liraü Mainán, Mainán, liraü Matáta, Matáta, liraü Natán, ³² Natán, liraü David, David, liraü Isái, Isái, liraü Obéd, Obéd, liraü Booz, Booz, liraü Salmón, Salmón, liraü Naasón, ³³ Naasón, liraü Aminadáb, Aminadáb, liraü Arám, Arám, liraü Esróm, Esróm, liraü Fáres, Fáres, liraü Judá, ³⁴ Judá, liraü Jacób, Jacób, liraü Isáac, Isáac, liraü Abrahám, Abrahám, liraü Taré, Taré, liraü Nacór, ³⁵ Nacór, liraü Serúg, Serúg, liraü Ragáu, Ragáu, liraü Pelég, Pelég, liraü Héber, Héber, liraü Sála, ³⁶ Sála, liraü Cainán, Cainán, liraü Arfaxád, Arfaxád, liraü Sem, Sem, liraü Noé, Noé, liraü Laméc, ³⁷ Laméc, liraü Matusalén, Matusalén, liraü Enóc, Enóc, liraü Jaréd, Jaréd, liraü Mahalaléel, Mahalaléel, liraü Cainán, ³⁸ Cainán, liraü Enós, Enós, liraü Set, Set, liraü Adán, Adán, liraü Búngiu.

4

Loúchwagúniwa Jesúsu

(Mt 4.1-11; Mr 1.12-13)

¹ Ába lígiruni Jesúsu fulásu loúbawagu dúna Jordán, buin láu lubáfu Sífiri Sándu, ába lanügüni Sífiri Sándu lídoun fulásu mageírawati. ² Reídeiti Jesúsu bián-wein wéyu ñi láu Máfia ouchaguei ánjein áburuja lídoun wuríbani. Meíginti ni cáta lídan sun bián-wein wéyu ligía, ába lasándirun ában ouñwenbun ilámaü. ³ Ábati laríñagun Máfia lun.

—Ánjein Liraü bubei Búngiu, salíguagüdabeí dübü le feínme.

⁴ Laríñaga Jesúsu lun.

—Tariñajare Lerérun Búngiu. “Mámarügüba táu fein jabágarida güriquia, jabágariduba gíñe láu jagúnfulirun láu sun dimúrei le laríñagubei Búngiu.”

⁵ Lárigiñe, ába lanügüni Máfia Jesúsu luágun ában wübü íñuti, ába larúfuduni sun fulásu le ubouágubei lun lídan ában. ⁶ Ába laríñagun Máfia lun.

—Níchugubei sun ubáfu lúma sun uweíriguni le bun ⁷ ánjabu ájuduragua nun lun banügünina quei bubúngiute, bánibei súngubei, ladüga íbija náali sun le, áni gayáraati níchuguni lun le únti nabúseera.

⁸ Ába laríñagun Jesúsu lun.

—Dísebá nueí, Máfia, ladüga tariñajare Lerérun Búngiu. “Judúguabá lun Búngiu le Babúreme, lúnrügüla besériwida.”

⁹ Lárigiñe, ába lanügüni Máfia ubúrugun Jerusalén, ába laweínragüdüni tábulugu témpulu, ába laríñagun lun.

—Ánjein Liraü bubei Búngiu, chúguabá búngua yágiñe lun ünabun, ¹⁰ ladüga tariñajare Lerérun Búngiu.

Loúnajabaña Búngiu láni ánjeligu lun jóunigiruníbu,

¹¹ janügübadibu jájaburugu luei labúleiseirun bugúdi luágu dübü.

¹² Ába laríñagun Jesúsu lun.

—Tariñajare gíñe Lerérun Búngiu. “Moúchaguabeí Búngiu le Babúreme.”

¹³ Dánti le madárijali Máfia cába lan luwúyeri ouchwagúni ladüga lun Jesúsu, ába lígiruni lúngua luágu átiri dan.

*Lagúmeseruni Jesúsu luwádigimari Galiléa
(Mt 4.12-17; Mr 1.14-15)*

¹⁴ Ába lagíribudun Jesúsu Galiléoun buin láu lubáfu Sífiri Sándu, ába buríti ladímurejóun luágu lídan sun fulásu geyégua. ¹⁵ Arúfudajatija tídan jalígilisin juríu lídan sun fulásu, buíti jadímurejan sun güriquia luágu.

*Jesúsu lídan ubúruqu Nazarét
(Mt 13.53-58; Mr 6.1-6)*

¹⁶ Ábati lídin Jesúsu Nazarétün, le fulásu le ñí lubei lagüriajouá, ába lebélorun tídoun jalígilisin juríu lídan wéyu le eméaaguagülei quei ligáburi yebu, ába laráramun lun lalíjan tídan Lerérun Búngiu. ¹⁷ Ába jíchugunun liliburun proféta Isaías lun, dan le ladárunun, ába ladáriruni le ñí lubei laríñaga ítara.

¹⁸ Níjein láni Búngiu Sífiri Sándu nuágu, ladüga anúadaja láadina lun níchuguni ugánu buíti joun gudémetiña, oúnaja láadina lun námaliñaniña ja nidíjeribaña tídan janígi, lun náfuridagüdüniña adaürütiña, lun níchugun aríjini joun maríjintiña, lun neséfuruniña ja ouserúabaña wuríba, ¹⁹ lun nadímurejan luágu dan le fuleíseijabu lan Búngiu joun güriquia.

²⁰ Ába ladárunun Jesúsu líburu, ába líchugunun lun ídejati tánina ligílisi, ába lañúurun. Queíti jasígirun sun ja ñíbaña aríaguei, ²¹ ába lagúmeserun adímureja, laríñaga.

—Ugúñe guánarü gúnfulijali cátei le jigíbugiñe.

²² Adímurejatiña sun jagía buíti luágu Jesúsu, weírititi janígi luágu lubuidun buri dimúrei le laríñagubei. Jálügüdagua buríti jámagua.

—¿Mámasan le liraü José le?

²³ Ába laríñagun Jesúsu joun.

—Subúsiiti nun luágu jaríñagubei lan cátei le nun. “Surúsia, agáraniguabá búngua”, jaríñaguba giñe nun. “Agáambaadiwa luágu buri cátei le adüga báalibe Capernaúm, adügabei giñe ya bageíra.”

²⁴ Ába lasígirun adímureja, laríñaga.

—Nínárün jáu luágu úa lan ni ában proféta erésibirúati buídu lageíra. ²⁵ Choóru numúti luágu añájein lán meja sarágu würiña ja jiláguañábaña jámarigu jádan Israelítagu lídan meja lidáni proféta Elías, dan le májuyun lubei júya luágu ürüwa irúmu dimí, ába ñi lan sarágu ilámaü fulásurugu, ²⁶ áni moúnajan lumúti Búngiu Elías túmoun ni ában jádaangiñe würiña jiláguaña jámarigu jagía ja aganoúbaña Israel, louñajei túmoun ában to aganoúboun Sarépta, yaráfa lun ubúru Sidón. ²⁷ Ñíñanu meja giñe sarágu gawágutiña gumein luágu jára ñi Israel lídan lidáni proféta Eliséo, úati ni ában jádaangiñe areidawaguagüdüti lueídügüya Naamán le Síriana.

²⁸ Dan le jagáambunbalin sun ja ñíbaña ligílisirugu cátei le, ába jagáñidun sarágu. ²⁹ Ába jásaarun, ába jaságaruni Jesúsu bougudín luei fulásu, ába janügüni lálbulugun wúbü le gagíbuagubalin fulásu lun jájuchuruni ñígiñe.

³⁰ Ába lásügürün Jesúsu jamídaanguágiñe jámagua, ába lídin.

Ában wügüri gawáguti espíritu wuríbati

(Mr 1.21-28)

³¹ Ábati lídin Jesúsu Capernaúm, ában fulásu le lídaanbei Galiléa, ába larúfudajan joun güriña ñi lídan wéyu le eméraguagülei. ³² Weírititi janígi láu ligáburu larúfudajan, ladüga láu ubáfu ladímureja.

³³ Ñíñeinti ában wügüri ligílisirugu, gawáguti espíritu wuríbati, ába lagúaragun ítara.

³⁴ —Ígira báwa, ¿ca uágu bemétera wámoun, Jesúsu le Nazarétna? ¿Biábiña agünrinchaguawa? Subúdi numútibu, áni subúdi numúti luágu amürü lan Liraü Búngiu le sándubei.

³⁵ Ába ladeínjan Jesúsu lun espíritu wuríbati ligía, ába laríñagun lun.

—¡Maníba, furíba lídaangiñe güriña le!

Ábati lájuchuruni espíritu wuríbati wügüri ligía múarugun jagíbugiñe súngebui, ába láfuridun lídaangiñe, mabúleiseirunga. ³⁶ Ába laweíridun janígi súngebui, ába jaríñagun jámagua.

—¿Cáteisán buri dimúrei le? ¡Adímurejati wügüri le láu gumádi lúma ubáfu joun espíritugu wuríbatiña, ába jáfuridun!

³⁷ Adímurejóatiti buri luágu Jesúsu lídan sun fulásu geyégu.

Lareidaguagüdünun Jesúsu límenidi Pédro

(Mt 8.14-15; Mr 1.29-31)

³⁸ Ábati láfuridun Jesúsu tídaangiñe jalígilisin juríu, ába lídan lúbíñoun Simón. Sándiñounti límenidi Simón, tabíruajaña, ába jayúmuragun lun Jesúsu lun lareidaguagüdünun. ³⁹ Ába lélemuchun Jesúsu tuágun, ába ladeínjan lun abíruaü, ába lagídarun abíruaü tuei. Lídan méme óra ligía ába tásaarun, ába tagúmeserun eténira joun.

Lareidaguagüdünun Jesúsu sarágu sánditiña

(Mt 8.16-17; Mr 1.32-34)

⁴⁰ Sun ja añájeinbaña sánditiña jábiñe, dan le láfuachun wéyu ába janügüniña lun Jesúsu, ába líchuguni lújabu jawágu cáda ában jádaangiñe,

ába lareídagun furúmieguaügü sándi le jawáguti. ⁴¹ Sarágu jaña giñe ja gawágutiña espíritugu wuríbatiña, ába jagídarúniwa jaweí, ába buri jagúaragun ítara.

—Amürü le Liraübei Búngiu.

Ába ladeínjan Jesúsu joun espíritugu wuríbatiña, mígirun lumútiña lun jadímurejan, ladüga subúdi jamúti luágu ligía lan Crístubei.

Lapúrichijan Jesúsu Galiléa

(Mr 1.35-39)

⁴² Dan le larúgadunbei, ába láfuridun Jesúsu bougudín lueí ubúru gu lídoun ában fulásu mageírawati. Ába jáluajani gürígia, ába jachülürün le ñíjin lubei, busentiña yebe jeréderuni lueí lídin, ⁴³ ába laríñagun joun.

—Gásu giñe níchuguni ugánu le luáguti larúeijan Búngiu joun lílana líbiri fulásu, ladüga lun líra nouñajoúa.

⁴⁴ Ítara líña lídin apúrichijaina tídan buri jalígílisin juríu, Galiléa.

5

Esénijani le láubei miláguru

(Mt 4.18-22; Mr 1.16-20)

¹ Luágu ában dan, ñíñein Jesúsu láru dúna le Genesarét, ábati jayábingua sarágu gürígia darí lun jámurudaguni, ladüga busén jamá jagáambuni lerérun Búngiu. ² Ába laríjin Jesúsu bián ugúnein málatu dúnarugu yaráfa lun láru béya, raríguaaña esénijatiña tídaangiñe, jachíbuñounti jasénin.

³ Ábati ládinun Jesúsu tídoun ában tídaangiñe ugúnein tugúya to lugúneboun Simón, ába laríñagun lun lun ladísedun murúsun lueí láru béya. Ábati lañúurun Jesúsu tídan ugúnein, ába lagúmeserun arúfudaja joun gürígia ñígiñe. ⁴ Dan le lásurunbei ladímurejan, ába laríñagun lun Simón.

—Jeíba méme anágün, ábame jágurun ñi.

⁵ Laríñaga Simón lun.

—Maésturu, ñadímeinjadiwa sun áriebu, mañúguntiwa ni cáta, quei amürü lubei aríñagubalin, wágura.

⁶ Ába jágurun, dan le jíñúragunbárun séni, ñíñanu sarágu úduraü tídan darí yebe lun tajeíridagun. ⁷ Ábati jadügün seíni joun jíbirigu ja tídaanbaña to ában ugúnein lun jayábin íderaguaña. Ába jayábin, ába jabuínchagüdünun biángubei ugúnein darí yebe lun tadíbiragun. ⁸ Dan le laríjini Simón Pedro cátei le, ába lájuduragun ligíbugiñe Jesúsu, ába laríñagun lun.

—Ígira bána, Nabúreme, ladüga ában wügüri gafígounti nugúya.

⁹ Laríñagubaalin Simón líra ladüga laweíridun lanígi, jáu sun ja úarabaña lúma, luágu añúguni le jadügübei. ¹⁰ Weíríti giñe janígi Jacóbo lúma Juan, ja lirájüñü Zebedéo, ja lúmabaña Simón. Ába laríñagun Jesúsu lun Simón.

—Manúfudebá, lúmagiñe guetó buwádígimarida adíaja gürígia nun.

¹¹ Lárigiñeti játürün, ába jígiruni sun cátei, ába jóudin lúma Jesúsu lun láni jamá disípulugu.

Lareídaguaügüdin Jesúsu ában gawáguti gumeínluágu sun lúra

(Mt 8.1-4; Mr 1.40-45)

¹² Luágu ában dan, lídaañein ában fulásu Jesúsu, le ñi lubei ában wügüri gawáguti gumeín luágu sun lúra. Dan le laríjinbalin wügüri ligía Jesúsu, ába lájuduragun dagá ligíbu múarugun, ába layúmuragun lun ítara.

—Nabúreme, ánjabu busén, gayáraati bareídaguaügüdinina.

13 Ábati lagúruruni Jesúsu láu lújabu, ába lariñagun.

—Buséntina, areídaguabá.

Quei lariñagun ítara, ába lagídarun gumeín lueí wügüri ligía, 14 ábati lariñagun Jesúsu lun lun mabájúdagun láani cátei le ni ca un. Lariñaga lun.

—Ñüdünrügübá, arúfudaga búngua lun fádiri, rúbeíme edéweejani le uágubei lariñaga lilúrudun Moisés luágu barúmadun, aríja jamámugei gürígia luágu areídaguaadibu lan.

15 Eíbu dan, eíbu labúruchaguntima luágu Jesúsu, sarágu jañátija gürígia oúndaragutiña lun jagáambuni lúma lun lareídaguágüdüni jasándi. 16 Ábaja lídin Jesúsu le ñíjin lumúti úa jamá gürígia lun layúmuragun lun Búngiu.

Lareídaguagüdüni Jesúsu ában fadáguaali

(Mt 9.1-8; Mr 2.1-12)

17 Luágu ában wéyu, ñíñein Jesúsu arúfudaja, ñíñanuti fariséogu jáma arúfudajatiña lilúrudun Moisés, ñúbintiña lídaangiñe lirájüñü buri fulásu le láni Galiléa, Judéa lúma Jerusalén. Nijánti lubáfu Búngiu arijúa luágu Jesúsu láu lareídaguagüdüniña sánditiña. 18 Ábati jayábin fiú wügüriña barúina ában wügüri fadáguaali tídan ában ubárari, jálugati jebélaagüdüni le ñíjin lubei Jesúsu lun laríjini. 19 Madáritiña jalíagiñeba lan jebélura ladúga jíbe gürígia, ábati jaweínrun tábulugun múna, ába jagídarun murúsun lueigiñe lougiñe le ñí lubei Jesúsu, ába jarárigüdüni sánditi tídan lubárari ligíbugiñoun. 20 Dan le laríjinalin Jesúsu afíñeni le jawágubei, ába lariñagun lun sánditi ligía.

—Wügüri, ferúdnawaali bifígoun.

21 Ábati jaríñagun arúfudajatiña lilúrudun Moisés jáma fariséogu jóunguarügü.

—¿Cáteisán gürígia le, le minébenejabubei lun Búngiu láu ligáburi ladímurejan? Úati ámu gayáraati ferúduna lan figoú lueídügüya Búngiu.

22 Subúdi lumúti Jesúsu ca lan jasáminabei, ába lariñagun joun.

—¿Ca uágu jasáminara ítara? 23 ¿Cátima méreengünbei lariñawagun. “Ferúdnawaali bifígoun”, ódi “Sarába, beíbuga”? 24 Narúfudaaliti jun luágu gayára lan ferúduna nan figoú, áu le Wügüri Garaúwarügüti.

Ábati lariñagun lun le sándibei.

—Sarába, barúboun bubárari, beíba búbiñoun.

25 Lídan óra ligía, ába lásaarun sánditi ligía jagíbugiñe, ába labúdnun lubárari tó buga ídaanboun laroúnra, ába lídin lúbiñoun adímurejeina luágu luweírigun Búngiu. 26 Ába laweíridun janígi súngubei, ába jadímurejan luágu luweírigun Búngiu, ába jaríñagun láu luweírin janígi.

—Aríjaadiwa cátei weíriguti ugúñe.

Lagúarun Jesúsu lun Leví lun lánime disípulu

(Mt 9.9-13; Mr 2.13-17)

27 Lárigiñe cátei le, ába láfuridun Jesúsu lídaangiñe fulásu ligía, ába laríjin ában agúburajati liseínsuna gumádi, gíriti Leví, ñun líña lídan fulásu le ñí lubei lagúburaja, ába lariñagun Jesúsu lun.

—Falábana, queímoun núma queísi náni disípulu.

28 Ába lásaarun Leví, ába lígiruni sun cátei lánina binádu libágari, ába lídin lúma Jesúsu queísi láni disípulu lúmagiñe óra ligía.

29 Lárigiñe, ába ladügün Leví ában oúnwenbun fédu lun Jesúsu, lúbiñe, ñíñanuti sarágu agúburajatiña liseínsuna gumádi jámaya ámu gürígia ñun

luágu dábula jáma. ³⁰ Ába jagúmeserun fariséogu jáma arúfudajatiña lilúrudun Moisés adímureja luágu Jesúsu jáma láni disípulugu, ába jaríñagun joun.

—¿Cásan uágu jeíginbei jáma agúburajatiña liseínsuna gumádi lúma jáma ámu gaffigountiña?

³¹ Laríñaga Jesúsu joun.

—Ja magádiebaña, memégeirúntiña surúsia, aná ja sándibaña. ³² Mára niábiña áluaja magádietaña ligíbugiñe Búngiu, niábiña áluaja gaffigountiña lun lasáansirún jóuserun.

Jálügüdüni Jesúsu luágu ayúnaruni
(Mt 9.14-17; Mr 2.18-22)

³³ Ábati jaríñagun lun Jesúsu.

—¿Ída liñasan ayúnara jabeí lánigu Juan jáma fariséogu, ayúmuragua jagía sarágu lun Búngiu, ánjaña báni disípulugu, jóutiña, gurá jagía súnwandan?

³⁴ Ába laríñagun Jesúsu joun.

—¿Gayaraati funági jayúnaragüdüniña güriquia ja jamísurajan lídoun ában maríei sun niján lan adári jáma ñi? ³⁵ Lachülürüba dan lun lídin adári, ligíameti jayúnarun.

³⁶ Rúti giñe Jesúsu ában jémpulu joun luágu iséri larúfudajan lúma binádu, laríñaga.

—Úati íbuguti murúsun gamísa tueigiñe ában anáanguni isérigiru lun láfadajan ában anáanguni ñulújaru, ánjein ladüga ítara, lagádeiruboun to isérigiruboun, áni merédebei giñe murúsun gamísa iséri ligía buídu tuágu anáanguni ñulújaru tugúya. ³⁷ Michugúntu giñe diweín iséri lídoun guéru ñulújali, ánjein adügüwa ítara, tajeíridagubei diweín iséri guéru ñulújali, féridiméti diweín, féridi guéru. ³⁸ Ligía lúnti lubeí tíchugún diweín iséri lídoun guéru iséri, ítara lúba lesériwidun guéru, seríwi diweín. ³⁹ Úati giñe átuti diweín to binádu lun labúseerunun to iséri lárigiñe, laríñaguba. “Buítimaatu to binádu.”

6

Jabúdajan disípulugu túrígu lídan wéyu le eméraaguagülei
(Mt 12.1-8; Mr 2.23-28)

¹ Luágu ában wéyu le eméraaguagülei, eíbugeina líña Jesúsu labádinagua nádü jáma láni disípulugu, átüjeina jagíati disípulugu lin túrígu, ába jéferējani láu jájabu, ába jeígini líla. ² Ábati jaríñagun jádaangiñe fariséogu joun.

—¿Cásan uágu jadüga wadágimanu le moún lumuti ladügün lídan wéyu le eméraaguagülei?

³ Laríñaga Jesúsu joun.

—¿Malíjangidün luágu le ladügübei Davíd luágu ában dan, dan le lálámachunbei jáu sun ja úarabaña lúma? ⁴ Ába lebéllurun tídoun lúban Búngiu, ába lanügün tídaangiñe fein to sagraúboun, jou ligía tídaangiñe, ru ligía joun ja úarabaña lúma, láu sun fádirigu rügüñanu lán yebe lúnbaña jeígin tídaangiñe fein tugúya, según lilúrudun Moisés, áni máma figou le ladügübei Davíd ligíbugiñe Búngiu.

⁵ Aríñagati giñe joun.

—Gabáfutina, áu le Wügüri Garaüwarügüti, lun nariñagun cába lan gayára ladügüniwa wéyu le eméraaguagülei.

*Wügüri le jiláalibeí újabu**(Mt 12.9-14; Mr 3.1-6)*

⁶ Lídaanya ában wéyu le eméraaguagülei, ába lebélorun Jesúsu tídoun jalígilisin juríu, ába lagúmeserun arúfudaja. Níñein ában wügüri jiláali lújabu le loúnwenren, ⁷ añájati arúfudajatiña lilúrudun Moisés jáma fariséogu ariaajei Jesúsu ánjein lagáranijaba lubeí lun lídan wéyu le eméraaguagülei, lun jadárirun lidúnrun. ⁸ Subúdi lumúti ca lan jarítagubei, ába laríñagun lun wügüri le jiláalibeí újabu.

—Sarába, ráramabá wagíbugiñe.

Ába lásaarun, ába laráramun ñi. ⁹ Ábati laríñagun Jesúsu joun jíbiri.

—Nálügüdaadün ában cátei. ¿Ca cátei gayáraabei ladügün lídan wéyu le eméraaguagülei, buídu ódi wuríbani, lasálbarun ibágari ódi lagídarún?

¹⁰ Ábati lariáguniña Jesúsu sun ja geyégubaña láu, ába laríñagun lun wügüri ligía.

—Tulébei bújabu.

Ába látuleruni, ába lareídagun. ¹¹ Ja jíbiri, ába jagáñidun sarágu, ába jagúmeserun álügüdagua jámagua ída lúba lan gayára lan jagúmochun láu Jesúsu.

*Lanúadajaniña Jesúsu dúusu apóstolugu**(Mt 10.1-4; Mr 3.13-19)*

¹² Lídoun dan ligía, ába lídin Jesúsu luágun ában wübü ayúmuragua lun Búngiu. ¹³ Dan le larúgadunbei, ába lagúarun joun láni disípulugu, ába lanúadajan dúusu jádaangiñe, ja únbaña lagúara apóstolugu. ¹⁴ Niján jírabei. Simón, le méme líchubei Pédro, Andrés, le lamúlen Simón, Jacóbo lúma Juan, Felípe lúma Bartolomé, ¹⁵ Matéo lúma Tomás, Jacóbo, le liraü Alféo, Simón, le áfaaguti lun jawáanserun juríu, ¹⁶ Júdas, le lamúlen Jacóbo, lúma Júdas Iscarióte, le alúgurubalin Jesúsu.

*Larúfudajan Jesúsu joun sarágu güri-gia**(Mt 4.23-25)*

¹⁷ Ába larárirun Jesúsu jáu lueígiñe wübü, ába leréderagun jáu láni disípulugu lídan ában fulásu le ñi lumuti sagádi wásati, níñianu gíñe sarágu güri-gia ñúbintiña loúbawagugiñe Judéa, Jerusalén, lúma lárurugugiñe Tíro lúma Sidón. Sun güri-gia ja, jayábiña lun jagáambuni lapúrichijan Jesúsu lúma lun lareídaguagüdüni jasándi. ¹⁸ Já buri asúfurirubaña jáu espíritugu wuríbatiña, areidaguátiña gíñe. ¹⁹ Álugatiña sun güri-gia jagúrurun luágu Jesúsu, ladüga areidaguagüda lumútiña súngebui láu lubáfu.

*Fuleíseiwatiña jáma fugiábugu**(Mt 5.1-12)*

²⁰ Ábati laríjin Jesúsu jawágun láni disípulugu, ába laríñagun joun.

—Fuleíseiwatün, jugúya le mégeibeí, ladüga ménreengünbei jun lun jebélurun lídoun larúeijan Búngiu.

²¹ ‘Fuleíseiwatün, jugúya le áfaagubei ilámaü guetó, ladüga jaquímuleduba.

‘Fuleíseiwatün, jugúya le ayájubei guetó, jéjerajaba lárigiñe.

²² ‘Fuleíseiwatün dan le iyéreegu jumá joun güri-gia nueígiñe, dan le jabúgagunün jawáriu, dan le janábagonün, dan le janügüni jiri queí ni cáta, queí cátei wuríbati, nueígiñe, áu le Wügüri Garaüwarügüti. ²³ Gúnda jumá sarágu, buin jumá láu ugúndani lídan wéyu ligía, ladüga jibíjuba

ában oúnwenbun afáyeiruajaü siélu, ítara méme líña meja jadüga binádu jagübürigu gürígia ja joun profétagu.

²⁴ ‘Fugiábugu jugúya, jugúya le rísibei, ladüga íbja jumáli sun ugúndani le lúnbei jibíjini.

²⁵ ‘Fugiábugu jugúya, jugúya le químulebei, ladüga jalámachuba.

‘Fugiábugu jugúya le éjerajabei guetó, ladüga jayájuajaba láu íruni.

²⁶ ‘Fugiábugu jugúya dan le sun jamá gürígia adímureja buíti juágu, ítara líña meja jadímurejan binádu jagübürigu buíti jawágu profétagu yéetiña.

Jínsiñe jamá jáganiñu jun

(Mt 5.38-48, 7.12)

²⁷ ‘Niján nerérun jun, Jugúya le agáambubalina. Jínsiñe jamá jáganiñu jun, adüga jumá buíti joun ja iyéreejabúbaña jun, ²⁸ biní jumaña ja íñaragutün, ayúmuragua jumá jawágu ja anábagutün. ²⁹ Ánjabu láfara ában gürígia luágu ában louba bigíbu, rúbei gíñe le ában louba lun, le anügütu babíte bueí, rúboun gíñe bisímisin lun. ³⁰ Furúmieguaügü le amúriajati búma, rúba lun, le anügüti bumégen, máluajabei lúma. ³¹ Le cátei le babúseerubei ladügün bun, ligíalá badüga joun ámu.

³² ‘Ánjein já rügüñanu lubei jínsiñejabúbaña jun jínsiñe jun, ¿ca buíti jadügübei láu líra? Ásta gafígountiña, ítara líña jadüga. ³³ O ánjaün lan adüga buíti jounrügü ja adügübaña buíti jun, ¿ca buíti jadügübei láu líra? Ítara líña gíñe jadügün gafígountiña. ³⁴ Ánjaün afúredeija jounrügü ja úmagiñebaña jarítagua jibíjin som cátei, ¿ca buíti jadügübei láu líra? Afúredeijatiña gíñe ja wuríbabaña joun wuríbatiña jáledi, agúrabañu jagía gíñe jabíjin som cátei jámagiñe. ³⁵ Ánjein jugúya, lúnti jínsiñe jamá jáganiñu jun, adüga jugúyame buíti, afúredeija jugúyame, magúrabajaanga ni cáta lewéñegua. Ítara lúba weíri lan jafáyeiruaja lúmagiñe Búngiu le íñugubei, áni lirájüñübadün gíñe le úmatimaati, ladüga ligía, fuleiseijabúti gíñe joun ja meteíngiradibaña lúma joun ja wuríbabaña. ³⁶ Gudémejabu jumá, quei gudémejabu lan jüguchi Búngiu.

Madímureja jumá wuríba jawágu ámu

(Mt 7.1-5)

³⁷ ‘Madímureja jumá wuríba jawágu ámu, ábame gíñe maríñagun lan Búngiu luágu wuríba lan jigáburí. Míchiga jumá jadúnrun ámu, míchun lámuga gíñe Búngiu jidúnrun. Ferúduna jumá, ferúduna lámugaün gíñe Búngiu. ³⁸ Rújuma joun ámu, ru lámuga gíñe Búngiu jun. Líchuguba Búngiu sarágu jun, ladügüba jun queígubeirügü jadüga joun ámu.

³⁹ Rúlumuti Jesúsu jémpulu le joun.

—¿Gayáraati funági ladúndejan ában maríjinti ában maríjinti líledi? ¿Ma jeíguaduba bíangubei lídoun ában meme júyu? ⁴⁰ Úati ni ában disípulu weíríguti lueí lumáesturun, íbini ánjein lagúmucha latúriajan, chülürügübei quei lumáesturun.

⁴¹ ‘¿Ída líña gayára bubálin liraúraü ífei le lídaanbei lágu bíbugaña aríja, áni masándi bumúti durúsu le lídaanbei bágu? ⁴² ¿Ída líña gayára lubei baríñagun lun bíbugaña. “Sagánei liraúraü ífei le bágurugubei”, áni masándi bumúti durúsu le bágurugubei? ¡Bíanguañein bigíbu! Sagábei durúsu le bágurugubei furúmiñe, gayára lámuga baríjini liraúraü ífei le lágurugubei bíbugaña buídu lun baságaruni.

Luágu lin tídibu wéwe tasúbudirúa

(Mt 7.17-20, 12.34-35)

⁴³Úati tídibu wéwe buíti lun wuríba lan lin, úati gíñe tídibu wéwe wuríbati lun buídu lan lin. ⁴⁴Sun tídibu wéwe subúdiwati luágu lin, mátújoúntu ígo lueígiñe jíyu, ni beíbeí lueígiñe guríbiyuwa. ⁴⁵Gurígia le buídubei, cátei buíti laríñagubei ladüga cátei lan buíti tídaanbei lanígi, gurígia le wuríbati, cátei wuríbati laríñagubei ladüga cátei lan wuríbati tídaanbei lanígi. Luágu le laríñagubei gurígia lasúbudirúa ca lan tídaanbei lanígi.

Bián ébuu

(Mt 7.24-27)

⁴⁶‘¿Ca uágu jaríñaga luágu áu lan Jabúremebei áni madügün jumúti le nubeíbei? ⁴⁷Naríñagaali jun ída líña lan le ñübinbei nun áni adügaleí le nubeíbei. ⁴⁸Ítara líña quei ában wügüri le ábunagubei ában múna, achíajati julíli furúmiñe, ába lábununi wagábu labádinagua dübü derébuguti. Dan le liñúrunbei dúna, ába liábin fulúdu láu érei tuágun múna tugúya, siñá lumutu ánjingicha ladüga luáguñoun lan ébuu derébuguti. ⁴⁹Anjeinti le agáambubalina áni madügün lumúti le nubeíbei, ítara líña quei ában wügüri le ábunagubei lúban ligíbuagu ságoun, mawágaburiga, dánti le liñúrunbei dúna, ába liábin fulúdu láu érei tuágun, ába teíguadun, ába tagünrinchagun le gumúti.

7

Lareídaguagüdüni Jesúsu lumúsun ában gumándan Rómana

(Mt 8.5-13)

¹Dan le lásurunbei ladímurejan Jesúsu joun gurígia, ába lídin Capernaúm. ²Ñíñein ában gumándan Rómana ñi, láu ában lumúsun jínsiñeti lun sarágu, sándiñein músu ligía, yaráfa lun loúnwen. ³Dan le lagáambunbei gumándan ligía luágu Jesúsu, ába loúnajan fiú jádaangiñe wügüriña weírigitíña lídan jafíñen juríu lun jayúmuragun lun Jesúsu lun lídin areídaguagüdei lumúsun. ⁴Ába jóudin lúmoun Jesúsu, ába jagúmeserun ayúmuragua lun táu sun janígi, jaríñaga lun.

—Buíti lun bíderaguni gumándan le, ⁵ladüga jínsiñetiwa wagía juríu lun, ligía guánarügü ábunaguagüdübarun walígilisin.

⁶Ábati lídin Jesúsu jáma, dan le yaráfaaña tun lúban gumándan ligía, ába loúnajan gumándan jádaangiñe lumádagu aríñaga lun Jesúsu.

—Nabúreme, ítara líña gumándan lun manügün ban bubéresegun ñüdüñ lúbiñe, luágu nege madüna lan lun bebélurun lúbiñoun, ⁷ligía nege mídin lubeí lúngua álugabu. Rúrügübeí dimúrei, ábame lareídagun lumúsun. ⁸Ladüga ligía nege gíñe lábugiñeñein gumádi íñutimaati, áni añájein gíñe súdaara lábugiñe lagúmadijan. Dan lé nege laríñagun lun ában jádaangiñe lun lídin, ñüdünti, dan le laríñagun lun le ában lun liábin, ñübinti, áni dan le loúnajani lumúsun adüga som cátei, adüga lumúti. Ítara lúba nege, luágu berérun mósu lídin sándi lueí lumúsun.

⁹Dan le lagáambunbalin Jesúsu cátei le, weíríti lanígi láu wügüri ligía, ába laríjin jawágun gurígia ja afálarubalin, aba laríñagun joun.

—Nínárün jáu, ni íbini jádan Israelítagu madárigidina afíñeni weíríti quei lafíñen wügüri le.

¹⁰Dánti le jachúlürünbei wügüriña ja ñüdüñbaña álugei Jesúsu járigoún lúbiñoun gumándan, areídaguagüdei lumúsun.

Láguyuagüdüni Jesúsu tiraü ában jiláali túmari

¹¹ Lárigiñe cátei le, lídiña Jesúsu lídoun ában ubúругu gíríti Naín, úareina jáña láni disípulugu lúma, jáma sarágu gürígia. ¹² Dan le lachülürünbei yaráfa lun lubéneri ubúругu ligía, ába laríjin jóudin ábunaja ában jiláali le ligiarügüti tiraü lúguchu to jiláali túmari. Sarágu jáña lílana fulásu ñüdün ábunaja túma. ¹³ Dan le laríjinbarun Wabúreme Jesúsu, ába tagüdemedagun lun, ába laríñagun tun.

—Mayájuabá.

¹⁴ Ába layárafadun, ába lagúrurunun gánjoun, ába jaráramagun ja anügübaña. Ába laríñagun lun jiláali.

—Írájú, ñnaríñaguña bun lun básaarun!

¹⁵ Ábati lásaarun lé buga jiláalibei, ába lagúmeserun adímureja. Ába ledéregeruni Jesúsu tun lúguchu. ¹⁶ Dan le jaríjinbalin gürígia cátei le, ába laweíridun janígi, ába jagúmeserun adímureja buíti luágu Búngiu, jaríñaga.

—Chülúgua ában proféta weíriguti wádoun.

Aríñagatiña gíñe.

—Ñübinja Búngiu íderaguawa, wagía le lumútuniña.

¹⁷ Ába lagaambúniwa cátei le ladügübei Jesúsu lídan sun Judéa lúma geyégua láu.

*Loúnagülegu Juan le abásteragüdjabei
(Mt 11.2-19)*

¹⁸ Agáambati Juan luágu sun cátei le, abájüdagua jamúti lánigu lun. Ábati lagúarun joun biáma jádaangiñe, ¹⁹ ába loúnajaniña álügüdei Wabúreme Jesúsu ánjein ligía lubei Crístubei le lúnbei líabin, o ánjein jagúrabajaba lubei ámu. ²⁰ Dan le jachülürünbei le ñí lubei Jesúsu, ába jayárafadun, ába jaríñagun lun.

—Loúnajañadiwa Juan le abásteragüdjabei álügüdabu ánjein amürü lubei Crístubei le lúnbei líabin, o ánjein lun lubei wagúrabun ámu.

²¹ Lídan méme óra ligía, areídaguagüdati Jesúsu sarágu gürígia lídaangiñe jasáandi lúma jasúfurirun, lúma jádaangiñe espíritugu wuríbatíña, aríjagüda ligía gíñe sarágu maríjintiña. ²² Ába lubeíti laríñagun joun.

—Jeíba, jaríñageime le jaríjubei lúma le jagáambubei lun Juan. Jabájüdaguáme lun luágu jaríjin maríjintiña, jeíbugun meíbuguntiña, jareídagun láutiña gumein luágu jára, jagáambun magáambaditiña, jáguuyugun jiláaña, lúma luágu líchugún ugánu luáguti asálbaruni joun gudémetiña. ²³ Gúndaati gíñe gürígia le meféridirun lumúti lafiñen nuágu.

²⁴ Lárigiñe jóudin já buga loúnajabaña Juan, ába lagúmeserun Jesúsu adímureja luágu Juan joun gürígia, laríñaga.

—¿Cásan jídinbei aríja lídan fulásu mageírawati? ¿Ában mabúru le lánjinjan garábali? ²⁵ Ánjein máma lubei ítara líña, ¿cáti jídinbei aríja? ¿Ában wügüri táu anáanguni wéndegutu? Máma ligía, subúdi jumúti luágu ja lan wéndegubaña adáüragun, agánawa jagía buídu, tídaañanu jában urúeigu.

²⁶ Lídan linárün cátei, ¿ca jídinbei aríja? ¿Ába proféta? Ánja, inárüni, áni ában weíriguti sügü láu proféta. ²⁷ Juan, ligía oúnagülei le uágubei taríñaga Lerérün Búngiu.

Noúnajañein noúnagüle bubáragiñe
lun laráansejani üma bubá.

²⁸ Quei naríñaguni jun, jádan sun gürígia, úagili proféta weiriguti luei Juan, áni láu sun líra, weiriguti le únabutimaabei lídan larúeijan Búngiu sügú láu le anügarügübalin ugánu luágu arúejani ligía.

²⁹ Dan le jagáambunbalin sun gürígia, ásta ja agúburajabaña liseínsuna gumádi, cátei le, ába jaríñagun luágu richá lan Búngiu láu laríñagun liyúmulugugiñe Juan luágu lúnti lan jasáansiraguni jagáburi. Gürígia jagía, resíbi jamáli meja labásteragüdajan Juan, ³⁰ ánjañati jíbe-ágei fariséogu jáma arúfudajatiña lilúrudun Moisés, májatiña meja lun jadügüni le lubeíbei Juan, merésibirun jamúti lé yebe labúseerubei Búngiu ladügün luágu jafúleisein. ³¹ Ába laríñagun Jesúsu.

—¿Ída liñásan jagáburi gürígia lánina dan le? ¿Cásan lenégebei? ³² Ítara jáña quei irájüñü ja añúurubaña mágidirugu ájurerera, ába jagúaragun joun jíbegu. “Íñaajatiwa fídu jun, mabínajantün, erémujatiwa urému jírti jun, mayájuntün.” ³³ Ladüga ñübinti Juan le abásteragüdajabei, lé meja meiginbei fein, mátun ligía diweín, aríñagatün luágu gawágu lan espíritu wuríbati. ³⁴ Lárigiñe, ába niábin, áu le Wügüri Garaüwarügüti, jóutina áni gurá áu. Jaríñaga luágu geigadina, gátadi, jamáda áu nege gafígountiña jáma agúburajatiña liseínsuna gumádi. ³⁵ Wel, ja chúbaña áu, subúdi jamúti luágu buídu lan le ladügübei Búngiu láu lichú láu.

Jesúsu lúbiñe Simón le fariséo

³⁶ Ába lamísurajani ában jádaangiñe fariséogu Jesúsu lun lídin eíga lúbiñe, ába lídin Jesúsu lúbiñe fariséo ligía, ába lañúurun eíga luágu lidábulan. ³⁷ Ñíñounti ában würi wuríbati témeri lídan ubúru gu ligía, dan le tagáambunbei luágu lídin Jesúsu eíga lúbiñe fariséo ligía, ába tídin láu ában lágei ibíñei jémeti. ³⁸ Ába taráramun lanágangiñe Jesúsu, lubádu lugúdi, ába tadüdüragüdüni lugúdi láu táguira. Nuján ayájuaja, nuján arágajei láu tí diburi, nuján achújei lugúdi, ába téseruni ibíñei luágun. ³⁹ Dan le laríjinbalin fariséo le amísurajabalin Jesúsu cátei le, laríñaga lúnguarügü. “Lun jamúga inárüni lan luágu proféta lan wügüri le, lasúbudiruñein jamúga ca lan to agúruruboun luágu lúma ca lan tuwúyeri gürígia tugúya, luágu wuríba lan témeri.” ⁴⁰ Ábati laríñagun Jesúsu lun fariséo ligía.

—Simón, níjein ában cátei lun naríñaguni bun.

Laríñaga fariséo.

—Aríñagabeí nun, maésturu.

⁴¹ Laríñaga Jesúsu lun.

—Níñanu bián wügüriña dúweitiña seínsu lun ában afúredeijati. Ában jádaangiñe, dúweiti seíngü-san denáriu, le ában, dimí-san. ⁴² Queíti siñá lubei jafáyeruni, ába ferúduna láani afúredeijati ligía jadúweijan biángubei. Aríñagabeíti nun. ¿cábagi jádaangiñe jínsiñejabutima lun afúredeijati ligía?

⁴³ Laríñaga Simón lun.

—Lídan narítangun, le gíbetimaabei adúweijan.

Laríñaga Jesúsu lun.

—Richátibu.

⁴⁴ Ába laríjin Jesúsu tuágun würi tugúya, ába laríñagun lun Simón.

—¿Ariágu bíña tun würi to? Belútina búbiñoun, míchutibu dúna nun lun nachíbuni nugúdi, ánjounti würi to, ágawagüda tumúti nugúdi láu táguira, ába tamábeidagüdüni láu tí diburi. ⁴⁵ Machú bumútna, ánjoun tugúya, lúmagiñe nebélurun, merédegili tachújani nugúdi. ⁴⁶ Míchutibu

aáli nábulugu, ánjoun tugúya, túguatu ibíñei jémeti luágu nugúdi. ⁴⁷ Ligía naríñagunbei bun luágu arúfuda láani luweírín tínsiñejabu luágu ferúdunawa lan líbe tífígoun, ánjeinti gürígia le míbeti ferúdunawa lan, míbeti ínsiñeni larúfudun.

⁴⁸ Ábati laríñagun Jesúsu tun würi tugúya.

—Ferúdunawaali bifígoun.

⁴⁹ Ábati jagúmeserun amísurajóutiña ja ñúnbaña lúma ñi aríñaga jámagua.

—¿Cáteisán wügüri le, ferúduna lubei giñe figou?

⁵⁰ Ába laríñagun Jesúsu tun würi tugúya.

—Sálbawádibu lídaangiñe bifígoun ladúga bafíñerun nuágu, beíba darángilañu.

8

Wíríña já buri meja íderaguti Jesúsu

¹ Lárigiñe cátei le, ñüdünti Jesúsu lídoun sarágu ubúругu lúma buri lirájüñü fulásu íchigei ugánu buíti luágu larúeijan Búngiu. ² Ñüdütiña dúusu apóstolugu lúma jáma wíríña ja lareídaguagüdübaña jádaangiñe espíritugu wuríbatiña lúma sándi. Ñíñoun María to gíríboun Magdaléna jádan, to ídaangiñeboun jáfurida sédü espíritugu wuríbatiña, ³ ñíñoun giñe Juána, to lúmari Chúza, le oúnigirubarun lúban Heródes, ñíñoun Susána, jámaya sarágu ámu ja íderagubálin láu le jámati.

Jémpulu luágu abunaguti

(Mt 13.1-9; Mr 4.1-9)

⁴ Sarágu jáña gürígia ñübinburitiña lídaangiñe sarágu fulásu lun jaríjini Jesúsu, dánti le oúndaraguaaña, ába ladímurejan Jesúsu joun láu jémpulu. Laríñaga joun.

⁵ —Furíti ában ábunaguti ábunagua líla nádü, dan le afúrujeina láani, ába láburijan lídaangiñe luágun üma, ába jadügüraguni ásügürütiña, ába jeígini dunúru. ⁶ Líbiri, ába láburijan labádinaguouñ dübü, dánti le labouçhun, ába lásaurün ladúga lumábei fulásu. ⁷ Ába láburijan líbiri labádinaguouñ jíyu, ába láfaruni jíyu le ájüchübei úara lúma. ⁸ Ñíñein giñe lídaangiñe, áburujati lídoun múa buíti, dan le laweínamudun, gin ligía, buíti lalúbajouñ, cáda ílaü rúti san águu.

Lárigiñe laríñaguni Jesúsu cátei le, ába laríñagun joun láu umálali jéreti.

—Jugúya le garígeirugubei lun jagáambun, agáamba jumána.

Le lébubei ladímurejan Jesúsu láu jémpulu

(Mt 13.10-17; Mr 4.10-12)

⁹ Ábati jálügüdüni láni díspulugu ca lan lílabei jémpulu le. ¹⁰ Laríñaga joun.

—Jugúya, subúdigüda láali Búngiu cátei arámudaguati le luágutibeí larúeijan jun, ánjaña ja mebéresenbaña láu lerérun, láu jémpulu laríñawagúa cátei luágu larúeijan joun lun íbídiñebeí lan líla cátei le jaríjibeí joun, lun giñe úa lan gunfaráanda jamáni cátei le jagáambubei.

Lafúnraanguagüdüni Jesúsu jémpulu luágu abunaguti

(Mt 13.18-23; Mr 4.13-20)

¹¹ Ába laríñagun Jesúsu joun.

—Níján líla jémpulu ligía. Líla nádü, ligía lerérun Búngiu, ¹² üma le ñíjin lubei láburija lídaangiñe líla nádü, jagía gürígia ja agáambubalin lerérun

Búngiu, ába liábin Máfia, ába lagídaruni tídaangiñe janígi lun mafíñerun jamá, masálbarun jagíame. ¹³ Dübü le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jerésibiruni láu ugúndani, áni márügüdünti jádan buídu, afíñetiña luágu murúsun dan, áni dan le jóuchawagún, mawándun jamúti, ába jeféridiruni jafíñen luágu Búngiu. ¹⁴ Jíyu le ñíjin lubeí láburuja líbiri líla nádü, jagía gürígia ja agáambubalin lerérun Búngiu, ába jasígiruni binádu jagáburi, ába jasígirun arítagua luágu irísini lúma ugúndani le lánina ubou le, úati fulásu jarítaturugun lun lerérun Búngiu, siñátiti laságarún cátei buíti jádaangiñe. ¹⁵ Ánjeinti múa buíti le ñíjin lubeí láburuja líbiri líla nádü, jagía gürígia ja agáambubalin lerérun Búngiu táu anígi buítu, adüga jagía gásu láu lerérun, eíbuga jagía quei lubúdubú, sagáwati cátei buíti jádaangiñe.

Jémpulu luáguti lámpu
(Mr 4.21-25)

¹⁶ Ába laríñagun Jesúsu.

—Úati gürígia ébeduti lámpu, ába ladáuragun láu láu som cátei o líchuguni lan tábugiñe gabána, íñu líchigei lun larúgoungadágüdün múnada, lun gayára lan jaríjin ja ebélurubaña jabárua. ¹⁷ Úati lubeíti ni cáta arámudaguati lun mafúnraangudun lan, úa ni cáta le íbídiñewati lun machülürün lan dan lun lasúbudirúniwa lúma lun lafúnraangudun.

¹⁸ ‘Gagáambadi jumá lubeíti buídu lun lerérun Búngiu, le gámati lerérun Búngiu tídan lanígi, libíjuba lánwoun le lúmabei, ánjeinti le úabei ni cáta lídaangiñe lerérun Búngiu tídan lanígi, íbini le uágubei larítagua luágu níjein lan lúma, lagídarúaba lueí.

Lúguchu Jesúsu jáma lamúlenu
(Mt 12.46-50; Mr 3.31-35)

¹⁹ Ábati tachülürün lúguchu Jesúsu jáma lamúlenu le ñíjin lubeí Jesúsu, siñátí jayarafadun lun ladüga jíbe gürígia. ²⁰ Ába laríñawagún lun.

—Nujántia bóguchu jáma bamúlenu bougudi áni buséntiña jaríjinibu.

²¹ Ába laríñagun joun.

—Ja agáambubalin lerérun Búngiu, úara jagía lúma, jagía nóguchubaña jáma namúlenu.

Lagálumaduni Jesúsu lérouga
(Mt 8.23-27; Mr 4.35-41)

²² Luágu ában wéyu, ába ladinun Jesúsu tídoun ában ugúnein jáu láni disípulugu, ába laríñagun joun.

—Queímoun loubáfurugun lagúnu.

Ába jóúdin. ²³ Dan le añája lan ánjiñuragua, ába larúmugun Jesúsu. Ába láfurun ában garábali jéreti jáu, lagúnurugu, ába lagúmeserun dúna ebéluja tídoun jagúne yaráfa lun jadíbiragun. ²⁴ Ábati jóúdin agágudajei Jesúsu, ába jaríñagun lun.

—¡Maésturu! ¡Maésturu! ¡Wadíbiragua!

Ábati lásaarun Jesúsu, ába ladeínjan lun garábali lúma lugúdi barána, ába lagálumougadun, ába darángila lan sun cátei. ²⁵ Ábati laríñagun joun disípulugu.

—¿Ca susébebe lun jafíñen?

Ába jálügüdagun jámagua láu anúfudei lúma luweírín anígi, jaríñaga.

—¿Cátei funásan wügüri le, gumádi lubáli garábali lúma lugúdi barána áni agáamba jameí?

*Wügüri Gadárana le gawágubei espíritugu wuríbatiña
(Mt 8.28-34; Mr 5.1-20)*

²⁶ Ába jachülürün loubawagun Gadára, le loubáfurugubei lagúnu, ligíbugiñe Galiléa. ²⁷ Dan le larárirunbei Jesúsu, ába liábin ában wügüri lílana fulásu ligía lubádun. Lújali wügüri ligía gawágu espíritugu wuríbatiña. Madáüti anánguni, maganoún ligía tídan múna, lídan buri jabára jiláaña le achigíti luágu dübü lagánawa. ²⁸ Dan le laríjnbalin wügüri ligía Jesúsu, ába lájuduragun ligíbugiñe, ába lagúaragun.

—¿Ca uágu bemétera númoun, Jesúsu Liraü Búngiu le Íñgutimaabei? Ayúmuraguatna bun lun masúfuriragüdün bánina.

²⁹ Lariñagunbei itara ladüga lagúmadiruñein lan Jesúsu espíritugu ligía lun láfuridun lídaangiñe. Saráguja weíyaasu lárügüdüni espíritugu wuríbati ligía, ábaja jagúraguni gürígia lújabu lúma lugúdi láu güríngüri lun ledéraguagüdün, ábaja látumuraguni, ába lanúragüdüni espíritugu lídoun fulásu le mageírawati. ³⁰ Ába lariñagun Jesúsu lun.

—¿Ca bíri?

Ába lariñagun.

—Lejión níribei.

Lariñagunbei luágu ligía lan líribei ladüga gíbeeña espíritugu wuríbatiña ja ebélurubaña lídoun. ³¹ Ába jamúriajan espíritugu jagía lúma Jesúsu lun moúnajan láníña máfiougatin. ³² Queíti ñíñanu jamá sarágu búiruju eíga luágu ában wübü yaráfa, ába jayúmuragun espíritugu jagía lun lun louñajaniña jádoun búiruju jagía, ába lánjarun Jesúsu. ³³ Ábati jáfuridun espíritugu wuríbatiña jagía lueí wügüri ligía, ába jebélurun jádoun búiruju, ábati jáguragun búiruju jagía jóungua lueígiñe ában gudúungu, ába jáburujan lídoun lagúnu, ába jañáradagun.

³⁴ Dan le jaríjnbalin ja oúnigirubaliña búiruju cátei le asúseredubei, ába janúfudedagun, ába jeíbaagun abájüdaguei ubúruгу lúma áraabu. ³⁵ Ábati jóúdingua gürígia aríjei cátei le asúseredubei. Dan le jachülürünbei le ñí lubei Jesúsu, ába jadáriruni wügüri le ídaangiñebei jáfurida espíritugu wuríbatiña ñun lubádu lugúdi Jesúsu, táu lanáangun, areídaguaali, ába janúfudedagun. ³⁶ Játi buga aríjubalin, ába jabájüdaguni luáguti lareídagun wügüri lé buga gawágubei espíritugu wuríbatiña joun, ³⁷ ába jayúmuragun lílana fulásu ligía lun Jesúsu lun lídin ñígiñe, ladüga janúfude. Ábati ladinun Jesúsu tídoun ugúnein lun lídin, ³⁸ ába layúmuragun wügüri le ídaangiñebei jáfurida espíritugu lun lun lídin lúma, ába lariñagun Jesúsu lun lun leréderun, lariñaga lun.

³⁹ —Giríubá búbiñoun, ábame babájüdaguni sun le ladügübei Búngiu bun.

Ába lídin, ába labájüdaguni le ladügübei Jesúsu lun lídan sun fulásu ligía.

*Liraü Jáiro túma würi to agúrurubarun lanáangun Jesúsu
(Mt 9.18-26; Mr 5.21-43)*

⁴⁰ Dan le lagíribudunbei Jesúsu loubáfurugun lagúnu, ába jerésibiruni gürígia láu ugúndani ladüga sun jagía agúrabañu jáñein. ⁴¹ Ábati liábin ában wügüri gíriti Jáiro, le ábanbei jádaangiñe tábutigu jalígílisin juríu, ába lájuduragun lubádu lugúdi Jesúsu, ába layúmuragun lun lun lídin lúbiñe,

42 ladüga ában rügüñoun liraü, quei buri dúusu irúmu táu, touwe. Dan le lídinbei Jesúsu, ába jafálaruni sarágu gürígia darí lun jámurudaguni.

43 Ñiñounti ában würi jádan, dúusu irúmu táu láu lésejan jítaü tídaangiñe. Gásta táali sun tiseínsun jawágu surúsiagu, siñá jamutu areídaguagüda.

44 Ába tayárafadun lun Jesúsu lanágangiñe, ába tagúruruni táru lanáangun, lídan méme óra ligía ába tareídagun.

45 Ábati laríñagun Jesúsu.

—¿Ca agúrurubei nuágu?

Quei sun lan jagía aríñaga luágu magúrurúnwa lan luágu, ába laríñagun Pédro jáma líbirigu.

—Maésturu, murúgu wañátia ya lurúma jíbe gürígia, ¿álügüdajagidibu ca lan agúrurubei buágu?

46 Ába laríñagun Jesúsu.

—Gurúwaali nuágu, ladüga sandí numuti luágu areídaguagüdaadina lan gürígia láu nubáfu.

47 Dan le tasúbudiruni würi tugúya luágu subúdiwaali lan, aba tiábin adádagareina, ába tájuduragun lubádu lugúdi Jesúsu, ába tagúfesperun lun jagíbugiñe sun gürígia ca lan lébubei tagúrurun luágu áni ába lan tareídagun lídan méme óra ligía. 48 Ábati laríñagun Jesúsu tun.

—Niraü, areídaguagüdaadibu ladüga bafiñerun nuágu. Beíba darángilañu.

49 Ñígili Jesúsu adímureja, ligía lachülürün ában lúbiñegiñe Jáiro, ába laríñagun lun Jáiro.

—Jilá biraü, mebérésejadügüyabá lun Maésturu.

50 Dan le lagáambunbalin Jesúsu le, ába laríñagun lun.

—Manúfudedabá, afiñerügüba, ábame tareídagun biraü.

51 Dan le lachülürünbei Jesúsu lúbiñoun Jáiro, mígirunti lun jebélurun ámu lúma lueídügüya Pédro, Jacóbo lúma Juan jáma tagübürigu irájü tugúya.

52 Jayájuañu sun ja ñibaña tárigi, ába laríñagun Jesúsu joun.

—Mayájua jumá, moúnwentu, tarúmugarügüña.

53 Ába jéjerajan láu ladüga subúdi jamáni luágu jilá tan. 54 Ábati lárügüdüni Jesúsu tújabu, ába laríñagun láu umálali jéreti.

—Irájü, sarába.

55 Ába tágyugun, ába tásaarun lídan méme óra ligía, ába laríñagun Jesúsu lun jíchugun eigini tun. 56 Weíríti janígi tagübürigu, ába laríñagun Jesúsu joun lun mabájüdagun jamáni le asúseredubei ni ca un.

9

*Loúnajaniña Jesúsu dúusu apóstolugu apúrichija
(Mt 10.5-15; Mr 6.7-13)*

1 Ába loúndaruniña Jesúsu dúusu láni apóstolugu, ába líchugun ubáfu joun lun jaságarun sun jawúyeri espíritugu wuríbatíña lúma lun jareídaguagüdün sánditiña. 2 Ába loúnajaniña apúrichije uganu luáguti larúeijan Búngiu lúma areídaguagüdaña sánditiña. 3 Laríñaga joun.

—Manüga jumá ni cáta júmagua luágu juweíyasun—ni bádun, ni ságü, ni feín, ni seínsu. Ábanrügütá símisi janügün. 4 Furúmieguarügü múna to ñíjin lumúti jachülúra, reídei jumá ñi darí jídin lídaangiñe fulásu ligía. 5 Le ñí lumuti merésibirúniwa jumá, dánme le jáfuridun lídaangiñe fulásu ligía, ábame

jáfuruduni calíqui lueígiñe jugúdi, arúfuda jumámugei luágu magúndan jumá láu jagáburi lílana fulásu ligía, ígira jumáña quei jadáriragun jóungua.

⁶ Ábati jáfuridun apóstolugu jagía, ába jeíbuguni sun lirájüñü fulásu apúrichijeinei ugánu luáguti asálbaruni, areídaguagüdeina jagía sánditiña lídan sun fulásu le ñí lumuti jóudin.

Loúnwen Juan le abásteragüdjabei
(Mt 14.1-12; Mr 6.14-29)

⁷ Ába lagáambun gumádimati Heródes luágu sun cátei le ladügübei Jesúsu, ibídiñetiti lun cába lan larítagua, ladüga ñíñanu aríñagutiña luágu saráali lan Juan lídaangiñe ouweni, ⁸ jíbiri aríñaga luágu proféta Elías lan achülaagubei, jíbiri aríñaga luágu ában lan jádaangiñe jíbiri binádu profétagu le ásaaruti lídaangiñe ouweni. ⁹ Ába laríñagun Heródes.

—Áu guánarügü oúnajabei adürürei lichügü Juan. ¿Cátei funáti le, le uágubei nagáamba labájüdawagún sarágu cátei?

Ábati louchun Heródes laríjini Jesúsu.

Leíagüdüñ Jesúsu seíngü mílu wügüriña
(Mt 14.13-21; Mr 6.30-44; Jn 6.1-14)

¹⁰ Dan le jagíribudun apóstolugu, ába jabájüdagun lun Jesúsu luágu sun le jadügübei. Ábati lanügüniña lídoun fulásu mageírawati yaráfa lun Betsáida.

¹¹ Dan le jasúbudirunbalin güriñgia, ába jafálaruni, ába lerésibiruniña Jesúsu, ába ladímurejan joun luágu larúeijan Búngiu, areídaguagüda láña sánditiña.

¹² Dan le lagúmeserunbei adárüda, ába jayábin láni Jesúsu dúusu apóstolugu lúmoun, ába jaríñagun lun.

—Oúnaja báña güriñgia ja, ñüdüñ jamámuga áluga jabára lun jeméraagun, áluaja jagíame eíginí lídan buri lirájüñü aüdü lúma lídan buri fulásu yaráfati, ladüga úati ni cáta ya.

¹³ Laríñaga Jesúsu joun.

—Rújuma eíginí joun.

Jaríñaga lun.

—Seíngü rügüñoun fein wáma jáma bián úduraü, ánjawa gubeírügü ñüdüñ agáñija eíginí joun sun güriñgia ja.

¹⁴ Yaráfañanu jóun seíngü mílu wügüriña ñi, mabájüdünga würiña jáma irájüñü. Ába laríñagun Jesúsu joun láni disípulugu.

—Ñurügüda jumáña dimí dimí-san.

¹⁵ Ába jadügüni ítara, ába jañúurun súngubei. ¹⁶ Ábati lanügünun Jesúsu seíngü fein lújaburugu jáma bián úduraü, ába laríjin siélun, ába líchuguni eteíngiruni lun Búngiu. Lárigiñe lagúbachagunun fein lúma úwi, ába líchuguni joun láni disípulugu lun jafánreinjani jádan güriñgia. ¹⁷ Jóutiña súngubei quimúle, dan le jabúdajanun ígiragutu, buíngüdatiña dúusu faníñe láu.

Laríñaguni Pédro luágu Jesúsu lan Crístubei
(Mt 16.13-19; Mr 8.27-29)

¹⁸ Luágu ában wéyu dan le layúmuruña lan Jesúsu lábbuga, ñíñanu láni disípulugu díseraü lueí, ába laríñagun joun.

—¿Ída liñásan jarítangun güriñgia nuágu? ¿Cátanasan, según jagía?

¹⁹ Ába jaríñagun lun.

—Añájein, aríñagutiña luágu Juan lan le abásteragüdjabei amürü, jíbiri, aríñaga Elías, añájeingua aríñagutiña luágu ában lan jádaangiñe binádu profétagu ásaaruti lídaangiñe oúweni amürü.

²⁰ Ábati laríñagun joun.

—Ángi jugúya, ¿cátanagi lídan jarítangun?

Laríñaga Pédro lun.

—Crístu, le loúnajabei Búngiu lun lasálbaruniña gürígia, amürü.

Ladímurejan Jesúsu luágu loúnwen

(Mt 16.20-28; Mr 8.30-9.1)

²¹ Ába laríñagun Jesúsu joun láu éregu lun maríñagun jamáni cátei le ni ca un. ²² Ába laríñagun joun.

—Nasúfuriruba sarágu, áu le Wügüri Garaüwarügüti. Janügübadina wügüriña weírigutiña lídan jafiñen juríu, jábutigu fádorigu, jáma arúfudajatiña lilúrudun Moisés, quei ni cáta. Nafarúaba jílágubei, ábame násaarun lídaangiñe oúweni luágu lürüwan wéyu lúnya nabágaridun.

²³ Lárigiñe, ába laríñagun joun súngubei.

—Le busénti nánigu lan, bulíeileí cáteiñein lan, awándaleí sun luwúyeri asúfuriruni le lúnbei liábin lun, nueígiñe, queísi lanügüni ában wügüri lugúruwan, falálana. ²⁴ Ladüga le abúseeruti leséfuragun lúngua ya ubouágu lefériDIRUBEI íbágarí le magúmchaditi, ánjein le ánjabei lefériDIRUNI libágarí ya ubouágu nueígiñe, libíjubei íbágarí le magúmchaditi siélu. ²⁵ ¿Cági ju lan lun gürígia lagáñeiruni sun le lánina ubou, lefériDIREIME lubára siélu o lagünrinchaguba lan lúngua? ²⁶ Le anügüti busíganu nuágu lúma luágu nerérun, áu le Wügüri Garaüwarügüti, nibúsigaribadina gíñe láu dánme le niábin quei urúei láu luweírigun Núguchi jáma ánjeligu ja sándubaña. ²⁷ Ninárün nariñaguni jun luágu añájein lan jádaangiñe ja yábaña guetó, mouñwenbaña maríjinga jameí larúeijan Búngiu.

Lámuñedagun laríjín Jesúsu

(Mt 17.1-8; Mr 9.2-8)

²⁸ Queíburi wídü wéyu lárigiñe laríñaguni Jesúsu cátei le, ába laweínrun luágun ában wübü ayúmuragua lun Búngiu, barü lumútiña Pédro, Jacóbo, lúma Juan lúmagua. ²⁹ Dan le niján lan Jesúsu ayúmuragua, ába lámuñedagun ligíbu, ába tájarudun lanáangun, ába támiridun. ³⁰ Ábati jasáriragun Moisés lúma Elías ayánuja lúma, ³¹ geyégu líña ában larúgounga weírítí jáu, jayánujaña libügürü oúweni le lúnbei lasúfuriruni Jesúsu, Jerusalén. ³² Láu sun luweírín lidábu lágu Pédro jáma líbirigu, marúmuguntiña, aríja jamúti luweírigun Jesúsu jáma bián wügüriña ja lúmabaña. ³³ Dan le adísedeinaña bián wügüriña jagía lueí Jesúsu, ába laríñagun Pédro lun.

—Maésturu, jílidan dan awánja lan ya! Adüga wamá ürüwa dibásein ya —ában bun, ában lun Moisés, túma ában lun Elías.

Ibídiñeti lun Pédro ca lan laríñagubei. ³⁴ Súnti niján lan adímureja, ába liábin ában juánriñu oúburaguaña, ába janúfudedagun ladüga jadáriragun jóungua lurágeirugu juánriñu ligía. ³⁵ Ábati jagáambun ában umálali aríñaguti lídaangiñe juánriñu ligía.

—Niraü le jínsiñebei nun le, agáamba jumeí le lubeíbei.

³⁶ Lárigiñe ladímurejan umálali ligía, ába jaríjin dispulugu luágu lábugua rügáali lan Jesúsu. Reideitiña maníñu, maríñagun jamúti cátei le jaríjubei lun ni ában lídan dan ligía.

Lareídaguagüdün Jesúsu ában irájü gawáguti espíritu wuríbati

(Mt 17.14-21; Mr 9.14-29)

³⁷ Larúgan, dan le jarárirunbei lueígiñe wübü, sarágu jáña gürígia ñüdüntiña lubároun Jesúsu. ³⁸ Ábati lagúaragun ában wügüri jádaangiñe láu umálali jéreti, laríñaga.

—Maésturu, fuleísejabubá nun, aríjabeí niraü le ligía rügüñeibeí, ³⁹ níjein ában espíritu wuríbati luágu, dan le lárügüdüni, ába lagúaraguagüdüni, ába louwejan, ába láfurijan jacútaü liyúmulugugiñe. Añáwurija lumúti, májati lígiruni. ⁴⁰ Ayúmuraguaadina joun báni disípulugu lun jaságaruni espíritu wuríbati le lueí, siñá jamuti.

⁴¹ Ába loúnabun Jesúsu, laríñaga.

—Jugúya gürígia maffíneraditiña, wuríbatiña! ¿Átiribeísan dan lun neréderuni júma lubá gayára lan jaffínerun nuágu? ¿Ídame lagúmucha maffíñeni le jídaanbei? Barübei biraü ñájoun.

⁴² Dán yebe le lídin irájü ligía lun, ába lájuchuruni espíritu wuríbati múarugún, ába louwejagüdüni, ába ladeínjan Jesúsu lun espíritu wuríbati ligía, ába lareídaguagüdüni irájü, ába ledéregeruni lun lúguchi. ⁴³ Ába laweíridun janígi súngebei láu luweírigun Búngiu.

Ladímurejaanya Jesúsu luágu loúnwen

(Mt 17.22-23; Mr 9.30-32)

Sun añája lan láu luweírín janígi láu le ladügübei Jesúsu, ába laríñagun joun láni disípulugu.

⁴⁴ —Agáamba jumeí cátei le buídu. nedéregerúaba, áu le Wügüri Garaüwarügüti, jájaburugun náganiñu.

⁴⁵ Úati gunfaráanda jamáni disípulugu le laríñagubei, ladüga darúñu líña jasáminan lun cátei le, áni janúfudetiñati lun jaríñagun lun lun lafúnraanguagüdüni le laríñagubei, joun.

¿Ca weírigutimaabei?

(Mt 18.1-5; Mr 9.33-37)

⁴⁶ Ábati jagúmeserun disípulugu asígeneja jámagua luágu ca lan weírigutimaabei jádan, ⁴⁷ queí lasúbudiruni Jesúsu jasáminan, ába lanügün ában irájü lubáduagun, ⁴⁸ ába laríñagun joun.

—Le erésibiruti ában irájü queísi irájü le lídan níri, resíbi lumútina, le erésibirutina, resíbi lumúti gíñe le oúnajabalina. Le lubeíti ünabugutimaabei jídan, ligía weírigutimaabei.

Le mámabei wágani, wámagiñeñein

(Mr 9.38-40)

⁴⁹ Ábati laríñagun Juan lun Jesúsu.

—Maésturu, aríjatiwa ában wügüri aságajati espíritugu wuríbatiña lídan bíri, ába wewéridiruni ladüga máma lan ában wádaangiñe.

⁵⁰ Laríñaga Jesúsu lun.

—Mewéridira jumeí, ladüga le mámabei wágani, wámagiñeñein.

Ladeínjan Jesúsu lun Jacóbo lúma Juan

⁵¹ Dan le layárafadun dan lun lanügüniwa Jesúsu siélun, ába ladügüni luweíyasun Jerusaléoun láu anígi. ⁵² Ába loúnajan loúnagülegu lubá, ába jóudin lídoun ában liraüraü fulásu láni Samária lun jáluajan múna lubá, ⁵³ májatiña Samariána jerésibiruni ladüga jaríjin luágu leíbuga lan

Jerusaléoun. ⁵⁴ Dan le jaríjinbalin Jacóbo lúma Juan luágu mája jamá Samariána jerésibiruni, ába jaríñagun lun.

—Wabúreme, ¿buséntibu lun wamúriajan lun larárirun wátu geméti siélugiñe lun lagúmunchun jáu queí meja ladügüni proféta Elías?

⁵⁵ Ábati ladígiragun Jesúsu jawágun, ába ladeínjan joun, laríñaga.

—Ibidiñeti jun luágu wuríba lan cátei le jayúmajabei. ⁵⁶ Máma niábiña, áu le Wügüri Garaüwarügüti, agünrinchaguei jabágari gürígia, niábiña asálbarei.

Ábati jóudin lídoun ámu liraüraü fulásu.

Já yebe busénbaña jafálaruni Jesúsu
(Mt 8.19-22)

⁵⁷ Dan le luágu jamá üma, ába laríñagun ában wügüri lun Jesúsu.

—Nabúreme, buséntina nafálarunibu le ñíjin lumúti bídin.

⁵⁸ Laríñaga Jesúsu lun.

—Darítiña gasígamu júyu lun jaganoún ñi, gádibu jagía dunúru, ánjein áu le Wügüri Garaüwarügüti, úati ni jalába lan nabálachagüdei nichügü.

⁵⁹ Laríñagaya Jesúsu lun ában.

—Falábana.

Laríñaga lun.

—Nabúreme, lárigiñeme louñwen nüguchi, buná neíme, ábame neíbugun búma.

⁶⁰ Ába louñabuni Jesúsu.

—Falábana guetó, ígira báña ja jiláñubaña lun cátei le lánina larúeijan Búngiu lun jábununiña jegéburu, ánjein bugúya, beíba apúrichijeí ugánu luáguti larúeijan Búngiu.

⁶¹ Ábayati laríñagun ában lun.

—Nabúreme, buséntina nafálarunibu, neíba yebe ayoúragua joun ja wábiñebaña.

⁶² Laríñaga Jesúsu lun.

—Le íchuguti lújabu luágu awoújagülei, lárigiñe ába laríjin lárigoún, mabuídunti lun lílaname larúeijan Búngiu.

10

Louñajaniña Jesúsu ürüwa-wein-dísi dístípulugu apúrichija

¹ Lárigiñe cátei le, ába lanúadajan Jesúsu ürüwa-wein-dísi jádaangiñe lánigu, ába louñajaniña lubá, bián bián, lídoun sun ageíraü lúma fulásu le lúnbei lídin ñi. ² Laríñaga joun.

—Inárüni, gíbetiña gürígia ja aráanseñabaña lun jagáambuni ugánu luáguti asálbaruni, jagía, ítara jáña queísi nádü le lúnbei lalúbajoúniwa, áni louguatiña ñadágimeintiña. Ligía lúnti lubeí jamúriajan lúma Búngiu lun louñajan ñadágimeintiña jagánaguóun. ³ Jeíba, noúnajañadün quei mudún jádoun anímaalu gáñitiña. ⁴ Manüga jumá ságü júmagua, ni seínsu, ni geídi, meréderagun jugúyame ayánuja ni ca úma luágu üma. ⁵ Dánme le jebélurun tídoun ában múna, busújuma furúmiñe, jaríñagame. “Darángilaü joun tílana múna to.” ⁶ Ánjein añájein lubeí gürígia jínsiñejabutiña lun darángilaü tídan múna tugúya, jerésibirubadün láu ugúndani, jóunbei abúsuruni lánina darángilaü. Ánjein úa jabeí gürígia jínsiñejabutiña lun darángilaü tídan múna tugúya, giríbugüda jumeí abúsuruni. ⁷ Reidei jumá tídan múna tugúya to ñí lubeí jerésibirúa, jou jumeíme, gurá le íchugúti jun

úouga busíganu, ladüga garíchatí ñadágimeinti lun lafáyeirua. Masáansija jumá múna. ⁸ Dánme le jachülürün lídoun ában ageíraü le ñí lumuti jerésibirúa, jóujumei le íchugúti jun, ⁹ areídaguagüda jumáña sánditiña ja ñítiña, jaríñagame joun lílana fulásu ligía. “Subúdigüdáwaali luáguti larúeijan Búngiu jun.” ¹⁰ Ánjaün achülüra lídoun ában ageíraü le ñí lumuti merésibirúniwa jumá, furíjuma lídoun buri üma, jaríñagame. ¹¹ “Ásta licáliquin jageíra le luágubei wagúdi furú wamuti lun warúfuduni jun luágu magúndan wamá láu jigáburí, áni subúdi jumei luágu subúdigüdáwaali lan luáguti larúeijan Búngiu jun.” ¹² Naríñajare jun luágu lídan lánme luwéyuri lagúseragüdúniña Búngiu gafígountiña, janárimetimaabei jabeichúniwa lílana fulásu le merésibirunbadün sügü láu jabeichún lílana ubúruyu le Sodóma.

*Lílana ageíraü buri magáambaditiña
(Mt 11.20-24)*

¹³ ¡Fugíabu jugúya lílana Corazín! ¡Fugíabu jugúya lílana Betsáida! Ladüga lun jamúga ubúruyu lan Tíro o Sidón ladügüwa buri miláguru le adügúbei lídan jubúrugute, binárü jamúga lasáansiragua jagáburí lílana, ába jamúga jarúfuduni láu jadáüragun lúdu lúma balígi. ¹⁴ Ánjein jugúya, lídaanme luwéyuri agúseruni, weiritimaabei jabeichúniwa sügü jáu gúrígía Tírona jáma Sidónna. ¹⁵ Amürüti, ubúruyu le Capernaúm, ¿jarítaquatibu luágu liñurúaba lan bíri queísi liñun siélu? Larárirawagüdúwaba bíri ünabun queísi lünabun máfiougati.

¹⁶ Ába laríñagun Jesúsu joun ürüwa-wein-dísi dísipulugu ja loúnajañabaña apúrichija luágu larúeijan Búngiu.

—Le agáambutün, agáamba lumútina, le májati lagáambunün, májati giñe lagáambunina, áni le májati lagáambunina, májati giñe lagáambuni Núguchi le oúnajabalina.

Jagíribudun ürüwa-wein-dísi dísipulugu

¹⁷ Ába jagíribudun ürüwa-wein-dísi dísipulugu jagía lídaangiñe jaweíyasun láu ugúndani, aríñageina jagía.

—Wabúreme, ásta espíritugu wuríbatiña agáamba jamútiwa dan le waságaruniña lídan bíri.

¹⁸ Laríñaga Jesúsu joun.

—Ánja, aríja numúti ligáburí leíguadun Máfia siéluigiñe quei ában labíríjanouga. ¹⁹ Rújadina ubáfu jun lun jadügüragun jéwe jáma águru, masúfurirunga ní cáta, lúma lun jére lan jubáfu luei lubáfu Máfia. ²⁰ Láu sun líra, magúndaara jumá luágu jagáambunün espíritugu, gúnda jumá luágu níjein lan jíri bürüwañu tídan lílíburun Búngiu siélu.

*Lagúndaarun Jesúsu
(Mt 11.25-27, 13.16-17)*

²¹ Lídan óra ligía, ába labuínchagüdúni Sífiri Sándu Jesúsu láu ugúndani, ába laríñagun.

—Núguchi, le Labúremebei siélu lúma múa, iñüragüda numúti bíri, ladüga arámuda báali cátei luáguti barúeijan jawei chútiña áu jáma furéndeitiña, ába bafúraanguagüdúni joun ja loúguabaña ufúrendeí queísi irájüñü. Ánja, Núguchi, ladüga ítara líña babúseeruni.

²² ‘Derége láali Núguchi sun cátei nun. Úati ni ában subúdíjabuti cáтана lan lueídügüya Núguchi, úati giñe ni ában subúdíjabuti cáteiñein lan Núguchi nueídügüya jáma ja úntiña nabúseera nasúbudiragüdüni.

²³ Ábati ladígiragun adímureja jóunrügü láni disípulugu, laríñaga.

—Fuleiseiwatiña ja arijubalin cátei le jaríjubei jugüya, ²⁴ladüga naríñajare jun luágu sarágu jáña urúeigu jáma profétagu abúseerutiña yebe meja jaríjini le jaríjubei jugüya guetó, maríjin jamúti, busén jagía yebé meja jagáambuni le jagáambubei guetó, magáambun jamúti.

Jémpulu luáguati Samariána le buídubei

²⁵ Lídan ában guríriguau, ñiñein ában arúfudajati lilúrudun Moisés, abúseeruti louchaguni Jesúsu, ába lásaarun, ába laríñagun lun.

—Maésturu, ¿cábasan nadüga lun gayára lan nibíjini ibágarí magúmuchaditi?

²⁶ Laríñaga Jesúsu lun.

—¿Cáteigi bürüwañubei lídan lilúrudun Moisés? ¿Ída liñágia balíjan ñi?

²⁷ Ába louñabun, laríñaga.

—Jínsiñelá Babúreme Búngiu bun táu sun banígi, táu sun buwáni, láu sun bére, lúma láu sun bisáminan, jínsiñe jagíame bíbirigu bun quei bínsiñegua búngua.

²⁸ Ábati laríñagun Jesúsu lun.

—Oúnabaadibu buídu, ánjein badüga ítara, bibíjubei ibágarí magúmuchaditi.

²⁹ Queíti busén lan arúfudajati ligía larúfuduni luágu buídu lan lálügüdajan, ába laríñagun lun Jesúsu.

—¿Cátañagi níbirigubaña?

³⁰ Ábati louñabuni Jesúsu, laríñaga lun.

—Ñiñein ában wügüri arágachuti Jerusaléngiñe lun ubúrugun Jericó, luágu luweiyasun ába járügüdüni jíwerutiña, ába jíwerujani sun le lúmabei ásta lanáangun, buleisei jameí, ába jígiruni jilá mémeeli. ³¹ Ába lásügürün ában jafádirin juríu lídaangiñe méme üma ligía, dan le laríjinbalin wügüri ligía, mebéresenti láu, ába lasígiruni leíbugun loubáfurugugiñe üma. ³² Sügü ligía ában jádaangiñe ladügawagun Leví ñigiñe, dan giñe le laríjini wügüri buleiseiwaali ligía, ába giñe lasígiruni leíbugun loubáfurugugiñe üma, mebéresenga giñe láu. ³³ Ábati lásügürün ában wügüri Samariána aweiyasujati lídaangiñe üma ligía, dan le laríjinbalin, ába lagüdemedagun lun. ³⁴ Ába liábin, ába lagáranijan lun bíti buri le luágubei láu aáli túma diweín, ába lagüraguni. Ába laweínragüdüni luágu lilügün burígü, ába lanügüni tídon jában chülüdügütiña, ába ladügüni le liyáraati lun. ³⁵ Larúgan, dan le leíbuga lan Samariána ligía, ába láluguchun bián seínsu le denáriu, ába líchuguni lun tabúreme múna, laríñaga lun. “Tóunigibeí wügüri le, ánjabu agástara ámu lueí le níchugubei bun luágu, nafáyeirubei bun dánme le nagíribudun.”

³⁶ Ábati lálügüdüni Jesúsu arúfudajati ligía.

—¿Cáteiti jádaangiñe ürüwa wügüriña ja líbiribeí le ueíbeí líwerujoúa, lídan barítangun?

³⁷ Laríñaga lun.

—Le gudémejabubei lun.

Laríñagati Jesúsu lun.

—Ítaralá giñe badüga.

Jesúsu jábiñe Márta túma María

³⁸ Ába lasígirun Jesúsu luágu luweíyasun jáma lánigu, ába lachülürün lídoun ában liraüräü fulásu le ñí lubei terésibirei ában würi gíritu Márta, túbiñe. ³⁹ Ñíñoun ában tamúlelua Márta gíritu María, ába tañúurun lubádu lugúdi Jesúsu lun tagáambuni le laríñagubei, ⁴⁰ ánjounti Márta, weíriti teténirun lun tubéresegun. Ába tariñagun Márta lun Jesúsu.

—Nabúreme, ¿mebéresentibusan láu tígirunina namúlelua adügei sun berésegu nábugua? Aríñagabá tun lun tíderagunina.

⁴¹ Ába loúnabunun Jesúsu, laríñaga tun.

—Márta, bafúuduña luágu sarágu cátei, ⁴² buídurügüti murúsun lun weígin. Anúadaja táali María lubuídun-ágei cátei le lúnbei ladügüniwa, áni úabei ni ában lun lagídaruni tueí.

11

Larúfudajani Jesúsu ayúmuraguni lun Búngiu

(Mt 6.9-15, 7.7-11)

¹ Luágu ában wéyu, layúmuraguña Jesúsu lun Búngiu lídan ában fulásu, dan le lásurun, ába laríñagun ában jádaangiñe lání disípulugu lun.

—Nabúreme, arúfudajabá ayúmuraguni woun quei larúfudajan Juan joun láni disípulugu.

² Laríñaga Jesúsu lun.

—Dánme le jayúmuragun lun Búngiu, jaríñagame ítara.

Wáguchi Búngiu le siélubei, inébewalá bíri.

Ñübinlá bidáani lun barúeijan ya uboúagu, adügüwalá bugúndan uboúagu quei ladügün bugúndan siélu.

³ Rúboun fein buídurügütu woun lun wéyu le ugúñebei.

⁴ Ferúdnabei wuríbati le adüga wamáalibei quei ferúduna wamániña ja adügübaña wuríbati woun.

Mígira báwa lun wáburujan lídoun wuríbani, dísegüdarügü báwa lueí.

⁵ Aríñagati giñe Jesúsu joun.

—Niján ában jémpulu jun. lídin jamúga ában jídaangiñe lúbiñe ában lumáda amídi áriebu, ába laríñagun lun. “Numáda, furédeibá úrúwa fein nun, ⁶ ladüga sun liña lachülürün ában numáda núbiñoun áni úati ni cáta núma lun níchugun lun.” ⁷ Ába jamúgati loúnabun le ában múnadagiñe, laríñaga jamúga. “Mebéreseja bána, darúnaali nubéneri, áni rouñjadina jáu sun nisáanigu, siñáti násaarun íchiga ni cáta bun.” ⁸ Naríñaguña jun luágu íbini lan jamúga másaarun lan íchigoun lun ladüga lumáda lan, lásaaruña jamúga íchigoun lun lueí lasígirun ebéreseja lun. ⁹ Aríñagatina lubeíti jun. Jamúriaja, ábame líchugun Búngiu jun, jáluaja, ábame jadárirun, jadaúnja luágu béna, ábame lánjunrenchúniwa jun. ¹⁰ Ladüga sun le amúriajati, íbíjati, le áluajati, daríti, le adaúnjati luágu béna, junrénwati lun.

¹¹ ¿Gayáraabei funági líchugun ában úguchili jídaangiñe dübü lun liraü dan le lamúriajan fein lúma? ¿o líchugun lan ában jéwe lun dan le lamúriajan úduraü? ¹² ¿o líchugun lan ában águru lun dan le lamúriajan gañeín?

13 Gíchigadijadün ligía cátei buíti joun jirájüñü láu sun juríban, ¡gúbumeti líchigei Júguchi Búngiu le siélubei Sífiri Sándu joun ja amúriajati!

Laríñawagún luágu njein lan lubáfu Máfia lúma Jesúsu
(Mt 12.22-30; Mr 3.19-27)

14 Níñein Jesúsu aságara ában espíritu wuríbati lueí ában wügüri le madímuregüdün láalibe yebe espíritu ligía, dánti le láfuridunbei espíritu wuríbati ligía, ába gayára lan ladímurejan meréngaditi ligía. Ába laweíridun janígi gürígia láu cátei le. 15 Níñanu gíñe, aríñagutiña.

—Láu lubáfu Beelzebú, le Máfia, le jábuti máfianu, laságaja wügüri le espíritugu wuríbatiña.

16 Jíbiri, lun jóuchaguni, ába jamúriajan miláguru lúma lun larúfuduni luágu lúmagiñe lan Búngiu liábin lubáfu. 17 Queíti subúdi láani le jarítagebei, ába laríñagun joun.

—Furúmiegurügü arúejani le afánreinraguti lun jageíndagun jámagua, lagünrinchaguba, ában gíñe família fánreinguatiña ladüga wuríbu, jagünrinchaguba gíñe. 18 Ánjein gíñe níjein lubei fánreinguau jádan Máfia jáma lánigu, ¿ida lubági ladúrarun lubáfu? Nariñagunbalin le, ladüga jariñagun luágu láu lan lubáfu Máfia naságaja espíritugu wuríbatiña ja ebélagüdúbaña Máfia guánarügü jádoun gürígia, 19 áni ánjein itara líña lubei, ¿cági íchugubei ubáfu joun ja jánigu jugúya lun jaságajan espíritugu wuríbatiña, Máfia ódi Búngiu? Láu líra, jagia guánarügü arúfuda jamúti luágu bulíeigua jumá. 20 Le inárünibe, láu lubáfu Búngiu naságaja espíritugu wuríbatiña, áni arúfuda lumúti líra luágu chülújali lan larúejan Búngiu lídoun fulásu le.

21 ‘Ába wügüri jéreti, dan le aráanseñu lan, toúnigi lúban buídu, sun le lúbiñebei chouúti. 22 Ánjein ñübin ában jéretimaati lueí ába lásiiraguni, lagídaruboun sun lárumate to uáguboun leménigida lueí, ábame lanügüni le labúseerun, ába lafánreinraguni jáma lumádagu.

23 ‘Le mámabei númagiñe, náganiñein, le míderagun lumútina, güríngua lumúti le nadügubei.

Espíritu wuríbati le agíribudúbei
(Mt 12.43-45)

24 Ába laríñagun Jesúsu.

—Dan le láfuridun ában espíritu wuríbati lídaangiñe ában gürígia, eíbugañajádügü líña lídan buri fulásu mábeiti áluaja leméraagun, dánti le madári láani, ába laríñagun lúnguarügü. “Nagíribudayá tídoun núban to ñígiñe lubei náfurida.” 25 Dánti le lagíribudun, ába ladáriruni gürígia buga ligía quei ában múna to buídawaru, aráanserúa. 26 Ábati lídin, ába liábin jáu sédü espíritugu wuríbatimaatiña lueí, ába jebélurun agánawa lídan gürígia ligía, wuríbatimaajali le gádaanbalin wügüri ligía lueí buga furúmiñe.

Ugúndani le tímatimaati

27 Dan le niján lubei Jesúsu aríñagei cátei le, ába tagúaragun ában würi jádaangiñe gürígia, taríñaga.

—¡Fuleíseiwatu jiñáru to agúriajabalibu, fuleíseiwatu to átagüdúbalibu!

28 Ába laríñagun Jesúsu.

—¡Fuleíseiwatimaatiña ja agáambubalin le lubeíbei Búngiu áni abájüda jameí!

Amúriajatiña gürígia wuríbatíña miláguru lúma Jesúsú
(Mt 12.38-42; Mr 8.12)

²⁹ Añája méme gürígia oúndaragua geyégu láu Jesúsú, ába lagúmeserun adímureja, lariñaga.

—Wuríbatíña gürígia ja lánina dan le, áni jamúriaja miláguru núma lun narúfuduni luágu Búngiu lan oúnajabalina, wel, míchugúnbei ámu seíni joun luei le luáguti meja proféta Jonás. ³⁰ Ítara quei meja le asúseredubei lun Jonás ában seíni joun ja aganoúbaña Nínive luágu Búngiu lan oúnajabalin, ítara lúba gíñe le lúnbei lasúseredun nun, áu le Wügüri Garaúwarügüti, ligíaba ában seíni joun gürígia ja lánina dan le luágu Búngiu lan oúnajabalin. ³¹ Dánme le lidáani agúseruni, dánme le lagúseragüdüniña Búngiu gürígia ja lánina dan le, ábame tásaarun lurúeite Súru lun tasíadiruniña, ladüga tugúya, ñúbintu lídaangiñe lidíse-ágei ubouú lun tagáambuni lichú láu Salomón, áu, weirigutimaatina sügü láu Salomón áni májatün jagáambunina. ³² Lídan mémeme agúseruni ligía, ábame gíñe jásaarun já meja aganoúbaña ubúругu Nínive, ábame jasíadiruniña ja lánina dan le, ladüga sáansiguati jagáburi Nínivena lárigiñe lapúrichijani Jonás ugánu le láni Búngiu joun, áni áu ában le weiriguti sügü láu Jonás, áni májatün lun jagáambunina.

Lilámpun úgubu
(Mt 5.15, 6.22-23)

Ába lasígirun Jesúsú aríñaga.

³³—Úati ébeduti ában lámpu líchigei lídan fulásu arámudaguati, ni tábugiñe ában gáfu, íñuba líchigei lun larúgoungadun joun ja ebélurutiña. ³⁴ Ítara líña águu quei ában lámpu lun úgubu, ánjein buídu lubei bágu, aríja ligía luágun cátei lánina Búngiu, camá jamuga jarúgoungabei gíñe láu sun búgubu, áni buídubei gíñe sun bigáburi. Ánjein sándi lubei bágu, aríja ligía luágun cátei lánina ubouú, camá jamuga lídaanbei lubúriga sun búgubu, wuríbabei gíñe bigáburi. ³⁵ Touñigibá lun mabúrigadun lan bilámpun. ³⁶ Ánjein jarúgounga lubei láu sun búgubu, úga ni murúsun lubúriga, baríjubei sun cátei furáangu quei dan le durúngu líña lan lámpu báu.

Líchugun Jesúsú jadúnrun fariséogu jáma arúfudajatiña lilúrudun Moisés
(Mt 23.1-36; Mr 12.38-40; Lc 20.45-47)

³⁷ Dan le lagúmunchunbei ladímurejan Jesúsú, ába lamísurajani ában fariséo eíga lúbiñe. Ába lebélorun Jesúsú, ába lañúurun luágu dábula. ³⁸ Ába laweíridun lanígi fariséo ligía láu magúnfulirun lan Jesúsú láu igáburi le lánina lachibún újabu lubá eígini. ³⁹ Ába lariñagun Wabúreme Jesúsú lun.

—Jugúya fariséogu ragá jumuti wéru lúma asíedu bougudigiñe libíti, múnadagiñe jibíti, wíyetün, buin jíña láu luweínamu águu lúma sarágu luwúyeri wuríbani. ⁴⁰ ¡Deré tagáambun jugúya le! ¿Ibídíñeti jun luágu le lan adügübalin le bougudigiñebei, ligía lan gíñe adügübalin le múnadagiñebei? ⁴¹ Jarúma jumá múnadagiñe jibíti láu jíchugun joun gudémetiña, ítara lúba jarúma jumá gíñe bougudigiñe jibíti.

⁴² ¡Fugiábugu jugúya fariséogu! Adügatün díisi fánreinti láu jíduru le ménta, rúda, lúma ámu luwúyeri nádü lun jíchugun ában fánreinti lun Búngiu, áni madügüntün gásu láu ísuruni lúma línsiñejabu Búngiu. Ligía lúnbei jadügüni, mígirunga jumeíme jadügüni le ában.

⁴³ ‘¡Fugiábugu jugúya fariséogu! Buséntün járügüdüni ubáraü le jabára ja weírigutimaabaña tídan jilígílisin, busén jugúya lun labúsurún jun láu sarágu inébesei úmada.

⁴⁴ ‘¡Fugiábugu jugúya fariséogu, biángua tigíbu!, ladüga ítara jíña quei umúajaü le marijinti, sügü jagía gürígia ligíbuagugiñe ibídiñoun joun.

⁴⁵ Ábati loúnabun ában jádaangiñe arúfudajatiña lilúrudun Moisés, lariñaga.

—Maésturu, banábaguñadiwa giñetia dan le baríñaguni le.

⁴⁶ Ába lariñagun Jesúsu.

—¡Fugiábugu giñe jugúya, arúfudajatiña lilúrudun Moisés! Jíchigei lilúrudun Búngiu queisi ában anúgüni jürüti joun ámu, áni jugúya, májatün janúgün ni murúsun lídaangiñe.

⁴⁷ ‘¡Fugiábugu jugúya!, ladüga rújumuti dübü arítaguagüleime luágu jamúaja profétagu já meja jáfaragubaña binádu jagübürigu. ⁴⁸ Láu líra, arúfuda jumúti luágu gúnda jumá láu le jadügübei binádu jagübürigu, jagía áfaragubaliña, jugúya wéndegüda jumúti jamúaja.

⁴⁹ ‘Ligía lariñagunbei meja Búngiu láu lichú láu. “Nóunajaba profétagu jáma apóstolugu joun, ábame jáfaraguniña jíbiri jilágubei, eíbaaja jamáñame jíbiri.” ⁵⁰ Ligía lagúseragüdübaña lubeí Búngiu gürígia ja lánina dan le luágu játa profétagu ja áfarawagübaña lúmagiñe ladügün ubouú, ⁵¹ lúmagiñe líta Abél lúmoun líta Zacarías le jáfarubei labádinagua latárü túma témpulu. Ligía nariñagunbei jun luágu lagúseragüdübaña lan Búngiu gürígia ja lánina dan le luágu jouwegun profétagu.

⁵² ‘¡Fugiábugu jugúya arúfudajatiña lilúrudun Moisés!, ladüga ragü jumaali ligélen lubéneri subúdi, mebélurun jíña, mígirun jugúya lun jebélurun ja busénbaña jebélurun.

⁵³ Dan le lariñagunbalin Jesúsu cátei lé buri joun arúfudajatiña lilúrudun Moisés jáma fariséogu, ába jagáñidun lúma, lárigiñe láfuridun lúbiñegiñe fariséo ligía, ába jagúmeserun ebéresejei láu sarágu buri álügüdajani ⁵⁴ lun jaríjin ánjaña adárira lidúnrun.

12

Larúfudajan Jesúsu luágu mabuídun lan biángua lan igíbu

¹ Ába joundaragun sarágu mílu gürígia, gíbetiña darí lun jachúinragun joungua. Ába lagúmeserun Jesúsu aríñaga jountima láni disípulugu.

—Tóunigi jumátia jaweí fariséogu, ítara líña jagáburi quei ísi—biánguañein jagíbu. ² Úati ni cáta lábugiñeti lubúriga lun mafúnraangudunbei lan, úa ni cáta arámudaguati lun masúbudirúnwabei lan. ³ Ítara líña lubeíti, sun le jaríñagubei lábugiñe lubúriga, lagaambúaba lídan larúgounga, le jaríñagubei lanáangiñe béna, lagúarajouba tábulugugiñe múna.

Ca lan ueí lúnbei janúfudewa lan

(Mt 10.28-31)

⁴ ‘Nariñajare jun, numádagu, moún lumuti janúfudedun jaweí gürígia ja gabáfubaña lun jáfarunün jilágubei, lárigiñe líra siñá jadügün ámu cátei jun. ⁵ Nariñagaali jun ca lan ueí lúnbei janúfudedun. Janúfude jumá lueí Búngiu le gabáfugilibei lun loúnajanun juwáni máfiougatin lárigiñe lagidaruni jibágari. Lueílá janúfueda.

⁶ ‘¿Ma alúgurúatiña seíngü dunúru luágu bián gáwanün? Láu sun mebégi jamá sarágu, mabúlieidunti Búngiu ni ában jádaangiñe. ⁷ Ánjeinti jugúya,

Íbini ídiburi le jábulugubei abájüda láali Búngiu ában ában. Manúfude jumá lubeíti, gebégitün sügü jáu sarágu dunúru ligíbugiñe Búngiu, áni loúnigiruñádün.

*Ja meyédagunbaña luágu Jesúsu jagíbugiñe gürígia
(Mt 10.32-33, 12.32, 10.19-20)*

⁸ Nariñajare jun luágu sun lan ja aríñagubaña jagíbugiñe gürígia luágu nánigu jamá, nariñaguba gíñe luágu nánigu jamá jagíbugiñe láni Búngiu ánjeligu. ⁹ Ánjaña ja aríñagubaña jagíbugiñe gürígia luágu máma jamá nánigu, nariñaguba gíñe jagíbugiñe láni Búngiu ánjeligu luágu máma jamá nánigu.

¹⁰ Furúmieguarügü le aríñaguti cátei wuríbati nuágu, áu le Wügüri Garaüwarügüti, gayáraati ferúdunawa lan, ánjein le anábaguti Sífiri Sándu, siñáti ferúdunawa lan.

¹¹ Dánme le janügün ligíbugiñoun lúru du lun jagúserun, o jagíbugiñoun lan tábutigu jalígilisin juríu, madíjerida jumá luágu cába lan jóunaba o cába lan jaríñaga, ¹² dánme le lachülürün óra lun jadímurejan, larúfudubei Sífiri Sándu le lúnbei jaríñaguni jun.

Ewéridijani lueí leténirün sarágu lun irísini

¹³ Ába lariñagun ában jádaangiñe gürígia jagía lun Jesúsu.

—Maésturu, aríñagabá lun níbugaña lun líchuguni nufánran nun lídaangiñe alágan.

¹⁴ Lariñaga Jesúsu lun.

—¿Cági ichubalina quei agúseragüdüti o quei afánreinjati jídan?

¹⁵ Aríñagati gíñe ítara.

—Toúnigigua jumá júngua lueí luweínamu águu, ladüga máma lueígiñe líbe lúmati gürígia labágarida sarágu dan.

¹⁶ Ábati líchuguni jémpulu le joun, lariñaga.

—Ñíñein méja ában wügüri rísiti, ába líchugun lichári alúbajoúni buíti.

¹⁷ Ábati lariñagun rísiti le lúnguarügü. “¿Cábasán funa nadüga? Íbidiñeti nun jalíaba lan nareídei sun le nalúbajabei.” ¹⁸ Ába lasáminarun, ába lariñagun. “Subúdi náali cába lan nadüga, nagünrinchaguaru sun náni lágei líla nádü, ábame nadügün ámu weínamutimaatu, ábame nareíduni nalúbajan lúma sun le nómabei tídan. ¹⁹ Ábame ti nariñagun núniwagua. Buíti dan bun, níjein sarágu cátei areídañu búma lun sarágu dan, eméraaguabá, jóuba, gurába, gúndaabá.” ²⁰ Lariñaga Búngiu lun. “Wügüri deré tagáambun, bouwe árie bu le, sun le búmabei areídañu, ¿cábasan un lerédera?” ²¹ Ítara líña lasúseredun lun gürígia le adámuridaguagüdüti irísini lánina ubou le lúngua, ába leréderun gudémeñu lídan cátei le luáguti Búngiu, líña Jesúsu.

*Toúnigi lumútiña Búngiu lirájüñü
(Mt 6.25-34)*

²² Ába lariñagun Jesúsu joun láni disípulugu.

—Aríñagatina lubeíti jun. Madíjerida jumá luágu cába lan le lúnbei jeigini lun jawínwandun, ni tuágu anáanguni to lúnboun jadáürünun.

²³ Gebégitimaati íbágarí sügü láu eíginí, gebégi úgubu sügü táu anáanguni.

²⁴ Aríja jumá joun dunúru. mábunaguntiña, malúbajan, mágei ligía jeigin, láu sun líra, jóügüda lumútiña Búngiu. ¡Gebégitimaatün sügü jáu dunúru!

²⁵ Úati ni ában jádaangiñe gayáraati líchugun lánwoun libágarí láu sun

luweírín lidíjeri luágu. ²⁶ Ánjein lubeíti siñá lubei jadügüni le míbebei, ¿ca uágu jadíjerida luágu buri líbiri cátei?

²⁷ ‘Aríja jumá ída líña lan labouchun buri fulúri. mawádigimariti, májüchagun ligía lanáangun, áni láu sun líra, quei naríñaguni jun, ni urúei Salomón láu sun luwéndegun, mawéndedunti quei ában fulúri. ²⁸ Ánjeinti ítara líña lubei ladáüraguagüdüni Búngiu jíduru, le níjeinbei ugúñe, jarúga lagudúña, ¡ladáüraguagüdatimabadün, lougua tafíñen jugúya le! ²⁹ Madíjerida jumá lubeíti luágu ni cáta, ni luágu cába lan jeíga, ni luágu cába lan játa. ³⁰ Ladüga lirájüñü ubouú le, lárigiñanu buri cátei le, ánjein jugúya, níjein ában Júguchi le subúdíjabúbei lun sun jemegeirun. ³¹ Áluaja jumá lun jesériwidun lun furúmiñe, ábame líchuguni sun le jemegeirubei jun.

*Írísini siélu
(Mt 6.19-21)*

³² ‘Manúfude jumá, nirájüñü, láu sun míbe jumá, gúndaati Búngiu lun líchugun ában ubáraü jun lídan larúeijan. ³³ Alúgura jumeí le júmati, jíchigeime lebégi joun gudémetiña, láu líra, jadügüñoun lágei seínsu to maweíyadaditu, írísini siélu le magúmuchaditi, le ní lubei siñá lan jebélurun jíwerutiña anúgei jírisin, úa jagía jamútiri ní lun jeígini. ³⁴ Naríñagubalin le jun ladüga le ní lumuti jírisin, níñoun gíñe janígi.

Aráanseñu jumá, agúrabaja

³⁵ ‘Aráanseñu jumá lubá nagíribudun siélugiñe, durúngu jilámpun. ³⁶ Ítara jumá quei músu ja agúrabañubaña liábin jayúbudiri lídaangiñe ában maríei lun jadáraruni béna lubá, óra lagúarun. ³⁷ Buídubei dan joun músu ja ladárirubaña jayúbudiri agágudúña dan le lachülürün, ninárün jáu, iyúbudiri meme ligía laráanseruba, ábame lañúuragüdüniña luágu dábula, ábame lesériwiduni jeígin joun. ³⁸ Íbini amídi áriebu lan lachülüra o lubá lan larúgan, ánjaña ladárra agágudúña, buídubei dan joun músu jagía. ³⁹ Subúdi jumeí luágu lun lan jamúga subúdi láni tabúreme múna cába lan óra lachülüra jíweruti íweruja, leréderuña jamúga agágudúña, mígirunti jamúga lun tadárarün lúban lun líwerujoún lumégegün. ⁴⁰ Jugúya, aráanseñu jumá gíñe, ladüga lídaanme magáradajan jumá ligíame nagíribudun, áu le Wügüri Garaüwarügüti, ubouágun.

*Músu le úarabei, lúma le múaraanbei
(Mt 24.45-51)*

⁴¹ Ábati lálügüdüni Pédro Jesúsu, laríñaga lun.

—Nabúreme, ¿wouñrügü bíchigei jémpulu le ódi joun súngubei?

⁴² Laríñaga Wabúreme Jesúsu lun.

—Lun furúmieguarügü oúnigiruti úarati, gunfaráanda ligía, le lígirubei liyúbudiri lun laríjin jáu tílana lúban, lun leígagüdüniña lídan dan. ⁴³ Buídubei dan lun músu le ladárirubei liyúbudiri agúnfulira láu luwádigimari dan le lachülürün. ⁴⁴ Ninárün jáu, luágu líchugubei lan liyúbudiri lun ligía lan aríja láu sun le libíjubei. ⁴⁵ Ánjein arítagua músu ligía luágu lügili lan liábin liyúbudiri, ábame lagúmeserun oúseraña jíbiri músu ja lábugiñebaña laríajaan wuríba, leréderame eíga, áta, abácharuada, ⁴⁶ ligíame liábin liyúbudiri lídan magáradajan lan, lídan ában óra le íbídiñeti lun. Ábame líchuguni luweírín-ágei abeíchuni luágu, lasíadireime lun lasúfuriruni le jasúfurirubei ja múaraanbaña, máfiougati.

47 ‘Músu le subúdíjabúbei lun ca lan labúseerubei liyúbudiri áni maráanserunti, mabájüdüñleí, labeichúba sarágu. 48 Ánjeinti músu le ibídiñeti lun, ába ladügün cátei lé buri lúnti labeichún lueígiñe, maweíribei labeichún. Le únti líchugúa gíbeti, gíbebei amúriajoúti lúmagiñe, le gíbeti ígirúti lábugiñe laríajaan, gíbetimaabei amúriajoúti lúmagiñe.

Jesúsu lébunabei fánreinguaü

(Mt 10.34-36)

49 ‘Láu niábin ubouágun, ñíbei fánreinguaü ubouágu queísi wátu geméti. ¡Busénjadina jamúga durúnguaali lan wátu ligía! 50 Lúnti nasúfurirun le gumúti, ¡meménija nanígi lagúmuchun! 51 ¡Jarítaguatünsan luágu barü nán meja darángilaü númagua dan le niábinbei ubouágun? Manügütina darángilaü, fánreinguaü nanügübei. Jafánreinraguba ja mafíñebaña nuágu jáma ja afíñebaña nuágu, 52 lúmagiñe guetó, seíngügua tídan ában múna, jafánreinraguba úrúwa jaweí biáma, biáma jaweí úrúwa, nueígiñe. 53 Lagáraguba úguchili luágun liraü, isáni luágun úguchili, úguchuru tuágun tiraü, isáni tuágun túguchu, ímenidi tuágun ágürü, ágürü tuágun ímenidi.

Liseíni buri dan

(Mt 16.1-4; Mr 8.11-13)

54 Aríñagati giñe Jesúsu joun güri-gia ítara.

—Dan le jaríjin labúrigadun siélu, ába jaríñagun luágu lájuya lan júya, áni ligía asúsereda. 55 Dánti le láfurun garábali lueígiñe suédi, ába jaríñagun luágu lárougada lan, áni ligía asúsereda. 56 ¡Biángua tigíbu jugúya le! Subúdi jumúti luáguti ligáburi lasáansiragun dan siélu lúma múarugu, ¿ca uágu ibídiñe lubei luáguti ligáburi dan le gádaanbalün jun?

Jóucha jumá lun lídan jumá dan jáma jáganiñü

(Mt 5.25-26)

57 ‘¿Ca uágu siñá lubei jasúbudiruni cátei le úraguabei júngua? 58 Ánjein agúragüda ában güri-gia buágu, ába bídin lúma ligíbugiñe lúrudu, jóuchabá baráanseragun búngua lúma luágu úma lubáragiñe jachülürün, manügün lámugabu ligíbugiñoun agúseragüdüti, lueí ledéregerunibu agúseragüdüti lun polisía, ábame ládarunibu furísunrugun. 59 Naríñajare bun luágu máfuridunbadibu lan ñígiñe darí bafáyeiruni lagúmujoún bigáwanün.

13

Ca lan uágu lúnti lubei lasáansirún igáburi

1 Lídoun méja dan ligía, ába jayábin güri-gia abájüdagua lun Jesúsu jawágu wügüríña Galiléana ja láfaragubaña Piláto úara jáma anímaalu ja áfarawagúbaña lun adágaragüdüni lun Búngiu. 2 Ába laríñagun Jesúsu joun.

—¿Jarítaguatünsan luágu ladüga lan luweírin jafígoun Galiléana jagía sügü jáu ja jíbiri lílana jageíra lasúseredunbei le joun? 3 Máma lueígiñe líra, láu sun líra, naríñajare jun luágu ánjein lan masáansirun jumá jigáburi, jóüweguba giñe sun jugúya. 4 Ángi díisi-wídü jagüra ja ouwegubaña dan le láburujanbei wáyelesi le Siloébei jawágun— ¿jarítaguatün luágu weíritima lan jadúnrun sügü jáu ja jíbiri ja aganoubaña Jerusalén? 5 Máma líña giñe, láu sun líra, naríñajare jun luágu ánjein lan masáansirun jumá jigáburi, jóüweguba giñe sun jugúya.

Jémpulu tuáguti tídibu ígo to mínboun

⁶ Ábati labájüdaguni Jesúsu jémpulu le joun, lariñaga.

—Ñiñein ában wügüri, ganádiriti ában tídibu wéwe to ígo, ába lídin aríja ánjein gín tubei, madáriti ni cáta tuágu. ⁷ Ábati lariñagun lun le oúnigirubalin ichári. “Aríjabásan, ürüwaali irúmu gabügürügua niábin áluaja ígo tuágu ídibu to, madáritina. Chaúnboun, ¿cába uágu terédera ñi luágu ni cáta?” ⁸ Ába louñabuni le oúnigirubalin ichári, ába lariñagun. “Niyúbudiri, ígirayaboún irúmu le, nañúludagüdali múa táu, awoúja áume táu. ⁹ Fágua tagíindun ítara, ánjoun magíindun, ábame tánychugún.”

Lareídaguagüdünnun Jesúsu ában würi sebúti tanágan lídan wéyu le eméraguagülei

¹⁰ Luágu ában wéyu le eméraguagülei, ñiñein Jesúsu arúfudaja tídan jalígílisin juríu, ¹¹ ñiñounti ában würi, díisi-wídü irúmu táu láu ában espíritu wuríbati tuágu, ígira láaru espíritu ligía lemúñu, siñá tásururun ni murúsun. ¹² Dan le lariñinbarun Jesúsu, ába lagúarun tun, ába lariñaga tun.

—Würi, areídaguaadibu.

¹³ Ábati líchuguni lújabu tuágu, lídan óra ligía ába tásururun, ába tagúmeserun adímureja buíti luágu Búngiu. ¹⁴ Ábati lagáñidun tábuti ligílisi ladüga lareídaguagüdünnun Jesúsu lídan wéyu le eméraguagülei, ába lariñagun joun gürígia ja ñibaña.

—Níjein sísi wéyu lídan dimáasu lun gayára lan luwádigimaríniwa, lídan sísi wéyu ligía lun jiábin lun lagáranijoún jun, máma lídan wéyu le eméraguagülei.

¹⁵ Ába lariñagun Wabúreme Jesúsu lun.

—¿Bíangua tigíbu jugúya le!, ¿ma farára jumúti sun jugúya jilügün bágasu o jilügün lan burígü lun janügün áta dúna lídan wéyu le eméraguagülei? ¹⁶ Würi to, linébaanfan Abrahám, ragúlaaru Máfia láu sándi, díisi-wídü irúmu táu láu, ¿moún lumuti funági yebe lun tareídawaguagüdünnun lídan wéyu le eméraguagülei?

¹⁷ Dan le lariñagunbalin Jesúsu cátei le, ába nibúsigarigua jamá sun láganiñu, ánjaña sun jíbiri gürígia, gúndaatiña láu cátei lé buri weíriguti le ladügübei Jesúsu.

Jémpulu luáguti tíla mostása
(Mt 13.31-32; Mr 4.30-32)

¹⁸ Ábati lariñagun Jesúsu.

—¿Ída líña ligáburu larúeijan Búngiu? ¿ca cátei úmounbei gayára lan níchuguni? ¹⁹ Ítara líña quei ában liraüraü tíla mostása le lábunubei ában wügüri lichárirugu, ába laboúchun, ába laweíridun darí lun liábin lun ábanme lan tídibu wéwe weíriti, darí lun jadügün dunúru jádibu luágu tuburébu.

Jémpulu luáguti ísi
(Mt 13.33)

²⁰ Ábaya lariñagun Jesúsu.

—¿Ca cátei úmounbei gayára lan níchuguni larúeijan Búngiu? ²¹ Ítara líña quei ísi le tíchugubei ában würi tídoun ürüwa líburu fulúaar, ába terésirun súngubei.

Béna le bürüraübei
(Mt 7.13-14, 21-23)

22 Ába lasígiruni Jesúsu luweiyasun Jerusaléoun, arúfudajeina ligía lídan buri sun aüdü lúma lirájüñü fulásu le idaangiñebei lásügüra. 23 Ába laríñagun ában wügüri lun Jesúsu.

—Nabúreme, míbetiñásan ja lúnbaña jasálbarun?

Ába loúnabun Jesúsu, ába laríñagun.

24 —Bürüraüti lubéneri siélu, jóucha jumá lun gayáraabei lan jebélurun lídaangiñe, ladüga quei naríñaguni jun, sarágujaba busúentiña jebélurun, siñábei. 25 Lárigiñe ladáuruni tabúreme múna lubéneri, jugúya le bougudibei jadaúnjaba luágu béna, jaríñagame. “Wabúreme, darába béna wabá.” Ábame loúnabunün, laríñagame jun. “Ibídiñetün nun, ibídiñe giñe nun jalána jumá.” 26 Ábameti jagúmeserun aríñaga. “Jóujadiwa, gurá wagía búma, arúfudaja amürü woun úmadarugu.” 27 Ábameti loúnabunün, laríñagame. “Aríñaga náali jun luágu ibídiñe jumá nun, ibídiñe nun jalána jumá. Díse jumá nueí, sun jugúya le adügübei wuríbani.” 28 Ligíaba jayájuajan, acünrijame jári dánme jaríjini Abrahám, Isáac, lúma Jacób, jáma jíbiri profétagu lídan larúeijan Búngiu, jugúyame aságarúa bougudin. 29 Jayábiba gürígia lueígiñe oúbaü le ñígiñe lubei láfuara wéyu lúma lueígiñe le ñígiñe lubei lálüda, lueígiñe núru lúma lueígiñe suédi lun jañúurun eíga lídan larúeijan Búngiu. 30 Ñíbañati jádaangiñe ja agúmujoúnibaña guetó, jagíaba furúmiñetiña, jámeti furúmiñetiña guetó, jagíaba agúmujoúni.

*Layájun Jesúsu jawágu lílana Jerusalén
(Mt 23.37-39)*

31 Lídan méme wéyu ligía, ába jayábin fariséogu, ába jaríñagun lun Jesúsu. —Beíba yágiñe, ladüga buséti Heródes láfarunibu jilágubei.

32 Ába laríñagun joun.

—Jeíba, jaríñagame lun wügüri bíbuti ligía. “Ugúñe lúma jarúga naságajan espíritugu wuríbatiña jádaangiñe gürígia, areídaguagüda áu sánditiña, lárigiñe jarúga, lásurun nuwádigimari. 33 Lúnti nasígiruni nuweiyasun ugúñe, jarúga, lúma lárigiñe jarúga, ladüga máma lúnti lafarúniwa ában proféta jilágubei bougudi lueí Jerusalén.

34 Ába layájun Jesúsu jawágu lílana Jerusalén ítara.

—¡O jugúya Jerusalénna! Áfaragua jumáaña profétagu, chügua jugúya dübü jawágun ja loúnajabaña Búngiu láu ugánu buíti jun! ¡Sarágu weíyaasu nálugun natoúnigirunün quei tatoúnigiruniña gáyu tirájüñü lábugiñe tarüna, májatün! 35 Ígira láadün Búngiu, áni naríñajare jun luágu maríjindügüya jumáadina lan daríme lachülürün dan lun jaríñagun. “Biníwati le ñúbinbei lídan líri Wabúreme.”

14

Lareídaguagüdün Jesúsu ában wügüri lújali larüna lúma liyáda

1 Luágu ában wéyu le eméraguagülei, ába lídin Jesúsu eíga lúbiñe ában fariséo weíriguti, sun ja ñíbaña, jaríaguñein Jesúsu. 2 Ñíñein giñe ában wügüri láu sándi le ílu, 3 ábati lálügüdüniña Jesúsu arúfudajatiña lilúruden Moisés jáma fariséogu, laríñaga joun.

—¿Gayáraati lareídawaguagüdün ában wügüri lídan wéyu le eméraguagülei ódi siñáti?

4 Ába jeréderun maníñu. Ábati lanügüni Jesúsu sánditi ligía, ába lareídaguagüdüni, ába laríñagun lun lun lídin. 5 Ába laríñagun joun fariséogu.

—Furúmiegurügü jídaangiñe, ánjein eíguada lilügün bágasu o lilügün lan burígü lídoun ában wélu lídan wéyu le eméraaguagülei, laságarubei ñígiñe furése.

6 Maríñagun jáña ni cáta.

Ja amísurajoúbaña lídoun maríei

7 Dan le laríjini Jesúsu janúadajani amísurajoútiña ubáraü buri le jounbei ja weírígubaña, ába laríñagun joun.

8 —Dánme le bamísurajoún lídoun ában fédu lánina maríei, máluajabeí lubuídun-ágei ubáraü, ñübin liñeín ábanya amísurajoúti weírigitimáati bueí, 9 ábame liábin le amísurajabalün, laríñagame bun. “Rúbei bubára lun wügüri le.” Ábamei bídin láu busíganu añúura lídan lünabun-ágei ubáraü. 10 Dánme le bamísurajoún lídoun ában fédu, ñurúba lídan lünabun-ágei ubáraü, lun dánme lan le liábin le amísurajabalibu, laríñagame bun. “Numáda, sügüba lídoun ában ubáraü weírigitimaati.” Ítara lúba berésibirun inébesei jagíbugiñe sun ja ñünbaña luágu dábula. 11 Le anáanguti lúngua weíri, lünabudúba, le ünabuti lanáangun lúngua, weírubei lanügün.

12 Aríñagati giñe lun wügüri le amísurajabalín.

—Dánme le bíchugun ában adíneruni o fédu, mamísuraja báña bumádagu, ni bamúleni, ni bíbugañanu, ni jíbiri bídújeñu, ni bubésinanigu ja rísitiña, ladüga jamísurajabadibu gíñe, bíbíjubati bafáyeiruaja. 13 Dánme le badügün fédu, amísuraja báña gudémetiña, siñáguatiña úngua, danímaatiña, maríjintiña. 14 Ábame gúnda ban, ladüga siñáti jafáyeirunibu, bíbíjubeiti bafáyeiruaja lídaanme le jásaarun ja richáguabaña ligíbugiñe Búngiu lídaangiñe ouweni.

Jémpulu luáguti ouñwenbun adíneruni

15 Dan le lagáambunbalín ában jádaangiñe ja ñünbaña luágu dábula cátei le, ába laríñagun lun Jesúsu.

—Gúndaabaña gürígia ja eígibaña lídan larúeijan Búngiu.

16 Ábati laríñagun Jesúsu lun.

—Ñíñein ában wügüri, íchuguti ában ouñwenbun adíneruni, ába louñajan amísuraja sarágu gürígia. 17 Óra lun adíneruni, aba louñajani lumúsun aríñaga joun amísurajoútiña. “Queímoun, aráanseeli sun cátei.” 18 Súngubei, ába jaríñagun luágu siñá lan jóudin. Laríñaga furúmiñeti. “Sun líña nagáñijan ában fulásu, mósu nídin aríjei, ferúduna bána, siñáti nídin.” 19 Laríñaga ában. “Agáñijaadina seíngü féru bágasu lánina wadágimanu, neíbuga ouchaña, adügabá fuleísei nun, ferúduna bána, siñáti nídin.” 20 Laríñagaya ában. “Sun líña namárieidun, ligía siñá lubei nídin.” 21 Dan le lagíribudun músu, ába labájúdaguni sun cátei le lun liyúbudiri. Ábati lagáñidun liyúbudiri, ába laríñagun lun músu. “Beíba lídan sun úma le ubúrugubei, banúgañame gudémetiña, siñáguatiña úngua, danímaatiña, jáma maríjintiña.” 22 Lárigiñe ladügüni, ába laríñagun músu lun liyúbudiri. “Nabúreme, adüga náali le bubeíbei nun, níjein mémegua ubáraü.” 23 Ábati laríñagun iyúbudiri lun músu ligía. “Beíba lídan sun úma bougudín lueí ubúrugu, lúma sun fulásu geyéguá láu, ábame bafósuruníña sun ja badárirun lun jayábin lídoun nufédun, buín támuga núban. 24 Ladüga naríñajare

jun luágu úabei lan ni ában jádaangiñe ja namísurajabaña eígiti lídan nadíneragüdün.”

Lúnti lígirúniwa sun cátei lun lánibei lan Crístu

²⁵ Sarágu jáña gürígia afálaruti Jesúsu, ába lagáraragun, ába laríñagun joun.

²⁶ —Siñáti nánigubei lan le jínsiñejabutimaati lun lúguchi, o lúguchu, o lúmari, o lisáanigu, o líbugañanu jáma lamúleno, o lítunu, o libágari guánarügü, sügü náu. ²⁷ Le gíñe májabei lasúfurirun nueígiñe queísigubeirügü jamúga ában wügüri le anügüti lugúruwan, siñáti náni lan disípulo. ²⁸ Ánjein arítagua ában jádaangiñe ladügün ában wáyelesi, ¿ma funági lañúuruba furúmiñe asáminara átiribei lan lagástarun lun laríjini ánjein gabáfu lubei lun lagúmuchi? ²⁹ Ladüga ánjein líchiga ébuu, lárigiñeme lásiñerei wadágimanu agúmucha, jéjerajaba ja aríjubalin láu, ³⁰ jaríñagame. “Guméseti wügüri le ában wadágimanu, siñá lumuti agúmucha.” ³¹ Ánjein lawúribuja lubei ában urúei lúma ámu urúei, ¿ma funági ñurúti furúmiñe lun lasáminarun ánjein gayáraabei lubei lageíndagun jáu díisi mílu súdaara lúma le jáubei wein mílu? ³² Ánjeinti arítagua luágu siñábei lan, dánme le dísegili le ában urúei, ábame loúnajan aríñaga lun lun mawúribujan jamá, lun jebélurun lídoun idíli. ³³ Ítara líña lubeíti, furúmiegurügü jádaangiñe le mígirunti sun le lúmabei lun lafálarunina, siñáti nánibei lan disípulo.

Dan le leféridiruni sálu lubásuan

(Mt 5.13; Mr 9.50)

³⁴ Buíti sálu, ánjein leféridira lubásuan, ¿cábago un ju lan? ³⁵ Mabuídunjali ni lun lábunawagún nádü lídan, ni lun lidérebogu múa, fíwarügaalime. Agáamba jumána, jugúya le garígeirugubei lun jagáambun.

15

Jémpulu tuáguti mudún to eféridiruboun

(Mt 18.10-14)

¹ Luágu ában wéyu, ába jayárafadun sarágu agúburajatiña liseínsuna gumádi jáma gafígountiña lun Jesúsu lun jagáambuni. ² Ába jadímurejan fariséogu jáma arúfudajatiña lilúrudun Moisés luágu Jesúsu lueígiñe cátei le, jaríñaga.

—Wügüri le, resíbi lumútiña gafígountiña, jou ligía jáma.

³ Ábati líchuguni Jesúsu jémpulu le joun, laríñaga.

⁴ —¿Ca jádaangiñe, lun jamúga galügüniña lan san mudún, leféridira ában jádaangiñe, mígirun lubáña gádürü-wein-díisi-néfu ñi, lubárua, lun lídin áluajoun mudún to eféridiruboun? ⁵ Dan le ladárirunun, ába lanügünun légewagu láu ugúndani. ⁶ Dan le lachúlürün lúbiñoun, ába loúndaruniña lumádagu jáma lubésinanigu, laríñaga joun. “Gúnda jumá úara núma, ladüga darína nilügün mudún tó yebe eféridiruboun nueí.” ⁷ Naríñajare jun luágu ítara méme líña weíritima lan ugúndani siélu luágu ában gafígounti le asáansiruti luríban ligáburu lun lafálaruni Búngiu, sügü láu jawágu gádürü-wein-díisi-néfu gürígia richágutiña ligíbugiñe Búngiu ja memégeirunbaña jasáansiruni jagáburu.

Jémpulu luáguti seínsu le eféridirubei

⁸ ‘¿Ca würi to níjeinti jamúga díisi murúsun seínsu túma, leféridira ában lídaangiñe tueí, lun mébedun tan lámpu, ába tabuídajanun múna áluajei buídu darí lun tadáriruni?’ ⁹ Dan le tadáriruni, ába toundaruniña tumádagu jáma tubésinanigu, tariñaga joun. “Gúnda jumá núma, ladüga darina seínsu lé yebe neféridirubei.” ¹⁰ Naríñajare jun luágu ítara líña lan giñe ugúndani jádan láni Búngiu ánjeligu luágu ában gafígounti le asáansiraguti luríban ligáburu lun lafálaruni Búngiu.

Jémpulu luáguti irájü le acháragadubei

¹¹ Rúlumuti giñe Jesúsu jémpulu le joun, lariñaga.

—Ñiñein méja ában wügüri jáu bián lirájüñü. ¹² Ába lariñagun le amúleñein lun lúguchi. “Núguchi, rúbei alágan le yúbei nun nun guetó.” Ába lafánreinjani úguchili alágan jádan biángubei. ¹³ Málüti lueigiñe, ába loundaruni amúleñein sun lumégegún, ába lídin díse lídoun ámu fulásu, ába lagástaruni liseínsun ñi lídan ában ibágari mabuídunti. ¹⁴ Dan le gumújali sun liseínsun, ába ladágarun ában lemégeirun eígini lídan fulásu ligía, ába ladáiragun lúngua lídan ában ouñwenbun mégei. ¹⁵ Ábati lídin áluaja wadágimanu lúma ában lílana fulásu ligía, ába louñajani wügüri ligía ouñigiraña lilügüniña büüruju. ¹⁶ Weíríti liláma darí lun lawámadun lun lun leígini jeigin büüruju, míchugúnwati lun. ¹⁷ Ábati lasáminarun, lariñaga lúnguarügü. “¡Sarágu ñadágimeintiña lúbiñe núguchi ígiraguati eígini joun, áu ya, ouwe niláma! ¹⁸ Nagribuda le ñijin lubeí núguchi, nariñagame lun. Núguchi, afigounjaadina ligíbugiñe Búngiu lúma bigíbugiñe. ¹⁹ Madúnaali lun nanáangun núngua quei biraü, barúbana quei ában jádaangiñe ñadágimeintiña búma.” ²⁰ Ába lárügüdün üma lun lagribudun lúbiñoun lúguchi.

‘Dísegi líña, ába larijini úguchili irájü le, ába lagúdemedun lun. Ába leíbaagun lubároun, ába louburuni, ába lachúuruni. ²¹ Ábati lariñagun isáani lun. “Núguchi, afigounjaadina ligíbugiñe Búngiu lúma bigíbugiñe, madúnaali lun nanáangun núngua quei biraü.” ²² Ába lariñagun úguchili joun lumúsuníña. “Sagájumoun tubuídun-ágei anáanguni furése, daüguagüda jumeí. Daújuma giñe ában hágü luágu lújabu túma geídi luágu lugúdi. ²³ Áfara jumeí liraúraü bágasu le dibúnetimaabei. ¡Weíga, eféduja wagíamel, ²⁴ ladüga niraü le, rúnaali yebe quei jiláali áni chülúguaya, féridijalí yebe áni daríwama.” Ába jagúmeserun eféduja.

²⁵ ‘Súnti buga dan le, níjeinti buga íbugañaü áraabu. Dánti le lagribudun, dan le lachülürün tubádun múna, ába lagáambuni áfaruni lúma abínajani. ²⁶ Ábati lagúarun lun ában jádaangiñe músu, ába lálügüduni ca lan susérebei. ²⁷ Ába lariñagun lun. “Chülújali bamúlen, áfaragüdalá búguchi liraúraü bágasu le dibúnetimaabei, ladüga lachülürün láu magádiei.” ²⁸ Ába lagáñidun íbugañaü, májaali lebélorun. Ába láfuridun lúguchi, ába layúmragun lun lun lebélorun. ²⁹ Ába lariñagun lun lúguchi. “Subúdi bumúti luágu seríwjadina lan bun sarágu dan, madúraagunganeí le bubeíbei ní ában weíyaasu, míchugidibu ní ában liraúraü gábara nun lun nefédujan jáma numádagu. ³⁰ Guetóti, láu liábin biraü le, le achágarubalin biseínsun jáma würiña wuríbatíña, jáfaragüdabá bágasu le dibúnetimaabei!” ³¹ Ábati lariñagun úguchili lun. “Niraü, amürü númañadibu súnwandan, sun le náni, báni. ³² Ánjein guetó, lúnti wadügün fédu lúma lun wagúndaarun

ladüga bamúlen lé yebe rúwamaalíbei quei jiláali, chülüguaya, féridijalí yebe, áni daríwama.”

16

Jémpulu luáguti óúnigiruti le múaraanbei

¹ Aríñagati gíñe Jesúsu joun láni disípulugu.

—Ñíñein méja ában iyúbudiri rísiti, ñíñein gíñe ában loúniri lumégeggun, ába jayábin aríñaga lun luágu lachágaruñein lan óúnigiruti ligía lirísini. ² Ábati lagúarun iyúbudiri lun, ába laríñagun lun. “Ída liñásan cátei le, le aríñawagúbei nun buágu? Rúba fe nun luágu buwádigimari, ladüga masígijadibu óúnigirei nílagu.” ³ Ábati leréderun óúnigiruti ligía asáminara, laríñaga lúnguarügü. “¿Cábatí nadüga guetó lárigiñe gidála lan niyúbudiri wadágimanu nuei? Méretina lun nadügün wadágimanu jürüti, áni nibúsigaritina lun namúriaajan. ⁴ Subúdi náali cába lan nadüga lun ní jama erésibirutina jábiñe dánme mawádigimarijadina.” ⁵ Ába loúnajan jawágu ja adúweirubalin liyúbudiri lun jayábin lun ában ában. Ába lálügüdüni le furúmiñeti, laríñaga lun. “¿Átiri badúweiruni niyúbudiri?” ⁶ Ába laríñagun lun. “Dúwei numúti san barín agülei.” Ábati laríñagun óúnigiruti ligía lun. “Nuján bigáradan, ñurúba furése, badügame ában luágurügü dimísan.” ⁷ Lárigiñe, ábaya lálügüdün ában, laríñaga lun. “Ángi amürü, ¿átiri badúweijan?” Laríñaga lun. “San ságü türígu.” Laríñagati lun. “Nuján bigáradan, adügabá ában luágurügü gádürü-wein.” ⁸ Ába lasúbudiruni iyúbudiri luágu chu lan láu óúnigiruti ligía lídan ligáburí ladügüni cátei.

Ligía laríñagun Jesúsu.

—Gürígia wuríbatíña ja lánina ubou le, chúti jáu lídan jáni jáma ámu sügü jáu ja lánina larúgounga, ja lirájüñü Búngiu. ⁹ Siñátí leménigidún luágu irísini lánina ubou le, aríñagatina lubeíti jun lun jayúsuruni jírísini lun jadügün buíti, lun dánme lan le lagúmuchun jibágari, jerésibirúba tídan múna to magúmuchaditu, yágüta siélu.

¹⁰ Le adügüti buíti láu le murúsunrügüti, ladügüba gíñe buíti láu le gíbeti, le madügünti buíti láu le murúsunrügüti, madügünbei gíñe buíti láu le gíbeti. ¹¹ Ánjaün lubeíti madügün buíti láu buri irísini le láni ubou le, le uágubei siñá lan leménigidún, ¿cábagi afíñera juágu lun ledéregerun irísini inárüñiti lábugiñe jaríaaajan? ¹² Ánjaünti madügün buíti láu jemégen ámu, ¿cábagi íchigei le jáni guánarügü jun?

¹³ Siñátí lesériwidun ában gürígia joun bián iyúbudirigu, ladüga liyéreeguduba ában lun, línsiñedame le ában lun, o úarabei lan lun ában, lanügeime le ában quei ni cáta. Siñátí lesériwidúniwa lun Búngiu lúma lun seínsu.

¹⁴ Agáambagu jáña fariséogu lun sun cátei le, ába jéjerajan láu Jesúsu, ladüga jínsiñe lan seínsu joun. ¹⁵ Ábati laríñagun Jesúsu joun.

—Jugúya gürígia ja arúfudagubaña jóungua quei buítiña jagíbugiñe gürígia, ánjeinti Búngiu, subúdi lumútu janígi luágu wuríba tan. Le cátei le janügübei gürígia quei weíríti cátei, iyéreeguti lun Búngiu.

Lúrudu lúma larúeijan Búngiu

¹⁶ Níjein meja lilúrudun Moisés lúma jarúfudajan profétagu darí lúmoun lidáani Juan. Lúmagiñe dan ligía, lapúrichijoún ugánu buíti le luáguti larúeijan Búngiu, sun gürígia jóúchatiña lun jebélurun lídoun.

17 ‘Méreenguntimaati lun lagúmuchagun siélu lúma ubou, máma lun magúnfulirun lan liñúraü-ágei dimúrei lídaangiñe lilúrudun Búngiu.

*Larúfudajan Jesúsu luágu ígiraguni
(Mt 19.1-12; Mr 10.1-12)*

18 ‘Ánjoun lígira ában wügüri lúmari, lagámarida ámu, ladügüñein figou le gírubei adultériu, le giñe agámariduti ában würi to ígiraguaaru, ladügüña giñe adultériu.

Wügüri le rísibeí, lúma Lázaro

19 Aríñagati giñe Jesúsu.

—Ñiñein méja ában wügüri rísiti, anáanguni finutu to wéndegutu ladáuraguboun, ságüja wéyu ladáagun fédu láu sarágu wéndegu. 20 Ñiñein giñe ában gudémeti gíríti Lázaro, sun lúra láu gumeín, 21 lañúurati buri múarugu tubéneri lúban rísiti ligía áluga leígini life eígini le eíguaduti lueígiñe lidábulan rísiti. Weíríti lasúfurirun darí lun lawánduni jayábin oúnli éjelujei lugúmeín. 22 Luágu ában wéyu, ába louñwen fugiábu ligía, ába janügüni ánjeligu lúmoun Abrahám, le ñíjin jabeí jiláaña buítiña, ába giñe louñwen rísiti, ába lábunajoún. 23 Dan le lasúfuriruña lan rísiti ligía lídan fulásu le ñíjin jabeí jiláaña wuríbatiña, ába liñúruni laríjin, ában laríjini Abrahám dísegiñe, láu Lázaro lúma. 24 Ábati lagúaragun, laríñaga. “¡Núguchi Abrahám, gudémená bun! Oúnajabeí Lázaro lun ladüdüragüdüni ligíbu lújabu láu dúna, ñübin lámuga éderei tuágu niñéñe, ladüga nasúfuriruña sarágu lídan wátu geméti le.” 25 Ába laríñagun Abrahám lun. “Niraü, jarítaguabá luágu buídu lán meja dan bun lídan bibágari, ánjein lun Lázaro, wuríbati meja dan. Guetó, buíti dan lun ya, bugúya asúfurira. 26 Bougudigiñe lueí sun le, níjein ában baráangu afánreinraguáwa júma, ja jamúga buséñiña jóudin yágiñe lun ñíjin, siñáti, ni ja ñíbaña, siñáti jayábin ñájoun.” 27 Ábati laríñagun rísiti. “Amúriajatina búma, Núguchi Abrahám, lun bouñajani Lázaro lúbiñe núguchi, 28 añájein seíngü namúlenu ñi, lun ladímurejan joun, mayábin jamámuga giñe lídoun fulásu lánina asúfuriruni le.” 29 Ába laríñagun Abrahám lun. “Níjein le labürüjabeí Moisés jáma profétagu jáma ñi, jadüga jamá gásu láu!” 30 Ába louñabun rísiti, ába laríñagun. “Binárün, núguchi Abrahám, láu sun líra, ánjein ñüdüñ ában jádaangiñe jiláaña adímureja joun, lasáansiraguba jagáburi.” 31 Laríñaga Abrahám lun. “Ánjein mája jabeí jadügün gásu láu le laríñagubei Moisés jáma profétagu, maffñebaña giñe láu sun lásaarun ában jádaangiñe jiláaña lun lídin adímureja joun.”

17

*Luríban lafigoungüdüniwa ában gürígia
(Mt 18.6-7, 21-22; Mr 9.42)*

1 Ába laríñagun Jesúsu joun lani disípulugu.

—Súnwandan níjeinbei lán buri cátei afigougüdüti gürígia, jáni fugiábu gürígia le afigougüdüti ámu! 2 Buítimaati jamúga lun lun lagurún baránajoun láu ában dübü le lamúlja awási güráñu luágu ligína sügü láu lafigoungüdüñ ában jádaangiñe ja ñübürigiñabaña lídan jafiñen nuágu. 3 Ítara líña lubeíti toúnigi jumá.

‘Ánjein adüga bamúlen o bíbugaña wuríbani bun, wéridibeí, ánjein asáansiragua ligáburi, ferúdunabeí, 4 ánjein adüga wuríbani bun sédü

weíyaasu lídan ában wéyu, sédü weíyaasu liábin aríñaga bun luágu madügündügüya láali lan, lúnti ferúduna báni.

Lubáfu afíñeni

⁵ Ába jaríñagun apóstolugu lun Jesúsu.

—Wabúreme, rúba lánwoun wafíñen.

⁶ Ábati laríñagun Wabúreme Jesúsu joun.

—Lun jamúga níjein lan murúsuraü afíñeni jídan—gayáraati jamúga ñúraüraü lan queísi ában tíla mostása—gayáraati jamúga jaríñagun tun tídibu wéwe to. “Gidába yágiñe láu sun bílagüle, beíba ájücha baránaja”, áni lasúsereduña jamúga.

Wesériwidun lun Búngiu máma ában cátei lun lateíngiruníwa luágu

⁷ ‘Ánjein níjein lubeí lumúsun ában jídaangiñe, dan le lagíribudun áraabugiñe lárigiñe lawoujan o loúnigirun lan anímaalu, ¿laríñaguba funági lun músu ligía. “Belúba, ñurúba eíga”? ⁸ Uá, aríñagarügübei lun. “Aráansebeí neígin, aráanseñu amürüme lun beténirun nun sun anája lan eíga lúma áta, lárigiñeme, gayárajalíme beígin lúma bátun.” ⁹ ¿Teínqui lumúti funági iyúbudiri músu luágu ladügüni le lubeíbei lun? Uá. ¹⁰ Jugúya giñéti, dánme lásurun jadügüni le uágubei laríñaga Búngiu jun lun jadügüni, lúnti jaríñagun. “Músu mouñtiña wagía, ladüga lé rügüñein lúnbei wadügüni wadüga.”

Lareídaguagüdüni Jesúsu díisi gawáguñiña gumeín

¹¹ Lídan lasígiruni Jesúsu luweíyasun Jerusaléoun, ába lásügürün labádinaguagiñe Samária lúma Galiléa. ¹² Dan le lachülürünbei lídan ában liraüraü fulásu, ába jayábin díisi wügüriña gawáguñiña gumeín, lubároun. Ába jeréderun díse lueí, ¹³ ába jagúaragun lun ítara.

—¡Jesúsu, Maésturu, gudéme wamá bun!

¹⁴ Dan le laríñagun Jesúsu, ába laríñagun joun.

—Jeíba arúfudagua júngua joun fádirigu.

Dánti le ídirina jamá, ába jareídagun. ¹⁵ Níñeinti ában jádaangiñe, dan le laríñinbei luágu areídaguuaali lan, ába lagíribudun le ñíjin lubeí Jesúsu, adímurejeina buíti luágu Búngiu láu umálali jéreti. ¹⁶ Ába lájuduragun dagá ligíbu múarugu lun líchuguni eteíngiruni lun. Áni Samariána wügüri ligía. ¹⁷ Ábati laríñagun Jesúsu.

—¿Ma díisiñanu areídaguñiña? ¿Jagáñagi ja jíbiri néfu? ¹⁸ ¿Niján gubeírügü teréncha le agíribuda eteíngirei Búngiu?

¹⁹ Ábati laríñagun lun wügüri ligía.

—Sarába, beíba, areídaguadibu ladüga bafíñen.

Ída lúba lan ligáburu liábin larúeijan Búngiu

(Mt 24.23-28, 36-41)

²⁰ Ába jálügüdüni fariséogu Jesúsu ídaba lan lagúmesera larúeijan Búngiu, ába laríñagun joun.

—Dánme le lagúmeserun larúeijan Búngiu, maríñinbei, ²¹ maríñawagúnbei. “Niján”, o “Níngitan”, ladüga lídan linárün cátei, níjeinjali larúeijan Búngiu jagánagua.

²² Ábati laríñagun joun láni disípulugu.

—Lachülürüba dan lun meménija lánme janígi lun júmabadina lan, íbini luágurügü ában wéyu, masúseredunbei lídan dan ligía. ²³ Laríñawagúba

jun. “Niján Cristu ya”, o “Níngitan yágüta.” Iyéenibei, mídin jumá járigi, mafálarun jumáñame. ²⁴ Ladüga ítara quei laríjin ában labírijaníga lueígiñe ában loúba siélu lun luágun le ában, ítara lúba dánme le nagíribudun ubouágun, áu le Wügüri Garaüwarügüti. ²⁵ Lúnti nasúfurirun sarágu furúmiñe, mebéresen jagíame güriquia ja lánina dan le náu. ²⁶ Quei meja lasúseredun lídan lidáani Noé, ítara lúba gíñe lasúseredun lídan búrime wéyu le niábingüle, áu le Wügüri Garaüwarügüti. ²⁷ Dán meja ligía, jerédera meja güriquia eíga, áta, agámarida, íchaajaña jarájüñü lun jamárieidun darí wéyu le lebélorun Noé tídoun ugúnein to árcá. Ába liábin gúnran, ába jañáradagun súngebui. ²⁸ Ítara lúba gíñe quei lasúseredun lídan lidáani Lot. jerédera güriquia eíga, áta, agáñija, alúguraja, ábunagua, adáagua múna. ²⁹ Dan le láfuridunbei Lot ubúrugugiñe Sodóma, ába lábujurjan wátu geméti lúma sáfuru siélugiñe, ába láfaraguniña súngebui. ³⁰ Ítara lúba dánme le niábin, áu le Wügüri Garaüwarügüti.

³¹ ‘Lídaanme wéyu ligía, le güriquia le bougudibei tueí lúban, ánjein níjein lubei lumégeggun múnada, mebéluralá aságarei. Le güriquia le áraabubei lídan óra ligía, magíribudalá lúbiñoun. ³² Jarítagua jumá luágu le asúseredubei tun lúmari Lot. ³³ Le áluguti leséfuruni libágari ya ubouágu, leféridirubei íbágari magúmchaditi, le ánjabei leféridiruni libágari ya ubouágu, nueígiñe, libíjuba íbágari magúmchaditi.

³⁴ ‘Naríñajare jun luágu áriebu lánme ligía, ñíbaña biáma güriquia arúmuga tídan ában meme gabána, lanügüba ában jádaangiñe, ígirúame le ában según jafíñen nuágu. ³⁵ Ñíbaña biáma wúríña amúlija lídan ában, tanügüba ában jádaangiñe, ígirúame to ában. ³⁶ Ñíbaña biáma wügüriña áraabu, lanügüba ában jádaangiñe, ígirúame le ában.

³⁷ Dan le jagáambunbalin cátei le, ába jálügüdüni, jaríñaga lun.

—¿Jalíabasan lasúsereda buri cátei le, Wabúreme?

Laríñaga joun.

—Le ñí lumuti lúgubu jiláali, ñíba jóúndaragua wadúbi.

18

Jémpulu tuáguti würi to jiláali túmari, lúma agúseragüdüti

¹ Ába labájüdagun Jesúsu ában jémpulu joun, lun larúfudajan joun luágu lúnti lan jayúmuragun lun Búngiu súnwandan, láu gurásu. ² Laríñaga joun.

—Ñíñein meja ában agúseragüdüti lídan ában fulásu, minébe líña Búngiu lun, mebéresen ligía láu ni ában güriquia. ³ Ñíñoun gíñe ában würi lídan fulásu ligía, jilá meja túmari, ságü wéyu tídin lúmoun agúseragüdüti le lun líchuguni tirícha tun luágu ában tuwúribun lúma tágani. ⁴ Luágu sarágu dan, májati yebe leténirun tun, lárigiñe, ába laríñagun lúnguarügü. “Láu sun minében lan Búngiu nun, mebéresen áu láu ni ában, ⁵ quei nuján méme lan würi to ásüdagüda nichügü, neséfuraaru, jebé lámuga tiábin, gumú líñein nugúraasun.”

⁶ Ába laríñagun Jesúsu.

—Niján laríñagubei agúseragüdüti le wuríbabei, ⁷ gúbumeti leséfuraña Búngiu lánigu ja ayúmuragutiña lun wéyuagu, áriebu. ¿Lúbei lubá líderaguniña? ⁸ Uá, madárasanbei. Láu sun le, dánme le nagíribudun, áu le Wügüri Garaüwarügüti, ubouágun, ¿nadáriruba funásan afíñeni jádan güriquia ja yábaña, nuágu?

Jémpulu luáguti fariséo lúma agúburajati liseínsuna gumádi

⁹ Rúyati Jesúsu ában jémpulu joun ja jarítaguabaña luágu richágua jamá ligíbugiñe Búngiu, janúgaña ámu gürigia quei ni cáta. Laríñaga.

¹⁰ —Ñüdütiña bián wügüriña témpulurugu ayúmuragua lun Búngiu, ában fariséo, ában agúburajati liseínsuna gumádi. ¹¹ Le fariséo, rára líña layúmuragun, laríñaga. “Búngiu, teínqui numútibu luágu mítaran nan quei jíbiri gürigia—jíwerutiña, wuríbatíña, salúfuritiña, mítaraantina gíñe quei agúburajati liseínsuna gumádi le. ¹² Ayúnaratina bián weíyaasu lídan dimáasu lun nagúnfulirun búma, rúnumuti gíñe dísi gáwanün lídaangiñe ságü fiádürü le ebélurubei nun, bun.” ¹³ Ánjeinti agúburajati liseínsuna gumádi, ába leréderun díse, mabúseerunti ni lun línúruni laríjin siélun, le luweírín lúnabun lanáangun lúngua. Aboujarügülei lanínguagu láu igárigu, laríñaga. “¡Búngiu, gudémená bun, nugúya le gaffigounti!” ¹⁴ Naríñajare jun luágu giríbu lan agúburajati ligía lúbiñoun, resíbiñuleí Búngiu, máma fariséo ligía. Ladüga le anáanguti lúngua weíri, ñúraübei lanügün, ánjein le ñúraübei lanáangun lúngua, weíríbei lanügün.

Labíniruniña Jesúsu irájüñü
(Mt 19.13-15; Mr 10.13-16)

¹⁵ Anaajouátiña gíñe irájüñü lun Jesúsu lun lagúrurun jawágu, dan le jaríjinbalin disípulugu cátei le, ába jadeínjan joun ja anáajabaliña irájüñü. ¹⁶ Ába laríñagun Jesúsu joun lun jasígirun anáajaña jarájüñü lun, ába laríñagun joun lánigu.

—Ígira jumá lun jayábin irájüñü nun, mewéridija jumá lueí, ladüga ja ítarabaña quei jagía, jagía lílanabaña larúeijan Búngiu. ¹⁷ Ninárün jáu luágu le lan merésibirun lumúti larúeijan Búngiu láu afíñeni jarúmati líbe jafíñen irájüñü, mebélubei lídoun.

Layánujan ában wügüri rísiti lúma Jesúsu
(Mt 19.16-30; Mr 10.17-31)

¹⁸ Ába lálügüdüni ában jádaangiñe ábutigu Jesúsu, laríñaga lun.

—Maésturu buíti, ¿ca lúnbei nadügüni lun gayára lan nibíjini ibágari le magúmuchaditi?

¹⁹ Laríñaga Jesúsu lun.

—¿Ca uágu baríñaga nun “buíti”? Ában rügüñein buíti, Búngiu. ²⁰ Subúdi bumúti gumádi. Maganouábá túma würi gámaritu, máfarajabá, míwerujabá, mayéejabá luágu ni ában, inébe jamá bagúbürigu bun.

²¹ Laríñaga wügüri ligía lun.

—Gúnfulitina láu sun le lúmagiñe ñúraügidina.

²² Lídan le lagáambunbalin Jesúsu cátei le, ába laríñagun lun.

—Mégeigili ában cátei lun badügüni. alúgurabeí sun le búmabei, ábame bíchuguni lebégi joun gudémetiña, ábame garísin ban siélu. Ábame bagíríbudun, ábame bafálarunina.

²³ Dan le lagáambunbalin wügüri ligía cátei le, ába lírudagun, ladüga rísiti buídu. ²⁴ Dan le laríjini Jesúsu lírudagun, ába laríñagun.

—¡Jénreenguti lun jebélurun rísitiña lídoun larúeijan Búngiu!
²⁵ Méreenguntimaati lun lásügürün ában caméyu lídaangiñe lujúyun ában agúsa sügü láu lebélorun ában rísiti lídoun larúeijan Búngiu.

²⁶ Ába jaríñagun ja agáambubalin.

—¿Cáteiti gayáraabei lasálbarun?

27 Laríñaga Jesúsu joun.

—Le jásiñerubei gürígia adüga, gayára lumúti Búngiu, ladüga úati ni cáta siñáti lun Búngiu.

28 Laríñaga Pédro lun.

—Wabúreme, wagía, ígira wamáali sun le wámati lun wafálarunibu.

29 Ába laríñagun Jesúsu joun.

—Nínárün jáu luágu furúmieguaügü lan le ígiruti lúban, o lagübürigu, o líbugañanu, o lamúleno, o lúmari, o lirájüñü luágu larúeijan Búngiu, 30 libíjubatíma sarágu weíyaasu lougiñe lídan ubouú le, ibíjaleíme ibágari magúmuchaditi yágüta siélu.

Ladímurejaanya Jesúsu luágu loúnwen

(Mt 20.17-19; Mr 10.32-34)

31 Ába lagúarun Jesúsu joun láni dúusu apóstolugu jábugua, ába laríñagun joun.

—Weíbuga Jerusalén guetó, le ñíba lubeí lagúnfulira sun le jabürüjabei profétagu nuágu, áu le Wügüri Garaüwarügüti. 32 Jedéregerubadina joun ja mámabaña juríu, jéjerajaba náu, anába jamáname, suégua. 33 Jabeíchubadina, lárigiñeme, ábame jáfarunina jilágubei, áni násaaruba lídaangiñe ouweni luágu lürüwan wéyu lúnya nabágaridun.

34 Úati gunfaráanda jamá ni cáta lídaangiñe cátei le, ibídiñegubeíti joun ca lan uágu ladímureja joun, darúguati laníchigu cátei le laríñagubei, joun.

Lareídaguagüdüin Jesúsu ában Jericóna maríjinti

(Mt 20.29-34; Mr 10.46-52)

35 Dan le achülüreinaali Jesúsu ubúrugun Jericó, ñíñein ában maríjinti ñun láru úma amúriaja. 36 Dan le lagáambunbei maríjinti ligía jásuüjan sarágu gürígia, ába lálügüdajan ca lan susébebei. 37 Ába jariñagun lun luágu niján lan Jesúsu Nazarétna ásügüra ñígiñe. 38 Ábati lagúaragun, laríñaga.

—¡Jesúsu, le ladügawagun Davíd, gudémená bun!

39 Ja lubá lubáabaña, ába jadeínjan lun lun lámanichun, ligiatima lagúaragun.

—¡Ladügawagun Davíd, gudémená bun!

40 Ábati laráramagun Jesúsu, ába loúnajan anúgei. Dan le yaráfaali lun, ába laríñagun lun.

41 —¿Ca babúseerubei nadügün bun?

Ába laríñagun lun.

—Nabúreme, buséntina naríjin.

42 Laríñaga Jesúsu lun.

—¡Ibíjabei baríjin! Areídaguadibu ladüga bafiñen.

43 Lídan meme óra ligía, ába laríjin maríjinti ligía, ába lafálaruni Jesúsu adímurejeina buíti luágu Búngiu. Sun gürígia ja aríjubalin cátei le, ába gíñe jadímurejan buíti luágu Búngiu.

19

Jesúsu lúma Zaquéo

1 Ábati lebélorun Jesúsu fulásurugun Jericó, ába lásügürün ubúrugugiñe. 2 Ñíñein ában wügüri rísiti, giriti Zaquéo, jábuti agúburajatiña liseínsuna gumádi. 3 Buséntiti Zaquéo laríjini Jesúsu lun lasúbudiruni, siñáti laríjini ladüga ñúraüraüti lúgubu, áni gíbetiña gürígia. 4 Lúnti gayára lan laríjini,

ába leíbaagun ubáraü, ába laweínrun tuágun ában tídibu wéwe sicómoro yaráfa lun le ñígiñeba lubeí lásügüra Jesúsu. ⁵ Dan le lásügürün Jesúsu ñígiñe, ába laríjin íñun, ába laríñagun lun Zaqueó.

—Zaqueó, raríba furése, ladüga lúnti neréderun búbiñe uguñe.

⁶ Ábati larárirun Zaqueó furése, ába lerésibiruni Jesúsu lúbiñe láu ugúndani. ⁷ Dánti le jaríjini jíbiri güri-gia cátei le, ába jagúmeserun adímureja luágu lídin Jesúsu erédera lúbiñe ában gafígounti. ⁸ Ábati laráramun Zaqueó, ába laríñagun lun Jesúsu.

—Nabúreme, níchiga lamídan le nómabei joun gudémetiña, áni ánjein íwerujaadina lubeí lueí ában güri-gia láu eyéeraguni, náguuyugüdüba gádürü weíyaasu sügü láu lun.

⁹ Laríñaga Jesúsu lun.

—Sálbañu jáña tílana múna to uguñe, ladügawagun giñe Abrahám amürü. ¹⁰ Ligía niábinbei ubouágu, áu le Wügüri Garaüwarügüti, lun náluajaniña lúma asálbaraña já yebe féridijañabaña.

Jémpulu luáguti díisi murúsun seínsu

¹¹ Dan le añája lubeí güri-gia agáambajei laríñaguni buri Jesúsu cátei le, ába labájüdagun ában jémpulu joun, ladüga ayárafadeinaali lan lun Jerusalén áni jarítaguatiñáti luágu lagúmesera lan larúeijan Búngiu dan ligía. ¹² Ábati laríñagun joun.

—Ñíñein ában wügüri íñugutiña lidújeñu, leíbugati wügüri ligía lídoun ámu fulásu díseti lun líchugúniwa lurúeiteme lageira, ábayame lagíribudun. ¹³ Lubáragiñe láfuridun, ába louñajan jawágu díisi jádaangiñe lumúsuniña, ába ledéregerun ában seínsu le gebégiti sarágu lun cáda ában, ába laríñagun joun. “Agárabaja jumeí seínsu le dari nagíribudun.” ¹⁴ Queíti liyéreegunbei wügüri ligía joun lílana fulásu, ába jounajan larígi lun jaríñagun lun le lúnbei líchuguni ubáraü lun luágu mabúseerun jamáni lun jarúeiteme. ¹⁵ Láu sun líra, resíbiwati lun urúeime, ába lagíribudun lageíroun. Dan le lachülürün, ába louñajan jawágu lumúsuniña já buga únbaña líchigei seínsu lun lasúbudiruni átiriñein lan lagáñirun cáda ában. ¹⁶ Ába liábin le furúmiñeti, ába laríñagun. “Nabúreme, gáñeitina díisi weíyaasu ligíbuagun biseínsun.” ¹⁷ Laríñaga urúei lun. “Buíti, ában músu buíti bugúya. Quei úara bubeí lídan le murúsunrügüti, níchigaadibu agúmadija lídan díisi fulásu.” ¹⁸ Ábaya liábin ában, ába laríñagun. “Nabúreme, gáñeitina seíngü weíyaasu ligíbuagun biseínsun.” ¹⁹ Ába giñe laríñagun lun. “Bagúmadija lídan seíngü fulásu.” ²⁰ Ábati liábin ában, ába laríñagun. “Nabúreme, niján biseínsun, areída numúti tídan ában músue ladüga nanúfude bueí, ²¹ ladüga ában ban wügüri derégüdati, reídeitibu láu cátei le mawádigimaritibu luágu, alúbaja amürü le ñí lumuti mábunagun ban.” ²² Ábati laríñagun urúei lun. “Músu wuríbatí, luágu guánarügü berérun nagúseragüdábu. Quei subúdi bubálin luágu ában nan wügüri derégüdati, luágu reidei nan láu cátei le mawádigimaritina luágu, alúbaja áu le ñí lumuti mábunagun nan, ²³ ¿cáti uágu míchububalin niseínsun báncürugun lun jamúga lagánwoundun dan le nagíribudun?” ²⁴ Ába laríñagun joun ja ñíbaña. “Gidájumei seínsu lueí, rújumei lun le díisibei lúma.” ²⁵ Ába jaríñagun lun. “Wabúreme, níjeinga díisi seínsu lúma.” ²⁶ Ába laríñagun urúei. “Naríñajare jun luágu sun lan le adügati buíti láu le lúmabei, libíjuba lánwoun, ánjein le madügünti ní cáta buíti láu murúsun le lúmabei, lagídarúaba murúsun ligía lueí. ²⁷ Játi

náganiñu, já yebe mabúseerúnbaña lun urúei nan, barüjumaña ñájoun, áfaragua jumáña jilágubei nigíbugiñe.”

Lebélorun Jesúsu Jerusaléoun

(Mt 21.1-11; Mr 11.1-11; Jn 12.12-19)

²⁸ Lárigiñe lariñaguni Jesúsu cátei le, ába lasígiruni luweíyasun Jerusaléoun jáu lánigu, ligía jabá jabá. ²⁹ Dan le chülü mémeeli lídoun buri fulásu le Betfajé lúma Betánia, yaráfa lun wübü le gíribei Olívos, ³⁰ ába lariñagun joun biáma jádaangiñe láni disípulugu.

—Jeiba lídan liraüraü fulásu le wagíbugiñebei, dánme le jachülürün ñi, jadáriruba ában burígü güráñu le maweinrúngili. Jafáragadeíme, ábame janügüni ñájoun. ³¹ Ánjaün álügüdüwa ca lan uágu jafáragadei, jariñagame luágu busén láani Jabúreme.

³² Ába jóúdin, ába jadáriruni ítara quei lariñaguni Jesúsu joun. ³³ Dánti le añája lubei afáragadei burígü, ába jálügüdüniña labúriña, jariñaga joun.

—¿Ca uágu jafáragadei burígü le?

³⁴ Ába jóúnabuniña.

—Ladüga busén láani Wabúreme.

³⁵ Ábati janügüni lun Jesúsu, ába jíchugunun janáangun lanágawagun burígü, ába jaweínragüdüni Jesúsu luágun. ³⁶ Quei awáansereina lan Jesúsu, átulejeina jamoún janáangun luágu üma lubá. ³⁷ Dan le jayárafadun lun larárirün wübü le Olívos, ába jagümeserun sun lánigu Jesúsu ja afálarubalin agúaraja láu ugúndani lúma adímureja luágu luweírigun Búngiu, luágu buri miláguru le jarijibe. ³⁸ Jariñaga.

—¡Biniwati urúei le ñübinbei lídan líri Wabúreme Búngiu! ¡Níjein ñurúguaü siélu, lúma uweírigu lun Búngiu!

³⁹ Ábati jariñagun fariséogu ja ñíbaña jádan gürígia lun.

—Maésturu, aríñagabá joun bánigu lun jámanichun.

⁴⁰ Lariñaga Jesúsu joun.

—Ninárün jáu luágu ánjaña lan ámanichaja ja, lagúarajaba lán buri dübü nuágu.

⁴¹ Dan le layárafadun lun Jerusalén, dan le larijini ubúruigu ligía, ába layájuajan jawágu lílana fulásu ligía, lariñaga.

⁴² —¡Lun jamúga gunfaráanda jumáni ugúñe luágu áu lan ümabei lun ñurúguaü jun, buíti jamúga! Májatün. ⁴³ Ligía lachülürüba lubei wéyu buri wuríbati jun, jadügame jáganiñu ában baríeru geyégua láu jubúrugute lun siñá lan jáfuridun ñigiñe, ábame jageíndagun júma lídaangiñe sun oúbaü. ⁴⁴ Jagünrinchagubei jufúlasun le gumúti, mígirunbaña ni ában dübü ligíbuagu dübü, jáfarúaba sun jugúya, ladüga mebéresen jumá láu óra le liábinbei Búngiu asálbaraün.

Larúmadagüdünnun Jesúsu témpulu

(Mt 21.12-17; Mr 11.15-19; Jn 2.13-22)

⁴⁵ Ábati lebélorun Jesúsu témpulurugun, ába laságaruniña ja alúgurajabaña jáma ja agáñijabaña ñi. ⁴⁶ Lariñaga joun.

—Lariñajare tídan Lerérun Búngiu. “Núban, fulásu le ñi lubei gayára lan jayúmuragun gürígia nun”, ánjein jugúya, barüjumaaru quei jában jíwerutiña.

⁴⁷ Ságu buri wéyu larúfudajan Jesúsu témpulurugu, añájati jábutigu jafádirigun juríu jáma arúfudajatiña lilúrudun Moisés, jáma gíñe lábutigu

fulásu áluaja ída lúba lan jáfaruni jilágubei, ⁴⁸ madáritiña ída lúba lan jadügüni ladüga weíri lan jóurabajoúniwa sun güri-gia lun jagáambuni lerérun.

20

Lirícha Jesúsu témpulurugu
(Mt 21.23-27; Mr 11.27-33)

¹ Luágu ában wéyu, dan le témpuluruguñein lubei Jesúsu arúfudaja joun güri-gia, apúrichijeí ugánu luáguti asálbaruni, ligía jayábin jábutigu jafádirigun juríu, jáma arúfudajatiña lilúrudun Moisés, jáma wügüriña weirigutiña lídan jafíñen juríu, ² ába jaríñagun lun.

—Ariñagabeí woun ca lan biríchabei lun badügüni cátei le. ¿Ca íchugubalin ubáfu le bun?

³ Ábati laríñagun Jesúsu joun.

—Nálügüdaadün giñe ában cátei, oúnaba jumána. ⁴ ¿Ca oúnajabalin Juan abásteragüdaja? ¿Loúnajan Búngiu ódi jóúnajan wügüriña?

⁵ Ába jagúmeserun aríñaga jámagua.

—¿Cába waríñaga? Ánjawa aríñaga luágu loúnajan lan Búngiu, laríñagame woun ca lan uágu mafiñerun wabeí lun. ⁶ Ánjawa aríñaga luágu jóúnajan lan wügüriña, jachámuraguba güri-gia dübü wawágun, ladüga choúru jamúti luágu proféta lán meja Juan.

⁷ Ábati jaríñagun luágu ibídiñe lan joun ca lán meja oúnajabalin Juan abásteragüdaja. ⁸ Ábati laríñagun Jesúsu joun.

—Mariñagun nubei giñe jun ca lan áu ubáfu nadügei buri cátei le.

Jémpulu jawáuti ñadágimeintiña wuríbatíña
(Mt 21.33-44; Mr 12.1-11)

⁹ Ába lagúmeserun Jesúsu adímureja joun güri-gia, ába labájüdagun ában úraga le gíbebei laníchigu, joun. Niján úraga ligía.

—Ñíñein meja ában wügüri ábunaguti beíbei lichárirugu, lárigiñe, ába lájayajani lichári joun ñadágimeintiña, ába lídin lídoun ámu fulásu luágu sarágu dan. ¹⁰ Dan le lachülürün lidáani alúbajani, ába loúnajan ában lumúsun anügei lufánran, ába jabúleiseiruni ñadágimeintiña músu ligía, ába jóúnajani lárigoún, míchugunga ni cáta lun. ¹¹ Ábayati loúnajan ábanya músu, ába giñe janábuni, buleísei jameí, oúnaja jameí, míchugunga ni cáta lun. ¹² Ábaya loúnajan ábanya, ábaya giñe jabúleiseiruni, ába jabúguni ñígiñe.

¹³ Ába laríñagun labúreme ichári lúnguarügü. “¿Cábasán funa nadüga? Nounajaali niraü le jínsiñebei nun, dánme le jaríjini, fágua inébebei joun.” Ába loúnajani. ¹⁴ Dan le jaríjinalin, ába jaríñagun jámagua. “Niján le lúnbei lerésibiruni alágan, wáfaraali jilágubei, wagía lámuga labúriña sun cátei.”

¹⁵ Ábati jaságaruni lídaangiñe fulásu ligía, ába jáfaruni jilágubei.

Ábati lálügüdajan Jesúsu, laríñaga.

—¿Cábatí ladüga labúreme ichári? ¹⁶ Liábinme, ábame láfaraguniña ñadágimeintiña jagía jilágubei, ábame líchuguni ichári joun ámu.

Dan le jagáambunbalin cátei le, ába jaríñagun.

—¡Masúsereda lámuga ítaral!

¹⁷ Ába laríaguniña Jesúsu, ába laríñagun joun.

—¿Cáti lílabei le búrtñubei tidan Lerérun Búngiu le ní lubei laríñaga. Lé meja dübü le mabúseerun jabeí ábunagutiña,

ligíaaali furúmiñeti?

¹⁸ Furúmieguarügü le achúgeraguti luágu dübü ligía lagünrinchaguba, léti uágunti láburuja, labúrechagübei. Áu dübü ligía.

Luáguti liseínsuna gumádi

(Mt 21.45-46, 22.15-22; Mr 12.12-17)

¹⁹ Lídán meme óra ligía, ába jálugun jábutigu jafádirigun juríu jáma arúfudajatiña lilúrudun Moisés járügüdüni Jesúsu, ladüga jasúbudiruni luágu jawáguti lan jémpulu le laríñagubei, madügün jamúti ladüga janúfude jaweí gürígia. Ábati jagúrabajan ámu dan. ²⁰ Ábati jóúnajan gürígia ja ásügürütiña jóungua camá jamuga jarúmatiña lun jaríaaiani Jesúsu, lun jaríñagagüdüni cátei le gawáguti gayára lan jíchugun lidúnrun lun jedéregeruni lun gumádimati. ²¹ Ligía jálügüdünbalin, jaríñaga lun.

—Maésturu, subúdi wamúti luágu richá lan le baríñagubei lúma gíñe le barúfudajabei, manúfudetibu gíñe lueí ni ában, ladüga ni cáta lan luweirigun gürígia bun, áni láu inárüni barúfudajei lémeri Búngiu. ²² Aríñagabá ában cátei woun. ¿buíti lun lafáyeijóun seínsu lun warúeite César ódi mabuídunti?

²³ Ába lasúbudiruni Jesúsu luríban jarítangun, ába laríñangun joun.

—¿Ca uágu jabúseera jíchugun sádara nubá? ²⁴ Arúfuda jumá ában lídaangiñe seínsu ligía nun. ¿Cá iyáwa lúma íri le бүрүñubei luágu?

Jaríñaga lun.

—Láni César.

²⁵ Ábati laríñangun joun.

—Le láni César rújumei lun César, le láni Búngiu rújumei lun Búngiu.

²⁶ Siñá jamútiti áburügüda tídoun jasá daran láu lé buri laríñagubei jagíbugiñe gürígia, weírirügüti janígi láu loúnabagüle joun. Ába jámanichun.

Álügüdajani lübügürü ásaaruni lídaangiñe ouweni

(Mt 22.23-33; Mr 12.18-27)

²⁷ Lárigiñe, ába jóúdin saduseógu aríjei Jesúsu. Jaríñajare saduseógu luágu másaarunbaña lan jiláaña lídaangiñe ouweni lúnya jabágaridun. Ábati jaríñangun lun Jesúsu.

²⁸ —Maésturu, laríñajare Moisés woun tidan lilíburun, luágu ánjein lan ouwe ában wügüri, ába lígirunun lúmari marájüñüga ligía táu, lúnti lan lamárieidun lamúlen túma lun garájüñü lan táu, gadügawagun lámuga líbugaña le ouwebei. ²⁹ Wel, ñíñanu mejáti sédú wügüriña gamúlenuguátiña, ába lamárieidun le furúmiñeti, ába loúnwen marájüñüga. ³⁰ Ába lamárieidun le jabíaman túma buga lúmari íbugañaü, ába gíñe loúnwen marájüñüga.

³¹ Ábati lamárieidun le jürüwan túma, chülü lúmoun le jasédün, jilágu meme jagía, marájüñüga táu. ³² Ába gíñe toúnwen würi tugúya.

³³ Aríñagabá ában cátei woun. dánmeti le jásaarun lídaangiñe ouweni lúnya jabágaridun, ¿cábatu úmari würi to jádaangiñe, quei maríei tubeí jáma sédügubei?

³⁴ Ába laríñangun Jesúsu joun.

—Lídán ubou le, maríeitiña wügüriña jáma würiña, ³⁵ ánjein lídaanme dan le lúnbei liábin, úabei agámariduni siélu jádan ja garíchabaña lun ásaaruni lídaangiñe ouweni lúma lun jebélurun siélun agánawa ñi lun sun dan. Magámaridubaña ñi, míchaajan jamáñame jarájüñü lun maríei, ³⁶ ladüga moúnwendügüyaaña gürígia siélu, ítaraañame quei ánjeligu, lirájüñü jañame

Búngiu ja saráaña lídaangiñe ouweni. ³⁷ Moisés guánarügü arúfuda lumúti luágu njein lan ásaaruni lídaangiñe ouweni lídan le labürüjanbei luágu búbugati geméti. Laríñajare ñi luágu Búngiu lan Lubúngiutebei Abraham, Isáac luma Jacób. ³⁸ Láu dimúrei ligía, arúfuda lumúti Moisés luágu wínwangiña lan Abraham, Isáac luma Jacób, láu sun jilá lan jágubu, ladüga máma Jabúngiute jiláaña Búngiu, Jabúngiute ja wínwangiñabaña. Wínwangiña lanügüniña Búngiu sun gürígia.

³⁹ Ábati jaríñagun arúfudajatiña lilúrudun Moisés.

—Buíti baríñaguni, Maésturu.

⁴⁰ Ába málügüdagun jamáli lan.

¿Ladügawagunsan David Crístu?

(Mt 22.41-46; Mr 12.35-37)

⁴¹ Ába laríñagun Jesúsu joun.

—¿Ída liñásan jaríñagunbei luágu ladügawagun lan David Crístu?

⁴² Laríñajare David guánarügü tídan líburu to giriboun Sálmos.

Aríñagati Búngiu lun Nabúreme. “Ñurúba lueígiñe nouwenren,

⁴³ daríme níchuguniña báganiñu bújaburugun.”

⁴⁴ ¿Ída lubáti ladügawagun lan David Crístu, áni aríñagati David guánarügü lun Crístu “Nabúreme”?

Ladárirun Jesúsu jadúnrun arúfudajatiña lilúrudun Moisés

(Mt 23.1-36; Mr 12.38-40; Lc 11.37-54)

⁴⁵ Ñíñanu sarágu gürígia agáambajei Jesúsu, ába jagáambun laríñagun joun láni disípulugu.

⁴⁶ —Touñigüa jumá júngua jawei arúfudajatiña lilúrudun Moisés, ganígitiña jeíbugun táu anáanguni durúrutu, busén jagía lun labúsurún joun láu inébesei úmadarugu, áluaja jamei ubáraü le jabára weírigutiña tídan ligílisi, luma lubuídun-ágei ubáraü lídan eígini. ⁴⁷ Gídá jamutu gíñe jában würíña ja jiláaña úmari jawei, lúnti jadáuragun láu, ába jadügün furíeigi migínaguti. Weíribei jasúfurirun luágu sun le jadügübei.

21

Seínsu le tíchugubei ában fugiábu würi témpulurugu

(Mr 12.41-44)

¹ Ába laríjin Jesúsu jíchaajan rísitiña seínsu tídoun buri gáfu to lágei seínsu témpulurugu, ² arija lumúti gíñe tíchugun ában würi jiláali túmari, gudémetu, bián gáwanün tídoun gáfu. ³ Ába laríñagun Jesúsu.

—Nínárün jáu luágu gíbetima lan tíchugun fugiábu würi to sügü jáu sùngubei, ladüga sun jagía, lídaangiñe le ígiragubei jáma jíchiga, ⁴ ánjoun tugúya, láu tugúdemegun tíchigei sun le túmabei lún yebe tawínwandun.

Laríñagun Jesúsu luágu tagünrinchawagúba lan témpulu

(Mt 24.1-2; Mr 13.1-2)

⁵ Jadímurejaña fiú gürígia tuágu témpulu, luágu tubuídunmeraü láu lubuídun buri tidübüri luma buri cátei le jíchugubei gürígia lun tawéndedun. Ábati laríñagun Jesúsu.

⁶ —Lachülürüba wéyu lun lagünrinchawagún sun le jaríagubei tuágu témpulu to guetó, merédebei ni ában dübü ligíbuagu dübü.

Seíni buri lubá lagúmuchun ubouú

(Mt 24.3-28; Mr 13.3-23)

⁷ Ábati jálügüdüni, jaríñaga lun.

—Maésturu, ¿ídame san lasúseredá buri cátei le? ¿Cábasan seíni waríja luágu dánjali lan lun lasúseredun?

⁸ Ába laríñagun Jesúsu.

—Tounigi jumá, mayeedúa jumá. Jayábinba sarágu aríñageina luágu áu lan jagía, jaríñagame. “Áu Crístubei”, “Niján dan ligía.” Mafiñera jumá joun, mafálara jumáña. ⁹ Dánme le jagáambun ladímurejóun luágu awúribujani lúma jawágu gürígia agárabagua luágun jarúeite, manúfudedagua jumá, lasúsereduba le furúmiñe, mámagilíme lagúmuchun ubouú líra.

¹⁰ Ába lasígirun aríñaga joun.

—Lageíndaguba ában fulásu lúma ában, awúribuja ligíame ában ageíraü lúma ámu. ¹¹ Níbei oúnwenbun buri jarabaganáli, ilámaü, sándi, lídan ámuñegueinarügü fulásu, larijúba buri cátei janúfunati siélu lúma oúnwenbun buri seíni.

¹² Lubáragiñe lasúseredun sun le, járújoúba, eíbaajoúa jugúyame. Janügüba agúsera tídan jalígilisin juríu, jádarawagüba furísunrugun, barúwa jugúyame jagíbugiñoún urúeigu jáma gumádimatiña, nueígiñe, lun jagúseragüdünün, ¹³ ligíame jidáani lun jadímurejan luágu nufúleisein. ¹⁴ Aráanse jumei jarítangun lun madíjeri jumá cába lan jaríñaga jueígiñegua, ¹⁵ níchuguba dímuerei lúma lichú áu jun le lásíñerun ní ában jádaangiñe jáganiñu asígenara ní oúnaba. ¹⁶ Jalúgurubadün jagúbürigu guánarügü, jíbugañanu, jamúlenu, jidújeñu, jumádagu. Jáfarúba jídaangiñe, ¹⁷ jiyéereguduba joun sun gürígia, nueígiñe. ¹⁸ Lídaanme sun líra, latoúnigirubadün Búngiu le gumúti, ¹⁹ áni ánjaün meme derégüdagua lídan jafíñen nuágu, jíbíjibeí ibágari magúmuchaditi.

²⁰ ‘Dánme jaríjin geyéguá jamá lan súdeara ubúругu Jerusalén, subúdi jumei luágu yaráfalaí lan lagünrinchagun ubúругu ligía. ²¹ Jámeti gürígia ja Judéabaña, lúnti janúrajan luágun buri wúbü, ja ubúrugubaña Jerusalén, lúnti jáfuridun ñígiñe, ja áraabubaña, magíribuda jamá ubúrugun. ²² Luwéyuri buríbei jafáyeirun gürígia luágu wuríbati le jadügübei, dánme le lagúnfulirún sun le bürúwañubei tídan Lerérun Búngiu. ²³ ¡Fugiábugume wúriña ja dageínatiña lídan dan ligía, o ja lan garájüñütiña ja gurágiña! Ladüga ñíbei sarágu igárigu ubouúagu, larúfudubei Búngiu luweírín ligáñi luágu jafígoun gürígia ja juríu. ²⁴ Níbaña ouwegutiña wuríburugu, jíbiri janáawaguba adáurawagua lídoun ámu ageíraü, ábame jagünrinchaguni ja mámbaña juríu ubúругu Jerusalén daríme lagúmuchun dan le íchugübei joun lun jadügüni.

Ligáburi ída lúba lan liábin Crístu

(Mt 24.29-35, 42-44; Mr 13.24-37)

²⁵ ‘Lasáíragubáti buri seíni luágu wéyu, luágu játi lúma jawágu warúguma, ábame laweíridun janígi néchaanigu ubouúagu, ábame janúfudedagun luágu lanátime lajúujan lúma labouñjan lugúdi barána. ²⁶ Ladágaruba falálaü jawágu gürígia láu anúfudei, láu jasáminarun luágu cátei le lúnbei lasúseredun, ladüga járügüdüba lan warúguma ámu úma. ²⁷ Ábamei larijín niábin, áu le Wügüri Garaúwarügüti, lídan juánriñu láu sun nubáfu lúma oúnwenbun nuweírigin. ²⁸ Dánme le lagúmeserún buri

cátei le asúsereda, ragüjuma dügüdaguaü, iñúra jumeíme jichügü, ladüga madíseelime jasálbarun.

²⁹ Rúlumuti giñe jémpulu le joun.

—Aríja jumoún tídibu ígo, o furúmieguaügü tídibu wéwe. ³⁰ Dan le jaríjin labouchun tubána, subúdi jumúti luágu yaráfaali lan lidáani lubáchouga. ³¹ Dánme giñe le jaríjini lasúseredun buri cátei le, subúdi jumeí luágu madíseeli lan lidáani Búngiu lun larúeijan.

³² Ninárün jáu luágu lagünrinchawagúba lan sun ubúruyu le Jerusalén lubáragiñe jóuwegun güriña ja lánina dan le. ³³ Lagúmuhaguba siélu lúma ubouú, ánjein nerérun, ladúraruba lun sun dan.

³⁴ Touñigi jumá, mígira jumá lun tabuínchun janígi láu cátei málati quei sarágu afúuduni, bacháruaü, lúma buri idíjeri luágu buri cátei lánina íbágarí le, márügüdün lámugaün wéyu nagíribudagüle ubouúagun lídan magáradajan jumá, ³⁵ quei ában sádara to adárurutu. Ladüga itara lúba líabin wéyu ligía jawágun sun ja aganoúbaña lídan sun fulásu ya ubouúagu. ³⁶ Aráanseñu jumá lubeíti, ayúmuragua jumá lun Búngiu sun dan, gayára lámuga jíbíjin ubáfu lun jawánduni sün buri cátei le lúnbei lasúseredun, lun giñe gayáraabei lan jarúfudagun júngua nigíbugiñe táu tarúman anígi.

³⁷ Ábaja larúfudajan Jesúsu témpulurugu wéyuagua, árieubu, ábaja lídin erédera luágu wübü le Olívos. ³⁸ Ábaja chülügiñe jamá güriña témpulurugun ságü bináafin lun jagáambuni.

22

Jelédegun áganiñu lubá Jesúsu

(Mt 26.1-5, 14-16; Mr 14.1-2, 10-11; Jn 11.45-53)

¹ Yaráfaali fédu le lidáani teigíniwa fein to magánatu ísi, fédu le jarítaguagüle juríu luágu meja dan le lásügürünbei láni Búngiu ánjeli áfaraguaña jígirama Ejíptona, máfaragun lumútiña jígirama Israélitagu. ² Ábati jáluajan jafádirigun juríu jáma arúfudajatiña lilúrudun Moisés ída lúba lan jáfaruni Jesúsu jilágubei, íbídiñounga joun güriña, ladüga janúfude jaweí.

³ Ábati lagáñeiruni Máfia larítangun Júdas Iscarióte, le ában jádaangiñe láni Jesúsu dúusu apóstolugu, ⁴ ába lídin adüga darádu jáma jábutigu jafádiríñegu juríu jáma jábutigu tisúdaarana témpulu lun ledéregeruni Jesúsu joun. ⁵ Ába jagúndaaragun, ába jariñagun lun Júdas luágu jíchuguba lan seínsu lun, ⁶ ába lañúurun darádu, ába lagúmeserun áluaja ída lúba lan gayára lan ledéregeruni joun dánme le úa jamá güriña.

Lagúmujoún leígin Jesúsu jáma lánigu

(Mt 26.17-29; Mr 14.12-25; Jn 13.21-30, 1 Co 11.23-26)

⁷ Ába lachülürün fédu le ídaanbei teigúa fein magánatu ísi, ñí lubei giñe ladágarawagüdüwa mudún le lánina fédu. ⁸ Ába lariñagun Jesúsu lun Pédro lúma Juan.

—Jeíba aráanserei eígini le lánina fédu.

⁹ Ába jálügüdüni.

—¿Jalíagi babúseera waráanseruni?

¹⁰ Lariñaga joun.

—Dánme le jebélurun ubúrugun, jadúnraguba lúma ában wügüri táu ában dináa láu dúna, jafálareime chülü tídoun múna to ñíjin lumúti lebélera. ¹¹ Jariñagame lun tabúreme múna. “Lariñajare Maésturu. ¿Jígoun rúmu

to ñí lubei gayára lan neígini eígini le lánina fédu jáu náni disípulugu?”
 12 Ábame larúfudun ában rúmu weírítu jun tougíñegua múna, aráanseñu tíña, jaráansereime eígini ñi.

13 Ába jóudin, ába jadáriruni sun cátei quei laríñaguni Jesúsu joun, ába jaráanseruni eígini lánina fédu ñi.

14 Dan le lachúlürünbei óra, ába lañúurun Jesúsu jáu láni disípulugu luágu dábula, 15 ábati laríñagun joun.

—¡Oúnwenbun nabúseerun neígini eígini lánina fédu le júma lubáragiñe nouñwen! 16 Ladüga nariñajare jun luágu meigindügüya náali lan eígini lánina fédu le daríme lagúnfulirún laníchigu lídan larúeijan Búngiu.

17 Ábati lanügün ában wéru táu diweín lújaburugu, ába leteíngiruni Búngiu, laríñaga.

—Barújumei le, fánreingua jumeí jádaangua, 18 nariñajare jun luágu mátundügüyaadina lan diweín daríme liábin larúeijan Búngiu.

19 Láriigiñe, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun, aríñageina.

—Núgubu le, le lúnbei ledéregerún juágu. Lúmagiñe guetó, adüga jumeí le, jarítaguagüleme nuágu.

20 Ítara meme gíñe, láriigiñe jeígin, ába lanügüni wéru táu diweín, ába laríñagun.

—Niján níta le lúnbei láwiyurun lídaangiñe núgubu juágu, lun lañúurun iséri darádu.

21 Niján wügüri le lúnbei ledéregerunina wáma ya luágu dábula, 22 luáguñadina üma le lúnbei nanügüni, áu le Wügüri Garaúwarügüti, áni ¡fugiábutia wügüri le lúnbei lalúgurunina!

23 Ábati jagúmeserun álügüdagua jádaangua cába lánfuna alúgurei.

Ladímurejoún luágu cába lan weírigutima

24 Ába jasígenejan lánigu luágu cába lan jádaangiñe weírigutimá. 25 Ába laríñagun Jesúsu joun.

—Lídan arúeijani lánina ubou le, agúmadijatiña já buri lurúeitena fulásu, camá jamuga labúreme jagía, já buri lábutigu fulásu, aríñawagúati jawágu luágu wügüriña jamá ja gadügatiña fuleísei joun gürígia. 26 Ánjein lídan narúeijan, mítaraanti, lubáragiñe líra, le weírigutimaabei le tímatisaati jídan lúnti lanáangun lúngua quei le ünabutimaabei, le agúmadijabei, lúnti ítara lan quei le esériwijabei. 27 ¿Cági weírigutimaabei, le añúurubei eíga luágu dábula, ódi le esériwijabei? ¿Ma le añúurubei luágu dábula? Áni áu, ítara níña jídan quei le esériwijabei.

28 ¡Jugúya úarabañája núma lídan nouchawagun, 29 ligía níchugunbadün lun jarúeijan quei líchugunina Núguchi lun narúeijan. 30 Jeígiba, gurá jugúyame luágu nidábulan yágüta siélu lídan narúeijan, ñurú jugúyame luágu buri lála urúei lun jagúseragüdüniña jadügawagun dúusu lirájüñü Israél.

Laríñaguni Jesúsu luágu leyédaguba lan Pédro láu

(Mt 26.31-35; Mr 14.27-31; Jn 13.36-38)

31 Aríñagati gíñe Wabúreme Jesúsu.

—Simón, Simón, amúriajaali Máfia üma lúma Búngiu lun gayáraabei lan louchagunün quei lawánijoún túrígu, 32 ibíja lumúti, áni ayúmuraguaadina buágu lun Búngiu lun meféridirun báani bafíñen nuágu lídaanme óra ligía. Áni dánme le bagíribudun nun, rúba dügüdaguaü joun bíbirigu.

33 Laríñaga Simón lun.

—Nabúreme, aráansetina lun nídin búma furísunrugun, o lun lan noúnwen búma.

34 Laríñaga Jesúsu lun.

—Pédro, ugúñe méme, beyéedaguba náu ürüwa weíyaasu lubáragiñe layúgurujan gáyu, baríñaguba luágu ibídiñe nan bun.

Layárafadun lórate oúchawaguni

35 Ábati laríñagun Jesúsu joun.

—Dan le noúnajanbalün maságüteiga, ni láu lágei seínsu, ni geídi, ¿ñíñein funági jemégeirun?

Ába jaríñagun.

—Uá Maésturu, memégeiruntiwa ni cáta.

36 Ábati laríñagun joun.

—Ánjeinti guetó, le gaságüteti, barüloun, barü ligíame lágei seínsu, le mefeínteti, alúguraloún labíte lun lagáñijan lefeínte, ladüga wuríbati dan le. 37 Naríñajare jun luágu lagúnfuliruba lan le tariñagubei Lerérun Búngiu nuágu. “Ába jabájüdüni jádan wuríbatiña.” Sun le bürüwañubei nuágu lagúnfuliruña guetó.

38 Ábati jaríñagun.

—Wabúreme, nuján bián efeín ya.

Ába laríñagun joun.

—Buíti.

Layúmuragun Jesúsu Getsemaní

(Mt 26.36-46; Mr 14.32-42)

39 Ábati láfuridun Jesúsu, ába lídin luágun wübü le Olívos quei ligáburiñaja, ába jóudin láni disípulugu lúma. 40 Dan le jachülürün lídan fulásu ligía, ába laríñagun joun.

—Jayúmuragua, meféridirun jumámugei jafiñen nuágu.

41 Ába ladísedun Jesúsu jawei murúsunraü, ába lájuduragun ayúmuragua lun Búngiu, 42 laríñaga.

—Núguchi, ánjabu busén, séfu bána lueí oúnwenbun asúfuriruni le lúnbei nasúfurirun, madügüwalá le nabúseerubei, le la babúseerubei adügüwa.

43 Ábati liábin ában ánjeli siélugiñe lun líchugun érei lun. 44 Dan létima laweíridun ligárigu, ligiatima layúmuragun láu érei, lédedejati lísüga lueí camá jamuga oúnwenbun lédedejan jítaü, múarugun.

45 Dan le lásaarun lídaangiñe layúmuragun, ába ladáriruniña disípulugu arúmuga, larúmagüdün íruni. 46 Ábati laríñagun joun.

—¿Ca uágu jarúmuga? Sarájuma, jayúmuragua, meféridirun jumámugei jafiñen nuágu.

Janügüni Jesúsu adáüra

(Mt 26.47-56; Mr 14.43-50; Jn 18.2-11)

47 Ñígili Jesúsu adímureja, ligía jayábin sarágu gürígia, Júdas, le ában jádaangiñe dúusu disípulugu, jabá jabá. Aba layárafadun lun Jesúsu lun lachúuruni. 48 Ábati laríñagun Jesúsu lun.

—Júdas, ¿láu ában chúuti balúgurana, áu le Wügüri Garaüwarügüti?

49 Játi lúmabaña Jesúsu, dan le jaríjinbalin cába lan asúsereda, ába jaríñagun lun.

—Wabúreme, ¿ageíndagua wamáña táu efeín?

⁵⁰ Ába lánchuguni ában jádaangiñe lánigu Jesúsu larígei lumúsun fádiri íñutimaati, le loúnwenren. ⁵¹ Ába laríñagun Jesúsu.

—Ígira jumáña, buídurügaali.

Ábati lagúruruni Jesúsu larígei músu ligía, ába lareídagun. ⁵² Ába laríñagun joun jábutigu fádirigu, joun wügüríña weírigutiña lídan jafíñen juríu, lúma joun jábutigu tisúdaarana témpulu, ja ñübinbaña anügei.

—¿Jiábin nuágu táu efeín lúma wéwe camá jamuga jíwerutina? ⁵³ Dan lé meja júma nan témpulurugu ságü wéyu, magúrugubeitün nuágu, wel, niján jidáani lun jadügüni jugúndan náu, óraali lun lagúmadijan le labúremebei lubúriga.

Laríñagun Pédro luágu ibídiñe lan Jesúsu lun

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Ábati járügüdüni Jesúsu, ába janügüni lúbiñoun fádiri le íñutimaabei, ábati lafálaruni Pédro dísegiñe. ⁵⁵ Ába jáfuragun wátu ñi lamídaangua barrieru, ába jañúurun geyégu láu, ába gíñe lañúurun Pédro jádan. ⁵⁶ Queíti taríjini ában músu ñun larügürügü wátu, ába teréderun aríaguei, ába taríñagun.

—Lúmañein buga gíñe Jesúsu gürígia le.

⁵⁷ Ába leyéedagun Pédro, laríñaga.

—Ibídiñeti wügüri ligía nun.

⁵⁸ Murúsun lueígiñe, ábaya laríjini ában, ába laríñagun.

—Jánigu gíñe amürü.

Ába laríñagun Pédro.

—Máma jánigu áu.

⁵⁹ Queí buri ában óra lárigiñe, ábaya laríñagun ában.

—Inárüni luágu lúmañajañein lan wügüri le ladüga Galiléana gíñe.

⁶⁰ Ábati laríñagun Pédro.

—Ibídiñeti nun ca lan uágu badímureja.

Lídan meme óra ligía, dan le nijángua lan Pédro adímureja, ába layúgurujan ában gáyu. ⁶¹ Ába ladígiragun Wabúreme Jesúsu aríja luágun Pédro, ába larítagun Pédro luágu lé buga laríñagubei Jesúsu lun. “Lubáragiñe layúgurujan gáyu ugúñe, beyéedaguba náu ürüwa weíyaasu.” ⁶² Ábati láfuridun Pédro, ába layájun láu igárigu.

Jéjerajan láu Jesúsu

(Mt 26.67-68; Mr 14.65)

⁶³ Ja wügüríña ja oúnigirubalin Jesúsu, ába jéjerajan láu, bei jameí. ⁶⁴ Ába jagüraguni lágu, ába jagáyuajan ligíbuagun, aríñageina jagía.

—¿Bugúya le profétabei, aríñagabeígia ca lan agáyuajabei buágu!

⁶⁵ Ába buri jaríñagun sarágu ámu cátei anábei.

Jesúsu ligíbugiñe líñun-ágei lúrudu

(Mt 26.59-66; Mr 14.55-64; Jn 18.19-24)

⁶⁶ Dan le larúgadunbei, ába jóúndaragun wügüríña weírigutiña lídan jafíñen juríu, jábutigu jafádirigun juríu, jáma arúfudajatiña lilúrudun Moisés, ába janügüni Jesúsu ligíbugiñoún jadámurin le líñun-ágei lúrudu. Ába jaríñagun lun ñi.

⁶⁷ —Aríñagabei woun, ¿amürüsan Crístubei le lúnbei lasálbaruniña gürígia?

Ába laríñagun joun.

—Ánjana aríñaga jun luágu ánja lan, maffñebadün nun, ⁶⁸ ánjaün nálügüdagua, moúnabun jubádina, mígiragüdün jumáname. ⁶⁹ Naríñaga ában cátei jun. lúmagiñe guetó, nañúuruba, áu le Wügüri Garaüwarügüti, lueigiñe loúnwenren Búngiu le Súnti Gabáfuti.

⁷⁰ Ábati jálügüdüni súngubei.

—¿Amürü lubeíti Liraübei Búngiu?

Ába laríñagun Jesúsu joun.

—Ánja, áu, quei jaríñaguni jugúya guánarügü.

⁷¹ Ábati jaríñagun.

—Mabúseerunjadiwa geféen jamá ámu woun, agáamba wamáali lídaangiñe guánarügü liyúma.

23

Jesúsu ligíbugiñe Piláto

(Mt 27.1-2, 11-14; Mr 15.1-5; Jn 18.28-38)

¹ Ábati jásaarun sun líñun-ágei lúrudu, ába janügüni Jesúsu ligíbugiñoun Piláto, ² ába jagúmeserun íchiga lidúnrun, jaríñaga.

—Darí wamaali wügüri le achágaraguágüdaña gürígia, laríñajare luágu moun lan lun wafáyeijan seínsu lun urúei Rómána, aríñagati gíñe luágu ligía lan Crístubei le lanúadirubei Búngiu lun lasálbaruniña gürígia, aríñaga ligía luágu urúei lan ligía.

³ Ábati laríñagun Piláto lun.

—¿Amürüsan Jarúeitebei Juríu?

Laríñaga Jesúsu lun.

—Ánja, ítara líña quei baríñaguni.

⁴ Ábati laríñagun Piláto joun jábutigu fádirigu lúma joun jíbiri gürígia.

—Madáritina dúru luágu wügüri le.

⁵ Ábatima jaríñagun jére.

—Lachágaraguágüdüñanu sun gürígia Judéana láu ligáburi larúfudajan, lagúmesera Galiléagiñe, niján mémegua adúgei chülü ñájoun.

Jesúsu ligíbugiñe Heródes

⁶ Dan le lagáambunbalin Piláto cátei le, ába lálügüdajan ánjein Galiléana lubei wügüri ligía. ⁷ Dánti le jaríñagun lun luágu Galiléana lan, ába loúnajani lun Heródes, le gumándan Galiléa, ladüga ñíñein Heródes Jerusalén lídan dan ligía. ⁸ Ába lagúndaaragun Heródes dan le laríjini Jesúsu, ladüga agáambañajaali lan luágu áni lüja labúseerun laríjini, agúrabatiti laríjin ladügün ában miláguru. ⁹ Ába lálügüdaguni luágu sarágu cátei, moúnabunti Jesúsu ni cáta. ¹⁰ Níñanu jábutigu fádirigu jáma arúfudajatiña lilúrudun Moisés, magúmuti jíchugun lidúnrun. ¹¹ Ábati loúseruni Heródes jáu lisúdaaranigu quei ni cáta, éjeraja jagía láu. Ábati jadáüraguagüdüni táu anáanguni wéndegutu quei lanáangun urúei, ábaya loúnajani Heródes lun Piláto. ¹² Wéyu ligía, ába gamádagua lan Heródes lúma Piláto, lubáragiñe líra, gáganiguañajatiña.

Lasíadirúniwa Jesúsu lun loúnwen

(Mt 27.15-26; Mr 15.6-15; Jn 18.39-19.16)

¹³ Ábati loúndaruniña Piláto jábutigu fádirigu jáma lúrudugu, jáma buri ámu gürígia, ¹⁴ ába lariñagun joun.

—Jugúya anügübalin wügüri le nun, jariñaga luágu chagáguagüda lániña gürígia, álügüdagua náali jigíbugiñe, áni aríja jumúti luágu madári nan ni murúsun dúru luágu lídaangiñe le jariñagubei luágu. ¹⁵ Madáriti giñe Heródes lidúnrun, giríbugüdalá woun. Aríja jumáli luágu madügün lan ni cáta le lúnti lafarún jilágubei lueígiñe, ¹⁶ nabeíchagüdalí lubeíti, lárigiñeme, ábame nígiragüdüni.

¹⁷ Gagáburititi Piláto lúnja lígiragüdün ában adaürüti fédurugu, ¹⁸ ába jagúarajan súngubei lídan ában.

—¡Áfarabeí le! ¡Ígiragüdabeí Barabási!

¹⁹ Barabási ligía, ladaürüña lueígiñe ligía lan ában jádaangiñe ja iñúragubaña jóungua luágu gumádi, lúma lueígiñe láfarajan. ²⁰ Busénti yebe Piláto lígiragüdüni Jesúsu, ábaya ladímurejan joun, ²¹ ligíatima jagúaragun.

—¡Dáguabeí luágu gurúwa! ¡Dáguabeí luágu gurúwa!

²² Ába lariñagun Piláto joun luágu lürüwan weíyaasu.

—¿Cáti wuríbati ladügübei? Madáritina ni cáta le lúnti lafarún jilágubei lueígiñe. Nabeíchagüdalí, ábame nígiragüdüni.

²³ Ábatima jagúarajan lun ládarawagún luágu gurúwa, jéretiti jagúarajan jagía jáma jábutigu fádirigu, ába jabíjini le jabúseerubei. ²⁴ Ábagubeíti ladügüni Piláto le jabúseerubei, ²⁵ ábati lígiragüdüni wügüri le jabúseerubei, le adaürübei lueígiñe iñúraguni lúma áfarajani, ábati ledéregeruni Jesúsu joun lun jadügüni jagúndan láu.

Ládarawagún Jesúsu luágu gurúwa

(Mt 27.32-44; Mr 15.21-32; Jn 19.17-27)

²⁶ Dan le jóüdiña lan láu Jesúsu lun ládarawagún luágu gurúwa, ába járügüdün ában wügüri Cirénena gíriti Simón, liábiña áraabugiñe, ába janügagüdüni gurúwa lun, ába lídin láu lárigi lárigi Jesúsu.

²⁷ Sarágu jána gürígia afálaruti jáma sarágu würiña jádan ayájuajeina, agúarajeina láu írui luágu. ²⁸ Ába ladígiragun Jesúsu jawágun, ába lariñagun joun.

—Würiña Jerusalénna, mayájua jumá nuágu, jayájua juoúgua lúma jawágu jirájüñü, ²⁹ ladüga liábinba buri wéyu dánme le lariñawagún. “Fuleiseiwatiña ja siñábei jagáraüdüni jáma giñe ja marájüñüjañábaña, jáma ja mátagüdajanbaña.” ³⁰ Ábameti jariñagun gürígia lun wübü iñuti. “Áburujabá wawágun”, aríñaga jagíame lun wübü ünabuti. “Darúguabá wáu.” ³¹ Ladüga ánjein adügajabalin sun le láu tídibu wéwe le düdügili, ¿cábagi madügün jamá láu le mábeijali? (Ítara líña ladímurejan luóúgua, le madúnrunbei, lúma jawágu ja gadúnrunbaña.)

³² Barütiña giñe biáma gadúnruntiña lun jafarún úara lúma Jesúsu. ³³ Dan le jachülürünbei lídoun fulásu le gíribei Lufúlasun Lábu Ichügü, ába jádaraguni Jesúsu luágu gurúwa jáma giñe biáma wuríbatiña jagía, ában lueígiñe loúnwenren, ában lueígiñe lubáüna. ³⁴ Dánti le añája lan ádaraguei Jesúsu luágu gurúwa, ába lariñagun.

—Núguchi, ferúduna báña ladüga ibídiñeti joun ca lan jadügübei.

Ába jájurerun súdeara ubúnuruni lun jaríjin cába lan un jádaangiñe terédera lanáangun Jesúsu. ³⁵ Níñanu gürígia aríagua, ñíñanu giñe lúrudugu jéjerajaña láu, jariñaga.

—Sálbati ámu, sálbagualá gíñeti lúngua, ánjein inárüni lubei luágu ligía lan Crístubei le lanúadirubei Búngiu lun lasálbaruniña gürígia.

³⁶ Éjerajatiña gíñe súaara láu, láu jayárafadun íchiga tagübüri diweín lun lun látunun, ³⁷ jariñaga buri lun.

—Ánjein Jarúeite bubei juríu, sálbaguabá búngua.

³⁸ Níñeinti ában abürüjouni lougiñe lichügü, laríñajare ñi. “Niján Jarúeite Juríu.”

³⁹ Ába lanábuni ában jádaangiñe wuríbatíña ja dáwagubaña luágu gurúwa ñi Jesúsu, laríñaga.

—Ánjein bugúya lubei Crístubei, sálbaguabá búngua, sálba báwame.

⁴⁰ Ába ladeínjan le ában lun louba, laríñaga lun.

—¿Manúfudetibusan luei Búngiu, bugúya le lábugiñebei ában meme súfuri lúma? ⁴¹ Wagía, garíchatiwa lun wasúfurirun ladüga wafáyeijaña luágu wadüga, ánjeinti wügüri le, madügünti ni cáta wuríbatí.

⁴² Ábati laríñagun.

—Jesúsu, barítaguame nuágu dánme le lagúmeserun barúeijan.

⁴³ Laríñaga Jesúsu lun.

—Ninárün báu luágu númabadibu lan siélu, ugúñe méme.

Loúnwen Jesúsu

(Mt 27.45-56; Mr 15.33-41; Jn 19.28-30)

⁴⁴ Amídirugu, ába labúrigadun sun fulásu darí ladaünrún ürúwa rábounwéyu. ⁴⁵ Ába labúrigadun wéyu, ába tajeíridagun tubélun témpulu tamídan túmagua. ⁴⁶ Ábati lagúaragun Jesúsu ítara.

—Núguchi, deréga numútu nuwáni bújaburugun.

Quei laríñagun ítara, ába loúnwen.

⁴⁷ Dan le laríjinalin jábuti súaara Rómána le asúseredubei, ába ladímurejan weírugu luágu Búngiu, laríñaga.

—Inárüni, madúnrunti buga wügüri le.

⁴⁸ Sun gürígia ja ñibaña, ja aríjbalin le asúseredubei, ába jóúdin nígiñe, áfarajaina jamei janíguagu, le jagárigu. ⁴⁹ Ánjaña sun lumádagu Jesúsu jáma giñe würiña ja ñübinbaña úara lúma Galiléagiñe, ába jeréderun díse aríjei buri cátei le.

Labunún Jesúsu

(Mt 27.57-61; Mr 15.42-47; Jn 19.38-42)

⁵⁰ Níñein ában wügüri gíriti José, lídaangiñeti fulásu le gíribei Arimatéa, le jafúlasun juríu. Buíti ligáburi wügüri ligía, richáguati ligíbugiñe Búngiu, lídaañein líñun-ágei lúruđu le jáni juríu. ⁵¹ Agúrabañu líñein larúeijan Búngiu, magúndaanti lubeiti láu cátei le ladügübei líñun-ágei lúruđu láu Jesúsu. ⁵² Ábati lídin lúmoun Piláto, ába lamúriajani lúgubu Jesúsu lúma. ⁵³ Lárigiñe laráriragüdüni luegiñe gurúwa, ába louburaguni táu ában gamísa, ába lácharuni lídoun ában umúajaü achigíti luágu ában dübü le ñí lubei úagili lan ni ában abunúti. ⁵⁴ Wándaradi wéyu ligía, luwéyuri aráansejani lubá luwéyuri eméraaguni joun juríu, áni agúñeeli gumése.

⁵⁵ Ába jafálaruni würiña já meja ñübinbaña lúma Jesúsu Galiléagiñe José, aríja jamei umúajaü, aríja jamei buíđu ída líña lan líchugún lúgubu Jesúsu lídoun umúajaü. ⁵⁶ Dan le jagíríbudunbei jábiñoun, ába jaráanseruni

ibiñei buri le íchugúbei jawágu jiláaña, ábati jeméraagun lídan wéyu le eméraaguagülei quei laríñaguni lilúrudun Moisés.

24

Lásaarun Jesúsu lídaangiñe ouweni
(Mt 28.1-10; Mr 16.1-8; Jn 20.1-10)

¹ Wéyu dimáasu, ába jagíribudun wúriña luágun umúajaü, bináafingua, barüina jamei ibiñei le jaráanserubei jámagua. ² Dan le jachülürünbei, mámaali lídan lubára dübü le lidaü umúajaü. ³ Ába jebélurun lídoun umúajaü ligía, madári jamúti lúgubu Wabúreme Jesúsu ñi. ⁴ Súnti añája lan ñi arítagua jagei lánfuna, ligía jaríjin bián wügüriña rára jarúgabu táu anáanguni mirítu. ⁵ Queíti jélemuchun láu jagíbu ünabun, buin láu anúfudei, ába jaríñagun wügüriña jagía joun.

—¿Ca uágu jáluajei le wínwanbei jádan jiláaña? ⁶ Úati ya, saráali lídaangiñe ouweni. Jarítagua jumá luágu lé meja laríñagubei jun dan le Galiléañein lán meja, luágu le lúnbei lasúseredun lun, ligía le Wügüri Garaüwarügüti, ⁷ luágu ledéregerúaba lan jájaburugun gafígountiña, ábame jádaraguni luágu gurúwa, ábame lásaarun lídaangiñe ouweni luágu lürüwan wéyu.

⁸ Ábati jarítangun luágu dimúrei le laríñagubei Jesúsu. ⁹ Lárigiñeti jagíribudun umúajaürugúgiñe, ába jabájüdaguni sun cátei le asúseredubei joun únsu apóstolugu lúma joun jíbiri lánigu Jesúsu. ¹⁰ Ja anügübalin ugánu le joun apóstolugu, María Magdaléna, Juána, María to lúguchu Jacóbo, jáma ja jíbiri wúriña. ¹¹ Dan le jaríñagunbalin buri cátei le joun apóstolugu, ába janügüni quei lilülün áu, mafíñetiña joun.

¹² Ába láfuridun Pédro, ába lídin eíbaagueina luágun umúajaü, dan le laríjinbei lurágeirugun, gamísa rügüñoun ñi, úaali úgubu. Ába lídin lúbíñoun láu luweírín anígí láu cátei le laríjubei.

Luágu üma lun Emaúsun
(Mr 16.12-13)

¹³ Luágu méme wéyu ligía, jóúdiña biáma jádaangiñe lánigu Jesúsu lídoun ában liraüraü fulásu gíriti Emaús, ürüwa óra eíbuguni Jerusaléngiñe, ¹⁴ adímurejeina jáña luágu sun cátei lé buri asúseredubei. ¹⁵ Súnti adímurejeina jamá, ába layárafadun Jesúsu joun, ába lagúmeserun eíbuga úara jáma. ¹⁶ Láu sun aríja jamáni, siñáti jasúbudiruni luágu Jesúsu lan. ¹⁷ Ábati laríñagun joun.

—¿Cásan le uágubei jadímureja, sun eíbugaina jumá?

¹⁸ Ába jaráramagun láu íruni jagíbuagu, ába loúnabun ában jádaangiñe, gíriti Cleofás, ába laríñagun.

—Sun gürígia subúdi jamúti le asúseredubei Jerusalén lídoun buri wéyu le. ¿Amürü rügüñein jádaangiñe ja ñíbaña ibídiñejabu lun?

¹⁹ Ábati laríñagun joun.

—¿Cági asúseredubei?

Jaríñaga lun.

—Luáguti Jesúsu le Nazarétna, ában meja proféta láu ubáfu luágu le ladügübei lúma luágu lerérun ligíbugiñe Búngiu lúma jagíbugiñe sun gürígia. ²⁰ Ábati jedéregeruni jábutigu wafádiriñegu jáma walúrudungu lun siádiwa lan lun ouweni lúma lun ládarawagún luágu gurúwa. ²¹ Rúwamutí yebe wafíñen luágu ligíaba lan eséfurei linásiñun Israel. Ürüwa wéyu guetó

lueigiñe lasúseredun cátei le. ²² Láu sun líra, weirigüda jamáli jádaangiñe würiña ja wámabaña wanígi láu jóudin luágun umúajaü lubá buga larúgan, ²³ queíti madári jamáni lúgubu ñi, ába jayábin abájüdagua woun luágu aríja jamá ánjeligu ñi, aríñaga jamá joun luágu wínwan lan Jesúsu. ²⁴ Ába jóudin jádaangiñe wíbirigu aríjei umúajaü, ába jadáriruni itara quei jariñaguni würiña jagía, marijin jamúti Jesúsu.

²⁵ Ábati lariñagun Jesúsu joun.

—¡Loúguati giñe gunfaráanda jumá, lüti giñe lubá jafiñerun luágu lé meja jariñagubei profétagu! ²⁶ ¿Ma funági lúnti meja lasúfuriruni Crístu sun cátei le lubáragiñe lerésibiruni luweirigun?

²⁷ Ábati lagúmeserun afúnraanguágüdei sun le tariñagubei Lerérun Búngiu luágu joun, lagúmesera túmagiñe buri liliburun Moisés túmoun sun jalíburun profétagu.

²⁸ Dan le jachülürün lídoun fulásu le ñijnbaña lubei, ába ladügün Jesúsu camá jamuga lasígiraali leíbugun. ²⁹ Ába jéredun luágu lun leréderun jáma, jariñaga lun.

—Reídeibá wáma, ladüga ladáruđuña áni güñemémeeli.

Ábati lebélorun Jesúsu lun leréderun jáma. ³⁰ Dánti le ñurújali jáma luágu dábula, ába lanügünun fein lújaburugu, ába leteíngiruni Búngiu tuágu, ába lagúbachagunun, ába líchugunun joun. ³¹ Lídan óra ligía, ába léfegechun jágu, ába jasúbudiruni luágu Jesúsu lan, ába lagúmuchagun jagíbugiñe. ³² Ábati jariñagun jámagua.

—¿Ma sandítiwa tásüdün wanígi le wagúndan dan le adímurejeina lubei woun luágu üma, aríñagalei tía Lerérun Búngiu woun?

³³ Ábati magúrabajaanjaña lan, ába járügüdün üma lun jagíribudun ubúrugun Jerusalén le ñi lubei jadáriraña únsu apóstolugu oúndaragu jáma giñe jíbiri lánigu. ³⁴ Ába jariñagun ja oúndaraguñubaña ñi joun.

—Inárüni luágu saráli lan Wabúreme Jesúsu lídaangiñe ouweni lúnya labágaridun, aríja láali Simón.

³⁵ Ábati jabájüdaguni bián wügüriña jagía le asúseredubei joun luágu üma, lúma luágu jasúbudiruni luágu Jesúsu lan dan le lagúbachagúnbarun fein.

*Larúfudagun Jesúsu lúngua joun disípulugu
(Mt 28.16-20; Mr 16.14-18; Jn 20.19-23)*

³⁶ Ñigiña adímureja luágu buri cátei le, ligía lasáliragun Jesúsu jamídaangua, ába labúsurun joun, aríñageina.

—Ñurúguaü jun.

³⁷ Ába tájüchürün janígi láu sarágu anúfudei, jarítangun luágu pántu lan jarijubei. ³⁸ Ába lariñagun Jesúsu joun.

—¿Ca uágu tájüchüra janígi? ¿Ca uágu níjein lubei liloúguan afiñeni le tídun janígi? ³⁹ Aríja jumei nújabu lúma nugúdi, áu méme le. Gurújumana, pántu, mágürügüti, mábu ligía, anáti áu.

⁴⁰ Dan lariñaguni líra, ába larúfuduni lújabu lúma lugúdi joun. ⁴¹ Queíti mafíñen mémegiña lan ladüga ugúndani lúma luweírin anígi le jawágubei, ába lariñagun Jesúsu joun.

—¿Níjeinsan eígini júma ya?

⁴² Ába jíchugun murúsun úduraü süti lun lúma síruudu, ⁴³ ába lanügüni, ába leígini jagíbugiñe sun jagía. ⁴⁴ Lárigiñe, ába lariñagun joun.

—Le asúseredubei nun, ligía lé meja uágubei nariñaga jun dán meja le júmagidina, luágu lagúnfulirúaba lan sun le bürüwañubei nuágu tídan lílburun Moisés, tídan jaliburun profétagu, lúma tídan líburu to giriboun Sálmos.

⁴⁵ Ábati gunfaráandagüda lánun Lerérun Búngiu joun, ⁴⁶ ába laríñagun joun.

—Bürüwañu líña luágu lúnti lan loúnwen Crístu, ába lánme lásaarun lídaangiñe ouweni lúnya labágaridun luágu lürüwan wéyu, ⁴⁷ lúnti lan gíñe lapúrichijoún lídan líri joun sun gürígia ubouágu lun jasáansiruni jóuserun lun ferúdunawa lan jafígoun, lagúmeseruña apúrichijani ligía ubúrugugiñe Jerusalén. ⁴⁸ Jugúya geféentün luágu buri cátei le. ⁴⁹ Noúnajabei Sífiri Sándu, le uágubei laríñaga Nüguchi Búngiu jun, ítara líña lubeíti, reidei jumá ya ubúrugú Jerusalén daríme jerésibiruni ubáfu lúmagiñe Búngiu le siélupei.

Lamúdeirun Jesúsu siélun

(Mr 16.19-20)

⁵⁰ Ábati lanügüniña Jesúsu bougudin lueí ubúrugú chülü Betánia, ába líñúrui lújabu, ába ln ferúdunawa laabíniruniña. ⁵¹ Dánti labíniruniña, ába lamúdeirun jaweí, ába lanügüniwa siélun. ⁵² Lárigiñe jájuduragun lun, ába jagíribudun járigoún ubúrugun Jerusalén, ¡ma jagúndan! ⁵³ Súnwandánti témpulurugúñanu lan íchiga uweíriguni lun Búngiu.

UGÁNU BUÍTI LE LABÜRÜJABEI JUAN LUÁGU JESÚSU

Liábígüle Búngiu Irájü ubouágun queísi Wügüri Garaiwarügüti

¹ Dan le lagúmeserunbei sun cátei, níjeinjali meja Dimúrei (le ámu íri lun Búngiu Irájü), lúmañein Búngiu le Dimúreibe, áni Búngiu méme ligía.

² Lídan lubeíti lagúmeserunbei sun cátei, lúmañein Búngiu Úguchili Búngiu Irájü. ³ Lídaangiñe ladügei Búngiu sun cátei, úati ni cáta adügüti le máma ladüga. ⁴ Ligía íchugubei íbágari lun sun cátei, áni ligía arúgoundagadügübei jáu gürígia. ⁵ Rúti larúgounga queísi lámpu lídan lubúriga, áni lásiñerubei lubúriga lámpu ligía éñegucha.

⁶ Níñein meja ában wügüri loúnajan Búngiu, gíriti Juan, le ñübinbei lun íchugun fe luágu Búngiu Irájü le lúnbei liábin ubouágun lun larúgoundagádügün jáu gürígia. ⁷ Juan, lúnti íchugun fe luágu, lun gayáraabei lan jafiñerun sun gürígia luágu cátei le lúnbei laríñaguni dánme le liábin. ⁸ Máma Juan le lúnbei larúgoundagádügün jáu gürígia, ában wügüri ligía le oúnajoubei lun ladímurejaba lan luágu. ⁹ Búngiu Irájü, le queísigubeirügübei ában lámpu le tímatimaati lun larúgoundagádügün jáu sun gürígia, lachülürüña meja ubouágun lídan dan ligía.

¹⁰ Nübinti ubouágun, áni láu sun lídaangiñe lan ladügei Búngiu ubou, manügün jamúti lirájüñü ubou quei Búngiu Irájü. ¹¹ Lageíroun yebe liábin, merésibirun jamúti lílana lageíra. ¹² Láu sun líra, añájein erésibiruti, ába jafiñerun luágu, ába íchugun ubáfu joun lun lirájüñübaña lan Búngiu. ¹³ Mítaraantiñatia quei jasáanigu agübürigu ja gürígiabaña, ja agüriajouítiña quei furúmierügü gürígia o láu lan lugúndan ában wügüri, lirájüñü Búngiu jagía.

¹⁴ Ligíratí meja le Dimúreibe, le méme Búngiu Irájübei, ñübinti lun ítara lúba lan quei furúmierügü gürígia, ába laganouñiwa wádan. Arija wamúti luweírigan, uweírigan le ladúnabei Liraü Búngiu le ábanrügüti, le buínbei láu areíni lúma inárüni. ¹⁵ Adímurejati Juan luágu, ába laríñagun.

—Niján léñaja uágubei nadímureja jun dan le naríñagunbei luágu le lan ubábei naráanseja üma, weírigitima lan sügü náu, ladüga níjeinjali lán meja lubáragiñebei nagüriajoun.

¹⁶ Sun wagía íbíjaadiwa sarágu abíniruni lídaangiñe luweírín lirísín. ¹⁷ Lúmagiñe Moisés lerésibirúa lílúrúdan Búngiu, ánjeinti ínsíñeni lúma inárüni, lídaangiñe Jesucrístu liábin. ¹⁸ Úagili ni ában aríjiti Búngiu, Liraü le ábanrügübei le yaráfabei tun lanígi, ligía arúfudubalin woun ída líña lan Búngiu.

*Ladímurejan Juan le abásteragüdjabei luágu lufúleisein Jesucrístu
(Mt 3.11-12; Mr 1.7-8; Lc 3.15-17)*

¹⁹ Ába jounajan juríu ja Jerusalénna fádirigu jáma wügüriña jádaangiñe ladügawagun Leví álügüdei Juan cáteíñein lan. ²⁰ Ába laríñagun joun furáangu.

—Máma áu Crístu.

²¹ Ábayati jálügüdüni.

—¿Cátabuti? ¿Proféta Elías amürü?

Lariñaga joun.

—Uá, máma áu.

Ábaya jariñagun lun.

—¿Amürü proféta ligira le lúnbei liábin?

Ába lariñagun joun.

—Máma giñe áu.

²² Ábati jariñagun lun.

—¿Cátabuti? Mósutia wanügüni boúnabagüle joun ja oúnajabaliwa. ¿Cági gayáraabei baríñagun woun buoúgua?

²³ Ába loúnabuniña láu méme dimúrei lé meja lariñagubei proféta Isaías.

—Áu ában le agúarajabei lídan fulásu le mageírawati. “Aráanse jumouñ janígi lubá liábin Wabúreme queisi ladárarúniwa ũma surúti.”

²⁴ Ja ñüdünbaña adímureja lúma Juan, lánigu jadámurin fariséogu, ²⁵ ábati jariñagun lun.

—Ánjeinti máma hubei Crístu, ni Elías, ni proféta ligía, ¿cáti uágu babásteragüdaja?

²⁶ Ába lariñagun joun.

—Áu, láu dúna nabásteragüdaja, níjein ában ibídiñeti jun jagánagua, ²⁷ liábinba nárigiñe, wügüri ligía, madúnatina ni lun jamúga nafáragaduni tagürüga ligeídín.

²⁸ Sun cátei le, lídan fulásu le gíribei Betábara lasúsereda, luágu oúbaü le ñigiñe lubei láfuara wéyu libíti dúna Jordán, le ñi lubei labásteragüdaja Juan.

Wügüri le loúnajabei Búngiu lun loúnwen luágu jafígoun güri-gia

²⁹ Larúgan, ába laríjin Juan liábin Jesúsu ayárafadeina lun, ába lariñagun joun lánigu.

—Niján le loúnajabei Búngiu lun loúnwen luágu jafígoun güri-gia queisi meja lafarúniwa mudún lídan dan ligira luágu jafígoun güri-gia. ³⁰ Luáguñaja nadímureja dan le naríñagunbei. “Liábinba ában wügüri nárigiñe le weíriguti sügü náu, ladüga níjeinjali lán meja lubáragiñe nagüríajouñ.”

³¹ Ni áu, ibídiñeti meja wügüri ligía nun, abásteragüdajádina láu dúna lun jasúbudiruni Israelítagu.

³² Aríñagati giñe Juan.

—Aríja numúti Sífiri Sándu camá ában únjun, larárirun siélugiñe, ába laráramagun lálulugu. ³³ Ibídiñeti yebe nun cátei lan wügüri ligía, aríñagarúgaali meja le oúnajabalina abásteragüdaja láu dúna, nun. “Dánme le baríjin larárirun Sífiri Sándu ábame laráramun lálulugu ítaga wügüri, ligía wügüri ligía le abásteragüdajabei láu Sífiri Sándu.” ³⁴ Aríja náaliti, geféen áu luágu ligía lan Liraübei Búngiu.

Furúmiñetiña láni Jesúsu díspulugu

³⁵ Larúgan, ñíñeinya Juan jáma biáma jádaangiñe lánigu. ³⁶ Dan le laríjinbei Juan lásügürün Jesúsu, ába lariñagun.

—Niján wügüri le lanúadirubei Búngiu lun lagídaruni jafígoun güri-gia.

³⁷ Ába jagáambuni biáma lánigu Juan lariñagun ítara, ába jafálaruni Jesúsu.

³⁸ Ábati ladígiragun Jesúsu lárigoún, quei laríjin jafálaruni, ába lariñagun joun.

—¿Ca jabúseerubei núma?

Ába jariñagun lun.

—Maésturu, ¿jalía bagánawa?

³⁹ Ába laríñagun Jesúsu joun.

—Jigoúgu jaríjei.

Ába jóudin, ába jaríjini jalía lan lagánawa, ába jásügürüni líbiri wéyu ligía lúma, ladüga queiburijali lan gádürü rábounwéyu óra ligía.

⁴⁰ Andrés, le lamúlen Simón Pédro, ligía ában jádaangiñe biáma ja agáambubalin le laríñagubei Juan ába jafálaruni Jesúsu. ⁴¹ Lubáragiñe ámu cátei, ába lídin Andrés álugei Simón Pédro le líbugaña, ába laríñagun lun.

—Darí wamaali Mesías, le Cristu, le lanúadirubei Búngiu lun lasálbaruniña gürígia lídaangiñe jafígoun.

⁴² Ába lanügüni Andrés Simón le ñíjin lubei Jesúsu, ába laríaguni Jesúsu Simón ligíbuagun, ába laríñagun lun.

—Simón, amürü le liraü Jonás, guetó Cefasba bíri, míni lan íri le. Pédro, o dübü.

Lanuádiruniña Jesúsu Felípe lúma Natanaél lun lánime disípulugu

⁴³ Larúgan, ába laríttagun Jesúsu lídin loúbawagun Galiléa, ába ladúnragun lúma Felípe, ába laríñagun lun.

—Falábana.

⁴⁴ Felípe ligía, Betsáidana le ñí lubei giñe lagánawa Andrés láu sun Pédro. ⁴⁵ Ábati lídin Felípe áluajei Natanaél, ába laríñagun lun.

—Aríja wamáali wügüri le uágubei labürüja Moisés tídan líburu to lánina lilúrudun Búngiu, le giñe uágubei jabürüja profétagu—Jesúsu le liraü José le Nazarétna.

⁴⁶ Ába laríñagun Natanaél.

—¿Níjein funági Nazarétna buíti?

Ába laríñagun Felípe lun.

—Jigábu baríja.

⁴⁷ Dan le laríjin Jesúsu layárafadun Natanaél, ába laríñagun.

—Nítén ában ladügawagun Israél le tímatimaati, úati yéguau lídan.

⁴⁸ Ába laríñagun Natanaél lun.

—¿Ída liñági basúbudirunina?

Ába laríñagun Jesúsu lun.

—Aríja numútibu lubáragiñe lagúarun Felípe bun, dan le tábugiñeñadibu lan tídibu ígo.

⁴⁹ Ábati laríñagun Natanaél lun.

—Maésturu, amürü Liraübei Búngiu, amürü jarúeitebei Israelítagu.

⁵⁰ Ába laríñagun Jesúsu lun.

—¿Bafíñerunbei nun ladügarügü naríñagun bun luágu aríja nánibu tábugiñe tídibu ígo? Baríjubati cátei weínamutimáati luei le.

⁵¹ Aríñagati giñe Jesúsu.

—Nínárün jáu, luágu jaríjubei lan siélu junréñu, añájame láni Búngiu ánjeligu aweínja lúma arárijá nougiñe, áu le Wügüri Garaüwarügüti.

2

Ában maríei lídan fulásu le gíribei Caná, le lídaanbei Galiléa

¹ Ürüwa wéyu lárigiñe, ñíñein ában maríei lídan ában fulásu gíriti Caná, le lídaanbei Galiléa. Níñounti lúguchu Jesúsu, ² amísurajóuati gíñeti Jesúsu

jáu sun láni disípulugu lídoun maríei ligía. ³ Ába tagúmuchun diweín, ába taríñagun lúguchu Jesúsu lun.

—Gumújatia diweín.

⁴ Ába laríñagun Jesúsu tun.

—¿Cági uágu bariñagei le nun, núguchu? Machülügili dan lun nídejan lídan cátei le.

⁵ Ába taríñagun joun ja éjeeragubaña.

—Adüga jumei sun le laríñagunbei jun.

⁶ Níñoun sísi dináa láutu dübü tibe to jayúsuruboun juríu lun jachíbagun jóungua según jagáburi. Ságü ában dináa tugúya, barütu wein o darándi gálun dúna. ⁷ Ába laríñagun Jesúsu joun éjeeragutiña.

—Buíngüda jumóun sun dináa to láu dúna.

Ába jabuínchagüdünnun buídu buídu. ⁸ Ábati laríñagun Jesúsu joun.

—Dabú jumati murúsun tídaangiñe, ábame janügüni lun le aríjubei láu fédu.

Ába jadügüni ítara. ⁹ Ábati louchuni le aríjubei láu fédu dúna ligía salígua lun diweínme, ibídiñoun lun jalíagiñeti lan, ja rügüñanu éjeeragubaña asúbudirei, ladüga jagía lan adáburubalin dúna. Ábati lagúarun le aríjubei láu fédu lun le amárieidubei, ¹⁰ ába laríñagun lun.

—Sun gürigia seríwi jamútu tubuídun-ágei diweín furúmiñe, dánti le guráaña amísurajoútiña gibe, ligía jéjeeragun diweín to furúmieguarügü, ánjeinti amürü, ába bareídunun tubuídun-ágei diweín dari guetó baságaroun.

¹¹ Cátei le, le ladügübei Jesúsu lídan fulásu le gíribei Caná le lídaanbei Galiléa, ligía furúmiñetibe miláguru le áubei larúfudei luweirigun, ába jafíñerun láni disípulugu luágu.

¹² Lárigiñe cátei le, ába lídin lídoun fulásu le gíribei Capernaúm, úara túma lúguchu, lamúlenu, jáma láni disípulugu, ába jeréderun átiri wéyu ñi.

*Labúgaguniña Jesúsu alúgurajatiña témpulurugugiñe
(Mt 21.12-13; Mr 11.15-18; Lc 19.45-46)*

¹³ Ábati lídin Jesúsu ubúruğu Jerusalén ladüga yaráfaali lan jafédun juríu le lánina páscua. ¹⁴ Ñi ladárraña ja alúgurajabaña bágasu, mudún, únjun, jáma buri ja ñúnbaña lídan jabára le ní lubei jasáansija seínsu joun gürigia. Lídan tübürürü témpulu ladárraña sun gürigia ja. ¹⁵ Dan le laríjinbalin Jesúsu cátei le, ába ladügün ában labeíjagüle láu gúrudu, ába labúgaguniña sun jagía lídaangiñe tübürürü témpulu jáu sun jalügüniña mudún jáma bágasu. Chagálei jaseínsun ja asáansijabaña seínsu, garábagualeí jadábulan. ¹⁶ Ába laríñagun joun ja alúgurajabaña únjun.

—¡Sagájumei sun cátei le yágiñe! ¡Manüga jumóun lúban Núguchi lun jalúguraagüleme!

¹⁷ Ábati jarítagun láni disípulugu luágu laríñawagún tídan líburu to Lerérun Búngiu. “Jángitina táu búban táu sun nanígi.”

¹⁸ Ábati jaríñagun juríu lun.

—¿Ca miláguru barúfudubei woun lun wasúbudiruni ánjein garícha bubei lun badügüni cátei le?

¹⁹ Ába laríñagun Jesúsu joun.

—Güríngua jumóun témpulu to, naráramagüdáyaboun lídan ürüwa wéyu.

²⁰ Ába jaríñagun juríu lun.

—Bián-wein-sísi irúmu janügün adügoun témpulu to, ¿lun biyáraaboun lan aráramagüda lídan ürüwa wéyu?

²¹ Lúgubu guánarü Jesúsu témpulu to uáguboun ladímureja joun. ²² Ligía dan lubeí le lásaarun lídaangiñe oúweni, ába jarítagn luágu dimúrei lé meja laríñagubei, ába jafíñerun luágu sun le tídaanbei líburu to Lerérun Búngiu lúma luágu dimúrei buri lé meja laríñagubei joun.

Subúsi le tídaanbei janígi gürígia lun Jesúsu

²³ Dan le Jerusalén lubeí Jesúsu lídan fédu le lánina páscua, sarágu jáña afíñerutiña luágu dan jarijinbaalin miláguru buri le ladáagubei lun larúfuduni luágu ligía lan Crístubei. ²⁴ Ánjeinti Jesúsu, míchaagunti lúngua jájaburugun ladüga subúdi láníña cátañañanu lan. ²⁵ Mabúseerunti laríñawagúniwa lun ída jáña lan gürígia, ligía lúngua subúdi lumúti cátei lan tídaanbei janígi.

3

Jesúsu lúma Nicodémo

¹ Níñein ában wügüri lánina jadámurin fariséogu, ába jádaangiñe jábutigu juríu, gíríti Nicodémo. ² Ába lídin Nicodémo ayánuja lúma Jesúsu gúñoun, ába laríñagn lun.

—Maésturu, subúdi wamúti luágu Búngiu lan oúnajabalibu arúfudaja woun, ladüga úati ni ában lun gayára lan larúfuduni lubáfu láu miláguru quei badügüni ánjein úa lubeí Búngiu lúma.

³ Ába laríñagn Jesúsu lun.

—Nínárün báu luágu le lan magüriajóunwayati, siñáti lebéllurun lídoun larúejan Búngiu.

⁴ Ába laríñagn Nicodémo lun.

—¿Ída lubági lagüriajóunwaya ában wügüri weíríyaali? ¿Gayáraati funági lebéllurunya turágeirugun lúguchu lúnya tagüriajani?

⁵ Ába laríñagn Jesúsu lun.

—Nínárün báu luágu le lan magüriajóunti lídaangiñe dúna lánina abásteruni, lúma lídaangiñe Sífiri Sándu, siñáti lebéllurun lídoun larúejan Búngiu. ⁶ Le agüriajóubei jádaangiñe agübürigu ja gürígiabaña, ítara líña ligáburi queísi jagáburi gürígia, le agüriajóubei lídaangiñe Sífiri Sándu, ítara líña ligáburi queísi ligáburi Sífiri Sándu. ⁷ Maweíridalá banígi luágu naríñagn bun luágu lúnti lánya jagüriajóuniwa sun gürígia. ⁸ Ítara quei láfurun garábali le nígiñe lumúti labúseera, agáambabei lamúri, ibídiñeti bun jalíagiñe lan liábin ni jalíñoun lan lídin, ítara jáña gíñe sun ja agüriajóubaña lídaangiñe Sífiri Sándu.

⁹ Ábayati laríñagn Nicodémo lun.

—¿Ída lubásan cátei le?

¹⁰ Ába laríñagn Jesúsu lun.

—Ába oúnwenbun maésturu Israélna amürü, ¿ibídiñeti cátei le bun? ¹¹ Nínárün báu luágu le lan wasúbudirubei, ligía lan wadímurejabei, geféen wagía luágu le aríja wamáalibeí, jugúya fariséogu, mafíñetün luágu le waríñagubei jun. ¹² Ánjein mafíñen jubeí nun dan le nadímurejan jun luágu buri cátei le lánina ubouú, ¿ída lubági jafíñera luágu le lánina síélu?

¹³ Úagili ni ában amúdeiruti siélun, lárigiñe ába larárirun ñígiñe lun gayára lan geféen lan luágu nueídügüya, áu le Wügüri Garaüwarügüti, le gábanbei siélu. ¹⁴ Ítara quei meja liñúrurun Moisés tiyáwa jéwe luágu wéwe lídan fulásu mageírawati lun jasálbaruba lan sun ja aríjitiña tuágun, ítara liñá giñe niñurúaba lan luágu gurúwa ¹⁵ lun sun lan le afñeruti nuágu, mídin lámuga máfiougati, siélun lámuga lídin abágarida ában ibágari le magúmuchaditi.

Lísiñejabu Búngiu joun gürígia

¹⁶ Weíriti jínsiñe gürígia ja ubouágubaña lun Búngiu darí lun loúnajanina, áu le Liraü le ábanrügüti, lun nouwen luágu jafígoun, lun sun lan ja afñerutiña nuágu, mídin jamámuga máfiougati, siélun lámuga jóudin, abágarida ában ibágari le magúmuchaditi. ¹⁷ Moúnajan lumútina Búngiu áu le Liraü ubouágun lun nichugun jadúnrun gürígia, loúnajanina lun jasálbarun ja ubouágubaña nuágu.

¹⁸ Le afñeti nuágu, áu le Liraü Búngiu, barü lumuti Búngiu quéisi madúnrunti, ánjein le maffñeti, gadúnrunjali ligíbugiñe Búngiu ladüga maffñen lan nuágu, áu le Liraü Búngiu le ábanrügüti. ¹⁹ Ja maffñebaña, gadúnrunjaña ligíbugiñe Búngiu ladüga dán buga le niábinbei ubouágun lun narúgoungagüdün láu, gúndaatimaatiña lílana ubóu láu lubúriga sügü láu larúgounga, ladüga cátei lan wuríbati jadáagubei. ²⁰ Sun ja adügübaña cátei wuríbati, iyéreeguti larúgounga joun, ába jadisedun lueí larúgounga ligía, lueí lasúbudirúniwa cátei wuríbati le jadügübei. ²¹ Ja adügübalin lugúndan Búngiu, jínsiñeti joun lun lídan jamá larúgounga lun larijiniwa luágu jarúma lan le jadügübei, láu lubáfu Búngiu.

Ladímurejaanya Juan luágu Jesúsu

²² Lárigiñe sun cátei le, ába lídin Jesúsu jáu láni disípulugu Judéoun, ába leréderun átiri dan ñi, abásteragüdaja. ²³ Ñíñein giñe Juan abásteragüdaja lídan fulásu le gírabei Enón, yaráfa lun Sálím, ladüga ñíñein lan sarágu dúna, ába buríti jayábingua gürígia, ába jabásterun. ²⁴ Lubáragiñe ladaürün Juan lasúsereda sun cátei le.

²⁵ Ábati jagúmeserun jádaangiñe lánigu Juan asígeneja jáma juríu luágu igáburi le lánina arúmaduni. ²⁶ Ábati jóudin aríñaga lun Juan.

—Aríjabásan maésturu, wügüri lé buga búmabei luágu óubaü le ñígiñe lubei láfurida wéyu libíti dúna Jordán, le ligíra lé meja uágubei badímureja woun, guetó labásteragüdajaña gürígia áni jafálaruñeíti sun gürígia.

²⁷ Ába lariñagun Juan joun.

—Siñáti níjein lan ni cáta lúma ni ában gürígia ánjein máma lubei líchugun Búngiu lun. ²⁸ Agáamba jumúti lubeígia naríñagun jun furáangu luágu máma lan áu Crístubei, luágu áu lan ában le oúnajoúbei lubá. ²⁹ Lídan ában maríei, adári ligía táubei ladári. Léti lumáda adári, le ñíbei agáambei, oúnwenbun lugúndan láu lagáambuni ladímurejan. Ítara níña gíñeti, oúnwenbun nugúndan luágu Jesúsu, ³⁰ ligía lúnti laweírigudúntima, áu lun núnabudúntima.

Le ñübinbei siélugiñe

³¹ Jesúsu, le ñübinbei siélugiñe, jóugiñeñein sun gürígia. Áu, múaruguna áu, áni lérügüñein lánina ubouú gunfaráanda nan. Ánjein le ñübinbei siélugiñe, jóugiñeñein sun gürígia, ³² luágu giñe le aríja láalibei lúma le agáamba láalibei ladímureja, míbetiña afñerutiña luágu le lariñagubei. ³³ Ánjeinti le afñeruti, lachouúrubei luágu inárüni lan le lariñagubei

Búngiu, láu lafiñerun. ³⁴ Le loúnajabei Búngiu, lerérun Búngiu ladímurejabei, ladüga mébejati líchuguni Búngiu láni Espíritu lun. ³⁵ Jínsiñeti Liraü Búngiu lun, rúlaali giñe sun cátei lújaburugun. ³⁶ Le afiñebei luágu Liraü Búngiu, gabágariti le magúmuchaditi, ánjeinti le májabei lafiñerun luágu Liraü Búngiu, mabágaribeibe libe ibágarige ligía áni mebelurunbei siélun, lábujurarügüba ligáñi Búngiu luágu.

4

Jesúsu túma würi to Samariána

¹ Aba jagáambun fariséogu luágu gíbetima jamá lánigu Jesúsu sügü jáu lánigu Juan, áni gíbetima gúrígía ñübintiña lun, lun jabásterun, ² láu sun máma lan Jesúsu abásteragüdajabaliña, lánigu abásteragüdajabaña. ³ Dan le lasúbudirunbalin Jesúsu cátei le, ába láfuridun Judéagiñe lun lagíribudun Galiléoun.

⁴ Lídán weíyaasu ligía lásügürübatei louábawagugiñe Samária. ⁵ Ítara liñáti lachülürün lídoun ában fulásu lídán Samária gíriti Sícar, yaráfa lun múa lé meja lígirubei Jacób lun José le liraü, le ában jádaangiñe binádu wagübürigu. ⁶ Ñíñein wélu le únbei jagúara luwélun Jacób, queíti buchá lan luágu Jesúsu eíbuga, ába lañúurun láru wélu ligía. Queí buri amídirugu óra ligía. ⁷ Tiábijati ában würi Samariána adábura dúna lídaangiñe wélu le, ába lariñagun Jesúsu tun.

—Rúba dúna nun.

⁸ Añángürati buga láni disípulugu agáñija eígini ubúrugu. ⁹ Ábati taríñagun würi Samariána to lun Jesúsu.

—¿Ída liñági bamúriajanbei dúna núma, lárigeñe juríu ban, nugúya Samariána?

(Mínsiñeguatiñati juríu jóungua jáma Samariána.) ¹⁰ Aba lariñagun Jesúsu tun.

—Lun jamúga subúdi báni edéweejani le líchugubei Búngiu, subúdibeí jamúga cátei lan le amúriajabei dúna búma, bamúriajaña jamúga núma, ába jamúga níchugun ában luwúyeri dúna le gayáraati líchugun ibágarige bun, bun.

¹¹ Ába taríñagun lun.

—Úagubeíti cába lan áu badábura dúna áni juliliti wélu le, ¿ída lubáti bíchuguni luwúyeri dúna ligía nun? ¹² Jacób, lé meja binádu wadügawagun, ígirubalin wélu le woun, guráti meja dúna lídaangiñe jáu sun lirájüñü jáma lilügüniña. ¿Weírigutibu funági sügü láu Jacób?

¹³ Ába lariñagun Jesúsu tun.

—Sun ja átubaña lídaangiñe dúna le, jamágürabudayaba, ¹⁴ ánjein le átuti lídaangiñe dúna le níchugubei, mamágürabudundügüyaali, ladüga dúna le lúnbei níchuguni lun, géseséenbei lídán lun líchugun ibágarige magúmuchaditi lun.

¹⁵ Ábati taríñagun lun.

—Rúbeibe dúna ligía nun, masándirundügüyaadina lámuga mágürabu, miábin nugúyame ya wélurugu adábura dúna.

¹⁶ Ába lariñagun Jesúsu tun.

—Beíba óugei búmari le úmabeibe bamárieida, ábame biábin.

¹⁷ Ába taríñagun lun.

—Mámaritina le maríeitina luma.

Ábati lariñagun Jesúsu tun.

—Binárün láu baríñagun luágu mámari ban le maríeiti búma, ¹⁸ ladüga seíngüjáña wügüríña úmatiña bagánawa, áni mamárieiduntibu lúma wügürí le úmabei bagánawa guetó. Aríñagaadibu inárüni.

¹⁹ Dan tagáambubalin würi to cátei le, ába taríñagun lun.

—Affíñetina luágu proféta ban. ²⁰ Binádu wagübürigu ja Samariána, judúguatiña meja lun Búngiu ya luágu wübü lígita, ánjein jugúya juríu, aríñagatün luágu Jerusalén lan fulásu le lúnbei ñi lan wájuduragua lun Búngiu.

²¹ Ába laríñagun Jesúsu tun.

—Affíñebá nun luágu nítebei lan dan lun jájuduragun lun Búngiu mídinga jugúya luágun wübü lígita, ni jídin Jerusalén. ²² Jugúya Samariána, ibídiñeti jun ca lan un jájuduragua, ánjein wagía, subúdi wamúti ca lan un wájuduragua ladüga lídaangiñe warásan wagía juríu liábin asálbaruni. ²³ Lachülürüba óra, áni niján óra ligía, lun mebéresenwa lan jalía lan jájuduragua gürígia lun Búngiu. Le lúnbei lebéreserunwa láu, ída líña lan ligáburi jájuduragun lun. lúnti jadügüni táu sun janígi lídan ában luwúyeri le áuti lagúndaara Búngiu, según lerérun. Niján luwúyeri ájuduraguni le láluajabei Búngiu jámagiñe gürígia. ²⁴ Espíritu Búngiu, ja ájuduragubaña lun, lúnti jadügüni láu sun janárün, mebéresenga láu cátei le arijúati.

²⁵ Ába taríñagun lun.

—Subúdi nun luágu liábinba lan Mesías le gíríbei Crístu, dánmeti liábin, lafúnraanguagüdübei sun cátei woun.

²⁶ Ába laríñagun Jesúsu tun.

—Áu Mesías ligía.

²⁷ Ligíati jachülürün láni disípulugu, ába laweíridun janígi láu jadáriruni Jesúsu adímureja túma ában würi, úati ni ában ganígiti lun lálügüdajan ca lan tabúseerubei o ca lan uágu layánuja túma. ²⁸ Ábati tígirunun würi tugúya tidína, ába tídin ubúruugu ougaña gürígia, ába taríñagun joun.

²⁹ —Jigougu jaríja ában eyéri aríñaguti sun cátei le adüga náalíbei nun. ¿Mamadügü funásan ligía Crístubei?

³⁰ Ábati jóúdingua ubúrugugiñe lun le ñíjin lubei Jesúsu. ³¹ Añájati buga disípulugu ayúmuragua lun Jesúsu lun leígin. ³² Laríñaga joun.

—Níjein cátei lun neígini le ibídiñeti jun.

³³ Ábati jagúmeserun disípulugu álügüdagua jámagua, ába jaríñagun.

—¿Máfuna barüjaña eígini lun?

³⁴ Ába laríñagun Jesúsu joun.

—Nadügüni lugúndan le oúnajabalina, agúmucheí luwádigimari, ligía neíginbei. ³⁵ Jugúya aríñagatün. “Níjeingua gádürü játi lubá alúbajani.” Ánjein áu, nariñajare jun. Aríja jumei nádü, dánjali lun lalúbajoún. ³⁶ Le ñadágimeinbei alúbaja, ibíja lumúti lafáyeiruaja, áni cáteiti le lalúbajabei, gürígia, lun jabíjini íbágari le magúmuchaditi siélu, lun lagúndaarun le ábunagubei úara lúma le alúbajabei. ³⁷ Quei le lubei bei laríñawagún. “Ámu le ábunagubei, ámu le alúbajabei.” ³⁸ Oúnaja náadün alúbaja le ñi lubei mábunagun jumá, ámu ábunagubaña, jugúya alúbaja.

³⁹ Sarágu jáña lílana fulásu ligía le láni Samária affíñerutiña luágu Jesúsu láu taríñagun würi tugúya joun luágu aríñaga láni sun le adüga táalíbei tun. ⁴⁰ Dánti le jachülürünbei Samariána le ñi lubei Jesúsu, ába jayúmuragun lun lun leréderun jáma. Ába leréderun bián wéyu ñi, ⁴¹ ábaya jafíñerun sarágu

gürígia dan le jagáambunbalin le laríñagubei. ⁴² Ábati jaríñagun tun würi tugúya.

—Mámarügaali luágu le bariñagubei woun waffínera, ladüga agáamba wamáali gíñe lúmagiñe, áni subúdi wamúti luágu ligía lan Crístubei le lasálbaja ubóu.

Lareídaguagüdüni Jesúsu liraü ában ñadágimeinti lúma urúei

⁴³ Bián wéyu lárigiñe, ába láfuridun Jesúsu Samáriagiñe, ába lasígiruni luweíyasun loúbawagun Galiléa, ⁴⁴ mídinti lageíra quei laríñaguni Jesúsu guánarü luágu madügüniwa lan gásu láu ában proféta lídan guánarü lageíra. ⁴⁵ Dan lachülürünbei Galiléa, resíbi jamúti lílana fulásu buídu, ladüga ñüdün jamá gíñe lídan fédu le lánina páscua Jerusalén áni aríja jamúti sun le ladügübei lídan fédu ligía.

⁴⁶ Ábayati lagíribudun Jesúsu lídoun fulásu le Caná le lídaanbei Galiléa, le ñí lubei lasálriraguagüda dúna lun diweínme. Ñíñeinti ában wügüri weíriguti, ñadágimeinti lúma urúei, níjein ában liraü sánditi lídan fulásu le gíribei Capernaúm. ⁴⁷ Dan lagáambunbei wügüri ligía luágu ñübinjali lan Jesúsu Judéagiñe lun Galiléoun, ába lídin aríjei, ába layúmuragun lun lun lídin lúbiñe lun lareídaguagüdüni liraü, ladüga madíseeli lan lun loúnwen. ⁴⁸ Ába laríñagun Jesúsu lun.

—Jugúya, ánjaün maríjin miláguru, maffíñetün.

⁴⁹ Laríñaga wügüri ligía lun.

—Queímoun furése lubáragiñe loúnwen niraü.

⁵⁰ Ábati laríñagun Jesúsu lun.

—Giríbubá búbiñoun, areídagua biraü.

Ába lafiñerun wügüri ligía luágu le laríñagubei Jesúsu lun, ába lídin. ⁵¹ Dan layárafadun tun lúban, ába jayábin lumúsuniña lubároun, ába jaríñagun lun.

—Magádieeli biraü.

⁵² Ába lálügüdüniña ca lan óra lagúmesera liraü areídagua, ába jaríñagun lun.

—Gúñaarü ladaünrún ában rábounwéyu lagídara abíruaü lueí.

⁵³ Ába larítagni luágu ligía lan óra laríñagun Jesúsu lun luágu areídaguuali lan liraü, ába lafiñerun luágu Jesúsu jáu sun lufámilian.

⁵⁴ Ligía libíaman miláguru le ladügübei Jesúsu dan le lagíribudunbei Judéagiñe lun Galiléoun.

5

Lareídaguagüdüni Jesúsu wügüri adádagaraali le Betésdana

¹ Lárigiñe cátei le, jadügüña juríu ában fédu, ába lagíribudun Jesúsu Jerusaléoun luágu fédu ligía. ² Ñi Jerusalén, yaráfa lun béna le gíribei Jabéneri Mudún, níjein ában dúna, Betésda líribei lídan jerérun juríu, seíngüñein lubéneri. ³ Sarágu jáña sánditiña roun ñi múarugu, ñíñanu maríjintiña, meíbuguntiña, jáma derégüdaña, jagúrabajañein lánjingichagun dúna. ⁴ Ladüga níjeinja dan, liábin ában ánjeli siélugiñe, ába lánjingichaguni dúna ligía, léti furúmiñeti sánditi le adáburuti lídoun dúna ligía lárigi lánjingichagun, ába lareídagun furúmieguarügü sándi le luágubei. ⁵ Ñíñeinti ában wügüri, darándi-widü írúmu láu láu sándi, ⁶ dan laríjinbalin Jesúsu wügüri ligía roun, subúdilei átiri lan dan láu ítara, ába laríñagun lun.

—¿Buséntibu bareídagun?

⁷ Ába loúnabun le sándibei.

—Úati cába lan anügana lídoun dúna dan le lánjingichagun. Ságu nálugun nadáburun, dabújali ámu nubáragiñe.

⁸ Ába laríñagun Jesúsu lun.

—Sarába, budáboun bubárari, beíba.

⁹ Lídan óra ligía, ába lareídagun, ába labúdunun lubárari, ába lagúmeserun eíbuga. Queíti lidáani lubeí eméraaguni wéyu ligía, ¹⁰ ába jaríñagun juríu lun le areídagubei.

—Wéyu le eméraaguagülei ugúñe, moún lumuti banügünun bubárari buóúgua.

¹¹ Ába laríñagun joun.

—Le areídaguagüdübalina aríñagubei nun. “Budáboun bubárari, beíba.”

¹² Ába jaríñagun lun.

—¿Cáteigi le aríñagubei bun. “Budáboun bubárari, beíba”?

¹³ Ibídiñetiti lun ca lan areídaguagüdübalin, ladüga gibetiña gürígia ñi áni ñüdünja bugáti Jesúsu. ¹⁴ Lárigiñe, ába ladúnragun Jesúsu lúma, témpulurugu, ába laríñagun lun.

—Guetó, quei areídaguaadibu lubeí, mafígounjadügüyabá lueí ladágarun ámu cátei janárimetimaati buágu.

¹⁵ Ábati lídin, ába lawísaruniña juríu luágu Jesúsu lan areídaguagüdübalin.

¹⁶ Ligía lébubei jeíbaajani juríu Jesúsu lun jáfaruni jilágubei ladüga buri ladáaguni cátei líbe le lídan wéyu le eméraaguagülei. ¹⁷ Ába laríñagun Jesúsu joun.

—Ñadágimeinti Núguchi chülü lúmoun dan le, áu ñadágimeintina gíñe.

¹⁸ Ligíatimaati jabúseerunbei juríu jáfaruni jilágubei, mámarügü ladüga lálalachaguni lúru du le lánina wéyu le eméraaguagülei, ladüga gíñe líchaagun lúngua quei Búngiu láu laríñagun luágu Lúguchi lan.

Lugúmadin Liraü Búngiu

¹⁹ Ábati laríñagun Jesúsu joun.

—Nínárün jáu, luágu siñá lan nadügün, áu le Liraü Búngiu, ni cáta láu náni nungua, le rügüñein naríjubei ladügün Núguchi, nadüga. Sun le ladügübei Búngiu Úguchili, adüga numúti gíñe, áu le Búngiu Irájü, ²⁰ ladüga jínsiñetina lun Búngiu, arúfuda lumúti sun le ladügübei nun, áni larúfuduba cátei weínamutimaati nun, le lúnti laweíridun janígi láu. ²¹ Ítara quei lásaaragüdüniña Búngiu Úguchili jiláaña lídaangiñe oúweni ába líchugun ibágari joun, ítara líña gíñe níchugun, áu le Búngiu Irájü, ibágari joun ja nabúseerun. ²² Magúseragüdünti Búngiu ni ában, rúrügü lumúti sun ubáfu nun, áu le Liraü, lun nadügüni, ²³ lun sun lan gürígia íchigei ában méme inébesei le jíchugubei lun Búngiu Úguchili nun. Le míchuti inébesei nun, áu le Búngiu Irájü, míchuti gíñe inébesei lun Búngiu Úguchili le oúnajabalina.

²⁴ ‘Nínárün jáu, luágu le lan eténiruti lun le naríñagubei lun, afíñe ligía luágu le oúnajabalina, gabágariti le magúmuchaditi, masíadirúnwabei gíñe, sügüjali lídaangiñe féridi lídoun ibágari le magúmuchaditi. ²⁵ Nínárün jáu luágu nítebei lan dan, áni niján dan ligía, dánme le jagáambuni jiláaña numálali, ja ñüdünbaña láu le nubeíbei, gabágaribaña. ²⁶ Ladüga gabáfuti Búngiu Úguchili lun líchugun ibágari, rújali gíñe ubáfu nun, áu le Búngiu

Irájü, lun níchugun ibágari, ²⁷ rújali gíñe ubáfu nun lun nagúseragüdüniña gürígia ladüga Wügüri Garaúwarügüti áu. ²⁸ Maweídalá janígi luágu le, ladüga lachülürüba dan lun jagáambuni sun jiláguaaña numálali, ²⁹ ábame jáfuridunga lídaangiñe jamúaja. Já meja arúfudubalin luágu nánigu jamá láu jadügüni buíti ubouágu, jásaaruba lun jaganouñ lúma Búngiu lun sun dan, ánjañati ja arúfudubalin luágu lánigu jamá Máfia láu jadügüni wuríbani, jásaaruba lun jasiadirúniwa lun máfiougati lun sun dan.

Larúfuduni Jesúsu lagúmadijan

³⁰ ‘Siñáti nadügün ni cáta láu náni núngua. Quei laríñawagúniwa nun, ítara líña nagúseragüdün, áni buíti ligáburí nagúseragüdün ladüga mouchun nan lun nadügüni le nabúseerubei, lueídügüya le labúseerubei Nóguchi le ouñajabalina. ³¹ Ánjein áuba lubei geféen nuougua, mouñti le nariñagubei. ³² Níjein ámu le geféenbei luágu náni fuleísei, áni subúdi ni nun luágu le lan laríñagubei nuágu, gebégiti. ³³ Jugúya ouñajatün álügüdei Juan nuágu, áni le louñabagülebei jun, inárüni. ³⁴ Áu magúrabuntina ladímurejan ni ában wügüri luágu nufúleisein, narítaguagüda rügüñaadün luágu le laríñagubei Juan nuágu lun gayáraabei lan jafiñerun nuágu lun jasálbaruba lan. ³⁵ Ítara líña meja Juan quei ában lámpu le durúnguati, ru ligía larúgounga, áni jugúya aráanseñu jíña méjati lun jerésibiruni larúgounga ligía luágu murúsun dan. ³⁶ Níjein ában cátei luágu nufúleisein buítimaati sügü láu le laríñagubei Juan. Lé buri cátei le nadügübei, le méme buri uágubei laríñaga Nóguchi nun lun nadügüni, arúfuda lumúti luágu Nóguchi lan ouñajabalina le tímatimaati. ³⁷ Nóguchi le ouñajabalina, arúfuda láali luágu áu lan Liraü le ouñajoubei lun nasálbaruniña gürígia ubouágu, láu sun magáambun jumágili lan lumálali Búngiu, maríjin jumeí. ³⁸ Mebélugili lerérun jídoun, ladüga mafiñetün nuágu, áu le louñajabei. ³⁹ Atúriaja jumútu Lerérun Búngiu láu sarágu goúnigi, ladüga agúraba jumá jadáriruni ibágari le magúmuchaditi tídan, láu sun líra, líburu tugúya adímurejaboun nuágu, ⁴⁰ áni májatün jíábin númoun lun jibíjini ibágari ligía.

⁴¹ ‘Máluajantina lun janügünina gürígia weírigu. ⁴² Gáma lúmoun, subúdi numútün, áni subúdi numúti luágu mísiñen lan Búngiu jun. ⁴³ Áu, lueigiñe loubadina Nóguchi niábin, áni jugúya, merésibirun jumúti, ánjein ñübin ámu láu láni lúngua, ligíaba jerésibira. ⁴⁴ ¿Ída lubásan jafiñerun nuágu, resíbitünga uweíriguni jumagiñegua, máluajan jumúti uweíriguni le lúmagiñeti Búngiu le ábanrügüti? ⁴⁵ Marítagua jumátia luágu níchuguba lan jidúnrun ligíbugiñe Nóguchi, Moisés guánarügüba íchiga jidúnrun, le guánarügü uágubei jíchigei jeménigin. ⁴⁶ Ladüga, lun jamúga afíñe jumá luágu le laríñagubei Moisés, jafiñeruña jamúga gíñe nun, ladüga abürüjati Moisés nibügürü. ⁴⁷ Ánjein mafiñen jubei luágu le labürüjabei, ¿ída lubáti jafiñerun luágu le nariñagubei jun?

6

Leígaqüdün Jesúsu seíngü mílu wügüríña
(Mt 14.13-21; Mr 6.30-44; Lc 9.10-17)

¹ Lárigiñe, ába lídin Jesúsu loubáfurugun dúna le Galiléa, le méme gíñe dúna le gíríbei Tibérias. ² Sarágu jáña gürígia afálarei ladüga jaríjini buri miláguru le ladágubei, láu lareidaguagüdüniña sánditiña. ³ Ábati laweínrun Jesúsu luágun ában wübü, ába lañúurun ñi jáma láni disípulugu. ⁴ Yaráfaaliti

páscua, le jafédun juríu. ⁵ Dan laríjinbei Jesúsu luágu sarágu jáña lan gürígia afálaruti, ába laríñagun lun Felípe.

—¿Jalíabasan wagáñija eígini joun sun gürígia ja?

⁶ Laríñagunbalin líra lúnrgü lagáambun cába lan laríñaga Felípe, Jesúsu, subúdi láali cába lan ladüga. ⁷ Ábati laríñagun Felípe lun.

—Ni bián-san fiádürü fein loúguaboun lun tafánreinjoúniwa murúsun murúsun jádan sun gürígia ja.

⁸ Ábati laríñagun Andrés, ában gíñe jádaangiñe disípulugu, le lamúlen Simón Pédro, lun.

⁹ —Níjan ában irájü ya, nújein seíngü fein lúma, jáma bián úduraü, loúguabei líra joun sarágu gürígia.

¹⁰ Ábati laríñagun Jesúsu.

—Aríñaga jumá joun súngebui lun jañúurun.

Ñíñanuti jawára seíngü mílu wügüríña bougudin jawei würíña jáma irájüñü. Queíti ñíñein lan sarágu sagádi lídan fulásu ligía, ába jañúurun.

¹¹ Ábati lanügünun Jesúsu fein lújaburugu, lárigiñe líchugun eteíngiruni lun Búngiu, ába líchugunun joun láni disípulugu, ába jafánreinjanun disípulugu jádan sun ja ñúnbaña. Ligía méme ladüga jáu úduraü, ruíñalei sun le jabúseerubei joun. ¹² Dan le quimúleña, ába laríñagun Jesúsu joun láni disípulugu.

—Abúdaja jumei sun le ígiragubei, mabúlegu lámuga ni cáta.

¹³ Ába jabúdajani, ába jabuínchagüdün dúusu faniñe láu tife fein le ígiragubei tídaangiñe seíngü fein. ¹⁴ Dánti le jaríjinbalin gürígia miláguru le, le ladügubei Jesúsu, ába jaríñagun.

—Inárüni luágu niján lan proféta lé meja lúnbei liábin uboúagun.

¹⁵ Queiti lasúbudiruni Jesúsu luágu busén jamá janügüni láu érei lun jadügüni urúeime, ába lídin lábugua luágun wúbü.

Leíbugun Jesúsu ligíbuagu dúna

(Mt 14.22-27; Mr 6.45-52)

¹⁶ Dan le lagúñedunbei, ába jarágachun láni Jesúsu disípulugu lárün dúna, ¹⁷ ába jádinagun tídoun ában ugúnein, ába jagúmeserun ánjiñuragua lun jachülürün Capernaúm. Búrigaaliti, machülüti Jesúsu jámoun. ¹⁸ Ába lagúmeserun garábali áfuragua jére, ába lérougadun. ¹⁹ Dan le awáanseña luára seíngü o sísi quilómetros, ligía jaríjin liábin Jesúsu tuágun ugúnein, eibugeina ligíbuagu dúna, ába janúfudedagun. ²⁰ Ába laríñagun joun.

—Manúfueda jumá, áu le.

²¹ Ábati jerésibiruni láu ugúndani tídan ugúnein, ába jachülürün lídoun fulásu le ñíjin lubei jóudin lídan murúsun óra.

Jáluajani gürígia Jesúsu

²² Larúgan, ába jaríjin gürígia ja eréderubaña loubáfurugu luágu ñüdünja jamá buga disípulugu tídan ugúnein to ñíboun áni tugúya rügüñoun ñi, áni mídin lan Jesúsu jáma. ²³ Súnti dan ligía, ába tiábingua ugúnein ubúrugugiñe Tibérias lun lídoun ában fulásu yaráfa lun le ñí lubei jeígoun fein lárigi leteíngirun Jesúsu tuágu. ²⁴ Dánti jaríjini gürígia luágu úa lan Jesúsu ñi, ni láni disípulugu, ába jádinagun tídoun ugúnein buri tugúya, ába jóudin Capernaúm áluajei.

Jesúsu, fein to lánina ibágari

25 Dan le jachülürünbei loubáfurugu dúna, ába jadáriruni Jesúsu, ába jaríñagun lun.

—Maésturu, ¿ída búgasan biábin?

26 Ába laríñagun Jesúsu joun.

—Nínárün jáu luágu ladüga lan jeígin darí lun jaquímuledun jáluajana, máma ladüga gunfaráanda jumáni laníchigu buri miláguru. 27 Madíjerida jumá luágu eígin le gagúmuchaditi le lúntibei júgubu, áluaja jumeí eígin tun juwáni, le íchugubei ibágari magúmuchaditi. Ligía eígin le lúnbei níchuguni jun, áu Wügüri Garaüwarügüti, ladüga rúlaali Búngiu Úguchili ubáfu nun lun níchuguni ibágari ligía.

28 Ábati jaríñagun lun.

—¿Ída lubásan wadüga lun wóudin láu le lubeíbei Búngiu?

29 Ába laríñagun Jesúsu joun.

—Le labúseerubei Búngiu, lun jafíñerun nuágu, áu le loúnajabei.

30 Jaríñagati lun.

—¿Cábagi seíni gayára barúfudun woun lun wafíñerun buágu? ¿Cági cátei badügübei? 31 Binádu wagübürigu jouítiña meja fein to gíriboun maná lídan fulásu mageírawati, quei taríñaguni Lerérun Búngiu. “Jougüda lumútiña Búngiu fein to siélugiñetu.”

32 Ába laríñagun Jesúsu joun.

—Nínárün jáu luágu máma lan Moisés íchugubarun fein siélugiñetu tugúya joun, Nóguchi íchugubei fein joun áni ligía gíñe íchugubarun fein siélugiñetu jun to tímatimaatu. 33 Ladüga fein to líchuguboun Búngiu, tugúya to aráriruboun siélugiñe áni rúti gíñe ibágari joun lílana ubóu.

34 Ábati jaríñagun lun.

—Rúboun fein tugúya woun súnwandan.

35 Ába laríñagun Jesúsu joun.

—Áu fein to íchuguboun ibágari. Le ñübinti númoun, malámadügüyaarume luwáni, le afíñeruti nuágu, mamágürabudügüyaaru gíñe luwáni. 36 Quei le nubeíbei jun, jugúya maffíñetün láu sun aríja jumáadina lan. 37 Sun gürígia ja líchugubaña Nóguchi nun, ñübintiña nun, játi ñübintiña númoun mabúgun nubáña. 38 Máma niábiña siélugiñe lun nadügüni nugúndan, le náni núngua, niábiña lun nadügüni lugúndan le oúnajabalina. 39 Léti labúseerubei Nóguchi le oúnajabalina, lun mefédirun nan ni ában jádaangiñe ja líchugubaña nun, lun sarágüdarügü náníña lídaangiñe oúweni lídaanme lagúmujoún wéyu. 40 Le labúseerubei le oúnajabalina, lun sun lan ja anügütina quéisi Liraü Búngiu, afíñe jagía nuágu, lun gabágari jamá le magúmuchaditi, áni násaaragüdübaña lídaangiñe oúweni lídan lagúmujoún wéyu.

41 Ába jagúmeserun juríu adímureja wuríba luágu Jesúsu ladüga laríñagun luágu ligía lan fein to aráriruboun siélugiñe. 42 Ába jaríñagun.

—¿Ma funági Jesúsu le liraü José le? Subúdi wamúti lúguchi túma lúguchu. ¿Ída liñáti laríñagunbei luágu siélugiñe lan larárira?

43 Ábati laríñagun Jesúsu joun.

—Madímureja jumá nuágu. 44 Siñáti liábin ni ában númoun ánjein máma lubeí lanügün Búngiu Úguchili le oúnajabalina, áni násaaragüdübei lídaangiñe oúweni lídan lagúmujoún wéyu. 45 Laríñajare tídan líburu to

jerérun profétagu. “Larúfudajaba Búngiu joun súngubei.” Sun lubeíti ja agáambubalin Búngiu Úguchili, furéndeí jagía lúmagiñe, ñübintiña nómoun.

⁴⁶ Mâma jamúgata luágu níjein lan aríjiti Búngiu Úguchili. Áu le ñübinbei lúmagiñe Búngiu, áu rügüñein aríjei. ⁴⁷ Ninárün jáu luágu le lan affiñeti nuágu, gabágariti le magúmuchaditi. ⁴⁸ Áu fein to íchuguboun íbágarí. ⁴⁹ Jóutiña binádu jagübürigu fein to maná lídan fulásu mageírawati áni láu sun luwúyeri jíláguatiña. ⁵⁰ Áu, tuágu fein to aráriruboun siéluigiñe nadímureja, lun ja lan eígitu, lúmounbaña Búngiu. ⁵¹ Áu méme fein wínwantu tugúya to aráriruboun siéluigiñe, le eígiti tídaangiñe fein tugúya, labágariduba le tímatimaati lúma Búngiu lun súnwandan. Fein to lúnboun níchugunun, nógubu guánarü, níchugubei lun gayáraabei lan jabágaridun gürígia lun sun dan lúma Búngiu.

⁵² Ábati jeréderun juríu adímureja jámagua, ába jaríñagun.

—¿Ída lubásan leígagüdüni le lúgubu guánarü woun?

⁵³ Laríñaga Jesúsu joun.

—Ninárün jáu luágu ánjaün lan meígin lídaangiñe nógubu, áu Wügüri Garaüwarügüti, mátun jumeíme níta, mabágaribadün. ⁵⁴ Le eígiti nógubu, gurálei níta, gabágariti tímatimaati le magúmuchaditi, áni násaaragüdübei lídaangiñe ouweni lídan lagúmujoún wéyu. ⁵⁵ Ladüga eígini le tímatimaati nógubu, uníñein le tímatimaati níta. ⁵⁶ Le eígiti nógubu, gurálei níta, lídaañein ában núma, áu lúma. ⁵⁷ Úguchili le ouñajabalina, gabágariti, áni áu, gabágaritina gíñe lídaangiñe, ítara méme líña, le awínwanduti nídaangiñe, gabágaribeí nídaangiñe. ⁵⁸ Tuágu fein to aráriruboun siéluigiñe nadímureja. Mítaraantu fein to quei maná le jeígubei binádu jagübürigu, láu lan sun luwúyeri jíláguatiña, le eígiti tídaangiñe fein to, labágariduba tímatimaati lun sun dan lúma Búngiu.

⁵⁹ Lídan adámuridaguni tídan jalígilisin juríu to Capernaúboun, ñi larúfudajei Jesúsu cátei le.

Dimúrei lánina íbágarí magúmuchaditi

⁶⁰ Sarágu jáña jádaangiñe ja afálarubalin Jesúsu, dan le jagáambunbalin arúfudajani le, ába jaríñagun.

—Cátei le laríñagubei, jénreenguti lerésibirúniwa, ¿cábasan adüga gásu láu?

⁶¹ Ába lasúbudiruni Jesúsu luágu jadímurejaña lan luágu cátei ligía, ába laríñagun joun.

—¿Wuríbati láburujan líra jun? ⁶² ¿Cába jamúga funáti asúsereda ánjana jamúga jaríja, áu Wügüri Garaüwarügüti, awárirá nárigoún siélu le meja ñi nubei furúmiñe? ⁶³ Náni Espírítu, ligía íchugubei íbágarí tímatimaati, nóguburügü, siñáti líderagunün. Áni sún buri cátei le naríñagubei jun, máma luáguti eígini le lúnti jurágeirugu, luáguti eígini le túnti juwáni, le íchugubei íbágarí magúmuchaditi. ⁶⁴ Áni añájeingua jídaangiñe, mafíñetiña.

Ladüga lúmagiñe furúmiñeti dan, subúdi láña Jesúsu cátaña lan mafíñebaña, lúma cátei lan le lúnbei lalúguruni. ⁶⁵ Ába laríñagun.

—Ligía naríñagunbei jun luágu siñá lan liábin ni ában nómoun ánjein máma lubeí Núguchi Búngiu agúarubei lun.

⁶⁶ Lúmagiñe dan ligía, sarágu jáña jádaangiñe ja afálarubalin Jesúsu, ába jígiruni, ába meíbugunjaña lan lúma. ⁶⁷ Ábati laríñagun Jesúsu joun dúusu disípulugu.

—Ángi jugúya, ¿buséntün giñe jídin nueí?

⁶⁸ Ába loúnabun Simón.

—¿Cábagi úmoun woúdin? Dimúrei buri le baríñagubei, lánina ibágari tímatimaati le magúmuchaditi. ⁶⁹ Wagía affíneediwa, áni subúdi wamúti luágu amúru lan Cristubei le Liraú Búngiu wínwanti.

⁷⁰ Ába laríñagun Jesúsu joun.

—¿Másan áu anúadajabalün dúusugubei jugúya? Láu sun líra, níjein ában jídaangiñe láni Máfia.

⁷¹ Dan laríñagunbalin Jesúsu líra, luáguñein Júdas, le liraú Simón Is-carióte, ladüga ligíaba lan alúgurei, láu sun ában lan jádaangiñe dúusu disípulugu ligía.

7

Mafíñeruntiña lamúlenu Jesúsu luágu

¹ Lárigiñe sun cátei le, ába eíbugañaja lan Jesúsu loúbawagu Galiléa, mabúseerunti leréderun Judéa ladüga ñi buséntiña juríu jáfaruni jílagubei.

² Queíti yaráfaali lan ában lídaangiñe jafédun juríu le gírubei tufédun dibásein,

³ ába jaríñagun lamúlenu lun.

—Meréderabá ya, beíba Judéoun aríja jamámugei giñe bánigu ja ñíbaña cátei lé buri badügübei. ⁴ Dan le busén lan ában gürígia lasúbudirúniwa, madügün lumúti buri cátei arámudaguarügü. Queíti adüga ban cátei líbeina le, adügabeí ligíbugiñe sun ubou.

⁵ Ni íbini lamúlenu mafíñetiña luágu. ⁶ Ábati laríñagun Jesúsu joun.

—Machülügili dan lun nídin Jerusalén luágu fédu ligía, ánjein jun, buíti furúmierügü óra. ⁷ Siñáti jiyéeregudún joun ja lánina ubou le, anáti áu, iyéeregutina joun, ladüga geféentina luágu wuríba lán buri cátei le jadügübei. ⁸ Jeíba lídan fédu, áu mídinbadina guetó, machülügili nidáani lun nídin.

⁹ Lárigiñe laríñaguni sun le joun, ába leréderun Galiléa.

Jesúsu lídan fédu le tánina dibásein

¹⁰ Lárigiñe jóudin lamúlenu, ligía lídin Jesúsu lídan fédu ligía, mafúnraangunrügü líña, camá jamuga mabúseerunti larijoúniwa. ¹¹ Ítara líña jáluajani juríu lídan fédu ligía, ába jaríñagun.

—¿Jageí funásan wügüri le?

¹² Sarágu jañáti adímurejatiña luágu jádan gürígia. Níñanu aríñagutiña luágu ában lan wügüri buíti ligía, jíbiri aríñaga. “Mabuídunti, yéegua lumútiña gürígia.”

¹³ Úati ní ában adímurejati furáangu luágu, ladüga janúfude jaweí juríu.

¹⁴ Lamídownjali fédu lúmagua, ligía lebéelurun Jesúsu témpulurugun, ába lagúmeserun arúfudaja. ¹⁵ Ába laweíridun janígi juríu, ába jaríñagun.

—¿Ída liñásan lasúbudirunbei le sarágu cátei, matúriajaanga ligía?

¹⁶ Ába laríñagun Jesúsu joun.

—Le narúfudajabei, máma nídaangiñeti, lídaangiñeti le oúnajabalina.

¹⁷ Ánjein níjein lubeí ában le aráanseti lun ladügüni le labúseerubei Búngiu, lasúbudirubei ánjein lúmagiñeti lubeí Búngiu le narúfudajabei lúmoun luágu lan nání nungua nadímureja. ¹⁸ Le adímurejabei luágu láni lúngua, ladügüni lun janügüni gürígia weíri, le ouchubei lun lanügüniwa le oúnajabalin weíri, ligía aríñagubalin inárüni, áni máma ligía biángua tigíbu.

¹⁹ ‘¿Ma inárüni luágu rúlaani Moisés lúru du jun? Láu sun líra, úati ni ában jídaangiñe úaraduti lúma lúru du ligía. ¿Ca uágu jabúseera jáfarunina jilágubei?

²⁰ Ába jariñagun lun.

—Níjein espíritu wuríbati bídan, ¿ca busénbei láfarunibu jilágubei?

²¹ Ába lariñagun Jesúsu joun.

—Luágurügü ában cátei le nadügübei lídan wéyu le eméraaguagülei laweírda janígi sun jugúya. ²² Arúfudaja lumúti Moisés luáguti jagáburi juríu le circuncisión, (láu sun máma lan ligía agúmeserubalin igáburi ligía, jagúmeserun binádu lagübürigu lubáragiñe), ligía lébubei lerésibirun ában irájü circuncisión íbini lídan lan wéyu le eméraaguagülei. ²³ Ánjein adüga jubálin líra íbini lídan lan wéyu le eméraaguagülei lueírügü jadúraaguni lilúrudun Moisés, ¿cáti uágu jagáñida núma lueígiñe nareídaguagüdüni lúgubu ában wügüri dayárugubei lídan wéyu le eméraaguagülei? ²⁴ Masáminara jumá luágu cátei quéisi larijiniwa, samína jumá luágu quéisi lubeí.

Ladímurejan Jesúsu luágu ladügawagún

²⁵ Ábati jagúmeserun jádaangiñe ja aganoúbaña Jerusalén álügüdaja.

—¿Másan niján le jáluajabei lun jáfaruni jilágubei? ²⁶ Nijánga adímureja ligíbugiñe guríriguau, áni úati ni ában aríñaguti ni cáta lun. ¿Léfufasan afiñe jamá gumádimatiña luágu wügüri lan le Crístubei? ²⁷ Subúdi woun jalíagiñe lan liábin le, ánjeinti dánme le liábin Crístu, ibídiñebei ni ca un jalíagiñe lan liábin.

²⁸ Dan lagáambubalin Jesúsu cátei le, dan larúfudajaña lubeí témpulurugu, ába lariñagun rein.

—¡Subúdi jumútina lubeíti, subúdi jumeí jalíagiñe lan niábin! Máma láu náni núngua niábin, ában le inárünibeí luágu níjein lan, ligía oúnajabalina, áni ibídiñeti jun. ²⁹ Áu, subúdi numúti ladüga lúmagiñe lan niábin, áni ligía oúnajabalina.

³⁰ Ába yebéti jabúseerun jadáürüni, úati ni ában agúuruti luágu ladüga machülügili lan dan lun loúnwen. ³¹ Sarágu jáña afíñerutiña luágu, ába jariñagun.

—Dánme le liábin Crístu, ¿ladügüba funági ámu miláguru sügü láu wügüri le?

Jounajan fariséogu polisía adáürei Jesúsu

³² Ába jagáambuni fariséogu le jariñagubei gürígia luágu Jesúsu, jagía jáma jábutigu fádirigu, ába jounajan polisía témpulurugugiñe lun jadáürüni.

³³ Ábati lariñagun Jesúsu.

—Murúsunrügübei dan neréderun júma ya, ábame nagíribudun lúmoun le oúnajabalina. ³⁴ Jáluajabadina, madári jubádina, ladüga siñábei lan jídin le ñíjinbadina lubeí.

³⁵ Ábati jagúmeserun juríu álügüdagua jámagua.

—¿Jalíñounba funásan lídin le siñábei lubeí nege wadáriruni? ¿Leíbuga funa jámoun juríu ja jagáaguabaña gürígia ja güriégu, lun larúfudajan joun güriégu? ³⁶ ¿Ca míni lan láu lariñagun woun. “Jáluajabadina, madári jubádina ladüga siñábei lan jídin le ñíbadina lubeí?”

Líseesen dúna wínwanti

³⁷ Le lagúmujoún wéyu lídan fédu ligía, ligíatima weírígubei. Lídaanti wéyu ligía, ába laráramun Jesúsu, ába lariñagun láu umálali reínti.

—Le mágürabutu luwáni, ñübinlá númoun, gurála. ³⁸ Le afiñeti nuágu, láwiyujaba dúna wínwanti tídaangiñe lanígi, quei taríñaguni Lerérun Búngiu. ³⁹ Lariñaguña Jesúsu láu líra luágu ja lan afiñerutiña luágu, jerésibirubei lan Sífiri Sándu, dan ligía, miábingili Sífiri Sándu ladüga magíribudungili lan Jesúsu larigóun siélun lídoun luweírigan.

Fánreinguaü jádan gürígia

⁴⁰ Níñanu jádaangiñe gürígia, dan le jagáambunbalin cátei le, ába jaríñagun. —Inárüni luágu niján lan proféta lé meja lúnbei liábin.

⁴¹ Jaríñaga jíbiri.

—Niján Crístubei.

Jaríñaga jíbiri.

—¿Ída lubásan Galiléanabei lan Crístu? ⁴² Tariñajare Lerérun Búngiu luágu ladügwagunbei lan uréi David Crístu, áni Beléngiñetibeí lan, fulásu meme le ñígiñeti lubeí David.

⁴³ Ába lubeíti jafánreinragun gürígia lueígiñe Jesúsu. ⁴⁴ Níñanu yebe abúseerutiña jadáürüni, úati ni ában adügüti.

Mafiñetiña gumádimatiña luágu Jesúsu

⁴⁵ Ába jagíribudun polisía ja tánina témpulu jarigóun jámoun fariséogu jáma jábutigu fádirigu. Ába jaríñagun joun polisía.

—¿Ca uágu manügün jubálin?

⁴⁶ Ába jaríñagun polisía.

—¡Úagili ni ában adímurejati quei ladímurejan wügüri le!

⁴⁷ Ábati jaríñagun fariséogu joun.

—¿Ígiraguagüdaadün giñe júngua lun leyéedunün? ⁴⁸ ¿Níjein funági ában jádaangiñe wábutigu o jádaangiñe lan fariséogu afiñeruti luágu? ⁴⁹ Anjaña gürígia ja, ja afálarubalin wügüri ligía, ja ibídiñejabubaña lun lúrudu, iñarawagúaaña.

⁵⁰ Nicodémo, le ñüdüñbei adímureja lúma Jesúsu gúñoun, ligía ában jádaangiñe fariséogu, ába lariñagun joun.

⁵¹ —Según walúrudun, siñáti wasiadiruni ában wügüri magáambunga wameí furúmiñe lun wasúbudiruni ca lan lidúnrunbei.

⁵² Ábati jaríñagun lun.

—¿Galiléana giñe amürü, badímurejaanbei luágu lufúleisein? Atúriajaboún Lerérun Búngiu, basúbudirubei luágu úagili lan ni ában proféta Galiléana.

⁵³ Ába jóudin cáda ában jábiñoun.

8

Würi maríeitu to aganoúboun luma ámu wügüri

¹ Anjeinti Jesúsu, ába lídin luágun wübü le gíribei Olívos. ² Larúgan bináafin, ába lagíribudun témpulurugun, ába jayábin sun gürígia lubádun, ába lañúurun, ába lagúmeserun arúfudaja joun. ³ Ábati janügün arúfudajatiña lilúrudun Moisés jáma fariséogu ában würi jadáriragun lúma ámu wügüri lueí túmari. Ába jíchugunun jamádaangua ja ñibaña jámagua, ⁴ ába jaríñagun lun Jesúsu.

—Maésturu, nuján würi to, wadáriragun lúma ámu wügüri lueí túmari.

⁵ Lariñajare lilúrudun Moisés jawágu jíbe würiña ja, lun jáfarawágun jílagubei láu dübü. ¿Cági baríñagubei?

⁶ Jaríñagunbalin líra lun jaríjin lábun, lun gébuna lan jíchugun lidúnrun. Ábati lélemuchun Jesúsu, ába labürüjan múarugu láu lújabu. ⁷ Queíti jasígirun álügüdaguei, ába laráramun, ába laríñagun joun.

—Furúmiñeguarügü jídaangiñe le mafígounti, chüleí furúmiñeti dübü tuágu.

⁸ Ábaya lélemuchun, ába lasígirun abürüja múarugu. ⁹ Jagía, le jagáambubalin le laríñagubei, ába jasándiragun jóungua luágu gafígoun jamá, ába jáfuridunga ában ában, jagúmesera jámagiñe ja weínamutimáajañabaña. Dánti le furíjaña súngubei, ába ladáriragun Jesúsu lúngua lábugua túma würi tugúya quei teréderunbei ñi. ¹⁰ Ábati liñúraguni Jesúsu lichügü, ába laríñagun tun.

—¿Jagáñasán buga ja íchugubaña bidúnrun? ¿Úati ni ában asíadirutibu lun bouñwen?

¹¹ Ába taríñagun lun.

—Uá, úati ni ában.

—Ábati laríñagun Jesúsu tun.

—Ni áu, masíadirun nubádibu, beíba, madügadügüyabá figou.

Jesúsu lilámpun ubou

¹² Ábaya ladímurejan Jesúsu joun güri-gia, ába laríñagun.

—Áu lilámpunbei ubou, le afálarutina, libíjubei larúgouna le anügübei güri-gia lídoun íbágarí magúmuchaditi, áni meíbugunbei lídan lubúriga.

¹³ Ábati jaríñagun fariséogu lun.

—Amürü, badímurejaña buíti buou-gua, mebégiti líra.

¹⁴ Ába laríñagun Jesúsu joun.

—Le nariñagubei gebégiti, láu sun áu lan adímurejabei buíti nuou-gua. Áu, subúdi numúti jalíagiñe lan niábin lúma jalíñounba lan nídin, ánjein jugúya, íbídiñeti jun jalíagiñe lan niábin ni jalíñounbadina lan. ¹⁵ Jugúya, jasáminarun nuágu queísi luwúyeri lasáminarun ubou, áu, magúseragüdüntina ni ában. ¹⁶ Ánjana jamúga agúseragüda, nadügüñe jamúga láu úarani, ladüga mámarügüba áu agúseragüda, Núguchi le ouñajabalina lagúseragüdüba giñe núma. ¹⁷ Bürüwati lídan jilúrudun luágu dan lan geféen jamá bián güri-gia luágu ában méme cátei, lúnti lan lafíñerún joun. ¹⁸ Ítara liñáti áu ában le geféenbei luágu náni fuleísei, Núguchi le ouñajabalina, ligía giñe ában le geféenbei nuágu.

¹⁹ Ábati jaríñagun lun.

—¿Jageígi Búguchi?

Ába laríñagun joun.

—Jugúya, íbídiñetina jun, ni Núguchi, íbídiñeti giñe jun, lun jamúga subúdi jumánina, subúditi jamúga giñe Núguchi jun.

²⁰ Lídan laríñagubalin Jesúsu cátei le, larúfudajaña témpulurugu lídan fulásu le ñí tubeí buri gáfu to lágei seínsu. Madáürún lumúti ni ában ladüga machülügili lan lidáani lun louñwen.

Laríñajare Jesúsu joun luágu siñá lan jeídin ñíjinba lubeí lídin

²¹ Ábaya laríñagun Jesúsu joun.

—Áu, neíbuga, jugúya jáluajabadina, jóúweguba gafígouna, siñáti jídin le ñíjinba lubeí nídin.

²² Ábati jaríñagun juríu.

—¿Láfaragua funa lúngua, laríñagunbei luágu siñá lan woúdin le ñjinja lubei lídin?

²³ Ábati laríñagun Jesúsu joun.

—Jugúya, únabuna jugúya, ánjein áu, yágütana íñu áu. Láni ubou le jugúya, ánjein áu, máma láni ubou le áu. ²⁴ Ligía naríñagunbei jun luágu jouweguba lan gaffgounga, ladüga ánjein mafíñen jubei luágu áu lan áu, jouweguba ítara.

²⁵ Ábati jaríñagun lun.

—¿Cátabuti?

Ába laríñagun joun.

—Aríñaga náali jun lúmagiñe binárü. ²⁶ Gayáraati jamúga naríñagun gíbeti jun luágu luríban jigáburu lun nadeínjan jun, le oúnajabalina aríñaga lumúti inárüni, áni cáteirügübei le nagáambubei lúmagiñe le oúnajabalina naríñaga joun ja lílana ubou.

²⁷ Ánjein jagía, úati gunfaráanda jamáni láu luágu lan Búngiu ladímureja Jesúsu joun. ²⁸ Ligía laríñagunbei joun.

—Dánme le jiñúrunina, áu Wügüri Garaüwarügüti, ligíame jasúbudiruni luágu áu lan le uágubei naríñaga luágu áu lan, áni madügün nan ni cáta luágu náni núngua, lueídügüya le larúfudajabei Nóguchi nun. ²⁹ Ladüga númañein le oúnajabalina, mígirun lágidina Nóguchi nábugua, ladüga adüga náni le áubei lagúndaara súnwandan.

³⁰ Dan le laríñagunbalin Jesúsu le, ába jafíñerun sarágu luágu.

Lirájüñü Búngiu jáma lidámuniña figou

³¹ Ába laríñagun Jesúsu joun juríu ja ánjarubaña lun lerérun.

—Ánjaün asígira lun jídin surúñu láu le nubeíbei jun, jíábinba lun náni jumá disípulugu le tímatimaati. ³² Ábame jasúbudiruni inárüni, ábame lafúnraanguagüdünün inárüni.

³³ Ába jaríñagun lun.

—Linébaanfaangu Abrahám wagía, áni merédegidiwa idámunime ni ca un. ¿Ída liñáti baríñagunbei luágu furáangujadiwa lánme?

³⁴ Ába laríñagun Jesúsu joun.

—Nínárün jáu, luágu sun lan ja adágubaña figou, lidámun figou jagía. ³⁵ Ában idámuni, máma jádaangiñeti famíliá, ánjeinti ában isáni, jádaangiñeti famíliá súnwandan. ³⁶ Ánjaün lubeíti nafúnraanguagüda, áu le Búngiu Irájü, lídaangiñe idámuni lun figou, furáangubadün le tímatimaati. ³⁷ Subúdi náali luágu linébaanfaangu jumá Abrahám, láu sun líra, buséntün jáfarunina, ladüga mája jumá lun le nubeíbei jun. ³⁸ Áu nadímurejan luágu le larúfudubei Nóguchi nun, jugúya jadügüni le jafúnrendeirubei lúmagiñe júguchi, le Máfia.

³⁹ Ába jaríñagun lun.

—Abrahám wáguchibei.

Ába laríñagun Jesúsu joun.

—Lun jamúga inárüni lan luágu lirájüñü jumá Abrahám, jadügüñein jamúga le ladügübei. ⁴⁰ Láu sun aríñaga náali lan inárüni le larúfudajabei Búngiu nun jun, buséntün jáfarunina. ¡Madügünti meja Abrahám ni cáta líbe líra! ⁴¹ Le méme ladügübei júguchi, ligía jadügübei.

Ábati jaríñagun lun.

—Mámatia wagía bástadi, ában rügüñein wáguchi, Búngiu.

⁴² Ába laríñagun Jesúsu joun.

—Ánjein jamúga Búngiu lubei júguchibei, jínsiñetina jamúga jun ladüga lúmagiñe Búngiu niábin, áni anája ya. Mάma láu náni núngua niábin, Búngiu oúnajabalina. ⁴³ ¿Ca uágu lásiñerunbei gunfaráanda jumáni le naríñagubei? Ladüga mabúseerun jumá jagáambuni náni ugánu. ⁴⁴ Mάfia júguchibei, lánigu jugúya, áni buséntün jadügüni lugúndan. Gáfarajadigubeiñein Mάfia lúmagiñe furúmiñeti dan. Mārügüdünti lueígiñe inárüni, maríñagunti gíñe inárüni. Lidan le laríñagun iyéeni, ladímurejaña quei ligáburi, ladüga yéeti áni ligía lúguchibei iyéeni. ⁴⁵ Ánjeinti áu, quei inárüni lubei naríñagubei, maffiñetün nun. ⁴⁶ ¿Ca jídaangiñe gayáraabei larúfuduni luágu gafigoun nan? Ánjeinti inárüni lubei naríñagubei, ¿cáti uágu maffiñen jubei nun? ⁴⁷ Le lánigu Búngiu, agáamba lumúti lerérun Búngiu, ánjeinti jugúya, quei máma jubei lánigu Búngiu, ligía mája jubei jagáambuni.

Níjeinjali meja Crístu lubáragiñe Abrahám

⁴⁸ Ábati jaríñagun juríu lun.

—Wanárün láu waríñagun luágu máma ban ámu jaweí jagübüri Samariána, luágu gíñe níjein lan ában espíritu wuríbati bídan.

⁴⁹ Ába laríñagun Jesúsu joun.

—Úati espíritu wuríbati nídan. Le nadügübei, níchuguña inébesei lun Núguchi, jugúya, íchiga minébeni nun. ⁵⁰ Máluaajaantina inébesei núngua, láu sun níjein lan ában áluga lumúti ninébesi, áni ligía le agúseragüdübei. ⁵¹ Ninárün jáu luágu le lan adügüti gásu láu le nubeíbei, moúnwenbei lan.

⁵² Ábati jaríñagun juríu lun.

—Anáti guetó, chouuru wamáali luágu níjein lan espíritu wuríbati bídan. Jiláti Abrahám, jilágu profétagu, áni aríñagagibu luágu le lan adügüti gásu láu le bubeíbei, moúnwenbei lan. ⁵³ ¿Cátabuñadibugi lúmoun wáguchi Abrahám? Jiláti Abrahám, jilágu profétagu. ¿Ída liñáti banáangun búngua?

⁵⁴ Ába laríñagun Jesúsu joun.

—Ánjana íchiga uweíríguni nuóugua, málabei, ánjeinti Núguchi, le méme uágubei jaríñaga luágu ligía lan Jubúngiutebei, ligía íchugubei uweíríguni nuágu. ⁵⁵ Jugúya, ibídiñeti Búngiu jun, anáti áu, subúditi nun, áni ánjana jamúga aríñaga luágu ibídiñe lan nun, yéetina jamúga gíñe quei jugúya. Subúditi Búngiu nun le tímatimaati, áni adüga numúti le lubeíbei. ⁵⁶ Abrahám lé meja binádu júguchi, gúndaati meja láu lasúbudiruni luágu lachülürüba lan nuwéyuri lun niábin uboúagun queisi asálbaragülei, buin líña láu ugúndani dan laríjini wéyu ligía.

⁵⁷ Ábati jaríñagun juríu lun Jesúsu.

—Úagubeigili ni dimí-san irúmu báu, ¿aríñagatibu luágu aríja báni Abrahám?

⁵⁸ Ába laríñagun Jesúsu joun.

—Ninárün jáu luágu lubáragiñe lan ñi lan Abrahám, anájeinjadina.

⁵⁹ Ába jabúdajan dübü lun jachüraguni luágu, ába larámudagun, ába láfuridun témpulurugugiñe, ába lásügürün jamádaangiñe, ába lídin.

9

Lareídaguagüdüñ Jesúsu ában wügüri maríjinti

¹ Lídán le lásügürün Jesúsu lídaangiñe ában fulásu, ába laríjin ában wügüri maríjinti lúmagiñe lagüriajoun. ² Ába jaríñagun láni disípulugu lun.

—Maésturu, ¿cásan uágu lagüriajounbei wügüri le maríjinga? ¿Ladügasan jafígoun lagübürigu, o ladüga lifígoun guánarü?

³ Ába laríñagun Jesúsu joun.

—Máma ladüga lifígoun, máma giñe ladüga jafígoun lagübürigu, lasúseredunbei ítara lun larijóuniwa le luáraabei Búngiu adüga láu lareídagun wügüri ligía. ⁴ Lúnti nadügüni luwádigimari Búngiu le oúnajabalina sun wínwangidina lan, jiláadina ligíame, siñame nadügüni. ⁵ Sun dan anája lan ligíbuagu ubou le, áu lilámpunbei ubou.

⁶ Lárigiñe laríñaguni Jesúsu cátei le, ába lásuerun múarugun, ába ladügün murúsun gubégubeti láu larüre, ába lájuruduni luágu le maríjinbei.

⁷ Ába laríñagun lun.

—Beíba achíbei bigíbu lídan dúna le gíribei Siloé —míni lan líra, Oúnajouti.

Ába lídin maríjinti ligía, ába lachíbuni ligíbu ñi, dan le lagíribudunbei, aríjaali. ⁸ Játi lubésinanigu jáma gürígia já meja aríjubalin amúriaja, ába jaríñagun.

—¿Másan nijáñaja le añúurubei amúriaja seínsu?

⁹ Ñíñanu aríñagutiña.

—Ánja, ligía.

Jaríñaga jíbiri.

—Máma ligía, lenége.

Ába laríñagun wügüri ligía.

—Ánja, áu.

¹⁰ Ábati jaríñagun lun.

—¿Ída liñáti aríjaadibu lubeí?

¹¹ Ába laríñagun joun.

—Wügüri le gíribei Jesúsu, ligía adügübei murúsun gubégubeti, ába lájuruduni luágu nágu, ába laríñagun nun. “Beíba lídan dúna le gíribei Siloé, ábame bachíbuni bigíbu ñi.” Ábati nídin, lásun nachíbuni nigíbu, ába naríjin.

¹² Ábati jaríñagun lun.

—¿Jageígi wügüri ligía?

Laríñaga joun.

—Ibídiñeti nun jageí lan.

Jálügüdaguni fariséogu maríjinti le areídaguagüdüwalíbei

¹³ Ábati janügüni wügüri lé meja maríjinbei jagíbugiñoún fariséogu. ¹⁴ Queíti lídan lan wéyu le eméraaguagülei ladügei Jesúsu gubégubeti le áubei lareídaguagüdei maríjinti ligía, ¹⁵ ába giñe jálügüdüni fariséogu wügüri ligía ída líña lan gayárajali lubeí laríjin. Ába laríñagun joun.

—Ába líchugun gubégubeti luágu nágu, ába nachíbuni nigíbu, guetó aríjaadina.

¹⁶ Ábati jaríñagun jádaangiñe fariséogu.

—Le wügüri le adügübalin cátei le, siñáti louñagüle lan Búngiu ladüga minébenti wéyu le eméraaguagülei lun.

Jaríñagati jíbiri.

—¿Ída liñáti ladáaguni buri miláguru le, ánjein gafígoun lubeí?

Ába lubeíti ñi lan fánreinguäü jádan. ¹⁷ Ábaya jálügüdüni lé meja maríjinbei.

—Ángi bugúya, ¿cági baríñagubei luágu wügüri le, queísi bugúya lubeí le laríjagüdübei?

Ába laríñagun.

—Nugúya, naríñagun luágu ában lan proféta.

¹⁸ Májatiña yebe fariséogu jafíñerun luágu maríjin lán meja wügüri ligía áni aríjaali lan guetó, darí lun jagúarun joun lagübürigu, ¹⁹ ába jaríñagun joun.

—¿Nijánsan jiraü le uágubei jaríñaga luágu maríjin gubeíñein lan lúmagiñe lagüriajóun? ¿Ída liñáti aríjaali lubeí guetó?

²⁰ Ába jaríñagun lagübürigu.

—Subúdi wamúti luágu waraü lan le, áni maríjin lan dan le lagüriajóunbei, ²¹ ibídiñeti woun ída líña lan aríjaali lubeí, ni ca lan areídaguagüdübalin lágu. Álügüda jumeí, weíríyaali, gayáraati louñabun lueígiñegua.

²² Anúfudeíti aríñagagüdübalin líra joun lagübürigu wügüri ligía, ladüga aríñagaaña lan fariséogu luágu sun lan ja afíñerutiña luágu Jesúsu lan Cristubei, jabugúba lan tídaangiñe jalígílisin juríu. ²³ Ligía jaríñagunbei lagübürigu. “Álügüda jumeí, weíríyaali.”

²⁴ Ábayati jagúarun juríu lun wügüri lé meja maríjinbei, ába jaríñagun lun.

—Aríñagabeí inárüni woun ligíbugiñe Búngiu, wagía, subúditi woun luágu gafígoun lan wügüri líra.

²⁵ Ábati laríñagun joun.

—Ibídiñeti nun ánjein gaffígoun lubeí lúmoun maffígoun lan. Le nasúbudirubei, luágu maríjin nán meja, áni guetó aríjaadina.

²⁶ Ábaya jaríñagun lun.

—¿Cásan ladügübei báu? ¿Ída liñásan ladüga lun laríjagüdünibu?

²⁷ Ába laríñagun joun.

—Aríñaga náali jun, mebéreseguntün náu, ¿cáti uágu jabúseera naríñaguniya jun? ¿Ódi buséntün giñe jafálaruni?

²⁸ Ábati janábuni, ába jaríñagun lun.

—Bugúya, falá bumuti larúfudajan wügüri ligía, ánjein wagía, larúfudajan Moisés wafálarubei. ²⁹ Subúditi woun luágu adímureja lán meja Búngiu lun Moisés, ánjein le, ibídiñegubeíti woun jalíagiñeti lan.

³⁰ Ábati laríñagun wügüri ligía joun.

—¡Ámuti giñe cátei le! ¡Ibídiñeti jun jalíagiñeti lan, áni aríjagüda lána! ³¹ Subúditi woun luágu magáambun lániña Búngiu gaffígountiña, ja rügüñanu ájuduragubaña lun jáma ja adügübalin lugúndan, lagáamba. ³² Magáambuñajagili luágu ni ában aríjagüdüti ában gürígia le agüriajóuti maríjinga. ³³ Lun jamúga máma lan lúmagiñe Búngiu liábin wügüri le, siñáti jamúga ladügün ni cáta.

³⁴ Ábati jaríñagun lun.

—¿Bugúyasan le agüriajóubei buin láu figoú, buséntibu barúfudajan woun?

Ába jabúguni tídaangiñe jalígílisin.

Ja maríjinbaña luágu cátei lánina Búngiu

³⁵ Ába lagáambuni Jesúsu luágu bugá jamaani maríjinti meja ligía, dánti le ladúnragun lúma, ába laríñagun lun.

—¿Afiñetibu luágu Liraü Búngiu?

³⁶ Ába laríñagun wügüri ligía lun.

—Ariñagabei nun cátei lan, afiñe námuga luágu.

³⁷ Ába laríñagun Jesúsu lun.

—Arija báali, áu le úmabei badímureja.

³⁸ Ába lájuduragun ligíbugiñe Jesúsu, ába laríñagun.

—Afiñetina, Nabúreme.

³⁹ Ába laríñagun Jesúsu.

—Niábinbei ñájoun ubouágun lun néfegechagüdüni jágu ja ibídiñejabubaña lun cátei lánina Búngiu, lun giñe narúfuduni luágu ja lan aríñagubaña luágu fegé lan jágu luágu buri cátei lánina Búngiu, maríjin jamá ni cáta.

⁴⁰ Dan le jagáambunbalin jádaangiñe fariséogu ja ñíbaña cátei le, ába jaríñagun lun.

—¿Baríñaguñati luágu darúñu líña lan giñe wágu lun cátei le luáguti Búngiu?

⁴¹ Laríñaga Jesúsu joun.

—Lun jamúga ibídiñe lan cátei lánina Búngiu jun, madúnruntün jamúga luágu jífigoun, quei jaríñagun luágu subúdi jumáni, gadúnruntün.

10

Jémpulu luáguti loúnigiruniña Jesúsu lánigu queísi ában oúnigiruti mudún

¹ ‘Nínárün jáu luágu le lan mebéluti lídaangiñe lubéneri jabárierun mudún, lun lebélorun lídaangiñe ámu oúbaü, jíweruti. ² Ánjeinti le ebélorubei lídaangiñe béna, ligía le oúnigirubaliña mudún. ³ Ába lánjunrenchuni le oúnigirubalin béna béna lun, lun lebélorun, subúdi jamúti giñe mudún lumálali. Ába lagúajan joun láu jíri, ába laságaraguniña baríerurugugiñe. ⁴ Lárigiñe laságaraguniña súngebei, ába lídin eíbugeina jabá jabá, ába jafálaruni ladúga subúdi jamáni lumálali. ⁵ Mídintiña lárigi ában le ibídiñeti joun, anúrararügütiña lueí ladúga ibídiñeti jamálali ámu mútu joun.

⁶ Rúlumuti Jesúsu jémpulu le joun, úati gunfaráanda jamáni le labúseerubei laríñagun joun.

Jesúsu jóúniri mudún buíti

⁷ Ábayati laríñagun Jesúsu joun.

—Nínárün jáu, áu béna le ñígiñe lubeí gayára lan jayábin güri-gia lun lánigu jamá Búngiu. ⁸ Ja ñúbinbaña nubáragiñe, ítara jáña queísi jíwerutiña mudún ladúga iyéeni lan jarúfudajabei, madügütiña lánigu Búngiu gásu jáu. ⁹ Áu bénabei, le ebéloruti nueígiñe, lasálbarúaba. Ítara lúba quei ában mudún le ebéloruti furí ligía baríerurugugiñe, darí ligía sagádi lun leígin.

¹⁰ ‘Jíweruti, liábin rügüña lun líwerujan, lun láfarajan lúma lun lagünrinchagun, ánjein áu, niábiña lun jibíjin ibágari, áni lun jibíjini gíbe.

¹¹ Áu, ítara niña queísi ában jóúniri mudún le buíti, le gayáraati líchuguni libágari jawágu lilügüniña mudún. ¹² Ánjein le ñadágimeinrügüti luágu fáyeiti, dan le laríjin liábin anímaalu le jabísa mudún, ába lígiruniña mudún, ába leíbaagun, ladúga máma lan oúnigiruti buíti ligía, máma giñe lilügüniña

mudún. Ábati liábin jabísa mudún, ába lawáraüdagugüdüniña. ¹³ Wügüri ligía eíbaaguati ladüga luwádigimariña lan luágurügü fáyeiti, mebéresegúnti jáu mudún.

¹⁴⁻¹⁵ ‘Áu oúnigirutibei buíti. Ítara quei nisúbudin lun Núguchi áni subúdi Núguchi nun, ítara líña gíñe jasúbudin nánigu nun, subúdi jamána gíñe queísi subúdi jamáni mudún jouniri. Rúnumuti nibágari jawágu queísi líchuguni oúnigirutu mudún libágari jawágu lilügüniña mudún. ¹⁶ Añájein gíñe ámu güriña ja lúnbaña nánigu jamá ja mámabaña juríu, lúnti gíñe nanügüniña lun nánigu jamá. Jagáambubadina, ábame jeréderun súnigubei lídan ában lúma ában oúnigirutu.

¹⁷ Jínsiñetina lun Núguchi, ladüga níchugubei nibágari luágu uboú, ligía ábayame nibíjini. ¹⁸ Magída lubei ni ában güriña nibágari, láuba nugúndan níchigei. Garíchatina lun níchuguni lúma lúnya nerésibiruni. Ligía cátei le laríñagubei Núguchi nun.

¹⁹ Dan le jagáambubalin juríu dimúrei buri le, ábaya jafánreinragun. ²⁰ Sarágu jáña jádaangiñe aríñagutiña.

—¿Cásan uágu jadüga gásu láu, níjeingusan espíritu wuríbati lídan áni lülüjali láu?

²¹ Jaríñaga jíbiri.

—Úati ni ában le láuti espíritu wuríbati lun gayára lan ladímurejan ítara. ¿Gayáraati funági laríjagüdün espíritu wuríbati maríjintiña?

Merésibirun jamáni juríu Jesúsu

²² Dan ligía lidáani luríbouga, ladügüñati fédu le lánina tedéregerún témpulu Jerusalén lun Búngiu. ²³ Níñeinti Jesúsu eíbugañaja témpulurugu luágu corredór le giríbeí Láni Salomón corredór. ²⁴ Ába jagúriridagun juríu láu, ába jaríñagun lun.

—¿Darísan ídaba bígirawa láu machoúruni? Ánjein amürü lubei Crístubei, aríñagabeí furáangu.

²⁵ Ába laríñagun Jesúsu joun.

—Aríñaga náali, maffíñetün nun. Sún buri cátei le nadáagubei láu lugúmadin Núguchi, arúfuda lumúti furáangu. ²⁶ Jugúya, maffíñetün ladüga máma jumá jádaangiñe nilügüniña mudún quei bugája naríñaguni jun. ²⁷ Subúdi jamúti nilügüniña mudún numálali, subúdi numútiña gíñe, áni falá jamutina. ²⁸ Rútina íbágari magúmuchaditi joun áni meféridirubaña, úabei gíñe agídarutiña nújaburugugiñe. ²⁹ Núguchi le weíribeí jaweí súnigubei, ligía íchugubaliña nun, áni úati ni ában lun lagídaruniña lújaburugugiñe. ³⁰ Áu lúma Búngiu Úguchili ában méme wagía.

³¹ Ábayati jabúdajan juríu dübü lun jachüraguni luágun. ³² Ába laríñagun Jesúsu joun.

—Gíbeeli cátei buíti nadüga jigíbugiñe láu lubáfu Búngiu, ¿cábagi lídaangiñe uágu jíchaagua dübü nuágu?

³³ Ába jaríñagun juríu lun.

—Míchaagunbadiwa dübü buágu luágu ni cáta buíti badüga, ladüga anába báali lan Búngiu láu berérun. Wügüri rügüñadibu, áni bíchaaguña búngua quei Búngiu.

³⁴ Ábati laríñagun Jesúsu joun.

—Bürüwati lídan jilúruden luágu aríñaga lan Búngiu. “búngiu buri jugúya”. ³⁵ Subúditi woun luágu siñá lan leyéedawagún láu le taríñagubei

Lerérun Búngiu, áni aríñagatu líburu tugúya luágu wa lániña Búngiu gürígia ja erésibirubalin lerérun lun jíchuguni joun gürígia, quei búngiugu. ³⁶ Ánjeinti anúadaja lubáalina Búngiu, ába louñajanina ubouágun, ¿ida líñáti jaríñagunbei luágu anába náni láu naríñagun luágu Liraü nan Búngiu? ³⁷ Ánjein madügün nan cátei lé buri ladügübei Nüguchi, mafiñera jumá nun, ³⁸ ánjein nadüga, íbini mafiñerun jumá nun, afiñe jumá luágu buri cátei le nadügübei, subúdi jumámugei luágu níjein lan Nüguchi nídan, áni anájein lan gifñe lídan Nüguchi.

³⁹ Ábaya jálugun jadáürüni, ába leséfurun jawéi.

⁴⁰ Ábati lagíribudun Jesúsu loubáfurugun dúna Jordán, ába leréderun ñi lídan fulásu le ñi lubei meja labásteragúdaja Juan. ⁴¹ Sarágu jáña gürígia ñdúntiña aríjei, ába buri jaríñagun.

—Láu sun madügün lan Juan ni ában miláguru, inárüni sun le laríñagubei luágu wügüri le.

⁴² Ába jafiñerun sarágu gürígia luágu Jesúsu lídan fulásu ligía.

11

Loúnwen Lázaro

¹ Ñíñein ában wügüri sánditi, gíríti Lázaro, lílana fulásu le gíríbei Betánia, le tageíra María túma Márta to títugaña. ² María tugúya, to lítu Lázaro le sándíbei, tugúya to éseruboun íbíñei luágun lugúdi Jesúsu, ába tarágajani láu tídíburi. ³ Ábati jóunajan bián ítunu ja, aríñaga lun Jesúsu.

—Jesúsu, sándíñeintia bumáda.

⁴ Dan lagáambunbalin Jesúsu cátei le, ába laríñagun.

—Mámabei ouweni lébeja cátei lídaangiñe sándi le, lúntíbei larijíníwa luweírígun Búngiu, lúma gifñe lun larijíníwa luweírígun Liraü Búngiu lídaangiñe sándi ligía.

⁵ Láu sun weíri lan jínsiñe Márta, María, lúma Lázaro lun Jesúsu, ⁶ dan le jaríñawagúnbei lun luágu sándíñein lan Lázaro, reídeigili bián wéyu lídan fulásu le ñi lubei. ⁷ Lárigiñe, ába laríñagun joun láni disípulugu.

—Queímounya Judéa.

⁸ Ábati jaríñagun lun.

—Maésturu, málügili lueígiñe jálugun juríu jáfarunibu láu dübü ñi, ¿busényadibu bídin ñi?

⁹ Ába laríñagun Jesúsu joun.

—¿Ma dúusuñein óra lídan ában wéyu? Ánjein lubeíti eíbuga ában gürígia wéyuagu, machúgeragúnbei, ladüga larijubei lan larúgounga le yábei ubouágu, ¹⁰ ánjein eíbuga áriebe, lachúgeraguba ladüga lubúriga.

¹¹ Lárigiñe, ába laríñagun Jesúsu joun.

—Arúmuga wamáda Lázaro, neíbuga agágudajei.

¹² Ábati jaríñagun disípulugu lun.

—Maésturu, ánjein arúmuga lubei, lareídaguárügü líña.

¹³ Míni lánti Jesúsu luágu jilá lan Lázaro, jarítagunti disípulugu luágu luágu lan furúmiegurügü arúmuguni ladímureja. ¹⁴ Ábati laríñagun Jesúsu joun, furáangu.

—Jilá Lázaro. ¹⁵ Gúndaatina láu úa nan ñi, ladüga buítimaati ítara jun, afiñe jumámuga. Queímoun waríjei.

¹⁶ Ábati laríñagun Tomás, le únbei jaríñaga Mádou, joun jíbiri disípulugu.

—Queímoun giñe, jilá wamámuga úara lúma.

Jesúsu ásaaraqüdübei lídaangiñe ouweni, ligía íchiga íbágarí

¹⁷ Dan le lachülürünbei Jesúsu, gádürüjali wéyu lueígiñe labunún Lázaro. ¹⁸ Lidíse Betánia lueí Jerusalén quei bián quilómetros dimí. ¹⁹ Sarágu jáñati jádaangiñe juríu ñüdüntiña Jerusaléngiñe bisídoun Márta túma María lun jíchugun ñurúguaü joun luágu loúnwen jamúlen. ²⁰ Dan tagáambunbei Márta luágu níteeli lan Jesúsu achülüreina, ába táfuridun lubároun, ánjoun María, ába teréderun múnada. ²¹ Ába taríñagun Márta lun Jesúsu.

—Lun jamúga ya ban, moúnwenti jamúga namúlen, ²² áni subúditi nun luágu líchugubei lan Búngiu sun le bamúriajan lúma bun.

²³ Laríñaga Jesúsu tun.

—Labágaridayaba bamúlen.

²⁴ Taríñaga Márta lun.

—Ánja, subúditi nun luágu labágaridayaba lan lídaanme jásaarun jiláguaaña lídan lagúmujoún wéyu.

²⁵ Ábati laríñagun Jesúsu tun.

—Áu le ásaaraqüdübaliña jiláaña, rúnei jabágarí joun lárigoún. Le afíñeti nuágu, gayáraati loúnwen, labágaridayaba, ²⁶ áni sun le wíngangilibei áni afíñeti nuágu, labágariduba giñe lúma Búngiu súnwandan. ¿Afíñetibu?

²⁷ Taríñaga lun.

—Ánja, Nabúreme, afíñetiña luágu bugúya lan Crístubei le Liraü Búngiu, lé meja lúnbei liábin uboúagun.

Layájun Jesúsu lubádu lumúaja Lázaro

²⁸ Lárigiñe taríñaguni Márta le, ába tídin ougoun María, ába taríñagun tun jóunguarügü.

—Níjein Maésturu ya lún nege bídin lun.

²⁹ Quei tagáambuni María cátei le, ába tásaarun, ába tídin furése aríjei Jesúsu. ³⁰ Mebélugiliti Jesúsu ubúrugin, lídaañein fulásu le ñí lubei tadárierei Márta. ³¹ Dan le jaríjinbei juríu ja ñíbaña múnada túma María ámalijoun tásaarun ába táfuridun furéseguina, ába jóudin tárigi, jarítangun luágu teíbuga lán yebe luágu umúajaü ayájua.

³² Dánti le tachülürünbei María le ñíjin lubeí Jesúsu, ába tájuduragun ligíbugiñe, ába taríñagun.

—Nabúreme, lun jamúga ya ban, moúnwenti jamúga namúlen.

³³ Dan le laríjin Jesúsu tayájun María jáma juríu ja ñübinbaña túma, ába lírudagun tídan lanígi, ³⁴ ába laríñagun joun.

—¿Jalíasan jábunei?

Ába jaríñagun lun.

—Jigábu baríjei.

³⁵ Ába layájun Jesúsu. ³⁶ Ábati jaríñagun juríu.

—¿Aríja jumá luweírín meja línsiñe lun!

³⁷ Ñíñanu jádaangiñe aríñagutiña.

—Niján le aríjagüdübalin wügüri le maríjinbei, ¿siñátí jamúga funásan ladügün lun moúnwen lan Lázaro?

Lásaarun Lázaro lídaangiñe ouweni

³⁸ Ábaya tírudagun lanígi Jesúsu, ába layárafadun lun umúajaü. Umúajaü ligía ában júyu luágu dübü, ñíñein ában dübü lidaüme. ³⁹ Ába laríñagun Jesúsu.

—Gidájumei dübü.

Ába taríñagun Márta lun.

—Mósutia jíngiaali lan ladüga gádürü wéyu lueígiñe loúnwen.

⁴⁰ Ába laríñagun Jesúsu tun.

—¿Másan aríñagatina bun luágu ánjabu lan afíñe nuágu, baríjubei lan luweírigin Búngiu?

⁴¹ Ábati jagídaruni dübü, ába laríjin Jesúsu siélun, ába laríñagun.

—Núguchi, teínqui numútibu luágu bagáambunina. ⁴² Subúdi numúti luágu agáamba bánina súnwandan, naríñaguñein líra jawágu gürígia ja, ja yábaña, lun jafíñerun luágu amürü lan oúnajabalina.

⁴³ Lárigiñe laríñaguni cátei le, ába lagúaragun.

—¡Lázaro, furíba ñígiñe!

⁴⁴ Ába láfuridun jiláali láu lújabu lúma lugúdi gürágu táu gamísa, lúma ligíbu táu ában gamísa. Ába laríñagun Jesúsu joun.

—Farára jumeí, ígira jumeí lun lídin.

Elédeguni lun lárügüdüniwa Jesúsu

(Mt 26.1-5; Mr 14.1-2; Lc 22.1-2)

⁴⁵ Láu lasúseredun líra, sarágu jádaangiñe juríu ja ñüdünbaña túma María, aríja jameí le ladügübei Jesúsu, ába jafíñerun luágu. ⁴⁶ Ñíñanu jádaangiñe, ába jóudin jámoun fariséogu, ába jabájüdaguni le ladügübei Jesúsu joun. ⁴⁷ Ábati jayábin fariséogu jáma jábutigu fádirigu, ába jóúndaragun jáma jíñun-ágei agúmadijatiña, ába jaríñagun.

—¿Cábasan wadüga? Ladáaguñatia wügüri le sarágu miláguru. ⁴⁸ Ánjeinti wígira ítara, jafíñeruba sun gürígia luágu, ábamei jayábin gumádimatiña Rómána, ábame jagúmuchaguagüdünun walígilisin láu sun warásan.

⁴⁹ Ñíñein ában jádaangiñe, gíríti Gáifasi, ligía jábutibei fádirigu lídan irúmu ligía, ába laríñagun joun.

—Íbídiñeti ni cáta jun, ⁵⁰ maríjin jumeí luágu buítima lan woun lun loúnwen ábanrügü wügüri jawágu jíbiri, máma lun lagünrinchawagún sun warásan.

⁵¹ Máma láu lání Gáifasi lúngua laríñagei líra, ladüga quei ligía lan fádiri le íñutimaabei lídan irúmu ligía, ába laríñagagüdüni Búngiu lun, luágu louweba lan Jesúsu jawágu juríu, ⁵² áni mámarügü jawágu juríu, lun giñe loúndaruniña sun lirájüñü Búngiu ja díseguabaña jawáriuagua. ⁵³ Lúmagiñeti wéyu ligía, ába jagúmeserun agúmadijatiña aráanseja lun jáfaruni Jesúsu jilágubei.

⁵⁴ Ligía ába lubeí meíbugunjaali lan Jesúsu furáangu jádan juríu, ába láfuridun Judéagiñe, ába lídin lídoun ában fulásu gíríti Efraín, yaráfa lun fulásu mageírawati. Ába leréderun ñi jáma lání disípulugu.

⁵⁵ Yaráfaaliti jafédun juríu le gíríbei páscua, sarágu jáña gürígia ñüdüñ Jerusalén lun jadügüni igáburi le lánina jarúmadun lubáragiñe fédu ligía. ⁵⁶ Jáluajañeinti Jesúsu, dánti le témpulurugüñanu lan, ába jálügüdajan jámagua.

—¿Ca jaríñagubei? ¿Liábinba lídan fédu, ódi miábinbei?

⁵⁷ Rújañati fariséogu jáma jábutigu fádirigu dimúrei lun le lan asúbudiruti jalíañein lan Jesúsu, lun lan lariñaguni, barü jamámugei adáüra.

12

Tájurudaguni ában würi lugúdi Jesúsu
(Mt 26.6-13; Mr 14.3-9)

¹ Sísi wéyu lubáragiñe páscua, ába lídin Jesúsu Betánia, le ñí lubei lagánawa Lázaro le lásaaragüdübei jádaangiñe jiláaña lúnya labágaridun. ² Ába jadügün ában adíneruni ñi luágu láni fuléisei, Márta, tugúya éjeeraguboun, Lázaro ában jádaangiñe ja ñünbaña luágu dábulu lúma Jesúsu. ³ Ábati tanügün María ában paénti ibiñei le séruti, ába tájurudaguni lugúdi Jesúsu láu, ába tarágajani láu tídiburi, ába lejémougadun ibiñei ligía sun ñi múnada. ⁴ Ába lariñagun Júdas Iscarióte, le líraü Simón, ában jádaangiñe láni Jesúsu disípulugu, le méme lúnbei lalúguruni.

⁵ —¿Ánsan malúgurún lubei ibiñei le luágu ürüwa-san fiádürü lun jíderawagún gudémetiña?

⁶ Lariñagunbei Júdas itara, máma luágu berése lan jáu gudémetiña, lariñagunbei itara ladüga jíweru lan, áni queíti ligía lan gámabarun lágei seínsu, ábaja líwerujan lidaangiñe le íchugúbei tidoun. ⁷ Ábati lariñagun Jesúsu lun.

—Ígiraboún, taráanseruñadina lubá lachülürün luwéyuri nábunúniwa. ⁸ Súnwandan ñibaña lan gudémetiña jídan, ánjeinti áu, mámaba súnwandan júma nan.

Elédeguni lubá Lázaro

⁹ Ába jasúbudiruni sarágu jádaangiñe juríu luágu níjein lan Jesúsu Betánia, ába jóudin ñi, mámarügü lun jaríjini, lun giñe jaríjini Lázaro le lásaaragüdübei Jesúsu jádaangiñe jiláaña. ¹⁰ Ába giñéti juáradun jábutigu fádirigu lídan ában lun giñe jáfaruni Lázaro, ¹¹ ladüga sarágu jáña lan juríu adíseduntiña jawei lun jafíñerun luágu Jesúsu, lídaangiñeti Lázaro.

Lebélorun Jesúsu ubúrugun Jerusalén
(Mt 21.1-11; Mr 11.1-11; Lc 19.28-40)

¹² Sarágu jáña gürígia ñüdüntiña Jerusalén lubá fédu le páscua, larúgan, ába jasúbudiruni luágu lachülürüba lan Jesúsu ñijin ubúrugun. ¹³ Ábati játüjan tubána fáluma, ába jáfuridun lubároun Jesúsu agúarajeina.

—¡Uweíriguni lun Búngiu! ¡Biníwati le ñübinbei lídan líri Wabúreme! ¡Biníwati lurúeite Israél!

¹⁴ Ába ladárirun Jesúsu ában burígü, ába laweínruni quei lariñagun tídan Lerérun Búngiu.

¹⁵ Manúfudebá, ubúругu le Sión, níten burúeite waríñu luágu ában burígü.

¹⁶ Úati yebe gunfaráanda jamáni láni disípulugu cátei le wéyu ligía, lárigiñe, dan le belújali Jesúsu lídoun luweírigun yágüta siélu, ába jarítagan luágu bürüwa lan sun cátei le luágu, áni itara líña lan lasúseredun lun.

¹⁷ Ja gürígia ja ñibaña dan le lagúarun Jesúsu lun Lázaro lídaangiñe lumúaja, ába lásaaragüdüni lídaangiñe ouweni, abájüdagua jamúti le jaríjubei. ¹⁸ Ligía lébubei jáfuridun gürígia erésibirei Jesúsu, ladüga jagáambun luágu miláguru le ladügübei. ¹⁹ Ábati jaríñagun fariséogu jámagua.

—Aríja jumáali luágu, siñá lan ladügüniwa ni cáta, sun gürígia añágüran lúma.

Jáluajani güriégu Jesúsu

²⁰ Níñanu güriégu jádan gürígia ja ñüdünbaña Jerusalén lun jájuduragun lun Búngiu, ²¹ ába jayábin güriégu jagía lúmoun Felípe, le Betsáidana, ñi Galiléa, ába jaríñagun lun.

—Buséntiwa waríjini Jesúsu.

²² Ába lídin Felípe, ába laríñaguni lun Andrés, ába jóudin biángubei jagía abájüdaguei lun Jesúsu. ²³ Ábati laríñagun Jesúsu joun.

—Chülüja óra lun líchugüniwa uweírighuni nun, áu le Wügüri Garaüwarügüti. ²⁴ Ninárün jáu luágu ánjein lan máburujan ában lágu türígu múarugun lun loúnwen, ában mémebei águu, ánjein ouwe, lalúbajoúba sarágu lídaangiñe. ²⁵ Le jínsiñejabuti lun libágari, leféridirubei, ánjein le mebésenti láu libágari lídan ubouú le, lareídubei lubá íbágari le magúmchaditi, siélu. ²⁶ Le busénti lesériwidunina, lúnti lafálarunina, áni le ñi numuti, ñibeigiñe le esériwidubalina. Le esériwidutina, líchuguba Nüguchi uweírighuni lun.

Ladímurejan Jesúsu luágu loúnwen

²⁷ Níjein ában ouúnwenbun líbe samínaü nuágu guetó. ¿Cábasan naríñaga? ¿Naríñaga funa. “Nüguchi, sálba bána lídaangiñe le lúnbei lasúseredun nun guetó”? Uá, lun líra níabin. ²⁸ Nüguchi, iñurúalá bíri nídaangiñe.

Ábati lagaambúniwa ában umálali siéluigiñe le aríñagubei.

—Íñúra náali níri bídaangiñe, áni niñúrüyabei.

²⁹ Ábati jaríñagun gürígia ja ñíbaña agáambaja luágu wayújururu lan, jíbiri aríñaga.

—Ában ánjeli adímurejabei lun.

³⁰ Ábati laríñagun Jesúsu joun.

—Mámatia luágu nufúleisein lagaambúa umálali le, luágu jufúleisein. ³¹ Niján dan ligía lun lagúserawagüdün ubouú, áni guetóba leféridirei Máfia, le agúmadijabei lídan ubouú le, lubáfu. ³² Dánmeti le niñurúniwa múarugugiñe, nanügübaña sùngubei nómoun.

³³ Láu líra laríñaguñein luágu louweba lan luágu ában gurúwa. ³⁴ Ába jaríñagun gürígia lun.

—Agáambaadiwa laliijóun tídan walíburun to lánina lilúrudun Moisés luágu labágariduba lan Cristu lun sun dan. ¿Ída liñáti bariñagunbei luágu liñurúaba lan Wügüri Garaüwarügüti? ¿Cáteigi Wügüri Garaüwarügüti ligía?

³⁵ Ábati laríñagun Jesúsu joun.

—Níchiga mémebei larúgounga jun luágurügü murúsun dan. Eíbuga jumá lídan larúgounga ligía sun anájagua lan júma lun gayáraabei lan jachülürün le ñíjin lubeí jabúseera jachülürün, márügüdün lámugaün lubúriga, ladüga le eíbuguti lídan lubúriga, íbídiñeti lun jalíñouñein lan. ³⁶ Afíñe jumá lubeíti nuágu sun anájagua lan júma lun lirájüñü jumá larúgounga.

Lárigiñe laríñaguni Jesúsu sún buri cátei le, ába lídin, ába larámudagun jaweí.

Lébuna mafíñen jamá juríu luágu Jesúsu

³⁷ Láu sun adüga lan Jesúsu sarágu miláguru jagíbugiñe, mafíñetiña luágu. ³⁸ Láu líra jagúnfulirei le laríñagubei proféta Isaías.

¿Cásan afiñerubei luágu wáni ugánu?

¿Ca un larúfudei Wabúreme Búngiu lubáfu?

³⁹ Quei mafiñerun jabei, ába lasúseredun le ámu dimúrei le laríñagubei Isaías tídan labúrjan, joun.

⁴⁰ Darú lumuti Búngiu jarjín, derégüda loun janígi,

lun marjín jamá láu jágu,

úame gunfaráanda jamá,

mayábin jagíame nun lun nareídaguagüdüniña.

⁴¹ Laríñagunbalin Isaías le luágu Jesúsu ladüga aríja láali lan luweírigin.

⁴² Láu sun líra, sarágu jáña jádaangiñe juríu afiñerutiña luágu Jesúsu ásta jádaangiñe ábutigu, áni mariñagun jamúti bougudi, le janúfude jaweí fariséogu, lueí jabúguniña tídaangiñe jalígilisin. ⁴³ Ladüga gúndaatimaatiña láu inébesi le jíchugubei gürígia sügü láu le líchugubei Búngiu.

Lagúseragüdübaña dimúrei buri le laríñagubei Jesúsu gürígia

⁴⁴ Ába laríñagun Jesúsu láu umálali jéreti.

—Le afiñeti nuágu, máma rügüñein nuágu lafiñera, afiñeti gíñe luágu Nóguchi le oúnajabalina. ⁴⁵ Le gíñe aríjtina, laríjñein gíñe le oúnajabalina.

⁴⁶ Áu lámpubei, niábinbei ubouágun lun sun lan ja afiñetiña nuágu, merédera jamámuga lídan lubúriga. ⁴⁷ Ánjein le agáambuti nerérun áni madügünti gásu láu, máma áu asiadirubalin, ladüga máma niábiña lun nasiadiruniña gürígia ubouágu, niábiña asálbaraña. ⁴⁸ Le mebéresenti náu, madügün ligía gásu láu nerérun, níjein lúnti lasiadiruni. dimúrei buri le aríñaga náalibeí, ligíaba asiadireí lídaanme lagúmujoún wéyu. ⁴⁹ Ladüga madímurejaantina luágu náni núngua, Nóguchi le oúnajabalina, ligía aríñagubalin le lúnbei nariñaguni nun lúma le lúnbei narúfudajani. ⁵⁰ Áni subúdi numúti luágu barú lan lugúmadin Nóguchi ibágarí magúmuchaditi joun ja adügübalin le lubeíbei. Le lubeíti nariñagubei, nariñaguni quei laríñaguni Nóguchi nun.

13

Lachíbuni Jesúsu jagúdi láni disípulugu

¹ Ábanrúgaali wéyu lubá fédu le páscua. Subúdi láali Jesúsu luágu chülúja lan óra lun lígiruni ubou le lun lídin lúmoun Lúguchi. Súnwandan meja jínsiñe jamá lánigu ja ubouágubaña lun, guetó larúfuduñeinti línsiñejabu lídan luweírín-ágei.

²⁻⁴ Dálaalíti Máfia larítagun tídoun lanígi Júdas Iscarióte lun ledéregeruni Jesúsu joun láganiñu. Jesúsu, láu sun subúdi láni luágu lúmagiñe lan Búngiu liábin, luágu lúmounba lan gíñe Búngiu lagíríbuda, luágu gíñe rúlaali lan Úguchili sun cátei lújaburugun, ába larúfuduni luweírín-ágei ünabuni le luágubei. Dan lubeíti jadíneruña lan, ába lásaarun lueígiñe dábula, ába larágachunun gamísa to tigíbuaguboun ladáüragun, ába lagürün ában tuáya liránaagua. ⁵ Ába líchugun dúna lídoun ában dabárasí, ába lachíbuni jagúdi disípulugu, ába larágachuni táu tuáya to liránaaguaboun.

⁶ Dán yebe le lachíbaali lan lugúdi Simón Pédro, ába laríñagun lun.

—Nabúreme, ¿bachíbaalisn nugúdi?

⁷ Ába laríñagun Jesúsu lun.

—Guetó, úati gunfaráanda báni le nadügübei, gunfaráanda bubeí lárígiñe.

⁸ Ába lariñagun Pédro lun.

—¡Machíbun bubeí nugúdi!

Lariñaga Jesúsu lun.

—Ánjein machíbun nan bugúdi, siñábei gafánran ban núma.

⁹ Ába lariñagun Simón Pédro lun.

—Mámarügüla nugúdi bachíba, chibábei giñe nújabu lúma nigíbu.

¹⁰ Lariñaga Jesúsu lun.

—Le sun liñábei lágoun, lugúdi rügüñein abúseera lachibúniwa, ladüga jarúmati líbiri lúgubu. Jugúya, jarúmatün, mámarügü líña sun jugúya.

¹¹ Le lariñagunbei luágu máma lan sun jagía jarúmatiña, ladüga subúdi láni cába lan edéregerei.

¹² Lásun lachíbuni Jesúsu jagúdi, ábaya ladáurunun gamísa to larágachuboun, ábaya lañúurun luágu dábula, ába lariñagun joun.

—¿Gunfaráanda jumútisan le nadügübei jun? ¹³ Jugúya agúajatün nun Maésturu, lúma Nabúreme, áni richátün ladüga áu ligía, ¹⁴ ánjeinti chibá nubálin jugúdi láu sun Jumáesturun nan áni Jabúreme, lúnti giñe jachíbuni jugúdi júmaga. ¹⁵ Rújadina ában jémpulu jun lun jadügüni líbe méme le nadügübei. ¹⁶ Ninárün jáu luágu míñugun lan ni ában músu lueí liyúbudiri, ni ában le oúnajoúti lueí le oúnajabalin. ¹⁷ Ánjein gunfaráanda jumá buri cátei le áni adüga jumeíme, gúndaabadün.

¹⁸ ‘Mámatia nadímurejaña juágu sun jugúya, subúdi numútiña cátaña lan nanúadirubaña lun nánigume le tímatimaati. Áni lúnti lagúnfulirún le tídaanbei Lerérun Búngiu. “Garábagua le eígubei núma, nuágun.” ¹⁹ Nariñaguñein le jun lubáragiñe lasúseredun, lun dánme lan le lasúseredun, affiñe jumámuga luágu áu lan Crístubei. ²⁰ Ninárün jáu luágu le lan erésibiruti le noúnajan, resíbi lumútina giñe, áni le erésibirutina, resíbi lumúti giñe le oúnajabalina.

Ladímurejani Jesúsu luágu ledéregerubei lan Júdas

(Mt 26.20-25; Mr 14.17-21; Lc 22.21-23)

²¹ Lásun lariñaguni Jesúsu sun cátei le, ába lasándirun sarágu íruni tídan lanígi, ába lariñagun furáangu.

—Ninárün jáu luágu ledéregerubadina lan ában jídaangiñe.

²² Ábati jagúmeserun disípulugu aríagua jawoúguoún, ibídiñounga joun ca lan jádaangiñe uágubei ladímureja Jesúsu. ²³ Áu Juan, le abürüjabarun gárada to, ában jádaangiñe disípulugu, le weíribei ínsiñe lun Jesúsu, loúbagiñeñádina lídan adíneruni, ²⁴ ába ladügün Simón Pédro seíni nun lun nálügüdüni Jesúsu ca lan jádaangiñe uágubei ladímureja. ²⁵ Ábati nayárafaduntima lun Jesúsu, ába nariñagun lun.

—Nabúreme, ¿cáteisán lúnbei ledéregerunibu?

²⁶ Ába lariñagun Jesúsu nun.

—Nadüdüragüda murúsun fein, le únti níchigoun, ligíaba edéregerana.

Ábati ladüdüragüdün murúsun fein, ába líchugunun lun Júdas Iscarióte, le liraú Simón. ²⁷ Quei lárügüdünun Júdas fein tugúya, ítara lebélerun Máfia tídoun lanígi. Ábati lariñagun Jesúsu lun.

—Le lúnbei badügüni, adügabei furése.

²⁸ Úati gunfaráanda láni ni ában jádaangiñe ja eígibaña luágu dábula ca lan uágu lariñagei Jesúsu líra lun. ²⁹ Quei Júdas lubei táubei lágei seínsu, sun jariñagun yebéti lariñaguña Jesúsu lun lun lagáñijani le jabúseerubei lubá

fédu, o lun lan líchugun seínsu joun gudémetiña. ³⁰ Lárigiñe leíginun Júdas fein, ába láfuridun. Gúñeeli óra ligía.

Iséri gumádi

³¹ Lárigiñe láfuridun Júdas, ába lariñagun Jesúsu.

—Larijúa nuweírigun, áu le Wügüri Garaüwarügüti, guetó, arijúame luweírigun Úguchili nuágu. ³² Ánjeinti arúfuda nubálin luweírigun Búngiu, larúfudubei giñe Búngiu nuweírigun, áni ladügübei madíse. ³³ Nirájüñü, úaadináme júma sarágu dan. Jáluajabadina, le méme nariñagubei joun juríu nariñagayaali jun guetó. Siñábei jídin le ñíjinba lubei nídin. ³⁴ Níchigaali iséri gumádi le jun. lun jínsiñegua jumá júngua. Ítara quei jínsiñe nun, lúnti giñe jínsiñegua jumá júngua. ³⁵ Ánjaün jínsiñegua júngua, jasúbudirubei sun gürígia luágu náni jumá disípulugu.

Ladímurejani Jesúsu luágu leyéedaguba lan Pédro luágu
(Mt 26.31-35; Mr 14.27-31; Lc 22.31-34)

³⁶ Ába lariñagun Simón Pédro lun Jesúsu.

—¿Jalíñounbadibusan, Nabúreme?

Ába lariñagun Jesúsu lun.

—Siñáti bafálarunina le ñíjinbadina lubei guetó, lachülürüba wéyu lun bafálarubadina lan.

³⁷ Lariñaga Pédro lun.

—¿Ca uágu siñá lubei nafálarunibu guetó? Aráanseedina lun níchuguni nibágari buágu.

³⁸ Lariñaga Jesúsu lun.

—¿Binárün luágu aráanse ban lun bíchuguni bibágari nuágu? Ninárün báu luágu beyéedaguba lan náu úrúwa weíyaasu lubáragiñe layúgurujan gáyu.

14

Jesúsu, ligía ùmabei lun lúmoun Úguchili

¹ Merédera jumá láu líbe samínaü, afíñe méme jumá luágu Búngiu, afíñe méme jugúyame nuágu. ² Níjein sarágu ubáraü tídan lúban Núguchi lun jaganouñ gürígia ñi, lun jamúga máma lan ítara líña, aríñaga náali jamúga jun. Neibuga lubeíti aráanseja ában ubáraü jubá. ³ Lárigiñeme nídin, aráanse neíme ubáraü ligía, ábame nagíribudunya lun nanügünün númagua, lun ñi jumá le méme ñí numuti. ⁴ Subúdi jumúti jalíñounbadina lan, subúdi jumúti giñe ùma.

⁵ Lariñaga Tomás lun.

—Nabúreme, ibídiñeti woun jalíñounbadibu lan, ¿ída lubáti wasúbudiruni ùma?

⁶ Lariñaga Jesúsu lun.

—Lun lachülürüniwa lúmoun Búngiu, áu ùmabei, áu inárüni, áu ibágari. Nueígiñe rügüñein gayára lan lachülürüniwa lúmoun Búngiu Úguchili.

⁷ Lun jamúga subúdi nan jun buídu, subúdi jumúti jamúga giñe Núguchi, subúdi jumáaliti lúmagiñe guetó, ladúga aríjañaja jumáali láu jaríjinina.

⁸ Lariñagati Felípe lun.

—Arúfudabeí Úguchili woun, buídurügaalime woun.

⁹ Lariñaga Jesúsu lun.

—Felípe, lüjadina júma, ¿ibídiñegidina bun? Le aríjítina, laríjiñein giñe Búngiu Úguchili, ¿cáti uágu baríñaga nun lun narúfuduni Búngiu Úguchili jun? ¹⁰ ¿Mafíñetibusan luágu anájein lan lídan Búngiu Úguchili, níjein lan giñe Búngiu Úguchili nítan? Lé buri cátei le naríñagubei jun, máma lan láu náni núngua naríñagei, Búngiu Úguchili le aganoubei nítan, ligía adügubalin luwádigimari guánarü. ¹¹ Afíñe jumá nun luágu anájein lan lídan Búngiu Úguchili, áni lan níjein giñe Búngiu Úguchili nítan, íbini luágurügü cátei lé buri nadügübei, afíñe jumá nun. ¹² Ninárün jáu, luágu le lan affíñeti nuágu, ladügübei lan cátei lé buri nadügübei, ladügüba buri cátei weínamutimaati, ladüga áu, neíbuga le ñíjin lubei Nóguchi. ¹³ Sun le jamúriajan lídan níri, nadügübei, arúfuda námugei luweirigun Nóguchi. ¹⁴ Nadügübei furúmiegurügü cátei le jamúriajan lídan níri.

Líchugun Jesúsu dimúrei luágu loúnajabei lan Sífiri Sándu

¹⁵ Ánjein jínsiñe nubei jun, gúnfuli jumá láu le nubeíbei, ¹⁶ ábame nayúmuragun lun Nóguchi lun loúnajan ámu jun newéñegua lun líderagunün, lun giñe líchugun gurásu jun. Ligíaba Sífiri Sándu le subúdíjábubei lun sun inárüni, júmabei súnwandan. ¹⁷ Ja lánigu uboú le, siñáti jerésibiruni Sífiri Sándu ligía, ladüga siñá lan jaríjini ni jasúbudiruni, ánjein jugúya, subúdi jumáli, ladüga níjein júma áni leréderuba jídan. ¹⁸ Mígirun nubádün jábugua, nagíribudayaba lun júma nan. ¹⁹ Málüjadina ánjana marijin jamá gürígia, ánjein jugúya, jaríjubadina, áni gabágaribadün ladüga wínwañu níña lan. ²⁰ Lárigiñeme liábin Sífiri Sándu lun júma lan lun sun dan, jasúbudirubei luágu anájein lan lídan Nóguchi, jugúya nítan, áu giñe jídan. ²¹ Le subúdíjabuti lun nugúmadin áni úragu ligía lúma, arúfuda lumúti luágu jínsiñe nan lun le tímatisaati. Áni jínsiñejábubei Nóguchi lun le jínsiñejabuti nun, jínsiñebei giñe nun, arúfudagua áume núngua lun.

²² Ába laríñagun Júdas (mámatia le Iscarióte).

—¿Cásan uágu barúfudaguba lubei búngua woun, máma joun gürígia ja lánigu uboú le?

²³ Laríñaga Jesúsu lun.

—Le jínsiñejabuti nun, adügati gásu láu le nubeíbei, áni línsiñeduba lun Nóguchi, ábame wayábin, áu lúma Nóguchi, agánawa lúma. ²⁴ Le mínsiñejabuti nun, madügünti gásu láu le nubeíbei. Dimúrei le naríñagubei, máma náni, láni Nóguchi le oúnajabalina.

²⁵ ‘Naríñaguñein sun le jun láu anájagua lan júma, ²⁶ Sífiri Sándu le lúnbei loúnajani Nóguchi lídan níri lun líderagunün, larúfudajaba jun, larítaguagüdúbadün giñe luágu sun le aríñaga náalibeí jun.

²⁷ ‘Neíbuga jümagiñe, nígiraali ñurúguaü júma—ában luwúyeri ñurúguaü le áurügübei gayára lan níchiguni. Mítaraanti queísi ñurúguaü le líchugubei uboú. Magíbedalá jisáminan, manúfude jugúyame. ²⁸ Agáamba jumáli naríñagun luágu neíbuga lan, áni nagíribudayaba lan lun júma nan, lun jamúga jínsiñe nan jun láu jinárün, gúndaatün jamúga láu jasúbudiruni luágu neíbuga lan lúmoun Nóguchi, ladüga ligía íñugutimaati nueí. ²⁹ Ligía aríñaga giñe nubálin le jun, lun dánme lan lasúseredun, afíñe jumámuga.

³⁰ ‘Madímurejaanjadina sarágu júma, ladüga níteeli le agúmadijabei lídan uboú le. Láu sun mabáfu lan nuágu, ³¹ lúnti itara lúba lan lun lasúbudiruni uboú luágu jínsiñe lan Nóguchi nun, áni adüga náni le lubeíbei nun. Sarájuma, queímoun yágiñe.

15

Tídibu beíbei lúma tilímun

¹ Lariñaga Jesúsu.

—Ítara níña quei ában tídibu beíbei le tímatimaati, Nóguchi, ítara líña quei le oúnigirubarun nádü. ² Chaün lumuti furúmieguaügü lídaangiñe nilímun le mínti, atirimuja lumúti le gínbei, jarúmagüdaleí lúntima lagíndun. ³ Jugúya, jarúmaadün lárigi narúfudajan jun. ⁴ Lídan méme jumá ában núma quei lídaañadina lan ában júma. Ában límu siñáti lagíndun ánjein mámañein lubei luágu ídibu, ítara jíña gíñe, siñáti jagíndun ánjein máma lubei badüleñu jíña nuágu.

⁵ ‘Áu ídibubei, jugúya límu. Le badüleñuti nuágu, badüleñu áu luágu, lagínduba gíbe, siñáti jadügün ni cáta úouga áu. ⁶ Le merédeti badüleñu nuágu, lágurúba bougudin, ábame lamábeidun quei buri límu le abúdajoubei lun lagudúniwa.

⁷ ‘Ánjaün asígira badüleñu nuágu, mabúlieidun jumeíme le narúfudajabei, gayáraabei jamúriajani le jabúseerun, áni jibíjubei. ⁸ Ibíjati Nóguchi inébesi dan le gíbe lan jagíndun, áni arúfuda jumúti luágu náni jumá disípulugu ja tímatimaatiña láu líra. ⁹ Jínsiñetün nun ítara quei nínsiñe lun Nóguchi, ítara méme jumá lubeíti lídan ínsiñeni le nánibei jun. ¹⁰ Ánjaün nñdün láu le nubeíbei, lídan mémebadün ínsiñeni le nánibei jun, ítara quei nídin láu le lubeíbei Nóguchi, áni lídan mémeñadina ínsiñeni le lánibei nun.

¹¹ ‘Nadímurejánbei jun ítara lun gayára lan jasúbusiruni úgundani le níchugubei, le gumúti. ¹² Niján nugúmadinbei. lun jínsiñegua jumá júngua quei jínsiñe nun. ¹³ Luweírín-ágei ínsiñeni le gayáraabei gáni láni gürígia, lun líchuguni libágari jawágu lumádagu. ¹⁴ Numádagu jugúya, ánjein jadüga le nubeíbei. ¹⁵ Manügün náadün quei músu, ladüga ibídiñeti le ladügübei liyúbudiri músu lun, nanügünün quei numádagu ladüga subúdigüda náali sun le lariñagubei Nóguchi nun jun. ¹⁶ Máma jugúya anúadajabalina, áu anúadajabalün, áni rújadina dimúrei jun lun jagíndun gíbe, lun gíñe ladúraran jin. Ítara lúba líchuguni Nóguchi sun le jamúriajan lúma lídan níri jun. ¹⁷ Ítara líña lubeíti nugúmadin jun lun jínsiñegua jumá júngua.

Iyéreeguti Jesúsu jáu sun lánigu lun ubou

¹⁸ ‘Ánjaün iyéreeguda lun ubou, subúdi jumeí luágu áu lan iyéreegudubei lun furúmiñe. ¹⁹ Lun jamúga lánigu jumá ubou, jínsiñetün jamúga joun gürígia ja lánigu ubou quei jínsiñe jánigu joun. Anúadaja numútün jádaangiñe ja lánigu ubou, ligía jiyéreegunbei lun ubou ladüga mámaadün lan láni ubou. ²⁰ Jarítagua jumá luágu le naríñagubei jun. “Úati músu íñuguti lueí liyúbudiri.” Ánjein eíbaaja jamáadina lubeí, jeíbaajabadün gíñe, ánjein giñéti madügün jabeí gásu láu narúfudajan, madügünbaña gíñe gásu jáu. ²¹ Jadügübei sun le jun, nueígiñe, ladüga ibídiñe lan le oúnajabalina joun.

²² ‘Lun jamúga meja miábin nan adímureja joun, madúnruntiña jamúga luágu jamájarun lun jerésibirunina, queísiti niábin joun, gadúnruntiña lubeíti luágu figou ligía. ²³ Ja iyéreejabúbaña nun, iyéreeguti gíñe Nóguchi joun. ²⁴ Madúnruntiña jamúga lun jamúga madügün nan ni cáta le úagili adügüti jagánagua, guetó aríja jamáali buri cátei ligía áni láu sun líra iyéreegudina joun, iyéreegu gíñe Nóguchi joun. ²⁵ Wel, lasúseredunbei le ladüga lúnti lan lagúnfulirun dimúrei le bürüwañubei lídan jalúrudun. “Ába niyéreegudun joun, mébunouga.”

²⁶ ‘Dánme liábin Sífiri Sándu le lúnbei líderagunün, Espíritu le lánina inárüni le lúnbei noúnajani luágu loubadina Nóguchi, ligíaba adímureja luágu náni fuleísei. ²⁷ Jugúya, jadímurejaba gíñe luágu náni fuleísei, ladüga númañadün lan lúmagiñe furúmiñeti dan.

16

¹ ‘Nariñaguñein buri cátei le jun lun moúnwen lan jafiñen nuágu. ² Jabúgagubadün tídaangiñe jalígílisin, wuríbabei dan jun daríme lun ánjaün lan láfargua furúmierügü gürígia jilágubei, larítaguba luágu lesériwiduñein lan Búngiu láu líra. ³ Jadügübei líra ladüga masúbudirun jamágili lan Nóguchi, masúbudirun jamána. ⁴ Nariñaguñein le jun, lun dánme lan le lachülürün dan ligía, lun jarítangun luágu aríñaga náali lán meja jun.

Le ladügübei Sífiri Sándu

‘Mariñagun numúti meja le jun lúmagiñe binárü ladüga meja júmañadina lan, ⁵ ánjein guetó, neíbuga lúmoun le oúnajabalina. Málügüdün lumútina ni ában jídaangiñe jalíñounbadina lan, ⁶ jírurügütün luágu nariñaguni cátei lé buri jun. ⁷ Inárüni nariñagubei jun. buítimaati jun lun nídin, ladüga ánjana mídin, miábinbei Sífiri Sándu júmoun lun líderagunün, áni ánjana ññüdün, noúnajabei. ⁸ Dánme liábin, ladáriraguagüdübaña gürígia ja ubouagubaña jóungua luágu gáfígon jamá, luágu gíñe níjein lan ában úma le lánina úarani, luágu gíñe lagúseragüdübaña lan Búngiu. ⁹ Larúfudubei joun luágu gáfígon jamá láu mafiñen jamá nuágu, ¹⁰ lasúbudiragüdübei joun luágu úaragua nan, láu larúfuduni joun luágu nídiba lan le ñíjin lubei Nóguchi dánme le nígirunün. ¹¹ Líchuguba fe joun luágu lagúseragüdün Búngiu, ladüga agúseragüda láali Máfia, le agúmadijabei lídan ubou le.

¹² ‘Gíbegili lúnti nariñaguni jun, jásiñerubei gunfaráanda guetó. ¹³ Dánme liábin Sífiri Sándu le lánina inárüni, larúfudajabei sun inárüni jun, ladüga madímurejanbei luágu láni lúngua, le lagáambubei, ligíaba lariñaga. Lasúbudiragüdübei cátei lé buri lúnbei lasúseredun jun. ¹⁴ Líchuguba inébesi nun, ladüga lerésibiruba lídaangiñe ninárün, ábame lasúbudiragüdüni jun. ¹⁵ Sun le lúmabei Nóguchi, náni gíñe, ligía nariñagunbei luágu lerésibiruba lan Sífiri Sándu lídaangiñe ninárün, ábame lasúbudiragüdüni jun.

Lasáansiraguba íruni lun ugúndanime

¹⁶ ‘Málüjadina, ánjana maríjin jumá, múrusunmeya dan lárigiñe, ábayame jaríjinina, ladüga neíbuga le ñíjin lubei Nóguchi.

¹⁷ Ábati jálügüdagun jídaangiñe láni dispulugu jamagua, ába jaríñagun.

—¿Cásan míni lan le? Lariñaga woun luágu málüjali lan ánjein maríjin wamá, múrusunya lánme dan lárigiñe, ábayame lan waríjini, ladüga leíbuga lan le ñíjin lubei Lúguchi. ¹⁸ ¿Ca míni lan láu “múrusun dan lárigiñe le”? Úati gunfaráanda wamáni ca lan uágu ladímureja.

¹⁹ Ába lasúbudiruni Jesúsu luágu busén jama jálügüdaguni, ába lariñagun joun.

—Aríñagatina jun luágu málüjadina lan ánjana maríjin jumá, múrusun lánme dan lárigiñe, ábaya lánme jaríjinina. ¿Ligía le uágubei jálügüdagua júmagua? ²⁰ Ninárün jáu luágu jayájuba lan, jírugua jugúyame, ánjañati gürígia ja láni ubou le, jagúndaaruba. Láu sun líra, íbini jíru jumá, lasáansiraguba jírún lun ugúndanime. ²¹ Dan le tagúriajan lan ában wúri, súfuritu ladüga chülúja lan lórate igári, lásun agúriajouaali lan irájü, marítangunjaru luágu igári, ladüga ugúndanime le tasáandirubei luágu

agüriajaaru lan ában irájü ubouágu. ²² Ítara líña gíñe, jugúya jírutün guetó, narijyabadün, ábame ti tabuínchun janígi láu ugúndani, ában ugúndani le úati gayáraati lagidaruni jueí.

²³ Lídaanme wéyu ligía, málügüdün jumádiname luágu ni cáta. Ninárün jáu luágu líchugubei lan Nóguchi sun le jamúriajabei lídan níri lúma, jun. ²⁴ Chülú lúmoun dan le, mamúriajangidün ni cáta lídan níri, jamúriaja, ábame jibíjin, buin jumámuga láu ugúndani.

Jesucrístu, le ásiiraqúbalin ubouú

²⁵ Aríñaga náali buri cátei le jun láu jémpulu, inítebei dan lun madímurejaanjadina lánme jun láu jémpulu, ábame nadímurejan furáangu jun luágu Búngiu Úguchili. ²⁶ Lídaanme wéyu ligía, jamúriajaba lúma lídan níri, maríñaguntina luágu nayúmura guba lan lun Nóguchi juágu, ²⁷ ladüga ligía guánarü jínsiñetün lun. Jínsiñetün lun ladüga jínsiñe nan jun, afíñeedün gíñe luágu lúmagiñe lan Búngiu niábin. ²⁸ Lúmagiñe Búngiu Úguchili náfurida, ába niábin lídoun ubouú le, guetó nígiraali ubouú le, neíbugaya lúmoun Nóguchi.

²⁹ Ába jaríñagun láni disípulugu.

—Anáti guetó, badímurejaña furáangu, mayúsurunga jémpulu. ³⁰ Aríja wamáali guetó luágu subúdi lan sun cátei bun, moún lumuti bálügüdün luágu ni cáta ladüga subúdi báni jaritagun gürígia. Luágu líra wafíñera luágu lúmagiñe lan Búngiu biábin.

³¹ Ába laríñagun Jesúsu joun.

—¿Afíñeedüti guetó? ³² Iníteeli óra, áni guetó guetó, dánme le jachágaragun sun jugúya, cáda ában luágu loubadina, ábame jígirunina nábugua, láu sun máma lan nábuguañadina ladüga níjein Nóguchi núma. ³³ Naríñagunbalin sun le jun, lun jadárirun ñurúguaü lídan jafíñerun nuágu. Jasúfuriruba ubouágu, ganígi jumá, ¡sirígua náali ubouú!

17

Layúmuragun Jesúsu jawágu láni disípulugu

¹ Larígiñe laríñaguni Jesúsu sun cátei le, ába laríjin siélun, ába laríñagun.

—Nóguchi, chülúja nidáani, rúba inébesi luágu Biraü, ru lámuga gíñe Biraü inébesi bun. ² Rújadibu ubáfu lun Biraü jawágu sun gürígia lun líchugun ibágaru magúmuchaditi joun ja bíchugubaña lun. ³ Niján lébunabei ibágaru le magúmuchaditi, lun jasúbudirunibu gürígia amürü le Búngiu ábanrügüti, le inárüti, lúma lun jasúbudirunina, áu Jesucrístu le bouñajabei.

⁴ Rújadina uweírighuni bun ya ubouágu, gumú nan gíñe le uágubei bouñajana. ⁵ Guetóti Nóguchi, rúbei uweírighuni le méme méja nánibe nun biñüwarü lubárgiñe meja ñi lan ubouú.

⁶ Subúdigüda náali joun ja baságarubaña lídaangiñe ubouú lun bíchuguniña nun, cátabu lan. Bánigu meja, ába bíchuguniña nun, ñüdütiña láu le bubeíbei. ⁷ Guetó, subúdi jamáali luágu sun lan le bíchugubei nun búmagiñe lan liábin, ⁸ rúnaali ugánu le bíchugubei nun joun áni resíbi jamúti, subúdi jamáali luágu inárüni lan luágu búmagiñe lan niábin, afíñeeña gíñe luágu amürü lan ouñajabalina.

⁹ Ayúmuraguatina bun jawágu, mayúmuraguntina jawágu lánigu ubouú, nayúmuragun jawágu ja bíchugubaña nun, ladüga báni jamá. ¹⁰ Sun le náni, báni, le báni, náni, arijúati nuweírighun jawágu.

¹¹ ‘Áu, merédeedina ubouágu, ánjein jagía, jeréderuba. Áu, neíbuga búmoun. Núguchi sánduti, toúnigi báña ja bíchugubaña nun láu bubáfu lueí jeíguadun, lun lídan jamá ában le tímatimaati quei áu búma. ¹² Dán meja le jáma nan ubouágu, toúnigi numútiña meja ja bíchugubaña nun láu bubáfu, meféridiruntina ni ában jádaangiñe lueidügü Júdas, lun lagúnfulirun le бүрүwаñubei tídan Berérun.

¹³ ‘Guetó, neíbuga le ñíjin bubeí, luágu anájagua lan ubouágu aríñaga numúti buri cátei le lun jabuínchun láu ugúndani méme le nuágubei. ¹⁴ Rúnaali berérun joun, ába jeyéreegudún lun ubouú, ladúga máma jamá lánigu ubouú ítara queisi máma lan lánigu ubouú áu. ¹⁵ Mamúriajaantina búma lun baságaruniña ubouágugiñe, namúriajan búma lun batoúnigiruniña lueí Máfia. ¹⁶ Ítara quei máma lan láni ubouú áu, máma giñe láni ubouú jagía. ¹⁷ Derégeguagüda báña jóungua bun, láu lubáfu berérun le inárütibeí. ¹⁸ Quei boúnajanina jádoun lánigu ubouú láu ugánu lánina asálbaruni, ítara giñe nouñajaniña jádoun lánigu ubouú láu ugánu ligía. ¹⁹ Áni derégeguatina núngua bun jawágu, lun giñe jedéregeragun jóungua bun le tímatimaati.

²⁰ ‘Máma rügüñein jawágu namúriaja búma, amúriajatina giñe jawágu ja lúnbaña jafiñerun nuágu dánme le jagáambuni ugánu lánina asálbaruni jámagiñe. ²¹ Amúriajatina búma lun lídan jamá ában sun jagía, lun ában méme jamá cátei wáma quei áu búma, amürü núma, lun lídan jamá ában buídu buídu, lun lafiñerun ubouú luágu boúnajan nan. ²² Rúnaali uweíríguni le méme bíchugubei nun joun, lun ában méme jamá cátei quei ában méme wamá cátei áu búma, ²³ áu jádan, amürü nídan, lun jayábin lun ában mémebaña lan buídu buídu, subúdi lámugei ubouú luágu boúnajan lan áu, áni jínsiñe jamá bun sarágu quei nísíñe bun.

²⁴ ‘Núguchi, amürü íchugubaliña nun, buséntina lun númabaña lan le ñí numuti, lun jaríjini uweíríguni le bíchugubei nun, ladúga jínsiñegubeiñadina bun lubáragiñe ladügüniwa ubouú. ²⁵ Núguchi richáguati, ibídiñetibu lun ubouú, subúditibu nun, subúdi jamáali giñe wügüriña ja luágu boúnajan lan áu. ²⁶ Subúdigüda náali joun cátabu lan, áni nasúbudiragüda mémebadibu, lun ñi lan ínsiñeni le buágubei nun jádan, lun giñe ñi nan já dan.

18

Janügüni Jesúsu adáüra

(Mt 26.47-56; Mr 14.43-50; Lc 22.47-53)

¹ Lárigiñe laríñaguni Jesúsu cátei le, ába láfuridun jáu láni disípulugu lun jóúdin loubáfurugun dúna le cedrón. Ñíñein ában fulásu lé buri ñí lumuti tídibu olívos, ñíjin lubeí lebélura Jesúsu jáu láni disípulugu. ² Subúdi lumúti giñe Júdas le alúgurubalin Jesúsu, fulásu ligía, ladúga oúndaraguañajaali Jesúsu ñi jáma láni disípulugu. ³ Ába lubeíti lachülürün Júdas ñíjin jáu sarágu sudaara jáma polisía ja tánina témpulu, jóúnajan jábutigu fádirigu jáma fariséogu. Gárumatetiña, barütiña giñe lámpu lúma tóchi. ⁴ Quei subúdi láali lan Jesúsu le lúnbei lasúseredun lun, ába láfuridun, ába laríñagun joun.

—¿Ca jáluajabei?

⁵ Ába jaríñagun lun.

—Wáluajañein Jesúsu le Nazarétna.

Laríñaga Jesúsu joun.

—Áu Jesúsu ligía le jáluajabei.

Ñíñeinti Júdas le edéregerubalin jáma. ⁶ Dan laríñagunbei Jesúsu joun luágu ligía lan le jáluajabei, ába jeíguadunga múarugún janagoún. ⁷ Ábaya laríñagun Jesúsu joun.

—¿Ca jáluajabei?

Ába jaríñagun lun.

—Wáluajañein Jesúsu le Nazarétna.

⁸ Ábati laríñagun Jesúsu joun.

—Aríñagaadinatia jun luágu áu lan. Ánjein áu lubeí jáluajabei, ígira jumáña ja lun jóúdin.

⁹ Lasúseredunbei líra lun lagúnfulirun le laríñagubei Jesúsu guánarügü. “Meféridirúnti ni ában jádaangiñe ja líchugubaña Núguchi nun.” ¹⁰ Ábati laságarunun Simón Pédro lefeínte, ába líbuguni larígei ában lumúsun fádiri le íñutimaabei gíriti Málco. ¹¹ Ába laríñagun Jesúsu lun Pédro.

—Dáboun befeínte tárigoún. ¿Jarítaguatibu funági luágu moun lan nasúfuriruni oúchawagúni le líchugubei Núguchi lun nasúfuriruni?

Jesúsu ligíbugiñe fádiri le íñutimaabei

(Mt 26.57-58; Mr 14.53-54; Lc 22.54)

¹² Ábati janügüni súdeara, lúma gumándan, jáma japolisían juríu, Jesúsu adáúra, ába jagüraguni. ¹³ Lárigiñe, ába janügüni lúbiñoun Anás. Anás ligía limédamurubei Gáifasi, fádiri le íñutimaabei lídan irúmu ligía. ¹⁴ Gáifasi ligía, le méme meja aríñagubei joun juríu luágu buítima lan joun lun loúnwen ában wügüri jawágu sun mútu.

Leyéedagun Pédro luágu subúdi láni Jesúsu

(Mt 26.69-70; Mr 14.66-68; Lc 22.55-57)

¹⁵ Ába wóúdin, áu Juan lúma Simón Pédro, lárigi lárigi Jesúsu. Áu, subúditina lun fádiri le íñutimaabei, ábati nebélurun lúma Jesúsu lídoun tübürürü lúban fádiri, ¹⁶ ánjeinti Pédro, ába leréderun bougudi luágu béna. Ligía náfuridunbei, ába nadímurejan túma to oúnigirubalin béna, ába nebélaagüdüni Pédro. ¹⁷ Ábati tálügüdüni oúnigirutu béna Pédro.

—¿Ma bugúya ában jádaangiñe láni güriña le disípulugu?

Laríñaga Pédro.

—Uá, máma áu.

¹⁸ Queíti díliña lubeí, fúguatiñati músu jáma polisía wátu, rára jañáti ñi abácharagua. Ñíñein giñe Pédro jáma, abácharagua larügürügü wátu.

Lálügüdaguni fádiri le íñutimaabei Jesúsu

(Mt 26.59-66; Mr 14.55-64; Lc 22.66-71)

¹⁹ Ába lagúmeserun fádiri le íñutimaabei álügüdaguei Jesúsu cátaña lan lánibaña disípulugu, cátei lan giñe larúfudajabei. ²⁰ Laríñaga Jesúsu lun.

—Bougudi nadímureja ligíbugiñe sun ubou, súnwandan narúfudajan tídan ligílisi lúma témpulurugu le ñi lubei jóúndaragua sun juríu, madügüngidina lubeíti ni cáta arámudaguati. ²¹ ¿Ca uágu bálügüdana? Álügüda báña ja agáambubalina, jagíalá aríñagei le uágubei nadímureja joun. Subúdi jamúti le naríñagubei joun.

²² Dan laríñaguni Jesúsu cátei le, ába liábin ában jádaangiñe polisía ja tánina témpulu, ába lagáyuajan ligíbuagun, ába laríñagun lun.

—¿Ítara lúba bouñabuni fádiri le íñutimaabei?

²³ Laríñaga Jesúsu lun.

—Ánjein aríñaga nubei wuríbati, aríñagabei jalíañein lan luríban, ánjeinti buídu lubei le nariñagubei, ¿ca uágu bagáyuaja nuágu?

²⁴ Ábati loúnajani Anás gürágu lun Gáifasi, fádiri le íñutimaabei lídan irúmu ligía.

Leyéedagunya Pédro luágu Jesúsu
(Mt 26.71-75; Mr 14.69-72; Lc 22.58-62)

²⁵ Sun dan le, nijágu Pédro abácharagua larügürügü wátu, ába jaríñagun lun.

—¿Másan amürü ában jádaangiñe láni gürígia le disípulugu?

Ába leyéedagun Pédro, ába lariñagun.

—Uá, máma áu.

²⁶ Ábati lálügüdüni ában jádaangiñe lumúsuniña fádiri le íñutimaabei, ában lidúje le líbugubei Pédro arígei.

—¿Máfunagi aríja numútibu lúma lídan fulásu lé buri ní lumuti tídibu olívos?

²⁷ Ábaya leyéedagun Pédro, lídan óra ligía, ába layúgurujan gáyu.

Jesúsu ligíbugiñe Piláto
(Mt 27.1-2, 11-14; Mr 15.1-5; Lc 23.1-5)

²⁸ Ábati janügüni Jesúsu lúbiñegiñe Gáifasi lun lúbiñoun gumándan. Arúgadeina liñáti, mebélutiñati juríu palásiurugún luei marúma jamá, siñáme gádan lániña adíneruni le lánina páscua. ²⁹ Ligía láfuridunbei Piláto lun ladímurejan jáma, ába lariñagun joun.

—¿Cásan lidúnrunbei gürígia le jurúma?

³⁰ Ába jaríñagun lun.

—Lun jamúga madügün lan wuríbani, medéregerun wamúti jamúga bun.

³¹ Ábati lariñagun Piláto joun.

—Barújumei, agúseragüda jumei quei lariñaguni jilúrudun guánarü.

Jaríñaga juríu lun.

—Wagía juríu, maríchatywa lun wáfarun ni ában jilágubei.

³² Ítara líña lagúnfulirún le lariñagubei Jesúsu luágu ligáburi ída lúba lan loúnwen. ³³ Ábaya lebélorun Piláto palásiurugun, ába lagúarun lun Jesúsu, ába lariñagun lun.

—¿Amürü Jarúeitebei Juríu?

³⁴ Ába lariñagun Jesúsu lun.

—¿Luágu báni búngua bálügüdaja luágu líra, ódi ladúga jaríñaguni ámu bun nuágu?

³⁵ Lariñaga Piláto lun.

—¿Juríu funági áu? Binásiñun jáma jábutigu fádirigu, jagía edéregerubalibu nun. ¿Cági bidúnrunbei?

³⁶ Ábati lariñagun Jesúsu lun.

—Narúeijan máma lánina ubou le, lun jamúga ítara líña lan, jageíndaguña jamúga nánigu lun medéregerúniwa nan joun juríu. Máma yána narúeijan.

³⁷ Ábati lariñagun Piláto lun.

—¿Urúei lubeiti amürü?

Lariñaga Jesúsu lun.

—Urúei áu quei baríñaguni. Agúriajouátina, ñübin áu lídoun ubouú le lun nariñaguni le inárünibeí. Sun ja gagáambadibaña lun inárüni, agáamba jamúti le nariñagubeí.

³⁸ Laríñaga Piláto lun.

—¿Cáteiti inárünibeí?

Lasíadirúniwa Jesúsu lun ouweni

(Mt 27.15-31; Mr 15.6-20; Lc 23.13-25)

Lárigiñe ladügüni Piláto álügüdajani le, ábaya láfuridun adímureja jáma juríu, ába lariñagun joun.

—Madáritina ni murúsun dúru luágu wügüri le. ³⁹ Quei jéchu jumá lun nígiragüdün ában adaürüti jun lídan fédu le láni páscua, ¿buséntün lun náfuridagüdüni Jesúsu le jarúeitebei juríu?

⁴⁰ Ábaya jagúaragun sun jagía.

—¡Mígiragüdabeí le! ¡Barabáslá bígiragüda!

Barabási ligía, ában jíwer uti.

19

¹ Ábati lanügüni Piláto Jesúsu, ába loúnajan abeíchagüdei, ² ába jíchugun ában súdaara ába rídi láuti jíyu leréberugu Jesúsu, ába jadáüraguagüdüni táu ában anáanguni colóru gúchu. ³ Ába jayárafadun lubádun dan méme aríñageina.

—¡Gabágarilá Jarúeite Juríu!

Ába jagáyuajan ligíbuagun.

⁴ Ábayati láfuridun Piláto, ába lariñagun joun juríu.

—Naságaraali ñájoun lun jasúbudiruni luágu madári nan dúru luágu.

⁵ Ába láfuridun Jesúsu láu rídi láuti jíyu lábulugu, táu lanáangun colóru gúchu. Ábati lariñagun Piláto joun.

—¡Niján wügüri ligía!

⁶ Dan jaríjinbalin jábutigu fádirigu jáu sun polisía, ába jagúmeserun agúaraja.

—¡Dáguabeí luágu gurúwa! ¡Dáguabeí luágu gurúwa!

Laríñaga Piláto joun.

—Barújumeiti, dágua jumeí luágu gurúwa, ladüga áu, madáritina ni murúsun dúru luágu.

⁷ Ába jaríñagun juríu lun.

—Wagía galúruduntiwa áni según walúrudun, lúnti loúnwen ladüga lariñagun luoúgua luágu Liraü lan Búngiu.

⁸ Dan lagáambunbalin Piláto le, ábatima lanúfudedun. ⁹ Ábaya lebélurun palásiurugun, ába lariñagun lun Jesúsu.

—¿Jalíanasan amürü?

Moúnabunti Jesúsu ni cáta.

¹⁰ Ábati lariñagun Piláto lun.

—¿Moúnabun bumútina? ¿Ibídiñetisan bun luágu gabáfu nan lun nígiragüdünibu, gabáfu áu lun nádaraguagüdünibu luágu gurúwa?

¹¹ Laríñaga Jesúsu lun.

—Úati jamúga ni murúsun ubáfu búma nuágu lun jamúga míchu láni Búngiu bun, ligía weíritima lubeí lidúnrun le edéregubalina bun sügü báu.

¹² Lúmagiñe óra ligía, ába lálugun Piláto ída lúba lan lígiragüdüni Jesúsu. Ába jagúaragun juríu lun.

—¡Ánjein bígiragüda, máma amürü lumáda urúei Rómana! ¡Furúmieguarügü le aríñaguti luóúgua luágu urúei lan, lágani urúei Rómana!

¹³ Dan lagáambunbalin Piláto líra, ába loúnajan aságarei Jesúsu, ába lañúurun luágu jalaü le agúseragülei, ubáraü le únbei jaríñaga Dübü, Gabáta lídan jerérun juríu. ¹⁴ Queí buri amídirugujaali, le ában wéyu lubá páscua. Ábati laríñagun Piláto joun juríu.

—¡Niján jurúeite!

¹⁵ Ába jagúaragun.

—¡Jilála! ¡Jilála! ¡Dáguabeí luágu gurúwa!

Laríñaga Piláto joun.

—¿Buséntün nádaraguni jurúeite luágu gurúwa?

Jaríñaga jábutigu fádirigu lun.

—Marúeitetiwa ámu lueí urúei Rómana.

¹⁶ Láu líra, ába ledéregeruni Piláto joun lun ládarawagún luágu gurúwa, ába janügüni.

Ládarawagún Jesúsu luágu gurúwa

(Mt 27.32-44; Mr 15.21-32; Lc 23.26-43)

¹⁷ Ábati láfuridun Jesúsu barüinaleí lugúruwan lun lídin lídoun fulásu le únbei jaríñaga Lufúlasun Lábu Ichügü, Gólgota lídan jerérun juríu. ¹⁸ Ñi jádaraguei luágu gurúwa, dágua jagía bián wügüríña úara lúma, ában lueígiñe cáda louba. ¹⁹ Ába loúnajan Piláto íchigagüda ában abürüjoúni luágu gurúwa, laríñaga ñi. “Jesúsu Nazarétna, Jarúeite Juríu”. ²⁰ Sarágu jáña jádaangiñe juríu alíjati abürüjoúni ligía ladüga fulásu le ní lubei jádaraguei Jesúsu luágu gurúwa, madíseti ubúrugugiñe, áni abürüjoúati abürüjoúni ligía lídan buri dimúrei hebréo, güríegu, lúma latín. ²¹ Ligía jaríñagunbei jábutigu jafádirin juríu lun Piláto.

—Mabürüdabá ñi “Jarúeite Juríu”, bürüba “Le aríñagubei luágu Jarúeite lan Juríu.”

²² Ába laríñagun Piláto joun.

—Le bürünaalíbei bürünaalíbei, ítara lúba.

²³ Lárigiñe jádaraguni súdeara Jesúsu luágu gurúwa, ába janügünun lanáangun, ába jadügün gádürü fánreinti táu, ába fánreinti lun cáda súdeara. Ába giñe janügünun lisímisin, quei májüchawagún tubeí, ában rügüñoun fiésu íñugiñe lun únabun, ²⁴ ába jaríñagun súdeara jámagua.

—Majeíridagua wamóun, ájurerera wamá tuágu, aríja wamámuga cába lan agáñiroun.

Ítara líña lagúnfulirun le taríñagubei Lerérun Búngiu. “Fánreingua jamútu nanáangun jádaangua, ájurerera jagía tuágu nisímisin cába lan agáñiroun.” Ítara líña lubeiti jadügüni súdearagu.

²⁵ Ñíñoun lúguchu Jesúsu yaráfa lun gurúwa túma tamúlelua, María to lúmari Cléofas, túma María Magdaléna. ²⁶ Dan laríjinbarun Jesúsu lúguchu rára nubádu, áu le disípulu lé jínsiñebei lun sarágu, ába laríñagun tun lúguchu.

—Núguchu, nirán biraü.

²⁷ Ába laríñagun nun.

—Nurán búguchu.

Lúmagiñe óra ligía, ába nerésibirunun núbiñe.

Loúnwen Jesúsu

(Mt 27.45-56; Mr 15.33-41; Lc 23.44-49)

²⁸ Lárigiñe sun cátei le, quei subúdi láni Jesúsu luágu gúnfulijali lan láu sun le lúnbei ladügüni luágu wasálbarun, ába laríñagun, lun lagúnfulirún le tariñagubei Lerérun Búngiu.

—Mágürabujadina.

²⁹ Ñíñein ában fúdu táu diweín garüjütu, ába jadüdüragüdün ában mudúsi tídan diweín tugúya, ába jíchuguni luágu ában wéwe, ába jiñúruni luágun liyúma. ³⁰ Ába látunun Jesúsu diweín garüjütu tugúya, ába laríñagun.

—Gúnfulija sun cátei.

Ába larábachun ligíina, ába loúnwen.

Límiruni ában súaara louba Jesúsu táu lefeínte

³¹ Wéyu ligía, ában wéyu lubá páscua, mabúseeruntiñati juríu lun leréderun jágubu güriquia luágu gurúwa lídan wéyu le eméraaguagülei, ladüga weíríti wéyu ligía. Ligía jamúriajaanbei lúma Piláto lun loúnajan ájalajei járuna ja dáwaguñubaña luágu gurúwa, lun gíñe lagídarún jágubu ñígiñe. ³² Ábati jóudin súaara, ába jájalachuni lúruna furúmiñeti, jalá jameí lúruna le ában le dáwaguñubei luágu gurúwa úara lúma Jesúsu. ³³ Dan le jayárafadunbei lun Jesúsu, ába jaríjin luágu jiláali lan, ligía májalachun jamáli lubei lúruna.

³⁴ Ába liábin ában súaara, ába límiruni Jesúsu loúbawagun táu ában efeín, ába láfuridun jítaü lúma dúna ñígiñe. ³⁵ Au Juan, le abürüjabalin le, ában le aríjubalin, áni aríñaga numúti inárüni, subúdi numúti luágu aríñaga náni inárüni lun gíñe jafiñerun jugúya. ³⁶ Ladüga lasúseredunbei buri cátei le, lun lagúnfulirun le tariñagubei Lerérun Búngiu. “Májalachúnwabei ni ában ábuu luágu.” ³⁷ Aríñagati gíñe tídan Lerérun Búngiu. “Jaríjubei le jímiragubei.”

Lábunajoún Jesúsu

(Mt 27.57-61; Mr 15.42-47; Lc 23.50-56)

³⁸ Lárigiñe sun cátei le, ñíñein ában wügüri Arimatéana, gíriti José, falá lumuti meja wügüri ligía Jesúsu, láu sun arámudaguarügü lan ladüga lanúfude jaweí juríu, ába lamúriajani lúgubu Jesúsu lúma Piláto. Ába líchuguni lun, ába lanügüni José lúgubu Jesúsu. ³⁹ Ába gíñe liábin Nicodémo, lé meja ñüdünbei ayánuja lúma Jesúsu gúñoun, ába liábin láu sarágu ibíñei. ⁴⁰ Ábati janügüni José lúma Nicodémo lúgubu Jesúsu, ába jóuburaguni táu gamísa to túaguatu láu ibíñei ligía según jagáburi juríu lubá jábunajan. ⁴¹ Ñíñein ában fulúri-ágei lídan fulásu le ñí lubei jádaraguei Jesúsu luágu gurúwa, lídaanti fulásu ligía, ñíñein ában umúajaü iséri le mayúsurungili. ⁴² Ñíjin jíchigei lúgubu Jesúsu, ladüga yaráfa lan umúajaü ligía, ladüga gíñe agúñeele lan, gumése wéyu le eméraaguagülei.

20

Lásaarun Jesúsu lídaangiñe ouweni

(Mt 28.1-10; Mr 16.1-8; Lc 24.1-12)

¹ Wéyu dimáasu, lubá larúgan dan le búrigagili, ába tídin María Magdaléna aríjei umúajaü, dan tachülürünbei ñi, úaali dübü le lidaü umúajaü

ñi. ² Ába tídin eíbaagueina le ñjín wabeí áu lúma Simón Pédro, ába taríñagun woun.

—Barüjama Jesúsu lídaangiñe lumúaja, ibídiñeti woun jalía lan jíchigei.

³ Ábati wáfuridun, ába woúdin luágun umúajaü. ⁴ Úara woúdin biángubei wagía eíbaagueina, furésetina lueí Pédro, ába nachülürün furúmiñe luágu umúajaü. ⁵ Ába nélemuchun aríja ñjín, gamísa rügüñoun naríja ñi, mebélutina. ⁶ Lárigiñe, ába lachülürün Simón Pédro, ába lebélurun lídoun umúajaü. Gamísa to aúboun lagürawagua Jesúsu, tugúya rügüñoun giñe laríja ñi. ⁷ Gamísati to áboun loubarawagúa lichügü Jesúsu, máma lídaañoun ában túma tó buri áboun lagürawagúa, jóuburagu tíña, tábugua. ⁸ Ába giñeti nebélurun, ába naríjini le asúseredubei, ába nafiñerun luágu saráli lan Jesúsu lídaangiñe oúweni. ⁹ Ligíaaliti gunfaráanda náni le taríñagubei Lerérun Búngiu luágu lásaaruba lan Jesúsu lídaangiñe oúweni. ¹⁰ Ábati wagíribudun wábiñoun.

Larúfudagun Jesúsu lúngua tun María Magdaléna
(Mr 16.9-11)

¹¹ Ánjounti María, ába teréderun boúgudi ayájuaja lubádu umúajaü. Sun nuján lan ayájuaja, ába télemuchun aríja lídoun umúajaü, ¹² ába taríjin bián ánjeligu, jarútu jadáüragun, ñun le ñi lubeí buga lúgubu Jesúsu, ában lichügügiñe, ában lugúdigiñe. ¹³ Ába jaríñagun ánjeligu jagía tun.

—¿Ca uágu bayájua?

Taríñaga joun.

—Barüjama Nabúreme, ibídiñeti nun jalía lan jíchigei.

¹⁴ Quei taríñagun ítara, ába tadígiragun, ába taríjini Jesúsu, niján lan ñi, ibídiñeti tun luágu ligía lan. ¹⁵ Ábati laríñagun Jesúsu tun.

—¿Ca uágu bayájua? ¿Ca báluajabei?

Sun taríñaguti le oúnigirubalin fulúri-ágei adímurejabei tun, ába taríñagun lun.

—Ánjein banügün lubeí, aríñagabei nun jalía lan bíchigei, barü námugei.

¹⁶ Ábati laríñagun Jesúsu tun.

—¡María!

Ába tagáragun, ába taríñagun lun lídan jerérun juríu.

—¡Rabóni! —míni lan líra, Maésturu.

¹⁷ Laríñaga Jesúsu tun.

—Márügüdába nuágu, ladüga maweínrungidina le ñjín lubeí Nüguchi. Beíba, baríñagame joun náni disípulugu luágu neíbuga lan le ñjín lubeí Nüguchi, le giñe Júguchi, Nubúngiute le giñe Jubúngiute.

¹⁸ Ábati tídin María Magdaléna awísaraña disípulugu luágu aríja táali lan Jesúsu, áni aríñaga láni buri cátei le tun lun taríñagun joun.

Larúfudagun Jesúsu lúngua joun disípulugu
(Mt 28.16-20; Mr 16.14-18; Lc 24.36-49)

¹⁹ Wéyu méme ligía gúñoun, oúndaragu jáña disípulugu, darúgu béna jáu ladüga janúfude jawéi juríu. Ába lebélurun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁰ Lárigiñe laríñaguni líra, ába larúfuduni lújabu lúma louba joun. Ába jagúndaaragun disípulugu láu jaríjini Jesúsu. ²¹ Ábaya laríñagun Jesúsu joun.

—Níjeinlá darángilaü jídan. Ítara quei louñajanina Núguchi, ítara líña gíñe nouñajanün.

²² Ábati láfurun jawágun, ába laríñagun joun.

—Resíbi jumeí Sífiri Sándu. ²³ Ánjein ferúduna jumá jafígoun ámu, ferúdnawaali, ánjein úa ferúduna jumáni, reídeijali, úouga ferúdnawa lan.

Laríjini Tomás Jesúsu lárigiñe lásaarun lídaangiñe ouweni

²⁴ Tomás, ában jádaangiñe dúusu disípulugu le únbei jaríñaga Mádou, úatiti jáma dan le liábinbei Jesúsu. ²⁵ Lárigiñe, ába jaríñagun ja jíbiri disípulugu lun.

—Aríja wamáali Wabúreme Jesúsu.

Ába laríñagun Tomás joun.

—Ánjein maríjin nan lárigi gürábu luágu lújabu, da neíme liraúraü nújabu lídoun júyu le lárigi gürábu, da nújabu lídoun louba, siñábei nafíñerun.

²⁶ Wídü wéyu lárigiñe, oundaragu jáñaya disípulugu tídan ában múna, ñíñeinti Tomás jáma dan ligía. Láu sun darúgu líña lan béna jáu, ába lebélorun Jesúsu, ába laráramun jamídaangua, ába labúsurun joun ítara.

—Níjeinlá darángilaü jídan.

²⁷ Ába laríñagun lun Tomás.

—Dábei liraúraü bújabu ñájoun, aríja beíme nújabu, da beíme bújabu lídoun nouba. Masígirabá láu liloúguan afíñeni, afíñebá luágu áu lan.

²⁸ Ábati laríñagun Tomás.

—¡Nabúreme, Nubúngiute gíñe!

²⁹ Laríñaga Jesúsu lun.

—Tomás, afíñeedibu guetó, ladüga aríja báadina lan, gúndaatiña ja afíñerubaña, maríjina jamána.

Ca lan lébubei tabürüjoún líburu to

³⁰ Adügayati Jesúsu ámu sarágu miláguru jagíbugiñe láni disípulugu, le úabei bürüñu tídan líburu to. ³¹ Labürüdünbei buri le lun jafíñerun luágu Jesúsu lan Crístubei, le Liraü Búngiu, lun gíñe láu lan jafíñerun, gabágarí jumá queísi lánigu.

21

Larúfudagun Jesúsu lúngua joun sédü jádaangiñe láni disípulugu

¹ Lárigiñe, ábaya larúfudagun Jesúsu lúngua joun láni disípulugu láru dúna le gíribei Tibérias. Niján ligáburí ladügüni. ² Lídaañanu ában Simón Pédro, Tomás le únbei jaríñaga Mádou, Natanaél, le lílana Caná le láni Galiléa, lirájüñü Zebedéo, jámaya bián jádaangiñe láni Jesúsu disípulugu. ³ Ába laríñagun Simón Pédro joun.

—Neíbuga esénija.

Ába jaríñagun lun.

—Weíbuga gíñe búma.

Ába jádinun tídoun jagúne, ába jóudin, mañúguntiña ni cáta áriebu ligía. ⁴ Dan le arúgadeina lan, ába jaríjini Jesúsu ñi láru dúna, ibídiñetí yebe joun disípulugu luágu Jesúsu lan. ⁵ Ábati laríñagun joun.

—Numádagu, ¿mañúgungidünsan?

Jaríñaga lun.

—Ni cáta.

⁶ Ábati laríñagun Jesúsu joun.

—Fíjuma lueígiñe toúnwenren ibíti ugúnein, jañúguba.

Ába jágurun, lárigiñe siñá yebe jacháwarunun séni dúnarugugiñe le jíbe úduraü tídan. ⁷ Ábati naríñagun, aú Juan, lun Pédro.

—¡Jesúsutia le!

Quei lagáambun Simón Pédro luágu Jesúsu lan, ába ladáurunun lanáangun, ába lachúbarun dúnarugun. ⁸ Ja jíberi disípulugu, ába jóudin lárun béya táu ugúnein, adúrujeina jamoún séni buin jáu úduraü, quei ában rügúñein lan san bádun jadíse luei béya. ⁹ Dan le jarárirun múarugun, ába jadárirun wátu geméti láu eñéguraü, láu ában úduraü ligíbuagu túma fein. ¹⁰ Ába laríñagun Jesúsu joun.

—Barújuma fiú jádaangiñe úduraü ja sun liñábei jañúguniña.

¹¹ Ába ladinun Simón Pédro tídoun ugúnein, ába ladúrujanun séni lárun béya buin jáu úduraü weínamutiña, san dimí-san ürúwafñanu, láu sun jíbe, majeíridaguntu séni. ¹² Ábati laríñagun Jesúsu joun.

—Jigoúgu, játa bacháti.

Úati ni ában jádaangiñe disípulugu álügüdüti cátei lan, ladüga subúdi jamáni luágu Jesúsu lan. ¹³ Ába liábin, ába lanügúnun fein lújaburugu, ába líchugunun joun, ligía méme ladüga láu úduraü.

¹⁴ Ligía lürüwan larúfudagun Jesúsu lúngua joun láni disípulugu lárigi lásaarun lídaangiñe oúweni lúnya labágaridun.

Ladímurejan Jesúsu lúma Simón Pédro

¹⁵ Lárigiñe játun bacháti, ába laríñagun Jesúsu lun Simón Pédro.

—Simón, Liraü Jonás, ¿jínsiñetinasan bun sügü jáu ja?

Laríñaga Pédro lun.

—Ánja, Nabúreme, subúditi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jóuniri mudún buíti.

¹⁶ Ábaya lálügüdüni luágu libíaman weíyaasu.

—Simón, liraü Jonás, ¿jínsiñetinasan bun le tímatimaati?

Laríñaga Pédro lun.

—Ánja, Nabúreme, subúditi bun luágu jínsiñe ban nun.

Laríñaga lun.

—Toúnigi báñati nánigu.

¹⁷ Ábaya lálügüdüni luágu lürüwan weíyaasu.

—Simón, liraü Jonás, ¿jínsiñetinasan bun?

Ába lírudagun Pédro ladüga lálügüdüni Jesúsu luágu lürüwan weíyaasu ánjein jínsiñe lubei lun, ába laríñagun lun.

—Nabúreme, subúsi sun cátei bun. Subúsi bun luágu jínsiñe ban nun.

Ába laríñagun Jesúsu lun.

—Toúnigi báñati nánigu queísi ában jóuniri mudún buíti. ¹⁸ Ninárün báu, luágu dan lán meja ñúraütimagidibu, ábaja badáuragun, ába bídin le ñíjin lumúti babúseera, dánme le weíyaadibu, iñúrarügübalime barúna, ábame ladáüraguagüdünibu ámu, ábame lanügünibu le ñíjin lumúti mabúseerun ban bídin.

¹⁹ Láu laríñaguni Jesúsu cátei le, lasúbudiragüdüñein ída lúba lan ligáburi loúnwen Pédro, lun líchugun uweírighuni lun Búngiu láu. Lárigiñe, ába laríñagun lun.

—¡Falábana!

Disípulu le jínsiñegubei

²⁰ Dan ladígiragúnbei Pédro, ába laríjinina, áu Juan, anángüran lan járigi, áu le jínsiñebei sarágu lun Jesúsu, le méme añúurubei loubagiñe Jesúsu lídan adíneruni, le gíñe álügüdübalin Jesúsu cába lan wádaangiñe edéregerei.

²¹ Dan laríjinbalina Pédro, ába laríñagun lun Jesúsu.

—Nabúreme, ánsan le, ¿cábasan asúsereda lun?

²² Laríñaga Jesúsu lun.

—Ánjana busén labágaridun daríme nagíribudun, ¿cámegi burúma? Amürü, falábana.

²³ Ábati leíbaagun dimúrei jádan jíbiri lánigu Jesúsu luágu moúnwenbadina lán nege, mariñagunti Jesúsu luágu moúnwenbadina lan, aríñagarügüti. “Ánjana busén labágaridun darí lúmoun nagíribudun, ¿cámegi burúma?”

²⁴ Áu méme disípulu le, le achoúrurubalin buri cátei le, abürüja náaru gíñe gárada to jalíjaboun guetó. Áni subúdiwati luágu inárüni lan le naríñagubei.

²⁵ Níjein gíñe sarágu cátei ladüga Jesúsu, ánjein jamúga abürüjoúa ában ában, afíñetina luágu mábara tan jamúga buri líburu to abürüjoútu láu lídan sun ubou.

CÁTEI LÉ BURI MEJA JADÜGÜBEI APÓSTOLUGU

Loúnajani Búngiu Sífiri Sándu

¹ Lun teófilo.

Abürüjatina bun tídan furúmiñetu nigáradan luágu sun le ladügübei Jesúsu, lúma le larúfudajabei, lúmagiñe dan le lagúmeserunbalin luwádigimari ² darí lúmoun wéyu le lamúdeirúnbei siélun. Lubáragiñebei lídin siélun, láu lubáfu Sífiri Sándu aríñaga aríñaga cátei lé buri labúseerubei lun jadügüni apóstolugu já meja lanúadajabaña, lárigiñe lídin jámagiñe. ³ Lídan bián-wein wéyu le láubei ubouágu lárigiñe lásaarun lídaangiñe ouweni, arúfudaguati lúngua furáangu joun sarágu weíyaasu luágu wínwan lan. Ába burítí ladímurejan joun luágu larúeijan Búngiu.

⁴ Dán meja le níjeingua lan Jesúsu jáma láni apóstolugu, aríñagati meja joun lun máfuridun jamá lídaangiñe ubúругu Jerusalén, laríñaga joun.

—Agúraba jumá lagúnfulirun dímuñe le líchugubei Nóguchi jun, le uágubei naríñaga jun. ⁵ Subúdi jumúti luágu badíseigüda lan Juan láu dúna, nasúbudiragüdüñein jun luágu málüjadün lan giñe ánjaün badísei láu Sífiri Sándu.

Lamúdeirun Jesúsu siélun

⁶ Dan le oundaragujaña lubei lúma Jesúsu, ába jaríñagun lun.

—Wabúreme, ¿Nijánsan dan le lúnbei bíchuguniya linásiñun Israél lun larúeijan?

⁷ Laríñaga Jesúsu joun.

—Siñáti jasúbudiruni ídame lan o cába lan dan ladügei Nóguchi cátei le buri, ligía rügüñein gayára laríñagun ídame lan ladügei. ⁸ Anjein dánme le liábin Sífiri Sándu juágun, jibíjuba ubáfu lun geféen jumá nuágu, dándu Jerusalén quei sun louábawagu Judéa, Samária, chülú lúmoun lidíse-ágei fulásu ubouágu.

⁹ Lárigiñe laríñaguni Jesúsu cátei le, sun añája lan aríaguei, ába liñurúniwa lun lanügüniwa siélun, ába liábin ában juánriñu, ába ladáuragun láu, ába maríjin jamáli lan. ¹⁰ Níñanu aríagua siélun sun amúdeireina lan Jesúsu, ligía jasálriragun bián wügüriña, jarútu jadáuragun jarúgabü, ¹¹ ába jaríñagun joun.

—Wügüriña Galiléana, ¿ca uágu jerédera aríagua siélun? Jesúsu méme le, le amúdeirubei siélun júmagiñe, liábiyaba ítara quei jaríjin lídin.

Lanúadirün Matías lewéñeguame Júdas

¹² Ábati jagíribudun disípulugu lueígiñe wübü le gíribei Olívos lun ubúrugun Jerusalén, lidíse ában kilómetro. ¹³ Dan le jachülürünbei ubúrugun, ába jamúdeirun tídoun rúmu to ní lubei jagánawa. Níñein Pédro jádan, Jacóbo, Juan, Andrés, Felípe, Tomás, Bartolomé, Matéo, Jacóbo le liraü Álfeo, Simón le lídaanbei adámurini le gíribei Cananísta, lúma Júdas le lamúlen Jacóbo. ¹⁴ Oúndaraguátíñaja sun jagía súnwandan lun jayúmuragun lun Búngiu jáma lamúlenu Jesúsu, túma María to lúguchu, jáma ja jíbiri würiña.

¹⁵ Luágu ában wéyu lídan dan ligía, ába laráramun Pédro jagíbugiñe sun afíñetiña ja níbaña—jawára san-wein gürígia—ába laríñagun joun.

¹⁶ —Nidújeñu, lúnti buga lagúnfulirun le laríñagubei Sífiri Sándu liyúmulugugiñe Davíd tídan Lerérun Búngiu, lídan le ladímurejánbei luágu Júdas, le adúndejabáliña ja anügübalin Jesúsu adáüra. ¹⁷ Ában meja jádaangiñe wánigu, Júdas, áni seríwiti lun Jesúsu úara wáma. ¹⁸ Ába lídin, ába lagáñijan ában fulásu láu seínsu le afáyeirúbei lun luágu wuríbani le ladügübei. Ába láburuan láu lábuloğu ünabun, ába lafáüñchün, ába lafúridun sun litíripan. ¹⁹ Dan le jagáambunbalin güriğia ja aganoúbaña Jerusalén, ába jagúajan lun fulásu ligía, Acéldama, míni lan lídan jerérun, Fulásu Láni Jítaü.

²⁰ Ába lasígirun Pédro aríñaga.

—Bürüwañu liña dimúrei buri le luágu Júdas tídan líburu to gíriboun Sálmos. Laríñajare ñi.

Reídeitá lúban málouga,
úa jamá aganoútiña tídan.
Aríñagati gíñe ñi.

Rúalá lubára lun ámu.

²¹ Ítara liña lubeiti, lúnti wanúadajan ában wügüri wádaangiñe lé meja wámati sun dan le wáma lubei Jesúsu, ²² lúmagiñe dan le labásterágüdüñbalin Juan Jesúsu dari lúmoun dan le lamúdeirünbei siélun, lun lewéñegua lan Júdas. Wügüri ligía, líchuguba fe úara wáma luágu lásaarun Jesúsu lídaangiñe ouweni lúnya labágaridun.

²³ Ábati jíridun bián jádaangiñe. José, le méme gíribei Barsabási, le méme gíñe gíribei Jústo, lúma Matías. ²⁴ Ába jayúmuragun lun Búngiu ítara.

—Wabúreme, amürü le subúdíjabúbei tun janígi sun güriğia, arúfudabei woun ca lan jádaangiñe bián wügüriña ja anúadira báalibe ²⁵ lun lesériwidunibu queísi apóstolu lewéñegua Júdas. Ladüga féridi láali Júdas lubára ladüga lafígounjan, áni ñüdünja lídoun fulásu le ladünabei.

²⁶ Ábati jíchaajan ubúnuruni, ába láburuan luágun Matías. Lúmagiñe óra ligía, ába ábanjali lan jádaangiñe apóstolugu.

2

Liábin Sífiri Sándu

¹ Dan lachülürünbei luwéyuri fédu le Pentecostés, oúndaragu jáña sun lánigu Jesúsu lídan ában fulásu. ² Sódini ába lagaambún ában ireíni ñübinti siélugiñe quei dan le lafúrun ában garábali jéreti, ába lagaambún tídan sun múna to ñí jabei. ³ Ábati lasálriragún buri cátei joun camá ligémeri wátu, afánreinjoúañu lun ñi lan ában murúsun lougiñe lábuloğu cáda ában jádaangiñe. ⁴ Ába jabuínchun sun jagía láu Sífiri Sándu, ába jagúmeserun adímureja lídan buri ámu luwýyeri dimúrei luei jerérun quei ladímuregüdüniña Sífiri Sándu.

⁵ Lídoun buri dan ligía, ñíburiñanu juríu Jerusalén ja gúnfulitiña lídan jafíñen, ñübintiña lídaangiñe sun fulásu ubouágu. ⁶ Dan le jagáambunbalin ireíni ligía, ába joúndaragunga güriğia, ibídiñeja joun cába lan jasáminara ladüga cáda ában jádaangiñe güriğia jagía, agáamba jamútiña lánigu Jesúsu adímureja lídan jerérun guánarü. ⁷ Ába laweíridun janígi, ába jaríñagun jámagua.

—¿Ma funági Galiléana ja adímurejabaña? ⁸ ¿Ída liñáti wagáambubaliña adímureja lídan lerérun cáda ában wádaangiñe? ⁹ Añájein güriğia Pártiana

ya, Médiana, Elámna, Mesopotámiana, Judéana, Capadócia, Póntona jáma Ásiana, ¹⁰ Fríjiana, Panfíliana, Ejíptona lúma lídaangiñe buri fulásu África le yagüroun mémebei lueí Ciréne. Añájein giñe Rómána aganouítiña ya, añájein jádaangiñe, juríu ladüga juríu jamá jagübürigu, jíbiri, barü jamaali ligáburi jaffínen juríu. ¹¹ Añájein giñe güriña Crétana jáma Arábiana, sun wagía agáamba wamútiña adímureja luágu luweirigun Búngiu lídan werérun guánarü.

¹² Weíriti janígi súngubei, ibídiñeja joun cába lan jasáminara, ába buri jálügüdagun jámagua.

—¿Cásan míni lan sun le?

¹³ Jíbiri, ába jéjerajan jáu lánigu Jesúsu, ába jaríñagun.

—Bacháruañanúrügü jáña.

Le laríñagubei Pédro joun güriña ja ñíbaña

¹⁴ Ábati laráramun Pédro jáma ja jíbiri únsu apóstolugu, ába laríñagun láu umálali jéreti.

—Wügüriña Judéana jáma sun ja aganoubaña Jerusalén, agáamba jumeí le lúnbei naríñaguni jun buídu, subúdi jumámugei ca lan lílabei cátei le jaríjubei. ¹⁵ Mabácharuántiña wügüriña ja quei jarítangun, néfugubeigili bináafin guetó. ¹⁶ Cátei le, le jaríjubei, ligía lé meja uágubei ladímureja Joél, le proféta, dan le laríñagunbei.

¹⁷ Lídoun buríme lagúmujoun wéyu, líña laríñagun Búngiu, nouñajabei náni Espíritu jádoun sun güriña, nadímurejaba jayúmulugugiñe jisáanigu.

Nayáwadaguba joun irájüñü,
lúma joun weíyaaña mútu.

¹⁸ Nouñajabei giñe náni Espíritu jádoun ja esériwidubaña nun lídoun buri wéyu ligía, wügüriña jáma würiña, ábame nadímurejan jayúmulugugiñe.

¹⁹ Narúfuduba buri cátei garíyawaseti siélu,
narúfuduba seíni ubouágu.

láubei jítaü seíni buri ligía, láu wátu geméti, lúma láu juánriñu láuti gumúlali.

²⁰ Labúrigaduba wéyu,

láfuarame játi funáti quei jítaü,

lubáragiñe lachülürün luwéyuri Wabúreme,

le lúnbei ában lan wéyu weíriti, le marijínligíbei líbe.

²¹ Áni sun ja amúriajatiña asálbaruni lúmagiñe Búngiu, jasálbaruba.

²² Agáamba jumeí lubeíti le lúnbei naríñaguni, jugúya wügüriña Israélítagu. Jesúsu le Nazarétna, ában meja wügüri le larúfudubei Búngiu jigíbugiñe quei wügüri úraguati láu buri cátei weínamuti, miláguru, lúma buri seíni le ladügubei Búngiu jagánagua lídaangiñe, quei le jisúbudin. ²³ Láu sun líra, dan le ledéregerúnbei jun, quei ligáburi aráansejani le larítangubei Búngiu lúmagiñe furúmiñeti dan, ába jáfaruni jilágubei láu jedéregeruni joun wügüriña wuríbatiña lun jádaraguni luágu gurúwa. ²⁴ Ába leséfuruni Búngiu lídaangiñe lubáfu ouweni, sarágüda lumúti lúnya labágaridun, ladüga siñá lan gabáfu lan ouweni luágu. ²⁵ Laríñajare urúei David, dan le ladímurejan luágu Jesúsu.

Subúdi numúti luágu númabei lan Nabúreme Búngiu súnwandan,
noubagiñeñein lun úa lan ni cáta lun lebélaagüdün anúfudei nídoun.

²⁶ Ligía lébubei téjerajan nanígi, ába nadímurejan luágu ugúndani le nídaanbei.

Láu sun wügüri nan garaüwarügüti, jeménigitina buágu luágu nabágaridayaba lan,

²⁷ ladüga mígirun bubóun nuwáni lídan jabára jiláaña, mígirun amürüme lun lañáladun núgubu, áu le bánígu le jínsiñebei bun.

²⁸ Arúfuda bumúti üma le anügübei güri-gia lídoun íbágarí magúmuchaditi nun,

áni babuínchagüdübadina láu ugúndani láu abúnja lan nubádu.

²⁹ ‘Nidújeñu, cátei furánguti le, luágu jilá lan meja wadúje Davíd, bunáwa ligía, gayáraagili waríjini lumúaja chülü lúmoun wéyu le. ³⁰ Davíd, ában meja proféta ligía, áni subúdi lumúti meja luágu aríñaga láali lan Búngiu lun luágu jádaangiñeba lan linébaanfan liábin Crístu, le lúnbei lañúurun luágu lála. ³¹ Adímurejati lubeíti Davíd luágu lásaarun Crístu lídaangiñe ouweni, luágu giñe merédeboun lan luwáni lídan jabára jiláaña,

mañáladun ligíame lúgubu. Ítara líña ladímurejan Davíd luágu Crístu camá jamuga aríagu líña lun, áni ítara líña lasúseredun. ³² Sarágüda lumúti Búngiu Jesúsú méme le lídaangiñe ouweni, sun wagía geféentiwa luágu líra.

³³ Ñurúgüda lumúti Búngiu lueígiñe loúnwenren láu sarágu uweiriguni, ába lerésibiruni Sífiri Sándu lúmagañe Búngiu queísi laríñaguni Búngiu lun, lan gayáraabei lan loúnajani méme Sífiri Sándu ligía joun sun lánigu uboúagu. Ligía cátei le aríja jumáalibei lúma le agáamba jumáalibei guetó. ³⁴ Mاما Davíd amúdeirubei siélun, aríñagati Davíd guánarügü.

Laríñajare Búngiu lun Nabúreme.

“Ñürüba lueígiñe noúnwenren,

³⁵ daríme níchuguniña báganiñu lábugiñoun bubáfu.”

³⁶ ‘Lúnti jasúbudiruni sun jugúya linásiñun Israél luágu Jesúsú méme lan le, le jádaragubei luágu gurúwa, adüga láali lan Búngiu lun ligíaba lan Wasálbaragüle, ligíame giñe Wabúreme.

³⁷ Dan jagáambunbalin cátei le, ába lebélorun igárigu tídoun janígi, ába jaríñagun lun Pédro lúma joun jíbiri apóstolugu.

—Wadújeñu, ¿cábasan wadüga?

³⁸ Ába laríñagun Pédro joun.

—Sáansi jumeí jigáburí ligíbugiñe Búngiu, badísei jugúyame cáda ában lídan líri Jesucrístu, ferúdunawa lámuga jíffigoun, ru lámugei Búngiu Sífiri Sándu jun. ³⁹ Ladüga aríñagaali Búngiu luágu líchugubei lan giñe Sífiri Sándu jun, lúma joun jadügawagun, lúma joun ja aganoubaña díse, lúma joun sun ja lagúarubaña Búngiu lun lánigu jamá.

⁴⁰ Láu buri dimúrei le lúma buri ámu, ladímureja Pédro joun, ába laríñagun joun.

—Séfu jumá lueí asúfuriruni le lúnbei liábin jawágun güri-gia wuríbatíña ja.

⁴¹ Ítara líñáti ába jabásterun, ja adügübaña gásu láu lerérun, ába jayábin queí buri ürüwa mílu güri-gia lun jafíñerun luágu Jesucrístu wéyu ligía.

⁴² Ába jedéregeragun jóungua lun jafúnrendeiruni le jarúfudajabei apóstolugu joun, aganoua jagía lídan úarani jámagua, ayúmuragua jagía buri lun Búngiu, oundaragua jagía lun jeiginun fein to arítaguagülei luágu loúnwen Jesúsú, queísi meja laríñaguni joun apóstolugu lun jadügüni.

Jabágarí furúmiñetiña lánigu Crístu

⁴³ Súngubei láuñanu luweírin anígi luágu buri seíni lúma buri miláguru le ladügübei Búngiu jádaangiñe apóstolugu. ⁴⁴ Sun ja afiñerubaña, lídaañanu ában, ába buríti jafánreinjani le jámati jádaangua. ⁴⁵ Jalúgurajei buri jafúlasun lúma le jámati, ába jafánreinjani lebégi según lemégeirun cáda ában. ⁴⁶ Ságü wéyu jóundaragun témpulurugu lun jájuduragun lun Búngiu. Lárigiñe, ába jóundaragun lúbiñe ában jádaangiñe lun jeíginun fein to arítaguagülei luágu loúnwen Jesúsu, lúma lun jeígin le lánina ságü wéyu, lídan ában láu ugúndani lúma gudémegu. ⁴⁷ Ábaja jadímurejan weírigu luágu Búngiu, ábati jínsiñe jamá joun gürígia, ábatija anáajeina láníña Búngiu ja asálbareinabaña jánwoun.

3

Lareídagun ában meíbugunti

¹ Luágu ában wéyu, ába lídin Pédro lúma Juan témpulurugu ladaünrün ürüwa rábounwéyu, le lórate ayúmuraguni lun Búngiu. ² Ságü wéyu, ñíñein lan ában wügüri meíbugunti lúmagiñe lagüriajoun, barüwarügütija añúura lubádu tubéneri témpulu le gíribei “Béna Buídumeraüti” lun lamúriajan seínsu jáma ebélurutiña témpulurugun. ³ Dan le laríjinbaliña meíbugunti ligía Pédro lúma Juan jebélura lan témpulurugun, ába lamúriajan seínsu jáma. ⁴ Ábati jaríjin Pédro lúma Juan luágun, ába laríñagun Pédro lun.

—Aríjabá wawágun.

⁵ Ába laríjin jawágun, agúraba yebe jíchugun seínsu lun. ⁶ Ába laríñagun Pédro lun.

—Maseínsutina, níchigaali le númati bun. lídan líri Jesucrístu le Nazarétna, sarába, beíbuga.

⁷ Ábati lárügüdüni Pédro lueígiñe lújabu le loúnwenren, ába liñúraguni, óra ligía, ába ledérebugudun lugúdi lúma lumúrugute. ⁸ Ábati lachúbarun lun laráramun, ába leíbugun. Ába lebélorun jáma témpulurugun, eíbugeina, achúbajeina, adímurejeina luágu luweírigun Búngiu. ⁹ Ába jaríjini sun gürígia eíbuga lúma adímureja luágu luweírigun Búngiu. ¹⁰ Weírititi janígi luágu le asúseredubei lun, quei subúdi jabálin wügüri ligía, subúdi jameí luágu ligía lan léñaja añúurubei amúriaja tubéneri témpulu le gíribei “Béna Buídumeraüti”.

Lapúrichijan Pédro témpulurugu

¹¹ Mígiragüdün lumútiñati meíbugunti le areídagubei Pédro lúma Juan, súnti gürígia, ába jeíbaagun láu luweírin janígi luágun tubárandá témpulu le gíribei Salomón, le ñí jabei. ¹² Dan le laríjini Pédro cátei le, ába laríñagun joun gürígia.

—Jugúya Israelítagu, ¿ca uágu laweírda janígi? ¿Ca uágu jaríaguawa camá jamuga wagía areídaguagüdúbalin wügüri le, eíbugagüdei láu wabáfu o láu lan wagúnfulin lúma Búngiu? ¹³ Máma líña, Búngiu, le Jabúngiute binádu wagübürigu Abrahám, Isáac lúma Jacób, ligía areídaguagüdúbalin wügüri le lun íchuguni líñun-ágei uweíriguni lun Jesucrístu le Liraü, ligíra lé meja jedéregerubei joun lúrudugu, áni dan lálugan Piláto lígiragüdüni, májatün. ¹⁴ Lubáragiñe jamúriajan lun lígirawagüdün Jesúsu le jarúmabei áni richágua, amúriajarügü jugúya lun lígirawagüdün ában gáfarajati. ¹⁵ Ítara líña jáfaruni le íchugubalin íbágarí tímatimaati. Ába lásaaragüdüni Búngiu lídaangiñe ouweni, áni geféentiwa luágu líra. ¹⁶ Niján wügüri le jaríjubei áni

subúdi jumei, láu lubáfu méme Jesúsu ligía, lerésibira érei. Wafíñen luágu Jesúsu, ligía areídaguagüdübalin buídu buídu quei jaríjini.

¹⁷ ‘Subúdi náali, nidújeñu, luágu ibídiñe lán meja jun ca lan jadügübei dan le jáfarunbálin Jesúsu, jugúya jáma jábutinu. ¹⁸ Láu sun líra, gúnfuli lumúti Búngiu le meja lariñagubei jádaangiñe profétagu, luágu lúnti lan lasúfuriruba lan Crístu. ¹⁹ Ligía lubeiti, ígira jumei binádu jigáburu, giríbu jumá lun Búngiu, chibáwa lámuga jiffigoun. ²⁰ Ábamei gayára lan loúnajan Búngiu eméraguni tun juwáni, oúnajaya leíme Jesúsu le Crístu, le aráanseelibeí lubáragiñe furúmiñeti dan woun. ²¹ Láu sun, lúnti lan leréderun Jesucrístu siélu guetó daríme laráanseruni Búngiu sun cátei quei lariñaguni jádaangiñe profétagu ja derégeguaañabaña jóungua lun, lídan meja dan le binádu. ²² Ítara líña lubeiti ariñagati meja Moisés joun binádu wagübürigu. “Loúnajaba Wabúreme Búngiu ában proféta jádaangiñe guánarügü quei loúnajanina. Ánja jumá lun sun le lúnbei lariñaguni jun, ²³ ladüga sun ja amájarutiña lun le lariñagubei proféta ligía, jagídarúba jádaangiñe lánigu Búngiu, ábame jagünrinchawagún.”

²⁴ Ítara líña lubeiti, sun profétagu lúmagiñe Samuél darí lárigiñe, adímurejatiña libügürü buri cátei le lúnbei lasúseredun lídoun buri wéyu le. ²⁵ Jugúya lúnbei jerésibiruni sun le lariñagubei Búngiu jádaangiñe profétagu, luáguti gíñe jufúleisein darádu le meja ladügübei Búngiu jáma binádu wagübürigu dan le lariñagunbei lun Abrahám. “Nabínirubaña sun gürígia ja uboúagubaña láu ában jádaangiñe binébaanfaangu.” ²⁶ Ába lanúadajani Búngiu Liraú lun loúnajani jun furúmiñe, jugúya juríu, lun labínirunün cáda ában jádaangiñe, láu laságarunün lídaangiñe luríban jigáburu.

4

Pédro lúma Juan jagíbugiñe gumádimatiña

¹ Nígiña Pedro lúma Juan adímureja joun gürígia, ligía jayábin jafádirigun juríu, jáma jábutigu súdaara ja oúnigirubárun témpulu, jáma ja lídaanbaña jadámurin saduséogu. ² Gáñitiña ladüga jarúfudajan Pédro lúma Juan joun gürígia, ariñaga jagía luágu arúfudúa lan luágu jásaaruba lan gürígia lídaangiñe ouweni lúnya jabágaridun ladüga sará lan Jesúsu. ³ Ábati janügüniña adáüra, ába jádaruniña furisunrugun darí larúgan quei dárüjali lubei. ⁴ Sarágu jáña jádaangiñe ja agáambubalin ugánu le jíchugubei apóstolugu afíñerutiña luágu. Ja afíñerubaña járügü wügüríña, quei buri seíngü mílu.

⁵ Larúgan, ába jóúndaragun jábutigu juríu, wügüríña weírigutiña lídan jafíñen, jáma arúfudajatiña lilúrudun Moisés, Jerusalén. ⁶ Níñein gíñe Anás le fádiri le íñutimaabei, Gáifasi, Juan, Alejándro jáma sun ja jádaangiñebaña lufámilian Anás. ⁷ Ábati jóúnajan anügei Pédro lúma Juan, ába jíchuguniña lamídan jadámurin, ába jaríñagun joun.

—¿Ca áu ubáfu, o ca ídan íri jareídaguagüdei wügüri le?

⁸ Buin líña Pédro láu Sífiri Sándu, ába lariñagun joun.

—Jábutigu juríu jáma wügüríña weírigutiña lídan wafíñen. ⁹ quei jálügüdüniwa luágu buíti le adügübei lun ában wügüri sánditi, ída líña lan la Reidawaguágüdün, ¹⁰ buséntiwa lun jasúbudiruni, jugúya jáma sun gürígia ja Israelítagu, luágu láu lan lubáfu Jesucrístu le Nazarétna niján lubei wügüri le ya jigíbugiñe areídaguañu. Láu lubáfu Jesucrístu, le meme

jádaragubei luágu gurúwa, le lásaaragüdübei Búngiu lídaangiñe ouweni, lareídagua. ¹¹ Jesúsu le, ligía queísi dübü le áubei jíchiga mebéreseni, jugúya le queíbaña ábunagutiña múna, áni ñübinjali Jesúsu lun ligíaba lan quei dübü le mégeiwatimaabei lídan bunáguau. ¹² Úati ámu lun lasálbaruníwa lueidügüya Jesucrístu, ladüga míchuti Búngiu ámu íri ubouágu lun gayára lan wasálbarun lueígiñe.

¹³ Dan jarijini gumádimatiña luágu adímureja jamá Pédro lúma Juan manúfudeiga ni murúsun, áni subúdi jameí luágu máma jamá gürígia atúriajatiña sarágu, luágu gürígia jamá ja furúmieguarügü, ába laweíridun janígi, ábati jasúbudiruni luágu jádaangiñetiña lan já meja eíbugubaña lúma Jesúsu. ¹⁴ Queíti ñíñein lubei wügüri le areídawaguágüdübei jáma, rára ligía, siñáti jariñagun lúrudugu ni cáta. ¹⁵ Ábati jóunajaniña lúrudugu Pédro lúma Juan lúma wügüri le areídaguaalibei bougudin luei jadámurin lun gayáraabei lan jayánujan jámagua. ¹⁶ Jariñagati.

—¿Cábasan wadüga jáu wügüriña ja? Sun ja aganoubaña Jerusalén subúdi jamúti luágu adüga jamáali lan miláguru le, áni siñáti wayéedagun láu. ¹⁷ Lun mabúrchagun lan ugánu luágu cátei le lídan sun fulásu, wewéridiraña lun madímurejandügüya jamá ni ca un lídan líri Jesúsu lúmagiñe ugúñe.

¹⁸ Ábati jagúarun joun lun jebélurun, ába jariñagun joun lun ni lan ca uágu lun madímurejan jamá, marúfudajan jagíame lídan líri Jesúsu. ¹⁹ Ába jariñagun Pédro lúma Juan joun.

—Samína jumá júngua ánjein buídu lubei ligíbugiñe Búngiu lun ladügün le jubeíbei, ígira le lubeíbei Búngiu. ²⁰ Wagía, siñáti wámanichun láu cátei le aríja wamáalibei lúma le agáamba wamáalibei.

²¹ Ábayati jewéridiruniña gumádimatiña, ába jígiragüdüniña. Madáritiña ída lúba lan jadügün ni cáta jáu ladüga adímurejatiña buri gürígia buíti luágu Búngiu luágu cátei le asúseredubei. ²² Wügüri le areídagubei láu miláguru ligía, sügü láu bián-wein irúmu láu.

Jamúriajan afñetiña manúfudei lúma Búngiu lídan jesériwidun lun

²³ Dan le jáfuridun Pédro lúma Juan furísunrugugiñe, ába jóudin le ñí jabei jíbiri, ába jabájüdaguni sun le jariñagubei jábutigu fádirigu jáma wügüriña weírigutiña joun. ²⁴ Dan jagáambubalin, ába jayúmragun sun jagía lun Búngiu, ába jariñagun.

—Wabúreme, amürü Búngiubei le adügübalin siélu, ubou, barána lúma sun cátei. ²⁵ Amürü, aríñagatibu láu lubáfu Sífiri Sándu liyúmulugugiñe Davíd lé meja esériwidubei bun.

¿Ca uágu jagáñida ja mámabaña juríu, samína jagía lun jadügüni cátei le siñábei jadügüni?

²⁶ Iñúraguatiña lurúitegu ubou jóungua, oundaraguatiña lábutigu fulásu

lun jadügün wuríbani lun Wabúreme Búngiu lúma lun Crístu le lanúadajabei.

²⁷ Áni suséreti ítara, oundaraguatiña Heródes luma Póncio Piláto lídan ubúrugue, jáma ja mámabaña juríu, lúma jáma Israelítagu lun jadügün wuríbani lun Biraü Jesúsu le sándubei, le banúadajabei. ²⁸ Láu líra, adüga jamúti sun le baráansejabei lun lasúsereduba lan. ²⁹ Guetóti, Wabúreme, aríjabeí jasádiruníwa, rúba anígí woun, wagía le esériwidubalibu, lun

wadímurejan buágu manúfudeiga, ³⁰ gayára lámuga giñe wareídaguágüdün sánditiña, adüga wagíame miláguru lídan líri Biraü Jesúsu le sándubei, láu bubáfu wawágu.

³¹ Dan le lásurun jayúmuragun, ába lánjingichun fulásu le ñí lubei jóundaragua, ába jabuínchun sun jagía láu lubáfu Sífiri Sándu, ába japúrichijani lerérun Búngiu manúfudeiga.

Sun cátei jáni súnqua luágu

³² Sun ja afiñerubaña, ában lábu jarítangun, ában lábu jabúseerun. Úati ni ában aríñaguti luágu lumégen luágu láni lan lábugua, sun cátei jáni súnqua luágu. ³³ Ába jasígirun apóstolugu adímureja luágu lásaarun Wabúreme Jesúsu lídaangiñe ouweni láu sarágu ubáfu, ábati labíniruniña Búngiu sun jagía sarágu. ³⁴ Úati ni ában jádaangiñe emégeiruti ni cáta ladüga sun ja gafúlasunbaña o gában, ába buri jalúgurunun, ába janügüni tebégi, ³⁵ ába jadéregeruni joun apóstolugu lun lafánreinjóun jádan ja emégeirutiña. ³⁶ Queíburi, ñíñein ában jádaangiñe ladügawagun Leví jádan, gíriti José, agúriajóuti luágu uboúju le gíribei Chípre, ába jáchuni apóstolugu Bernabé, míni lan líra, “Le Íchigubei Gurásu”. ³⁷ Wügüri ligía, ába lalúguruni lufúlasun, ába lanügüni seínsu edéregera joun apóstolugu.

5

Jafígoun Ananías túma Safíra

¹ Ñíñein giñe ában wügüri gíriti Ananías, túma Safíra, to lúmari, ába giñe jalúgurun ában fulásu. ² Wügüri le, ába lanügün lídaangiñe seínsu, ába lídin láu líbiri joun apóstolugu, lafámura camá jamuga ligía rügüñein libíjin luágu fulásu. Áni subúsititi sun cátei tun lúmari. ³ Ábati laríñangun Pédro lun.

—Ananías, ¿ca uágu bígira lun lagañiruni Máfia barítangun lun layéejagüdüniibu lun Sífiri Sándu, lun beréderun láu líbiri seínsu le afáyeirúbei bun luágu fulásu? ⁴ ¿Ma funági bufúlasun meja fulásu? Lárigiñe balúguruni, ¿ma biseínsun lun badügüni le babúseerunbei láu? ¿Ca uágu basáminara badügüni cátei le? Búngiu balúgubei bayéedangun, máma wügüriña.

⁵ Dan lagaámbuni Ananías cátei le, ába láburujan ouwe. Súnti ja asúbudirubalin cátei le, ába janúfudedangun. ⁶ Ábati jayábin wügüriña, ába jóuburaguni Ananías, ába janügüni ábuna.

⁷ Queíburi úrúwa óra lárigiñe, ába tebélorun lúmari Ananías, ibídiñoun ni cáta tun luágu le asúseredubei. ⁸ Ába laríñangun Pédro tun.

—Aríñagabeí nun, ¿luágu ebégi le jaríñagubei jalúgurei fulásu?

Ába taríñangun.

—Ánja, luágu ebégi ligía.

⁹ Ábati laríñangun Pédro.

—¿Ca san uágu jebélura lídoun úaraduni lun jóuchaguni láni Búngiu Espíritu ítara? Añatén ja anügübalin búmari ábuna, janügadibu giñe.

¹⁰ Lídan méme óra ligía, ába táburujan ouwe lubádu lugúdi Pédro. Dan jebélurun wügüriña, jadáriroun jiláaru, ába jaságarunun, ába jábununun loubagiñe túmari. ¹¹ Súnti gürígia ja afiñebaña luágu Crístu jáma sun ja asúbudirubalin cátei le, ába janúfudedangun sarágu.

Sarágu buri miláguru lúma seíni

¹² Adáaguatiña buri apóstolugu sarágu seíni lúma miláguru jádan gürígia, ábati buri jóúndaragun sun afiñetiña lídan fulásu témpulurugu le gíribei “Barandá Salomón”. ¹³ Úati meja ni ában jádaangiñe ja mámabaña afiñetiña lun jóúndaragun jáma afiñetiña ladüga janúfude, láu sun jínsiñe jamá sun afiñetiña joun gürígia, sarágu. ¹⁴ Eíbu wéyu, eíbu jayábin gürígia lun jafíñerun luágu Jesucristu, dándu wügüríña queisi würíña. ¹⁵ Quei jadügüña lan apóstolugu sarágu miláguru, ába jaságaraguniña gürígia sánditiña úmadoun tídan jabárari lun dan lan lásügürün Pédro, gayára lan jareídagun láurügü tadágarun liyáwa jawágu. ¹⁶ Nñubintiña gíñe sarágu gürígia lídaangiñe buri fulásu yaráfati lun Jerusaléoun jáu sánditiña jáma ja gawágutiña espíritugu wuríbatíña, sun jagía areídaguatiña.

Jeibaajóun Pédro lúma Juan

¹⁷ Léti fádiri le íñutimaabei jáma ja jánigu saduséogu ja lúmabaña, ába jabuínchun láu gimúgaü, ¹⁸ ába janügüniña apóstolugu, ába jadáürüniña. ¹⁹ Ába ladáraruni ában láni Wabúreme Búngiu ánjeli tubéneri furísun áriebu ligía, ába láfuridagüdüniña, ába laríñagun joun.

²⁰ —Jeíba, jaráramame témpulurugu, ábame jabájüdagun joun ja ñíbaña luágu iséri íbágari le líchugubei Jesucristu joun gürígia.

²¹ Dan jagáambuni cátei le, ába jóúdin témpulurugun bináafingua, ába jagúmeserun arúfudaja.

Súnti dan le, le fádiri le íñutimaabei jáma ja lúmabaña, ába jóúndaruniña líñun-ágei lúruđu, ja súnbaña Israelítagu weírigitíña, ába jóúnajan anügaña apóstolugu furísunrugugiñe. ²² Dan jachülürünbei polisía furísunrugu, madári jamútiña ñi. Ába jagíribudun, ²³ ába jaríñagun.

—Darúñu líña wadárirunun furísun, ñíñanu súdeara bénabu oúnigira, dan le webélurunbei, madáritiwa ni ában jádaangiñe apóstolugu ñi múnada.

²⁴ Dan le jagáambunbalin jábutigu fádirigu lúma jábuti súdeara ja oúnigirubarun témpulu cátei le, ába jálügüdagun jóúngua cába lánfunu ídan lébeda cátei le. ²⁵ Lídan óra ligía, ligía liábin ában wügüri, ába laríñagun joun.

—Ja wügüriña ja jádarubaña furísunrugun, añájein témpulurugu arúfudaja joun gürígia.

²⁶ Ábati lídin jábuti oúnigirutiña jáu súdeara, ába janügüniña láu buíđu, ladüga janúfude luei jachámuragun gürígia dübü jawágun. ²⁷ Dan jachülürün jáu, ába jíchuguniña ligíbugiñe líñun-ágei lúruđu, ába laríñagun fádiri íñutimaati joun.

²⁸ —Wéridi wamáadün lun marúfudajandügüya jumá lídan líri Jesús, áni ¿ca jadüga? Buíngüda jumá sun Jerusalén láu le jarúfudajabei, áni buséntün jíchuguni dúru wawágun luágu loúnwen wügüri ligía.

²⁹ Ábati loúnabun Pédro jáma ja jíbiri apóstolugu, ába laríñagun.

—Lúnti wagáambuni Búngiu lun wadügüni le lubeíbei lubáragiñe le jabeíbei wügüriña. ³⁰ Le Jabúngiute binádu wagübüriгу, ligía ásaaragüdübalin Jesús, le méme jáfarubei láu jádaraguni luágu ában gurúwa. ³¹ Rúlaali Búngiu weíriguni lun, ñurúgüdalei lueígiñe loúnwenren, adüga láali Ábutime lúma Asálbaragülei, gayára lámuga jígiruni Israelítagu binádu jagáburi, lun gíñe ferúduawa lan jafígoun. ³² Geféentiwa luágu líra, geféenti gíñe Sífiri Sándu le líchugubei Búngiu joun ja ñüdünbaña láu le lubeíbei.

³³ Dan jagáambunbalin líñun-ágei lúrudu cátei le, ába jagáñidun, ába yebe jabúseerun jáfaraguniña jilágubei. ³⁴ Níñein ában fariséo jádan lúrudugu, gíriti Gamaliél, maésturu lánina lilúrudun Moisés, inébeti joun gürígia sarágu. Ába laráramun, ába laríñagun lun janügüniwa apóstolugu lídaangiñe adámurini luágu murúsun óra, gayára lámuga ladímurejan jámarügü lúrudu. ³⁵ Ába laríñagun joun gumádimatiña.

—Wügüriña Israélna, toúnigi jumátia láu le lúnbei jadügüni jáu wügüriña ja. ³⁶ Jarítagua jumátia luágu iñúragua lán meja Teudás lúngua aríñaga luágu ában lan wügüri weiriguti ligía, ába jafálaruni gádürü-san wügüriña, áni afarúati jilágubei, súnti ja afálarubalin, ába jawáragadagun, ába lagúmuchun sun cátei. ³⁷ Lárigiñe, lídan lidáni jabájüdüniwa gürígia, ligía liñúragun Júdas le Galiléana lúngua, sarágu jáña afálaruti lídan labúseerun yebe lagáragun luágun gumádi. Áfarúati gíñe, ába gíñe jawáragadagun sun ja afálarubalin. ³⁸ Ígira jumáña lubeíti wügüriña ja, memétera jumá jámoun. Ladüga ánjein jáni lubei wügüriña cátei le jarúfudajabei lúma le jadügübei, lagúmuchaguba, ³⁹ ánjein láni lubei Búngiu, siñá jubei agünrinchagua. Toúnigi jumá, mageíndagua jumá lúma Búngiu.

⁴⁰ Ába jánjanrun súnigubei láu le laríñagubei. Ábati jebélaagüdüniña apóstolugu, ába jabeíchuniña, ába jaríñagun joun lun jebé lan jadímurejan lídan líri Jesúsu. Lárigiñe, ába jígiragüdüniña, ⁴¹ Ába jáfuridun apóstolugu jámangiñe lúrudugu, gúndaañu láu laríjiniña Búngiu queisi gürígia gadünamatiña lun jasúfuriruni busíganu luágu líri Jesúsu. ⁴² Merédetiti jarúfudajan témpulurugu lúma tidan buri múna ságü wéyu, aríñaga jagía luágu Jesúsu lan Crístubei le agúrabajoúbei.

6

Jáluajoúniwa sédü idejatiña

¹ Lídan dan ligía, quei agíbedeina jamátima afiñetiña luágu Jesucristu, ába jagúmeserun ja adímurejabaña güriégu adárra jadúnrun ja adímurejabalin jerérun juríu, ába jaríñagun luágu mibíjin jamá würiña güriégu ja jiláañabaña úmari eígini dan le lafánreinjoúniwa, ságü wéyu.

² Ábati joúndaruniña dúusu apóstolugu afiñetiña, ába jaríñagun joun.

—Mabuídunti lun wígiruni wapúrichijani lerérun Búngiu lun wagíaba lan afánreinjei eígini. ³ Ligía lubeíti nidújeñu, áluga jumá sédü wügüriña jidaangiñe ja gafiñerúati jawágu, ja chúbaña áu, ja derégeguatiña joúngua lun Sífiri Sándu le gumúti, lun jadügüni wadágimanu le. ⁴ Wagía, wedéregubei wadáni lun ayúmuraguni lun Búngiu luma lun warúfudajani lerérun.

⁵ Ába júaradun súnigubei lídan cátei le, ába janúadiruní Estéban, le ában wügüri buín líña láu afiñeni luágu Jesucristu áni derégeguañu líña lúngua lun Sífiri Sándu le gumúti, Felípe, Prócoro, Nicanór, Timón, Parménas lúma Nicolás le Antioquiana, lé meja afálarubalin ligáburi jafiñen juríu. ⁶ Ába janügüniña le ñíjin jabei apóstolugu, ába jayúmuragun lun Búngiu jáu, ába jíchuguni jájabu jawágu lun jabíniruniña.

⁷ Ába gíbetimaajaña lan agáambuti lerérun Búngiu lídan sun fulásu, agánwoundeina jagía afiñetiña Jerusalén furése, ába giñe jafiñerun sarágu fádirigu juríu luágu Jesucristu.

Ladáürün Estéban

⁸ Adáaguatija Estéban, le ábanbei wügüri le buinbei láu ubáfu lúma abíniruni lúmagiñeti Búngiu, miláguru lúma seíni jádan güri-gia. ⁹ Ábati jagúmeserun güri-gia asígeneja luágu, güri-gia jagía, tídaangiñetiña jalígilisin juríu to giríboun “Idámunigu Joúnguaaña”, jáma Cirénena, Alejandríana, Cilíciana jáma Ásiana. ¹⁰ Siñáti joun lúma Estéban, ladüga láu lichú áu le líchugubei Sífiri Sándu lun ladímureja. ¹¹ Ábati jafáyeirun wügüriña lun jariñagun luágu agáamba jamáani adímureja wuríba luágu Moisés lúma luágu Búngiu. ¹² Ábati jafúdagüdüniña güri-gia, jáma arúfudajatiña lilúrudun Moisés, jáma wügüriña weirigutiña lídan jafíñen juríu, ába járügüdüni Estéban, ába janügüni ligíbugiñoun líñun-ágei lúrudu. ¹³ Ába giñe jálugun yéetiña lun jariñagun luágu lerédera lan adímureja wuríba tuágu témpulu sándu lúma luágu lilúrudun Moisés. ¹⁴ Jariñaga.

—Agáamba wamúti lariñagun luágu lagúnrinchaguboun lan Jesúsu Nazarétna témpulu, sáansi leíme igáburi le lígirubeni Moisés woun.

¹⁵ Dánti jaríjini lúrudugu jáma sun ja ñíbaña ligíbu Estéban, ítara líña camá ligíbu ában ánjeli.

7

Ladímurejan Estéban luágu lufúleisein

¹ Ábati lariñagun fádiri le íñutimaabei lun Estéban.

—¿Inárüni sun cátei le?

² Ába loúnabun.

—Nidújeñu, nagübürigu, agáamba jumána. Weiriguti Búngiu, arúfudaguáti meja lúngua lun Wáguchi Abrahám dan le Mesopotámia lan, lubáragiñe lídin agánawa Harán. ³ Ába lariñagun lun. “Ígirabeí bageíra jáma bidújeñu, beíba lídoun fulásu le lúnbei narúfuduni bun.” ⁴ Ábati láfuridun Abrahám Caldéagiñe, ába lídin agánawa Harán. Lárigiñe, ába loúnwen lúguchi, ába lanügüni Búngiu Abrahám lídoun fulásu le ní lubei wagánawa guetó. ⁵ Míchuti ni murúsun múa lun lídan fulásu le, aríñagarügüti lun luágu lachülürüba lan dan lun lánibei lan ageíraü le jáu sun ladügüwagun, láu sún meja marájüñügili lan Abrahám lídan dan ligía. ⁶ Aríñagati Búngiu lun luágu jaganóüba lan ladügawagun quei teréncha lídan jageíra ámu, luágu idámunibaña lan ñi, amúdirúa jagíame luágu gádürü-san irúmu. ⁷ Aríñagati giñe Búngiu lun. “Nagúseragüdübaña lílana fulásu le anügübaliña idámunime, lárigiñeme lásügürün gádürü-san irúmu, ábame jáfuridun ñígiñe, ábame jesériwidun nun lídan fulásu le.” ⁸ Adügati Búngiu ában darádu lúma Abrahám, ába lerésibiruni Abrahám circuncisión, liseínime darádu ligía. Ligía, dan lubeí lagüriajounbei liraü Abrahám le Isáac, ába lerésibiruni circuncisión luágu wídu wéyu láu, ítara giñe ladüga Isáac lun Jacób le liraü, adügaleí Jacób, le méme giríbei Israél, joun dúusu lirájüñü, ja jagübürigubaña dúusu türíbu ja giríbaña Israelítagu guetó.

⁹ ‘Lirájüñü Jacób ja, ja binádubaña wagübürigu, ába jagímugajan lun José le jamúlen, ába jalúguruni lun lanügün Ejíptoun quei idámuni. Níñein Búngiu lúma José, ¹⁰ ába leséfuruni lídaangiñe sun lidíjeri láu líchugun gun-faráandaü lun. Ába lagáñeiragüdüni lufúleisein Faraón, le lurúeite Ejípto lun, ába líchuguni José ábutime ñi Ejípto lúma tídan lúban Faraón.

¹¹ Ábati ladágarun ában ilámaü lídan fulásu le Ejípto lúma Canaán, deréti meja dan ligía, madáritiñati binádu wagübürigu cába lan jeíga. ¹² Ába

lagáambun Jacób luágu njein lan eíginí Ejipto, ába louñajaniña lirájũñũ, ja binádu wagübürigu, ñi. Ligía furúmiñetibeí jaweíyasun. ¹³ Le libíaman jóudin, ába larúfudagun José lúngua joun líbugañanu lúma lamúlen, ítara líña lasúbudirúniña urúeí lidújeñu José. ¹⁴ Ábati louñajan José anúgei Jacób le lúguchi jáu sun lufámilian, Ejiptoun, úrúwañanu-wein-queínsi gürigia jagía. ¹⁵ Ítara líña lídinbeí Jacób agánawa Ejipto, le ñí lubei louwe, ñí lubei giñe jóuwegua binádu wagübürigu. ¹⁶ Átiri irúmu lárigiñe, ába lanügúniwa jábu ñígiñe lídoun fulásu le gíribeí Síquem, ába jabunún lídan umúajaü lé meja lagáñijabeí Abrahám jámagiñe lirájũñũ Hamor ñi Síquem.

¹⁷ ‘Dan le layárafadúnbeí dan lun lagúnfulirun dimúrei le líchugubeí Búngiu lun Abrahám, gíbeeña ladügawagun Israél Ejipto. ¹⁸ Ábati lagúmeserun ában urúeí agúmadija Ejipto le ibídiñejabubeí lun José. ¹⁹ Ába layéeraguniña urúeí ligía warásan juríu, amúdiragua láña binádu wagübürigu, águragüdáña jasáanigu ja figígiña joun lun jóuwegun, gumúgua lámuga warásan. ²⁰ Lídan dan ligía, ligía lagúriajóun Moisés, ában irájü buídumeraüti, ába jagúriajani lagübürigu jábiñe luágu úrúwa játi. ²¹ Dan lachúlürünbeí dan lun jáguruni, ába jáguruni, ába tabúduni liraü urúeí Ejiptona, ába tagúriajani queí tiraü. ²² Ligía lafúnrendeirubalin Moisés lichú jáu Ejiptona, áni gabáfutiti lídan le laríñagubeí lúma le ladügubeí.

²³ ‘Dan le bián-weínjali irúmu láu Moisés, ába lálugun lídin aríjaña lirásan ja ladügawagun Israél, ja ñíbaña Ejipto. ²⁴ Ába laríjin ában Ejiptona amúdiragua ában jádaangiñe, ába lídin Moisés íderagueí lidúje, ába leséfuruni láu láfaruni Ejiptona ligía jilágubeí. ²⁵ Moisés, jarítaguati luágu jasúbudirúbeí lan Israelítagu luágu ligíaba lan layúsura Búngiu lun jésefurún lídaangiñe le gádaanbaliña, jagía, masúbudirun jamúti. ²⁶ Larúgan, ába ladúnragun Moisés jáma biáma Israelítagu ageíndagua jámagua, ába yebe labúseerun laráandaragüdúniña jámagua. Ítara líña laríñagunbeí joun. “Ában mémetia mútu jugúya, ¿ca uágu jageíndagua júmagua?” ²⁷ Ábati ládaruni wügüri le áluajabeí wuríbu lúma le ában, ába laríñagun lun. “¿Ca íchubalibu ábutime lúma agúseragüdútime wádan? ²⁸ ¿Buséntibu giñe báfarunina queí báfaruni Ejiptona ligíra gúñaarü?” ²⁹ Dan lagáambuni Moisés cátei le, ába lanúrajan, ába lídin Madiáoun. Ába leréderun agánawa ñi queí teréncha, ába jáguchi lan bián irájũñũ ñi.

³⁰ ‘Bián-wein irúmu lárigiñe, ába lasáriragun ában ánjeli lun lídan fulásu mageírawati, yaráfa lun wúbü le gíribeí Sinaí, liábin lun queí wátu gemetí lídan ában búbugati. ³¹ Ába laweíridun lanígi Moisés láu cátei le laríjubeí, dánti layárafadun lúntima laríjini buídu, ába lagáambun laríñagun lumálali Wabúreme Búngiu. ³² “Áu Jabúngiute binádu bagübürigu, Lubúngiute Abrahám, Lubúngiute Isáac lúma Jacób.” Ábati lagúmeserun Moisés adádagara láu anúfudeí, májaali ni lun laríjin ñíjin. ³³ Ába laríñagun Búngiu lun. “Gidáboun bigeídín lueígiñe bugúdi, ladúga fulásu le ñí bubeí rára, fulásu sánduti. ³⁴ Aríja náali jasúfurirun numútuniña Ejipto, agáamba náali jagúajan láu igárigu, neséfuraaña lubeíti. Jigábu lubeíti, noúnajadibu Ejipto.”

³⁵ ‘Láu sun mebéresen jamá láu Moisés, álügüda jameí ca lan íchubalin ábutime lúma agúseragüdútime, oúnaja lumúti Búngiu queí ábuti lúma queí eséfujati, adímurejeina Búngiu lídaangiñe ánjeli le asáriragubeí lun lídan búbugati. ³⁶ Moisés aságarubaliña binádu wagübürigu Ejiptogiñe, adúga ligía miláguru buri lúma buri cátei weíríguti lídan fulásu ligía,

lidan Barána Funáti, lúma lidan fulásu mageírawati, luágu bián-wein irúmu. ³⁷ Moisés meme le, ligía aríñagubei joun Israelítagu. “Louñajaba Búngiu ában proféta jun jádaangiñe guánarügü jibíriña, quei louñajanina. Adüga jumá gásu láu.” ³⁸ Lidan le añája lubei Israelítagu adamurigu lidan fulásu mageírawati, Moisés meme le, ába ladímurejan lúma ánjeli luágu wúbü le Sinaí, ába lásügüragüdüni lerérun ánjeli ligía joun binádu wagübürigu. Ligía le erésibirubalin ugánu le adúrarubei lun sun dan lúmagiñe Búngiu lun lásügüragüdüni woun.

³⁹ ‘Májatiña meja binádu wagübürigu jagáambuni Moisés, mebéréserruntiña láu, busénrügü jagía jagíribudun Ejiptoun. ⁴⁰ Ábati jariñagun lun Aarón. “Buséntiwa lun badügün búngiugu woun lun jouidin wabá wabá, ladüga ibídiñeti woun ca lan susébebei lun Moisés, le aságarubaliwa Ejiptogiñe.” ⁴¹ Ábati jadügün ában tiyáwa bágasu lun jasándunme, ába jáfarun anímaalugu lun jadágaragüdün tun jasándun, ába jadügün fédu lun jagúndaarun láu cátei le jadügübei láu jájabu. ⁴² Ábati ladíreirun Búngiu jawei, ába lígiruniña lun jájuduragun joun warúguma ja siélubaña. Ítara líña labürüdün tídan jalíburun profétaгу.

Jugúya Israelítagu, ¿áfaratün funági anímaalugu lun jadágaragüdün nun lidan bián-wein irúmu le jáubei lidan fulásu mageírawati?

⁴³ Madügün jumúti líra, lubáragiñe lira, barü jumuti jisándun Molóc tídan lágei to jadügüboun lun,

túma tiyáwa warúguma to gíriboun Renfán, to gíñe janügüboun quei jisándun,

iyáwaü buri ja jadáagun guánarügü lun jájuduragun joun.

Ligía naságarubadün lubei jageíragiñe, nouñajaünme yagüroun méme luei Babilónia.

⁴⁴ ‘Lidan fulásu mageírawati, ñíñoun méja lúban Búngiu to gadíñurúwadiboun jáma binádu wagübürigu, ñí lubei lerédera Búngiu jáma. Adüga lumútu Moisés lúban Búngiu tugúya queisi larúfuduni Búngiu lun lun ladügünun. ⁴⁵ Nújeingua méja múna tugúya jáma jadügewagun binádu wagübürigu, ába janügünun jámawagua lídoun fulásu le ñí lubei wagánawa guetó, dán meja le lagáñeirubalin Josué wuríbu jawágu mútu ja mámabaña juríu já meja aganoúbaña ya. Ítara líña, nújeingua lubei lúban Búngiu tugúya lidan fulásu le darí lidáni David. ⁴⁶ Daríti urúei David fuleisei ligíbugiñe Búngiu, ába labúseerún yebe ladügün ában témpulu lun laganouñ Lubúngiute Jacób ñi, ⁴⁷ Salomón adügubarun témpulu tugúya, ⁴⁸ láu sun, maganoún lan Búngiu le weírigutimaabei tídan buri ligílisi to jadüga gürígia, quei meja lariñaguni proféta.

⁴⁹ Siélu nálabei le ñí lubei nañúura lun narúeijan, ubou, le ñí lubei neméraaguagüdei nugúdi.

¿Cába tuwúyeri múna jadüga nun? Líña lariñagun Búngiu.

¿Cátei fulásu le ñí lubei gayára lan neméraagun?

⁵⁰ ¿Ma funági nadüga sun cátei le láu nújabu?

⁵¹ Ába lasígirun Estéban aríñaga joun.

—Ánjein jugúya, derégubeiñoun janígi, magáambaditün lun lerérun Búngiu, ítara jíña quei ja ibídiñejabúbaña lun Búngiu. Súnwandan májatün lun Sífiri Sándu, ítara jíña quei binádu jagübürigu. ⁵² ¿Ca jádaangiñe profétaгу mouserun jabáña binádu jagübürigu wuríba? Ni ában, áfaragua jamútiña já meja adímurejabaña luágu liábin Crístu le richáguabei, guetóti

dan liábin, ába jalúguruni joun láganiñu, ába jáfaruni jilágubei. ⁵³ Jugúya le erésibirubálin lilúrudun Búngiu jámagiñe ánjeligu, mídintün láu.

Louñwen Estéban

⁵⁴ Dan jagáambunbalin cátei le, ába jagáñidun buídu, ába lacünrinjan jári luágu Estéban, le jagáñi lun. ⁵⁵ Ánjein Estéban, buin líña láu lubáfu Sífiri Sándu, ába laríjin siélun, ába laríjini luweírigin Búngiu, lúma Jesúsu rára lueígiñe louñwenren Búngiu. ⁵⁶ Ába laríñagun joun.

—¡Aríja jumá! Aríagu niña lun siélu darágu, lúma Jesúsu le Wügüri Garaüwarügüti, lueígiñe louñwenren Búngiu.

⁵⁷ Ába jadáuruni jarígei láu jájabu luei jagáambuni, ába jayábin sun jagía luágun, agúarajeina. ⁵⁸ Ába jaságaruni ubúrugugiñe, ába jígirunun geféentiña janáangun lábugiñe laríaaan ában wügüri gíriti Sáulo, ába jachámuragun dübü luágun Estéban. ⁵⁹ Súnti añája lan achámuragua dübü luágun, ába layúmuragun Estéban lun Jesúsu, ába laríñagun.

—Nabúreme Jesúsu, resíbiboún nuwáni.

⁶⁰ Lárigiñe, ába lájuduragun, ába lagúaragun.

—Nabúreme, míchigabá dúru jawágun lueígiñe figou le.

Lárigiñe laríñaguni le, ába louñwen.

8

Leíbaajaniña Sáulo ja afíñebaña luágu Crístu

¹ Sáulo, gúndaatiti láu láfarún Estéban.

Wéyu méme ligía, ába lagúmeserun ában ouñwenbun eíbaajoúni jawágun ja afíñebaña luágu Jesucrístu, Jerusalén. Ába janúragun lídoun buri lirájüñü fulásu Judéa lúma Samária le míbetiña gürígia ñi, apóstolugu rügüñanu manúrajan. ² Ába jayábin wügüriña ja derégeguatiña jóungua lun Búngiu, ába jábununi Estéban láu sarágu íruni luágu louñwen. ³ Ábati lasígirun Sáulo eíbaajaña afíñetiña, ábaja lebélorun tídoun sun múna lun laságaruniña wügüriña jáma würiña adúruujeina, ába louñajaniña furísunrugun.

Lapúrichijoún ugánu buíti luáguti asálbaruni Samária

⁴ Apúrichija jamúti ja anúrjabaña Jerusaléngiñe ugánu buíti luágu chülú lan Jesucrístu lun lasálbaruniña sun gürígia, sun le ñi lumuti jóudin. ⁵ Ába lídin ában jádaangiñe, gíriti Felípe, lídoun ában ubúругu Samária, ába lagúmeserun adímureja joun ja ñíbaña luágu Crístu. ⁶ Ábaja jóundaragun gürígia, ru jagía jarígei lun le ladímurejabei Felípe, aríja jamei buri giñe miláguru le ladágubei. ⁷ Ladüga sarágu buri gürígia ja gawágutiña espíritugu wuríbatiña, areidaguátiña, ába buri jáfuridun espíritugu wuríbatiña jagía agúarajeina jádaangiñe, areidagua jagía sarágu derégüdaaña jamá, meibuguntiña. ⁸ Súnti gürígia lídan fulásu ligía, gúndaatiña luágu cátei le.

⁹ Ñíñein ában wügüri lídan fulásu ligía, gíriti Simón, gabíñarajati meja, lüñajaali ayéjeña gürígia Samariána láu laríñagun joun luágu máma lan furúmieguaügü gürígia ligía. ¹⁰ Agáambaja jamútítija sun gürígia buídu, jámagiñe ja gudémegutiña dagá jámoun ja weírigutiña, ába jaríñagun.

—Íbija lumúti gürígia le ouñwenbun lubáfu Búngiu.

¹¹ Adügatiñatija gásu láu, ladüga lüñajaali ayéjeña láu labíñarajan.

¹² Dan le jafíñerunbei luágu ugánu le líchugubei Felípe joun luágu larúeijan Búngiu lúma luágu Jesucrístu, dándu wügüriña quei würiña, ába

jabásterún. ¹³ Simón meme ligía ába giñe lafiñerun, ába giñe labásterún, ába lagúmeserun afálarei Felípe, le luweírin lanígi láu buri oúnwenbun buri miláguo lúma seíni le ladáagubei Felípe.

¹⁴ Dan le jagáambunbalin apóstolugu ja Jerusalénbaña luágu resíbi jamáali lan Samariána lerérun Búngiu, ába jóunajani Pédro lúma Juan ñi. ¹⁵ Dan le jachúlürünbei, ába jayúmuragun jawágu afiñetiña ja Samariána lun liábiba Sífiri Sándu jádoun, ¹⁶ ladüga miábingili lan Sífiri Sándu lídoun ni ában jádaangiñe, badíseirügügiña lídan líri Wabúreme Jesúsu. ¹⁷ Ábati jíchuguni Pédro lúma Juan jájabu jawágu, ába liábin Sífiri Sándu jádoun.

¹⁸ Dan le laríjinbei Simón luágu ñübin lan Sífiri Sándu jádoun gürigia dan le jíchuguni apóstolugu jájabu jawágu, ába lálugun lagáñjani ubáfu ligía jamagiñe láu seínsu. ¹⁹ Ába lariñagun joun.

—Rújumei giñe ubáfu le nun, lun dánme lan níchuguni nújabu luágu furúmiegurügü, lun giñe lerésibiruni Sífiri Sándu.

²⁰ Ábati lariñagun Pédro lun.

—Beíba máfiougatin láu sun biseínsun, ladüga jarítaguatibu luágu gayára lan lagáñjóun cátei le ledéweejan Búngiu. ²¹ Maríchatibu, mafánran bugúya lídan wesériwidun lun Búngiu, ladüga múaraantu banígi ligibugiñe Búngiu.

²² Ígirabeí buríban le, ayúmuruabá lun Búngiu, lun ferúduna lánibu luágu luríban barítangun. ²³ Ladüga aríja numúti luágu buin tíña lan banígi láu wuríbani, áni ragüñu liñálibu Máfia.

²⁴ Ábati lariñagun Simón.

—Ayúmuragua jumá lun Búngiu nuágu lun masúseredun lan ni cáta nun lídaangiñe le jaríñagubei.

²⁵ Lárigiñe jíchugun fe luágu Jesucrístu lúma jadímurejani lerérun Búngiu lídan fulásu ligía, ába japúrichijani apóstolugu ugánu buíti luáguti lasálbaruniña Jesucrístu gürigia lídaangiñe jafígoun lídan sarágu lirájüñü fulásu Samária, luágu jaweíyasun járiogún Jerusaléoun.

Felípe lúma wügüri le Etiopiana

²⁶ Lárigiñe cátei le, ába lariñagun láni Wabúreme Búngiu ánjeli lun Felípe.

—Aráansebá, beíba luágun sur lídaangiñe üma le arárirubei Jerusaléngiñe lun ubúrugin Gáza.

Ligía üma le ásügürübei lídaangiñe fulásu mageírawati. ²⁷ Ába laráanserun Felípe, ába lídin. Luágu leíbuguniwágu, ába ladárirun ában wügüri Etiopiana lubá lubá. Wügüri ligía siñáti garaü lan, ában wügüri weíriguti, ligía giñe gamánjaribeí láu sun tiseínsun Candáce to lurúeite Etiopía. Liábiñati wügüri ligía Jerusaléngiñe lárigi lídin ájuduragua lun Búngiu. ²⁸ Lagíribuduñáti lageíroun, ñun tídan ában cárü, alíjeinaloún lilíburun proféta Isaías. ²⁹ Ábati lariñagun Sífiri Sándu lun Felípe.

—Yaráfabá tuágun cárü túra.

³⁰ Ába leíbaagun tuágun cárü, ába lagáambuni lalíjaña lan tídan lilíburun Isaías, ába lariñagun lun.

—¿Gunfaráanda bumútisan le balíjabei?

³¹ Ába lariñagun wügüri ligía lun.

—¿Ída lubági gunfaráanda náani, úaga cába lan afúnraanguáguidei nun?

Ába lariñagun lun Felípe lun ládinun lúmoun lun lañúurun loubagiñe.

³² Niján buri dimúrei le lalíjabei.

Quei mudún, lanügüwa lun lafarún jilágubei,

ítara quei leréderun mudún maníñu jagíbugiñe ja ásarubalín líyu,
ítara líña giñe mariñagun lan ni cáta.

³³ Ūnabuti lanügün, áni michugúnwati lirícha lun,
siñábei ladímurejoún jawágu ladügawagun,
ladüga gumúja lan labágaridun uboúagu.

³⁴ Ába lariñagun wügüri ligía lun Felípe.

—Adügabei fuleísei nun, aríñagabei nun, ¿cáteisan le uágubei lariñagei wügüri le abürüjabei dimúrei le, luougua, ódi luágu ámu?

³⁵ Ábati lagúmeserun Felípe arúfudajei Lerérun Búngiu lun, lúmagiñe le ñigiñe lubei lagúmesera alíja, ába líchuguni ugánu luáguti Jesúsu lun.

³⁶ Dánti le jásügürünbei lídaangiñe ában fulásu le ñi lubei dúna, ába lariñagun wügüri ligía.

—Nijántia dúna, ¿siñátisan nabásterun?

³⁷ Lariñaga Felípe lun.

—Ánjein afiñe hubei luágu Jesucrístu táu sun banígi, gayáraati babásterun.

Lariñaga wügüri ligía lun.

—Afiñetina luágu Jesucrístu lan Liraübei Búngiu.

³⁸ Ábati laráramagüdünun cárü, ába jarárirun biángubei jagía dúnarugün, ába labásterágüdüni Felípe. ³⁹ Dan jamúdeirun dúnarugugiñe, ába lanügüni láni Búngiu Espíritu Felípe ñigiñe, ába marijin láali lan wügüri ligía. Ába lasígiruni leíbugun, gúndaañu. ⁴⁰ Ába ladáriragun Felípe lúngua Azóto, ába lídin lídaangiñeina fulásu apúrichijeinaleí ugánu luáguti Crístu darí lachülürün Cesaréa.

9

Lerésibiruni Sáulo Crístu queísi lasálbaragüile

¹ Sun dan ligía, merédeti lasíadiruniña Sáulo afiñetiña luágu Jesucrístu.

² Ligía lídinbei lúmoun fádiri íñutimaati lídan jafiñen juríu amúriaja gárada láutu ubáfu lun lídin tídan buri jalígilisin juríu to Damáscoboun áluajaña ja afálarubalin lémeri Crístu lun lanügüniña adáüragua Jerusalén, dándu wügüriña quei würiña. ³ Luágu leíbuguniwágu, dan yaráfaali lun Damásko, sódini ába ladúnraagun ában larúgounga siélugiñe, geyégua láu. ⁴ Ábati lábburujan Sáulo múarugün, ába lagáambun lariñagun ában umálali lun.

—Sáulo, Sáulo, ¿ca uágu beíbaajana?

⁵ Ábati lariñagun Sáulo.

—¿Cátabusan Nabúreme?

Ába lariñagun umálali ligía.

—Jesúsu áu, le méme beíbaajabei. ⁶ Sarába, belúba ubúrugun, lariñawagúba bun ñi cába lan badüga.

⁷ Wügüriña ja úarabaña lúma Sáulo lídan luweíyasun, ába jaráramun láu luweírín janígi ladüga agáamba jamúti umálali, áni marijin jamúti le adímurejabei. ⁸ Ába lásaarun Sáulo múarugugiñe, dan le léfegechúnbalin lágu, marijinjali. Ábati járügüdüni lújabu, ába janügüni ubúrugun Damásko. ⁹ Ába leréderun úrúwa wéyu ñi marijina, meígin líña, mátun ni cáta.

¹⁰ Ñíñein ában afiñeti luágu Jesucrístu ñi Damásko gíriti Ananías, le únbei layáwadagua Wabúreme Jesúsu, ába lariñagun lun.

—¡Ananías!

Ába loúnabun.

—Anája ya, Nabúreme.

¹¹ Ábati laríñagun Jesúsu lun.

—Beíba guetó guetó luágu úma le gírubei Surúti, danme le bachülürün lúbiñe Júdas, bálügüdajame luágu ában wügüri Társona gíriti Sáulo. Badárirubei ñi ayúmuragua lun Búngiu, ¹² áni ayáwadaguaali ában wügüri gíriti Ananías lun, ába líchuguni lújabu luágu lun gayára lan laríjin.

¹³ Dan lagáambunbalin Ananías cátei le, ába laríñagun.

—Nabúreme, gíbeeñátia abájüdagutiña nun luágu wügüri ligía lúma luágu sun wuríbani le ladáagubei joun ja afiñebaña buágu, Jerusalén. ¹⁴ Guetó, liábiña ñájoun láu ubáfu jámagiñe jábutigu fádirigu lun ladáuraguniña sun ja bánigubaña.

¹⁵ Ába laríñagun Jesúsu lun.

—Beíba, ladüga anúadira náali wügüri ligía lun ladímurejan nuágu joun gürígia ja mámabaña juríu lúma joun jarúeitegu, lúma giñe joun Israelítagu.

¹⁶ Narúfudubei sarágu cátei le lúnbei lasúfuriruni nueígiñe lun.

¹⁷ Ábati lídin Ananías lídoun fulásu le ñí lubei Sáulo. Ába lebélorun múnadoun, ába líchuguni lújabu luágu, ába laríñagun lun.

—Nidúje Sáulo, loúnajañadina Wabúreme Jesúsu le arúfudagubei lúngua bun luágu úma le ñígiñe lubei biábin, lun gayáraaya lan baríjin, lun giñe berésibiruni Sífiri Sándu.

¹⁸ Lídan óra ligía, ába leíguadun camá jamuga arúraü lueígiñe lágu, ábaya laríjin. Lídan óra ligía, ába labásterún. ¹⁹ Lárigiñe, ába leígin, ábaya lejéredun, ába leréderun átiri wéyu jáma afiñetiña ja aganoúbaña Damásco.

Lapúrichijan Sáulo Damásco

²⁰ Ába lagúmeserun Sáulo apúrichija tídan buri jalígilisin juríu, laríñaga luágu Jesúsu lan Liraübei Búngiu. ²¹ Súnti ja agáambubalín, ába laweíridun janígi, jaríñagati.

—¿Másan niján wügüri léñaja eíbaajabáliña ja afálarubalin Jesúsu Jerusalén? ¿Ma ligía méme le ñübinbei ya lun lanáanguniña adáüra, lun ledéregeruniña joun jábutigu fádirigu juríu?

²² Ábatimá lapúrichijan Sáulo láu anígi, arúfudei luágu Jesúsu lan Crístubei le lúnbei lasálbaruniña gürígia lídaangiñe jafígoun, darí lun labúlieidaguágüdün jáu juríu buri ja aganoúbaña Damásco.

Leséfurun Sáulo jawei juríu

²³ Lárigiñe sarágu wéyu, ába jelédegun juríu lun jáfaruni Sáulo jilágubei, ²⁴ ába lasúbudirawagüdün le jabúseerubei jadügün lun Sáulo. Wéyuagu, áriebu, jagúrabajanja juríu luágu béna le áfuridagülei le láni ubúrugun Damásco lun jáfaruni jilágubei. ²⁵ Ába jíchuguni afiñetiña lídoun ában faniñe weíruti, ába jarárigüdüni áriebu lueígiñe baríeru le geyégubei láu ubúrugun, ába leséfurun.

Sáulo ubúrugun Jerusalén

²⁶ Dan le bachülürünbei Sáulo Jerusalén, ába yebe lálugun ládaragun lúngua jádoun afiñetiña, sun jagía, janúfudetiña lueí, ladüga mafiñetiñá yebe luágu afiñejali lan luágu Jesucrístu. ²⁷ Ába lanügüni Bernabé jagíbugiñoun apóstolugu. Ába labájüdagun joun luágu laríjini Sáulo Jesúsu luágu leíbuguniwágu, lúma luágu ladímurejan Jesúsu lun, lúma luágu lapúrichijan Sáulo furáangu luágu Jesúsu ubúrugun Damásco. ²⁸ Ábati

jerésibiruni Sáulo queísi jánigu, ába leíbugun jáma Jerusalén, ²⁹ apúrichijeina luágu Wabúreme Jesúsu furáangu. Lárigiñe ladímurejan luágu Jesúsu jáma juríu ja adímurejabaña güriégu, asígeneja ligía jáma, ába jabúseerun jáfaruni jilágubei. ³⁰ Dan le jasúbudirúnbalin afíñetiña cátei le, ába janügüni Sáulo ubúrugin Cesaréa, ñígiñe ába jóunajani Társoun.

³¹ Lídoun buri dan ligía, buíti jóuserúniwa afíñetiña luágu Jesucrístu ja aganoúbaña Judéa, Galiléa, lúma Samária. Ába jedérebugudún lídan jafíñen luágu Jesucrístu, falájamei le lubeíbei, resíbi jagía gurásu lúmagiñe Sífiri Sándu. Ába agánwoundeina jamá afíñerutiña.

Lareídagun Enéas

³² Dan le lebélujaña lubeí Pédro lídan buri fulásu lun líderaguniña ja afíñeñaabaña luágu Jesucrístu, ába giñe lídin aríjaña lánigu Búngiu ja ubúrugaña Lída. ³³ Ñi ladárira ában wügüri gíríti Enéas, wídü irúmu láu gabánarugu láu derégüdaü. ³⁴ Ába laríñagun Pédro lun.

—Enéas, areídaguagüda lumútibu Jesucrístu. Sarába, aráanseboún bigábana.

Ába lásaarun Enéas óra ligía. ³⁵ Ába jaríjini sun ja aganoúbaña fulásu buri Lída lúma Sarón, ába jígiruni binádu jafíñen, ába jafíñerun luágu Jesúsu.

Táguyuğun Dórcas

³⁶ Lídan meja dan ligía, ñíñoun meja ában afíñetu aganoútu Jópe, gírítu Tabíta, lídan jerérun güriégu, gírítu Dórcas. Würi tugúya, súnwandan táu adúga buíti, íderagua tugúya gudémetiña. ³⁷ Lídoun dan ligía, ába tasándirun Dórcas, ába toúnwen, lárigiñe jágawagüdünnun, ába jaríwachaguagüdünnun. ³⁸ Yaráfati Jópe lun Lída le ñi lubei Pédro, queíti jagáambuni afíñetiña luágu níjein lan ñi, ába jóunajan bián wügüriña aríñaga lun.

—Queímoun Jópe, oúfuda.

³⁹ Ábati lídin Pédro jáma. Dan le lachülürünbei, ába janügüni tídoun rúmu to ñi tubei jiláaru, ába jagúriridágun sun würiña ja jiláguaañábaña úmari láu, ayájuaja tárigi, arúfudajoún buri dínugu túma simísi tó buri tájüchagubóun Dórcas dán meja mouñwengiru, lun. ⁴⁰ Ába láfuridagüdüniña Pédro sun ja ñíbaña, ába lájuduragun, ába layúmuragun lun Búngiu. Ábati laríjin tuágun jiláaru, ába laríñagun tun.

—Tabíta, sarába.

Ábati téfegechuni tágu, dan taríjini Pédro, ába tiñúragun túngua. ⁴¹ Ába lárügüdüni tújabu, ába lásaaragüdünnun. Lárigiñe, ába lagúarun joun würiña jagía jáma jíbiri afíñetiña ja ñíbaña, ába larúfudunun joun, wínwañu. ⁴² Ába lagaambún cátei le lídan sun ubúrugu Jópe, ába sarágu jamá afíñerutiña luágu Jesucrístu. ⁴³ Ába leréderun Pédro sarágu dan lídan ubúrugu ligía, lúbiñe Simón le aráansejabei úraü.

10

Loúnajan Cornélio oúgei Pédro

¹ Ñíñein ában wügüri ubúrugu Cesaréa gíríti Cornélio, gumándan joun súdaara ja Italiána. ² Wügüri ligía jáu sun lufámilian, derégeguatiña jóungua lun Búngiu, judúguatiña lun Búngiu láu sun máma jamá juríu. Rúti buri giñe sarágu seínsu lun jíderawagún juríu, áni súnwandan layúmuragun lun

Búngiu. ³ Luágu ában wéyu, quei buri ladaünrün ürüwa rábounwéyu, ába lasálriragun ában láni Búngiu ánjeli lun, furáangu, ába laríñagun lun.

—¡Cornélio!

⁴ Ába leréderun Cornélio aríaguei ánjeli ligía láu sarágu anúfudei, ába laríñagun.

—¿Ca babúseerubei, Nabúreme?

Ába laríñagun ánjeli ligía lun.

—Agáamba láali Búngiu bayúmuragun, aríjalei buri cátei le badügübei lun bíderaguniña gudémetiña. ⁵ Oúnajabá lubeíti wügüriña ubúruгу Jópe lun jouguni Simón, le gíñe gíribei Pédro, lun liábin bun. ⁶ Lúbiñe Simón le aráansejabei úraü, le gábanbei láru barána.

⁷ Dan le ñüdünjali ánjeli le adímurejabei lúma Cornélio, ába lagúarun joun biáma jádaangiñe lumúsuniña lúma ában lisúdaaran, súdaara ligía, ában wügüri derégeguati lúngua lun Búngiu, leménigira Cornélio. ⁸ Ába labájüdaguni sun cátei joun, ába loúnajaniña ubúruгу Jópe.

⁹ Larúgan amídirugu, sun ayárafadeina jamá wügüriña ja lun Jópe, ába lamúdeirun Pédro luágun tábulugu múna le fadábei, ayúmuragua lun Búngiu. ¹⁰ Weirijaliti liláma óra ligía, busénjali leigin. Dan le añája lan aráanserei leigin, ába lasálriragun ában cátei lun itara. ¹¹ aríja lumúti lánjunrenchun siélu, ába tiábin ában catoun camá jamuga gamísa weiritu gúrágu lueigiñe gádürü tarígei, tiábin arárireina múarugun. ¹² Tídan gamísa tugúya, ñíñanu sun jawúyeri anímaalu, gádürügua tugúdi, jéwe, jáma dunúru. ¹³ Ábati lagáambun laríñagun ában umálali lun.

—Sarába Pédro, áfarabá jádaangiñe anímaalu ja lun beigin.

¹⁴ Ába loúnabun Pédro.

—Uá, Nabúreme, meigiñajágidina ni cáta le wanügübei quei mabuídunti según lilúrudun Moisés.

¹⁵ Ábayati ladímurejan umálali ligía lun, ába laríñagun lun.

—Le cátei le labuíduragüdün Búngiu, maríñagabá luágu luágu mabuídun lan.

¹⁶ Ürüwañein weíyaasu lasúseredun cátei le, lárigiñe, ábaya tamúdeirun gamísa tugúya siélu. ¹⁷ Súnti niján lan Pédro láu luweírín arítaguni luágu, asáminara ca lan laníchigubei cátei le laríjubei, ligía jachülürün luwügüriñan Cornélio, álügüdajeína tuágu lúban Simón. ¹⁸ Dan jachülürün tubéneri múna, ába jálügüdajan rein ánjein ní lubei lagánawa ában gíriti Simón le gíñe únbei jaríñaga Pédro. ¹⁹ Queíti buga nijágua lan Pédro asáminara luágu cátei le asálriragubei lun, ába laríñagun Sífiri Sándu lun.

—Añája ürüwa wügüriña álugabu, ²⁰ raríba, oúfudabá, beíba jáma láu afíñeni ladúga áu lan oúnajabalíña.

²¹ Ábati larárirun Pédro le ñíjin jabei wügüriña ja loúnajabaña Cornélio, ába laríñagun joun.

—Áu le jáluajabei. ¿Ca gabügürübalün?

²² Ába jaríñagun.

—Loúnajan gumándan le gíribei Cornélio wagía, ában wügüri surúti, derégeguati lúngua lun Búngiu, jínsiñeti joun sun juríu. Ñübinti ában ánjeli aríñaga lun lun loúnajan oúgabun lun bídin lúbiñe, lun lagáambuni le lúnbei baríñaguni lun.

²³ Ábati lebélaagüdüniña Pédro, ába jeréderun lúma ñi áriebu ligía. Larúgan, ába lídin Pédro jáma, ñüdüntiña giñe jádaangiñe affñetiña ja aganoubaña Jópe jáma.

²⁴ Larúgan, ligía jachülürün Cesaréa, le ñí lubei Cornélio agúrabajaña jáu lidújeñu jáma jabuidun-ágei lumádagu ja lamísurajabaña. ²⁵ Dan lachülürün Pédro, ába láfuridun Cornélio erésibirei, ába lájuduragun ligibugiñe láu sarágu inébesei. ²⁶ Ába liñúragni Pédro, ába laríñagun lun.

—Ráramabá, wügüri giñe áu bíledi.

²⁷ Súnti niján lan adímureja lúma, ába lebélorun, ába ladárirun sarágu gürígia adámuriñu ñi. ²⁸ Ábati laríñagun Pédro joun.

—Subúsi jumúti luágu mája lan wafíñen wagía juríu lun jóundaragun juríu jáma ja mámabaña juríu quei jugúya, ni lun webélurun tídoun jában luei wasálrin mabuídunga ligibugiñe Búngiu. Wel, arúfuda láali Búngiu nun luágu mabúseerun lan lun nouseruniña ja mámabaña juríu queisi gürígia mabuíduntiña. ²⁹ Ligía nánjanrunbei niábin dan le bouñajanbei nuágu. Buséntina jamúgati nasúbudiruni ca lan lébubei jóunajan nuágu.

³⁰ Ábati loúnabun Cornélio.

—Ürüwa wéyu guetó, queiburi óra le, ñañadina núbiñe ayúmuragua lun Búngiu ladaürün ürüwa rábounwéyu, queisi wéchun, ligía lasálrigun ában wügüri nun táu ában dáüguaü mirítu. ³¹ Ába laríñagun nun. “Cornélio, agáamba láali Búngiu bayúmuragun, jarítaguaaliti luágu buri cátei le badügübei lun bíderaguniña gudémetiña. ³² Oúnajabá lubeíti wügüriña ubúruгу Jópe oúgei Simón le giñe giríbei Pédro, lúbiñe ábanya Simón aráansejati úraü, le gábanbei láru barána, ñi lagánawa.” ³³ Ába lubeíti nouñajan oúgabú furése, áni buítiti badüga biábin. Guetóti awánja sun wagía ya ligibugiñe Búngiu, buséntiwati wagáambuni le laríñagubei Wabúreme Búngiu bun lun baríñaguni woun.

Lapúrichijan Pédro lúbiñe Cornélio

³⁴ Ábati lagúmeserun Pédro adímureja, ába laríñagun.

—Subúdi náali guetó luágu ában lan lábu lanügüniña Búngiu sun gürígia. ³⁵ Resíbirügü lumútiña sun ja inébejabúbaña lun áni adüga jamei le buídubei, dándu juríu quei ja mámabaña juríu. ³⁶ Adímurejati Búngiu joun ladügawagun Israél, adímurejeina ugánu luáguti gayára lan jaráandarun gürígia luma Búngiu lídaangiñe Jesucrístu, le Jabúremebei sun gürígia. ³⁷ Jugúya, subúdi jumúti cátei le asúseredubei jageíra juríu buídu, le agúmeserubei Galiléa lárigiñe lapúrichijan Juan, áni abásteragüdaja ligía. ³⁸ Subúdi jumúti luágu rúlaani Búngiu lubáfu Sífiri Sándu lun Jesúsú Nazarétna, luágu meja giñe ladáagun buíti, lúma lareídaguagüdüniña ja asúfurirubaña lábugiñe lubáfu Máfia. Ladügünbalin buri meja cátei le, ladüga ñíñein lan Búngiu lúma. ³⁹ Wagía geféentiwa luágu sun cátei le ladügübei Jesúsú Jerusalén lúma lídan sun líbiri jageíra juríu. Lárigiñe, ába jáfaruni jilágubei láu jádaraguní luágu ában gurúwa. ⁴⁰ Sarágüda lumúti Búngiu lídaangiñe oúweni luágu lürüwan wéyu, ába larúfudaguagüdüni lúngua wínwañu woun. ⁴¹ Marúfudagúnti lúngua joun sun gürígia, lueidügüya woun, wagía le anúadaja láañabaña Búngiu lúmagiñe binárü quei geféentiña luágu lásaarun lídaangiñe oúweni. Jóútiwa lúma, gurá wagía lúma lárigiñe lásaarun lídaangiñe oúweni lúnya labágaridun. ⁴² Ába loúnajaniwa apúrichija joun gürígia luágu, lun giñe waríñaguni luágu rúlaali

lan Búngiu Jesúsu méme le lun lagúseragüdüniña ja wínwangiñabaña jáma ja jiláguaañábaña dánme le lagíribudun ubouágun. ⁴³ Adímurejaaña meja giñe sun profétagu luágu Jesúsu lúmagiñe binárü, luágu sun lan ja afiñebaña luágu, resíbi jamáni ferúdun luágu jafígon.

Jerésibiruni ja mámabaña juríu Sífiri Sándu

⁴⁴ Ñígili Pédro adímureja, ligía liábin Sífiri Sándu jádoun ja agáambajabalin ladímurejan. ⁴⁵ Játi juríu ja afiñetiña luágu Jesucrístu ja ñúbinbaña úara lúma Pédro, ába laweíridun janígi láu liábin Sífiri Sándu jádoun ja mámabaña juríu. ⁴⁶ Agáamba jamútiña adímureja dimúrei le mámabei jerérun, adímureja jagía luágu luweírigun Búngiu. ⁴⁷ Ábati laríñagun Pédro.

—¿Majouabei funági lun jabásterún gürígia ja, quei resíbi jamáli lubeí Sífiri Sándu queígubeirügü wagía?

⁴⁸ Ába líchugun dimúrei lun jabásterun lídan líri Jesucrístu. Lárigiñe, ába jayúmuragun lun Pédro lun leréderun átiri wéyu jáma.

11

Labájüdagun Pédro joun tílana ligílisi to Jerusalénboun luágu le asúseredubei Jópe

¹ Ába jagáambuni apóstolugu jáma jíbiri afiñetiña ja Judéabaña luágu ánjaaña lan giñe ja mámabaña juríu lun láni Búngiu ugánu luáguti Wasálbaragüle, Jesucrístu. ² Dánti le lagíribudun Pédro Jerusaléoun, ába jachúrajani juríu ja afiñetiña, ³ jaríñaga.

—¿Cámesan bídin aríjaña ja mámabaña juríu, áni jou amürü jáma?

⁴ Ábati labájüdaguni Pédro sun le asúseredubei joun lúmagiñe lagúmeseja, ába laríñagun.

⁵ —Ubúruguañadina Jópe, ayúmuragua lun Búngiu, ligía naríjin ában cátei lasálaragun nun camá jamuga ában gamísa weírítu tarárirun siélugiñe, gürágu lueígiñe gádürü tarígei, tiábin chülü le ñí nubei. ⁶ Dan le naríjin tuágun buídu lun naríjin ca lan tídaanbei, ába naríjin anímaalugu gádürügua tugúdi ñi, anímaalugu gánitiña, jéwe, jáma dunúru. ⁷ Ába nagáambun laríñagun ában umálali nun. “Sarába Pédro, áfarabá jádaangiñe, joubei.”

⁸ Ába naríñagun. “Uá, Nabúreme, ladüga meígiñajágidina ni cáta le wanügübei quei mabuídunti según lilúrudun Moisés.” ⁹ Ábayati ladímurejan umálali siélugiñeti ligía nun, laríñaga nun. “Le cátei le labuíduragüdün Búngiu, mariñagabá luágu luágu mabuídun lan.” ¹⁰ Ürüwañein weíyaasu lasúseredun cátei le, lárigiñe, ábaya tamúdeirun siélun. ¹¹ Lídan óra ligía, ligía jachülürün ürüwa wügüríña tídoun múna to ñí nubei, oúnajóutiña Cesaréagiñe álugana. ¹² Ába laríñagun Sífiri Sándu nun lun nídín jáma láu afiñeni. Ñüdüntiña giñe sísi afiñetiña ja núma. Dan wachülürün Cesaréa, ába webélurun sun wagía lúbiñoun ában wügürí, ¹³ le abájüdagubei woun luágu nege laríjin ában ánjeli rára lúbiñe, ába lán nege laríñagun ánjeli ligía lun. “Oúnajabá wügüríña lun jóudin ubúrugú Jópe ougei Simón le giñe gíribei Pédro, ¹⁴ laríñagubei bun ída lúba lan gayára lan basálbarun jáu sun bufámilian.” ¹⁵ Dan nagúmeserúnbei adímureja joun, ába liábin Sífiri Sándu jádoun queí meja liábin wádoun furúmiñe. ¹⁶ Ábati narítangun luágu lé meja laríñagunbei Wabúreme. “Inárüni luágu badíseigüda lan Juan láu dúna, ánjein Búngiu, labásteragüdübadün láu Sífiri Sándu.” ¹⁷ Ánjeinti ru lubálin

Búngiu líbe le líchubei woun, wagía le afiñeelibe luágu Jesucristu, joun, ¿cátanañadináti lun neréderubei lan le labúseerubei Búngiu ladúga?

¹⁸ Dánti le jagáambuni afiñetiña ja Jerusalénbaña cátei le, ába jámanichun. Ába jadímurejan luágu luweírigan Búngiu, ába jariñagun.

—¡Rújali lubei giñéti Búngiu ubáfu joun ja mámabaña juríu lun jasáansiruni jagáburi, lun gayára lan jabíjin ibágarí magúmuchaditi!

Ligílisi to Antioquiana

¹⁹ Dan le láfarúnbei Estéban, ába giñe jagúmeserun eíbaajaña ja jíbiri afiñetiña, ába janúrajan jíbiri chülü Fenícia, Chípre, luma Antioquía. Ñi jíchigei ugánu luáguti lasálbaruniña Jesucristu gürígia lídaangiñe jafígoun jóunrügü juríu, máma joun ámu gürígia. ²⁰ Anjeinti afiñetiña ja Chíprena jáma Cirenena, ába jachülürün Antioquía, ába giñe jadímurejan joun ja mámabaña juríu, ába jíchuguni ugánu luáguti Wabúreme Jesucristu joun lun jasálbarun. ²¹ Ñiñein lubáfu Búngiu jáma afiñetiña jagía, sarágu ja mámabaña juríu, ába jígiruni binádu jafiñen, ába jafiñerun luágu Jesucristu.

²² Dan lachülürünbei ugánu le lábun jagáambun afiñetiña ja Jerusalénbaña, ába jóunajani Bernabé Antioquíoun. ²³ Dan lachülürünbei Bernabé, ába larijini luágu binílaaña lan Búngiu gürígia ja mámabaña juríu, ába lagúndaarun sarágu. Ába labímejaniña súnqubei lun jafálaruni Wabúreme Búngiu táu sun janígi. ²⁴ Bernabé, ában meja wügüri buíti, derégeguati lúngua lun Sífiri Sándu le gumúti, buin líña giñe láu afiñeni luágu Jesucristu, itara líña lagáñeirun sarágu gürígia lun Jesucristu.

²⁵ Lárigiñe, ába lídin Bernabé Társo áluajei Sáulo, dan ladáriruni, ába lanügüni Antioquíoun. ²⁶ Ába jeréderun ñi jáma tílana ligílisi ában irúmu, arúfudaja joun sarágu gürígia. Ñí Antioquía lagúarúa joun afiñetiña “Cristiánugu” furúmiñe.

²⁷ Lídan dan ligía, ába jóúdingua já buri profétagu Jerusaléngiñe lun Antioquíoun. ²⁸ Ában jádaangiñe, gíriti Ágabo, ába laráramun jádan afiñetiña, ába lariñagun láu le lasúbudirágüdübei Sífiri Sándu lun luágu liábiba lan ában oúnwenbun ilámaü lídan sun ubouú, áni suséreti lídan lidáani larúeijan Cláudio. ²⁹ Ábati jóúndaragun afiñetiña ja Antioquíana lun jóunajan seínsu joun afiñetiña ja Judéabaña según le jayáraati íchiga. ³⁰ Ítara líña jadügüni, ába jóunajani seínsu ligía lúma Sáulo joun tábutigu jalígilisin afiñetiña Judéana.

12

Louñwen Jacóbo lúma ladaürün Pédro

¹ Lídan dan ligía, ába lagúmeserun urúei Heródes eíbaajaña jádaangiñe afiñetiña. ² Ába láfaragüdüni Jacóbo le lamúlen Juan táu efeín, ³ queíti larijín láu gúnda jamá juríu láu cátei le, ába giñe lanügüni Pédro adaüra. Lídan buri wéyu le fédu le ídaanbei teigúa fein magánatu ísi lasúsereda cátei le. ⁴ Lárigiñe lanügüni Heródes Pédro adaüra, ába ládaruni furísunrugun jáu díisi-sísi súdaaragu oúnigira gádürü gádürü, lariitagun lún yebe laságaruni jagíbugiñe lílana fulásu lárigiñe fédu lun lagúserun. ⁵ Ñiñein lubeíti Pédro furísunrugu toúnigiwañu buídu, merédeti jayúmuragun tílana ligílisi lun Búngiu luágu.

Leséfuruni Búngiu Pédro furísunrugúgiñe

⁶ Áriebu le lubáragiñe wéyu lé yebe lúnbei laságaruni Heródes Pédro jagíbugiñoun gürígia, larúmuguña Pédro jamídaangua bián súdaara, gürágu ligía láu bián güríngüri, jámaya bián súdaara luágu béna oúnigira. ⁷ Sódini, ligía lasálaragun ában láni Wabúreme ánjeli, ába larúgoungadún furísunrugu. Ába lagúuruni ánjeli ligía loúbawagu, ába lagáguduni, ába laríñagun lun.

—Sarába furése.

Ábati láburujan güríngüri lueígiñe lújabu Pédro, ⁸ ába laríñagun ánjeli ligía lun.

—Murúbei bubélitin, daübounme bigeídin.

Lárigiñe ladügüni Pédro sun líra, ába laríñagun ánjeli ligía lun.

—Daüboun babíte, falábana.

⁹ Ába láfuridun Pédro lárigi ánjeli ligía, ibídiñoun lun ánjein inárüni lubei lúmoun máma lan inárüni cátei le ladügübei ánjeli ligía. Genégetimáati lun camá gewenediñein. ¹⁰ Ába jásügürün jáu furúmiñetiña oúnigirutiña, sügü jamaña jabíaman, dánti le jachülürün luágun béna le gürábu le úmadagiñebei, ába lánjunrenchun lúngua. Ába jáfuridun, lárigiñe jánjiñuragun ában úma, ába lígiruni ánjeli ligía Pédro lábugua. ¹¹ Ligíaali lárügüdagun Pédro lúngua, ába laríñagun.

—Aná guetó, subúdi náali luágu oúnaja láali lan Búngiu ánjeli lun leséfurunina lueí Heródes lúma lueí sun lé yebe jabúseerubei juríu jadügün náu.

¹² Asáminareína ligía Pédro luágu cátei le, ába lídin túbiñoun María to lúguchu Juan Márcos, le ñi jabei sarágu gürígia adámuriñu ayúmuragua lun Búngiu luágu. ¹³ Dan lacaŷjan luágu lubéneri bürürü, ába táfuridun ában irájü músu, gírítu Róde, aríja ca lan agúajabei. ¹⁴ Dan tasúbudiruni luágu Pédro lan luágu lumálali, bulíei tumúti tánjunrenchuni béna, le luweírín tugúndan, ábarüga teíbaagun múnadoun awísaja luágu niján lan Pédro bénabu. ¹⁵ Ábati jaríñagun tun.

—¡Lúlüjaali báu!

Ába taríñagun joun luágu chouuru tan luágu ligía lan. Ába jaríñagun.

—Máma ligía, fágua láfurugu.

¹⁶ Niján mémeti Pédro acaŷnja luágu béna. Dan jánjunrenchuni, ába laweíridun janígi dan le jaríjini. ¹⁷ Ába líchugun seíni joun láu lújabu lun jámanichun, ába labájüdaguni joun ída líña lan laságaruni Búngiu furísunrugúgiñe, lárigiñe, ába laríñaga joun.

—Abájüdagua jumeí cátei le lun Jacóbo lúma joun jíbiri afíñetiña.

Ábati láfuridun, ába lídin lídoun ámu fulásu.

¹⁸ Dan larúgadunbei, niján luwúyerigu samínaü jádan súdaara, ladüga ibídiñeti joun ca lan susérebei lun Pédro. ¹⁹ Ába loúnajan Heródes áluajei, quei madári jamáni, ába lálügüdaguniña súdaara já buga oúnigirubalin, lárigiñe, ába láfaraguágüdüniña jilágubei. Lárigiñe, ába láfuridun Heródes Judéagiñe, ába lídin agánawa Cesaréa.

Loúnwen Heródes

²⁰ Weíríti ligáñi Heródes jáma gürígia ja aganoúbaña Tíro lúma Sidón, ánjein jagía, ába jebélurun lídoun ában arítaguni lun jóúnajan wügüríña lun jadímurejan lúma luágu jafúleisein. Dan le jachülürün, ába jagáñeiruni Blásto, ában wügürí íñuguti láni Heródes, lun líderaguniña adlíjei sun cátei, ladüga lageíragiñe Heródes jabíja eíjini. ²¹ Ába lagúaragüdün Heródes jawágu luágu ában wéyu, wéyu ligía, ába ladáürunun lanaangun

to lanáangun urúei, ába lañúurun luágu lála le ñígiñe lubei lagúmadija, ába ladímurejan joun. ²² Ábati jagúmeserun gürígia agúaraja.

—¡Máma wügüri adímurejabei, búngiu adímurejabei!

²³ Lídan óra ligía, ába lasándiragüdüni láni Búngiu ánjeli Heródes, ladüga lanáangun lúngua luágu jerérun gürígia, míchu lumúti linébase Búngiu lun, ába jeígini jéweraü, ába loúnwen.

²⁴ Abúruchagueínatimá ligíati ugánu le láni Búngiu, apúrichijóuati lídan sun fulásu.

²⁵ Dan jagúmuchuni Bernabé lúma Sáulo jawádigimari, ába jagíribudun Jerusaléngiñe barúina jamei Juan Márcos jámaga.

13

Jagúmeseruni Bernabé lúma Sáulo jawádigimari apúrichijei Lerérun Búngiu

¹ Tídan ligílisi to Antioquíaboun, ñíñanu profétagu jáma maésturugu. Wügüriña jagía. Bernabé, Simón, le únbei jaríñaga Wuríti, Lúcio le Ciréna, Manaén le agúriarúbei úara lúma Heródes le gumádimati Galiléa, lúma Sáulo. ² Luágu ában wéyu dan le jájuduragun lun Búngiu, ayúnara jagía, ába laríñagun Sífiri Sándu joun.

—Dírei jumei Bernabé lúma Sáulo nun lun wadágimanu le únbei nanúadiraña.

³ Lárígiñeti jayúmuragun lúma jayúnarun, ába jíchuguni jájabu jawágu Bernabé lúma Sáulo, ába jóunajaniña luágu jawádigimari.

Japúrichijan Bernabé lúma Sáulo lídan fulásu le Chípre

⁴ Ítara líña loúnajaniña Sífiri Sándu Bernabé lúma Sáulo, ába jóudin Seléucia, ñígiñe, jádina lun jóudin luágun ubóuju le Chípre. ⁵ Dan jachúlürün lídan ubúru le gíribei Salamína, líbiri méme Chípre, ába jagúmeserun apúrichijei lerérun Búngiu tídan jalígilisin juríu. Ñüdüti gíñe Juan Márcos jáma, íderaguaaña. ⁶ Eíbuga jamúti sun ubóuju ligía chülü lumoun fulásu le gíribei Páfos. Ñi jadárra ában juríu gíríti Barjesús, garíyajati wügüri ligía, ye ligía, laríñaga luágu proféta lan. ⁷ Garíyajati ligía lúmañein gumádimati le Sérjio Páulo, ában wügüri janíchiguti. Ába loúnajan gumádimati ligía luágu Bernabé lúma Sáulo ladüga busén lan lagáambuni lerérun Búngiu. ⁸ Ánjein garíyajati ligía, le méme gíribei Elímas, sigéne lumútiña luei yebe lafíñerun gumádimati luágu le jaríñagubei lun luágu Jesucrístu. ⁹ Sáuloti, le méme gíribei Páblo, buin líña láu lubáfu Sífiri Sándu, ába laríaguni Elímas, ¹⁰ ába laríñagun lun.

—¡Yéetibu, buin bíña láu wuríbani, liraü Máfia amürü, lágani sun le buídubei! ¿Ca uágu meréde lubei beyéjejan luágu lémeri Búngiu le surúbei?

¹¹ Guetó láburuja ligáñi Búngiu buágun, berédera maríjina luágu átiri dan.

Lídan óra ligía, ába labúrigadún láu, ába lálujan cába lan árújei lújabu, ladüga maríjinali lan. ¹² Dan laríjini gumádimati cátei le, ába lafíñerun luágu Jesucrístu, weíríti lanígi láu le jarúfudajabei luágu Wabúreme Jesucrístu.

Páblo lúma Bernabé ubúru Antioquía

¹³ Ába láfayarun Páblo jáma líbirigu Páfosiñe lun ubúrugun Péрге, le lídaanbei fulásu gíríti Panfília. Ánjein Juan Márcos, ába lígiruniña, ába lagíribudun Jerusaléoun. ¹⁴ Lárígiñe, ába jásügürün Pérgesiñe lun ubúrugun Antioquía, le lídaanbei Pisídia. Ába jebélurun lídan wéyu le eméraaguagülei

tídoun jalígilisin juríu, ába jañúurun ñi. ¹⁵ Lárigiñeti taliijouñiwa líburu to lánina lilúrudun Moisés túma buri líburu to jabürüjaboun profétagu, ába jounajan ábutigu aríñaga joun.

—Wadújeñu, ánjein njein lubei dimúrei lun jaríñaguni joun gürígia ja, aríñaga jumei guetó.

¹⁶ Ábati lásaarun Páblo, ába ladügün seini joun láu lújabu lun jámanichun, ába lariñagun.

—Agáamba jumá, wügüríña Israelítagu júma jugúya le ájuduragubei lun Wabúngiute. ¹⁷ Búngiu le Jabúngiute Israelítagu, anúadaja lumútiña meja binádu wagübürigu lun lánigubaña lan, ába ladügüniña ábanme oúnwenbun násiñun dán meja le añájagua lan agánawa quei teréncha Ejipto, lárigiñe, ába laságaruniña lídaangiñe fulásu ligía láu lubáfu. ¹⁸ Awánda lumúti Búngiu luríban jagáburi lídan fulásu mageírawati quei buri bián-wein irúmu. ¹⁹ Lárigiñe, ába lagúmuchaguagüdüni sédü násiñun ja aganoútiña Canaán lun líchuguni jafúlasun joun binádu wagübürigu luára gádürü-san-dimí irúmu. ²⁰ Lárigiñe, ába líchugun gürígia lun jagúseragüdüniña darí lúmoun lidáani proféta Samuél. ²¹ Ábati jamúriajan ában urúei lun ligíaba lan agúmadiraña, ába líchuguni Búngiu Saúl joun jarúeiteme luágu bián-wein irúmu, Saúl ligía, liraü Cis, ladügawagun Benjamín. ²² Lárigiñe, ába lagídaruni Búngiu arúejiani luei Saúl, ába líchuguni lun David, le uágubei lariñaga. “Darína David, liraü Isaí, ában wügüri le áubei nagúndaara, áni ladügübei sun le nabúseerubei.” ²³ Jádaangiñe ladügawagun David ligía liábin Jesúsu le loúnajabei Búngiu lun jasálbarun Israelítagu, quei meja lariñaguni. ²⁴ Lubáragiñebei liábin Jesúsu ubouagun, apúrichijati Juan joun sun Israelítagu, lariñaga joun luágu lúnti lan jasáansiruni jagáburi, badísei jagíame. ²⁵ Dan le layárafadúnbei dan lun loúnwen Juan, ába lariñagun. “Mámatia áu le uágubei jarítagua luágu áu lan, liábiba ában nárige, ni cáta áu loúbagiñe, madúnatina ni íbini lun nafáragadunun ligeídin.”

²⁶ Nidújeñu, jugúya le jarájüñübei ladügawagun Abrahám, júma jugúya le mámabei ladügawagun Abrahám, inébejabutün lun Búngiu. wagía gürígia ja únbaña loúnajoúa ugánu le luáguti Wasálbaragüle. ²⁷ Já meja gürígia ja aganoúbaña Jerusalén jáu sun jábutigu, ibídiñeti yébe joun ca lan Jesúsubei, úa ligía gunfaráanda jamáni jerérun profétagu, láu sun aliijouá lan jerérun tídan jalígilisin ságü luwéyuri eméraaguni, jagía guánarügüti gúnfuli jamúti le bürüwañubei láu jasiádiruni Jesúsu lun loúnwen. ²⁸ Láu sun madári jamá lidúnrun Jesúsu lun gayára lan jáfaruni jilágubei, amúriajatiña lúma Piláto lun láfaragüdüni jilágubei. ²⁹ Dánti le adüga jamáli sun le tariñagubei Lerérun Búngiu luágu, ába jarárigüdüni lueígiñe gurúwa, ába jíchuguni lídoun lumúaja. ³⁰ Ába lásaaragüdüni Búngiu lídaangiñe oúweni lúnya labágaridun. ³¹ Arúfudaguati Jesúsu lúngua winwañu luágu sarágu weíyaasu joun ja ñübinbaña lúma luágu luweíyasun Galiléagiñe lun Jerusaléoun, jagíati geféenbaña luágu joun gürígia guetó.

³² Wíchiguñein lubeiti ugánu le jun, luágu darádu lé meja ladügübei Búngiu jáma binádu wagübürigu ³³ gúnfuli láali woun, wagía le jadügawagun, láu lásaaragüdüni Jesúsu, quei lariñaguni tídan lilíburun, lídan libíaman Sálmo. “Niraü amürü, rúnaali ubáraü le bun ugúñe.” ³⁴ Ariñaga láali meja Búngiu luágu lásaaragüdüni Jesúsu lídaangiñe oúweni lun mañáladun lan lúgubu, dan lariñagun tídan líburu to Lerérun. “Níchugubei abíniruni le uágubei nariñaga lun David bun, gayáraati

beménigidun luágu.”³⁵ Laríñaga gíñe Davíd lídan ábanya Sálmo. “Mígirunbadibu lun lañáladun lúgubu Biraü le jínsiñebei bun.”³⁶ Davíd, seríwiti méja joun ja lánina lidáani quei laríñaguni Búngiu lun, lárigiñe, ába louñwen, ába labunún le ñí lubei jabunúa lagúbürigu, ába lañáladun lúgubu.³⁷ Ánjeinti Jesúsu, sarágüda lumúti Búngiu lídaangiñe óuweni, mañáladunti lúgubu.³⁸ Nidújeñu, lúnti lubeíti jasúbudiruni luágu lídaangiñe lan Jesúsu ferúdnawa lan wafígoun. Ligía ugánu wanügübei jun.³⁹ Lídaangiñeti gíñe, chibáwaali lubei sun wafígoun, sun wagía le afiñebei luágu, gidáwa ligía wadúnrun ligíbugiñe Búngiu, cátei lé meja siñá lubei lilúrudun Moisés adüga.⁴⁰ Touñigi jumá lubeíti luei láburujan ligáñi Búngiu juágoun queisi jaríñaguni profétagu dan le jaríñagunbei.

⁴¹ Jugúya le éjerajabei náu, weirilá janígi, áni gumúgua jumá, ladüga áu le Búngiubei, nadügüba cátei weínamuburiti, daríme lun maffíñen jumá, íbini jabájüdaguni ámu jun.

⁴² Dan le láfuridunbei Páblo jáma lánigu tídaangiñe ligílisi, ába jamúriajan jáma lúnya jadímurejan joun luágu buri cátei le lewéñegua dimáasu.⁴³ Dan lagúmuchun jadámuridagun ligílisirugu, sarágu jádaangiñe juríu jáma buri ja ígirubalin binádu jafiñen lun jafálaruni jafiñen juríu, ába jafálaruni Páblo lúma Bernabé. Ába jadímurejan Páblo lúma Bernabé jáma, ába jaríñagun joun lun jasígirun eménigira luágu lareídun Búngiu.

⁴⁴ Lewéñegua dimáasu, le luwéyuri eméraaguni, ába jóundaragun jíbe-ágei lílana fulásu lun jagáambuni lerérun Búngiu.⁴⁵ Láu jaríjin juríu sarágu gürígia agáambajei lerérun Búngiu, ába jeméendüjan, ába jagúmeserun asígenerei Páblo, anába jamei líri Jesúsu.⁴⁶ Ábati jadímurejan Páblo lúma Bernabé manúfudeiga, ába jaríñagun.

—Lúnti yebe wíchuguni ugánu lúmagiñeti Búngiu luágu Wasálbaragüle jun furúmiñe, jugúya le juríu, quei mabúseerun jumá jerésibiruni ugánu ligía, láu líra jarúfuduñein luágu madüna jumáni ibágari le magúmuchaditi, ítara líña weíbugagubeíti apúrichija joun ja mámabaña juríu.⁴⁷ Ladüga ítara líña laríñaguni Wabúreme woun.

Níchuguñadibu lun bíchuguni larúgounga joun ja mámabaña juríu, lun gayáraabei lan jasálbarun ja aganoubaña lídan lagúmujóun fulásu ubouágu.

⁴⁸ Dan jagáambuni ja mámabaña juríu cátei le, ába jagúndaaragun, ába jagúmeserun aríñaga luágu buídu lan láni Búngiu ugánu, ába jafiñerun sun ja lúnbaña jafiñerun luágu Jesucrístu, ja lúntiñabaña ibágari le magúmuchaditi.

⁴⁹ Ítara líña lapúrichijoún lerérun Búngiu lídan sun fulásu ligía.⁵⁰ Ába jadímurejan juríu jáma würíña gúnfulitiña, inébewa jagía, lúma jáma wügüríña weírigutiña ñi ubúrugu, ába jínchajániña lun jeíbaajaniña Páblo lúma Bernabé dari lun jabúguniña lídaangiñe fulásu ligía.⁵¹ Ábati jáfuruduní calíqui lueigiñe jagúdi, arúfudei luágu mabuídun lan jóuserun lílana fulásu ligía, ába jóudin ubúrugin Icónio.⁵² Gúndaañu jáña afiñetiña Antioquia luágu jabágari lúma Crístu, weíríti jedéregeragun jóungua lun Sífiri Sándu.

14

Páblo lúma Bernabé ubúruyu Icónio

¹ Ába jebélurun Páblo lúma Bernabé tídoun jalígilisin juríu ubúrugu Icónio, ába japúrichijan, buíti jadímurejan dari lun jafiñerun sarágu, dándu juríu quei máma juríu, luágu Jesucrístu.² Juríu ja mafiñebaña luágu Jesucrístu,

ába jínchajaniña ja mámabaña juríu, amásiñedagüdaña afiñetiña joun. ³Ligía jeréderunbei Páblo lúma Bernabé sarágu dan ñi, ába jadímurejan furáangu, manúfudeiga, jeménigiñu luágu Búngiu, arúfuda lumúti Wabúreme luágu inárüni lan cátei le japúrichijabei luágu lareidun, láu líchuguni ubáfu joun lun jadáagun seíni lúma miláguru. ⁴Fánreinguañu jáña lílana ubúrugun ligía, jíbiri jámagiñeñanu juríu, jíbiri jámagiñe apóstolugu. ⁵Játi juríu jáma ja mámabaña juríu, ába jebélurun lídoun ában aritaguni jáma gumádimatiña lun jeibaajaniña apóstolugu lúma lun jachámuragun dübü jawágun. ⁶Ánjein Páblo lúma Bernabé, ába jasándiruni, ába jouúdin lídoun buri fulásu le gíríbei Lístra lúma Dérbe, biáma fulásu le láni méme fulásu le Licaónia, lúma geyégua láu, ⁷apúrichija jamúti giñe ugánu luáguti Wasálbaragüle Jesucrístu ñi.

Jachámuragun dübü luágu Páblo lídan fulásu le Lístra

⁸Ñiñein ában wügüri meíbugunti, Lístra, ñun líña ladüga ítaragubeiñein lan lumagiñe lagüriajoun, meíbugungubeíti. ⁹Lagáambajañein wügüri ligía le lariñagubei Páblo, láu larijin Páblo luágun, ába lasúbudiruni luágu afiñe lan wügüri ligía luágu gayára lan lareídagun. ¹⁰Ábati lariñagun Páblo lun láu umálali jéreti.

—Ráramabá luágu bugúdi.

Ába lachúbarun wügüri ligía arárama, ába lagúmeserun eíbuga. ¹¹Dan jaríjini gürígia cátei le ladügübei Páblo, ába jagúmeserun agúaraja lídan jerérun Licaóniana, jaríñaga.

—¡Rariña búngiugu quei jagáburi wügüriña wámoun!

¹²Jariñaga luágu Bernabé búngiu Júpiter, luágu Páblo búngiu Mercúrio, ladüga ligía lan adímurejabei. Nújein lúban jabúngiute Júpiter bougudiñoun luei ubúrugun, ¹³ába liábin lufádirin Júpiter ñigiñe barúina wügüriña bágasu lúma buri fulúri luágun lubéneri ubúrugun, busénti yebéti ligía jáma buri gürígia lun jáfaruniña bágasu jagía lun jadágaragüdün joun Páblo lúma Bernabé. ¹⁴Dan jasúbudiruni Páblo lúma Bernabé cátei lan jabúseerunbei gürígia ja jadügün, ába jajeíridagunun janáangun le luweírín lubéresen cátei le joun, ába jádaragun joungua jádoun gürígia agúarajeina.

¹⁵—¡Wügüriña! ¿cámesan jabúseera jadügüni cátei le? Wügüriña giñétia wagía quei jugúya, wayábiña aríñaga jun lun jígiruni cátei buri le mabuídunbei, lun jafálaruni Búngiu le wínwanbei, le adügübalin siélu lúma ubou, barána lúma sun cátei le lídaanbei. ¹⁶Lídan meja dan le sügüjalíbei, ígira lumútiña meja Búngiu gürígia lun jadügüni le jabúseerubei, ¹⁷láu sun, arúfuda láani joun gürígia cáteiñein lan láuja buídu le ladügübei joun. Rúti júya woun lúma alúbajani buíti, ru ligía eígini buídurügüti woun, belügüda lumúti ugúndani tídoun wanígi.

¹⁸Láu sun aríñaga jamáni Páblo lúma Bernabé sun cátei le joun, jénreengu mémegili jeréderuniña gürígia luei jáfaruniña bágasu jagía lun jadágaragüdün joun.

¹⁹Ábati jachülürün juríu Antioquíagiñe lúma Icóniogiñe, ába jagáñeiruni jaritagun gürígia lun jachámuragun dübü luágun Páblo. Lárigiñe, ába jadúruguduní bougudín luei fulásu, sun jariñagun luágu jíláali lan. ²⁰Dan le jagúriridágun afiñetiña láu Páblo, ába lásaarun, ábaya lebelurun fulásurugún. Larúgan, ligía lídin lúma Bernabé ubúrugun Dérbe.

²¹Lárigiñe lapúrichijaní ugánu luáguti Wasálbaragüle ñi Dérbe, le ñi jabei sarágu gürígia afiñerutiña luágu Jesucrístu, ába jagíríbudun, ába

jouúdin Lístra, Icónio lúma Antioquía. ²² Rútiña gurásu joun afiñetiña ja lídaanbaña buri fulásu ligía, aríñaga jagía joun lun jasígirun derégüdagu lídan jafiñen, aríñageina jagía joun luágu lúnti lan wasúfurirun sarágu lun gayára lan webélurun lídoun larúeijan Búngiu. ²³ Rútiña giñe ábutigu lídan cáda jadámurin afiñetiña. Lásunti jayúmuragun lúma jayúnarun, ába jedéregeruniña lábun laríajaan Búngiu le uágubei jafiñera.

Lagtribudun Páblo lúma Bernabé Antioquíoun

²⁴ Lárigiñe, ába jásügürün Pisídiagiñe, ába jachülürün Panfília. ²⁵ Ába japúrichijaní ugánu luáguti Jesucrístu ubúrugu Péрге, líbiri méme Panfília, ábati jouúdin Atálioun. ²⁶ Nígiñe jádina, ában jouúdin Antioquíoun, le fulásu le ñíjin lubei jóunajoúa lábugiñe laríajaan Búngiu adúgei wadágimanu le jagúmchubei guetó. ²⁷ Dan jachülürün Antioquía, ába jóúndaraguniña tánigu jalígilisin afiñetiña, ába jabájüdaguní sun cátei le ladügübei Búngiu jáu joun, lúma luágu lánjunrenchuní Búngiu béna joun ja mámabaña juríu lun giñe gayáraabei lan jafiñerun luágu Jesucrístu lun jasálbarun. ²⁸ Ába jeréderun Páblo lúma Bernabé sarágu dan jáma afiñetiña ñi.

15

Adámuridagúni Jerusalén

¹ Ligía jayábin wügüríña Judéagiñe lun Antioquíoun, ába jagúmeserun arúfudaja joun afiñetiña luágu lun lan jasálbarún, mósu lan jerésibiruni wügüríña circuncisión, quei laríñaguni lilúrudun Moisés. ² Barüti Páblo lúma Bernabé ában sigénei weíríti jáma luágu cátei ligía, lagúmujoún óra, ába loúnajoún Páblo, Bernabé, jámaya ámu wügüríña Jerusaléoun lun jouúdin aráanserei cátei le jáma apóstolugu jáma tábutigu ligílisi to ñíboun.

³ Ja tánigu ligílisi to Antioquíaboun oúnajabaliña, lídaanti jaweíyasun, ába jásügürün loúbawagugiñe Fenícia lúma Samária, abájüdagueina jagía luágu jígiruni ja mámabaña juríu binádu jafiñen lun jafálaruni Crístu. Ába jagúndaaragun sun afiñetiña láu ugánu le.

⁴ Dan jachülürünbei Páblo lúma Bernabé Jerusalén, ába jerésibiruniña tílana ligílisi, jáma apóstolugu, jáma tábutigu ligílisi, ába jabájüdagun Páblo lúma Bernabé joun luágu sun le adúga lálalibe Búngiu jádaangiñe. ⁵ Níñanu jádaangiñe jadámurin fariséogu ja afiñetiña luágu Crístu, ába jaráramun, ába jaríñagun.

—Lúnti jerésibiruni wügüríña afiñetiña ja mámabaña juríu circuncisión, lúnti giñe jagúnfulirun lúma lilúrudun Moisés.

⁶ Ábati jóúndaragun apóstolugu jáma tábutigu ligílisi lun jatúriajaní cátei le. ⁷ Lárigiñe sarágu dimúrei, ába lásaarun Pédro, ába laríñagun.

—Nidújeñu, subúdi jumúti luágu binárü lán meja lanúadirana Búngiu jídaangiñe lun níchuguni ugánu le lánina asálbaruni joun ja mámabaña juríu, lun giñe gayáraabei lan jafiñerun luágu Jesucrístu. ⁸ Búngiuti, le subúdiwabúbei tun anígi, arúfuda lumúti luágu resíbi láníña ja mámabaña juríu láu líchuguni Sífiri Sándu joun quei líchuguni woun. ⁹ Manügün lumútiwa Búngiu ámu jaweí, jarúmagüda lumútu giñe janígi láu jafiñen luágu Jesucrístu. ¹⁰ ¿Cáti uágu lalouguada jafiñen guetó luágu le adúga lálalibe Búngiu, ru jugúya ában ijürügu jawágun afiñetiña ja, le wásiñerubei wagía guánarügü anúga—ní wagía ní binádu wagübüriugu? ¹¹ Afiñetiwa luágu sálbaadiwa lan láurügü wafiñerun luágu Jesucrístu, madügünga wagía

ni ámu cátei lun wabíjini, sálbaadiwa láu lareíni Wabúreme Jesucrístu. Ítara méme líña giñe jasálbarun ja mámabaña juríu.

¹² Ábati jámanichúnga, ába jagáambuni sun le jaríñagubei Bernabé lúma Páblo joun luágu buri seíni lúma miláguru le ladügübei Búngiu jádaangiñe, jagánagua ja mámabaña juríu. ¹³ Dan le lásurun jadímurejan, ába laríñagun Jacóbo.

—Nidújeñu, agáamba jumána. ¹⁴ Abájüdaguaali Simón Pédro woun ida líña lan fuleísei lániña Búngiu ja mámabaña juríu, láu lanúadajan jádaangiñe lun lánigume. ¹⁵ Ítara líña cátei le quei lé meja jabürüjabei profétagu tídan Lerérun Búngiu.

¹⁶ Gumúguaali jarúeijan ladügawagun David, queísigubeirügü tagúmuchagun ában múna eíguadutu. Lachülürüba wéyu nun, áu le Búngiu, lúnyame naríjin jawágun ladügawagun David,

ábame níchuguni ubáfu lun ában jádaangiñe lun larúeijan jádan.

¹⁷ Nadügübei líra lun gayáraabei lan jayábin sun jíbiri gürígia lun jáluajanina queísi Jabúreme, lun jayábin sun ja mámabaña juríu nun, ja anúadaja náñabaña lun nánigume.

¹⁸ Ítara líña naríñagun, áu le Búngiu, le asúbudirágüdübalin cátei le lúmagiñe buga binádu dan.

¹⁹ ‘Ligía naríñagunbei luágu moun láni wíchugun sarágu lúrudu jawágun ja mámabaña juríu, ja ígirubalín binádu jafiñen lun jafálaruni Búngiu, ²⁰ buídurügüti láu labürüjoun joun lun jebé lan jeígin eígini le adágarawagüdüti joun sándu, madáagun jagíame cátei buri jáma ja úmatiña mamárieidun jamá, meígin jagíame jágürügü anímaalu ja tigíwarügütiña lugúndun máfuridunti játa jádaangiñe, meígin jagíame játa anímaalu. ²¹ Buíti lun jagúnfulirun lúma buri cátei le lun jíchugun inébesei joun juríu, ladüga lúmagiñe bugája binádu dan, añájein gürígia apúrichijati lilúrudun Moisés lídan ságü fulásu, aliijóuati lúrudu luágu tídan buri jalígilisin juríu ságü luwéyuri eméraguni.

²² Ábati jarítagun apóstolugu jáma tábutigu ligílisi jáma sun tílana ligílisi janúadajan wügüríña jádaangiñe, lun jóunajaniña Antioquía úara lúma Páblo lúma Bernabé. Ába janúadiruni Júdas, le giríbei Barsabási, lúma Sílas, bián wügüríña weírigutiña jádan afiñetiña. ²³ Ába jóunajan ában gárada jáma, laríñajare tídan gárada tugúya.

“Wagía le apóstolugu, tábutigu ligílisi, jáma sun jíbiri afiñetiña, mábuga wáña joun wadújeñu lueígiñe Jesucrístu ja mámabaña juríu ja aganoubaña Antioquía, Síria, lúma Cilícia. ²⁴ Agáambaadiwa luágu añájein lan gürígia ñüdüntiña yágiñe ibídiñoun woun ebéreseja jun láu jadímurejan, áni dájaña ámu arítaguni jídoun láu jaríñagun jun luágu mósu lan jerésibiruni wügüríña circuncisión, queísi laríñaguni lilúrudun Moisés. ²⁵ Ligía wúwaradúnbei lídan warítagun lun wanúadajan gürígia wádaangiñe lun jóudin aríjaün úara jáma wadújeñu Bernabé lúma Páblo ja jínsiñebaña woun sarágu, ²⁶ ja rújamaalíbei jabágari lídoun pelíguru lueígiñe Wabúreme Jesucrístu. ²⁷ Woúnajañanu lubeíti Júdas lúma Sílas jun, jadímurejaba júma lun jafúnraanguagüdüni sun cátei le tídaanbei gárada to woúnajaboun jun, jun. ²⁸ Maríbaanti laríjin lun Sífiri Sándu lúma woun, míchugúniwa lan ámu ijürügu jun lueídügüya murúsun cátei le, le lunbei jadügüni.

²⁹ lun meígin jumá úwi le jáni anímaalu ja adágarawagüdütiña joun sándu, meígin jugúyame jítaü, ni úwi le jáni anímaalu ja tigíwarügütiña, madáagun jugúyame cátei buri jama gürígia ja mamárieidúntiña júma. Ánjaün areídagua júngua lueí buri cátei le, buídubei jadüga. Buídu lámuga lídin jun.”

³⁰ Lárigiñeti jóúnajoún luágu jaweíyasun, ába jóúdin Antioquía. Dan le jachülürünbei ñi, ába jóúndaraguniña afíñetiña, ába jíchugunun gárada joun. ³¹ Dánti le jalíjanbarun afíñetiña, ába jagúndaarun sarágu luágu gurásu le tíchugubei joun. ³² Quei gíñeti gabáfu jamá Júdas lúma Sílas lun ladímurejan Búngiu jayúmulugugiñe, ába jíchugun gurásu joun afíñetiña láu jadímurejan joun, ru jagía idérebugu lun jafíñen. ³³ Lárigiñe jásügürün átiri dan ñi, ába jayoúragun afíñetiña joun lubá jagíribudun jámoun já meja oúnajabaliña Jerusalén. ³⁴ Ánjeinti Sílas, ába leréderun. ³⁵ Reídeitiña gíñe Páblo lúma Bernabé Antioquía, ába jasígirun arúfudajei lúma apúrichijeí ugánu luáguti Crístu, jagía jáma sarágu ámu.

Lagúmeseruni Páblo libíaman luweíyasun apúrichija

³⁶ Átiri dan lárigiñe, ába laríñagun Páblo lun Bernabé.

—Queímounya aríjaña afíñetiña lídan sun ubúru gu buri le ñí lubei apúrichija wamáali lan ugánu luágu Crístu, aríja wamámuga ída jáña lan.

³⁷ Busénti yebe Bernabé lanügüni Juan Márcos jámagua, ³⁸ májati Páblo janügüni ladüga meja ígira láaña lan Panfília, masigiti jáma lídan wadágimanu. ³⁹ Lárigiñe sarágu sigénei, múaradúntiña luágu cátei le darí lun jafánreinragun jawáriuagua. Ába lanügüni Bernabé Márcos, ába jóúdin Chípre, ⁴⁰ ába lanügüni Páblo Sílas. Lárigiñe jedéregeruni afíñetiña Páblo lúma Sílas lújaburugun Búngiu, ába jóúdin, ⁴¹ ába jásügürün Síriagiñe lúma Cilíciagiñe, íchaajeina gurásu joun afíñetiña ligílisirugu.

16

Lídin Timoteo úara jáma Páblo lúma Sílas

¹ Ába jachülürün Páblo lúma Sílas lídoun buri fulásu le Dérbe lúma Lístra, le ñí lubei jadárira ában afíñeti gíriri Timotéo, tiraü ában würi juríu afíñetu luágu Jesucrístu, güríegu lúguchi. ² Afíñetiña ja aganoúbaña Lístra lúma Icónio, buíti jadímurejan luágu. ³ Busénti Páblo lun lídiba lan Timotéo jáma, íchigeina ugánu luáguti Crístu, ába lerésibiruni Timotéo circuncisión lueí wuríba lan joun juríu ja aganoúbaña lídan buri fulásu ligía, quei subúdi jamáni luágu merésibirun láani circuncisión ladüga güríegu lan lúguchi. ⁴ Súnti fulásu le ñígiñe lumúti jásügüra, jasúbudirágüdüni cátei le jaríñagubei apóstolugu jáma tábutigu ligílisi ja Jerusalénbaña joun afíñetiña, ába jéredun jawágu lun jagúnfulirun lúma jagúmadin. ⁵ Ába lubeíti jedéraagüdüñ títana ligílisi lídan jafíñen, ába jagánwoundun afíñetiña ságü wéyu.

Lasáliragun ában wügüri Macedóniana lun Páblo

⁶ Májati Sífiri Sándu lun jíchugubei lan ugánu luágu Crístu Ásia. Ábati jásügürün labádinaguagiñe Fríjia luma Galácia, ⁷ ába jachülürün luágu fadáguaü le Mísia. Nígiñe yebe jarítaqua lun jebélurun loúbawagun Bitínia, májati láni Jesúsu Espíritu le méme Sífiri Sándu lun jadügüni. ⁸ Ábati jóúdin surúrugu Mísioun, ába jarárirun Tróas. ⁹ Ñi lasáliragua ában wügüri Macedóniana lun Páblo, árie bu, rára ayúmuragua lun, laríñaga

lun. “Queímoun Macedónia íderagua bámugawa.” ¹⁰ Lárigiñe lasálrangun wügüri ligía lun Páblo, ába waráansejan lun wóudin Macedónia láu wafiñen luágu lagúajaña lan Búngiu woun lun wíchuguni ugánu luágu Crístu le Wasálbaragúle joun Macedóniana.

Páblo lúma Sílas ubúruгу Filípos

¹¹ Ábati wáfayarun Tróasgiñe, ába wóudin sügülgü luágun ubóuju le Samotrácia, larúgan, ligía wachülürün Neápolis. ¹² Níigiñe ába wóudin Filípos, Filípos lábugiñeñein lagúmadijan Róma, ligía giñe ubúruгу le weírigutimáabei luágu louba Macedónia. Reídeitiwa átiri wéyu ñi. ¹³ Luágu ában wéyu le luwéyuri eméraaguni, ába wáfuridun bougudin lueí ubúruгу, lárún dúna, lídan ában fulásu le ñi lubeíja layúmurawagúa lun Búngiu. Ába wañúurun ñi, ába wíchuguni ugánu luáguti Crístu joun würiña ja oúndaragubáña ñi. ¹⁴ Níñoun ában jádaangiñe, gíritu Lídia, ubúruguna Tiatíra, tifísiute alúguraja gamísa finutu to gúchu tágu. Judúguatu würi tugúya lun Búngiu, tagáambajañádiwa, ába lánjunrenchunun Búngiu tanígi lun tadügün gásu láu le lariñagubei Páblo. ¹⁵ Ába tabásterun jáu sun tílana túban, lárigiñe, ába tayúmurangun woun ítara.

—Ánjein afiñe jubeí luágu afiñe nan le tímatimaati luágu Wabúreme Crístu, reídei jumá ya núbiñe.

Jéretu wawágu, ába weréderun.

¹⁶ Luágu ában dan, dan le wóudiña lan lídoun fulásu le ñi lubeíñaja layúmurawagúa lun Búngiu, ába wadúnragun túma ában irájü gawágutu ában espíritu wuríbati le íchugubei ubáfu tun lun tasábiujan. Ában idámuni irájü tugúya, íbijatutíja sarágu seínsu joun tabúriña láu tasábiujan. ¹⁷ Ába tagúmeserun irájü to afálarawa, wagía lúma Páblo, agúarajeina tugúya ítara.

—Gürígia ja, jesériwiduña lun Búngiu le íñubei, jadímurejaña luágu úma lánina asálbaruni lídaangiñe figou jun.

¹⁸ Gíbeti wéyu táu adúgei cátei le darí lun tebéresedun lun Páblo, ába lagárarangun, ába lariñagun lun espíritu le tídaanbei.

—Lídan líri Jesucrístu, gumádi numútibu lun báfuridun tídaangiñe.

Ába láfuridun espíritu ligía tídaangiñe lídan méme óra ligía.

¹⁹ Dan le jaríjin tabúriña luágu siñáali lan jagáñeirun seínsu tueígiñe, ába jarügüdüni Páblo lúma Sílas, ába janügüniña jagíbugiñoún ábutigu lamídaangua ubúruгу. ²⁰ Ába jarúfuduniña jagíbugiñe gumádimatiña, ába jariñagun.

—Wügüriña juríu ja, jachágaraguñein wabúrugute, ²¹ jarúfudajaña igáburi le wásiñerubei erésibira ni adúga ladúga Rómana wagía.

²² Ábati jíñúragun güri-gia jóungua jawágu, ába jarágachaguágüdüniña gumádimatiña, ába jíchugun dímu-rei lun jabeichúniwa láu wéwe. ²³ Lárigiñe sarágu abeichúni, ába jádaruniña furísunrugún, ába jariñagun lun oúnigiruti adaürütiña lun goúnigi láníña buídu. ²⁴ Dan libíjini oúnigiruti lúruđu le, ába ládaruniña lídoun lagúmujoún tarígeirugu furísun, ába legélenchuni jagúdi.

²⁵ Queí buri luágun amídi áriebe, ñíñanu Páblo lúma Sílas ayúmuragua lúma erémuja urému lun Búngiu, ja jíbiri, agáambaja. ²⁶ Sódini, ába líabin ában oúnwenbun jarabaganáli, ába lánjingichuni tuágaburi furísun. Lídan óra ligía, ába lánjunrenchun sun béna, safá ligía sun güri-güri le jawágubei adaürütiña. ²⁷ Ába lagágudun oúnigiruti, dan laríjin luágu júnren líña lan sun tubéneri furísun, ába laságarunun lefeínte lún yebe láfarangun lúngua, sún

yebe lariñagun luágu ñüdüngua jamá adaürütiña. ²⁸ Ába lagúaragun Páblo lun.

—Máfaraguabá búngua, awánja ya sun wagía.

²⁹ Ábati lamúriajan oúnigiruti lámpu, ába lebélorun eíbaagueina, adádagareina láu anúfudei, ába láguragun lúngua lubádu jagúdi Páblo lúma Sílas. ³⁰ Ába laságaruniña furísunrugugiñe, ába lariñagun joun.

—Wügüriña, ¿ca cátei lúnbei nadügüni lun nasálbarun?

³¹ Ába jariñagun lun.

—Affñebá luágu Wabúreme Jesucrístu, ábame basálbarun jáu sun tílana búban.

³² Ába jíchuguni ugánu luáguti Crístu lun jáu sun ja lúbiñebaña. ³³ Lídan méme óra ligía, láu sun áriebujali lan buídu, ába lachíbuni bíti buri le jawágubei, ábati labásterun jáu sun lufámilian. ³⁴ Lárigiñe, ába lanügüniña lúbiñoun, ába líchugun eígini joun, ¡máti lugúndan jáu sun lufámilian láu jaffñerun luágu Búngiu!

³⁵ Larúgan bináafin, ába jóunajan gumádimatiña polisía aríñaga lun oúnigiruti lun lígiragüdüniña Páblo lúma Sílas. ³⁶ Ábati lariñagun oúnigiruti lun Páblo.

—Oúnajaaña gumádimatiña aríñaga nun lun nígiragüdüñun, gayáraajali lubeíti jídin darángilañu.

³⁷ Ába lariñagun Páblo joun polisía.

—Láu sun Rómána wamá, beíjamutiwa jagíbugiñe güriégia, míchigunga dan woun lun wadímurejan waweígíñegua, dágua jamáwa furísunrugun, ¿guetó buséntiña jígiragüdüniwa arámudaguárügü? ¡Máfuridunbadiwa! Núbin jamá aságarawa.

³⁸ Ába jabájüdaguni polisía cátei le joun gumádimatiña, ába janúfudedagún gumádimatiña dan le jasúbudiruni luágu Rómána jamá Páblo lúma Sílas. ³⁹ Ábati jóudin amúriaja ferúdu jama, ába jaságaruniña, ába jayúmuragun joun lun jáfuridun ñígiñe ubúrugugiñe. ⁴⁰ Dan le jáfuridunbei furísunrugugiñe, ába jóudin túbiñe Lídia, lárigiñe jaríjiniña afñetiña lúma jíchugun idérebugu joun, ába jaságiruni jaweíyasun.

17

Chagáquaü ubúrgu Tesalónica

¹ Lídan jaweíyasun Páblo lúma Sílas, sügütiña Anfípolisgiñe lúma Apolóniagiñe, ñígiñe, ába jachülürün ubúrugun Tesalónica le ñí tubei ában jalígilisin juríu. ² Quei léchun Páblo, ñüdünti tidan ligílisi tugúya, adímurejati jáma ürüwa dimáasu, ságü luwéyuri eméraaguni. ³ Arúfudajati joun quei taríñaguni Lerérun Búngiu luágu lúnti lán meja lasúfurirun Crístu, lárigiñeme lan louñwen, aba lánme lásaarun lídaangiñe ouweni lúnya labágaridun. Lariñaga buri joun.

—Jesúsu méme le uágubei nadímureja jun, ligía Crístubei le lúnbei liábin asálbaraña güriégia.

⁴ Ábati jaffñerun jádaangiñe juríu, ába júaradun lúma Páblo lúma Sílas. Afñetiña gíñe sarágu ja mámabaña juríu ja judúguatiña lun Búngiu, jáma sarágu würiña weirigutiña. ⁵ Juríu ja mafñebaña luágu Jesúsu lan Crístubei le lunbei liábin, magúndaantiña láu cátei le, ába jóundaragun wügüriña wuríbatiña ja eíbugañajádügübaña úmada, ába jachágaraguágüdüniña güriégia ñi ubúrgu. Ába jaságarajanun lúban Jasón, áluajaña Páblo lúma Sílas

lun jaságaruniña lun jedéreguniña jájaburugún gürígia. ⁶ Queíti madári jamániña ñi, ába janügüni Jásón jáma átiri jádaangiñe afiñetiña jagíbugiñoún gumádimañiña lídan ubúru gu ligía, ába jagáragun aríñaga.

—Wügüríña ja, ja ebéresejabaña lídan sun fulásu, chülújaña giñe ñájoun, ⁷ resibi láaña Jáson lúbiñe. Sun jagía dūrügua jamúti lilúrudun Urúei César, ladüga aríñagatiña luágu níjein lan ámu urúei, ában nege gíriti Jesús.

⁸ Dan jagáambuni gumádimañiña jáma sun jíbiri gürígia cátei le, ába jacháragun. ⁹ Jáson jáma ja jíbiri, ába jafáyeijan, ába jígirawagüdüniwa.

Páblo lúma Sílas ubúru gu Beréa

¹⁰ Furése furése, dan le labúrigadun, ába jóunajaniña afiñetiña Páblo lúma Sílas ubúrugun Beréa. Quei jachülürün ñi, ába jóudin tídoun jalígílisin juríu. ¹¹ Juríu ja ñibaña, buítimaati jagáburi jawei ja Tesalónicabaña, resibi jamúti ugánu luáguti Crístu láu ugúndani, ságüti wéyu jalíjanun Lerérun Búngiu lun jaríjini ánjein inárüni lubei le aríñawagübei joun. ¹² Sarágu jáña lubeiti afiñerutiña jádaangiñe, afiñe jagía giñe sarágu ja mámabaña juríu, dándu wúríña weirigutiña quei wügüríña. ¹³ Dan le jasúbudirunbalin juríu ja Tesalónicabaña luágu lapúríchijañein lan giñe Páblo Lerérun Búngiu Beréa, ába joudin acháraguagüdaña gürígia ñi. ¹⁴ Ába jóunajani afiñetiña Páblo furése lun lídin lacóstoun, leréderame Sílas lúma Timotéo Beréa. ¹⁵ Ja ñüdünbaña láu Páblo, ába jáfayajan lúma chülú ubúru gu Aténas. Lárigiñe, ába jagíribudun barüina jagía dí múrei lun Sílas lúma Timotéo lun jóudin lárigi Páblo lídan lufúresen.

Páblo ubúru gu Aténas

¹⁶ Sun niján lan Páblo Aténas agúrabajei Sílas lúma Timotéo, medéraaguagüdünti larítangun láu laríjini ubúru gu ligía buin jáu bürübün sándu. ¹⁷ Ligíaja ladímurejaanbei tídan jalígílisin juríu lúma jáma ja mámabaña juríu ja ájuduragubaña lun Búngiu, adímureja ligía buri ságü wéyu jáma gürígia ja úmadarugubaña, ní lubei jadámuridagua. ¹⁸ Ñíñanu jádaangiñe wügüríña ja atúríajabalin jarúfudajan epicúreogu, jáma ja atúríajabalin jarúfudajan estóicogu, ába jadímurejan lúma. Jaríñaga jíbiri.

—¿Cáfunasan laríñagubei wügüri le woun, líbebei ladímurejan?

Jaríñaga jíbiri.

—Camátia ladímurejaña jawágu ámu búngiugu.

Jaríñagunbeiti ítara ladüga lapúríchijan Páblo joun luágu Jesús lúma luágu ásaaruni lídaangiñe ouweni. ¹⁹ Ábati janügüni lídoun ában fulásu gíriti Areópago, le ñi lubeija jóúndaragua lun jagáambagun jóúngua, ába jaríñagun lun.

—¿Gayáraati wasúbudiruni cátei lan iséri cátei le barúfudajabei? ²⁰ Cátei lé buri baríñagubei woun, terénchati woun, buséntiwati wasúbudiruni ca lan laníchigubei.

²¹ Sun Aténasna, jáma teréncha ja aganoúbaña ñi, marítaguntiña luágu ámu cátei lueidügüya luágu jaríñagun lúma jagáambun cátei iséri.

²² Ábati laráramun Páblo jamídaangua ñi Areópago, ába laríñagun.

—Wügüríña Aténasna, aríja numúti luágu afiñe jumá jawágu jisándun, ²³ ladüga dan le aríaaejane nubálin fulásu buri le ní lubei jájuduragua joun jisándun, darítina ában latárú le ní lubei bürüwañu lan dí múrei le. “Lun Búngiu le ibidíñewabei”. Búngiu le, le únbei jájuduragua, le ibidíñebei jun, ligía Búngiu le uágubei nadímureja jun.

²⁴ ‘Ligía Búngiu le adügübalin ubouú lúma sun cátei le ubouúagubei, ligía labúremebei siélu luma ubouú. Maganoúnti tídan ligílisi to jadüga güriúgia, ²⁵ memégeirun lumúti giñe le gayáraabei jadügüni güriúgia luágu lufúleisein, ligía guéanarügü íchugubei íbágari lúma garábali, lúma sun cátei woun, sun wagía.

²⁶ ‘Lídaangiñe ábanrügü wügüri ladügaña sun néchaanigu lun jaganouñ lídan sun fulásu, aráanseleí dan le lúnbei jabágariduni lúma fulásu le lúnbei ñíba lan jagánawa. ²⁷ Adüga lumúti Búngiu sun líra lun gayáraabei lan jáluajani güriúgia, gayára lámuga jadáriruni láu jáluajani, láu sun inárüni lan luágu madíse lan Búngiu luei cáda ában wádaangiñe. ²⁸ Ladüga lídaangiñeti Búngiu awánjein lubeí, gabágari wagía, eíbuga wagía ligíbuagu ubouú le, quei jaríñaguni poétagu jídaangiñe. “Lirájüñü Búngiu wagía.” ²⁹ Queíti lirájüñü wabeí Búngiu, moún lumuti wanügüni Búngiu quei ában sándu le gólu, o pláta o dübü le jadüga wügüriña quei jarítangun luágu ítara líña lan Búngiu. ³⁰ Mebéresegúnti méja Búngiu láu cátei le jadügübei güriúgia lábugiñe libídiñe joun, ánjein guetó, aríñagati joun sun güriúgia lídan sun fulásu lun jasáansiruni jouuserun. ³¹ Ladüga anúadajaali Búngiu ában wéyu lun ligíaba lan wéyu lagúseragüdüniña güriúgia ja ubouúagubaña láu ísuruni láu ában wügüri le anúadaja láalibeí, wügüri ligía, ligía Jesucristubei, arúfuda lumúti woun láu lásaaragüdüni Jesúsu lídaangiñe ouweni lúnya labágaridun.

³² Dan le jagáambubei luágu ásaaruni lídaangiñe ouweni, ñíñanu jádaangiñe, ába jéjerajan láu, jíbiri ába jaríñagun.

—Lídaanbagúbei ámu dan wagáambeí badímurejan luágu buri cátei le.

³³ Ábati lígiruniña Páblo. ³⁴ Ába jafíñerun jádaangiñe luágu Jesucristu, ába jafálaruni. Ñíñein Dionísio jádan, lé meja ában jádaangiñe ábutigu lídan fulásu le giríbeí Areópago, túma giñe ában würi gírítu Dámaris, jámaya ámu güriúgia.

18

Páblo ubúruyu Corínto

¹ Lárigiñe cátei le, ába láfuridun Páblo Aténasgiñe, ába lídin ubúruyu Corínto. ² Ñi ladárra ában juríu gírítu Aquíla, túma lúmari to giríboun Priscíla, Póntona jagía. Málügili lueigiñe jayábin Itáliagiñe, jayábinbeí ñígiñe ladüga líchugun urúei Cláudio dimúrei lun jáfuridun sun juríu Rómagiñe. Ába lídin Páblo aríjaña, ³ queíti ában lan lifísiute jáma—tadáawagun quiámpu—ába leréderun jáma lun jawádigimaridun lídan ában. ⁴ Ságüti wéyu le lidáani eméraaguni, lídin Páblo tídan jalígílisin juríu adímureja, áni gáñei láaña buri dándu juríu quei ja mámabaña juríu lun jafíñerun luágu Jesucristu.

⁵ Dan jachúlürün Sílas lúma Timotéo Macedóniagiñe, ába líchaagun Páblo lúngua le gumúti apúrichijeí Lerérun Búngiu. Aríñagati joun juríu furáangu luágu Jesúsu lan Crístubei le jagúrabajabei lun lasálbaruniña lídaangiñe jafígoun. ⁶ Ánjaña juríu, ába jasígeneruni le lubeíbeí, anábagua buri jameí. Ábati láfuridun Páblo labíte jawágun, arúfudei joun luágu mínsiñe lan jagáburi lun, ába laríñagun joun.

—Ánjañme eféridira jídaangiñe, mámaalime nídaangiñeti. Lúmagiñe guetó, neíbuga apúrichija joun ja mámabaña juríu.

⁷ Ába láfuridun tídaangiñe jalígílisin juríu, ába lídin lúbíñoun ában wügüri gírítu Jústo, wügüri ligía, judúguati lun Búngiu, ñi toubagiñe ligílisi lagánawa.

⁸ Críspo, le tábuti jalígílisin juríu, ába lafiñerun luágu Wabúreme Jesucrístu, jáu sun tílana lúban. Sarágu gíñe jádaangiñe Coríntona, dan jagáambunbalin ugánu luáguti Jesúsu, ába jafiñerun, ába jabásterún. ⁹ Ábati lasáliragun Wabúreme Jesúsu lun Páblo luágu ában áriebu, ába laríñagun lun.

—Manúfudebá, bapúrichija méme, mámanichabá, ¹⁰ladüga anájein búma, úabei ni ában agúruruti buágu lun ladügün wuríbani bun. Añájein sarágu gürígia lídan ubúruge le ja lúnbaña nánigubaña lan.

¹¹ Reídeiti lubeíti Páblo ában irúmu dimí ñi Corínto arúfudajei Lerérun Búngiu joun lílana fulásu.

¹² Lídan dan le Galión lan gumándanbei Acáya, ába jóundaragun juríu lun járügüdüni Páblo. Ába janügüni ligíbugiñoun lúru du lun lagúserawagüdün.

¹³ Ába jaríñagun lun gumándan.

—Wügüri le, leréde arúfudaja joun gürígia lun jájuduragun lun Búngiu láu ában igáburi le múaraanbei lúma lúru du.

¹⁴ Dán yebe ladímureja lan Páblo, ligía laríñagun Galión joun juríu.

—Lun jamúga ában lan wuríbani o dúru jürüti ladügübei wügüri le, níchaaguña jamúga núngua lun nagáambunün, jugúya juríu, ¹⁵ quei luágu lan dimúrei buri, lúma íri, lúma jilúrudun, aráanse jumei júngua, ladüga mabúseeruntina nagúseragüdün luágu buri cátei le.

¹⁶ Ába labúgaguniña ñígiñe. ¹⁷ Ábati járügüdüni sun güríégugu Sóstenes le tábuti jalígílisin juríu, ába jabúleiseiruni ñi guánarügü ligíbugiñe gumándan. Meberesejúnti Galión láu líra.

Lagribudun Páblo Antioquíoun, lagúmeseruni lürüwan luweíyasun apúrichija

¹⁸ Lárigiñe líra, ába leréderun Páblo átiri dan ñi Corínto. Lárigiñe, ába layoúragun joun afíñetiña, ába lídin Síria úara túma Priscíla lúma Aquíla. Ába lásaruni lídiburi lídan ubúruge Céncrea lubáragiñe ladinun, lun lagúnfulirun láu ában méja darádu le ladügübei lúma Búngiu. ¹⁹ Dan le jachülürün ubúruge Éfeso, ába lígiruniña Páblo Priscíla lúma Aquíla lun jeréderun ñi lídan ubúruge ligía. Lubáragiñe lígiruni Páblo Éfeso, ába lídin ligílisirugu adímureja jáma juríu. ²⁰ Ába jamúriañan lúma lun leréderun méme ñi jáma, májati. ²¹ Ábati layoúragun joun, laríñaga joun.

—Mósu ñi nan Jerusalén lubá fédu le lúnbei ladügün, nagribudayaba aríjaün ánjein busén Búngiu.

Ába ladinun, ába lídin Éfesogiñe. ²² Túrüti Cesaréa, ñígiñe ába lídin Jerusalén abúsura joun tílana ligílisi, lárigiñe, ába larágachun Antioquíoun. ²³ Lárigiñe lásügürün átiri dan ñi, ábaya láfuridun, ába leíbuguni sun fulásu Galácia lúma Fríjia ában ában, íchaajeina dügüdaguau joun afíñetiña.

Lapúrichijan Apólos ubúruge Éfeso

²⁴ Lídan dan ligía, ába lachülürün ában juríu gíriti Apólos ubúrugun Éfeso, Alejandríana juríu ligía. Gapúrichijati, áni subúdi lumúti gíñe Lerérun Búngiu buídu buídu. ²⁵ Subúditi luáguti Asálbaragülei le lúnbei líabin lun, áni apúrichijati luágu Asálbaragülei ligía táu sun tarúman lanígi. Sun le larúfudajabei luágu Jesúsu, inárüni, láu sun lougua lan lasúbudirun luágu, le rügüñein larúfudajabei Juan le abásteragüdajabei luágu Jesúsu le lúnbei líabin lárigiñe, lasúbudira. ²⁶ Luágu ában wéyu, dan le ladímurejañan lan Apólos tídan jalígílisin juríu láu sarágu ichoúrni, ába jagáambuni Priscíla lúma Aquíla. Dan lagúmuchun lapúrichijan, ába

janügüni Priscíla luma Aquíla jábiñoun lun jafúnraanguagüdünitima luáguti Jesúsu le Wasálbaragülebei lun, luma luáguti cátei le larúfudajabei. ²⁷ Dánti le labúseerunbei Apólos lídin loúbawagun Acáya, lúmagiñeñanu afiñetiña Éfeso lun lídin, ába jóunajan ában gárada joun afiñetiña ja ñibaña Acáya lun jerésibiruni buídu. Dan lachülürünbei Apólos Acáya, íderagua lumútiña ja lafiñeragüdúbaña Búngiu luágu Jesúsu, láu lareíni, ²⁸ arúfuda lumúti joun güriña láu richaü le siña jamuti asígena, luágu marícha lan le jarúfudajabei juríu, arúfudalei joun tídaangiñe Lerérun Búngiu luágu Jesúsu lan Crístu le jagúrabubei lun lasálbaruniña.

19

Páblo ubúругu Éfeso

¹ Sun niján lan Apólos ubúругu Corínto, ligía lásügürün Páblo labádinaguagiñe buri fulásu, ába lachülürün Éfesoun ñi lubei ladáriba sarágu afiñetiña. ² Ába laríñagun joun.

—¿Resíbi jumútisan Sífiri Sándu dan le jafiñerunbei luágu Jesucrístu?

Jaríñaga lun.

—Uá, magáambungubeígidiwa yebe luágu níjein lan Sífiri Sándu.

³ Ábati laríñagun joun.

—¿Cáti luwúyeri badísei jerésibirubei?

Jaríñaga lun.

—Le labásterágüdün Juan.

⁴ Laríñaga Páblo joun.

—Labásterágüdüniña méja Juan güriña, arúfudei luágu sáansi jamáli lan jóuserun, aríñagati giñe joun luágu lúnti lan jafiñerun luágu le lúnbei liábin lárigiñe—luágu Jesúsu le Crístubei, le Jasálbaragüle.

⁵ Dan jagáambuni cátei le, ába jabásterun lídan líri Wabúreme Jesúsu.

⁶ Dánti le líchugunbalin Páblo lújabu jawágu, ába liábin Sífiri Sándu jawágun, ában jadímurejan dimúrei buri teréncha, ába buri ladímurejan Búngiu jayúmulugugiñe. ⁷ Jawáraañanu dúusu wügüríña jádan súngubei.

⁸ Ürüwañein játi láu Páblo abásija tídoun jalígílin juríu le ñi lubeíja lapúrichija, adímureja ligíaja furáangu luágu larúeijan Búngiu, afiñegüda láña güriña luágu. ⁹ Ñiñanu giñe, edéreragüdütu janígi, májatiña jafiñerun, adímurejarügü jagía wuríba luágu lémeri Crístu jagíbugiñe güriña. Ábati ladíreirun Páblo jawei, ába lanügüniña ja afiñebaña luágu Jesucrístu tídoun ában lescuéla to ñi lubei larúfudaja ában wügüri gíriti Tiránno, ábaja ladímurejan ságü wéyu joun, ñi. ¹⁰ Ítara líña lasígírun luágu bián irúmu, súnti ja aganóubaña loúbawagu Ásia, agáamba jamúti ugánu luáguti Wabúreme Jesúsu, dándu juríu quei ja mámabaña juríu. ¹¹ Adügati buríti Búngiu oúnwenbun buri miláguru lídaangiñe Páblo, ¹² darí lun tánügüniwa buri músue o anáanguni to dagáaru luágu lúra joun sánditiña, ábaja jareídagun, furí jagíaja espíritugu wuríbatiña jádaangiñe.

¹³ Ñiñanu juríu eíbugañajádügütiña, aságajatiña giñe espíritugu wuríbatiña jawei güriña, álugatiña yebe jayúsuruní líri Wabúreme Jesúsu lun jaságajaniña, jaríñaga buri joun espíritugu.

—Gumádi numútiibu lídan líri Jesúsu, le uágubei lapúrichija Páblo, lun báfuridun.

¹⁴ Ñiñanu sédü lirájüñü ában juríu gíriti Escéva, jábuti méja fádirigu, jádan ja adügübalin buri cátei le. ¹⁵ Níjein ában jadügüni, ába louñabuniña espíritu wuríbatí ligía.

—Subúdi numúti Jesúsu, subúdití gíñe nun cátei lan Páblobei, ánjein jugúya, ¿cátaün?

¹⁶ Ába lachüragun wügüri le láubei espíritu wuríbatí lúngua jawágun, gabáfuti sügü jáu súngubei, ába labúleiseiruniña buídu, ába jeíbaagun ñígíñe surúsu lúma láu buri bíti jawágu. ¹⁷ Agáamba jamúti sun ja aganoúbaña Éfeso cátei le, juríu jáma máma juríu, ába janúfudedagun, weírítí linébedun líri Wabúreme Jesúsu joun.

¹⁸ Sarágu gíñe buri jádaangiñe ja afíñerubaña, ába jayábin agúfeserei buri cátei wuríbatí lé meja jadügübei, ¹⁹ sarágu gíñe buri jádaangiñe já meja gabíñarajadibaña, ába janügünun jalíburun buri, ába jágudunun jagíbugiñe súngubei. Dan jabájüdübalin tebégi líburu buri tugúya, gebégitu quei buri dimí-san mílu murúsun seínsu le pláta. ²⁰ Ítara líña abúruchagueína lan ugánu luáguti Jesúsu, arúfudeinaleí lubáfu lun lasáansiragüdüni jagáburi gürígia.

²¹ Lárígíñe sun cátei le, ába laráanserun Páblo lun lídin aríjaña afíñetiña Macedónia luma Acáya, lubá lasígiruni luweiyasun Jerusaléoun. Aríñagati gíñe luágu lárígíñe lanme lídin Jerusalén, lídiba lan gíñe Róma. ²² Ábati louñajan bíama jádaangiñe ja nderagubalin lubá, Macedónia, wügüriña jagía, Timotéo luma Erásto, ligía, ába leréderun átiriraüya dan Ásia.

Chagáguai ubúru gu Éfeso

²³ Lídan dan ligía, ñíñein ában oúnwenbun achágaraguní Éfeso jaweígíñeti ja afálarubalin lémeri Crístu, ²⁴ lídaangiñeti ában wügüri gíriti Demétrio, ladáawagun cátei láuti pláta lífisiutebei. Wügüri ligía, adaaguati tirájüñü ligílisi láu pláta to tilígílin sándu to giríboun Diána, belútíti sarágu seínsu joun ja ñadágimeinbaña lúma. ²⁵ Ábati louñdaruniña ja ñadágimeinbaña lúma úara jáma ámu ja ñadágimeintiña ámu físiu le lenége jafísiute, ába laríñagun joun.

—Wügüriña, subúdi jumúti luágu ñulú lan wabágari láu físiu le, ²⁶ agáamba jumáli, aríja jumeí ída líña lan lídin Páblo aríñaga luágu máma jamá búngiugu sándu ja jadügübaña wügüriña, áni gíbeeña gürígia jafíñeragüdün, mámarügü ya Éfeso, lídan gíñe líbe-ágei Ásia. ²⁷ Ñónguati cátei le, ladüga gayáraabei weféridiruni wabísinisin, gayáraabei gíñe teféridiruni tilígílin búngiu Diána tuweírigun, ábame tanügün búngiu Diána to únoun jájuduragua sun gürígia Ásia lúma lídan sun ubou quei ní cáta.

²⁸ Dan le jagáambunbalin cátei le, ába jagáñidun buídu, ába jagúaragun.

—¡Weírigutu Diána to jabúngiute Éfesona!

²⁹ Ñíñeinti ában oúnwenbun achágaraguní lídan sun ubúru gu ligía. Ába járügdüni Gáyo lúma Aristarco, bíama wügüriña Macedóniana ja úarabaña lúma Páblo, ába jadúruguduniña chülü tuágun múna to ñi lubeíja jóundaragua. ³⁰ Álugatí yebe Páblo lebélorun lun ladímurejan joun gürígia ñi lun ladílirun sun cátei, mígirun jamúti afíñetiña lun lebélorun. ³¹ Ñiñanu gíñe jádaangiñe ábutigu ñi Ásia lumádagu Páblo, oúnajatiña gíñe dimúrei lun lun mebélorun lan ñíjin. ³² Ñíti lídan adámurini, jíbiri agúaragua ában cátei, jíbiri agúaragua ámu, ladüga chagágujaña gürígia, jibe-ágei, íbídiñeti

joun ca lan lébubei jadámuridagun. ³³ Níñanu jádaangiñe gürígia, ába jafúnraanguágüdüni cátei le lun Alejandro, le jádajabei juríu ligíbugiñoún guríriguaü lun ladímurejan luágu jafúleisein. Ába ladügün Alejandro seini láu lújabu lun jámanichun, lun ladímurejan luágu jafúleisein jagíbugiñe gürígia. ³⁴ Dan jasúbudirunbalin luágu juríu lan, ába jagúarajan sun jagía lídan ában, yaráfa lun bián óra.

—¡Weírígutu Diána to jabúngiute Éfesona!

³⁵ Dánti le gálumagüda láaña abürüjati le láni ubúrugú ligía gürígia, ába laríñagun.

—Gürígia Éfesona, sun gürígia subúdi jamúti luágu Éfesona lan oúnigrubárun tilígilisin búngiu Diána, túma tiyáwa to áburujaboun siélugiñe. ³⁶ Quei úa lan ní ában lun lasígeneruni cátei le, gáluma jumá, madüga jumá ní cáta masáminarunga jumei buídu. ³⁷ Wügüríña ja, ja janügübaña ñájoun, míwerujan jamágiru jilígilisin, madímurejan jagía wuríbati tuágu jubúngiute. ³⁸ Ánjein níjein lubei cátei uáguti labúseera Demétrio jáma ja ñadágimeinbaña lúma líchugun jadúnrun, ligía níjein lubei agúseragüdüti lúma agúseragülei, gayáraati jídin ligíbugiñoún lúruudu lun ladímurejan cáda ában lueígiñegua. ³⁹ Ánjein ámu lubei cátei jamúriajabei, lúnti laráanserún lídan ában adámurini le richáti, ⁴⁰ ladüga gayáraabei laríñawagúniwa luágu wagúbujaña lan wuríbani ladüga cátei le asúseredubei ugúñe, ibídiñebei woun cába lan woúnabagüle ánjawa álügüdüwa luágu chagáguau le.

⁴¹ Lárigiñe laríñaguni cátei le, ába lagúmuchaguagüdüni adámuridaguni.

20

Luweíyasun Páblo Macedónioun lúma Grécioun

¹ Dan le lagúmuchunbei chagáguau Éfeso, ába loúnajan Páblo jawágu afíñetiña lun jayábin lun, gayára lámuga líchugun gurásu joun, ábati loúburuniña, ába layóuragun joun, ába lídin Macedónioun. ² Luágu luweíyasun, chülügueina líña jámagiñe afíñetiña lídan buri fulásu le ídaangiñebei lásügúra, ru ligía sarágu dügüdaguau joun láu lerérun. Ítara líña lachülürün lídoun ageíraü le Grécia. ³ Reídeiti ürüwa játi ñi Grécia, ládina yebe ugúnein lun lídin Síria, ligía lagáambun luágu jelédeguña lan juríu lubá. Ábagubeíti laráanserun lun lagíribudun múarugugíñe, sügüina ligíaya Macedóniagiñe. ⁴ Gíbetiña wügüríña ñüdüntiña úara lúma. Sópater, le liraü Pyrrhus, Beréagiñe, Aristárco lúma Segúndo, Tesalónicagiñe, Gáyo, Dérbeigiñe, Timotéo giñe, lúma giñe Tíquico lúma Trófimo, Ásiana. ⁵ Afíñetiña ja, ába jóudin wabá, ába jagúrabuníwa ubúrugú Tróas. ⁶ Wagía, lárigiñe fédu le teígín fein to magánaboun isi, ába wáfuridun Filípogíñe tidan ugúnein, seíngü wéyu lárigiñe, ligía wátürün Tróas, le ñi lubei wúwarada jáma ja ñüdünbána wabáragiñe, ába weréderun ñi sédü wéyu.

Bisída láni Páblo ubúrugú Tróas

⁷ Samúdi güñoun, ába jóúndaragun afíñetiña lun jeígin fein le jarítaguagüle luágu loúnwen Crísto, Páblo arúfudajabei joun. Queíti gaweíyasúnbei lan larúgan, ába lasígirun adímureja joun darí lúmoun amídi áriebe. ⁸ Íññanu lídan lürüwan túbanana múna to ñi lubei jóúndaragua, ñiñein sarágu lámpu durúngu. ⁹ Níñein ában irájü agáambaja, ñun líña luágu funédere, Eútico líribei. Queíti lílúbei lapúríchijan Páblo áriebe ligía, ába ladábudun lágu irájü ligía, ába larúmugun ñi, ába leíguadun lídaangiñe lürüwan túbanana múna,

múarugun. Dan le jarárirunbei lun jiñúraguni, jiláali. ¹⁰ Ábati larárirun Páblo, ába laróunrun ligíbuagu irájü ligía, ába loúburuni. Ába laríñagun joun afiñetiña.

—Madíjeri jumá, gabágariyaali.

¹¹ Ábayati lawárirun Páblo, ába jafánreinragunun fein, ába jeígin. Ábati lasígirun adímureja darí larúgadun, ligíaali lídin. ¹² Irájüti buga ligía, ába janüğüni ágyu winwañu, sun jagía láu ugúndani láu.

Weíyaasu lúmagiñe Tróasgiñe lun Milétoun

¹³ Ába giñe wóudin, ába wádinun tídon ugúnein, ába wóudin chülü Asón, le ñi lubei lúnti lan wabúduni Páblo quei wadáradun, ladüga busén lan lídin Asón múarugugiñe. ¹⁴ Dan le wadúnragun lúma ñi Asón, ába ládinun wáma, ába wóudin Mitiléne. ¹⁵ Larúgan, ába wáfuridun ñigiñe, sügüna wagía ligíbugiñe ubóju Quío, ában wéyu lárigiñe, ligía wachülürün ubóju Sámos. Ába weméraagun ubúrgu Trojílio, larúgan, ligía wachülürün ubúrgu Miléto. ¹⁶ Mátürüntiwa ubúrgu Éfeso luágu waweyiasun ladüga mabúseerun lan Páblo leréderun sarágu dan ageiráü Ásia, busénti lachülürün Jerusalén furése lun ñi lan lubá fédu le Pentecostés ánjein gayára.

Lapúrichijan Páblo joun tábutigu ligílisi, Éfeso

¹⁷ Dánti le Milétojadiwa, ába loúnajan Páblo jawágu tábutigu ligílisi Éfeso lun jayábin Miléto aríjei, ¹⁸ dan le jachülürünbei, ába laríñagun joun.

—Subúdi jumúti ída líña lan nigáburi lúmagiñe furúmiñeti wéyu nachülürün Ásioun. ¹⁹ Sun dan le jagánaguañadina lubei, seríwitina lun Búngiu láu únabuni, láu sarágu águiraü, súfuri áu sarágu láu cátei lé buri jabúseerubei juríu jadügun nun. ²⁰ Merédeti napúrichijan jun luágu cátei le lúnbei buídubei lan jun, arúfudaja áu jun furángu lídan guririguaü lúma júbiñe. ²¹ Dándu joun juríu quei joun ja mámabaña juríu, aríñagaadina luágu lúnti lan jasáansiruní jóuserun ligíbugiñe Búngiu, lúma lun jafiñerun luágu Wabúreme Jesucrístu. ²² Guetó lubeíti neíbuga Jerusalén, loúnajan Sífiri Sándu. Ibídiñeti nun cába lan asúsereda nun ñi, ²³ lé rügüñein nasúbudirubei, luágu sun lan ubúrgu le ñi lumuti nídin, aríñagati Sífiri Sándu nun luágu nadaürüba lan, nasúfuriruba sarágu, Jerusalén. ²⁴ Úati ni cáta lídaangiñe áuti nebésera, ni nibágari guánarügü, mebégiti ni cáta nun, adügarügü náali ligía le uágubei loúnajana Búngiu láu ugúndani darí lúmoun lagúmujoún, lun nadímurejani ugánu buíti luágu línsiñejabu Búngiu.

²⁵ ‘Guetó, choúru numúti luágu maríjindügüya láadina lan ni ában jídaangiñe, jugúya lé meja únbei napúrichija luágu larúeijan Búngiu. ²⁶ Ligía naríñagunbei jun ugúñe luágu masándiragun nan núngua láu dúru lueígiñe ni ában jídaangiñe, ²⁷ ladüga subúdigüda náali sun laráansejan Búngiu jun, marámuduntina ni cáta jueí. ²⁸ Toúnigigua jumá lubeíti júngua, toúnigi jumáñame afiñetiña ja líchugubaña Sífiri Sándu lun jóúnigiruniña, ja tánigu lílígilisin Búngiu, ja lagáñijabaña láu líta Liraü guánarügü. ²⁹ Subúdi numúti luágu dánme lan nídin, jayábinba lan ámu áluga jagúnrinchaguni jafiñen, quei lebélorun geígusi jádoun mudún áfaraguaña. ³⁰ Níbaña jídaangiñe guánarügü, lubáragiñe jamúga jarúfudajani inárüni, jarúfudajabei iyéeni lun jafálaruniña afiñetiña. ³¹ Toúnigi jumá lubeíti, jarítagua jumei luágu ürüwa lan irúmu náu ewéridijaün wéyuagu áriebu, ayájua buri áu.

³² ‘Guetóti, nidújeñu, derége numútun lun Búngiu lúma lun ugánu le luáguti línsiñejabu, le gabáfubei lun léredagüdüni jafiñen lúma lun líchugun ubáraü jun siélu jádan ja derégeguáañabaña jóungua lun. ³³ Mabúseerun nágili ni liseínsun ni ában, ni lanáangun, ³⁴ lubáragiñe líra, subúdi jumúti luágu ñadágimein nan lun nibíjini le nemégeirubei lúma le jemégeirubei ja númabaña. ³⁵ Súnwandan narúfudajan jun luágu ítara líña lan luwádigimariniwa lun jíderawagún ja níjeinbei jemégeirun, luágu gíñe lúnti lan larítawagún luágu dimúrei le lariñagubei Wabúreme Jesúsu dan le lariñagunbei. “Gúndaatimáati le íchugubei sügü láu le erésibirubei.”

³⁶ Láriñe lariñaguni Páblo cátei le, ába lájuduragun, ába layúmuragun lun Búngiu jáma súngubei. ³⁷ Ába jayájun súngubei láu igárigu, ába jóiburuni Páblo, ába jachúuruni. ³⁸ Jírutiñati ladüga lariñagun joun luágu maríjindügüya jamáli lánme. Ába jóudin íchaajei tuágu ugúnein.

21

Luweiyasun Páblo ubúrugun Jerusalén

¹ Dan le wígiruniña afiñetiña, ába woúdin sügülgü lídoun fulásu le gíribei Cos, larúgan, ában woúdin Ródas, ñígiñe Ródasgiñe woúdin lun Pátara. ² Ñi Pátara wadárira ában ugúnein teíbuga Fenícia, ába wádinun tídoun, ába woúdin. ³ Dan wásügürün, ába waríjini uboúju le Chípree, ába wígiruni lueígiñe wabaúna, ába wasígirun darí wachülürün Síria. Queíti taráriguágüdüba lan ugúnein lídan ubúругu le gíribei Tíro, ába warárirun ñi. ⁴ Aluaja wamútiña afiñetiña ja ñíbaña, ába weréderun sédü wéyu jáma ñi. Ába lawísaruniña Sífiri Sándu luágu lasúfuriruba lan Páblo Jerusalén, ába jariñagun lun lun mídin lan. ⁵ Dan lásügürün sédü wéyu ligía, ába woúdin. Sun afiñetiña jáu jámarigu jáma jasáanigu, ñüdüntiña íchaajawa chülü bougudi lueí ubúrugu, ñi béyabu ába wájuduragun ayúmuragua lun Búngiu. ⁶ Ábati woúburagun woúngua jáma, ába wádinun tídoun ugúnein, jagía, ába jagíribudun jábiñoun.

⁷ Ába wagúmuchuni waweíyasun baránaja lúmagiñe ubúrugugiñe Tíro darí Tolemáida, le ñi lubei wabúsuru joun afiñetiña, ába weréderun ában wéyu jáma ñi. ⁸ Larúgan, ába láfuridun Páblo wáma, wagía le lúmabei, ába wachülürün ubúrugu Cesaréa. Ñi woúdin lúbiñe Felípe le apúrichijabalin ugánu luáguti Jesucrístu, ába gíñe jádaangiñe sédü wügüriña já meja anúadajóúbaña Jerusalén lun jeténirun lun le jemégeirubei afiñetiña, ába weréderun lúma. ⁹ Gasáaniguti Felipe gádürü wúriña irájüñü ja máfuridungiña, ibíja jamúti ubáfu lúmagiñe Búngiu lun ladímurejan jayúmulugugiñe. ¹⁰ Átiri wéyu wáu ñi, ligía lachülürün ában proféta Judéagiñe, gíriti Ágabo, ¹¹ liábiña aríjawa. Ába lanügüni lubélitin Páblo, ába lagüraguni lugúdi guánarü lúma lújabu láu, ába lariñagun.

—Lariñajare Sífiri Sándu luágu ítara lúba lan jagüraguni juríu labúreme béliti le ubúrugun Jerusalén, ábame jedéregeruní joun ja mámabaña juríu.

¹² Dan wagáambuni cátei le, wagía jáma Cesaréana, ába wayúmuragun lun Páblo lun mídin lan Jerusalén. ¹³ Ába lariñagun Páblo.

—¿Ca uágu jayájua, írudagüdána? Aráansetina mámarügü lun nagürawagún Jerusalén, aráansetina darí lun noúnwen lueígiñe Nabúreme Jesúsu.

14 Quei siñá wamani larítagan agáñeira, ába wígiruni, ába waríñagun lun ladügüniwa lugúndan Búngiu.

15 Dan le gumújali webélujan ñi, ába waráanserun, ába wouúdin Jerusalén.
16 Ñüdütiña jádaangiñe afiñetiña wáma Cesaréagiñe, ñíñein ában Chíprena jádan, gíriti Mnasón, lújali lueígiñe lafiñerun luágu Jesucrístu, lúbiñeba wagánawa.

Bisída láani Páblo Jacóbo

17 Dan wachülürün Jerusalén, ába jerésibiruníwa afiñetiña láu ugúndani.
18 Larúgan, ába wouúdin lúma Páblo aríjei Jacóbo, ñíñanu gíñe sun tábutigu ligílisi Jerusalén. 19 Ába labúsurun Páblo joun, ába labájüdaguni sun cátei le ladügübei Búngiu lídaangiñe joun, jádan ja mámabaña juríu. 20 Dan le jagáambunbalin ugánu le, ába jadímurejan luágu luweírigan Búngiu. Ábati jaríñagun lun Páblo.

—Wadúje, aríjabásan, añájein sarágu mílu juríu afiñerutiña luágu Jesucrístu, áni sun jagía, aríñagatiña luágu lúnti lan lasígirúniwa lilúrudun Moisés. 21 Aríñawagúaaali joun luágu arúfudaja ban joun sun juríu ja aganoúbaña lídan jageíra ja mámabaña juríu lun madügün jamá gásu luágu lé meja laríñagubei Moisés, áni aríñaga bán nege joun lun merésibirun jamá jasáanigu circuncisión, mafála jameíme wagáburi, wagía juríu. 22 ¿Cábasan wadüga? Joúndaragubátia juríu dánme le jasúbudiruni luágu chülüjadibu lan, lun jadügün wuríbani bun. 23 Niján cátei le lúnbei badügüni. Añájein gádürü wügüriña ya wádan, gásu jagúnfulirun ában darádu lúma Búngiu. 24 Barúbaña búmagua, ábame barúmadaguágüdün búngua jáma ligíbugiñe Búngiu según wagáburi, wagía juríu, fáyeibeíme le jagástarubei lun jagúnfulirun lúma jadáradun, lárígíñeme gayáraajalíme jásaragüdüni jádiburi. Ítara lúba jaríjini sun juríu luágu iyéeni lan le aríñawagübei joun buágu, gúnfulirügütibu lan gíñe lúma lilúrudun Moisés quei lubúdubu. 25 Ánjeinti jawágu ja mámabaña juríu áni afiñejaña luágu Búngiu, abürüjaadiwa joun lun madíjeri jamá luágu buri cátei le, lúnrügü meígin jamá úwi le dagágüdawaali joun sándu, ni jítaü, ni anímaalu le tígíwarügüti, lun gíñe úa lan ni ában agámariduti würi to mamárieiduntu lúma.

Járügüdüni Páblo adáüra tídan témpulu

26 Ábati lanügüniña Páblo gádürü wügüriña jagía, larúgan, ába larúmadaguagüdüni lúngua jáma, ába lebélorun témpulurugun awísaja ídaba lan lagúmucha jawéyuri gádürü wügüriña jagía lun jarúmadun, léme lidáani jadágaragüdüni cada ában jádaangiñe lun Búngiu.

27 Dan lé yebe yaráfaaali lun lagúmuchun sédü wéyu ligía lubá lagúmuchun jarúmadun ligíbugiñe Búngiu, ába jaríjini jádaangiñe juríu Ásiana Páblo témpulurugu, ába jachágaraguágüdüniña gürígia. Ába jarügüdüni Páblo, 28 ába jagúaragun.

—¡Wügüriña Israelítagu, íderagua jumáwa! Niján wügüri le eíbugubalin sun fulásu arúfudaja joun sun gürígia wuríba luágu wanásiñun, luágu lilúrudun Moisés, lúma tuágu témpulu to, belúgüdaali gíñe gürígia ja mámabaña juríu témpulurugun awíyedei fulásu sándu le ligíbugiñe Búngiu.

29 Jaríñagunbei ítara ladüga meja jaríjini Páblo ubúrugú lúma Trófimo le Éfesona, jarítaguatiñati luágu barúlaani témpulurúgun.

³⁰ Ába jachágaragun sun lílana fulásu, ába jayábin gürígia eíbaagueina. Ábati járügüdüni Páblo, ába jadúruguduní bougudin tueí témpulu, ába jadáuraguni béna furése. ³¹ Busénjaña yebe jáfaruni jilágubei, ligía lachülürün ugánu lun gumándan luágu chagágujaña lan sun lílana ubúruгу Jerusalén. ³² Ábati loúndaraguniña gumándan lisúdaaranigu jáma jábutigu, ába lachülürün eíbaagueina le ñíjin jabeí gürígia. Dan jaríjini gumándan jáma súdaaragu, ába lásurun jabeíchuni Páblo. ³³ Ábati layárafadun gumándan, ába lárügüdüni Páblo, ába lagüraguágüdüni láu bián güringüri, lárigiñe, ába lálügüdajan cátei lan, lúma ca lan lidúnrunbei. ³⁴ Ámuñegueinarügüti cátei jaríñagun gürígia, siñátiti gunfaráanda lan gumándan ni cáta ladüga ireíni le jadügübei, ába lanütagüdüni jábñoun súdaara. ³⁵ Dan le jachülürünbei luágu testépute muna, ába janügüni súdaara Páblo oúyuajeina lueí jáfaruni gürígia jilágubei, ³⁶ ladüga jayábiña súngebui jarigi agúarajeina.

—¡Jilála!

Ladímurejan Páblo lueígiñe

³⁷ Dan lé yebe jádaraali lan Páblo múnadoun, ába laríñagun lun gumándan le jáubei súdaara.

—¿Gayáraati nadímurejan búma?

Ába laríñagun gumándan lun.

—¿Geréngaditibu güriégu? ³⁸ ¿Máma lubeí bugúya Ejíptona lé meja adügübei ában mabúchajaü luágu ában dan, ába lanügün gádürü mílu wügüriña gáfarajatiña lídoun fulásu mageírawaguti?

³⁹ Laríñagati Páblo lun.

—Máma áu, juríu áu, Társona, ában fulásu weíriguti Cilícia. Adügabá fuleísei nun lun bígirunina lun nadímurejan joun gürígia.

⁴⁰ Ába líchugun gumándan üma lun, ába laráramun Páblo luágu estépu, ába líchugun seíni láu lújabu joun gürígia lun jámanichun. Dan le manígaali, ába ladímurejan joun lídan hebréo, le jerérun juríu, ába laríñagun.

22

¹ —Nidújeñu jáma jagübürigu, agáamba jumeí le lúnbei naríñaguni jun nueígiñe.

² Dan jagáambun ladímurejan joun lídan jerérun, ábatima jámanichaguágüdün. Ábati laríñagun joun.

³ —Juríu áu, le gumúti, ubúruгу Társo loúbawagu Cilícia nagüriajoúa, ya Jerusalén naweírida. Lábugiñe larúfudajan Gamáiel natúriaja, úarati larúfudajan lúma jalúrudun binádu wagübürigu. Jouchatina súnwandan lun nesériwidun lun Búngiu táu sun nanígi, queígubeirügü ligáburu jadügüni jugúya ugúñe wéyu. ⁴ Áu, eíbaaja numútiña meja lánigu Crístu darí náfaraguniña jilágubei, barügua áu wügüriña furísunrugun. ⁵ Geféenti fádiri íñutimaati jáu sun jábutigu juríu luágu rújama gárada nun joun wapaísanu ja Damáscobaña. Nüdüntina ñi áluajaña afíñetiña luágu Crístu lun nanügüniña ñájoun lun nasúfuriragüdüniña.

Labájüdaguní Páblo luáguti lasáansiragun ligáburu

⁶ ‘Dan luáguñadina lubeí üma, yaráfaadina lun nachülürün Damáscu, queíburi amúdirugu, sódini ligía ladúnraagun ában oúnwenbun larúgounga siéluigiñe náu, ⁷ ába náburujan múarugun. Ába nagáambun laríñagun ában

umálali nun. “Sáulo, Sáulo, ¿ca uágu beíbaajanina?” ⁸ Ábati nariñagun. “¿Cátabusan Nabúreme?” Lariñaga nun. “Jesúsu le Nazarétna áu, le méme beíbaajabei.” ⁹ Aríja jamúti ja úarabaña núma larúgounga ligía, ába janúfudedagun, magáambun jamúti lumálali le adímurejabei nun. ¹⁰ Ábati nariñagun. “¿Cábagi nadüga, Nabúreme?” Ába lariñagun nun. “Sarába, beíba luágu buweiyasun Damáscoun, ñiba lariñawagúa sun le lúnbei badügüni bun.” ¹¹ Queíti maríjingüda láadina lubeí buga larúgounga ligira, ába járügüdüni ja númabaña nújabu darí wachülürün Damáscou.

¹² Ñiñein ában wügüri Damáscou gíriti Ananías, gúnfuliti buídu lúma lilúrudun Moisés, sun juríu ja aganoubaña Damáscou adímurejatiña buídu luágu wügüri ligía. ¹³ Ába liábin Ananías aríjana, dan lachülürün, ába laráramun nubádu, ába lariñagun nun. “Nidúje Sáulo, ibíjayabei baríjin lárigoún.” Lídan méme óra ligía, ába léfegechun nágu, ába naríjini. ¹⁴ Ábati lariñagun nun. “Anúadaja láadibu Jabúngiute binádu wagübürigu lúmagiñe binárü lun basúbudiruni lugúndan, lúma lun baríjini Jesúsu le richáguabei, lun bagáambuni lumálali, ¹⁵ ladüga bíchuguba lan fe luágu Jesúsu joun sun gürígia, abájüdagubeíme le aríja báalibeí lúma le agáamba báalibeí. ¹⁶ Guetóti, ¿ca uágu badárasaja? Sarába, badíseibá jeménigiñu luágu Wabúreme lun lachíbun bífígoun.”

Labájüdagun Páblo luágu loúnajoún apúrichija joun ja mámabaña juríu

¹⁷ Dan nagríbudun ubúrugin Jerusalén, luágu ában wéyu dan le nídin témpulurugu ayúmuragua, ába lasáliragun Nabúreme Jesúsu nun, ¹⁸ ába lariñagun nun. “Furíba yágiñe Jerusaléngiñe, oufuda, ladüga madügünbaña juríu gásu láu le baríñagunbei nuágu lídan fulásu le.” ¹⁹ Ábati nariñagun lun. “Nabúreme, subúdi jamúti luágu ñüdü nán buri méja tídan sun jalígilisin afíñetiña anáajaña ja afíñebaña buágu furísunurugin, bei buri náña. ²⁰ Dan le láfarúnbei Estéban jilágubei, le bánigu lé meja adímurejabei buágu, ñíñadina, gúndaatina láu jáfaruni, áu ouñigirubárun janáangun ja áfarubalín.” ²¹ Ába lariñagun Nabúreme nun. “Beíba, ladüga nouñajadibu díse, apúrichija joun ja mámabaña juríu.”

Páblo lújaburugu gumándan

²² Agáamba jamúti chülü lúmoun ladímurejan luágu lídin apúrichija joun ja mámabaña juríu, ába jagúmeserun agúaraja.

—¡Áfara jumeí jilágubei! ¡Maríchatí lun labágaridun!

²³ Queíti jasígirun agúaraja, achüjoun buri janáangun, achüja calíqui íñun le jagáñi, ²⁴ ába lariñagun gumándan lun ladarúniwa Páblo jábiñoun súdaara, ába loúnajan abeíchei lun ladímurejan, lun lasúbudirúniwa ca lan uágu jagúaraja gürígia luágu ítara. ²⁵ Dan le gürágu jamáali lun jabeíchuni, ába lariñagun Páblo lun jábuti súdaara le ñíbeí.

—¿Garíchatünsan lun jabeíchun ában wügüri Rómána, magúserunga ligía?

²⁶ Dan le lagáambuni jábuti súdaara cátei le, ába lídin aríñaga lun gumándan.

—Touñigibátia láu le lúnbei badügüni, Rómanatia wügüri le.

²⁷ Ábati lídin gumándan luágun Páblo, ába lariñagun lun.

—¿Inárüni luágu Rómána ban?

Lariñaga Páblo lun.

—Ánja.

²⁸ Ábati lariñagun gumándan.

—Fáyeitina sarágu seínsu lun Rómana nan.

Lariñaga Páblo.

—Ánjein áu, ñi nagüriajouá.

²⁹ Ába jígiruni já yebe lúnbei jabeíchuni furése, liábin giñe gumándan, dan le lasúbudiruni luágu Rómana lan Páblo, ába lanúfudedagun lueígiñe lagüraguni.

Páblo jagíbugiñe lúrudugu juríu ja íñutimáabaña

³⁰ Larúgan, busénti gumándan lasúbudiruni ca lan lidúnrunbei Páblo jarúma juríu, ába lagídaruni güríngüri lueí, ába loúndaraguágüdüniña jábutigu fádorigu jáma lúrudugu juríu ja íñutimáabaña, ábati laságaruni Páblo, ába líchuguni jagíbugiñe.

23

¹ Ába larijin Páblo jawágun lúrudugu jagía, ába lariñagun joun.

—Nidújeñu, jarúmati nasándiragun núngua ligíbugiñe Búngiu chülü lúmoun wéyu le.

² Ábati loúnajan Ananías, fádiri le íñutimaabei, lun jagáyuajan ja yaráfabaña ñi luágun liyúma Páblo. ³ Ába lariñagun Páblo lun.

—¡Lagáyuajaba Búngiu buágu, biángua tigíbu bugúya le! Ñun bíña ñi lun bagúseragüdüniña quei lariñaguni lúrudu, ¿cáti uágu bagáyuagüda nuágu, adúraaguei lúrudu?

⁴ Ába jariñagun ja ñíbaña lun.

—¿Ítara liñásan banábuni fádiri le íñutimaabei le láni Búngiu?

⁵ Ába lariñagun Páblo.

—Nidújeñu, ibídiñeti yebe nun luágu fádiri lan le íñutimaabei, ladüga tariñajare Lerérun Búngiu. “Madímurejaanbadibu wuríba luágu ában agúmadijati bageíra.”

⁶ Subúdi lumúti Páblo luágu jánigu lan saduséogu jíbiri ja ñíbaña, jíbiri, jánigu fariséogu, ába lariñagun láu umálali jéreti.

—Nidújeñu, fariséo áu, jádaangiñetiña fariséogu nagübürigu, áni jagúseragüdüñadina ladüga afiñe nan luágu jásaaruba lan jiláaña lídaangiñe ouweni lúnya jabágaridun.

⁷ Dan le lariñagunbálin cátei le, ába jagúmeserun fariséogu jáma saduséogu asígeneja jámagua, ába lafánreinragun adámurini. ⁸ Ladüga jariñajare saduséogu luágu másaarunbaña lan jiláaña lídaangiñe ouweni, úatiña nege giñe ánjeligu, ni espíritugu, ánjañati fariséogu, afiñetiña luágu sun cátei le. ⁹ Jareínchati súnigubei, ába jásaarun jádaangiñe arúfudajatiña lilúrudun Moisés ja ñíbaña, áni fariséogu giñe jagía, ába jariñagun.

—Wügüri le, úati ni cáta wuríbati ladüga, áni ánjeindügü ában lubeí espíritu adímurejabei lun o ában lan ánjeli, toúnigi wamátia lueí wadárirün oucha weréderuni luwádigimari Búngiu.

¹⁰ Weírjali sigénei darí lun lanúfudedun gumándan lueí jáfaruni Páblo jilágubei. Ábati loúnajaniña lisúdaaranigu lun jaságaruni Páblo lídaangiñe adámurini lúnya janügüni jábiñoun súdaara.

¹¹ Le ában áriebe, ába lasálriragun Wabúreme Jesúsú lun Páblo, ába lariñagun lun.

—Manúfudebá, Páblo, ladüga ítara quei rújadibu lan fe nuágu ya Jerusalén, bíchuguba giñe fe nuágu, Róma.

Aráansejaní lun láfarúniwa Páblo jilágubei

¹² Larúgan, ába jebélurun juríu lídoun úarani lun jáfaruni Páblo jilágubei, ába jaríñagun láu íñaraguni ligíbugiñe Búngiu luágu meíginbaña lan, mátun jagíame ni cáta darí jáfaruni. ¹³ Jougiñe bián-wein wügüríña ja aríñagubalin cátei le. ¹⁴ Ábati jóudin jámoun jábutigu fádirigu lúma jámoun wügüríña weírigutiña jádan juríu, ába jaríñagun.

—Aríñagaadiwa láu íñaraguni luágu meíginbadiwa lan ni cáta darí wáfaruni Páblo jilágubei. ¹⁵ Guetóti, jugúya jáma ja jíbiri lúrudugu íñutimaatiña amúriaja jumá lúma gumándan lun lanügüni jun jarúga, jaríñagame lun luágu lun lántima jálügdüni luágu dúru le rúwaalíbei luágu jabúseera jaríjini. Wagía, aráanseñu wába lun wáfaruni lubáragiñe lachülürün.

¹⁶ Ába lachülürün cátei le lábun lagáambun tiraü lítu Páblo, ába lídin jábiñoun súaara asúbudiragüdei lun Páblo. ¹⁷ Ábati lagúarun Páblo lun ában jádaangiñe jábutigu súaara, ába laríñagun lun.

—Barübei irájü le lúmoun gumándan, níjein cátei lun laríñaguni lun.

¹⁸ Ába lanügüni jábuti súaara lúmoun gumándan, ába laríñagun lun.

—Wáti adaürüti Páblo nun, ába lamúriajan núma lun nanügüni irájü le bun ñájoun, níjein nege cátei lun laríñaguni bun.

¹⁹ Ába lárügüdüni gumándan lújabu irájü ligía, ába lanügüni lun jábugua jamá, ába laríñagun lun.

—¿Ca babúseerubei baríñagun nun?

²⁰ Ábati laríñagun irájü ligía lun.

—Belújaña juríu lídoun úarani lun jamúriajan búma lun banügüni Páblo jagíbugiñoun lúrudugu íñutimaatiña lún nege jálügdünitima luágu lidúnrun.

²¹ Mafíñerabá joun, añájein jougiñe bián-wein jawügüríña arámudagu jabá ümada agúrabajei lun jáfaruni jilágubei. Aríñagaaña láu íñaraguni ligíbugiñe Búngiu luágu meíginbaña lan, mátun darí jáfaruni Páblo, guetó aráanseñu jáña, jagúraba rügüñein bouñabagüle.

²² Ábati louñajani gumándan irájü ligía águyu, aríñageina ligía lun lun maríñagun lan ni ca un luágu abájüdagua láali lan cátei le lun.

Louñajoun Páblo lun gumádimati le Félix

²³ Ába lagúarun gumándan joun bián jádaangiñe jábutigu súaara, ába laríñagun joun lun jaráanserun bián-san súaara lun jóudin Cesaréa eíbu, úara jáma ürüwa-wein-dísi ja jawágutiña gabáyu, jáma bián-san ja táutiña efeín, lun jóudin ladaürün néfu güñoun. ²⁴ Aráansegdáti giñe gabáyu lun laweínjaniña Páblo, ru ligía dimúrei lun jachülüragüdüni Páblo lúmoun gumádimati Félix láu magádiei. ²⁵ Oúnajati ában gárada jáma, laríñajare tídan gárada tugúya.

²⁶ “Lúmagiñetu Cláudio Lisías lun gumádimati Félix le weírigubei, mábuga níña bun. ²⁷ Niján wügüri le, le nouñajabei bun, daújamaali yebe juríu áni jáfaraali yebe jilágubei, dan le nasúbudirúbalin luágu Rómana lan, ába nídín jáu nisúdaaranigu, ába neséfuruni. ²⁸ Queíti nabúseerun nasúbudiruni ca lan lidúnrunbei jarúma, ába nanügüni jagíbugiñoun lúrudugu juríu íñutimaatiña. ²⁹ Lidúnrun jarúma luáguti buri cátei le luáguti jalúrudun, úati íríchaü lun láfarún jilágubei, ni íbini lun ladaürün. ³⁰ Quei lachülürün lábun nagáambun luágu jaráansejaña lan juríu lun jáfaruni jilágubei, ligía lébubei

noúnajani bun madárasajaanga. Ariñagaadina giñe joun ja íchugubaña lidúnrun lun búma lan jaráanserei le jánibei lúma.”

³¹ Ábati janügüni súaara Páblo quei lariñawagüniwa joun, áriebu, chülü Antípatris. ³² Larúgan, ligía jagíribudun súaara ja eíbubaña, súaara ja jawágubaña gabáyu, ába jasígiruni jaweiyasun láu Páblo. ³³ Dan le jachülürünbei Cesaréa, ába jedéregerunun gárada lun gumádimati, derége jamei giñe Páblo. ³⁴ Láriigiñe laliijanun gumádimati gárada, ába lálügüdajan jalána lan Páblo, dánti le lasúbudirúnbalin luágu Cilíciana lan, ³⁵ ába lariñagun lun.

—Nagáambubadibu dánme le jayábin ja íchugubaña bidúnrun.

Ábati líchugun dimúrei lun líchugúniwa Páblo tídoun palásiu tó meja lábunaguboun Heródes, jáu oúniri.

24

Ladímurejan Páblo lueígiñegua ligíbugiñe Félix

¹ Seíngü wéyu láriigiñe, ába lachülürün Ananías, fádiri le íñutimaabei, ubúrugin Cesaréa jáu wügüríña jádaangiñe juríu weirigutiña, lúma ában wügüri le subúdijabuti lun lúru, gíriti Tértulo. Ába jayábin lúmoun gumádimati lun jíchugin lidúnrun Páblo. ² Dan le lanügüniwa Páblo jagíbugiñoún, ába lagúmeserun Tértulo íchiga lidúnrun, lariñaga.

—Luágu bareíni, gumádimati, lüjadiwa láu darángilaü ya wageíra, buíti leíbugun sun cátei ya fulásurugu súnwandan lábugiñe lichú báu. ³ Ibíja wamúti sun le, áni teínqui wamútibu luágu. ⁴ Lun magídarun wamáni bidáani sarágu, amúriajatina búma lun badügün murúsun fuleísei woun lun bagáambuniwa luágu murúsun óra. ⁵ Niján wügüri le Páblo, beréseti, lerédera afánreinraguagüdaña juríu lídan sun fulásu, ligía giñe ában jádaangiñe lichügüdinabei jadámurin nazarénugu. ⁶ Álugati giñe lawiyedagüdünnun témpulu ligíbugiñe Búngiu láu lebélaagüdünn ában wügüri le mámabei juríu tídoun. Ába wárügüdüni, ába yebe wabúseerun wagúseragüdüni láu ligáburu walúrudun, ⁷ ába leméterun gumándan Lísias ñíjin, ába lagídaruni waweí láu érei, ⁸ ába lariñagun luágu ja lan íchugubaña lidúnrun lúnti lan jayábin búmoun. Gayáraati bálügüdaguni Páblo, subúdi bámugei inárüni luágu sun cátei le, le waríñagubei luágu.

⁹ Juríu buri ja ñibaña, ariñagatiña giñe luágu inárüni lan sun le lariñagubei Tértulo. ¹⁰ Ába ladügün gumádimati seíni lun Páblo lun ladímurejan, ában lariñagun Páblo.

—Lau sun nugúndan nadímureja nueígiñegua bigíbugiñe ladüga subúdi náani luágu lúmagiñe lan sarágu irúmu bagúseragüdajan lídan fulásu le. ¹¹ Gayáraati bálügüdajan ánjein inárüni lubei le lúnbei nariñaguni bun. Dúsurügügili wéyu lueígiñe nachülürün ubúrugin Jerusalén lun nájuduragun lun Búngiu, ¹² madárirúnwatina asígeneja ni ca úma, ni acháraguagüdaña gürígia témpulurugu, ni tídan buri túbiri jalígílin juríu, ni lídan buri ámu fulásu ubúru. ¹³ Gürígia ja, siñáti jarúfuduni luágu inárüni lan ni ában lídaangiñe sun cátei le jariñagubei nuágu. ¹⁴ Ában cátei nariñagubei bun, luágu nesériwiduña lan lun Jabúngiute nagübürigu quei larúfudajani Jesucrístu, le uágubei jariñaga luágu marícha lan. Afíñetina luágu sun le búrüwañubei tídan buri líburu to lánina lilúrudun Moisés lúma lé meja jabürüjabei profétagu. ¹⁵ Níjein giñe eménigini le jawágubei nuágu luágu Búngiu, luágu lásaaragüdübaña lan jiláaña, dándu ja buídubaña quei ja

wuríbabaña. ¹⁶ Ligía náfaagunbei súnwandan lun madúnrun nan ligíbugiñe Búngiu lúma jagíbugiñe gürigia.

¹⁷ Lárigiñe átiri dan náu eíbegei ámu buri fulásu, ába nagíribudun nageíroun lun nedégerun seínsu joun gudémetiña Jerusalén lúma lun nadágaragüdün lun Búngiu. ¹⁸ Nadügüñein yebe cátei le témpulurugu lárigiñe narúmudaguagüdün nungua quei le igáburi, ligía jadárirunina átiri juríu loúbawaguna Ásia ñi témpulurugu, úatiña sarágu gürigia ñi, ni chagáguau. ¹⁹ Jagía lúnbaña jayábin arúfudagua jóungua ya lun jariñaguni le lúnbei jariñaguni ánjein níjein lubei lúnti jariñaguni nuágu, ²⁰ jariñaguni lan ja yábaña ánjein darí jabei nidúnrun dan le ligíbugiñe nubei líñun-ágei lúruđu juríu. ²¹ Siñáti jariñagun ni cáta nuágu, lueídügüya luágu lan ában wéyu dan le jádaañadina lubei, ába nagúaragun aríñaga. “Jagúseragüdüñadina ugüñe lueigiñe afiñe nan luágu jásaaruba lan jiláaña lídaangiñe ouweni lúnya jabágaridun.”

²² Subúsi sarágu luágu larúfudajan Jesúsu lun gumádimati Félix, ítara líña, dan le lagáambunbalin le laríñagunbei Páblo luágu jásaarun jiláaña, ába lagúmuchaguagüdüni adámurini, aríñageina ligía.

—Nagúseragüdübei wügüri le dánme le lachülürün gumándan Lisías.

²³ Ábati laríñagun Félix lun jábuti sudaara lun lasígirun Páblo daüwañu, lun furáangu lan lun gayára lan jóudin lumádagu aríjei, eténira lun.

²⁴ Átiri wéyu lárigiñe, ábaya lachülürün Félix túma Drusíla to lúmari, to juríu, ubúrugun Cesaréa, ába lagúaragüdün luágu Páblo lun ladímurejan lun luágu Jesucrístu. ²⁵ Dan le ladímurejaanbei Páblo lun luágu íbágarí le surúbei, lúma luágu ágüdaagüni únguaü luei le wuríbabei, lúma luáguti wéyu le lúnbei lagúseragüdüniña Búngiu sun gürigia, ába lanúfudedagun Félix, ába laríñagun lun.

—Beíba yebe, dánme le gadáani nan, nagúarayaba bun.

²⁶ Agúrabatí yebe giñe Félix lun líchugun Páblo seínsu lun lun lígiragüdüni, ligía, dan méme lubei wájali luágu lun layánujan lúma. ²⁷ Sügüti bián írúmu ítara, ábati lagúmuchun lagúmadijan Félix, ába lárügüdüni Pórcio Fésto lufúlasun. Queiti busén lan Félix leréderun buídu jáma juríu, ába lígiruni Páblo daüwañu.

25

Páblo ligíbugiñe Fésto

¹ Ábati lachülürün Fésto lun lárügüdüni lufúlasun queísi gumádimati, ürúwa wéyu lueigiñe, ába lamúdeirun Cesaréagiñe lun ubúrugun Jerusalén. ² Ába jachülürün jábutigu fádirigu ñíjin jáma juríu ja weírigutimaabaña íchiga lidúnrun Páblo ligíbugiñe Fésto. ³ Ába jamúriajan fuleísei lúma lun loúnajan anúgei Páblo Jerusalén. Le jaráansejanbei, lún yebe jáfaruni jilágubei luágu úma. ⁴ Ába loúnabun Fésto luágu Cesaréa lan ladaürüwa Páblo, áni jaritagua lan lídin ñi madíse. ⁵ Ába laríñagun joun.

—Ligía lúnti lubei jóudin ja weírigutimaabaña jídaangiñe Cesaréa úara núma, áni ánjein adúgaali lubei wügüri ligía dúru, gayáraabei jariñaguni.

⁶ Wídü rügüñein o díisi lan wéyu láu Fésto Jerusalén, ába lagíribudun ubúrugun Cesaréa. Larúgan, ába lárügüdüni lufúlasun lun lagúseragüdün, ába loúnajan luágu Páblo. ⁷ Dan le lebéllurunbei Páblo, ába jagúriridágun juríu ja ñübinbaña Jerusaléngiñe láu, ába jíchugun sarágu lidúnrun le jürüti, áni

siñáti jarífuduni luágu inárüni lan ni cáta lídaangiñe le jaríñagunbei. ⁸ Ábati laríñagun Páblo lídan ladímurejan lueígiñegua.

—Madügüngidina ni murúsun dúru ni lun jalúruden juríu, ni tun témpulu, ni lun urúei César.

⁹ Queíti busén lan Fésto leréderun buídu jáma juríu, ába laríñagun lun Páblo.

—¿Buséntibu bídin Jerusalén lun nagúseragüdünibu ñi?

¹⁰ Ába loúnabun Páblo.

—Ligíbugiñeñadina lagúseragüle urúei César, le ñi lubei lúnti lan nagúserún. Queísi basúbudiruni buídu, madügüngidina dúru joun juríu.

¹¹ Anjein adügaadina lubei dúru le garíchatu lun nafarún jilágubei lueígiñe, mebéresegúntina noúnwen, anjein úa lubei ni cáta lánina inárüni lídan sun le aríñawagúbei nuágu, úati ni ában garíchatu lun ledéregerunina joun juríu. Amúriajatina lun César lan agúseragüdána.

¹² Lárigiñeti layánujan Fésto jáma lánigu cába lan ladüga láu Páblo, ába laríñagun lun.

—Amúriajaadibu lubeígia lun César lan agúseragüdadu, beíbugati lun César.

Páblo ligíbugiñe urúei Agrípa

¹³ Átiri wéyu lárigiñe, ába lídin urúei Agrípa túma Bereníce Cesaréa aríjei Fésto. ¹⁴ Quei reidei jabei átiri wéyu ñi, ába labájüdaguni Fésto luáguti lagúserun Páblo lun urúei Agrípa, laríñaga lun.

—Níjein ában wügüri lígirun Félix dáüwañu ya. ¹⁵ Dan le Jerusalén nubei, rútiña jábutigu fádorigu jáma wügüriña juríu weírigitíña lidúnrun nigíbugiñe, amúriajatiña núma lun nasiadiruni. ¹⁶ Ába naríñagun joun luágu magáburi láani lúrudu Rómána lun lasiadirun ában güri-gia lun ouweni maríjinga láña ja íchugubaña lidúnrun ligíbugiñe, lun gayára lan ladímurejan lueígiñegua. ¹⁷ Ligía, lídan lubei le jayábinbei ya úara núma, meféridirúntina dan, larúgan, ába nárügüdüni nufúlasun lídan agúseragülei, ába noúnajan luágu wügüri ligía. ¹⁸ Ja ñübinbaña lun jíchugun lidúnrun, maríñaguntiña ni cátei luágu lídaangiñe lé yebe uágubei naríta-gua. ¹⁹ Lé buri cátei le jaríñagubei luágu, luágu múaradun lán nege jáma luágu ligáburi jafíñen, lúma luágu ában nege wügüri giriti Jesúsu—jiláti nege, laríñajare Páblo luágu wínwanya lán nege. ²⁰ Queíti ibídiñe lan nun cába lan nadüga lídan ában cátei líbe le, ába nálügüdüni Páblo anjein busén lubei lídin Jerusalén lun lagúserún luágu cátei le ñi. ²¹ Quei lamúriajan lun urúeiba lan Augústo César agúseragüdeí, ába naríñagun lun lasígirun dáüwañu daríme gayára lan noúnajani lun Augústo César.

²² Ábati laríñagun Agrípa lun Fésto.

—Buséntina gíñe nagáambuni wügüri ligía.

Ába laríñagun Fésto lun.

—Bagáambubei jarúga.

²³ Larúgan, dan le jachúlürünbei Agrípa túma Bereníce, ába jebélurun láu ouñwenbun uweírighuni múnadoun, jáma jábutigu súdeara jáma wügüriña weírigitíña ñi ubúrugu. Ába loúnajan Fésto luágu Páblo, ²⁴ ába laríñagun.

—Urúei Agrípa, jáma wügüriña ja adámurigubaña wáma ya, niján wügüri le. adímurejaaña sarágu jádaangiñe juríu wuríba nun luágu, dándu Jerusalén quei ya Cesaréa, áni añájagua aríñaga nun láu sarágu éregu luágu lúnti lan loúnwen. ²⁵ Laganóun nun camá madügüngili ni

cáta le lúnti lafarún jilágubei lueígiñe, áni queíti ligía guánarügü lan amúriajabei lun urúeiba lan Augústo César agúseragüdei, nouñajaali lun. ²⁶ Queíti úa lan cába lan cátei uágu nabürüja lun Augústo luágu wüğüri le, ligía nanügübalin jigíbugiñoún, bigíbugiñoúntimá urúei Agrípa, lun bálügüdaguni, níjein lámuga cába lan nabürüja. ²⁷ Ladüga garábaguati nun lun nouñajan ában adaürüti, mawísajaanga áu ca lan lidúnrunbei.

26

Ladímurejan Páblo lueígiñegua ligíbugiñe urúei Agrípa

¹ Ábati laríñagun Agrípa lun Páblo.

—Gayáraati badímurejan bueígiñegua.

Ába liñúruni Páblo lújabu lun jagáambuni, ába lagúmeserun adímureja, ába laríñagun.

² —Oúnwenbun nugúndan gayára lan nadímurejan nueígiñegua bigíbugiñe, urúei Agrípa, luágu sun cátei le aríñaga jamáalibe juríu nuágu, ³ gúndaatimatina ladüga subúdi báni jagáburu juríu lúma cátei lé buri uágubei jasígeneja. Ligía namúriajanbei búma lun gagúraasun ban lun bagáambunina.

Labájüdaguni Páblo binádu libágari

⁴ ‘Subúdi jamúti sun juríu ligáburu meja nabágaridun jádan, nageíra lúma ubúrugü Jerusalén, lúmagiñe irájügídina. ⁵ Lüja jasúbudirunina, áni gayáraati jamúga jaríñaguni ánjaña jamúga busén luágu fariséo lan nugúya lúmagiñe niñúraü, adámurini létima derégüdabei lídan luwúyeri wafíñen, wagía juríu. ⁶ Guetóti, jagúseragüdüñadina luágu eménigini le nuágubei, luágu lásaaragüdübaña lan Búngiu jiláaña lídaangiñe ouweni lúnya jabágaridun, queí meja laríñaguni joun binádu wagübürigu. ⁷ Dúusugubei famúlia le jadügawagunbei lirájüñü Israél agúrabiña jaríjini lagúnfulirun dimúrei le, ligía jájuduragunbei lun Búngiu, seríwi jameí wéyuagu, áriebu. Lueígiñe méme eménigini le, jadárira juríu nidúnrun, urúei Agrípa. ⁸ ¿Mafíñetün funági luágu gayára lan lásaaragüdüniña Búngiu jiláaña?

Labájüdagun Páblo luágu meja leiñaajaniña afíñetiña

⁹ ‘Nugúya guánarügü, jarítaguatina méja luágu lúnti lan neiñaajaniña ja afálarunbalin Jesúsu Nazarétna, ¹⁰ áni ítara líña nadügüni ubúrugü Jerusalén. Láu ubáfu le jíchugubei jábutigu fádirigu nun, dátina sarágu jádaangiñe lánigu Búngiu furísunrugun, áni dan lé buri jasíadirúniwa lun jounwen, nugúya ában jádaangiñe ja abúdujabaña lun ítara lúba lan. ¹¹ Níjeinja dan, súfurigüda numútiña lún yebe jeyéedagun luágu jafíñen luágu Jesucrístu. Adáagua numúti meja cátei le tídan sun jalígilisin afíñetiña, áni weíríti meja nigáñi joun darí lun neiñaajaniña chülü lídoun buri ubúrugü le díseti.

Labájüdagunya Páblo luágu lasálbarun

¹² ‘Ligía yebe cátei le gabügürübalina ubúrugun Damáscó ában dan, jounajan jábutigu fádirigu. ¹³ Luágu üma, nurúeite, amídirugu, ába naríjin ában larúgounga siélugiñeti, jéreti sügü lau larúgounga wéyu, ába ladúnraagun geyéga náu jáu sun ja úarabaña núma. ¹⁴ Súngubei wagía, ába wáburujan múarugun, ába nagáambun ában umálali aríñaguti nun lídan hebréo, le jerérun juríu. “Sáulo, Sáulo, ¿ca uágu beiñaajana? Basúfuriraguagüdüñatia búngua láu bamánjarun nun quei ladüga bágasu

dan le líchaagun quiqui luágun cátei gágiriti.” ¹⁵ Ábati nariñagun. “¿Cátabusan, Nabúreme?” Ába lariñagun nun. “Jesúsu áu, le guánarügü beíbaajabei. ¹⁶ Sarába, ráramabá, ladüga narúfudagunbei nungua bun lun besériwidun nun, lun geféen ban luágu le aríja báalibe guetó lúma le lúnbei narúfuduni bun. ¹⁷ Neséfurabadibu jawei juríu lúma jawei ja mámabaña juríu, ja únbaña nouñajabu guetó. ¹⁸ Nouñajañadibu jámoun lun béfegechagüdüni jágu nuágu, lun jebé lan jeibugun lídan lubúriga, lun jeibugun lídan larúgounga, lun gíñe meréde méme jamá lábugiñe lubáfu Máfia, lun lábugiñe jamá lubáfu Búngiu. Nouñajañadibu joun, afíñe jamámuga nuágu, ferúdunawa lámuga jafígoun, ibíja jamámuga alágan jádan ja jarúmagüda láañabaña Búngiu láu jafíñerun nuágu.”

Labájüdagun Páblo luágu luwádigimari

¹⁹ Ítara líña lubeíti, urúei Agrípa, ába nadügüni le lariñagunbei Jesúsu nun lídan le lasálriragunbei nun. ²⁰ Furúmiñe, ába napúrichijan joun ja Damáscobaña, aríñagatina joun lun jaságürijan luágu jafígoun, lun jagíribudun lun Búngiu, lun jadügün cátei buíti, arijúa lámuga luágu saánsiguaali lan jagáburi. Lárigiñe, ába napúrichijani cátei méme le joun ja Jerusalénbaña, ja mámabaña juríu. ²¹ Ligía lébubei jarügüdünina juríu témpulurugu, ába jálugun jáfarunina jilágubei. ²² Ába líderagunina Búngiu, ítara líña gayára lan nasígirun íchiga fe luágu Jesúsu lan Crístubei joun sun gürígia, dándu ja weirigubaña queísi ja únabugubaña, chülü lúmoun óra le. Maríñaguntina ni cáta joun gürígia boügudin luei le uágubei jariñaga Moisés jáma profétagu luágu lasúsereduba lan — ²³ luágu lúnti lán meja lasúfuriruba lan Crístu, luágu lárigiñe lánme loúnwen, ligíaba lan furúmiñeti ásaaruti jádaangiñe jiláaña láu ibágari magúmchaditi, luágu gíñe líchugubei lan larúgounga luáguti asálbaruni dándu joun juríu quei joun ja mámabaña juríu.

Láfaagun Páblo lun lafiñeragüdüni Agrípa luágu Jesucrístu

²⁴ Lídan le lariñagunbalin Páblo cátei le buri lídan ladímurejan lueígiñegua, ába lagúaragun Féstó.

—¡Lülüjaali báu, Páblo! Lülügüdá sarágu atúriajani báu.

²⁵ Ába loúnabun Páblo, ába lariñagun.

—Málülünti náu, gumádimati, inárüni le nariñagunbei. ²⁶ Niján urúei Agrípa le subúdíjabúbei lún buri cátei le buídu, ligía gayára lubei nadímurejan ligíbugiñe, furáangu, ladüga choúru nání luágu subúdi láani gíñe sun cátei le asúseredubei lun Jesúsu, ladüga máma cátei le adügüti arámudaguarügü. ²⁷ ¿Afíñetibu luágu le jariñagubei profétagu, urúei Agrípa? Subúdi numúti luágu afíñe ban.

²⁸ Ába lariñagun Agrípa lun.

—¿Jarítaguatibusan luágu baffíñeragüdubadina lan luágu Jesucrístu ítara ufúresen?

²⁹ —Furése yebe, o darása yebe, amúriajatina lúma Búngiu, mámarügü buágu, jawágu gíñe sun ja añájabaña agáambana ugúñe, lun jayábin lun jafíñerun quei nugúya, úouga güringüri jawágu.

³⁰ Lárigiñe lariñaguni Páblo cátei le, ába lásaarun urúei, sará gíñe gumádimati úara túma Bereníce jáma sun ja ñúnbaña ñi, ³¹ ába jadíñurun nígiñe lun jadímurejan luágu cátei le. Jaríñagatí buri jámagua.

—Wügüri le, madügünti ni cáta le lúnti lafarún jilágubei lueígiñe, moún lumuti ni íbini leréderun furísunrugu.

³² Ába laríñagun Agrípa lun Fésto.

—Lun jamúga mamúriajan lan wügüri le lun lagúseragüdüni Augústo César, gayáraati jamúga lígirawagüdün.

27

Loúnajoún Páblo ubúrugun Róma

¹ Lídán le jaráanserunbei lun jóúnajaniwa Itálioun, ába ledéregerún Páblo jáma ja jíbiri adaürütiña lábu laríjin ában sudaara gíriti Júlio, ligía gumándanbei lun jadámurin sudaara le gíribei “lisúdaaranigu Urúei Augústo.”

² Ába wádinagun tídoun ában ugúnein ñübintu Adramítioigiñe lun Ásioun. Ñíñein giñe Aristárco wáma, le Tesalóncana, Tesalónica ában ubúru luáni Macedónia. ³ Larúgan, ligía wachülürün Sidón, lídan fulásu ligía, buíti louseruni Júlio, le gumándan, Páblo, ígira lumúti lun bisída láníña lumádagu lúma lun jeténirun lun. ⁴ Lídan wáfuridun Sidóngiñe, ába woúdin únabugiñe libíti uboúju Chípree ladúga wabánrouñein lan garábali. ⁵ Ába wájiñuraguni barána ligíbugiñe lubéyaari Cilícia lúma Panfilia, ába wachülürün lídoun fulásu le gíribei Míra, ában ubúru luáni Lícia.

⁶ Ñi ladárrira gumándan ában ugúnein Alejandríaana teíbuga Itália, ába ladinagüdüniwa lun wasígiruni waweíyasun. ⁷ Áfayajatiwa jámaru luágu sarágu wéyu, láu lénreengun wachülúra ligíbugiñe ubúru luáni le gíribei Gnído. Queíti wabánroun mémegili lubei garábali, ába wáfayajan únabugiñe libíti uboúju Créta, sügüina wagía ligíbugiñe Salmón, ⁸ wasígira láu méme lénreengun láru láru, ába wachülürün lídoun ában ubúru luáni Buíti Fulásu, yaráfa lun ubúru luáni Laséa.

⁹ Féridijadiwa sarágu dan, dénchajaliti áfayajani baránaja ladúga yaráfaali lidáni luríbouga, sügüjali jafédun juríu le lánina ferúdun figou. Ligía lewéridirunbalíña Páblo, laríñaga joun.

¹⁰ —Aríja numúti luágu denchábei lan weíyaasu le, áni weféridiruboun ugúnein, féridime sun tíla, gayáraabei giñe weféridiruni wabágari.

¹¹ Lubáragiñe ladügün gumándan gásu láu le laríñagunbei Páblo, ába lídin láu le lubeíbei tabúreme ugúnein lúma le abúgajabei. ¹² Queíti mabuídun lubei fulásu ligía lun lásügürün luríba dan ñi, ába jarítangun jibe-ágei luágu buídutima lán yebe lun wáfuridun ñígiñe, lun waríjin ánjein gayára wachülürün Feníce, ában fulásu lání uboúju Créta, lun wásügürüni luríbaniga ñi. Ñi Feníce, níjein barána lueígiñe núru lúma suédi.

Luríba dan baránaja

¹³ Queíti lagúmeserun suédi jámaru, ába jarítangun luágu gayáraabei lan jasígiruni weíyaasu, ábati joudin, ába jasígirun láru láru Créta. ¹⁴ Málüti lueígiñe jáfayarun, ába láfurun ában nodísi jéreti, ¹⁵ ába lagúmeserun abánrenjoun ugúnein. Queíti siñá lan wawáanserun lubároun garábali, ába wígiraguágüdün woúngua lun lanügüniwa. ¹⁶ Ába wásügürün únabugiñe libíti ában liraúraü uboúju gíriti Cláuda, le ñi lubei mére lan láfujan garábali, ába wádinagüdünun tisálufun wagúne to atoujeina wabouñ, láu ában lénreengun. ¹⁷ Lárígiñe wiñúrurun ugúneirugun, ába lásügüragüdüniwa gúrudu tábugiñegiñe ugúnein lun jagúragun, derébugu támaga. Queíti janúfudebei luei jóudin adágaru luágu sándala le gíribei Síрте, ába jagídaraguní

bíra, ába jígiraguagüdün jóungua lun lanügüniwa garábali. ¹⁸ Larúgan, quei jere mémegili lubei dan, ába jagúmeserun achágajei tíla ugúnein baránajoún, ¹⁹ luágu lürüwan wéyu, ába jachágajani lídaangiñe tumégegun ugúnein baránajoún láu jájabu guánarügü. ²⁰ Maríjintiwa wéyu ni warúguma lídan sarágu wéyu, láuti oúnwenbun luriban dan le, féridi wamáali wafíñen luágu weséfuruba lan.

²¹ Queíti sügüjadiwa lubei sarágu dan meíginga, ába laráramun Páblo wádan, ába laríñagun.

—Wügüríña, aríñagatiná yebe jun lun mayábin wamá Crétagiñe, buídutimaati jamúga luei wasúfuriruni dáñu le, áni féridi wamei wálagu. ²² Gagúraasun jumá, úabei ni ában jídaangiñe oúweti, láu sun teféridiruba lan ugúnein. ²³ Chülújali ában láni Búngiu ánjeli númoun áriebe to, loúnagüle Búngiu le Nabúreme le gíñe únbei nesériwida, ²⁴ laríñajare ánjeli ligía nun. “Manúfudedabá, Páblo, ladüga barúfudaguba búngua ligíbugiñe urúei César Augústo, áni badügaba leséfuraña Búngiu sun ja tídaanbaña ugúnein búma luei oúweni.” ²⁵ Gagúraasun jumá lubeiti, ladüga jeménigitina luágu Búngiu, áni chóuru numúti luágu ítara lúba lan quei laríñaguni ánjeli luágu nun, ²⁶ láu sun, wadágaruba lan luágun ában uboúju.

²⁷ Bián dimáasu wáu luágu wawéiyasun, lubáranarugúñadiwa Ádria, labánreinja mémeñadiwa garábali, ligía, amídi áriebe, ába jasándirun mádulungu luágu achülüreina wáña lan luágun múa. ²⁸ Ába jamísurajani lujúlilin dúna, san-wein ugúdi lujúlilin, ábaya jamísurajan jabáruaguóún mémeraü, gádürü-wein-díisi ugúdi. ²⁹ Léti janúfude luei jabúguchun luágu dübü, ába jágurun gádürü oúnguru tiyúnagiñe ugúnein, ába jagúrabajan larúgadun láu idíjeri. ³⁰ Súnti dan le, añája mádulungu asáminara lun jeséfuragun jóungua láu jeibaagun tídaangiñe ugúnein, ába jagúmeserun aráriragüdoún salúfu dúnarugun, jadüga camá jágura oúnguru tígirigiñe ugúnein. ³¹ Ába lawísaruni Páblo gumándan jáma lisúdaaranígu, laríñaga joun.

—Ánjaña meréde ja tídan ugúnein, jugúya siñábei jeséfurun.

³² Ábati jíbuguni súdeara tugúrudun salúfu, ába jígiragüdünnun dúnarugun.

³³ Lubá larúgan, ába laríñagun Páblo joun súngubei lun jeígin, laríñaga joun.

—Bián dimáasu guetó lueigiñe marúmugun jumá buídu, meígin sarágu, ladüga idíjeri le juágubei. ³⁴ Ayúmuraguatina jun lun jeígin, líchuguba érei jun lun jeséfurun. Chóuru numúti jun luágu úabei lan ni ában eféridiruti libágari.

³⁵ Lárigiñe laríñaguni Páblo cátei le, ába lanügün ában fein lújaburugu, ába líchugun eteíngiruni lun Búngiu jagíbugiñe súngubei. Ábati lagúbachagunun, ába leígin. ³⁶ Ába járügüdün ja jíbiri gurásu, ába gíñe jeígin. ³⁷ Bián-sáñadiwa ürüwa-wein-díisi-sísi güriúa tídan ugúnein. ³⁸ Dánti le jóujúña quimúle, ába jáguruni türígu baránajoun lúntima tawálidagun ugúnein.

Tabúluchun ugúnein

³⁹ Dan le larúgadunbei, ibídiñeti fulásu le ní jabei mádulungu joun, ába jaríjin ában beídi gebéaariti, ába jóuchun lun janügünun ugúnein níjin.

⁴⁰ Ába jíbuguni lagürüga oúnguru, ába jígiruni baránaja, ába jasílacürüni fágaayu le esériwidubei lun jabúgurunun ugúnein. Ábati jaweínragüdüni lúgubu bíra, ába tagúmeserun ugúnein ayárafajoúa lun láru béya. ⁴¹ Ába

tídin lídoun ában fulásu le ñi lubei biángua lan ébeeni, ába tadágarun, siñá lánjingichun tígiri ni murúsun, ába tagúmeserun abouchagua tiyúnagiñe, le lére lugúdi barána. ⁴² Ába yebe jabúseerun súdaara jáfaraguniña adaürütiña jilágubei luei janúrajan áfulijeina. ⁴³ Ánjein le gumándan, quei busén lubei leséfuruni Páblo, mígirunti lun jadügüni súdaara le jarítagebei. Ábati laráñagun lun lan jachúbaragun ja gáfulijadibaña baránajoun furúmiñe lun jachülürün múarugun, ⁴⁴ jáme jíbiri, jóudinme ligíbuagu buri fuláansu lúma buri tífe ugúnein. Ítara líña jachülürün sùngubei múarugun séfuñu.

28

Páblo luágu ubóju le gíribei Málta

¹ Dan le séfujadiwa sun wagía lárú béya, ligía wasúbudiruni luágu Málta lan líribei ubóju ligía. ² Buíti jóuseruniwa gürígia ja aganoubaña ñi, ába jáfuragun ában oúnwenbun wátu quei dilíga lubei áni niján júya ájuya, ába jamísurajaniwa sun wagía lun wabácharagun. ³ Ábati labúdajan Páblo wátu mábeiti, líchuguñein yebe wáturugun, ligía táfuridun ában jéwe tanúrajaña luei lára wátu, ába tárügüdün luágu lújabu, ába tágürüni. ⁴ Dan le jaríjbarun lílana fulásu jéwe to dawágu luágu lújabu Páblo, ába jaríñagun jámagua.

—Mósu ában lan wügüri gáfarajati wügüri le, láu sun leséfurun baránajagiñe, mabúseerunti Búngiu lun labágaridun.

⁵ Ába láfuridunun Páblo jéwe wáturugun, masúseredunti ni cáta lun. ⁶ Agúrabiñá yebe sùngubei láludun lújabu, o lábúrujan lan ouwe. Lílúwagu jagúraban, dan le jaríjinbei luágu masúseredun lan ni cáta lun, ába lasáansirun jarítage, ába jagúmeserun aríñaga luágu ában lan búngiu Páblo.

⁷ Yaráfa lun fulásu ligía, ñíñein lufúlasun ában wügüri le weírgutimaabei lídan sun ubóju ligía, Públio líribei, resíbi lumútiwa lúbiñe, seríwi láwa buídu luágu ürüwa wéyu. ⁸ Roun líñáti lúguchi Públio láu sándi, abírúau, lúma denési. Ába lídin Páblo aríjei, lásun layúmuragun lun Búngiu luágu, ába líchuguni lújabu luágu, ába lareídage. ⁹ Lárigiñe lira, ába gíñe jayábingua jíbiri sánditiña ja lídaanbaña fulásu ligía, ába jareídage. ¹⁰ Ába jarúfuduni lubuídun jagáburi woun, edéweejatiña sarágu cátei woun, lárigiñe, dan le lachülürün dan lúnya wádinagun lun wasígiruni waweíyasun, ába jíchuguni sun le wemegeirubei woun lun waweíyasun.

Lachülürün Páblo ubúrugun Róma

¹¹ Lárigiñe ürüwa játi wáu luágu ubóju ligía, ába wádinagun tídoun ában ugúnein to eréderuboun ásügürei luríbouga ñi luágu ubóju ligía. Alejandríana ugúnein tugúya, ñíñanu jayáwa bián sándu luágu tigíbu ugúnein tugúya, Cástor lúma Pólux. ¹² Ába wachülürün ubúru Siracúsa, ába weréderun ürüwa wéyu ñi, ¹³ ñígiñe wasígira lárú lárú darí wachülürün ubúru Régio. Larúgan, ába láfujan suédi, luágu libíaman wéyu ába wachülürün lídoun liraúraü aüdü le gíribei Puteóli. ¹⁴ Ñi wadárira átiri afíñetiña, ába jamísurajaniwa lun weréderun ában dimáasu jáma, lárigiñe, ába wígragüdün lun ubúrugun Róma. ¹⁵ Agáambaña afíñetiña ja Rómabaña wawágu luágu awánte lan, ába jóudin wabároun, jíbiri chülü lúmoun fulásu le gíribei Fóro, le luágubei úma gíriti Ápio, jíbiri, dúnguatiña wáma lídan fulásu le gíribei Ürüwa Jában Chülüdügütiña. Dan le laríjbalíña Páblo, ába líchugun eteíngiruni lun Búngiu, ába lárügüdün gurásu. ¹⁶ Dan le

wachülürünbei Róma, ába ledéregeruniña gumándan adaürütiña lun jábuti oúnigirutiña, ánjeinti Páblo, ígira lumúti lun leréderun lábugua láu ában súdaara oúnigirei.

Lapúrichijan Páblo Róma

¹⁷ Ürüwa wéyu lárigiñe lachülürün Páblo, ába loúnajan jawágu juríu weírígutiña ja Rómabaña, dan le adámuriguaña, ába laríñagun joun.

—Nidújeñu, láu sun madügün nan ni cáta wuríbati joun juríu, ni lun le uágubei jéchuda binádu wagübürigu, derégawatina dáüwañu joun Rómána ubúruğu Jerusalén. ¹⁸ Lárigiñe jálügüdágúnina, álugatiñá yebe jígiragüdünina ladüga madári jamá nidúnrun le lúnti náfarúniwa jilágubei lueígiñe, ¹⁹ májatiña juríu lun nígirawagüdün, ába namúriajan lun urúeiba lan César agúseragüdána, láu sun madúnrun jamá ninásiñun nun. ²⁰ Ligía lubeíti lébubei nouúnajan juágu lun naríjinün lúma lun nadímurejan jun, ladüga lueígiñe cátei le uágubei weménigida wagía Israelítagu anája lubeí gürágu láu güríngüri le.

²¹ Ábati jariñagun lun.

—Wagía, merésibirúngidiwa ni ában gárada buágu Judéagiñe, úgali giñe ni ában wapaísanu jádaangiñe ja nübinbaña ñígiñe aríñaguti wuríbati woun buágu. ²² Buséntiwa jamúga wagáambuni ca lan barítagebei, ladüga subúdi wamúti luágu adímurejóta lan wuríba luágu iséri adámurini le, le lánina lémeri Jesúsú, lídan sun fulásu.

²³ Ábati jíridun ában wéyu lun, ába jachülürün sarágu gürígia le ñí lubei lagánawa Páblo. Ába ladímurejan joun lúmagiñe bináafin darí gúñoun luágu larúeijan Búngiu. Louchun lun lafiñeragüdúniña luágu Jesúsú lan asálbaragüleibe le jagúrabajabei láu layúsuruni lilúrudun Moisés lúma le jabürüjabei profétagu. ²⁴ Jíbiri, afiñetiña luágu le laríñagubei Páblo, jíbiri mafiñetiña. ²⁵ Queíti múaradun jamá jámagua luágu jarítangun, ába jagúmeserun ñüdüngua, ábati laríñagun Páblo joun.

—Ligía laríñagunbei Sífiri Sándu joun binádu wagübürigu lídaangiñe proféta Isaías.

²⁶ Beíba, baríñagame joun gürígia ja juríubaña.

Jugúya, jagáambuba ában ugánu sarágu dan, úabei gunfaráanda jumáni laníchigu dimúrei le jagáambubei.

Jaríjuba sarágu cátei, meféenbadün luágu,

²⁷ ladüga deréeru janígi gürígia ja, áni wuríbati jagáambun,

darú jamuti jágu, lueí jaríjini laníchigu cátei le jaríjubei,

úati giñe gunfaráanda jamáni cátei le jagáambubei,

derétu giñe janígi,

máluajan jamútina lun nareídaguagüdünun jawáni.

²⁸ Subúdi jumeí luágu oúnaja láali lan Búngiu ugánu luáguti Jesúsú le méme Wasálbaragüleibe joun ja mámabaña juríu, áni jagía, jánjaruba lun.

²⁹ Dan le laríñagunbei Páblo ítara, ába jóüdingua juríu, adímurejeina jámagua luágu cátei le.

³⁰ Reideiti Páblo bián irúmu dayáruti tídan lúban ájayajoútu, resíbi lumútiña sun ja ñüdünbaña aríjei. ³¹ Apúrichijati luágu larúeijan Búngiu láu furáangu, arúfudaja ligía luágu Wabúreme Jesucrístu, mebérésejanga ni ában lun.

LIGÁRADAN PÁBLO JOUN RÓMANA

Labürüjan Páblo joun tílana liglisi to Rómaboun

¹ Anája áu, Páblo, nabürüjañoun gárada to jun, jugúya lánigu Búngiu ja aganoúbaña ubúругu Róma. Aban esériwiduti lun Jesucrístu áu, anúadira lumútina Búngiu lun lánibadina lan apóstolu, ába loúnajanina lun nasúbudiragüdüni ugánu luáguti Wasálbaragüle le aráanse láalibei jaba gürígia. ² Sabúdigüda lumúti Búngiu ugánu le lúmagiñé meja binárü jádaangiñe profétagu, bürúwati le jadímurejabei tídan Lerérun Búngiu. ³ Núbinti asálbaruni ligía woun lídaangiñe Wabúreme Jesucrístu. Gürígia uboúaguna Jesucrístu, Búngiu méme giñe. Queisi gürígia, jádaangiñeti méja lufámilian Urúei David Jesucrístu, ⁴ arufudúati luágu Liraü lan Búngiu láu luweírín miláguru le ladügübei láu lásaaragüdüni Jesucrístu lídaangiñe ouweni. ⁵ Fuleísei lumútiwa Búngiu lídaangiñe Jesucrístu lun loúnajaníwa lídan líri lun wasúbudiragüdün joun gürígia luágu queisi Wasálbaragüle lídan sun fulásu, gayára lámuga jafiñerun luágu, adüga jameíme le lubeíbei. ⁶ Anjünjein jagánagua gürígia jagía, jugúya le únbei lagúara Búngiu lun lánigu jumá Jesucrístu.

⁷ Nabürüjaña lubeíti jun, jugúya le aganoúbei ubúругu Róma, ja jínsiñebaña lun Búngiu, wa ligía jun lun jabágaridun ában íbágari derégeguañu júngua lun. Ibíja jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Busénti Páblo lídin Róma

⁸ Furúmiñeti cátei le nabúseerúbei jasúbudirun, luágu luweírín neteingiruni Nubúngiute lídaangiñe Jesucrístu juágu, sun jugúya, lugúndun adímurejoúati luágu jafiñen luágu Jesucrístu lídan sun fulásu. ⁹ Áni Búngiu, le únbei nesériwida táu sun nanígi apúrichijeí ugánu luáguti Liraü, geféenti luágu luweírín nayúmuragun juágu súnwandan lídan nayúmuragun lun. ¹⁰ Amúriajatina lúma Búngiu súnwandan lun madísebei lan wéyu ligía lun gayáraabei lan nídin aríjaün, ánjein ligía lubeí lugúndaanbei. ¹¹ Lugúndun buséntina naríjinün lun níderagunün lídan jafiñen, lúntima derégüdagu jumá, ¹² lun giñe wíchugun gurásu wádaangua láu afiñeni le wawágubei.

¹³ Nidújeñu, buséntina jasúbudiruni luágu álugaadina lan nídin aríjaün sarágu weíyaasu, siñágili nídin. Álugaadina nídin lun níderagunün lídan jawáanserun lídan jeibugun lúma Búngiu, queisi naríjini jawáanserun jíbiri afiñetiña lídan buri ámu fulásu. ¹⁴ Lúnti níderaguniña sun gürígia, dándu ja chülüguatiña queisi ja machúlaaguntiña, dándu chu táu queisi íbídiougua táu. ¹⁵ Lueígiñe lubeíti noubadina, buséntina giñe lun napúrichijani ugánu luáguti Wasálbaragüle jun, jugúya le aganoúbei ubúругu Róma.

Lubáfu ugánu lánina asálbaruni

¹⁶ Úati nibúsigari nan láu ugánu luáguti Wasálbaragüle, lugúndun níjein lan lubáfu Búngiu lídan ugánu ligía lun lasálbaruniña sun ja afiñebaña luágu, jurífu furúmiñe, lárigiñe, ja mámabaña juríu. ¹⁷ Arúfuda lumúti ugánu ligía woun ída líña lan larícharaguagüdüniña Búngiu gürígia ligíbugiñe, lun gayáraabei lan lerésibiruniña queisi lánigu. luwúyeri igáburi ligía, láurügü lafiñerúniwa luágu, libijúa. Ítara líña taríñaguni Lerérun Búngiu. “Le

gürigia le richáguabei ligíbugiñe Búngiu láu laffiñerun luágu, libíjubei ibágari magúmuchaditi.”

Jadúnrun gürigia ligíbugiñe Búngiu

¹⁸ Arija wamúti láburujan lanárimel ligáñi Búngiu siélugiñe jawágun sun gürigia ja wuríbabaña, jáma ja minébenejabubaña lun, ja mígirunbaña lun lasúbudirúniwa linárün Búngiu, lurúma jaríban. ¹⁹ Subúdi jamúti le gayáraabei lasúbudirúniwa luágu Búngiu buídu buídu lugúndun ligía guánarügü arúfuda láali joun, ²⁰ le marijínbei luágu Búngiu, gayáraati lasúbudirúniwa láu buri cátei le ladügübei. Arijúaali furáangu lúmagiñe lagúmeserun uboand luágu Búngiu lan ligía, luágu gíñe Súnti Gabáfu lan ligía lun súnwandan. Gadúnrunjaña lubeíti luágu jaríban, ²¹ lugúndun láu sun subúdi jamáni Búngiu ítara, míchugugiña inébesel lun queisi Búngiu, meteíngirun jameí. Queisi libídiouniga láu ligáburil jarítangun luágu Búngiu, fériril jamúti murúsun larúgounga luágu Búngiu lé meja jabíjibeil. ²² Láu sun aríñaga jamá luágu chu lan jáu, ibídiouguatil jáu, ²³ lubáragiñe jájuduragun lun Búngiu le weírigubeil, le móuwedadibeil, jájuduraguarüga joun jayáwa gürigia ja goúwedaditiña, lúma gíñe joun jayáwa dunúru, jéwe jáma anímaalu ja gádürügua tugúdi.

²⁴ Ligía ígira láaña lubeil Búngiu láu luríban ayúmajani le gádaanbaliña, daril lún buri jadügün cáteil buri nibúsigarídünatil jámagua. ²⁵ Ítara líña ligáburil jabágaridun lugúndun maffiñerun jamá luágu inárüni luágutil Búngiu, jaffiñeril luágu iyéeni, jájuduragua láu inébesel lún buri cáteil le ladügübei Búngiu lubáragiñe jamúga jájuduragun lun Búngiu, le gadúnabei inébesel súnwandan. Ítaralá.

²⁶ Ligía ígira láaña lubeil Búngiu lun jadáagun cáteil nibúsigarídünatil, ásta wúriña adáagutiña cáteil jáma wúriña jáledil lubáragiñe jamúga jagámaridun wügüri queisi lubúdubul. ²⁷ Ítara méme gíñe ígira jamáali wügüriña jayúsurun wúriña lun jayúsuragun jóungua. Adáaguatiña wügüriña cáteil buri nibúsigarídünatil jámagua, ábatil jasúfurirunil lafáyeirujajawíye jawóugua.

²⁸ Queísitil mabúseerúnjañal lan jíchugunil lilúgaarun Búngiu lun, ígira láañatil láu lagübüiril jasáminan, lun jadügünil le móun lubeil jadügünil. ²⁹ Buin jáñal láu sun luwúyeril maríchaü, salúfural, wuríbanil, meménijabunil, iyéreejabunil, gimúgaü, áfarajadil, lanígiwal wuríbul, ayéeragunil, ibíibunil, marásualugul. ³⁰ Adímurejatíñal wuríbal jawágu jíbiril gürigia, iyéreegutil Búngiu joun, minébenejabutiña, barúguatiña jóungua, pántatiña. Gachügütiñal lun jaságarun iséiril buri cáteil wuríbatil, mabájüdüñ jamútiñal jagübürigul, ³¹ ibídiouguatil jáu, magúnfulirun jamútil jerérun, mínsiñejabutiñal nil ca un, úatil ferúdunajamá, magúdemejabutiña. ³² Subúdi jamútil le laríñagubeil Búngiu buídu buídu, subúdi jamútil luágu jal lan adügütíl buri cáteil le, lúntil lan jóunwen lueígiñe. Láu sun líra, adúga méme jamútil, daril lun gúnda jamá dan l jasáminan, lun jadügünil lee jaríjin ámu gürigia adúgeil.

2

Agúseragüdüatil Búngiu láu inárüni

¹ Ligía gadúnrun lubeil le adímurejabeil luágu le ladügübeil ámu, cáteíñein lan, lugúndun dan le ladímurejan luágu wuríbanil le ladügübeil ámu, líchuguña guánarügü dúru luóúgua, lugúndun líbe méme gíñe cáteil wuríbatil

ligía ladügübei. ² Subúdi wamúti luágu láu lan inárüni lagúseragüda Búngiu dan le lasíadiruniña ja adügübalin buri cátei l jasáminan, lun jadügüni lee. ³ Bugúyati le adímurejabei jawágu ja adügübalin buri cátei wuríbati le, áni ligía méme gíñe badügübei, ¿jarítaguatibu funági luágu beséfuruba lan lueí ligáñi Búngiu? ⁴ ¿Ódi mebésentibu láu lareíni Búngiu le magúmuchadibeí lúma lugúraasun, ibídiñounga bun luágu arúfuda láani Búngiu lareíni bun lun gayáraabei lan basáansiruni bigáburi, máma lun basígirun afigounja? ⁵ Derétu banígi, májatibu basáansiruni bigáburi. Ligía abúnja lubeí agánwoundagüda lafáyeija bífígoun lubáme luwéyuri lagúseragüdün Búngiu dánme liábin lun líchuguni lisíadin le richábei, ⁶ dánme le lafáyeiruni cáda ában según le ladügübei. ⁷ Líchuguba íbágari magúmuchaditi joun ja áluajabalin uweíriguni, inébesei, lúma cátei lé buri magúmuchaditi yágüta siélu láu jadügüni le buídubei súnwandan ya ubouágu. ⁸ Ánjaña sun gürígia ja magáambadibaña lun Búngiu, ja májabaña lun jafálaruni linárün Búngiu, jafálaréi wuríbani, lafáyeirubaña Búngiu láu sun ligáñi. ⁹ Níjeinbei asúfuriruni lúma igárigu joun sun ja adügübalin le wuríbabei, joun juríu furúmiñe, lúma gíñe joun ja mámabaña juríu. ¹⁰ Ánjeinti joun sun ja adügübalin le buídubei, líchuguba Búngiu uweíriguni, inébesei, lúma darángilaü, juríu furúmiñe, lúma gíñe joun ja mámabaña juríu. ¹¹ Lugúndun ában lan lanügüniña Búngiu sun gürígia. ¹² sun ja afigounjabaña masúbudirunga jameí lilúrudun Búngiu le ledéregerubei joun gürígia lídaangiñe Moisés, jagúserawagüdüba bougudin lueí lúrudu ligía, tidiba jawáni máfiougatin. Játi afigounjabaña láu sun subúdi jamáni lilúrudun Búngiu, jagúserawagüdüba láu lúrudu ligía, tidiba gíñe jawáni máfiougatin. ¹³ Lugúndun máma ja agáambarügübalin lúrudu richáguabaña ligibugiñe Búngiu, anáti ja agúnfulirubalin. ¹⁴ Játi mámabaña juríu, ja ibídiñejabubaña lun lilúrudun Búngiu, gayáraagili jadügüni le lubeíbei Búngiu láurügü lariñagun jarítagun guánarügü joun luágu le buídubei lúma le wuríbabei. ¹⁵ Láu jagáburi, arúfuda jamúti luágu níjein lan lilúrudun Búngiu bürüñu tidan janígi, arúfuda tumúti janígi líra, áni lariñagubei jarítagun joun ánjein gadúnrun jabeí lúmoun madúnrun jamá. ¹⁶ Luágume wéyu le lagúseragüdüniña Búngiu sun gürígia lídaangiñe Jesucrístu, larítaguba luágu sún buri cátei le, ladüga lagúseragüdübei gíñe ásta cátei lé buri arámudagüabei tidan wanígi. Ítara lúba según ugánu luáguti asálbaruni le napúrichijabei.

Juríu lúma lilúrudun Moisés

¹⁷ Ánjein bugúya le pántabei luágu juríu ban, luágu bárügüdün luágu lilúrudun Moisés lun basálbarun, luágu Búngiu lan le inárüniti Bubúngiutebei. ¹⁸ Subúdi bumúti lugúndan Búngiu, áni arúfudajati lilúrudun Moisés bun lun banúadajani cátei le buídutimaabei. ¹⁹ Jarítaguatibu búngua luágu gayára lan badúndejan maríjintiña lídoun üma buíti lúma luágu gayára lan bíchugun larúgounga joun ja eíbubabaña lídan lubúriga. ²⁰ Jarítaguatibu luágu gayára lan barúfudajan joun íbidiounga táu luágu Búngiu, lúma lun barúfuduni üma joun ja isérigiñabaña lídan jaffínen, queísi barítagun luágu íbíja báani sun subúdi lúma inárüni lídan lilúrudun Moisés. ²¹ Wel, ánjein lubeíti arúfudaja bubeí joun ámu, ¿cági uágu marúfudajan bubeí bun guánarügü? Ánjein apúrichija bubeí luágu lúnti lan míwerujoún lan, ¿cági uágu bíweruja? ²² Ánjein aríñaga bubeí luágu moún lumuti

lan jagámaridúniwa jámari gürígia maríeitiña, ¿cámegi badúgei? Ánjein iyéreegu lubei cátei lánina sándu bun, ¿cámegi bádaragua búngua lídoun buri cátei jánina sándu láu bíwerujani tirísín jalígílisin? ²³ Pántatibu láu lilúrudun Búngiu, ába bíchugun minébesi lun Búngiu láu magúnfulirun báani. ²⁴ Tinárün Lerérun Búngiu dan le taríñagunbei. “Jídaangiñeti, jugúya juríu, jadímurejanbei ja mámabaña juríu wuríba luágu Búngiu.”

²⁵ Adüga jumúti jugúya juríu igáburí le circuncisión lé meja liseíni lidáradun Búngiu jáma lánigu. Buíti igáburí ligía ánjaün agúnfulira lúma líbiri lilúrudun Búngiu lé meja líchugubei joun lánigu lídaangiñe Moisés. Ánjein magúnfulirun jumá, manügünti circuncisión ni cáta jun, queígubeirügü madügüniwa lan. ²⁶ Gürígia ja mámabaña juríu, ánjein jadüga buri cátei le lubeíbei lilúrudun Búngiu, janügüba queísi lánigu Búngiu láu sun merésibirun jamáni circuncisión. ²⁷ Gürígia ja merésibirubalin circuncisión, ába jagúnfulirun lúma lilúrudun Búngiu, jarúfudunbei jidúnrun, jugúya le resíbi jumáalíbei circuncisión, ja magúnfulirunbalin Lerérun Búngiu, láu sun jun lan labürüdüwa. ²⁸ Le juríubei le tímatimaati, máma bougudigiñerügü libíti juríu lan, máma gíñe láurügü wadügün cátei le bouguditi wabíti lánigu wamá Búngiu. ²⁹ Láu wafálaruni Búngiu táu sun wanígi, lánigu wagía le tímatimaati, wáfaaguba táu sun wanígi lun wadügüni lugúndan, lugúndun ni cáta circuncisión lun Búngiu. Ítara líña lubeíti, gürígia le lánigubei Búngiu tídaangiñe lanígi, ligía buídubei ligíbugiñe Búngiu íbini jarítagun gürígia luágu mabuídun lan.

3

¹ Queísi ítara líña lubeí, ¿jalíañeinti jagáñiragüle gürígia lueígiñe juríu jamá? ¿o cági lubuíduña lerésibirúniwa circuncisión? ² Sarágu, áni gíbeti gíñe lébuna. Furúmiñeti cátei, rúlumuti Búngiu lerérun joun juríu. ³ Ánjaña ñi jádaangiñe juríu, múaraantiña lúma Búngiu, ¿magúnfulirunbei funági Búngiu láu lerérun ladüga líra? ⁴ ¡Máma líña! Lubáragiñe líra, lagúnfuliruba Búngiu láu lerérun láu sun yé jama sun gürígia ubouágu. Taríñajare Lerérun Búngiu.

Babájüdüba queísi richáti lídan le baríñagubei, áni buídubei báfuridun dánme le bagúserawagüdün.

⁵ Ábanya áltügüdajani. ánjein seríwi lubeí luríban wagáburí lun larúfuduni luágu richágua lan Búngiu, ¿cábagi waríñaga? ¿Maríchati funági Búngiu lugúndun larúfuduni ligáñi luágu luríban wagáburí? (Nadímurejañatia queísi gürígia.) ⁶ ¡Máma líña! Lugúndun lun jamúga múaran lan Búngiu, ¿ída líña jamúgagi lagúseragüdúniña gürígia?

⁷ Ánjein gíñe seríwi lubeí wayéeni lun weírigutimá lan linárün Búngiu, ¿cáti uágu laríñawagúa wawágu luágu gafígoun wamá? ⁸ ¿Lúnti lubeí jamúga ladügün wuríbani lun larijóuniwa le buídubei? Niján cátei le jariñagubei sarágu gürígia luágu ligía lan warúfudajabei. Gürígia ja aríñagubaña ítara, lúnti jamúga jasiádirúniwa.

Sun wagía gadúnruntiwa ligíbugiñe Búngiu

⁹ ¿Ída líñági? ¿Buítimaatiwa wagía juríu sügü jáu gürígia ja mámabaña juríu? ¡Uá! Lugúndun arúfuda wamáali luágu dándu lan juríu queísi máma juríu lábugiñeñanu lubáfu figóu. ¹⁰ Taríñajare Lerérun Búngiu.

Úati ni ában gürígia richáguati ligíbugiñe Búngiu, ni íbini ábanrügü,
¹¹ úati ni ában ánjaruti lun gunfaráanda lan,

úati ni ában áluajati Búngiu.

¹² Yuríguaaña súnqubei, ñüdünjaña lídoun féridi.

Úati ni ában adügüti le buídubei, ni íbini ában.

¹³ Eyéeraguatiña láu jayúma,

júnren líña jayúma lun jadímurejan lagübüri dimúrei le mínsiñeguti

queísi limínsiñegun líjeme umúajaü júnren lárigiñe líchugúniwa jiláali ñíjin.

Yúsu jamúti jayúma lun jagádeirun jíri gürígia furése queísi láfarajan luepeísini jéwe.

¹⁴ Anábajani rügüñein jadímurejan lau jeyéreejabu.

¹⁵ Furéseti jagúdi lun jóudin áfaraja.

¹⁶ Barüti jagáburi gürínguaü lúma igárigu,

¹⁷ áni íbídiñeti úma lánina darángilaü joun.

¹⁸ Marítagungubeítiña luágu lanúfudewa lueí Búngiu.

¹⁹ Subúdi wamúti luágu sun lan le laríñagubei binádu lilúrudun Búngiu, joun lan ja lábugiñebaña lúruđu ligía laríñagei, lun jasúbudiruni gürígia jagía luágu gafígoun jamá. Ítara líña lubeíti, gadúnrun jamá sun gürígia ligíbugiñe Búngiu, dándu juríu queísi ja mámabaña juríu. ²⁰ Lugúndun úabei ni ában eréderuti richágu ligíbugiñe Búngiu lueígiñerügü ladügüni le lubeíbei lúruđu, lúnrügü lasúbudiragüdüni lúruđu woun luágu gafígoun wamá lesériwida.

Lídaangiñe afíñeni liábin asálbaruni

²¹ Guetóti arúfuda láali Búngiu woun ída lúba lan ligáburi gayára lan weréderun richáguañu ligíbugiñe bougudin lueí lúruđu lé meja líchugubei lídaangiñe Moisés. Gayáraati wasúbudiruni líra láu walíjanun lilíburuna to meme lilúrudun Moisés, túma jalíburun profétagu. ²² Láu wafíñerun luágu Crístu, gayára lan weréderun richáguañu ligíbugiñe Búngiu, áni ában lan ladügüni Búngiu líra joun sun gürígia, ²³ lugúndun afígounjaaña sun gürígia áni siñáti lagúndaarun Búngiu jáu. ²⁴ Láu lareíni Búngiu, resíbi lumútiña sun gürígia queísi lánigu, mafáyeijaanga jagía luágu, lugúndun fáyeijali Crístu luágu wafígoun lun gayáraabei lan weréderun richáguañu ligíbugiñe Búngiu. ²⁵ Adügati Búngiu lun lébunabei lan ferúdn Crístu láu loúnwen luágu wafígoun, áni lídaangiñe wafíñerun luágu queísi Wasálbaragüle liábin ferúdn woun. Láu loúnwen Crístu queísi afáyeiragülei luágu figóu, ába larúfuduni Búngiu luágu úragua lan áni iyéereguti figóu lun. Ába lachíbuni líta Crístu jafígoun gürígia já meja aganoubaña lídan dan le sügüjalibei, le uágubei mafáyeijagüdüñ lúbaña lan, ²⁶ chibá lumuti gíñe jafígoun ja aganoubaña lídan buri dan le, lun larúfuduni luágu úragua lan, áni sun ja afíñebaña luágu Jesucrístu queísi Jasálbaragüle barü lumútiña queísi úraguatiña.

²⁷ Queísiti ítara líña lubeí, ¿cáti asúseredubei lun japántan gürígia luágu lubuidun jagáburi? Gumúguati. ¿Cági uágu? Lugúndun lun jamúga gayára lan wasálbarun láu lubuidun wagúnfulirun lúma binádu lilúrudun Búngiu, gayáraati jamúga wanáangun woúngua, queísi sálbañu wáña lubeí láurügü wafíñerun luágu Crístu, gumúgua lébuna wanáangun woúngua. ²⁸ Subúdi wamáali lubeíti buíđu luágu resíbi láani Búngiu gürígia le afíñeti luágu Crístu queísi gürígia richáguati, mebérésegúnga ánjein gúnfulijali lubeí lúma lilúrudun Moisés lúmoun magúnfulirungili lan.

²⁹ ¿Juríu rügüñanu funági Gabúngiutei Búngiu? ¿Ma funági gíñe Jabúngiute ja mámabaña juríu? Jabúngiute gíñe, ³⁰ lugúndun ában rügüñein

Búngiu, le erésibirubaliña sun gürigia ja afiñebaña luágu Jesucristu queísi Jasálbaragüle, mebésesenga ligía ánjein resíbi jabálin circuncisión lúmoun merésibirun jamáni. ³¹ ¿Wayúsuruñein lubeíti afiñeni luágu Cristu lun warúfuduni luágu mebégi lan binádu lilúrudun Búngiu guetó? ¡Uá! Lubáragiñe líra, warúfuduñein luágu buídu méme lan lúrudu ligía.

4

Jémpulu luáguti Abrahám

¹ ¿Cábati waríñaga luágu Abrahám, le binádu wáguchi, wagía juríu? ² Lun jamúga lueígiñe lan ladügün cátei buíti lerésibirei Búngiu queísi ában gürigia richáguati, gébunati jamúga lapántajan, máma ligíbugiñe Búngiu. ³ Tariñajare Lerérun Búngiu. “Afiñetí meja Abrahám luágu Búngiu, luágu lafiñen lerésibirei queísi wügüri richáguati.” ⁴ Dan le ladügün gürigia ában wadágimanu, fáyeiti le libíjubei lebégi luwádigimari, máma edéweejani. ⁵ Ánjeinti gürigia le asálbaruti lídaangiñe lifígoun láurügü lafiñerun luágu Búngiu le erésibirubaliña gafígountiña, lerésibirubei Búngiu queísi ában gürigia richáguati luágu lafiñen, anáti líra, edéweejani. ⁶ Davíd guánarügü adímurejati luágu jagúndan gürigia ja lerésibirubaña Búngiu queísi richáguatiña luágurügü jafiñen, mebésesenga ligía ca lán meja jadügübei. ⁷ Laríñajare Davíd. Gúndaatiña gürigia ja ferúduna lubáña Búngiu jaríban, áni chibáwa ligía jafígoun.

⁸ Gúndaati gürigia le lanügübei Búngiu queísi gürigia mafígounjaangili.

⁹ ¿Jóunti rügüñein funásan ja erésibirubalin circuncisión, ódi jóunti gíñe ja merésibirunbalin? Jóunti sun jawúyeri gürigia ugúndani ligía. Aríñagaadiwa luágu resíbi láani Búngiu Abrahám queísi wügüri richáguati, luágu lafiñen. ¹⁰ ¿Ída bugági lerésibirei, lárigiñe lerésibiruni circuncisión ligía ódi lubáragiñe? Máma lárigiñe, lubáragiñe. ¹¹ Lárigiñe larúfuduni Abrahám lafiñen luágu Búngiu, ligía lerésibiruni circuncisión queísi seíni luágu resíbi láali lan Búngiu queísi wügüri richáguati ladüga lafiñen luágu. Ítara líña gíñe liábin Abrahám lun jáguchibei lan sun ja afiñebaña luágu Búngiu merésibirunga circuncisión, áni resíbi lumútiña gíñe Búngiu ítara queísi richáguatiña. ¹² Jáguchi gíñe ja resíbi jamáalibei circuncisión Abrahám, ja afiñebaña luágu Búngiu queísi lafiñerun Abrahám lúmagiñe lubáragiñe meja lerésibiruni circuncisión.

Gúnfuliti Búngiu láu lerérun

¹³ Aríñagatí meja Búngiu lun Abrahám luágu líchugubei lan ubou lun jáu sun linébaanfaangu queísi jalágaante, máma ladüga lagúnfuliruni Abrahám lilúrudun Búngiu líchugúa dimúrei le lun, ladüga lafiñerun luágu Búngiu, ába lerésibiruni Búngiu queísi ában wügüri richáguati. ¹⁴ Lun jamúga já rügüñanu lan íchugubalin jeménigi luágu jagúnfulirun lúma lilúrudun Búngiu erésibira alágan, málati lubeíti jamúga jafiñerun ja eménigidubaña luágu jafiñen luágu Búngiu lun jerésibiruni. Málati jamúga gíñe dimúrei le líchugubei Búngiu luágu alágan lugúndun lídan linárün cátei, mabáfutiña gürigia lun jagúnfulirun lúma lilúrudun, ¹⁵ barürügü lumúti lilúrudun Búngiu ligáñi jawágun gürigia luágu magúnfulirun jamáni. Ánjein le ní lumuti úa lan lúrudu, úati gíñe dúru luágu ladúraawagún.

¹⁶ Ligía, lun lubeí derégüda lan dimúrei le líchugubei Búngiu lun Abrahám joun sun linébaanfaangu, lúnti méja ábanbei lan edéweejani

luágurügüti afiñeni. Mámarügü jounti ja lábugiñebaña lilúrudun Búngiu le líchugubei joun juríu lídaangiñe Moisés dimúrei ligía, jounti giñe sun ja mámabaña juríu áni máma giñe lábugiñeñanu lúrudu ligía, ába jafiñerun luágu Búngiu queísi lafiñerun Abrahám luágu. ¹⁷ Ligíbugiñe Búngiu, ñübinti lubeíti Abrahám lun wáguchibeí lan sun wagía le afiñebei luágu Búngiu, queísi tariñagun Lerérun Búngiu. “Adüga náadibu lun jáguchi ban sarágu mútu.” Gabáfuti Búngiu lun ladügüni líra queísi gabáfu lan lun líchugun ibágari joun jiláaña, ñjeingüdaleí buri cátei le úagili.

¹⁸ Láu sun uá lán yebe eménigini luágu Abrahám lun garaü lan ladüga weíyaali lan, weíya tugúya Sára, afiñeti dán meja le lariñagubei Búngiu lun luágu ítara lúba lan jíbe ladügewagun queísi warúguma. Ába lasúseredun ítara lun jáguchibeí lan sarágu mútu. ¹⁹ Meféridirun lumúti lafiñen luágu dimúrei le lariñagubei Búngiu lun, láu sún meja yaráfaali lan lun lagúnfulirun san irúmu, áni weíyaaru giñe Sára lun tagáraüdün. ²⁰ Malouguadunti lafiñen luágu dimúrei le lariñagubei Búngiu lun, weíritimáarügüti lafiñen. ²¹ Rúti uweíriguni lun Búngiu láu ában ichouruni le tímatimaati luágu gabáfu lan Búngiu lun ladügüni sun le uágubei lariñaga. ²² Ligía lerésibirunbalin Búngiu queísi wügüri richáguati, luágu lafiñen.

²³ Cátei le, luáguti lerésibiruniña Búngiu güri-gia luágu jafiñen, mámarügü luágu Abrahám labürüjoúa, ²⁴ labürüjoúña giñe wawágu. Lugúndun luágu wafiñen, resíbi lumútiwa giñe Búngiu queísi richáguatiña, wagía le afiñebei luágu le ásaaragüdübalin Wabúreme Jesúsu lídaangiñe ouweni. ²⁵ Jesúsu le edéregerúabei lun loúnwen luágu wafígoun, ába lásaarun lídaangiñe ouweni lun larúfuduníwa richáguañu ligíbugiñe Búngiu.

5

Niján lébubei weréderun madúnrun-ga

¹ Queísiti resíbi láadiwa lubeí Búngiu láu wafiñerun luágu, lídaanjadiwa dan lúma, lídaangiñe Wabúreme Jesucrístu. ² Ladüga Crístu, biníwadiwa lubeí láu wafiñen luágu, derégüdagu wáña lídan lareíni Búngiu, áni gúndaatiwa láu eménigini luágu gafáanranbadiwa lan lídan luweírigun Búngiu. ³ Áni máma rügüñein líra, gúndaatiwa giñe lídan wasúfurirun ya ubouágu, lugúndun subúdi wamúti luágu ru lan asúfuriruni gurásu woun, ⁴ buídugüda lumúti gurásu wagáburi, áni láu líra, gayára lan weménigidun lun gafáanranbadiwa lan lídan luweírigun Búngiu yágüta siélu. ⁵ Áni máburujanbei warúna lurúma eménigini le, ladügübei Búngiu le aríñaga láalibeí woun ladüga línsiñejabu woun. Sandí wamaali línsiñejabu, buíngüda láaru wanígi láu línsiñejabu, láu Sífri Sándu le rúlaalibeí woun.

⁶ Ladüga línsiñejabu Búngiu woun, queí meja le mabáfu wabeí lun wasálbaragun woúngua lídaangiñe figou le gádaanbaliwa, ába loúnajani Crístu lídan óra le lanúadirubei lun loúnwen wawágu, wagía le gafígounbei. ⁷ Máma cátei ménreengunti lun loúnwen ában güri-gia jawágu ámu güri-gia, ni íbini lueígiñe ában güri-gia le buídubei, láu sun níjein lan güri-gia gayáraati jamúga loúnwen lueígiñe ában güri-gia le buíti le tímatimaati. ⁸ Ánjein Búngiu, ába larúfuduni luweírin línsiñejabu woun láu loúnajani Jesucrístu le Liraü lun loúnwen wawágu, láu sún meja gafígoungidiwa lan. ⁹ Guetóti, láu resíbi láadiwa lan queísi güri-gia richáguatiña láu loúnwen Crístu wawágu, choúrutimaati luágu weséfuruba lan lueí ligáñi Búngiu le lúnbei laburujan

jawágun gaffigountiña lídaanme luwéyuri agúseruni. ¹⁰ Lugúndun ánjein ru lubáliwa Búngiu lídan dan lúmagua láu loúnwen Liraü dán meja le láganigídiwa, choúrutimaati luágu lasálbarubadiwa lan le gumúti, luágu Liraü le wínwañubei lúma, siélu. ¹¹ Áni máma rügüñein cátei le, gúndaatiwa giñe lúma Búngiu lídoun buri dan le, lídaangiñe Wabúreme Jesucrístu, le ídaangiñebei lídaanjadiwa lan dan lúma Búngiu.

Adán lúma Crístu

¹² Ítara queísi lídaangiñe lán meja ábanrügü wügüri le gíríbei Adán lebélura figoú uboúagun, ába lanügüni figoú oúweni lúmagua queísi lafáyeija, ítara líña giñe jóuweguba lubei sun gürígia lugúndun afigounjatiña súngebei. ¹³ Lubáragiñe meja líchuguni Búngiu lilúrudun joun gürígia lídaangiñe Moisés, añájeinjaña méja gürígia afigounjaña uboúagu, láu sun úgili lan lúrudu ligía lun gayáraabei lan jadúraaguni. ¹⁴ Láu sun líra, lúmagiñe meja lidáani Abrahám darí lúmoun lidáani Moisés, jilátiña gürígia luágu jafígoun láu sun máma lan ladüga magáambadi jamá jafígounbei queísi ladügüni Adán le magáambadibei lun lerérun Búngiu lun. Lueigiñe ában oúbaü, Adán liyáwa Crístu le lúnbei liábin, ladüga biángubei jagía barútiña som cátei joun gürígia.

¹⁵ ¡Ámuñegueinarügü giñe cátei le janügübei joun gürígia! Barúti Adán oúweni joun sun gürígia láu lafigounjan, ánjeinti Crístu, barúti asálbaruni joun sun gürígia, áni weíríti asálbaruni le líchugubei Búngiu láu lareíni woun lídaangiñe Crístu sügü láu lifígoun Adán. ¹⁶ Weíríti giñe le líchugubei asálbaruni sügü láu le líchugubei lifígoun Adán woun. Ladügarügü ában figoú, chülúti oúweni joun sun gürígia, ánjeinti ladüga loúnwen Crístu wawágu, ferúdunawati sun wafígoun le gíbebei, resíbi lumútiwa Búngiu queísi gürígia richáguatiña. ¹⁷ Ánjein gabáfu lubei oúweni jawágu sun gürígia ladüga lidúnrun ábanrügü wügüri—Adán, choúrutimaati luágu sun lan gürígia ja leresibirubaña Búngiu láu lareíni queísi gürígia richáguatiña, jabíjubei ibágarí magúmuchaditi lúma Búngiu, jarúejíjaba úara lúma Crístu, ladüga ábanrügü wügüri ligía.

¹⁸ Ítara queísi líchuguniña Adán sun gürígia lábugiñe lisíadin Búngiu lun jóunwen láu ladügüni le áubei magúndan lan, ítara líña giñe lagídaruniña Crístu gürígia lábugiñegiñe asíadiruni ligía, rúleí ibágarí magúmuchaditi joun láu ladügüni lugúndan Búngiu lun loúnwen jawágu. ¹⁹ Ladüga lubeíti lumágaambadi ábanrügü wügüri, ñübintiña sun gürígia lun jafígounjaba lan, ítara méme giñe, ladüga lagáambadi ábanrügü wügüri, gayáraati jayábin sun gürígia lun richágu jamá ligíbugiñe Búngiu.

²⁰ Rúati lilúrudun Moisés woun lun gayáraabei lan wasúbudiruni cátei lan figoúbei. Láu sun gíbe lan figoú uboúagu, weírítimaabei lareíni Búngiu lun lachíbuni sun figoú ligía. ²¹ Ítarati queísi gabáfu lán meja figoú lun lanügüni oúweni, ítara giñe gabáfuti lareíni Búngiu lun ladügüniña gürígia richágu ligíbugiñe, lúma lun líchugun ibágarí magúmuchaditi joun lídaangiñe Wabúreme Jesucrístu.

6

Jiláñu wáña lun figoú, wínwañu lun wesériwidun lun Crístu

¹ ¿Cábatí waríñaga? ¿Wasígiruba afigounja lun larúfuduntima Búngiu lídaangiñe lareíni woun? ² ¡Máma lúba! Wagía, jiláadiwa lun figoú, ¿ída lubáti gayára lan wasígirun afigounja? ³ ¿Ibidiñeti jun luágu láu lan

lidan wamá ában lúma Crístu láu wabásterun, queísigubeirügü jamúga lídaañadiwa lan gíñe ában lúma lidan loúnwen, lun mabáfujali lánme figoú wawágu? ⁴ Láu wabásterun, queísigubeirügü jamúga bunáwa wamá úara lúma Crístu, áni reídeitiwa jiláñu lun figoú. Queígubeirügü sarágüda láani Wáguchi Búngiu Crístu lídaangiñe oúweni láu luweirin lubáfu, sarágüda láadiwa gíñe lun isérjali lan wabágari.

⁵ Lugúndun ánjein ñübin wabei lun lídaanbadiwa lan ában lúma Crístu lidan ában oúweni líbe loúnwen, ítara wába gíñe lidan lásaarun lídaangiñe oúweni. ⁶ Subúdi wamúti luágu dáwagua lan binádu meja wagáburi lúma Crístu luágu gurúwa lun lagúnrinchawagún lubáfu figoú lé meja wawágubei, lun meréedeiwa lan queísi idámuni esériwida lun figoú queísi wayúbudiri. ⁷ Lugúndun le jiláalibei, furíjali lídaangiñe figoú. ⁸ Ánjein jiláadiwa lubei lúma Crístu, gayáraati wafíñerun luágu wabágariduba lan gíñe lúma, ⁹ lugúndun subúdi wamúti luágu sará lan Crístu ában weíyaasu lídaangiñe oúweni, moúnwendügüyaali, mabáfujali oúweni luágu. ¹⁰ Dan le loúnwenbei Crístu, ába lagúmuchaguagüdüni lubáfu figoú lun sun dan, áni ibágari le labágaridubei guetó, lun méme lesériwidun lun Búngiu labágaridei. ¹¹ Jugúya gíñe, rúgua jumá júngua queísi jiláguaaña lun figoú, áni winwañu lun jesériwidun lun Búngiu, lidan ában lúma Crístu Jesúsu le Wabúreme.

¹² Ligía, mígira jumá lubei lun gabáfu méme lan figoú juágu, afósuraün lun jadügüni luríban jayúmajan. ¹³ Míchaagua jumá júngua lun figoú lun layúsuruni júgubu lun cátei wuríbati. Lubáragiñe líra, derégegua jumá júngua lun Búngiu queísi gürígia jiláaña, ábaya jabágaridun, derége jumei júgubu lun Búngiu lun layúsuruni lun cátei buíti. ¹⁴ Mabáfujalíme figoú juágu, lugúndun mámaadün lábugiñe lilúrudun Búngiu, lábugiñejadün lareíni lun gayára lan jadügüni lugúndan.

Ában jémpulu luágu idámuni

¹⁵ Queísiti máma lubei lídaangiñe wagúnfulirun lúma lilúrudun Búngiu le líchugubei lun Moisés liábin wasálbarun, lídaangiñe werésibiruni lareíni Búngiu, ¿gayáraati lubeiti wabágaridun lidan figoú ladüga líra? ¡Siñáti! ¹⁶ ¿Ibídíñeti jun luágu le lan únti jíchaagua júngua lun jídin láu le lubeíbei lidámuñadün lan? Gayáraati lubeiti janúadajan cába lan un jíchaagua júngua, lún yebe figoú le íchugubei féridi, o lun lan agáambadi lun Búngiu, le íchugubei ában ibágari richáguati. ¹⁷ Teínqui níña lun Búngiu luágu láu sun lan lidámun jumá meja figoú, guetó jídiña láu ligáburi arúfudajani buíti le jagáambubei, táu sun janígi. ¹⁸ Mámaadün idámuni lun figoú, lidámunjadün Búngiu. ¹⁹ (Nadímurejaña jun láu jémpulu le, le luáguti idámuni lúma labúreme, lúntima gunfaráanda jumánina.) Ítara quei meja lidámun jumá sun luwúyeri figoú, guetó lúnti jíabin lun lidámun jumá buri cátei le buídubei, lun jabágaridun ában ibágari derégeguañu lun Búngiu.

²⁰ Lídan buri meja dan ligíra, dán meja le lidámuñadün lan figoú, mebéréseguntün meja lun jabágaridun ában ibágari buíti ligíbugiñe Búngiu. ²¹ ¿Ca mejáti cátei buíti lanügübei buri cátei ligía jun le áubei buri nibúsigari jumá guetó? Ni cáta buíti, féridi rügüñein lanüga jun. ²² Ánjeinti guetó, mámaadün lábugiñe lugúmadin figoú, lidámujadün Búngiu, barütiti cátei le arúmani tun janígi lúma ibágari magúmchaditi jun. ²³ Lugúndun oúweni lafáyeijabei figoú, ánjeinti edéweejani le líchugubei Búngiu woun, ibágari le magúmchaditi ladüga lídaañadiwa lan ában lúma Wabúreme Jesucrístu.

7

Ában jémpulu lídaangiñeti maríei

¹ Nidújeñu, jugúya le subúdíjabúbei lun lúrudu, subúdi jumáli luágu dán rügüñein lan wínwangili ában gürígia, ligía lábugiñeñein lan lúrudu. ² Quei jamúga, ában würi to maríeitu, rulumutu lúrudu lábun lagúmadijan túmari sun dan le wínwangili lan, ánjein ouwe túmari, bougudijaru luei lúrudu le íchugubarun lábugiñe lagúmadijan túmari. ³ Ánjoun lubeíti agánawa lúma ámu wügüri sun wínwangili lan túmari, tadügüña figou le giríbei adultériu, ánjein ouwe túmari, gidáaru lábugiñegiñe lúrudu ligía, áni gayáraati tamárieidun lúma ámu wügüri, madügüntu adultériu.

⁴ Ítara giñe jugúya, nidújeñu, láu loúnwen Crístu, furíjadün lábugiñegiñe lagúmadijan lilúrudun Moisés queísi würi to jiláli túmari, ába tagámaridun ámu. Guetó, láníjadün Crístu, le saráalíbei lídaangiñe ouweni, lun gayáraabei lan jesériwidun lun Búngiu le gumúti. ⁵ Lubáragiñé meja werésibiruni Crístu, seríwiti meja lilúrudun Moisés lun lagáguduni luríban ayúmajani wádan, áni ligía cátei le anügübalíwa lídoun ouweni. ⁶ Ánjeinti guetó, jiláadiwa lun lúrudu ligía lé meja gámabaliwa lábugiñe lubáfu, guetó furáangujadiwa lun wesériwidun lun Búngiu lídan iséri luwúyeri, táu sun wanígi, láu ubáfu le líchugubei Sífiri Sándu woun, máma queísi idámuni lun binádu lilúrudun Búngiu le bürüwabei.

Igáburi lánina figou le wádaanbei

⁷ ¿Waríñaguba lubeíti luágu wuríba lan binádu lilúrudun Búngiu? ¡Máma líña! Láu sun líra, lúrudu asúbudiragüdúbalin figou nun. Ibídiñeti jamúga nun luágu figou lan lawámadirun jamégen ámu ánjein jamúga maríñagunti lúrudu. “Mawámadirabei jamégen ámu.” ⁸ Ladüga méme gumádi le, ába lagáguduni igáburi lánina figou le nídaanbei sun luwúyeri luríban ayúmajani nídan. Lugúndun lun jamúga úa lan lúrudu, larúmuguñá yebe lubáfu figou. ⁹ Níjein meja ában dan, lubáragiñe nasúbudiruni laníchigu lilúrudun Búngiu le tímatimaati, ába narítangun luágu úaragua lan nigáburi ligíbugiñe Búngiu, dan le nasúbudirubalin laníchigu lúrudu ligía, ába nasúbudiruni luágu gafígoun nan, luágu lídaañadina lan úma lun féridi. ¹⁰ Ítara líña, lúrudu le jamúga lúnbei yebe líchugun ában ibágari buíti nun, arúfudarügü lumúti nidúnrun lúma lafáyeiruaia. ¹¹ Lugúndun lárügüdün igáburi lánina figou le nídaanbei lueigiñe lúrudu ligía, ába leyéeragunina lun nadügüni le wuríbabei, ába lanügünina lídoun féridi láu meme lúrudu ligía.

¹² Sánduti lubeíti lilúrudun Búngiu lídaangua, sánduti giñe sun gumádi le lídaanbei, úaraguati, áni buíti. ¹³ ¿Ligía funásan cátei buíti le anügübalina lídoun féridi? ¡Máma líña! Nifígoun anügübalin neféridirun nun, áni ítara líña larúfuduni luágu figou lan, láu cátei le buídubei, le méme lúrudubei, lanügana igáburi lánina figou le nídaanbei lídoun féridi, áni ítara líña larúfuduni lilúrudun Búngiu luágu wuríba lan figou le tímatimaati.

¹⁴ Subúdi wamúti luágu lídaangiñe lan Sífiri Sándu líchigei Búngiu lilúrudun, ánjeinti áu, queísi wügüri garaüwarügüti, alúgurúañu níña queísi idámuni lun lubáfu figou. ¹⁵ Úati gunfaráanda náani ca lan susérebei nun, madügün numúti cátei buíti le nabúseerubei nadügün, nadügei cátei le iyéreegubei nun. ¹⁶ Ánjein le lubei mabúseerun nubei nadügün ligía nadüga, úaraguati nisáminan lúma lilúrudun Búngiu luágu cátei le buídubei, áni láu líra, arúfuda numúti luágu barúnaani lúrudu quei cátei

buíti. ¹⁷ Mámaadina lubeíti áu adügübalin cátei wuríbati le nadügübei, igáburi lánina figou le nídaanbei, ligía adügübalin. ¹⁸ Subúdi numúti luágu úa lan ni cáta buíti nidan bougudin luei Búngiu, áu queísi wügüri garaüwarügüti. Buséntina jamúga nadügüni le buídubei, siñáti nadügüni. ¹⁹ Madügün numúti cátei buíti le nabúseerubei nadügün, nasígirarüga adügei wuríbati le mabúseerun nubei nadügün. ²⁰ Ánjein lubeíti le lubei cátei le mabúseerun nubei nadügün ligía nadüga, lídan linárün cátei, máma áu le lání Búngiu adügübalin, igáburi lánina figou le nídaangilibei, ligía adügübalin.

²¹ Niján cátei le asúseredubei nun. dan le busén nan nadügüni le buídubei, wuríbati rügüñein nadárra nidan. ²² Lídan nisáminan, jinsiñeti lilúrudun Búngiu nun, ²³ áni aríjatina luágu níjein lan cátei nidan, ageíndaguti lúma nisáminan, cátei ligía, igáburi lánina figou le nídaanbei, le gámabalina adaürüwañu.

²⁴ ¡Fugiábu áu! ¿Cába eséfurana lídaangiñe igáburi lánina figou le nídaanbei, le anügübalina lídoun ouweni? ²⁵ Búngiu gubeirügü, lídaangiñe Wabúreme Jesucristu. ¡Teínqui niña lun Búngiu! Gunfaráanda numúti lubeíti luágu áu lan láu nání nungua, úouga lubáfu Cristu nuágu, buséntina jamúga nagúnfulirun lúma lilúrudun Búngiu, siñá numuti ladüga igáburi lánina figou le nídaanbei, seríwirügütina lun figou queísi lídamun.

8

Wabágarí lúma Sífiri Sándu

¹ Guetó, gidáwaali jadúnrun gürígia ja lídaanbaña ában lúma Jesús. ² Rúlaali Cristu lání Espíritu woun, áni Espíritu ligía, rúti iséri ibágarí woun, furígüda láadiwa lábugiñegiñe lubáfu figou le anügübalíwa lídoun ouweni. ³ Mabáfuti meja lilúrudun Búngiu lun lagídaruníwa lábugiñegiñe lubáfu figou ladüga turíban wanígi, wagía gürígia garaüwarügütiña. Ába ladügüni Búngiu le lásiñerubei lilúrudun adüga láu loúnajani Liraü ubouágun queísi gürígia garaüwarügüti le giñe gayáraati laffigounjan (láu sun, maffigounjan lan). Ába loúnwen Liraü Búngiu, le Jesucristubei, luágu wafígoun, ába lagúmchaguagüdüni lubáfu figou wawágu láu loúnwen. ⁴ Ladügünbalin Búngiu líra, lun gayáraabei lan wadügüniwa gürígiame richáguatiña queísi lagúmadíjan lilúrudun, gürígia ja mabágaridunjañabaña lídan luríban jagúndan, ja abágaridunbaña guetó queísi lugúndan Sífiri Sándu.

⁵ Ja abágaridubaña queísi jagúndan queísi gürígia garaüwarügütiña, luágu rügüñein cátei le lánina ubou jaritagua, ánjaña ja abágaridubaña queísi lugúndan Sífiri Sándu, luágu cátei le lánina siélu jaritagua. ⁶ Dan le jabágaridun gürígia queísi jagúndan, marítagunga jagía luágu Búngiu, barü lumútiña lídoun ouweni, ánjeinti dan le jabágaridun queísi lugúndan Sífiri Sándu, barü lumútiña lídoun ibágarí tímátimaati lúma darángilaü. ⁷ Ja arítagubaña luágu cátei le lánina ubou le, láganiñu Búngiu lugúndan mája jáña, áni siñá ligía jíchaagun jóungua lábun lilúrudun. ⁸ Ligía, ja lubei abágaridubaña láu jagúndan queísi gürígia garaüwarügütiña, siñáti jadügüni lugúndan Búngiu.

⁹ Ánjeinti jugúya, mabágaridunjadün lídan jugúndan queísi gürígia garaüwarügütiña, jabágaridunbaña lídan ában lúma lání Búngiu Espíritu, queísi aganoúa lubei jídan. Le úabei lání Cristu Espíritu lúma, máma lánigu Cristu.

¹⁰ Ánjein wínwan lubei láni Crístu Espírítu jídan, wínwanboun juwáni lun sun dan ladüga tarúfudúniwa richáguañu ligíbugiñe Búngiu, láu sun louweba lan júgubu ladüga figou le lídaanbei ubou le. ¹¹ Ánjein wínwan lubei láni Espírítu jídan, Búngiu méme le ásaaragüdúbalin Jesucrístu lídaangiñe ouweni, líchuguba íbágarí iséri lun júgubu le gouwedadibei, lídaangiñe láni Espírítu le jídaanbei.

¹² Ítara líña lubeiti, nidújeñu, lúnti wagúnfulirun lúma Sífiri Sándu le wádaanbei, máma lúma wagúndan queísi gürígia garaúwarügütiña. ¹³ Lugúndun ánjaün abágaridarügü queísi jugúndan, queísi gürígia garaúwarügütiña, jefédiruba, mídinbadün siélu, ánjein jáfara ígáburi lánina figou le jídaanbei jílagubei, láu lubáfu Sífiri Sándu, jabágariduba lun sun dan lúma Búngiu siélu.

¹⁴ Sun ja ladúndejabaña láni Búngiu Espírítu, lirájüñü Búngiu. ¹⁵ Sífiri Sándu le jerésibirubei, máma ában espírítu lánina idámuni lúnya lanúfudedagüdünün luei láburujan ligáñi Búngiu juágun, Espírítu le jerésibirubei, ligía le adügúbalün lun lirájüñü jumá Búngiu. Ligía gayára lubei wagúaruni Búngiu Wáguchi. ¹⁶ Geféenti láni Búngiu Espírítu woun luágu lirájüñüjadiwa lan Búngiu. ¹⁷ Áni ladüga lirájüñü wamá Búngiu, garíchatíwa gíñe lun alágan siélu le uágubei laríñaga Búngiu woun, le lúnbei gafánran wamá lídaangiñe, lúma Crístu. Ánjein súfuri wabei luágu Crístu ya ubouágu, gafánraanbadiwa lídan luweírigin yágüta siélu.

¹⁸ Jarítaguatina luágu ni cáta lan le wasúfurirubei ya ubouágu lúmoun uweírigin le lúnbei wabíjini siélu. ¹⁹ Láuñein sarágu ayúmajani lúma eménigini sun ubou le ladügübei Búngiu, agúrabei dan le lúnbei jerésibiruni lirájüñü Búngiu jalágaante. ²⁰ Níjein mégeiti luágu sun ubou, máma jamúga ladüga labúseerun, ladüga ítara líña lan labúseeruni Búngiu, ²¹ láu sun líra, súnwandan níjein lan eménigini luágu leséfuruba lan ubou lídaangiñe asúfuriruni lúma agádeiruni le gádaanbalin lun gafánraanbei lan lídan jaweírigin lirájüñü Búngiu. ²² Subúdi wamúti luágu chülü lan lúmoun dan le, sun ubou le ladügübei Búngiu ayájuati láu ígárigu camá ában wúri to agáridutu. ²³ Áni máma rügüñein ubou asúfurira, súfuritiwa gíñe, wagía afiñetiña luágu Crístu, láu sun níjeinjali lan Sífiri Sándu wáma queísi lagúmeseraja cátei le lúnbei werésibiruni. Sandítiwa ában ounwenbun ígári, áni agúraba wamúti dan le lúnbei wayábin lun lirájüñüjadiwa lánme Búngiu le tímatimaati, dánme le liséridun wágubu. ²⁴ Ligía lágúdaja wasálbarun. Merésibirun wamágili sun ubuíduni le lúnbei wabíjini queísi lirájüñü Búngiu, agúrabajatiwa werésibiruni yágüta siélu. Ánjein jamúga íbja wamáaliti sun le lúnbei wabíjini queísi lirájüñü, mébunaali jamúga wagúrabajan. Magúrabajaantiña gürígia jerésibiruni cátei le íbja jamáalibei. ²⁵ Queíti merésibirun wamágili lubei sun le lúnbei wabíjini queísi lirájüñü Búngiu, lúnti wagúrabuni láu gurásu.

²⁶ Ítara méme gíñe, íderagua lumútiwa Sífiri Sándu lídan wadébilin. Queísigubeirügü níjein dan, siñáti wayúmuragun lun Búngiu queísi lubúdubu. Lídan óra ligía, ába líderaguniwa Sífiri Sándu lun waríñaguni luweírín cátei le wasándirubei tídan wanígi lun Búngiu lídan ában luwúyeri le siñáti laríñawagún láu dimúrei. ²⁷ Áni Búngiu, le aríjubarun wanígi, subúdi lumúti ca lan labúseerubei Sífiri Sándu laríñagun wádaangiñe, ába louñabuniwa Búngiu lugúndun ayúmuraguati Espírítu queísi lugúndan Búngiu.

Agáñeiruni lídan sun luwúyeri lénreengúnga

²⁸ Subúdi wamúti luágu aráanse láani Búngiu lun sun lan cátei le asúseredubei woun, íbini asúfuriruni, lun lanügün buíti woun, wagía le jínsiñejabúbei lun, wagía le wájali lan lun lánigu wamá queísi laritaguni. ²⁹ Lugúndun ja lasúbudirubaña Búngiu lúmagiñe lubáragiñe ladügüni ubou luágu lánigubaña lan, fánrein lumútiña lun ítara jamá queísi Liraü, lun Liraü lan íbugañau joun sun ja lanúadirubaña lun lirájüñü jamá. ³⁰ Játi lanúadirubaña lúmagiñe binárü, wáti gíñe joun, resíbi lumútiña gíñe lúmagua queísi gürígia richáguatiña, áni ja lerésibirubaña, rúti gíñe ufánrani joun lídan luweírigun queísi lirájüñü.

³¹ ¿Cábati waríñaga luágu buri cátei le? Queísi lueígiñeñein lubei wafúleisein Búngiu, ¿cábati jabáfu wáganiñu wawágu? ³² Mamájaanti Búngiu lun líchuguni Liraü guánarügü lun loúnwen luágu wafúleisein, lubáragiñe líra, ába ledéregeruni lun loúnwen waweígiñe, sun wagía, ¿ida lubáti míchugun láani sun líbiri cátei woun queísi líchuguni Liraü woun?

³³ ¿Cági gayáraabei líchugun jadúnrun ja anúadaja láañabaña Búngiu queísi lánigu? Búngiu arúfudubaliña quei madúnruntiña. ³⁴ ¿Cáteiti gayáraabei lasíadiruníwa lun féridi? Crístu guánarügü ouwebei wawágu, ába lásaarun lídaangiñe ouweni, guetó níjein ñun lueígiñe loúnwenren Búngiu Úguchili ayúmuragua wawágu. ³⁵ ¿Cábati gayára lagídaruníwa luei línsiñejabu Crístu? ¿Liyáraabadiwa funági asúfuriruni, o lénreengúnga, o eíbaajoüni, o ilámaü, o manáanguni, o pelíguru, o ouweni? ¡Uá! ³⁶ Laríñajare tídan Lerérun Búngiu. Yaráfatiwa lun wounwen bueígiñe ságü wéyu,

ítara líña jouseruniwa wáganiñu queísi mudún anügütiña lun jafarún.

³⁷ Lídan sun cátei le, íbija wamúti luweírin lubáfu Crístu, le jínsiñejabúbei woun, lun wagáñeirun lídan sun lénreengúnga. ³⁸ Choúru numúti lubeíti luágu úa lan ní cáta lun lagídaruníwa luei línsiñejabu Búngiu—ni ouweni, ni íbágarí, ni ánjeligu, ni máfianu, ni cátei le guetóbei, ni le lúnbei liábin, ³⁹ ni le siélubei, ni le ubouágubei, ní buri ámu cátei le ladügübei Búngiu—siñáti lagídaruníwa luei línsiñejabu le larúfudubei woun lídan Wabúreme Jesucrístu.

9

Anúadaja láaña Búngiu Israelítagu lun lánigu jamá

¹ Inárüni le lúnbei naríñaguni guetó jawágu nirásan, áu queísi ában afíñeti luágu Crístu, áni meyéejantina, aríñaga tumúti nanígi nun to úaraguaboun lúma Sífiri Sándu luágu inárüni lan. ² Weíríti nírun, áni súnwandan níjein lan gáriti tídan nanígi jawágu nirásan. ³ Buséntina jamúga lun gíñe lábugiñe nan líñaragun Búngiu, díseñu luei Crístu, ánjein jamúga ítara lúba lubei gayára lan jerésibiruni Jesucrístu queísi jasálbaragüle lun jasálbarun. ⁴ Linébaanfaangu Israél jagía, áni resíbi lumútiña Búngiu queísi lirájüñü. Reídeiti meja Búngiu jádan láu sun luweírigun áni rulumuti gíñe darádu buri joun lúma lilúrudun lídaangiñe Moisés. Arúfudati igáburi joun lun jesériwidun lun, ligílisirugu, áni joun laríñaga luágu loúnajaba lan ában Asálbaragülei. ⁵ Janébaanfaangu Abrahám, Isáac lúma Jacób jagía, lídaangiñe jarásan liábin Crístu, le Búngiubei, le gíñe Súnti Gabáfu, le gadünamabei lun liñurúniwa líri lun sun dan. Ítaralá.

⁶ Mámata luágu jamúga reidei lan lerérun Búngiu joun ladügawagun Israél magúnfulirunga, ladüga máma sun Israelítagu lánigu Búngiu le

tímatimaati. ⁷ Mâma sun linébaanfaangu Abrahám lirájüñü Búngiu le tímatimaati, aríñagarügüti méja Búngiu lun Abrahám. “Lídaangiñerügüba Israél ganébaanfaangu ban.” ⁸ Arúfuda lumúti líra woun luága úa lan ni ában liraú Búngiu luágurügü lirásan, ja rügüñanu lirájüñü ladüga jafíñerun luágu lerérun, jagía anügübaña queísi lirájüñü ja tímatimaatiña. ⁹ Lugúndun niján dimúrei le líchugubei Búngiu lun Abrahám. “Niábinba dánme le lachülürün dan ligía, ábame tagáraüdüñ Sára ában irájü.”

¹⁰ Áni máma rügüñein líra, niján ábanya jémpulu luágu lanúadajan Búngiu. Biángubei meja tirájüñü Rebéca ában jáguchi, le binádu wadúje Isaac, ¹¹⁻¹³ áni dán meja le magüriajoungiña, madügüngiña gíñe ni cáta ni buíti ni wuríbatí, ába laríñagun Búngiu tun Rebéca. “Lumúsunbei amúleñein le íbugañaü.” Úraguati gíñe líra lúma le aríñawagúbei tídan Lerérun Búngiu. “Jínsiñeti meja Jacób nun, ánjein Esaú, iyéreeguti nun.” Ítara líña gufirúmawa lan lirícha Búngiu lun lanúadajaniña ja únbaña labúseera lagúarun lun lánigu jamá queísi labúseeruni, mebéresenga ligía ca lan jadügübei.

¹⁴ ¿Cábatí waríñaga? ¿Waríñaguba luágu múaran lan Búngiu? ¡Siñáti! ¹⁵ Lugúndun laríñajare lun Moisés. “Gareínbadina lun le nabúseerun, gudémejabu áume lun le únti nabúseera.” ¹⁶ Ítara líña lubeíti, máma lídaañein wabúseerún o wáfaagun, lugúdejabu Búngiu woun, lídaañein lugúndan. ¹⁷ Tídan Lerérun Búngiu, bürüwañu líña dimúrei le laríñagubei lun urúei Ejíptona. “Nadügünbálíbu urúeime lun narúfuduni nubáfu buágu, lun gíñe nasúbudiragüdüni níri lídan sun fulásu.” ¹⁸ Gudémejabuti lubeíti Búngiu lun le labúseerun gudémejabu lan, derégüdalóun lanígi le únti labúseera ledéragüdüñun.

¹⁹ Baríñaguba lubeíti nun. “Ánjein ítara líña lubeí, ¿cáti uágu líchiga Búngiu dúru jawágu gürígia? ¿Cági gayáraabei ladügün cátei bouguditi lueí lugúndan Búngiu?” ²⁰ Wel, ¿cátabuñadíbugi lun balégejan lúma Búngiu? ¿Laríñaguba funági soudíeru lun le adügübalin. “¿Cáme badügana ítara?” ²¹ Garíchatí le adágubei soudíeru lun ladügüni le labúseerun láu lubúñe soudíeru, gayáraati ladügün ában soudíeru le díseguati layúsurun, lúma ában le ayúsurúti lun furúmiegurügü cátei lídaangiñe ában méme ubúñei.

²² Ítara méme líña, gabáfuti Búngiu jawágu gürígia, aráanseñu líña lun larúfuduni luweírín ligáñi jawágu gürígia ja gadúnabaña jagüñrinchawagún. Áfaaga lumúti jaríban láu sarágu gurásu darí guetó ²³ lúnrügü gayára lan larúfuduni luweírín luweírigin woun, wagía le únbaña gudémejabu lan, ja gíñe laráanserubaña lúmagiñe binárü lun gafánraanbadiwa lan lídan luweírigin. ²⁴ Wáti Búngiu woun, jíbiri jádaangiñe juríu, jíbiri jádaangiñe ja mámabaña juríu, ²⁵ queísi laríñagun Búngiu tídan lílíburun Oséas.

Já meja mámabaña nánigu, naríñaguba joun. “Nánigu”, gürígia méja ja mínsiñebaña nun, naríñaguba joun. “Jínsiñetün nun”.

²⁶ Áni lídan méme fulásu le ní lubei laríñawagúa joun. “Máma nánigu jugúya”,

ñíba laríñawagúa joun. “Lirájüñü Búngiu le wínwanbei”.

²⁷ Ánjeinti jawágu Israelítagu, ja méme juríubaña, laríñajare Isaías. “Láu sun gibe jamá ladügawagun Israél quei ságoun láru béya, biánraürügübaña jádaangiñe erédera lun jasálbarun, ²⁸ lugúndun lagúnfulirubei Búngiu lerérun

ligíbuagu ubouú lun lagünrinchaguniña ja magáambadibaña lun, lídan ában igáburi le gumúti, le giñe furéseti.”²⁹ Queísi méja lariñagun méme Isaías. Lun jamúga meja mígirun lan Súnti Gabáfu jádaangiñe wadügawagun woun, wayábiña jamúga lun ítara wamá queísi ubúru gu buri Sodóma lúma Gomórra.

Juríu lúma ugánu luáguti Crístu

³⁰ ¿Cábati waríñaga? Luágu ja lan mámbabaña juríu, ja mibíjinbalin lilúrudun Búngiu lun jasúbudiruni le buídubei lúma le wuríbabei, jagía anügübaña quei richáguatiña ligíbugiñe Búngiu ladüga jafiñerun luágu.³¹ Ánjañati ladügawagun Israel, ja áfaagubaña lun jerésibirúniwa queísi gürígia richáguatiña láurügü jagúnfulirun lúma lilúrudun Búngiu, siñá jamuti lúrudu ligía agúnfulira, machülüntiña lun richágua jamá ligíbugiñe Búngiu.³² ¿Cági uágu? Lugúndun máfaagun jamá lun jeréderun buídu ligíbugiñe Búngiu luágurügü jafiñen, jadügeirüga láu cátei le guánarügü jadügübei. Ligía jachúgeragunbei luágu Jesucrístu queísi “dübü le achúgeraguágülei”, ladüga siñá lan jafiñerun luágu queísi Jasálbaragüle.³³ Lariñajare tídan Lerérun Búngiu.

Rútina ában wügüri le queísigubeirügübei dübü le achúgeraguágülei Sión, dübü giñe le eíguadagüdüti gürígia.

Ánjeinti le afiñeruti luágu, maságürjanbei.

10

¹ Nidújeñu, le cátei le uágubei tayúmaja nanígi, lúma le uágubei nayúmuragun lun Búngiu jawágu Israelítagu, ja méme juríubaña, lun jasálbarun.² Aríñagatina luágu jafúleisein luágu níjein lan ában ouñwenbun gúnfuli jádan lun Búngiu, máma queísi lariñagun subúdi jagúnfulin.³ Ibídiñeti joun ída líña lan ligáburi líchuguniña Búngiu gürígia richáguañu ligíbugiñe, láu igáburi le jabúseerubei jáluajan jeréderun richáguañu ligíbugiñe Búngiu, madügünga jamei le labúseerubei.⁴ Lugúndun Crístu lébejabei lagúnfulirúniwa lilúrudun Moisés, áni adügati lun sun lan ja afiñebaña luágu, jeréderun richáguañu ligíbugiñe Búngiu.

⁵ Luágu lerésibiruniña Búngiu gürígia queísi gürígia richáguatiña láu jagúnfuliruni lilúrudun, lariñajare Moisés. “Gürígia ja agúnfulirutiña lúrudu le gumúti, jabágariduba luágu lúrudu.”⁶ Luáguti lerésibiruniña Búngiu gürígia queísi richáguatiña ligíbugiñe luágu jafiñen, lariñajare. “Mariñagabá tídan banígi. ¿Cába amúdeira siélun?” —queísigubeirügü barárigüdüñein lan Crístu le Wasálbaragüle siélugiñe.⁷ Mariñagabá giñe. “¿Cába arárira le níjin jabeí jiláaña?” —queísigubeirügü bamúdeiragüdüñein lan Crístu jádaangiñe jiláaña ítara. Úati ní cáta lun wadügüni lueídügüya lun wafiñerun luágu.⁸ Cáteiti lariñagubei Búngiu? “Yaráfati ugánu lánina asálbaruni bun, adímurejatibu luágu ugánu ligía láu biyúma, níjein giñe ugánu ligía tídan banígi.” Ugánu le, elun?” —queísigubeirügü barárigüdüñein lan Crístu le ligía ugánu le lánina afiñeni luágu Crístu le Wasálbaragüle, le wapúrichijabei.⁹ Anjabu aríñaga láu biyúma luágu Jesúsu lan Babúremebei, afiñe amürü tídan banígi luágu sarágüda láani Búngiu lídaangiñe ouweni, basálbaruba.¹⁰ Láu bafiñerun luágu Jesucrístu táu sun banígi, lerésibirabu Búngiu queísi ában gürígia richáguati ligíbugiñe, láu bíchugun fe luágu láu biyúma, basálbara.

11 Tariñajare Lerérun Búngiu. “Úati ni ában gürígia le afiñeruti luágu Jesucrístu lun laságüríjan luágu lárígiñe.” 12 Ában jáu juríu jáma ja mábabaña juríu, Wabúreme Jesucrístu, ligía Jabúremebei súngebui, áni fuleísei lumútiña sun ja agúarubaña lun lun líderaguniña. 13 Ítara líña quei laríñawagún tídan Lerérun Búngiu. “Sun ja aguáruti líri Wabúreme, jasálbaruba.” 14 ¿Ída lubáti gayára lan jagúaruni lun lasálbaruniña ánjein mafíñerungiña lubei luágu? ¿Ída lubáti gayára lan jafíñerun luágu, ánjein magáambungiña lubei luágu? ¿Ída lubáti gayára lan jagáambun luágu, ánjein uá jabeí apúríchijati ugánu luáguti asálbaruni joun? 15 ¿Ída lubáti giñe gayára lan japúríchiján gürígia joun ánjein uá cába lan oúnajaña apúríchija? Queísi laríñawagún tídan Lerérun Búngiu. “¡Ma lubuídun jachúlürün ja anügübalin ugánu luáguti aráandaruni lúma Búngiu, apúríchija jamei ugánu buíti luáguti asálbaruni!”

16 Másutiña gürígia ja agáamba jamáalibei ugánu luáguti asálbaruni ebéresera láu. Queísi laríñaguni Isaías tídan liliburun. “Wabúreme, míbetiña afiñerutiña luágu ugánu luáguti asálbaruni le wapúríchijabei.” 17 Ítara líña lubeíti, lídaangiñe jagáambuni gürígia ugánu luáguti Crístu gayára lan jafíñerun luágu.

18 Ába naríñagun. ¿Magáambun jamúba giñéti gayára lan jafíñerti funásan ugánu luáguti asálbaruni? ¡Agáamba jamúti! Tariñajare Lerérun Búngiu. Agaambúaaali jamálali lídan sun fulásu, chúlújali jerérun lídoun lagúmujoún larígei ubou.

19 Ába naríñagun. ¿Úagili funásan gunfaráanda jamáni Israelítagu ugánu luáguti Wasálbaragüle? Gunfaráanda jamáali, lugúndun lídan furúmiñeti cátei laríñajare Búngiu liyúmulugugiñe Moisés. Naméendidagüdübadün jadüga ában rása ja máma náni, nagáñidagüdübadün jadüga ában rása ja íbídíñegidina joun.

20 Aríñagati giñe Búngiu liyúmulugugiñe Isaías.

Darí jamutina ja máluajaanbalina, arúfudaguatina núngua joun ja málügüdajánbaña nuágu.

21 Ábaya laríñagun jawágu Israelítagu. “Sun wéyu náu agúaja joun gürígia magáambaditiña, mabuídun.”

11

Israelítagu ja sálbabaña

1 Aríñagatinati guetó. ¿Májaali funásan Búngiu joun Israelítagu ja lumútuniña? ¡Máma líña! Áu guánarügü Israelíta áu, jádaangiñetina lirásan Abrahám, jádaangiñe lufámilian Benjamín. 2 Barü lumútiña Búngiu Israel-ítagu queísi lánigu lúmagiñé meja binárü, guetó, mamájaanti joun. ¿Magáambun jumúti le tariñagubei Lerérun Búngiu luágu Elías, lé meja proféta, luágu líchuguni dúru jawágu Israelítagu lídan layúmuragun lun Búngiu? Laríñaga. 3 “Nabúreme, áfaragua jamá profétaгу jilágubei, güríngua jamei buri báni latárü, áu rügáali erédera jádaangiñe bánigu, áni buséntiña giñe jáfarunina jilágubei.” 4 Ába laríñagun Búngiu lun. “Anuádajaadina sédü mílu wügüriña nubárua ja májuduragúngiñabaña ligíbugiñe liyáwa búngiu le Baal.” 5 Ítara méme giñe lídoun buri wéyu le, reídeijaña átiri jádaangiñe juríu ja anuádaja láañabaña Búngiu láu lareíni. 6 Ánjeinti láu lubei lareíni

Búngiu lanúadiraña, mámaali láu cátei le liyáraati gürígia guánarügü adüga, lugúndun lun jamúga ítara líña lan, mámaali jamúga areíni lareíni Búngiu.

⁷ Ítara líña lubeíti, madári jamúti sun Israelítagu le jáluajabei, anáti ja lanúadirubaña Búngiu, darí jamuti. Ja jíbiri, siñáti jánjanrun lun asálbaruni le lébunabei affíñeni luágu Búngiu, ába lígruniña Búngiu táu tidére janígi. ⁸ Queísi tariñagun Lerérun Búngiu. “Adüga lumútiña Búngiu lun deré lan jachúgü lun cátei lánina Búngiu, rúti águu le maríjinti joun, arígeirugu le magáambuti. Ítara líñáti chülü lúmoun dan le.” ⁹ Aríñagati Davíd.

Garábagua lámuga jefédujan lun sádarame, lun jáburujan tídown, lun jasúfurirun.

¹⁰ Darú lámuga jágu, maríjin jamámuga, sebúgua lámuga gíñe janágan lábugiñe janügün lun sun dan.

Jasálbarun ja mámbaña juríu

¹¹ Nálügüdaaati guetó. ¿Láu jachúgeragun juríu, ja méme Israelítagu, jeíguatiña funásan le gumúti? ¡Máma líña! Lubáragiñe líra, láu jamájarun juríu lun jerésibiruni Crístu, jayábin ja mámbaña juríu lun jabíjubei lan asálbaruni, lun jáyeijabaña lan Israelítagu. ¹² Ánjeinti seríwi lubeí dúru le jadügübei juríu buítíme lun ubou, áni ánjein buíti lubeí lanügübei jefédirun joun ja mámbaña juríu, isarágume buídutimaabei lan dánme le jasálbarun sun juríu!

¹³ Níjein gíñe ában cátei lun naríñaguni jun, jugúya le mámbabei juríu. Quei loúnajañadina lan Búngiu apúrichija luágu Crístu joun ja mámbaña juríu, weíríti nubéresen láu nuwádigimari, ¹⁴ lun gayára lan jabúseerun nirásan jáyeijanün, lun gíñe jasálbarun. ¹⁵ Ánjein ladüga lubeí lamájarun Búngiu joun juríu, jayábin ja mámbaña juríu lun jaráandarun lúma Búngiu, ¿ídatimá lubáti dánme le jerésibirúniwa? Ítara lúba joun queísi ásaaruni lídaangiñe ouweni. ¹⁶ Ánjein derégewa tubeí furúmiñetu fein to adügütu tídaangiñe fulúwaaru añóundawagutu lun Búngiu, derégewatu gíñe sun fulúwaaru ñounwaguatu to ídaangiñeboun tiábin fein tugúya. Ánjein gíñe derégewa lubeí tilagüle ában tídibu wéwe lun Búngiu, derégewañu líña gíñe tilímun.

¹⁷ Añájein jádaangiñe juríu, queísi tilímun olívo tímatimaati, chaünwatiña, gidáwatiña jagánaguagiñe lumútuniña Búngiu ladüga maffíñeni le jádaanbei. Jugúya jawéñegubei, jugúya le mámbabei juríu, ja ítarabaña quei tilímun olívo to áraabuna. Ítara líña jiábin lun gabára jumá lídan tilagüle lúma lídan tibágari olívo, resíbi jugúyame labínirun Búngiu, queísi lumútuniña. ¹⁸ Marítagua jumátia luágu buídutimá jumá lueí límu le ñígubeibei méja. Ánjaün arítagua luágu buídutima jumá, jarítagua jumá luágu máma lan jugúya ágüdajabalin ílagülaü, luágu ílagülaü lan ágüdajabalün.

¹⁹ Fágua jaríñaguba. “Ánja, ába jagídarúniwa juríu lun wíchugún jawéñegua luágu olívo.” ²⁰ Jínárün luágu gidáwa jamá jagánaguagiñe lumútuniña Búngiu, jagídarúnbei lugúndun maffíñen jamá luágu Wasálbaragüle, jugúya, gabára jubeí ladüga jaffíñen luágu. Manángua jumá lubeíti júngua, duárirügü jumá. ²¹ Lugúndun ánjein úa lubeí ferúduna láníña Búngiu juríu já meja lanúadajabaña lun lánigu jamá, úabei gíñe ferúduna lánün, jugúya le mámbabei juríu, ánjaün ñübin lun maffíñen jumá. ²² Arija jumeí lubeíti luweírín lareídun Búngiu, derégüdati gíñe. Derégüdati joun ja maffíñebaña, areídati joun ja affíñebaña. Lúnti jasígirun lídan lareíni

láu sun jafiñen luágu, ánjein madügün jumá ítara, jagídarúba giñe. ²³ Ánjaña ñübin juríu lun jafiñerun luágu Crístu, jíchugúayaba lídoun jabára jagánagua lumútuniña Búngiu, lugúndun gabáfuti Búngiu lúnya lichuguniña járigoun. ²⁴ Jugúya le mámabei juríu, chañwatün tueigiñe ában olívo to áraabuna, ába jíchugün tuágun olívo to buítu, gúbume ladügúwa joun juríu ja tilímunbaña olívo buítu ja tímatimaatiña, jíchugúayaba járigoun tuágun olívo to ñígiñe lubei jagídarúa, nariñaguña luágu lachülürüba lan wéyu lun jerésibiruni juríu Jasálbaragüle.

Jasálbarun Israelítagu le lagúmujóun

²⁵ Nidújeñu, buséntina lun jasúbidiruni cátei le luáguti laráansejan Búngiu, lé meja arámudagúabei, lun mapántajan jumá luágu chu lan jáu lídan le jálügüdagun júngua luágu buri cátei le. luágu deréragüda láaru lan Búngiu janígi Israelítagu murúsun lun Jasálbaragüle darírügü dánme le gumújali jerésibiruni ja mámabaña juríu Crístu. ²⁶ Dánme le lasúseredun líra, ábame jasálbarun sun Israelítagu, ja méme juríu, lugúndun taríñajare Lerérun Búngiu.

Liábinba Asálbaragülei Sióngiñe,
ábame lagídarun wuríbani jádaangiñe juríu.

²⁷ Nijánba nidáradun jáma,
dánme le nagídaruni jafígoun.

²⁸ Luágu ugánu le luáguti asálbaruni, barüwatiña juríu queísi láganiñu Búngiu luágu jufúleisein, láu sun líra, jínsiñegiña lun Búngiu lugúndun anúadaja lumútiña binádu jagübürigu juríu. ²⁹ Lugúndun le cátei le líchugun Búngiu, magída lumúti, gürígia ja lanúadajabaña lun lánigu jamá, lánigumemebaña. ³⁰ Jugúya, magáambaditün meja lun Búngiu, guetó, láu jamájarun juríu jagáambuni, ába gudémejabu lan Búngiu jun. ³¹ Magáambaditiña juríu lun Búngiu guetó, ánjein líra, lúnrügü gudémejabu lan Búngiu joun queísi gudémejabu lan jun. ³² Ígira lumútiña Búngiu súngubei lun magáambun jamáni, lun gayáraabei lan gudémejabu lan joun.

³³ ¡Uweírín lareídun Búngiu, lúma lichú láu! Siñáti wasúbudiruni larítagun, siñá gunfaráanda wamáni lémeri. ³⁴ ¿Cági gunfarándabalin larítagun Búngiu? ¿Cági arúfudajabei lun? ³⁵ ¿Cági gürígia rújalibei som cátei lun Búngiu furúmiñe lun lerésibirun som cátei fáyeitime lárigiñe? ³⁶ Úati ni ában, lúmagiñe Búngiu liábin sun cátei, ligía giñe ágüdjabalin sun cátei, áni lúngua giñe ladügei. ¡Uweíríguni lun Búngiu lun sun dan! Ítaralá.

12

Ibágari le derégewati lun Búngiu

¹ Amúriajatina lubeiti júma, nidújeñu, lun jedéregeragun júngua le gumúti lun Búngiu queísi gürígia abágaridutiña lun jesériwidun lun, jarúmañu lan jibágari ligíbugiñe. Niján luwúyeri agúnfuliruni le áubei lagúndaara Búngiu, áni lúnti ítara lan wadügüni lugúndun weíriri lareíni woun. ² Jebé jabágaridun queísi lirájüñü ubou le, lubáragiñe líra, sáansi jumei ligáburi jisáminan, sáansi lámuga giñe ligáburi jabágaridun. Ítara lúba jíabin lun jasúbudiruni le lugúndaanbei Búngiu jun—le buídubei, le uáraguabei.

³ Queísi jumaésturun luágu lareíni Búngiu nun, aríñagatina jun sun jugúya, lun úa lan ni ában jídaangiñe arítaguti luougua weíri sügü láu le ligiabei. Lubáragiñe líra, cáda ában lúnti lasúbudiragun lúngua, segün afíñeni le rúlaalíbei Búngiu lun. ⁴ Lugúndun ítara quei gíbe lán buri umégeguni

luágu ábanrügü úgubu, áni máma ában méme lifísiute sun umégeguni ligía, ⁵ ítara wáña gíñe, wagía afiñetiña, láu sun gibe wamá, ában rügüñadiwa úgubu lídan ában lúma Crístu, áni íderaguatiwa woúngua wádaangua queísi lumégegun ában méme úgubu.

⁶ Rújali Búngiu ámuñegueinarügü ubáfu woun queísi labúseeruni líchuguni lun cáda ában, lun wesériwidun lun, lúma joun wadújeñu lueígiñe Jesucrístu. Lúnti buídu lan wayúsuruni ubáfu ligía. Ánjein rújali lubeí Búngiu ubáfu woun lun ladímurejan wayúmulugugiñe, lúnti wadügüni segün afiñeni le wádaanbei, ⁷ ánjein rújali lubeí ubáfu woun lun wesériwidun joun ámu, lúnti wesériwidun buídu. Le garúfudajadíbei Lerérun Búngiu, lúnti líchaagun lúngua lun arúfudajani. ⁸ Le gíchigaditi dügüdaguaü joun ámu, lúnti líchaagun lúngua lun ladügüni. Le edéweejati, lúnti magúraban lan láguyun lun, le ábutibei, lúnti lagúmadijan láu sarágu duári, le íderaguti gudemetiña, lúnti ladügüni láu ugúndani.

Ligáburí jabágaridun lánigu Crístu

⁹ Jínsiñe jamá jidújeñu lueígiñe Jesucrístu jun láu ínsiñeni le inárüñiti. Iyéeregulá wuríbani jun, falájumei le buídubei. ¹⁰ Lúnti jínsiñegua jumá júmagua queísi idújeñu. Furése jumá lun jiñúragüdüni jíri jidújeñu.

¹¹ Mamáqualigu jumá lídan luwádigimari Wabúreme, seríwi jumei táu sun janígi.

¹² Abágarida jumá gúndaañu láu eménigini le juágubei, gagúraasun jumá dan le jasúfurirun, ayúmuragua lun Búngiu, eteíngirei, súnwandan.

¹³ Íderagua jumáña afiñetiña lídan jemégeirun, resíbi jumáña ja bisídabalün láu ugúndani.

¹⁴ Amúriaja jumá labínirun Búngiu jawágun ja ouserutün wuríba, amúriaja jumá abíniruni joun, máma wuríbani.

¹⁵ Gúnda jumá jáma ja gúndaabaña, jayájua jáma ja ayájubaña.

¹⁶ Abágarida jumá lídan úraguni júmawagua. Manáangua jumá júngua, gamádagua jumá jáma ja gudémebaña. Marítagua jumá juoúgua queísi sábiugu.

¹⁷ Mafáyeira jumá wuríbani luágu wuríbani lun ni ában. Áfaagua jumá lun jadügüni le buídubei jagíbugiñe súngebui. ¹⁸ Adüga jumei sun le juáraati lun jabágaridun lídan dan jáma súngebui. ¹⁹ Nidújeñu jínsiñetiña nun, máguyugüda jumei wuríbani, ígira jumei lun Búngiu lan afáyeigüda luágu. Tariñajare Lerérun Búngiu. “Áu lúnbei nafáyeigüdüniña gürígia luágu jaríban, líña Jabúreme.” ²⁰ Aríñagati gíñe Búngiu. “Ánjein lámá lubeí bágani, rúba eíginí lun, ánjein mágürabu lubeí, rúba dúna lun, lugúndun láu badügüni líra, lebéloruba busíganu lun luágu luríban louserunibu.” ²¹ Mígiraguagüdába búngua lun lagañeirunibu wuríbani lun báguyugüdüñ wuríbani luágu wuríbani, lubáragiñe líra, gáñibeí wuríbani láu buídu le badügübei.

13

¹ Lúnti jíchaagun súngebui júngua lábun jalúrudun gumádimatiña, lugúndun ítara líña laráansejan Búngiu lun ñíbei lan lúrudu, áni gumádimatiña ja lídaanbaña jabára, labúseerun Búngiu añájein lubeí ñí. ² Gürígia lubeiti le awügüríjoúti lun gumádi, múaraanti láu le laríñagubei Búngiu, áni ja awügüríjoútiña ítara, gadúnruntiña luágu líra áni jafáyeiruba luágu. ³ Máma lúnñanu jíchugun gumádimatiña anúfudei joun ja adügübalin

le buídubei, aná joun ja adügübalin le wuríbabei. ¿Buséntibu babágaridun manúfudeiga luei lúrudu? Buídulá bouuserun, ábame buídu ban lurúma lúrudu, ⁴lugúndun lesériwiduña lun Búngiu luágu bufúleisein. Anjein wuríba bouuserun, lúnti janúfude ban, ladüga máma luágu ni cáta gabáfu lan lúrudu lun lafáyeijagüdüñ luágu dúru, quei lesériwiduña lubei lun Búngiu lun lafáyeijagüdüñ luágu dúru. ⁵Ligía lúnti lubei úaragua wamá lúma lilúrudun wageira, mámarügü lun máburujan lan asúfuriruni wawágun, lúnti ítara lan lun jarúmañu lan warítapun. ⁶Ligía gíñe lébubei jafáyeijan seínsu lun gumádi, lugúndun jesériwiduña lúrudugu lun Búngiu áni lun cátei le jeténira.

⁷Ru jumeíme le jáni cáda gürígia joun. Fáyei jumei le lagúburajabei gumádi luágu jufúlasun, lúma buri ámu cátei líbe líra, fáyei jumei le lúnti jafáyeiruni luágu cátei le ñübinbei jun bougudigiñe luei jageira. Gagáambadi jumá joun gumádimatiña, ru jugúyame inébesi joun queisi lubúdubu. ⁸Máni jumá dúweiti ni ca úma, lueidügüya lidúweitina ínsiñeni le jadúweirubei júmagua. Le jínsiñejabuti lun gürígia líledi, adüga láali sun le lubeíbei lilúrudun Búngiu láu ladügüni líra. ⁹Taríñajare Lerérun Búngiu. “Magámaridabá gürígia maríeitiña, máfarajabá, míwerujabá, maríñagabá iyéeni luágu ni ában, mawámadalá jemégen mútu bun.” Gúnfuli wamáali sun gumádi le, lúma buri le líbiri, láu wagúnfulirun lúma lilúrudun Búngiu le aríñagubei. “Jínsiñelá gürígia bíledi bun queisi bínsiñegua búngua.” ¹⁰Le jínsiñejabúbei, madügünti wuríbati lun ni ában, ánjava lubeiti jínsiñejabu, gúnfuli wamáali sun lilúrudun Búngiu queisi lubúdubu.

¹¹Lúnti ítara lan ligáburu wabágaridun lugúndun wabágariduña lídoun lagúmujoún dan. Dánjali lun wagágudun lídaangiñe idábagu, lugúndun yaráfatimaajali óra lun lagiribudun Wasálbaragüle ubouágun sügü láu dán meja le wafíñerunbei luágu ugánu luáguti asálbaruni. ¹²Belújali áriebu buídu, yaráfaali larúgadun, ligía lúnti lubei wígiruni wadügüni cátei wuríbati le adügübei lábugiñe lubúriga, lun wadáürunun wadáürapun queisi súdeara ja lábugiñetiña larúgouna. ¹³Eíbuga wamá queisi lubúdubu ítara queisi gürígia ja buídubaña, úouga ni cáta luágu jagáburu lun jarámudapun luei jaríjin gürígia. Mabágarida wamá lídan bacháruaü, lúma buri lanárime fédu, ni lídan salúfuri lúma iwíyeni, ni lídan gáganiguaü lúma gimúgaü. ¹⁴Lubáragiñe líra, rújumei Crístu guánarügü jubáragiñe lídan sun cátei, masáminara jumá lun jíchugun ugúndani lun lagübüri ayúmajani.

14

Madímurejabá luágu bidúje lueigiñe Jesucrístu

¹Ánjein débili lubei ában gürígia lídan lafíñen, resíbi jumei, maríñagunga ni cáta lun luágu cátei le machourunbei luágu. ²Quei buri, añajein derégüdati jafíñen, jarítaguatiña luágu gayára lan jeigin affíñetiña furúmiegurügü cátei áni jeréderuba jarúmañu ligíbugiñe Búngiu. Añajein jíbiri, débilitiña lídan jafíñen, meígintiña úwi. ³Le eígiti furúmiegurügü cátei, moún lumuti únabu lan lanügüni le meiginbalin, le gíñe májabei leígin furúmiegurügü cátei, moún lumuti gíñe ladímurejan luágu le eígbalin, lugúndun resíbi láali Búngiu gürígia ligía queisi lánigu. ⁴¿Cátabuñadíbugi lun badímurejan luágu gürígia le esériwidubei lun Búngiu? Ánjein erédera buídu o wuríba, Labúreme lúnbei laríjin láu líra. Áni leréderuba buídu lugúndun gabáfuti Búngiu lun leréderagüdüni buídu.

⁵ Nijánya ában jémpulu. Añájein güriquia weiriti janügüni ában wéyu lueí ámu wéyu, añájein jíbiri, affiñetiña luágu ában lan lábu sun wéyu. Cáda ában lúnti lachoúruruni le uágubei larítagua. ⁶ Le areidubei som wéyu, ladügüñein lun líchugun inébesei lun Búngiu. Le eígibe furúmiguarügü cátei, leígini lun líchugun inébesei lun Búngiu, lugúndun rúti eteíngiruni lun Búngiu luágu eígini ligía. Le meíginbei úwi ladüga liloúguan lafiñen, lun líchugun inébesei lun Búngiu ladügei, rúti giñe eteíngiruni lun Búngiu luágu cátei le gayáraabei leígin según lafiñen.

⁷ Nariñagubalin líra lugúndun úa lan ni ában wádaangiñe abágariduti lun guánarügü, úa ni ában ouweti lun guánarügü. ⁸ Ánjawa abágarida, wabágariduña lun wadügüni lugúndan Búngiu, ánjawa ouwe, wounweña según lugúndan Búngiu. Ítara líña lubeíti, dándu lídan ibágari queísi lídan ouweni, láni Crístu wagía. ⁹ Jiláti Crístu, ábaya labágaridun lun Wabúremebei lan, wínwañu wagía yebe, jiláñu yebe.

¹⁰ ¿Ánjein bugúya, ca uágu badímureja luágu bidúje lueígiñe Jesucrístu? ¿Ca uágu banügei quei ni cáta? Búngiu rügüñein lun lagúseragüdün, áni sun wagía, waráramuba ligíbugiñe lun wagúserun, ¹¹ queísi tariñagun Lerérun Búngiu.

Inárüni itara quei gabágarí nan, líña lariñagun Búngiu, luágu jájuduraguba lan sun güriquia nigíbugiñe,

áni jasúbudirubadina súngubei ligíbugiñe guríriguaü.

¹² Cáda lubeíti ában wádaangiñe, lagúseruba luougua lúma Búngiu.

Machúgeraguagüdüabei bidúje

¹³ Ligía, moún lubeí wadímurejan jawágu wadújeñu lueígiñe Jesucrístu. Lubáragiñe líra, derébugulá jarítacun lun madügün jumá ni cáta le gayáraati lachúgeraguagüdüni jíbiri, o lábुरुgüdüni lan lídoun figou.

¹⁴ Subúdi numúti luágu úa lan ni cáta le leígibe güriquia lun lawíyeduni ligíbugiñe Búngiu, áni choúru numúti líra, áu queísi affiñeti luágu Jesucrístu. Láu sun líra, ánjein jarítagua lubeí ában güriquia luágu marúman lan ában cátei, marúmaanti lun, áni figou lun lun leígini. ¹⁵ Ánjeinti bañáwurija lafiñen bidúje láu cátei le beígibe, mámaali bagáburiduña láu ínsiñejabuni. Madügabá lun leféridirun ában güriquia le ueígiñebeí louwe Crístu, ladügarügü beígin itaga cátei. ¹⁶ Míchiga jumá lubeíti lúgaaru lun ladímurejoún wuríba luágu cátei le gayáraabei jadügüni queísi affiñetiña luágu Crístu. ¹⁷ Larúejan Búngiu máma cátei luáguti le eígibe o atúbei, luáguti ában ibágari le lánina ísuruni, darángilaü lúma ugúndani le líchugubei Sífiri Sándu woun. ¹⁸ Le esériwiduti lun Crístu lídan igáburi le, gúndaati Búngiu láu, áni buíti giñe jarúma güriquia.

¹⁹ Ítara méme wamá lubeíti áluaja lun lídan lan darángilaü sun cátei, lun gayára lan wíderacun wámagua lun wawáanserun lídan cátei le lánina Búngiu. ²⁰ Magúrinchaguabeí luwádigimari Búngiu lídan libágari ában güriquia láu cátei le beígibe. Inárüni luágu jarúma lan sun eígini ligíbugiñe Búngiu, le wuríbabeí, lun leígin cátei le áburügüdütiña ámu güriquia lídoun figou. ²¹ Buíti lun meígin ban úwi, matún bínu, madügün ni cáta le achúgeraguagüdüti bidúje, o lábुरुgüdüni lan lídoun figou, o ledébiliragüdüni lan lafiñen. ²² Afíñeni le buágubei, lúnti buágu guánarügü lan ligíbugiñe Búngiu. ¡Gúndaati güriquia le gayáraabei lariñagun luágu buídu lan cátei le ladügubei, masándiragunga ligía lúngua láu dúru! ²³ Ánjeinti le

eígibeí ában cátei láu machoúruni luágu buídu lan leígini queísi afíñeti luágu Crístu, gadúnrunti ladüga leigíni, lugúndun meígin lumúti láu afíñeni. Sun le wadügübei, ánjava arítagua luágu fágua lan moun láani wadügüni, figoú woun.

15

Gúndaagüdübabá gürígia bíledi, máma amüürü guánariügü

¹ Wagía le jerebei lídan wafíñen, lúnti gagúraasun wamá jabá ja louguagiñabaña afíñe, lúnti warítapun luágu le buídubei joun, mámarügü luágu wíchugun ugúndani woúniwagua. ² Cáda ában wádaangiñe, lúnti lagúndaaraguagüdüni gürígia líledi láu le buídubei lun gürígia ligía, lúma láu le gayáraati lagánwoundagüdüni lafíñen. ³ Ni Crístu, míchugunti ugúndani lúniwagua, lubáragiñe líra, suséreti le abürüjoúbei tídan Lerérun Búngiu lun. “Núguchi, áburujati janábajan ja anábubalibu nuágun.” ⁴ Sun le aríñawagúbei tídan Lerérun Búngiu lúmagiñe binárü, lun larúfudajoún woun labürüjoúa, bürüwatí meja dimúrei buri ligía lun wanügün gurásu lúma dügüdaguau lídaangiñe, gayára lámuga wemenigiduntima luágu Búngiu. ⁵ Búngiu le íchugubei gurásu lúma dügüdaguau, íderagualaün lun jabágaridun lídan dan jáma jibirigu, queísi ladügüni Jesucrístu. ⁶ Ítara lúba, sun lan wagía lídan ában, láu ábanrügü umálali, wíchuguba uweíríguni lun Búngiu, le Lúguchi Wabúreme Jesucrístu.

Agáambatiña ja mámabaña juríu luágu Wasálbaragüle

⁷ Resibigua jumá lubeiti júniwagua quei giñe lerésibiruniwa Crístu, lun liñurúniwa líri Búngiu. ⁸ Le naríñagubei, luágu liábinbei lán meja Crístu lun lesériwidun joun juríu, lun lagúnfulirun dimúrei le íchugúbei joun binádu wagübürigu, lun larúfudún luágu gúnfuli láani Búngiu lerérun. ⁹ Liábinbei giñe lun íchuguba lan ja mámabaña juríu uweíríguni lun Búngiu luágu lareídun, quei taríñaguni Lerérun Búngiu. Ligía níchuguba lubei uweíríguni bun jagánaguagiñe ja mámabaña juríu, nerémujaba giñe luágu buweírígün.

¹⁰ Taríñajare giñe Lerérun Búngiu.

Gúnda jumá, júgúya le mámabei juríu, úara jáma ja lánigubaña Búngiu.

¹¹ Taríñajare giñe.

Rújuma sun ja mámabaña juríu inébesei lun Búngiu,

adímureja jamá sun gürígia luágu luweírígün.

¹² Laríñajare giñe Isaías tídan Lerérun Búngiu.

Liábiba ában ladügawagun Isaí,

le lúnbei lagúmadiruniña ja mámabaña juríu.

Jagía, jeménigiduba luágu.

¹³ Búngiu, le íchugubalin eménigini woun, buíngüdalaün láu ugúndani lúma darángilaü lídan jafíñerun luágu, lun buíñu jumá láu eménigini, láu lubáfu Sífiri Sándu.

¹⁴ Nidújeñu, choúruguatina núngua luágu buin jíña lan láu areíduni lúma subúdi luágu wafíñen luágu Crístu, luágu giñe gíchigadi jumá dimúrei buíti joun jibirigu. ¹⁵ Tídan gárada to, abürüjaadina jun láu sun furáangu luágu buri cátei le lun mabúlieidun jumáni. Nadügüñein luágu wadágimanu le rúlaalíbei Búngiu nun láu lareíni, ¹⁶ lun nesériwidun lun Jesucrístu jagánagua ja mámabaña juríu. Seríwi le nadügübei, napúrichijani ugánu lúmagiñeti Búngiu luágu Wasálbaragüle lun nanügübaña lan ja mámabaña

juríu lun Búngiu, lun lerésibiruniña queísi gürígia ja jarúmaaru janígi láu luwádígimaridun Sífiri Sándu jádan.

¹⁷ Ítara líña lubeíti, áu queísi ában afiñeti luágu Jesucrístu, gébunati gúnda nan lídan nesériwidun lun Búngiu, ¹⁸ luágu rügüñein buri cátei le ladügübei Crístu guánarügü nídaangiñe nadímureja, lun jayábin ja mámabaña juríu lun jagáambubei lan Búngiu. Yúsu láali Crístu nerérun lúma náfaagun, ¹⁹ luweírín buri seíni lúma buri miláguru le nadügübei láu lubáfu Sífiri Sándu nídán, lun lanügüniña ja mámabaña juríu lúmoun. Láu igáburi le, joustagüda náali lapúrichijóun ugánu luáguti asálbaruni lídaangiñe Crístu, lúmagiñe Jerusaléngiñe darí loubwagun Ilírico. ²⁰ Ítara líña áfaaguaadina lan lun napúrichijani ugánu luáguti Wasálbaragüle le ní lumuti magaambúngili lan líri Crístu. Mabúseeruntina nuwádígimaridun lun Crístu lídan fulásu le ní lumuti chülújali lan ámu láu ugánu luágu, nubáragiñe, ²¹ lubáragiñe líra, súnwandan busén nan nagúnfuliruni dimúrei lébei le taríñagubei Lerérun Búngiu.

Ja masúbudirungiñabaña luágu, jagáambuba luágu, gunfaráanda jagíame luágu.

Jarítaguati Páblo lídin Róma

²² Ladüga nesériwiduña lan lun Crístu lídan ámu fulásu, siñágili lubei nídin bisídaun, láu sun gíbeeli lan weiyaasu nabúseerun nadügüni. ²³ Guetóti, quei gumúnaali lan nuwádígimari lueígiñe oubaü le, áni quei lúmagiñe lan binárü nabúseera nídin aríjaun, ²⁴ agúrabatina násügürün bisídaun dánme le nídin Espáña. Lárigiñeme aríja náadün lan lun wagúndaaragun wámagua murúsuraü, agúrabatina lun jíderagubadina lan luágu nuweíyasun yágütoun. ²⁵ Ánjein guetó, neíbuga Jerusalén, barüina cátei joun wadújeñu lueígiñe Jesucrístu ní. ²⁶ Lugúndun wadújeñu ja Macedóniabaña jáma ja Acáyabaña jarítaguaaña jóundarun seínsu jádaangua lun jóunajani joun idújeñu gudémetiña ja Jerusalénbaña. ²⁷ Jarítaguaaña luágu buídu lan lun jadügüni cátei le, áni richátiña, lugúndun dúwei jamúti joun le tímatimaati, lugúndun ítara quei jafánreinraguni afiñetiña ja juríu jarísín le lánina siélu jáma ja mámabaña juríu, lúnti giñéti jíderaguniña afiñetiña ja mámabaña juríu afiñetiña ja juríu luágu jemegeirun ya ubouágu. ²⁸ Dánme lubeíti gumúnaali cátei le, derége neíme seínsu le joun, ábame nídin lun Espáñoun, bisída naünme dánme le násügürün. ²⁹ Chóuru numúti luágu dan lánme nachülürün júmoun, nachülürüba lan buin láu abíniruni lúmagiñe Crístu.

³⁰ Nidújeñu, ayúmuraguatina jun luágu jínsiñejabu lun Wabúreme Jesucrístu, lúma luágu ínsiñeni le líchugubei Sífiri Sándu woun, lun júaradun núma lídan áfaaguni, ayúmuragueina lun Búngiu nuágu. ³¹ Amúriaja jumá lúma Búngiu lun leséfurunina jaweí mafiñetiña ja Judéabaña, lun giñe buídu lan lerésibirúniwa íderawaguni le nanügübei joun wadújeñu ja Jerusalénbaña, ³² lun gúndaabadina lan dánme le nachülürün júmoun eméraagua murúsun, ánjein ligía lubei lugúndaabei Búngiu. ³³ Júmalá Búngiu le íchugubei darángilaü. Ítaralá.

16

Mábugaü lun cáda ában

¹ Táu gárada to, nasúbudiragüdüñoun Fébe, wadúje lueígiñe Crístu to esériwiduboun wáma tídan ligilisi to Cencreáboun, jun. ² Dánme le

tachülürün júmoun, resíbi jumoún buídu lídan líri Wabúreme, queísi lúnti lan ladügün jádan idújeñu lídan afíñeni. Íderagua jumoúnme lídan furúmieguaügü cátei le temégeirun, lugúndun tugúya, sarágujaña tíderagun, íderagua táadina gíñe.

³ Mábuga níña tun Priscíla, lúma lun Aquíla ja nidújeñu lídan nesériwidun lun Jesucrístu. ⁴ Jagía, rújamuti jabágari guánarügü lídoun lénreengúnga lun jasálbaruni nibágari, teínqui níña lubeíti joun, áni mámarügü áu, sun gíñe wadújeñu ja tílana jalígílisin ja mámabaña juríu, rújamuti jeteíngirun joun luágu líra. ⁵ Mábuga níña gíñe joun wadújeñu ja oúndaragubaña jábiñe Priscíla lúma Aquíla. Mábuga níña lun numáda Epenéto le jínsiñebei nun, le furúmíñebei afíñeruti luágu Crístu ubúruagu Acáya. ⁶ Mábuga níña tun María to ñadágimeinjáruboun sarágu jagánagua, jugúya Rómána. ⁷ Mábuga níña joun nupaísanu Andrónico lúma Junías já meja níbirigubaña furísunrugu, buíti jadímurejan láni Crístu apóstolugu jawágu, jagía gíñe afíñerubaña luágu Crístu nubáragíñe.

⁸ Mábuga níña lun Amplías, numáda jínsiñeti nun queísi lánigu Crístu. ⁹ Mábuga níña lun Urbáno, woúba lídan wawádigimari luágu Jesucrístu, lúma lun Estáquis, numáda le jínsiñebei nun. ¹⁰ Mábuga níña lun Apéles, le arúfuda láalíbei lafíñen luágu Crístu sarágu weíyaasu, mábuga níña gíñe joun tílana lúban Aristóbulo. ¹¹ Mábuga níña lun nupaísanu Herodión lúma joun tílana lúban Narcíso ja afíñebaña luágu Wabúreme. ¹² Mábuga níña joun Trífena túma Trífosa, ja ñadágimeinbaña lídan luwádigimari Wabúreme, lúma gíñe tun wadúje Pérsida to jínsiñeboun woun, to adúgaaruboun sarágu lídan líri Crístu. ¹³ Mábuga níña lun Rúfo, wügüri le buídubei igáburi le tímatimaati ligíbugíñe Crístu, mábuga níña gíñe tun lúguchu, to gíñe ítarajaruboun quei ában úguchuru nun. ¹⁴ Mábuga níña joun Asíncrito, Flegónte, Hérmes, Patróbas, Hérmes, lúma joun wadújeñu ja jámabaña. ¹⁵ Mábuga níña gíñe lun Filólogo lúma tun Júlia, lun Neréo lúma tun lítu, lun Olímpas lúma joun sun wadújeñu lueígíñe Crístu ja jámabaña.

¹⁶ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua. Mábuga jáña sun tílana lilígílisin Crístu jun.

¹⁷ Nidújeñu, ayúmuruaguatina jun lun jarjiniña cátaña lan ja afánreinraguagüdübaña gürígia, ru jagía achúgeraguágülei lun jafíñen. Múaraanti le jadügübei lúma le arúfudajoubei jun. Díse jumá jawei gürígia jagía, ¹⁸ lugúndun gürígia jagía, mesériwiduntiña lun Wabúreme Jesucrístu, joungua guánarügü jesériwida. Jeyédañati gürígia ja únabugutiña láu buri liñúlun lúma lubuídun lagaambún jerérun. ¹⁹ Subúdi jamúti sun gürígia luágu ñúdüñ jumá láu le lubeíbei Búngiu, ligía gúnda nubei, buséntina gíñe lun furése jumá ladügüni le buídubei, máma lun le wuríbabei. ²⁰ Búngiu le íchugubalin darángiláü, lagáñeiragüdübadün luágu Máfia, furése. Binílaün Wabúreme Jesucrístu.

²¹ Mábuga líña Timotéo jun, le noúba lídan wadágimanu, mábuga jaña gíñe Lúcio, Jasón lúma Sosípater, ja nupaísanu, jun.

²² (Áu, Tércio, le abúrújbarun gárada to, mábuga níña gíñe jun, nidújeñu lueígíñe Wabúreme.)

²³ Mábuga líña Gáyo jun. Naganoúña tídan lúban to gíñe lafúrederúboun joun sun tílana ligílisi. Mábuga líña gíñe Erásto jun, le ágüdajabalin liseínsun fulásu, lúma gíñe wadúje Cuaróto.

²⁴ Binílaün Wabúreme Jesucrístu sun jugúya. Ítaralá.

Rúwama uweírighuni lun Búngiu

²⁵ Guetóti, rúwama inébesi lun Búngiu, le gayáraabei ladügünün lúntima derégüdagu jumá lídan jafñen, según ugánu luáguti asálbaruni le napúrichijabei, lúma arúfudajani luágu Jesucristu. Arámudaguati meja laráansejan Búngiu luáguti wasálbarun lúmagiñe lubáragiñe lagúmeserun uboú, láu sun abürüja jamá meja profétagu luágu. ²⁶ Guetó, láu lugúmadin Búngiu le wínwanbei lun sun dan, subúdigüdáwaali luágu Wasálbaragüle joun sun gürígia lun gayára lan jafñerun luágu, gagáambadi jagíame lun Búngiu.

²⁷ ¡Uweírighuni lun Búngiu le ligíarügüti, ábanrügüti, le ligíarügüti chu áu, uweírighuni lun, lídaangiñe Jesucristu, lun sun dan! Ítaralá.

FURÚMIÑETU LIGÁRADAN PÁBLO JOUN CORÍNTONA

Labürüjan Páblo joun títana ligílisi Corínto

¹ Áu Páblo, wáladina Búngiu láu lugúndan lun ábanbadina la lání Jesucristu apóstolu, le méme giríbei ában le loúnajan. Nabürüjañoun gáradato, úara lúma wadúje Sóstenes, jun, ² jugúya le wadújeñu lueigiñe Jesucristu ja títanabaña lilígílisin Búngiu to ubúruguboun Corínto, ja lánigubaña Búngiu ladúga lídaañadün lan ában lúma Jesucristu. Wájali Búngiu jun lun jedéregeragun júngua lun le gumúti, queisi wájali lan joun sun ja agúarubalin líri Wabúreme Jesucristu lídan sun fulásu lun jedéregeragun joúngua lun. Jesucristu Jabúremebei, ligía gíñe Wabúremebei. ³ Resíbi jumei abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucristu.

Abíniruni le wánibei lídaangiñe Jesucristu

⁴ Súnwandan neteíngiruni Búngiu juágu, luágu abíniruni le rúlaalíbei jun láu lareíni, lídaangiñe Jesucristu. ⁵ Ladúga lídaañadün lan ában lúma Crístu, rújali Búngiu sun luwúyeri irisini le lánina siélu jun, rújali ában oúnwenbun subúdi jun luouúgua, lun gayáraabei lan jadímurejan luágu láu ában lichú áu. ⁶ Ítara líña geféen jumá luágu inárüni lan le waríñagubei jun luágu Crístu. ⁷ Láu igáburi le, úati ní cáta jemégeirun lídaangiñe le líchugubei Crístu, sun anjúnja lan agúrabajei wéyu le lúnbei lagíribudun Wabúreme Jesucristu ubouágun. ⁸ Lágúdajabadün Búngiu derégüdagu lídan jafíñen darí lúmoun lagúmujoún, lun úa lan ní ában íchuguti jidúnrun luágu ní cáta dánme le líabin Wabúreme Jesucristu. ⁹ Súnwandan lagúnfuliruni Búngiu lerérun, áni ligía agúarubei jun lun lídan jumá ában lúma Jesucristu, le Liraü, le Wabúreme.

Fánreinguaü jádan lánigu Búngiu

¹⁰ Nidújeñu, ayúmuraguatina jun luágu líri Wabúreme Jesucristu, lun júradun, lun meréde jumá fánreinguañu. Abágarida jumá lídan úarani le gumúti, láu ában méme luwúyeri asáminaruni lúma ayúmajani. ¹¹ Naríñagunbalin le, nidújeñu, lugúndun aríñagaaña ja jádaangiñebaña lufámilian Cloé luágu níjein lán nege múarani jagánagua. ¹² Ámuñegueinarügü lán nege cátei laríñagun cáda ában jádaangiñe, añájein nege jádaangiñe, aríñagatiña. “Áu, lánigu Páblo áu”, jaríñaga jíbiri. “Áu, lánigu Apólos áu”, jaríñaga jíbiri. “Áu, lánigu Pédro áu”, jaríñaga jíbiri. “Áu, lánigu Crístu áu”. ¹³ ¿Cámegi sun le? ¿Fánreinwaguati funági Crístu? ¿Dáwaguatina funági luágu gurúwa luágu jufúleisein? ¿Ódi lídan níri jabásterá? ¹⁴ Teínqui níña lun Búngiu luágu mabásteragüdün nan ní ában jádaangiñe lueídügüya Críspo lúma Gáyo, ¹⁵ ítara, úati ní ában lun laríñagun luágu lídan lan níri labásterá lun nánigu lan. ¹⁶ Narítaguñein guetó luágu badíseigüda náani gíñe Estéfanás jáu sun títana lúban, marítaguñein anjein badíseigüda nubeí ámu. ¹⁷ Moúnajan lumútina Crístu abásteragüdaja, loúnajañadina apúrichíjei ugánu luáguti lasálbaruniña gürígia, máma láu apúrichijani le weíriguburiti, lueí lagídarun lídaangiñe laníchigu loúnwen Crístu luágu gurúwa.

Arijúati lubáfu Búngiu lúma lichú láu lídan Crístu

¹⁸ Ítara líña ugánu luáguti loúnwen Crístu luágu gurúwa quei libídiouniga áu joun ja lúnbaña jeféridirun, ánjein woun, wagía le lúnbei wasálbarun, subúdi wamúti luágu lídaangiñe lan ugánu luáguti loúnwen Crístu larúfudei Búngiu lubáfu lun lasálbaruniña gürígia. ¹⁹ Bürüwati tídan Lerérun Búngiu. Nagürinchagubei lichú áu le lánina ubou le, nadügübei jafürendeí furéndeitiña lun ni cátime ánjein máma lubeí númagiñe liábin.

²⁰ ¿Cáti un ju lan le chúbei áu, o le arúfudajabei, o le lan gasígenejadibalín buri cátei le lánina ubou le? Úati ju lan lun ni cáta, adüga láali Búngiu lichú láu ubou le lun libídiounigame áu. ²¹ Láu lichú láu, adügati lun masúbudirun jamáni ja lánigubaña ubou láu lichú áu le jawágubei. Láu giñe lichú láu, ába laráansejan lun lasálbaruniña ja afiñebaña luágu lárigiñe jagáambuni ugánu luágu loúnwen Crístu jawágu, láu sun barü jamaani jíbiri gürígia ugánu le quei libídiouniga áu.

²² Buséntiña juríu jaríjin miláguru lun jafiñerun luágu Crístu, ja mámabaña juríu, buséntiña lun láubei lan lichú áu arúfudajani lun gayáraabei lan jerésibiruni. ²³ Ánjein wagía, wapúrichija luágu Crístu le ádarawagúbei luágu gurúwa. Jayábiti juríu, siñáti jerésibiruni ában asálbaragülei le ouwebei láu ában luwúyeri ouweni le busíganudünati líbe líra, játi mámabaña juríu, janügüni quei libídiouniga áu. ²⁴ Láu sun líra, añájein jádaangiñe juríu jáma ja mámabaña juríu ja agáambubalin lagúarun Búngiu joun lun lánigu jamá. Jagía, gayáraati jaríjini lubáfu Búngiu lídan loúnwen Crístu, lúma lichú láu lun lasálbaruniwa ítara. ²⁵ Joun lirájüñü ubou, libídiouniga áu laráansejan Búngiu, wel, weíriti lichú láu Búngiu sügü láu le chútimaabei áu ubouágu. ²⁶ Nidújeñu, lúnti jasúbudiruni luágu wájali lan Búngiu jun, láu sun míbe jamá jádaangiñe chúti jáu según ubou, áni míbetiña giñe jádaangiñe weírigutiña, o jádaangiñetiña lan famíliá iñugutiña. ²⁷ Anúadaja láaña Búngiu ja ibídiouguabaña áu según ubou lun lichugun busíganu joun ja chúbaña áu, láu jaríjini luágu ni cáta lan lichú jáu ligíbugiñe Búngiu. Anúadaja láaña giñe ja lanügübaña ubou quei mabáfutiña lun lichugun busíganu joun ja gabáfubaña, láu jaríjini luágu ni cáta lan jabáfu ligíbugiñe Búngiu. ²⁸ Anúadaja láaña Búngiu ja maweíriginbaña ubouágu, ja áubaña mebéresenwa lan, ja ni cátabaña, lun larúfuduni luágu ni cáta lan ja anáangubaña jóungua ubouágu. ²⁹ Úati lubeíti ni ában gayáraati lanáangun lúngua ligíbugiñe Búngiu. ³⁰ Rúládün Búngiu guánarügü jugúya afiñetiña lídoun ában lúma Jesucrístu. Ladüga cátei líra, ibíjatiwa lichú áu lúmagiñe Crístu, gayáraati lerésibiruniwa Búngiu queísi richáguatiña, derégeguañu woúngua lun, sálbañu. ³¹ Ítara líña lubeíti adüga wameí quei tariñagun Lerérun Búngiu. “Le busénti ladímurejan luágu uweíriguni, adímurejalá luágu luweírini cátei le adüga láalibeí Wabúreme Crístu woun.”

2

Ugánu luáguti Crístu le ádarawagúbei luágu gurúwa

¹ Nidújeñu, dán meja le nídinbei lun nadímurejan jun luágu linárün Búngiu, adüga numúti mayúsurunga dimúrei buri iñuguti. ² Dan lé meja júma nubeí, máluguntina meja napúrichijan luágu ámu cátei lueídügüya luágu Jesucrístu le ádarawagúbei luágu gurúwa. ³ Ába narúfudagun núngua jun queísi ában wügüri gudémeguti, adádagareina láu anúfudei

lueí jamúga níjein lan mégeiti lídan nuwádigimari luágu Wabúreme. ⁴ Dán meja le nadímurejanbei jun, ába napúrichijani Lerérun Búngiu jun, máluajantina nagáñeirunün láu buri dimúrei le jadímurejan wügüríña chu táu. Lubáragiñe líra, láurügü lubáfu láni Búngiu Espíritu nadímureja jun, ába jasúbudiruni luágu inárüni lan le nariñagubei jun. ⁵ Ítara líña jafíñerun lídaangiñe lubáfu Búngiu, máma lídaangiñe lichú jáu gürígia.

Arúfudaguati Búngiu lúngua lídaangiñe láni Espíritu

⁶ Láu sun líra, adímurejatiwa luágu ában luwúyeri lichú áu joun ja weínamujañábaña lídan jafíñen. Ánjeinti lichú áu ligía, máma lánina ubouú le, máma giñe jáni ja agúmadijabaña ya ubouúagu, ja madíseelibeí ánjañame gumúgua. ⁷ Luágu lichú láu Búngiu wadímureja, le áubei laráanseja lúmagiñe lubáragiñe ladügüni ubouú lun lasálbaruníwa lun sun dan, gafánran wamámuga lídan sun luweírigan Crístu. Ligía rügüñein meja asúbudirei aráansejani ligía, guetó, subúdigüda láali woun. ⁸ Játi gumádimatiña lánina ubouú le, siñáti gunfaráanda jamáni laráansejan Búngiu lubá wasálbarun, lugúndun lun jamúga gunfaráanda jamáni, mádaragun jamúti jamúga Crístu luágu gurúwa. ⁹ Ítara líña queísi tariñaguni Lerérun Búngiu.

Maríjiñaja jamágili gürígia cátei buíti lé buri laráansejabei Búngiu joun ja jinsiñejabúbaña lun, magáambuñajagiña gürígia luágu cátei buíti líbeina líra, marítaguntiña ída lúba lan.

¹⁰ Ába lasúbudiragüdüni láni Búngiu Espíritu, le méme Sífiri Sándu, luáguti buri sun lubuidun cátei ligía woun, wagía afíñetiña. Aríaaja lumúti Sífiri Sándu sun cátei, áni subúdi lumúti lujúlilin-ágei larítangun Búngiu.

¹¹ ¿Ca jádaangiñe gürígia gayáraabei lasúbudiruni ca lan tídaanbei lanígi ában gürígia, lueídügüya espíritu le lídaanbei gürígia ligía? Ítara líña giñe, láni rügüñein Búngiu Espíritu asúbudirei sun cátei le lánina Búngiu. ¹² Wagía afíñetiña, máma ában espíritu le lánina ubouú werésibirubei, Sífiri Sándu le ñübinbei lúmagiñe Búngiu, ligía werésibirubei, lun gunfaráanda wamáni le rúlaalíbei Búngiu woun láu lareíni. ¹³ Adímurejatiwa luágu lareíni Búngiu láu buri dimúrei le larúfudajabei Sífiri Sándu woun, máma láu buri dimúrei le wafúnrendeirun láu lichú wáu, le jáni gürígia. Ítara líña, laú lubáfu Sífiri Sándu, wafúnraanguagüdei linárün Búngiu joun gürígia ja ibíjubalin Sífiri Sándu.

¹⁴ Gürígia le mibíjinbalin Sífiri Sándu, májati lun larítangun Búngiu le larúfudajabei láni Búngiu Espíritu jádaangiñe gürígia, lugúndun libídiouniga áu lanügüni, siñá lumuti gunfaráanda, lugúndun cátei lán buri le, láu rügüñein lubáfu Sífiri Sándu gayára lan gunfaráandawa lan. ¹⁵ Ánjeinti gürígia le gámati Sífiri Sándu, gáma lumúti larúgounga le líchugubei Sífiri Sándu luágu sun cátei, jayábiti ja lirájüñü ubouú, siñáti gunfaráanda jamáni cáteiñein lan gürígia le eíbugubei lídan larúgounga le líchugubei Sífiri Sándu. ¹⁶ Queísi laríñawagun tídan Lerérun Búngiu. “¿Ca gunfaráanda jamáalibeí lisáminan Búngiu? ¿Ca gayáraabei larúfudajan lun Búngiu?” Láu sun líra, wagía afíñetiña, níjein lisáminan Crístu wádan ladüga ibíja wamáali Sífiri Sándu.

3

Luwádigimari Páblo lun Búngiu lídan ában jáma jíbiri

1 Láu sun líra, nidújeñu, dán meja le júmañadina lan, siñáti méja nadímurejan jun queísi joun gürígia ja lagúmadirubaña Sífiri Sándu, adímurejatina meja jun queísi joun gürígia ja míchaagugiñábaña joúngua lábugiñoun lagúmadijan Sífiri Sándu le gumúti—queísi joun irájüñü—luágu buri cátei le luáguati Crístu. 2 Ába níchugun arúfudajani le ménreengunti jun, queísi líchugúniwa úri lun ában irájü le gurágili lewéñegua eígini le deréguati, lugúndun siñágili lan lájuluchun eígini le deréguati. Siñá jumuti meja líla lujúlilin-ágei larítagun Búngiu gunfaráanda, áni chülü lúmoun dan le, siñá meme jumágili, 3 lugúndun gagáburigidün queísi jagáburi lirájüñü ubouú. Níjeingua ligía gimúgaü jídan, gáñiguaü, fánreinguaü, máma jígiraguagüdúña júngua lun labúgurunün Sífiri Sándu, áni jadüğüñein le jadüğübei sun mútu. 4 Lugúndun láu lariñagun ában. “Lánigu Páblo áu”, lariñagaya ában. “Áu lánigu Apólos”, jadüğüña queísi gürígia ja lánigu ubouú le.

5 ¿Cátanagi? ¿Cáteigi Apólosbei? Esériwidutiñarügü lun Búngiu wagía, ja ídaangiñébaña jiábin afiñera luágu Crístu. Wadágimanu le líchugubei Wabúreme lun cáda ában wádaangiñe, ligía wadüğübei. 6 Áu ábunagubalin Lerérun Búngiu queísi nádü tidoun janígi, Apólos áturaguei nádü ligía láu larúfudajan méme jun luágu Crístu. Búngiu aweíridagüdúbalin nádü, ligía edérebugüdúbalin jafiñen. 7 Ni lubeíti le ábunagubei, ni le áturagubei, ni cáta jagía, ánjeinti Búngiu, sun cátei ligía, lugúndun ligía aweíridagüdúbarun nádü. 8 Ában jáu ja ábunagubaña jáma ja áturagubaña, láu sun lafáyeirubei lan Búngiu cáda ában según luwúyeri lesériwidun lun. 9 Íbirigu wagía lídan wadágimanu esériwida lun Búngiu, jugúya, ítara jíña quei múa le luwádigimaridubei Búngiu.

Ítara jíña gíñe queísi ában múna to lábunaguñounboun Búngiu. 10 Fuleísei láadina Búngiu láu líchugun ubáfu nun lun nuwádigimaridun úara lúma. Niábiti queísi ában wügüri le subúsijabúbei lun labunún wagábu buídu—áú le íchugubalin ébuu lun jafiñen. Ámuti gürígia ábunagubei ligíbuagu ébuu ligía—jagía maésturugu ja arúfudajabaña luágu Jesucristu jun, nárígi. Cáda ában, lúnti goúnigi lan ída líña lan lábunagun ligíbuagu ébuu ligía. 11 Rúaaali ébuu lun jafiñen, áni siñáti líchugúniwa ámu ébuu. Ébuu ligía, Jesucristu guánarügü. 12 Gayáraati lábunagun gürígia ligíbuagu ébuu ligía laú cátei gebégiti le siñábei lágudúniwa, queísi gólu, pláta, lúma dübü gebégiti, o gayáraati lábunagun láu cátei le mebégibe sarágu, le gayáraabei lágudúniwa, quei fuláansu, murísi o mabúru. 13 Lachülürüba wéyu lun louchuni Búngiu jawádigimari sun gürígia ubouágu lun larjini ída líña lán meja, ánjein gebégi lubei lúmoun mebégi lan. Louchagubei wawádigimaridun quei láu wátu geméti, aríja lámugei ánjein gayára lubei lawándun, ánjein gebégi lubei. 14 Ánjein buídu lubei wawádigimaridun luágu Búngiu áni madúnamati lun lagünrinchawagúniwa, queísi siñá lan tagünrinchawagúniwa múna to adüğütu láu cátei derébuguti, werésibirubei wafáyeirujaja lúmagiñe Búngiu. 15 Ánjein mabuídun lubei wawádigimaridun luágu Búngiu, lagünrinchawagúba sun wawádigimari, weféridirubei sun cátei, wawánirügüba wasálbara, quei le séfugarügüti lúngua lídaangiñe wátu geméti.

16 ¿Íbidiñetísan jun luágu lilígilisin lan Búngiu jugúya, áni agánawa lan Sífiri Sándu jídan? 17 Ánjoun lagünrinchagua ában gürígia lilígilisin Búngiu

tugúya, lagünrinchagubei giñe Búngiu gürígia ligía, lugúndun Búngiu jabúremebei tílana lílígílisin, áni jugúya guánarügü tílanabei lígílisí tugúya.

¹⁸ Mayéeragua jumá júngua. Le arítaguti luágu sábiu lan según lichú áu le lánina ubou le, lúnti labúlieiduni lichú áu ligía, lun lanügüniwa queísi ában ibidiougua táu según ubou, gayára lámuga lerésibiruni lichú áu le tímatimaati le líchugubei Búngiu. ¹⁹ Lugúndun lichú áu le lánina ubou le, ában libídiouniga áu lun Búngiu. Taríñajare Lerérun Búngiu. “Áburügüda lumútiña Búngiu ja chúbaña áu según ubou le tídoun lisá daraana jabibun guánarügü.” ²⁰ Aríñagatu giñe. “Subúdi lumúti Wabúreme Búngiu luágu mála lan jasáminan sábiugu.” ²¹ Ligía moún lubei lun janáangun júngua luágu arúfudajati le jafálarubei, ladüga gürígia rügüñadiwa sun wagía, áni rúlaali Búngiu sun cátei jun lun lesériwidun jun. ²² Rúlaadina jun láu sun Apólos lúma Pédro, lun warúfudajan jun. Rúlaali giñe sun cátei le ubouagubei jun lun jayúsuruni. Rúlumuti giñe íbágari lúma ouweni jun. Sun le asúseredubei jun ugúñe lúma sun le lúnbei lasúseredun jun, jáni. ²³ Jáni sun cátei ladüga lánigu Crístu jugúya, áni Crístu láni Búngiu.

4

Jawádigimari apóstolugu

¹ Lúnti lubeíti janügüniwa queísirügü esériwidutiña lun Crístu, ja íchugúbaña lun jarúfudajani linárün Búngiu lé meja arámudaguabei jun. ² Le lubeíti íbítiti ában wadágimanu, lúnti ladügüni buídu lun larúfuduni luágu gadüna lan lun leménigidun liyúbudiri luágu. ³ Ánjein luágu noubadina, maweírinti nebésererun luágu ída líña lan janügüni nesériwidun lun Búngiu, ni jugúya ni furúmieguarügü le ubouaguna. Ni áu guánarügü, siñáti nariñagun ánjein buídu lubei nesériwidun lun, o ánjein níjein lubei mégeiti luágu, ⁴ láu sun madúnrun nan luágu ní cáta lurúma narítangun, máma lueígiñe líra lun madúnrunbadina lan, Nabúreme agúseragüdübalina. ⁵ Magúseragüda jumá lubeíti luágu buri cátei lubáragiñe dan, agúra jumá lagíribudun Wabúreme Jesucrístu ubouagun lun laságaruni cátei le arámudaguabei lídoun larúgounga. Lasúbudiragüdübei Wabúreme tarítangun cáda ában anígi, ca lan ueígiñe wadügei sun le adüga wamálibei. Ábame ladímurejan Búngiu buíti luágu gürígia le buídubei adüga.

⁶ Nidújeñu, adímurejaadina nuougua lúma luágu Apólos queísi ában jémpulu jun lun gayáraabei lan jafúnrendeirun lídaangiñe le nariñagubei wawougua. Le lúnbei jafúnrendeiruni, lun manügün jumá ában gürígia weíri luei le lúnbei lanügüniwa, queísi bürüwañu lan, lun giñe manáangun lan ni ában lúngua luágu ában arúfudajati le lafálarubei, áni lanügeime le ában quei ni cáta. ⁷ ¿Cági adügübalibu buídu jaweí jíbiri? ¿Cági cátei búmabei le mámabei líchugun Búngiu bun? Ánjeinti Búngiu lubei íchugubalin sun cátei bun, ¿cáti uágu banáangua búngua camá jamuga íbíjarügü bumúti le búmabei láu báni búngua?

⁸ Jaganouñ camá jamuga rísijadün lídan cátei lánina Búngiu, íbíja jumáli sun le gayáraabei jabúseeruni lídaangiñe le líchugubei. Sandíguatün júngua camá jamuga jarúeijaña lúma Crístu, ígira wagía. ¡Buíti jamúga lun urúeigu jumá le tímatimaati lun jamúga gafánran wamá lídan jarúeijan! ⁹ Laganoún nun luágu ígira láadiwa lan Búngiu wagía apóstolugu lídan lagúmujoún ubárau. Ítara wáña queísi gürígia ja siádiwañabaña lun ouweni, ñúbinjadiwa lun ábanbadiwa lan aríawasei lun jaríaguniwa sun lílana ubou,

dáandu ánjeligu queísi gürígia. ¹⁰ Barüwatiwa queísi ibídiougua táu lueígiñe wesériwidun lun Crístu, sun jarítaguñu jumá juoúgua luágu chu lan jáu lídan cátei lánina Crístu. Según jugúya, wagía débilitiwa, jugúya jéretün. Barü jamutiwa gürígia quei ni cáta, ánjein jugúya, inébetün joun. ¹¹ Chülü lúmoun wéyu le, áfagaadiwa ilámaü, mágürabu, lúma manáanguni, wuríbati jouuseruniwa gürígia, mábantiwa, ¹² weiriti wawádigimari láu wájabu lun wágüdaagun woúngua darí lun labúcharun wawágu. Anába jamútiwa gürígia, ába woúnabun láu abíniruni. Eíbaajouátiwa, awánda wamúti. ¹³ Adímurejatiña wuríba wawágu, rútiwa dimúrei buíti joun láu gurásu. Chülü lúmoun wéyu le, ousera jamútiwa camá ífei láni ubouú, quei cátei le mabúseerun jamáali gürígia.

¹⁴ Mára nabürüjañein le jun lun janügün busíganu, nabürüjañein jun lun narúfudajan jun queísi joun nisáanigu jínsiñetiña nun. ¹⁵ Láu sun jamúga añájein lan díisi-mílu maésturugu arúfudajatiña jun luágu Crístu, áu rügüñein júguchi lídan jafiñen luágu, ladüga áu lan anügübalin ugánu jun luágu Wasálbaragüle lun gayáraabei lan jafiñerun luágu. ¹⁶ Amúriajatina lubeíti júma lun jáyeijani nigáburi.

¹⁷ Ligía nouñaanbalin Timotéo lun líderangunün luágu cátei le. Jínsiñeti nun sarágu, ítara líña queísi ában niraü lídan Jesucrístu, gayáraati neménigidun luágu. Larítaguagüdúbadün luágu ligáburi nabágaridun queísi afiñeti luágu Crístu, lun jáyeijani. Niján luwúyeri igáburi le narúfudajabei tídan sun ligílisi lídan sun fulásu. ¹⁸ Añájein jídaangiñe, buin jáña láu anáanguni únguaü, jarítaguatiña luágu mídinbadina lan bisídaün ladüga nanúfudei lun nagágibudagun júma. ¹⁹ Buléiguatiña, agúrabatina nídin aríjaün madíse, ánjein busén Wabúreme. Ábameti naríjini ca lan jayáraabei barügua túngua ja adüga lun jesériwidun lun Búngiu, mámarügü le jariñagubei. ²⁰ Lugúndun dan le larúeijan Búngiu tídan wanígi, máma láurügüti dimúrei, níjein lubáfu wádan lun wadügüni lugúndan. ²¹ ¿Cáteiti jimein jubei. lun nabeíchunün dánme le nachülürün, ódi lun nídin aríjaün láu ínsiñeni lúma uálini?

5

Lagúserawagüdün ában le adügübei figou

¹ Agaambúaaali luágu níjein lan ában jídaangiñe lagámariduñoun lúmari lúguchi. Ában ouñwenbun iwíyei líra, le majouábei lun ni jádan ja ibídiñejabubaña lun Búngiu. ² ¡Áni laú sun líra, anáanguagidün júngua! ¡Lúntirügü jamúga jírudagun luágu líra! Gürígia le adügübalin lanárime iwíyei le, lúnti labugún jídaangiñe. ³ Láu sun úa nan júma le ní jubei, anájein júma narítangunrugu, áni darínaali lidúnrun le adügübalin figou le, camá jamuga níñadina júma lun nagúseragüdüni. ⁴ Guetó, le lúnbei jadügüni, lun jouúndaragun lídan líri Wabúreme Jesucrístu, ñíbadina júma narítangunrugu, ñíbei giñe lubáfu Wabúreme Jesúsü júma. ⁵ Lúnti lubeíti jedégeruni wügüri ligía lun Máfia láu jaságaruni lídaangiñe jidámurin, lun lagüñrinchawagún lúgubu, sálba támuga luwáni dánme le lagíríbudun Wabúreme Jesúsü ubouúgun.

⁶ Moún lumuti janáangun júngua luágu le jadügübei. ¿Magáambun jumágili cátei le. resígüda lumútu murúsun ísi sun fulúwaaru to ídounboun líchugúa? Ítara méme giñe, murúsun figou jagánagua gayáraati lagádeirunün súngubei. ⁷ Gidájumei lubeíti sun iwíyei le lánina binádu igáburi le ígirubei

jídan, le ítarabei quei ísi le pasáali. Ábame jarúma jumá le tímátimaati. Ítara júba quei fein to eigíbound lídan fédu le páscua, to adügüboun táu fulúwaaru to sún umuti tañoúndawagún, to magánatu ísi. Jarúmaali wadáriragun woungua ligíbugiñe Búngiu ladúga derége láani Búngiu Cristu lun loúnwen luágu wafígoun quei meja ladágaragüdúniwa mudún lídan fédu le páscua luágu figou. ⁸ Ítara líña lubeíti, queísi sálbaadiwa lan, lúnti wagáburidun ában igáburi jarúmati, falá wameíme inárüni. Igáburi ligía, ítara líña quei fein to magánatu ísi. Mouñ lumuti wagáburidun queísi meja wagáburidun furúmiñe, mouñ lumuti wouuserun wuríba, ni lun wasígirun láu tiwíye wanígi. Sun igáburi ligía, ítara líña quei ísi pasáali.

⁹ Aríñagatiná meja jun tídan to ában nigáradan luágu moun lan lun jeréderun lídan ában jáma ja abágaridubaña lídan salúfuri. ¹⁰ Mára meja naríñaguña jun lun jadísedun le gumúti jawei sun lirájúñü ubou le, ja salúfuribaña, o ja lan meménijabutiña, o jíwerutiña, o ájuduragutiña joun sándu, lugúndun lun jamúga mánbadün lan ni cáta jáma, gásu jamúga jáfuridun ubouagugiñe. ¹¹ Le nabúseerubei naríñagun jun, lun meméterun jumá lúmoun ni ában le aríñaguti luágu idújei lan lueígiñe Jesucristu áni salúfuriti, o meménijabuti, o judúguati joun sándu, o marásualuguti, bachárua o jíweru. Mouñ lumuti ni lun jeigin lúma idújei le ítarati. ¹²⁻¹³ Mára áu lúnbei nagúseragüdúniña ja bougudibaña lueí Cristu, Búngiuba agúseragüdaña. Wagía, lúnti wagúseragüdúniña wadújeñu lueígiñe Jesucristu ánjein jadügüña lubeí wuríbati. Ligía gidájumei lubeí gafígounti le jagánaguagiñe.

6

Wuríbu buri jagíbugiñe agúseragüdútiña ja máma afíñetiña

¹ Dan le níjein lan cátei lúnti laríñaajan ában jídaangiñe líri ámu, ¿cági uágu jídin jámoun agúseragüdútiña ja ibídiñebei Cristu joun, lubáragiñe jamúga jídin jámoun lánigu Búngiu? ² ¿Ódi ibídiñeti jun luágu jagúseragüdúbaña lan lánigu Búngiu lánigu ubou? Ánjeinti jagúseragüdúbaña lubeí lánigu ubou, ¿siñá jumuti buri cátei ñübüríti le aráansera? ³ ¿Ibídiñeti jun luágu wagúseragüdúbaña lan giñe ánjeligu? ¿Gúbuméti gayára lan wagúseragüdün luágu buri cátei lánina ibágari le! ⁴ Ánjein níjein lubeí buri wuríbu jagánagua luágu buri cátei le lánina ibágari le, ¿cámegi jídin aríñaaja joun ja mafíñebaña luágu Jesucristu, ja málabei lichú áu le jádaanbei ladúga máma lan lúmagiñeti Búngiu? ⁵ Naríñaguñein le lun janügün busíganu. ¿Úati funági íbini ában chu táu jídan le gayáraati laráanseruni ában cátei jádan lidújeñu lueígiñe Jesucristu? ⁶ ¿Lúnti lídin ában idújei aríñaaja líri lidúje joun agúseragüdútiña ja mafíñetiña luágu Cristu?

⁷ Láurügü jawúribujan júmagua, ábanjali mabuíduni le gumúti líra. Buítimaati lun jawánduni maríchaü le adügübei jun sügü láu jageíndagun ladúga. Buítimaati lun jígirun lun líwerujoún jueí. ⁸ Ánjein jugúya, lubáragiñe líra, adúgatün maríchaü, íweruja jugúya, íbini jawei jídujeñu guánarügü.

⁹⁻¹⁰ ¿Ibídiñeti jun luágu ja lan adügübaña wuríbani, mafánranbaña lan lídan larúeijan Búngiu? Sun ja agámaridubaña mamárieidunga, ja ájuduragubaña joun sándu, ja agámaridubaña ja maríetiña, ja wügüriña ja agámaridutiña wügüriña jáledi, jíwerutiña, meménijabutiña, bacháruatiña, marásualugutiña, ja anügübalin láni ámu láu jabíbun—sun ja adügübaña

wuríbani líbe buri le, siñábei jebélurun lídoun larúeijan Búngiu siélu. ¹¹ Añájein jídaangiñe, ítara jañá meja, ánjein guetó, chibáwaali jífígoun, derégeguaadün júngua lun Búngiu, áni resíbi láadün queísi lánigu ladüga le ladügübei Wabúreme Jesúsu juágu, lúma sun le ladügübei lání Búngiu Espíritu juágu.

Wágubu, ában cátei derégewati lun Búngiu

¹² Aríñawagúati. “Gayáraati ladügüni gürígia le labúseerun ladüga.” Inárüni líra, áni máma sun cátei lun buídu lan lanügün. Gayáraati ladügüni gürígia le labúseerun, wel, moún lumuti lígiraguagüdün lúngua lun lagúmadiruni layúmajan. ¹³ Inárüni le aríñawagübei luágu ladügüni lan Búngiu eígini lun weígini, adúgalei warágeirugu lun ladügüni wadágimanu láu weígin. Inárüni, áni lagúmuchaguagüdübei Búngiu biángubei cátei le, mamégeirun wamáalime. Ánjeinti wágubu, madügünti lun wadügün salúfuri láu, ladügün wágubu lun Crístu, lun ligíaba lan labúreme, áni ligía íchugubalin ubáfu lun wágubu lun gayáraabei lan wesériwidun lun, láu. ¹⁴ Ítara quei lásaaragüdüni Búngiu Crístu lídaangiñe ouweni láu sun lúgubu, lásaaragüdübadiwa gíñe láu sun wágubu, láu lubáfu.

¹⁵ ¿Ibídíñetísan jun luágu líbiri lan cátei le únbei wagúara lúgubu Crístu cáda ában jídaangiñe? ¿Nanügeiméti núgubu le líbiribe lúgubu Crístu lun nadügüni líbirime túgubu ában jóru? ¡Madügün nubei! ¹⁶ ¿Ódi ibídíñeti jun luágu dan lan le leméterun ában gürígia túmoun ában jóru, biángubei jagía ñübintiña lun ítara jabá lan quei ában méme úgubu? Taríñajare Lerérun Búngiu. “Jayábinba biángubei lun ítara jamá quei ábanrügü.” ¹⁷ Ánjein dan le liábin ában gürígia lun lídan lan ában lúma Crístu, ában liábin lání Crístu Espíritu lun ában lan lúma lání gürígia ligía espíritu lun ábanrügü jamá espíritu.

¹⁸ Anúraja jumá lubeíti lueí salúfuri. Mítaraanti salúfuri queísi ámu figou, furúmiñegarügü ámu figou le jadüga gürígia, bougudin lueí jágubu ladüga dáñu, ánjein le agámariduti mamárieidunga, ladügüña figou luágu lúgubu guánarügü. ¹⁹ ¿Ibídíñeti jun luágu lúban lan Sífiri Sándu wágubu, le líchugubei Búngiu woun lun laganoun wádan? Máma wagía labúriñabei wágubu, Búngiu labúremebei. ²⁰ Agáñija lumútiwa Búngiu séru lun lánigu wamá. Ligía lúnti lubeí wíchugun inébesei lun Búngiu dándu láu wágubu quei láu wáni espíritu lugúndun lání Búngiu biángubei.

7

Dimúrei buri luáguti maríei

¹ Guetó nóunabaali lé buri uágubei jálügüdana tídan jigáradan to jabürüjaboun nun. Inárüni luágu buídu lan lun wügüri lun magámaridun lan, ² quei níjein lubeí sarágu salúfuri, buítimaati lun lagámaridun wügüri, lun gíñe tagámaridun würi, súnwandan láu amárieiduni. ³ Lúnti lagúnfulirun wügüri túma lúmari queísi úmari, lúnti gíñe tagúnfulirun würi lúma túmari. ⁴ Máma úmari to würi labúremeboun túgubu guánarügü, lání gíñe túmari. Máma gíñe úmari le wügüri labúremebei lúgubu guánarügü, táni gíñe lúmari. ⁵ Mamájara jumá lun jesériwidagun júniwagua, ánjaün gubeírügü adüga darádu lun mayúsuragun jumá júngua luágu átiri dan lun jíchaagun júngua lúnrügü jayúmuragun lun Búngiu. Lárigiñe líra, lúntiya jayúsuragun júngua, lueí lásíñerun jágüdaagun júngua, ábame lafígoungüdünün Máfia láu jeméterun jámoun ámu jaweí jámarigu.

⁶ Mára naríñaguña luágu lúnti lan jagámaridun, gayáaarügüti jáluajan úmari lun jamárieidun jáma ánjaün busén. ⁷ Áu, buséntina jamúga lun sun lan gürígia gayára lan jágüdaagun jóungua lun magámaridun jamá queisi áu. Subúdi numúti luágu siñá lan ítara, rújali Búngiu ámuñegueinarügü ubáfu lun cáda ában, ában luwúyeri joun jíbiri, ámu joun jíbiri.

⁸ Ja mámarigiñabaña, jáma ja jiláañabaña úmari, aríñagatina joun luágu buídu lan jamúga lun jeréderun mámariga queisi áu, ⁹ ánjein siñá lubei jágüdaagun jóungua, buíti lun jagámaridun (súnwandan láu amárieiduni) sügü láu lun jeréderun láu ában luweírin ayúmajani le siñábei jawánduni.

¹⁰ Ánjaña ja maríejañabaña, aríñagatina joun lun mígirun táani würi túmari. Gumádi le, lídan lubúdubu máma nugúmadin, lugúmadin Wabúreme. ¹¹ Láu sun líra, ánjein tígira würi túmari, lúnti teréderun mámariga, o taráandarun lan lúma túmari. Moún lumuti giñe lígirunun wügüri lúmari.

¹² Joun jíbiri, aríñagatina queisi dimúrei le náni, máma láni Wabúreme, luágu ánjein lan mafiñen tubei lúmari ában le afiñeti luágu Crístu, áni gagúndaantu lun tasígirun agánawa lúma, moún lumuti lafánreinragun túma.

¹³ Ánjein giñe mafiñen lubei túmari ában würi to afiñetu luágu Crístu, áni gagúndaanti lun lasígirun agánawa túma, moún lumuti tafánreinragun lúma. ¹⁴ Úmari le mafiñebebei, derégewaali lun Búngiu láu lídaañein lan ában túma lúmari to afiñetu luágu Crístu, úmariti to mafiñetu, derégewaarú giñe lun Búngiu láu lídaañoun lan ában lúma túmari le afiñebebei luágu Crístu. Lun jamúga máma líña lan, ítara jáña jamúga jisáanigu quei jasáanigu ja mafiñebaña, ítara, derégewañu jáña lun Búngiu. ¹⁵ Ánjein busén lubei úmari le mafiñebebei luágu Crístu lun lígirunun lúmari, o würi to mafiñeboun lun tígiruni túmari, ígiragua jamá. Lídan oúbaü líra, moún lumuti jafósuruniña úmarigu ja afiñebaña úmarigu ja mafiñebaña lun jeréderun jáma, lugúndun wájali Búngiu woun lun wabágaridun lídan darángilaü. ¹⁶ Ában giñe cátei, ¿cági basúbudirubei, amürü würi, ánjeindügü gayára lubei basálbaruni búmari láu beréderun lúma? ¿O cági basúbudirubei, amürü wügüri, ánjeindügü gayára lubei basálbarunun búmari láu beréderun túma?

¹⁷ Lídan sun luwúyeri, lúnti labágaridun cáda ában quei líchuguni Wabúreme lun, áni quei lubei meja giñe, dan le lagúarunbei Búngiu lun lun lánigu lan. Ítara líña naríñaguni tídan sun ligílisi. ¹⁸ Ánjein agúara Búngiu lun ában gürígia le resibi láalibebei circuncisión, lé meja liseíni lidáradun Búngiu jáma lánigu, lúnti leréderun ítara, ánjein giñe agúara lun ában le merésibirungili circuncisión, moún lumuti lerésibiruni. ¹⁹ Mebéresenwati ánjein resibi lubei circuncisión lúmoun merésibirún lán, le busénwabei, lun lagúnfulirúniwa lugúmadin Búngiu. ²⁰ Cáda gürígia lúnti leréderun lídan igáburi lé meja gádaanbalin dan le lagúarunbei Búngiu lun lun lánigu lan. ²¹ Ánjein meja idámuni bubei dan le lagúarunbei Búngiu bun, madíjeribá luágu líra, ánjeinrügü liñáti gayára lubei báfuridun lídaangiñe idámuni ban, adügabeí. ²² Lé meja idámunibebei lun labúreme ya ubouágu dan le lagúarúnbei lun lun lafiñerun luágu Crístu, gidáli luei lubáfu figou lun lesériwidun lun Wabúreme Jesucrístu, ítara méme giñe, lé meja mámabei idámuni lun ában gürígia ubouágu dan le lagúarúnbei lun, lidámunjali Crístu, ligíajali Labúreme. ²³ Agáñija láadün Búngiu luágu oúnwenbun ebégi, mígira jumá lun janügünün wügüriña lidámunme jagúndan, lidámun jumá lugúndan Búngiu. ²⁴ Ítara líña lubeíti, nidújeñu, madíjeri jumá cátañañadün

lan bouğudigiñe jibíti, reidei jumá ligíbugiñe Búngiu lídan méme igáburi lé meja gádaanbalún dan le lagúarunbei jun.

²⁵ Jawágu gürígia ja mámarigiñabaña, úati ni ában gumádi núma le jamúga lúmagiñeti Wabúreme, naríñagaali le narítangun, áu queísi ában le gadúnati lun laffiñerúniwa luágu, luágu lareíni Wabúreme le rújalibei murúsun lídaangiñe lichú láu nun. ²⁶ Lídan narítangun, lúnti leréderun gürígia quei lubeí, ladüga buri lidére dan le gádaanbaliwa. ²⁷ Ánjein gámari bubeí, málugabá bígirangun, ánjein mámari bubeí, málugabá bagámaridun. ²⁸ Ánjabu amárieida, máma figou, ánjoun giñe amárieida ában irájü, máma giñe figou, láu sun líra, ññbei asúfuriruni joun ja gámaribaña, áni buséntina jamúga masúseredun lan líra.

²⁹ Nidújeñu, niján le nabúseerubei naríñangun. Murúsun rügáali dan wabá lun wesériwidun lun Búngiu. Lúmagiñe lubeíti guetó, ja gámaribaña, lúnti jesériwidun lun Búngiu táu sun janígi camá jamuga mámaritiña. ³⁰ Moún lumuti wíchugun dan lun íruni o ugúndani le gádaanbaliwa, o lun umégeguni le wámabei, lun lagídaruníwa lueí wadügüni le lúnbei wadügüni quei esériwidutiña lun Búngiu, ladüga louguati dan. ³¹ Masáminara jumá sarágu luágu lubuídun cátei lánina ubou le, le jánibei lun jayúsurun, ladüga ubou le, le waríjibei, lagúmuchuña, lúnti jarítangun luágu cátei le magúmuchadibei.

³² Buséntina lun madíjeri lan jarítangun luágu ni cáta. Dan le mámari lan ában wügüri, larítangun luágu buri cátei le luáguti Búngiu lúma lun lesériwiduni buídu. ³³ Ánjeinti dan le gámarijali, larítangun luágu buri cátei le lánina ibágari le, lúma lun lesériwidunun lúmari buídu, ³⁴ biánguañein cátei lun leténirun lun—lun lesériwidun lun Búngiu lúma lun latoúnigirunun lúmari. Ámuti giñe touserun würi maríeitu tueí to mámariboun. To mámariboun, tarítangun luágu buri cátei le luáguti Wabúreme Búngiu, lun derégeguñu tan túngua lun Búngiu dándu láu túgubu queísi táu tanígi. Ánjounti to gámariboun, tarítangun luágu buri berésegu lánina ibágari le, lúma lun tesériwidun buídu lun túmari.

³⁵ Naríñaguñein le jun luágu jáni fuleísei, máma naríñaguñein lun mamárieidun jumá. Naríñaguñein lun jabágaridun lídan ában igáburi le buíti, esériwideina lun Wabúreme, derégeguñu júngua lun, marítangunga sarágu luágu cátei lánina ibágari le.

³⁶ Agübürigu ja arítagubaña luágu buídutima lan lun tamárieidun jaraü lugúndun tawéyaaduña lan, áni ánjein buítima lubeí líra, lúnti jadügüni le uágubei jarítagua luágu buídu lan—gayáraati jíchugunun lun tadári lun tamárieidun lúma, máma figou líra. ³⁷ Ánjein añájein lubeí ámu agübürigu, derégüdaguatiña lídan jarítangun luágu moún lumuti lan lun tamárieidun jaraü, áni memégeiruati lun tíchugúniwa, áni gayáraati jadügüni le jabúseerunbei, buíti jadüga lun míchugun jamánun jaraü lun tamárieidun. ³⁸ Ja lubeíti íchugutu jaraü lun tamárieidun, buíti jadüga, ja míchuguntu, buítimaati jadüga.

³⁹ Würi to maríeitu, lábugiñeñoun leréreejan túmari, lurúma lúrudu, sun wínwangili lan, ánjein ouwe túmari, gayáraati tamárieidun lúma le tabúseerun, affiñeti rügáali ligia luágu Cristu. ⁴⁰ Láu sun líra, buítimaabei dan tun ánjounya mamárieidun. Ligia narítangunbei, áni affiñetina luágu ligia lan giñe larítangunbei láni Búngiu Espíritu.

8

Eígini buri le adágarawagüdüti joun sándu

¹ Guetó nadímureja luágu eígini le adágarawagüdüti joun sándu. Inárüni luágu subúdi wamáni luáguti buri cátei le, queísi jaríñaguni, awáansegüda lumútiwa wasúbudin lídan cátei málati, ánjein ínsiñeni, awáansegüda lumútiwa lídan lubuídun igáburi. ² Le arítaguti luágu níjein lan lasúbudirun, ibídiñegilirügü líña ni cáta lun queísi lubúdubu. ³ Ánjein le jínsiñejabúbei lun Búngiu, subúdi lumúti Búngiu gürígia ligía queísi lánigu.

⁴ Luáguti lubeíti leigín eígini le adágarawagüdüti joun sándu, inárüni luágu ni cáta jamá sándu ubouágu, máma jamá búngiugu ladüga subúdi wamúti luágu ában rügüñein lan Búngiu. ⁵ Añájein mútu ubouágu, jarítaguatiña luágu añájein lan bürübünü búngiugu jáma abúremeigu siélu lúma ubouágu, ⁶ ánjeinti woun, wagía le afíñebei luágu Crístu, ában rügüñein Búngiu, le Wáguchibei. Ligía adügübalin sun cátei, áni ligía le únbei wesériwida táu sun tarúman wanígi. Ában rügüñein gíñe Wabúreme, le Jesucrístu, le ídaangiñebei ladügüwa sun cátei, áni ligía le ídaangiñebei wibíjei íbágari magúmuchaditi.

⁷ Másutiña ja afíñebaña luágu Crístu gayára jafiñerun luágu ni cáta jamá sándu, añájein já meja jéchubaña ájuduragua joun sándu, jou jamágili eígini ligía queísi cátei adágarawagüdüti joun búngiugu. Queíti lougua lubeí jafiñen luágu gayára lan jeígini afíñetiña eígini ligía, ába mabuídun lan lasándiraguagüdüniña jóungua ligíbugiñe Búngiu láu jeígini eígini ligía. ⁸ Inárüni le jaríñagubei luágu máma lan cátei le weígibei gayáraagüdübalin lerésibiruníwa Búngiu, mabuíduntimaabadiwa ligíbugiñe Búngiu lueígiñe weígin, maríbaduntima wagíame lueígiñe meígin wáma. ⁹ Gayáraati jeígin eígini le adágarawagüdüti joun sándu, lúntirügü goúnigi jumá lueí jeíguadagüdüniña jidújeñu lueígiñe Crístu ja louguabaña jafiñen ánjein buídu lubeí lúmoun mabuídun lan. ¹⁰ Quei jamúga guetó, amúrú le subúdijabúbei luágu gayára lan beígin furúmieguarügü eígini, bañúura eíga lídan ában fulásu le jóunti sándu, laríjabu ában idújei le débiliti lafiñen luágu buri cátei le, ñi, lanügüba gurásu buágu lun gíñe leígin lídaangiñe eígini le, le adágarawagüdüti joun sándu. ¹¹ Ítara, ladüga bisúbudin, féridigüda bumúti bidúje le débilibei lídan lafiñen le gíñe ueígiñebei louwe Crístu. ¹² Dan lubeíti le jañáwarijani jarítagun idújeñu ja débilibaña lídan jafiñen, jadügüña lun jafígounjan jidújeñu, áni jugúya guánarügü jafígounjaña gíñe. ¹³ Ligía, ánjein lubeí nábुरुgüda nidúje lídoun figou ladüga cátei le neígibei, buítimaati lun meígingüdüya nan úwi lueí náfígounjagüdüni.

9

Lirícha buri ában apóstolu

¹ Áu, furángutina lun nadügüni le nabúseerubei, garíchatina gíñe queísi ában apóstolu, aríja náali Wabúreme Jesúsu, áni jugúya guánarügü asálrubaña lídaangiñe nuwádigimaridun luágu Wabúreme. ² Fágua manügün jabádina jíbiri queísi apóstolu, ánjeinti jugúya, gásu janügünina queísi apóstolu, lugúndun láu afíñe jumá luágu Crístu, arúfuda lumúti líra luágu inárüni lan luágu ában nan apóstolu.

³ Niján nouñabagülebei joun ja adímurejabaña nuágu. ⁴ Garíchatina lun nerésibiruni sun le íchugúbei nun lun neígini lúma lun nátuni queísi nafáyeiruaja luágu nuwádigimari luágu jáni fuleísei. ⁵ Garíchatina gíñe lun

namárieidun túma ában würi to affñetu luágu Crístu, lun giñe nanügünun númagua luágu nuweiyasun quei ladügüni Pédro jáma ja jíbiri apóstologu, jáma giñe ja lamúlenu Wabúreme. ⁶ ¿Ódi jarítaguatün luágu áu rügüñein lan lúma Bernabé marícha lun werésibirun wágüdaja júmagiñe lun gayára lan wígiruni wawádigimaridun láu wájabu lun wapúrichijani Lerérun Búngiu? ⁷ Queísigubeirügü, máma súdaara guánarügü afáyeirubalin cátei lé buri layúsurubei, le ábunagubei beíbei, jóuti tídaangiñe, le oúnigirubei bágasu, guráti lídaangiñe míligi le lamíligijabei. ⁸ Áni marítagua jumátia luágu nariñaguñein lan le queísirügü jarítagun gürígia, lugúndun aríñaga lumúti giñe lilúrudun Moisés. ⁹ Laríñajare tídan lilíburuna lúrudu. “Magúraguabeí liyúma bágasu le lánina wadágimanu lueí leígin lídaangiñe ílaü le léferejabei.” Máma lariñaguñein Búngiu líra jawágurügü bágasu, ¹⁰ lariñaguñein giñe queísi ában jémpulu woun. Luágu wáni fuleísei labürüdüwa lúrudu le, lugúndun dándu le awoújabalin múa, queísi le éferejabalin líla nádü, lúnti jadügüni láu eménigini luágu jerésibirubei lan jafánran lídaangiñe alúbajani. ¹¹ Queísi bunágu wamáali lubeí Lerérun Búngiu tídan janígi, ¿gíbetei funági larijín jun lun walúbajan murúsun cátei júmagiñe lun wágüdaagun woúngua? ¹² Ánjein garícha jabei ámu lun líra júmagiñe, garíchatimáatiwa.

Mayúsu wamúti iríchaü le wawágubei. Lubáragiñe líra, awánda wamáali sun le wemégeirubei lueí lejnreendun jun agáambeí wapúrichijani Lerérun Búngiu, ladüga wamúriajan wágüdaja júmagiñe. ¹³ Subúdi jumúti luágu ja lan ñadágimeinbaña ligílisirugu, lídaangiñe le ligílisirugubei jawínwanda. Ja eténirubaña lun latárü le ñí lubei líchugúa adágaragüdüni, jóutiña úwi jádaangiñe anímaalu ja adágarawagüdübaña ñi. ¹⁴ Ítara líña giñe lariñaguni Wabúreme Jesúsu lun ja lan apúrichijabalin ugánu luágu, lun giñe jádaangiñe lan ja agáambubalin ugánu ligía jawínwanda. ¹⁵ Áu, mayúsugidina ni ában lídaangiñe iríchaü le, máma giñe nabürüjañein le jun lun jíchugun som cátei nun. ¡Ímeín numúti nouñwen niláma lubáragiñe neféridiruni ugúndani le nuágubei láu napúrichijani ugánu luáguti asálbaruni, magúburajanga luágu!

¹⁶ Máma cátei lúnti napántajan luágu láu napúrichijani ugánu luáguti asálbaruni jun, lugúndun mósu nadügüni. ¡Fugiábu áu ánjein mapúrichijan nan ugánu le! ¹⁷ Lun jamúga mínsiñe lan nun lun napúrichijan, láu sun luwúyeri mósu nadügüni ladüga ligía lan wadágimanu le líchugubei Búngiu nun. Queísi apúrichija nan láu sun nugúndan, gafáyeirujatina, ¹⁸ afáyeirujau ligía, lun gayára lan napúrichijan luágu Wasálbaragüle, magúburajanga ni cáta, márügüdünganeí nirícha lun nawínwandun lídaangiñe nuwádigimari queísi apúrichijati.

¹⁹ Láu sun mábuti nan ubouágu lun nagáambuni, rúguaadina núngua jadámunme súnigubei, lun nagáñeirun sarágu gürígia lun Crístu. ²⁰ Dan le jagánagua nan juríu, ába nadügün camá juríu áu, lun nagáñeiruniña lun Crístu. Queísi jabágaridun juríu lábugiñe lilúrudun Moisés, rúguatina núngua lábugiñoun lúrudu ligía lun nagáñeiruniña, láu sun mámañadina lan lábugiñe lúrudu ligía. ²¹ Lun nagáñeiruniña ja mámabaña juríu, ja mabágaridunbaña lábugiñe lilúrudun Moisés, rúguatina núngua quei jagía, láu sun lábugiñeñadina lan lilúrudun Búngiu, quei lábugiñeñadina lubeí lilúrudun Crístu. ²² Dan le jáma nan ja louguabaña affñe luágu cátei le gayáraabei jadügüni affñetiña, madügúntina ni cáta le uágubei jarítagua luágu mabuídun lan ladügüniwa, lun gayára lan nagáñeiruniña. Rúguaadina núngua queísi cáda jawúyeri gürígia lun añájein lan nasálbarun

lídán furúmieguaugü luwúyeri. ²³ Nadügüñein sun le lun lasúbudirúniwa ugánu le lánina asálbaruni, lun gafánraanbadina lan lídan buídu le lanügübei ugánu le.

²⁴ Subúdi jumúti luágu gíbe jamá eíbaagutiña lídan ában eíbaaguni, áni ában rügüñein jádaangiñe agáñeira. Eíbaagua jumá lubeíti lídan ibágari le lídan ában luwúyeri lun gayáraabei lan jagáñeiruni ledéweejan Búngiu jun. ²⁵ Sun ja aráansejabaña lun jebélurun lídoun juráraü, jóuchatiña lun madügün jamá ni cáta le gayáraabei lásiñeragüdüni jájurerun. Áni jadügüni lun jagáñeirun ában rídi le láuti ubánaü. Anjeinti wagía, wáfaaguña lun wibíjin ában rídi siélu le lúnti ladúrarun lun sun dan. ²⁶ Au, neíbaaguña lídan ibágari le, rúñunei naríjin luágun ubuíduni le lúnbei líchuguni Búngiu nun, siélu. Mítaraantina queísi ageíndaguti le agáyuajabei garábalirugu, ²⁷ lubáragiñe líra, áfara numúti lugúndan núgubu, fósunei lun lagáambunina, lueí lubeígia neféridiruba lan lárigiñé buga arúfudajadina lan joun ámu luágu lubuídun üma lun wachülürün lúmoun Búngiu.

10

Dimúrei luágu ájuduraguni joun sándu

¹ Nidújeñu, buséntina lun narítaguagüdünnün luágu lé meja asúseredubei joun binádu wagübürigu lídan lé meja lídan jamá fulásu mageírawati, luágu ñíñein lán meja Búngiu lídan ában juánriñu jóugiñe lun loúnigiruniña. Séfuti giñe lanügüniña súngubei dan le jájiñuragunbalin Barána Funáti. ² Ítara líña queísi ában abásteruni joun láu jásügürün labádinaguagiñe barána, lúma juánriñu jóugiñe. Lídaañanu ában lúma Moisés lun jafálaruni ladüga ligía lan abúgurubaliña. ³ Jóutiña giñe sun jagía lídaangiñe ában mème eígini le líchugubei Búngiu joun, siélugiñe, ⁴ rúati giñe dúna joun súngubei lídaangiñe ában dübü lun játun. Ñíñein Crístu jáma luágu sun jaweíyasun lun fuleísei láníña láu dúna lun játun. ⁵ Láu sun líra, madügün jamúti jíbe-ágei lugúndan Búngiu, ába lamágundarun Búngiu jáma. Ligíati jóúwegunbei lídan fulásu mageírawati.

⁶ Sun le asúseredubei joun, ában jémpulu woun, lun mayúmajan wamá buri cátei wuríbati, queí meja jadügüni. ⁷ Ligía májuduragua jumá lubeí joun sándu queí meja jadüga jádaangiñe, queísi tariñaguni Lerérun Búngiu luágu jefédujan joun sándu. “Ába jañúurun gürígia eíga lúma áta, lárigiñe, ába jásaarun eféduja.” ⁸ Moún lumuti wadügün salúfuri queí meja jadüga jádaangiñe, ába larúfuduni Búngiu luágu wuríba lan le jadügübei láu louwegüdüniña mílu gürígia jádaangiñe lídan ában wéyu. ⁹ Moún lumuti giñe wáluajani lében lugúraasun Búngiu woun láu luríban wagáburi, queí jadügüni jádaangiñe, ába jóúwegun láu lágüragüdüniña joun jéwe. ¹⁰ Mamágundara jumá giñe lúma Búngiu queí jadüga jádaangiñe, ába loúnajani Búngiu ánjeli lun láfaraguniña jilágubei.

¹¹ Suséreti sun le joun binádu agübürigu, ába labürüdün tídan Lerérun Búngiu queísi jémpulu woun, wagía le wínwanbei lídan lagúmujoún dan le, lun wasúbudiruni buídu luágu mínsiñe lan figoú lun Búngiu. ¹² Le lubeíti jarítaguabei luágu derégüdagua lan leíbugun lúma Búngiu, toúnigilá, máburujalá lídoun figoú. ¹³ Oúchawaguni buri le jasúfurirubei, ában láu lúma buri le jasúfurirubei ja jíbiri. Gayáraati jeménigidun luágu Búngiu, mígirunbei lun jibíjin oúchawaguni le jásiñerun awánda. Lubáragiñe líra, dánme liábin

oúchawagúni, larúfudubei gíñe Búngiu jun ída lúba lan jáfuridun lídaangiñe, ítara lúba gayára lan jawánduni.

¹⁴ Ligía lubeíti, nidújeñu jínsiñetiña nun, mádaragua jumá júngua lídoun cátei le jánina sándu. ¹⁵ Nadímurejaña jun queísi joun gürígia gunfarándatiña, samína jumá júngua ánjein buídu lubeí le naríñagubei jun, lúmoun mabuídun lan. ¹⁶ Dan le werésibirun, dan le wátun lídaangiñe uníñein le uágubei wíchiga eteíngiruni lun Búngiu, arúfuda wamúti luágu lídaañadiwa lan ában lúma Crístu luágu líta le áwiyurubei, dan lé meja lounwenbei luágu gurúwa wawágu. Dan le weígin tídaangiñe fein to wagúbachaguboun, arúfuda wamúti luágu lídaañadiwa lan ában lúma Crístu luágu lúgubu le ledéregerubei lun oúweni luágu gurúwa ligía. ¹⁷ Queísi jou wabeí tídaangiñe ában méme fein, arúfuda lumúti líra luágu lídaañadiwa lan ában láu sun gibe wamá.

¹⁸ Aríja jumá lun násiñun le linásiñun Israél. Ja eígibaña lídaangiñe eígini lé buri adágarawagüdüti lun Búngiu luágu latárü, lídaañañu lan ában jámagua, lúma lúma Labúreme latárü. ¹⁹ Máma naríñaguña luágu wínwan jamá sándu, maríñaguntina gíñe luágu weírgutima lan úwi le adágarawagüdübei joun sügü láu ámu úwi. ²⁰ Le naríñagubei, luágu dan lan le jadágaragüdün ja ibídiñejabubaña lun Búngiu joun sándu, joun máfianu jadágaragüda, máma lun Búngiu, áni mabúseerúntina lun lídan jumá ában jáma máfianu. ²¹ Siñáti játun lídaangiñe licópun Wabúreme Jesucrístu úara lúma játun lídaangiñe jacópun máfianu. Siñáti gíñe jeígin luágu lidábulan Wabúreme Jesucrístu úara lúma jeígin luágu jadábulan máfianu. ²² ¿Ódi buséntün jeméendügüdüni Wabúreme láu jañúurun luágu jadábulan máfianu? ¿Jéretün funági lueí Búngiu lun manúfudebadün lan lueí ligáñi?

Lúnti jínsiñejabu jamá lánigu Crístu

²³ Inárüni le aríñawagúbei luágu gayára lan jadügüni gürígia le jabúseerun, láu sun líra, máma sun cátei buíti láburujan. Gayáraati jadügüni gürígia le jabúseerun, láu sun, máma lan sun cátei lun líderaguniña ámu gürígia lun jóudin jabáruaguóun lúma Crístu. ²⁴ Lúnti warítangun luágu le buídubei joun ámu gürígia, mámarügü lan wawoúguoun warítagua.

²⁵ Niján le lúnbei jadügüni luágu úwi. Jóujuma lídaangiñe sun cátei le alúgurajóubei mágidirugu, málügüdajanga jugúya ánjein dágüdawa lubeí joun sándu lúmoun madágarawagüdün lan, ²⁶ maríbadalá jarítangun luágu, gayáraati jeígini, lugúndun láni Wabúreme múa láu sun le lídaanbei.

²⁷ Ánjaün lamísuraja ában gürígia le mafíñeti luágu Crístu lun jídin eíga lúma, gayáraati jídin ánjaün busén. Jóujumei le íchugúti jun, málügüdajanga ni cáta, mebéresen jumá ánjein dágüdawa lubeí eígini ligía joun sándu furúmiñe, lúmoun madágaragüdünwa lan. ²⁸ Ánjein aríñawagua jun luágu dágüdawaali lan eígini ligía joun sándu, meíga jumeí, lueí jadügün dáñu lun le aríñagubalin jun, lueí gíñe laríbadun larítangun. ²⁹ Nadímurejañatia luágu larítangun le ában, máma luágu barítangun.

Gayáraati jamúga funa laríñagun mútu. “¿Cásan uágu lúnti lubeí lafálaruni ában gürígia le larítangun ámu? ³⁰ Ánjein gayára lubeí níchugun eteíngiruni lun Búngiu luágu le neígibeí, ¿cábagi uágu jadímureja nuágu lueígiñe neígini?” ³¹ Ánjaün lubeíti eíga o áta o jadügün furúmiegurügü cátei, adúga jumeí súngebui lídan ában luwúyeri le íchugubei inébesei lun Búngiu. ³² Míchiga jumá lébuna eíguaduni lun ni ában, ni joun juríu, ni

joun ja mámabaña juríu, ni joun ja lánigu Búngiu. ³³ Áu, jóuchatina lun nagúndaaragüdüniña sùngubei lídan sun cátei, máma rügüñein nuóúgua naritagua, jarítaguatina gíñe jawágu jíbiri lun gayáraabei lan jayábin lun jafíñerun luágu Jesucristu lun jasálbarun.

11

¹ Áyeija jumeí nigáburu queísi náyeijani ligáburu Crístu.

Wuríña lídan jóúndaragun afíñetiña

² Nidújeñu, gúndaatina jáu luágu súnwandan lan jarítangun nuágu, lúma luágu falá jumani arúfudajani le níchugubei jun. ³ Guetó, níjein ámu arúfudajani le nabúseerubei lun gunfaráanda jumáni, luágu Crístu lan lichügüdinabei cáda wügüri, wügüri tichügüdina lúmari, ítara quei Búngiu lan lichügüdinabei Crístu. ⁴ Nibúsigarídünati lun ladáuragun ában wügüri láu lálbulugu dan le layúmuragun lun Búngiu, eteíngirei lídan jadámurin afíñetiña, o dan lan le laríñagun ugánu le ladímurejan Búngiu liyúmulugugiñe wügüri ligía, ladüga láu líra, larúfuduñein luágu níjein lan ában wügüri weírigutimaati lanügüni lueí lídan adámurini ligía, áni Crístu rügüñein weírigu jádan sun wügüriña. ⁵ Nibúsigarídünati gíñe lun madáuragun tan würi láu tábulugu dan le tayúmuragun lun Búngiu, eteíngirei lídan jadámurin afíñetiña, o dan lan le ladímurejan Búngiu tiyúmulugugiñe, ladüga láu líra tarúfuduñein tamájarun lun tanügüni wügüri weírigu sügü táu, wuríbatí líra, queísigubeirügü jamúga lasarún tídíburu queísi wügüri. ⁶ Ánjoun madáuragun ában würi láu tábulugu, buítimaati lun tásaruni sun tídíburu, áni ánjein busíganudüna lubeí tíbuguni würi tídíburu o tásaruni lan tábulugu, darúguatá láu tábulugu. ⁷ Moún lumuti ladáuragun wügüri láu lálbulugu lídan jadámurin afíñetiña lugúndun liyáwa Búngiu ligía, áni arúfuda lumúti luweírigun Búngiu. Ánjounti würi, arúfuda tumúti luweírigun wügüri, ⁸ lugúndun dan le ladügünbalin Búngiu wügüri, máma tídaangiñe würi ladügei, würi ladügüboun lídaangiñe wügüri. ⁹ Adüga lumútu Búngiu würi lun wügüri, máma wügüri tun würi. ¹⁰ Ligía lúnti lubeí tadáuragun würi láu tábulugu lídan jadámurin afíñetiña queísi liseíni derégüdaguaü lábugiñe lagúmadijan wügüri, lúma lun jagúndaarun ánjeligu láu tagúfurumadun. ¹¹ Láu sun líra, lídan wabágari queísi afíñetiña, mégei lumútu wügüri würi, mégei tumúti gíñe würi wügüri. ¹² Queísi inárüni lubeí luágu lídaangiñe lan wügüri tadügüwa würi, ítara líña gíñe inárüni lan luágu würi lan íchugubalin wügüri ubouágu, áni sun cátei lúmagiñe Búngiu liábin.

¹³ Ítara líña lubeíti, samína jumá júngua ánjein buídu lubeí lun tayúmuragun würi lun Búngiu lídan adámurini madáuragunga láu tábulugu. ¹⁴ Jéchutiwa wagía gürígia lun warítangun luágu busíganu lan lun migínagu lan lídíburu wügüri. ¹⁵ Ánjoun würi, ában uwéndeni tun lun migínagu lan tídíburu, ligía líchugúnbei ídíburu migínaguti tun lun tadáuragun láu tábulugu. ¹⁶ Ánjein níjein lubeí busénti lasígenejan luágu cátei le, lúnti lasúbudiruni luágu ni lan wagía, ni já buru jíbiri tílana lílígílisin Búngiu masúbudiruntiwa ámu igáburu lueí líra.

Luríban jagáburu afíñetiña dan le jeígin luágu lidábulan Wabúreme Jesucristu

¹⁷ Nabürüja jun guetó luágu ában cátei le siñábei naríñagun luágu buídu lan jadügüni, lugúndun genége lumúti luágu adüga lán buru

joúndaragun dáñu jun lubáragiñe jamúga ladügün buíti. ¹⁸ Furúmiñeti cátei, aríñawagúati nun luágu dan lan le joúndaragun, níjein lan fánreinguau jidan, áni afíñetina luágu níjein lan inárüni lídan le aríñawagúbei. ¹⁹ ¡Fágua lúnti ñi lan fánreinguau jidan lun lasúbudirúniwa cátaña lan afíñetiñabaña ja tímatisaatiña! ²⁰ Láu buri fánreinguau le, dan le joúndaragun lun jeígin luágu lidábulan Wabúreme Jesucristu, siñáti jeígin láu ában igáburi le íchugubei inébesei lun, ²¹ lugúndun dan le lachülürün óra lun jeígin, meígintün nege lídan ában. Lubáragiñe líra, cáda ában, ába loufudajan eígei eígini le lanügübei. Ja siñábei janügün gíbeti, ába jeréderun láu jaláma. Jayábiti jídaangiñe, ába játun sarágu darí lun jabácharuadun. ²² ¿Mábantün funági lun jeígin luma lun játun ñi? Láu igáburi le, barü jumutiña tilana lilígilisin Búngiu quei ni cáta, rújumaña ja úabei ni cáta jáma lídoun busíganu. ¿Cábagi naríñaga jun luágu líra? ¿Lúnti nagúndaarun jáu? ¡Luágu líra siñáti!

Adíneruni le arítaguagülei luágu louñwen Wabúreme

²³ Lúmagiñe guánarügü Wabúreme Jesucristu nerésibirei igáburi le warítaguagüle luágu louñwen, lé meja níchugubei jun. Queísi le nubeíbei jun, luágu le lan áriebu le lalúgurúnbei Wabúreme, ába lanügünun fein lújaburugu, ²⁴ lásun líchugun eteíngiruni lun Búngiu tuágu, ába lagúbachagunun lun lafánreinragunun jádan lánigu, ába laríñagun. “Jóujuma, nógubu le, le nedéregerubei luágu jufúleisein. Adüga meme jumeí cátei le, jarítaguagüleme nuágu.” ²⁵ Ítara gíñe, lásun jeígin, ába lanügüni cópu táu diweín lújaburugu, ába laríñagun. “Cópu le táu diweín to, liseíni iséri lidáradun Búngiu júma, le achoúrurúabei láu níta le lúnbei láwiyurun lídaangiñe nógubu juágu. Ságüme játuni, adüga jumeí lun jarítagun nuágun.” ²⁶ Ítara líña lubeíti, daríme le lagríbudun Wabúreme ubouágun, ságüme jeígin fein, gurá jugúya diweín to jarítaguagüle luágu Jesúsu, jarúfuduñein luáguti louñwen Jesúsu wawágu.

Ligáburi leigín eígini le arítaguagülei luágu Jesúsu

²⁷ Furúmieguarügü le eígitu fein tugúya, guráloun diweín to láni Wabúreme Jesucristu lídan ában igáburi le míchuti inébesei lun Búngiu, ladügüña figou ladüga líchuguña lan minébesei lun lúgubu Wabúreme luma líta. ²⁸ Ítara líña lubeíti, cáda ában lúnti lasúbudiragun lúngua buídu ánjein jarúma tubeí lanígi lubáragiñe lerésibirun. ²⁹ Lugúndun ánjein erésibira marítagunga luágu laníchigu lánina lúgubu Wabúreme, labeíchubei Búngiu. ³⁰ Ligía añajein lubeí sarágu jídaangiñe, sánditiña, débilitiña, jilágua jíbiri. ³¹ Ánjawa jamúga asúbudiragua woúngua buídu lubáragiñe werésibirun, mabeíchun lumútiwa jamúga Wabúreme ítara. ³² Dan le labeíchuniwa Wabúreme, ladügüñein líra lun wasúbudiragun woúngua, gayára lámuga wasáansiraguni wagáburi lueí weféridirunme úara jáma lirájüñü ubou.

³³ Ítara líña lubeíti nidújeñu, dan le joúndaragun lun jerésibirun, agúrabagua jumá júngua. ³⁴ Ja lamátiña, jóujama jábiñe, mabeíchun lámugaña Búngiu luágu luríban ligáburi joúndaragun. Lé buri líbiri cátei naráanserubei dánme le nídin aríjañ.

12

Ubáfu buri le líchugubei Sífiri Sándu lun cáda afíñeti

¹ Nidújeñu, níjein buri cátei nabúseerun lun jasúbudiruni luáguti buri ubáfu le líchugubei Sífiri Sándu lun cáda afíñeti luágu Jesucristu.

² Subúdi jumúti buídu luágu dan lán meja le mámagidün lánigu Crístu, ádajouátün meja lun jeibugun járigi sándu ja mariñagadibaña. ³ Ligía nabúseerunbei nariñagun jun guetó lun gayára lan jasúbudiruni ánjein lubáfu lubei Sífiri Sándu ádajabálin ában gürígia lun ladímurejan lúmoun lubáfu lan espíritu wuríbati. Siñáti ládajani Sífiri Sándu ában gürígia lun lanábaguni Jesúsu láu lariñagun luágu máma lan Liraü Búngiu, espíritu wuríbati ádajabalin lun ladügüni líra. Áni láu rügüñein lubáfu Sífiri Sándu gayára lan lariñagun ában gürígia luágu Jesúsu lan Wabúremebei.

⁴ Níjein sarágu luwúyerigu ubáfu le gayáraati lerésibiruni gürígia le afiñebei luágu Jesucrístu, áni ában méme Sífiri Sándu íchugubalin. ⁵ Níjein sarágu luwúyeri ligáburu esériwiduni lun Wabúreme Jesucrístu láu ubáfu buri le líchugubei Sífiri Sándu woun, áni lun méme ában Abúremein wesériwida. ⁶ Lídan giñe sarágu luwúyeri wayúsuri ubáfu buri le rúaalibei woun, áni ában méme Búngiu le íderagubaliwa lun wayúsuruni ubáfu ligía. ⁷ Arúfudaguati Sífiri Sándu lúngua wádaangiñe láu ubáfu le líchugubei woun, lun gayára lan wíderaguniña jíbiri afiñetiña. ⁸ Añájein jíbiri, rúti Sífiri Sándu ubáfu joun lun gayára lan jadímurejan láu lichú áu, añájein úntiña líchiga ubáfu lun jadímurejan láu sarágu subúdi. ⁹ Jíbiri resíbitiña ában afiñeni weíruti lúmagiñe méme Sífiri Sándu ligía, jíbiri resíbitiña ubáfu lun jareídagugüdün sánditiña. ¹⁰ Añájein resíbitiña ubáfu lun jadügün miláguru, jíbiri resíbitiña ubáfu lun ladímurejan Búngiu jayúmulugugiñe. Joun jíbiri, rúti ubáfu lun jasúbudiruni ánjein Sífiri Sándu lubei ádajabalin ában gürígia lun ladímurejan o ámu lan luwúyeri espíritu, jíbiri íbjatiña ubáfu lun jadímurejan ámuñegueinarügü luwúyeri dimúrei lueí jerérun. Añájein íbjatiña ubáfu lúmagiñe Sífiri Sándu lun jafúnraanguagüdüni le aríñawagúbei lídan buri dimúrei teréncha ligía. ¹¹ Sún buri cátei le, ában méme Sífiri Sándu le ábanrügübei, ligía adügübalin, le afánreinjabalin ámuñegueinarügü ubáfu ligía lun cáda gürígia queísi labúseerun.

Lánigu ában méme úgubu súnqubei

¹² Gíbeti umégeguni lídan wágubu, áni sun umégeguni ligía ában rügüñein úgubu ladüga. Ítara líña giñe le únbei wagúara lúgubu Crístu, cáda ában afiñeti ában lídaangiñe lumégegün lúgubu Crístu. ¹³ Sun wagía afiñetiña—juríu, máma juríu, idámuni, máma idámuni, furúmiegurügü le wawúyeribei—láu wabásterun, ába ladügüniwa Sífiri Sándu lun ában wamá jáma sun jíbiri afiñetiña, áni sun wagía, resíbi wamúti méme Sífiri Sándu ligía.

¹⁴ Níchiga ában jémpulu jun luágu wágubu láu sun lumégegün lun jasúbudiruni luágu ítara wáña lan queísi lumégegün lúgubu Crístu. Wágubu, máma rügüñein ában umégeni luágu, gíbeti umégeguni luágu. ¹⁵ Ánjein jamúga aríñaga ugúdi. “Máma nugúya líbiri úgubu lugúndun máma nan újabu”, máma lueígiñe líra lun mámabei lan líbiri úgubu, ¹⁶ ánjein lan jamúga aríñaga arígei. “Máma nugúya líbiri úgubu lugúndun máma nan águu”, máma lueígiñe líra lun mámabei lan líbiri úgubu. ¹⁷ Lun jamúga águu lan sun úgubu, ¿ída líña jamúgagi wagáambun? O lun jamúga arígeirugu lan sun úgubu, ¿ída líña jamúgagi wirímichun? ¹⁸ Rúlaali Búngiu cáda lumégegün úgubu le ñi lumúti labúseera. ¹⁹ Lun jamúga ában rügüñein lan umégeni luágu úgubu, moústarunti jamúga úgubu ligía. ²⁰ Láu sun gíbe lan lumégegün úgubu, ában rügüñein úgubu.

21 Siñáti lariñagun águu lun újabu. “Memégeirun numútibu”, siñáti gíñe lariñagun ichügü lun ugúdi. “Memégeirun numútibu.” 22 Lubáragiñe líra, lé buri lumégeggun úgubu le laganóunbei camá débiliti, ligiatima buri mégeiwabei, 23 lé buri lumégeggun úgubu le wanügübei quei ni cáta, ligiatima wadáu ragaguädübei láu uwéndeni. Le buríti líbiri lumégeggun wágubu le arámudaguabei, ligiatima wóuserunbei láu goúnigi, 24 le madügünwabei lún buri líbiri lumégeggun wágubu. Ítara líña laráanseruni Búngiu úgubu lun le lán buri líbiri umégegguni le anügübei quei ni cáta, ligiatima lan weírigu, 25 lun njein lan ában úarani luágu úgubu lídan le luwádigimaridun sun umégegguni lídan ában, láu ában toúnigi jóuniwagua. 26 Ánjein asúfurira ában lídaangiñe lumégeggun úgubu, súfuriti gíñe buri le líbiri, ánjein gíñe oúserúa ában lídaangiñe buídu, ába lagúndaarun lé buri líbiri lídan ában.

27 Ítara méme líña gíñe, lúgubu Crístu jugúya, cáda ában jídaangiñe, lumégeggun úgubu ligía. 28 Rújali Búngiu wadágimanu jun tídan lilígilisin lun juwádigimaridun luágu ában queisi luwádigimaridun lumégeggun úgubu. Furúmiñetiña, apóstolugu líchuguniña Búngiu lun jesériwidun joun jíbiri afiñetiña, jabíaman, profétagu, jürüwan, arúfudajatiña luágu cátei láni Búngiu, lárigiñe, ja adáagubaña miláguru, lárigiñe, ja areídaguagüdübaña sánditiña, ja ídejabaña, ja láubaña gumádi, jáma ja íbíbubaña ubáfu lun jadímurejan dimúrei buri le teréncha. 29 ¿Apóstolugu funági súngubei? ¿Profétagu funági súngubei? ¿Arúfudajatiña súngubei? ¿Ódi sun jagía adáaguatiña miláguru? 30 ¿Gabáfutiña súngubei lun jareídaguagüdün sánditiña? ¿Adímurejatiña súngubei dimúrei buri teréncha? ¿Gayára jamúti súngubei míni lán buri dimúrei ligía aríñaga? Uá. 31 Buíti lubeíti lun jáfaagun lun jíbíjini lubuídun-ágei buri ubáfu lúmágiñe Búngiu, áni njein ában cátei lun jáfaagun lun jíbíjini, buítimaati sügü láu sún buri ubáfu ligía, ínsiñeni cátei ligía, narúfudaja jun luágu.

13

Ínsiñeni

1 Ánjawa jamúga gabáfu lun wadímurejani sun luwúyeri dimúrei le adímurejóubei ubouágu lúma sun luwúyeri dimúrei le jadímurejabei ánjeligu, áni mínsiñejabutiwa, málati jamúga wadímurejan. Ítara wáña jamúga quei ában garánwoun le adaúnjati, o quei lan ában asiedu le areínchuti. 2 Ánjein jamúga gayára ladímurejan Búngiu wayúmulugugiñe, subúdi wameí sún buri lujúlilin-ágei inárüni arámudaguati áni njein sun luwúyeri subúdi wáma, áni weíri ligía wafiñen darí jamúga lun gayára lan wagídaruni ában wübü lídaangiñe lubára láu afiñeni ligía, sun líra áni mínsiñejabutiwa, ni cáta wagía. 3 Ánjein wíchiga sun le wámabei murúsun murúsun joun gudémetiña darí lagúmuchun, madügünga wameí láu ínsiñejabuni, mesériwinti woun lun ni cáta. Lun jamúga weíri lan wesériwidun lun Búngiu darí lun wágudúniwa jilágubei luágu, mesériwidunga wagía láu ínsiñejabuni, málati gíñe woun.

4 Le jínsiñejabúbei gagúraasunti, areídati, áni magímugati, mapántati, manáangun ligía lúngua. 5 Manárimeguti, máma rügüñein luoúgua larítagua, magañidunti, mágyuyüdünti wuríbani luágu wuríbani. 6 Magúndaarunti láu jafígoun ámu, lagúndaarun dan le janügün güriá ában üma le richábei. 7 Awánda lumúti sun cátei, afiñeti buídu jawágu súngubei, afiñeti luágu

gayára lan leménigidun jawágun gürígia lun jarúfuduni lubuídun jagáburi, úati ni cáta lun gayára lan lagídaruni línsiñejabu.

⁸ Lachülürüba dan, dánme le lagíribudun Jesucrístu ubouágun, lun madímurejan lánme Búngiu jayúmulugugiñe gürígia, madímurejoún ligíame dimúrei buri teréncha, memégeirunwalime giñe subúdi. Ánjeinti ínsiñeni, leréderuba lun sun dan. ⁹ Guetó, murúsun rügüñein wasúbudirun, murúsun rügüñein giñe wafúraanguagüdüni dimúrei le ladímurejabei Búngiu wayúmulugugiñe. ¹⁰ Ánjeinti dánme le lagíribudun Jesucrístu, wasúbudirubei sun cátei le gumúti. Murúsun ubáfu le wabíjibei guetó, memégeirunwabei, lagúmuchagaba.

¹¹ Dán meja le irájüñügi diwa, quei meja irájüñü wadímureja, quei meja irájüñü wasáminara, quei giñe meja irájüñü warítağa, ánjeinti dan le wügüríñajadiwa, ába wígiruni le jáni irájüñü. ¹² Guetó, louguati wasúbudirun luágu Búngiu lúma luágu luwádigimari, waríjini camá buri cátei le maríjinti buídu tidan ában isúbusein. Lachülürüba wéyu lun waríjini Búngiu furáangu. Guetó, louguati wasúbudiruni buri cátei, wasúbudirubei Búngiu le gumúti lídanme wéyu ligía queisi lasúbudiruníwa Búngiu guetó. ¹³ Afíñeni, eménigini lúma ínsiñeni ladúraruba lun sun dan, áni ínsiñeni, weírítimaabei lídaangiñe ürüwagubei.

14

Ladímurejoún dimúrei teréncha

¹ Ítara líña lubeíti, lubáragiñe sun cátei, áfaagua jumá lun jínsiñejabu jumá, ayúmaja jumá giñe lun líchugun Búngiu ubáfu le líchugubei joun afíñetiña lídaangiñe Sífiri Sándu jun, létima ubáfu lánina ladímurejan Búngiu jayúmulugugiñe gürígia. ² Buítimaati lun jáluajan ladímurejan Búngiu jiyúmulugugiñe sügü láu jáluajan jadímurejan dimúrei teréncha, lugúndun gürígia le adímurejati dimúrei buri teréncha, lun Búngiu ladímureja máma joun gürígia, lugúndun Búngiu rügüñein asúbudirei líla dimúrei le ladímurejabei. Le lariñagubei, lídaangiñe Sífiri Sándu lariñagei, ánjeinti laníchigu, arámudaguati luei jasúbudin gürígia. ³ Ánjeinti le iyúmulugugiñebei ladímureja Búngiu, adímurejati láu jerérun ja agáambubalin lun lawáanseragüdüniña lídan cátei lánina Búngiu, lun líchugun dügüdaguau joun lúma gurásu. ⁴ Le adímurejati dimúrei teréncha, lúngua rügüñein líderagua lídan leíbugun lúma Búngiu, ánjeinti le iyúmulugugiñebei ladímureja Búngiu, awáansegüda lumútiña lánigu Búngiu lídan jeíbugun lúma.

⁵ Buséntina jamúga lun gabáfu jumá sun jugúya lun jadímurejan dimúrei teréncha, laú sun, buséntimaatina jamúga lun gayára lan ladímurejan Búngiu jiyúmulugugiñe, lugúndun buítimaati líra sügü láu ladímurejoún dimúrei teréncha, ánjein gubeírügü aríñawagua ca lan míni lan le aríñawagúbei lídan dimúrei ligía lun gayára lan jawáanserun tílana ligílisi lídan jeíbugun lúma Búngiu. ⁶ Ligía lubeíti nidújeñu, ánjana ñüdün bisídañ, ábame nadímurejan jun láu dimúrei teréncha, mesériwinbei líra jun lun ni cáta, ánjana gubeírügü giñe adímureja jun lídan werérun luágu cátei le lasúbudiragüdün Búngiu woun, o níchugun lan ában subúdi luáguti inárüni jun, o ában lan arúfudajani, o ladímurejan lan Búngiu jun niyúmulugugiñe.

⁷ Rúwamei jálagu áfarutiña quei ában jémpulu. ílagu buri ligía, mabágariti, quei buri fídu, gidára, ánjein wásiñera asúbudira furáangu ca lan nóta afarúbei, ibídiñebei woun ca lan urému le wagáambajabei. ⁸ Ánjein mínwirun

fídu ában ínwiruni furáanguti wuríburugu, úabei ni ában aráanseruti lun lídin ageíndagua. ⁹ Ligía méme gíñe asúseredubei wáma. ánjawa maríñagun dimúrei le gayáraati gunfaráandawa lan, ¿ída lubági lasúbudirúniwa ca lan waríñagubei? ¡Wadímurejaña lun garábali! ¹⁰ Gíbeti luwúyerigu dimúrei ubouágu, áni sún buri dimúrei ligía richáti joun ja gunfaráandabalin, ¹¹ ánjein úa lubei gunfaráanda náni dimúrei le áubei ladímurejoúa nun, terénchabagina lun gürígia le adímurejabei nun, áni terénchabei gíñe gürígia ligía nun. ¹² Ligía, quei weíri lubei jayúmajan lun jibíjin lídaangiñe ubáfu le líchugubei Sífiri Sándu joun afíñetiña, áfaagua jumá jibíjini ubáfu buri le gayáraabei lawáanseragüdüniña tílana ligílisi.

¹³ Gürígia lubeíti le adímurejati dimúrei teréncha, lúnti lamúriajan lúma Búngiu lun líchugun ubáfu lun lun lafúnraanguagüdüni le laríñagubei lídan dimúrei ligía. ¹⁴ Ánjana ayúmuragua lun Búngiu láu dimúrei teréncha, inárüni luágu nayúmuraguña lan láu náni espíritu, líla le naríñagubei, ibídiñeti nun. ¹⁵ ¿Cáteiti lúnbei wadügüni? Lídan adámurini gayáraati wayúmuragun láu dimúrei teréncha, lúnti gíñe wayúmuragun láu dimúrei le gunfaráandawati. Gayáraati werémujan láu dimúrei teréncha, lúnti gíñe werémujan láu dimúrei gunfaráandawati. ¹⁶ Ánjein badímurejaña lubei lun Búngiu luágu luweírigun láu dimúrei teréncha, gürígia ünabugutiña ja agáambubalibu siñabei júaradun búma, lugúndun úati gunfaráanda jamáni le baríñagubei. ¹⁷ Gayáraati ában lan eteíngiruni buíti le bíchugubei lun Búngiu láu dimúrei teréncha, míderagun lumútiña jíbiri gürígia láu líra. ¹⁸ Teínqui numúti Búngiu luágu gayára lan nadímurejan dimúrei teréncha sügü jáu sun jugúya, ¹⁹ áni jímein numúti naríñagun seíngü dimúrei le gunfaráandawati lídan jóúndaragun tílana ligílisi, lun gayára lan jafúnrendeirun númagiñe, lubáragiñe naríñagun díisi-mílu dimúrei teréncha le úati gunfaráanda láni ni ában.

²⁰ Nidújeñu, masáminara jumá quei irájüñü luágu buri cátei le. Ítara jumá quei irájüñü lún buri cátei le wuríbati, ítara jugúyame queísi weínamujaña lídan ligáburi jasáminarun. ²¹ Laríñajare tídan lílburun lúru. “Nadímurejaba joun lílana fulásu le lídan ámu luwúyeri dimúrei, lúma jayúmulugugiñe teréncha, ni ítara, mebéresenbaña náu, líña laríñagun Jabúreme Búngiu.” ²² Ubáfu lubeíti lun ladímurejoúniwa ámuñegueinarügü dimúrei, seríwiti liseínime lubáfu Búngiu joun ja mafíñebaña, máma joun ja afíñebaña. Ánjeinti ubáfu lun ladímurejan Búngiu jayúmulugugiñe gürígia, seríwiti liseínime lubáfu Búngiu joun afíñetiña luágu Jesucrístu, máma joun ja mafíñebaña. ²³ Dan lubeíti le oúndaragua jamá sun tílana ligílisi, ánjein jadímurejaña lubei sun jugúya dimúrei teréncha, ába jebélurun mafíñetiña jánwoun, o gürígia lan ja ibídiñegilibe luágu ubáfu le joun, ¿ma jaríñaguba luágu lülüjali lan jáu? ²⁴ Ánjein ladímurejaña lubei Búngiu jiyúmulugugiñe, ába lebélorun ában le mafíñeti, ladáriraguba lúngua luágu gafígoun lan dánme le lagáambuni le jaríñagubei. ²⁵ Ítara lúba lafúnraangudun cátei arámudaguati le tídaanbei lanígi, ábame lájuduragun íchiga inébesi lun Búngiu, aríñaga ligíame luágu níjein lan Búngiu júma le tímatimaati.

Adüga jumei sun cátei lídan lubúdubu

²⁶ Nidújeñu, níjan lubeíti igáburi le lúnbei jóuseruni lídan jidámurin. Dan le jóúndaragun lun jájuduragun lun Búngiu, añájeinbaña jídaangiñe láu urému o arúfudajani, o cátei le lasúbudiragüdüni Búngiu jun, o adímurejani lídan dimúrei teréncha, o lafúnraanguagüdüniwa adímurejani ligía, sun líra adüga

jumei lun méme jawáanserun tílana ligílisi lídan cátei le luáguti Búngiu. ²⁷ Dan le ladímurejoún lídan dimúrei teréncha, biámarügü jamá gürígia adímureja, o úrúwa, áni ában ábanlá giñe jadímurejan, lúnti giñe níjein lan ában lun lafúnraanguagüdüni le jariñagubei. ²⁸ Ánjein úa lubei ni ában le gayára lumúti afúnraanguagüda, buítimaati lun madímurejoún lan lídan dimúrei teréncha lídan adámurini, ladímureja cáda ában lúmagua lúma lun Búngiu. ²⁹ Ánjein giñe luáguti lubei ladímurejan Búngiu jayúmulugugiñe gürígia, biámarügü o úrúwa jamá gürígia adímureja, ja jíbiri lun jarijin ánjein lúmagiñeti lubei Búngiu le aríñawagúbei lúmoun máma lan lúmagiñeti. ³⁰ Ánjein asúbudiragüda Búngiu ában cátei lun ámu gürígia le ñun umúti lun líchuguni lun gurírguaü, lúnti lámánichun le adímurejabei lun líchugun dan lun, lun ladímurejan. ³¹ Ítara, sun jugúya le iyúmulugugiñebei ladímureja Búngiu, gayáraabei jadímurejan ában ában lun jafúrendeirun súngubei, ragü jugúyame gurásu. ³² Ja iyúmulugugiñebaña ladímureja Búngiu, lúnti jágüdaagun joúngua darí lachülürün jadáani lun jadímurejan, ³³ lugúndun Búngiu le íchugubalin ugánu ligía joun, lánina darángilaü, máma lánina chagáguau.

Queisi jagáburi jíbiri wadújeñu lídan wafiñen dan le jadámuridagun, ³⁴ moún lumuti jadímurejan würiña lídan jadámurin afiñetiña lugúndun majouati lun cátei le. Lúnti gagáambadi jamá queisi laríñaguni lilúrudun Búngiu. ³⁵ Ánjein busén jabei jasúbudirun ában cátei, álügüda jamei jámari jábiñe, lugúndun mabuidunti laríajouún lun tadímurejan ában würi lídan jadámurin afiñetiña.

³⁶ Ánjaün magúnda láu nerérun, lúnti jasúbudiruni luágu máma lan júma lagúmesera Lerérun Búngiu, áni mámarügügidün giñe jugúya erésibirei. ³⁷ Le jarítaguabei luágu gabáfu lan lun ladímurejan Búngiu liyúmulugugiñe, o jarítagua lan luágu ru lan Sífiri Sándu ámu ubáfu lun, lúnti lasúbudiruni luágu ában lan lugúmadin Wabúreme Jesucrístu cátei le nabürüjabei jun. ³⁸ Ánjein manügün lan ítara, reídeilá lídan libídiouniga láu.

³⁹ Ítara líña lubeiti nidújeñu, áfaagua jumá lun gayára lan ladímurejan Búngiu jiyúmulugugiñe, mamájara jumá lun ladímurejoún lídan dimúrei teréncha, ⁴⁰ adügarüga jumei sun cátei lídan lubúdubu.

15

Lásaarun Crístu lídaangiñe oúweni

¹ Guetóti nidújeñu, buséntina lun jarítagun luágu ugánu lé meja apúrichija náalibei jun luágu Jesucrístu le Wasálbaragüle. Niján ugánu ligía le jerésibirubei, le giñe ídaanbei derégüdagu lan jafiñen. ² Sálbatün giñe lun sun dan ladüga jafiñen luágu ugánu le, ánjein jafálara le uágubei napúrichija jun, ánjein giñe láu lubei jinárün jafiñera.

³ Furúmiñeti cátei, arúfudaja náali le furéndei náalibei luágu Wasálbaragüle jun, luágu jilá lan Crístu luágu wafígoun, queisi tariñaguni Lerérun Búngiu luágu lúnti lan lasúseredun. ⁴ Lárigiñe meja loúnwen, ába labunún, ába lásaarun lídaangiñe oúweni luágu lürüwan wéyu queisi tariñaguni Lerérun Búngiu luágu le lúnbei lasúseredun. ⁵ Ligía larúfudagun lúngua lun Pédro, lárigiñe, ába larúfudagun lúngua joun jíbiri apóstolugu. ⁶ Lárigiñe, ába larúfudagun lúngua joun sügü jáu seíngü-san afiñetiña ja oúndarañubaña lídan ában, áni añájeingua sarágu jádaangiñe, wínwangiña

chülü lúmoun dán le, ja jíbiri, jilágu. ⁷ Lárigiñe, ában larúfudagun lúngua lun Jacóbo, lárigiñe, joun sun apóstologu.

⁸ Agúmujoúni, járigiñe súngubei, ába giñe larúfudagun lúngua nun, láu sun ítara níña lan quei ában le agúriajóuti lídan ában igáburi le múaraanti, ⁹ lugúndun áu lan ni cátatimáabei jádan apóstologu, madúnatina ni lun nanügün quei apóstolu, lugúndun eíbaaja numútiña méja tílana liliğilisin Búngiu. ¹⁰ Áu le áubei guetó lugúndun lareídun Búngiu nun, áni merédeti lareíni nun maságarunga ni cáta buíti nídaangiñe, lubáragiñe líra, ñadágimeinjaadina sügü jáu jíbiri apóstologu, láu sun máma lan áu ñadágimeinbei, Búngiu le númabei láu lareíni, ligía ñadágimeinbei nídaangiñe. ¹¹ Mebéresentina ca lántima ñadágimeinjañabaña, jagía lan o áu lan, niján ugánu le wapúrichijabei luágu lásaarun Crístu lídaangiñe ouweni, áni niján giñe uágubei jafiñera.

Jásaarun jiláaña lídaangiñe ouweni

¹² Queísi wapúrichijan luágu saráali lan Jesucrístu lídaangiñe ouweni, ába jerésibiruni, çída liñáti añáein lubei jídaangiñe aríñagatiña luágu másaarun jamá jíbiri jiláaña? ¹³ Ánjein másaarun jabei jíbiri jiláaña, másaarunti lubei giñe Crístu lídaangiñe ouweni, ¹⁴ áni ánjeinti másaarun lubei Crístu lídaangiñe ouweni, málati ugánu le wapúrichijabei luágu asálbaruni, málati giñe afiñeni le juágubei. ¹⁵ Ánjein ítara líña lubei, waríñaguña iyéeni luágu Búngiu, lugúndun aríñagaadiwa lan luágu sarágüda láani Búngiu Crístu lídaangiñe ouweni, ánjein máma lubei inárüni luágu sará jamá jiláaña, máma giñe inárüni luágu sarágüda láani Búngiu Crístu lídaangiñe ouweni. ¹⁶ Lugúndun ánjein másaarun jabei jiláaña, ni Crístu, másaarunti giñe lídaangiñe ouweni, ¹⁷ áni ánjeinti jiláñugili lubei Crístu, mesériwinti jafiñen lun ni cáta, lídaangidün jiffigoun ligíbugiñe Búngiu. ¹⁸ Áni ánjein ítara líña lubei, féridiñu jáña giñe ja ouwegubaña láu jafiñen luágu Crístu. ¹⁹ ¡Ánjein lúntirügü lubei íbágari le weménigi luágu Crístu, fugiábu wagía jádaangiñe súngubei!

²⁰ Le inárünitibei, saráti Crístu lídaangiñe ouweni lúnya labágaridun, ligía furúmiñetibei ásaaruti lídaangiñe ouweni lun moúnwendügüyaali lan, áni ítara lúba jásaarun sun lánigu. ²¹ Ítara quei lídaangiñe lan ában wügüri lagúmesera ouweni ubouágu, lídaangiñe giñe ában wügüri lagúmesera jásaarun jiláaña. ²² Ítara quei jóuwegun súngubei ladüga lídaangiñe lan Adán jayábin, ítara lubá giñe gabágaríya jamá súngubei lárigiñe ouweni ladüga lánigu jamá Crístu. ²³ Lúnti lásaarun cáda ában lídan lidáni. furúmiñeti meja ásaaruti, Crístu, lárigiñeme, dánme le lagiribudun Crístu ubouágun, ligíame jásaarun lánigu lídaangiñe ouweni. ²⁴ Ligíabati liábin lagúmuchagüle sun cátei, ábame lagünrinchaguni Crístu sun líbiri luwúyeri arúejani, ubáfu, lúma érei le ubouágubei, ábame ledéregeruni arúejani lun Búngiu Úguchili. ²⁵ Larúejaba Crístu daríme gáñeigüda láali Búngiu wuríbu lun jawágu sun láganiñu, ²⁶ ouweni, ligíaba lagúmujoún ágani agünrinchawagúti. ²⁷ Rúlaali Búngiu sun cátei lábugiñoun lubáfu Crístu, dan le taríñagun Lerérun Búngiu luágu rúa lan sun cátei lábugiñoun lubáfu, subúdiwati luágu úa lan Búngiu lábugiñe lubáfu, lugúndun Búngiu íchugubalin sun cátei lábu lubáfu Crístu. ²⁸ Dánmeti le reidejiali sun sun cátei lábugiñe lubáfu Crístu, ábame leréderun Crístu, le Lirañ Búngiu, lábugiñe lubáfu Búngiu, le íchugubalin sun cátei lábugiñoun lubáfu Crístu. Búngiurügüba urúei, le Súnti Gabáfu.

²⁹ Añájein jídaangiñe, abásterutiña jewéñegua ja ouwetiña mabásterunga. ¿Cámegi jadügei lira? Ánjein másaarun jabeí jiláaña, ¿cámegi ju lan jabásterun jewéñegua?

³⁰ Ánjein siñá jásaarun jiláaña, málati wapúrichijan súnwandan lúnrügü weíbaajoún lueígiñe. ³¹ Ságü wéyu yaráfa wamá lun wounwen, inárüni líra nidújeñu, queísi ugúndani le nasándirubei juágu queísi afiñetiña luágu Wabúreme Jesucrístu. ³² Ageíndaguatiña wügüriña ja ítarabaña quei anímaalugu janárimetiña ya Éfeso núma, ladüga mínsiñe lan cátei le napúrichijabei joun, ¿cági nagáñeirubei láu líra? Ánjein jamúga inárüni lubeí luágu úabei lan ibágari lárigiñe ouweni, richátiña jamúga ja aríñagubaña. “Jouwama, guráwama, lugúndun jarúga wouwegua.”

³³ Mayeedúa jumá. Ariñawagúati. “Féridigüda jamúti jagübüri umádagu lubuidun igáburi.” Inárüni líra. ³⁴ Darígua jumá júngua, giríbu jumá lun ában ibágari le surúti, mafígojua jumá. Añájein jídaangiñe, ibídiñeti Búngiu joun. Naríñaguñein le lun janügün busíganu.

Ída lúba ligáburi jásaarun jiláaña

³⁵ Fágua níjeinbei álügüdjati. “¿Ída lúbasan ligáburi jásaarun jiláaña? ¿Cábasan luwúyeri úgubu jawágu?” ³⁶ Libídiouniga láu álügüdjani líra. Dan le labunún ában ílaü, gásu lañáladun lábugiñe múa furúmiñe lubá gayára lan labouçhun. ³⁷ Máma nádü le lúnbei lájüchün abunúbei, ílaü abunúbei, furúmiegüarügü le luwúyeribeí. ³⁸ Lárigiñe labunúniwa, jilá ligía, ába líchuguni Búngiu úgubu le labúseerubei luágu ílaü ligía, ába líchuguni úgubu le lúnbei cáda ílaü. ³⁹ Máma ában lábu sun úgubu, ámu luwúyeri jágubu güriñe, ámu jágubu anímaalú, ámu jágubu dunúru, ámu jágubu úduraü. ⁴⁰ Níjein giñe buri cátei siéluna queísi wéyu, játi, warúguma, queísigubeirügü níjein lan ubouáguna, ámu lubuidunmeraü buri le siéluna lueí le ubouáguna. ⁴¹ Ámu larúni wéyu lueí larúni játi, ámu giñe jarúni warúguma, áni jádaanganarügü warúguma, ámuñegueinarügü jarúni jawáriuagua. ⁴² Ítara líña giñe lídan jásaarun jiláaña, ámubei jágubu, labunúa ában úgubu le gañáladaditi, lásaarame le mouñwenjali. ⁴³ Labunúa ában úgubu le mabuídunjali, lásaarame ában le buídumeraüti. Labunúa ában úgubu le débiliti, lásaarame ában le jéreti. ⁴⁴ Labunúa ában úgubu le ídaanbei wabágarida ya ubouágu, lásaarame ában úgubu le ídaanbei wabágarida yágüta siélu. Ánjein ibíja wabeí wágubu lánina ubou, wibíjibeí giñe wágubu lánina siélu.

⁴⁵ Ítara líña taríñagun Lerérun Búngiu. “Adán le furúmiñeti wügüri, ában meja wügüri wínwanti”, ánjeinti Crístu, le giríbeí giñe lagúmujoún Adán, ában espíritu ligía le íchugubei ibágari. ⁴⁶ Furúmiñe ibíja wamúti ibágari le ubouáguna, lárigiñe, ábame wibíjini ibágari le lánina siélu. ⁴⁷ Lé meja furúmiñeti wügüri le adügübeí láu múa, ubouáguna meja, libíaman wügüri le Wabúreme Jesucrístu, siéluna. ⁴⁸ Sun güriñe ubouágu ítara líña jágubu quei lúgubu Adán le adügübeí láu múa, sun lánigu Crístu, jabíjuba jágubu quei lúgubu Crístu, le siélunabeí. ⁴⁹ Wágubu guetó, líbe lúgubu Adán, le lánina ubou, lachülürüba wéyu lun wibíjin ámu luwúyeri úgubu líbe lúgubu Crístu, le lánina siélu.

⁵⁰ Le naríñagubei, nidújeñu, luágu siñá lan jebélurun güriñe láu jágubu le ubouáguna lídoun larúeijan Búngiu siélu, lugúndun cátei le goúwedadibeí siñáti gabára lan lídan fulásu le ñi lubei úa lan ouweni. ⁵¹ Buséntina lun

jasúbudiruni cátei lé meja arámudaguabei le. Máma sun lánigu Crístu lun jóüweguba lan, jasáansirawagúba súngubei, ánjein wínwangiña lubei dánme lagíribudun Jesúsu o jiláaña lan, ⁵² lídan murúsun óra, furése furése quei ában léfegechun lúma lámurudun águu, dánme le lagaambúniwa lumálali fídu, le liseíni lagúmujóun sun cátei. Linwiruba fídu, ábame jásaarun lánigu Crístu ja jiláañabaña lun moúnwendügüyaaña lan, ja moúnwengiñabaña, ábame jasáansirawagún lídan méme óra ligía. ⁵³ Wágubu le wawágubei le gayáraabei lañáladun, lasáansiraguba lídoun ában luwúyeri le siñábei lañáladun, wágubu le goúwedadibei, lasáansiraguba lídoun le moúwedadibei. ⁵⁴ Dánme le sáansiguuali wágubu le goúwedadibei lídoun le moúwedadibei, ábameti lagúnfulirun le bürüwañubei tídan Lerérun Búngiu. “Gumúja lubáfu óüweni, férídlá wuríbu. ⁵⁵ Óüweni, ¿jigeígi bubáfu lun bagúmuchaguagüdüniwa? ¿jigeígi agáñeiruni lé nege lúnbei badügüni?” ⁵⁶ Figoú lébunabei óüweni, áni binádu lilúrudun Moisés, ligía arúfudubalin woun cátei lan figóubei lun wayúmajani. ⁵⁷ Teínqui wáña lun Búngiu luágu lagáñeiragüdüniwa luágu sún buri cátei le, láu lubáfu Wabúreme Jesucrístu.

⁵⁸ Ligía lubeíti nidújeñu jínsiñetiña nun, ítara méme jumá derégüdagu lídan jafñen, meréderagunga, ñadágimein súnwandan, gánwoun gueínarügü lídan luwádigimari Wabúreme, lugúndun subúdi jumúti luágu máma lan luágu ni cáta jadúgei wadágimanu le jadügübei lídan ában lúma Wabúreme Jesucrístu.

16

Loúndarún seínsu joun idújeñu lueígiñe Jesucrístu

¹ Luágu loúndarún seínsu joun wadújeñu lueígiñe Jesucrístu ja gudémebaña yágüta Jerusalén, adüga jumei quei narúfudajani tídan sun ligílisi loúbawagu Galácia. ² Ságü wéyu dimáasu, cáda ában jídaangiñe lúnti ladíreirun murúsun lídaangiñe le lagáñeirubei, ábame lareíduni lun dánme lan nachülürün, merédedünme oúndaragua seínsu. ³ Dánmeti le nachülürün, noúnajabaña gürígia ja janúadajabaña ubúругu Jerusalén, ábame níchugun gárada joun lun janügüni seínsu le jóúndarubei joun wadújeñu ja ñíbaña. ⁴ Ánjein gíñe lun lubei nídin, jóúdiba núma.

Laráansejan Páblo lubá luweíyasun

⁵ Lídan nuweíyasun, násügürüba loúbawagugiñe Macedónia lun neréderun átiri wéyu ñi, nachülürüba lubeíti ubúругu Corínto lárigiñe. ⁶ Fágua neréderagun júma átiri dan, o násügürüni lan sun juyáabun ñi, gayáraabeiti jíderagunina lídan nuweíyasun léme ñijin lumúti nídin lárigiñe nebélujan júmoun. ⁷ Mabúseerúntina chülüguarügü nan aríjaün, buséntina neréderagun átiri dan júma, ánjein busén Wabúreme. ⁸ Neréderuba ya ubúругu Éfeso darí luwéyuri Pentecostés, ⁹ lugúndun níjein ában oúnwenbun cháansi nuágu lun nadímurejan luágu Wabúreme Jesucrístu ya, áni buídubei lanügün. Añájein gíñe gíbetiña gürígia mabúseerúntiña lun nuwádigimaridun luágu Wabúreme ya, ligía siñábei lubei nígiruni Éfeso guetó.

¹⁰ Dánme le lachülürün Timotéo, jóücha jumá lun gúnda lan jagánagua, lun úa lan sarágu samínaü luágu, lugúndun luwádigimariña luágu Wabúreme Jesucrístu queisi áu. ¹¹ Manüga jumei quei ni cáta. Dánme le gumúlaali lidáani júma, jíderagueime lun gayára lan lagíribudun númoun láu ában ugúndani tídan lanígi luágu lubuídun lidáani júma. Nagúrabajañein

ya Éfeso jáu sun jíbiri wadújeñu lueígiñe Jesucrístu ja lúnbaña jayábin úara lúma.

¹² Ayúmuraguatina yebe lun Apólos lun lídin jáma jíbiri wadújeñu aríjaün, jénreenguti lídin guetó, lídiba dánme le gayára lan.

Lagúmujoún buri mábugaü

¹³ Ítara méme jumá agágudañu, toúnigiñu lueí cátei le jamúga gayáraabei ladíñurunün lueí lubuídun úma le gádaanbalün, derégüdagu jumá lídan jafíñen. Agáburida jumá quei wügüríña ja awáanserubaña lídan le inárünibeí, manúfudeiga, jére jumá, gáñei jumámuga luágu wuríbani. ¹⁴ Sun cátei le jadügübeí, adüga jumeí láu insiñejabuni.

¹⁵ Nidújeñu, subúdi jumúti luágu Estéfanos lan jáma sun tílana lúban furúmiñebaña louúbawagua Acáya ígirutiña binádu jagáburi lun jerésibiruni Crístu, luágu giñe derégeguaaña lan jóungua lun jesériwidun joun wadújeñu lídan afiñeni lídan furúmieguaarügü cátei le jayáraati. ¹⁶ Buséntina lubeíti lun giñe jíchaagun júngua joun, lúma joun sun ja ídejabaña, ñadágimein jagía ítara. ¹⁷ Gúndaatina láu jayábin Estéfanos, Fortunáto, lúma Acáico ñájoun. Weíríñajati nisáminan juágu, áni siñáti jíabin sun jugúya, ¹⁸ ába jíchugun wügüríña jagía gurásu nun láu janügün ugánu nun juágu. Afíñetina luágu janügüba lan giñe gurásu jámagiñe luágu jadímurejan jun nuágu. Lúnti jeteíngiruni Búngiu jawágu gürígia ítaratiña.

¹⁹ Mábuga jáña tílana ligílisi buri to louúbawaguboun Ásia jun. Mábuga jáña giñe Aquíla túma Priscíla jáma sun ja oúndaragubaña jábiñe jun, queísi afíñetiña luágu Crístu. ²⁰ Mábuga jáña sun idújeñu ja yábaña jun. Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

²¹ Áu Páblo, noúnajañein mábugaü le jun le nabürüjabei láu nújabu lúma nilétüran.

²² Le mínsiñejabuti lun Wabúreme Jesucrístu, reídeilá lábugiñe líñaragun Búngiu. ¡Giríbubá furése ubouágun, Wabúreme!

²³ Binílaün Wabúreme Jesucrístu. ²⁴ Oúnaja numúti nínsiñejabu lídan Jesucrístu jun, sun jugúya. Ítaralá.

TIBÍAMAN LIGÁRADAN PÁBLO JOUN CORÍNTONA

Abúsuraguni

¹ Áu Páblo, ában láni Jesucrístu apóstolu áu, láu lugúndan Búngiu, ában le loúnajabei lun napúrichijani ugánu luáguti asálbaruni. Úara lúma Timotéo, le wadúje lueígiñe Jesucrístu, nabúrűjañoun gárada to jun, jugúra le tílanabei ligílisi to ubúrűguboun Corínto, lúma joun sun lánigu Búngiu ja louábawagubaña Acáya. ² Resíbi jumá abíniruni lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Lasúfurirun Páblo

³ ¡Úati quei Búngiu, le Lúguchibei Wabúreme Jesucrístu! Ligía Wáguchibei le gudémejabubei woun, aráanseñu líña lun líchugun gurásu woun furúmieguarűgü óra. ⁴ Rúti gurásu woun lídan sun wasúfurirun, lun giñe gayára lan wafúnrendeirun lúmagiñe ída lúba lan gayára lan wíchugun gurásu joun ámu ja asúfurirubaña, lídan méme luwűyeri igáburi le líchugubei woun. ⁵ Lugúndan ítara quei luweírin wasúfurirun luágu líri Crístu, ítara giñe werésibirun ában oúnwenbun gurásu lúmagiñe. ⁶ Ligía lébubei wasúfurirun, lun gagúraasun jumá, sálba jugúyame, resíbitiwa gurásu lúmagiñe Búngiu lun giñe gayára lan jerésibirun gurásu wámagiñe, subúdi jumeíme Wasálbaragüle. Ítara lúba gayára lan jawánduni líbe asúfuriruni le wawándubei, láu gurásu. ⁷ Derégüdati wafíñen juágu luágu jasígiramémeba lan derébuguñu lídan jafíñen, láu sun weíri lan jasúfurirun. Subúsi woun luágu láu sun lan jasúfurirun luágu líri Crístu queísi wasúfurirun, jerésibiruba lan giñe gurásu lúmagiñe Búngiu queísigubeirűgü werésibiruni.

⁸ Nidújeñu, buséntiwa lun jasúbudirun luágu sarágu lénreengúnga le wasúfurirubei louábawagu Ásia. Deréti ouchwagúni ligía, darí yebe lun méreediwa lan lun wawánduni láu wáni woúngua. Jarítaguatiwa yebe luágu woúweguba lán meja lubáragiñe wáfuridun ñigiñe. ⁹ Sandíguaadiwa yebe woúngua queísi gürígia ja síadiwaaña lun jounwen. Wel, lasúseredunbei líra lun wafúnrendeirun lídaangiñe lun weménigidun luágu Búngiu le gabáfubei lun lásaaragűdüniña jiláaña, máma lun wawoúgua lan weménigida. ¹⁰ Séfu lumútiwa Búngiu dán buri meja ligía le yaráfa wabei lun wounwen, áni leséfuramémeñadiwa lídaangiñe lénreengúnga le gádaanbaliwa guetó, áni rúwamaali weménigi luágu, luágu leséfuramémebadiwa lan, ¹¹ ánjava jíderagua láu jayúmuragun lun Búngiu wawágu. Áni ánjaña ayúmuragua sarágu gürígia wawágu lun Búngiu, sarágubaña íchugutiña eteíngiruni lun Búngiu luágu fuleísei lániwa láu leséfuruniwa.

Ca lan uágu lasáansiraguei Páblo larítagan luágu luweíyasun ubúrűgun Corínto

¹² Nijein ában cátei agúndaaragűdütíwa. lariñagun warítagan woun luágu gagáburi wamá ában igáburi jarúmati, furáangu, ya uboúagu, jagánaguatima. Íderagua láadiwa Búngiu láu lareíni lun buídu lan wagáburiidun ítara, madűgűntiwa ni cátei láu lichú wáu guánarűgü. ¹³ Lídan le wabúrűjanbei jun tídan wagáradan, úati ni cáta arámudaguati ñi le jásiñerun alíjia o

gunfaráanda. ¹⁴ Guetó subúdiraüjadün luágu gayára lan jagúndaaragun wáu quei jumáesturungu, chülü lámuga wéyu lun gayáraabei lan jasándiragun júngua buídu buídu láu ugúndani wawágu, ítara quei wagía juágu lídaanne wéyu le lagíribudagüle Jesucrístu uboúagun.

¹⁵ Queísi méja affíne nubeí luágu gúnda jumá wáu queísi láni Crístu apóstolugu jun, jarítaguatina yebe meja nídin aríjaün furúmiñe, lun nagúndaaragüdünün láu bisída nánün bián weíyaasu— ¹⁶ jarítagutiná yebe nachülaagun aríjaün lídan nuweíyasun Macedónioun, dan jamúga le nagíribudun Macedóniagiñe, ábaya jamúga nachülaagun aríjaün. Ítara líña jamúga gayára lan jíderagunina lun nasígiruni nuweíyasun Judéoun. ¹⁷ Madügün numúti. ¿Jálügüdaguñasan júngua ca lan ueígiñe madügün nubálin? ¿Masáminarun numúti funásan quei lubúdubu dan lé meja nariñagubei jun luágu nadügübei lan cátei le? ¿Jarítaguatün luágu ítara níña lan queísi lirájüñü uboú ja aríñagubaña ában cátei áni magúnfuliruntiña láu jerérun? ¹⁸ Geféenti Búngiu luágu maríñagun wamá ában cátei jun magúnfulirunga wagía láu. ¹⁹ Sun wagía—Silváno, Timotéo, áu— apúrichijatiwa jun luágu Jesucrístu, le Liraü Búngiu. Áni mítaraanti Crístu quei gürígia ja aríñagubaña ában cátei áni magúnfuliruntiña láu jerérun, Crístu, súnwandan ladügüni le laríñagubei. ²⁰ Gúnfuli lumúti Crístu sun lidáradun Búngiu jáma lánigu, woun. Ligía lébubei dan lan le lásurun wadímurejan lúma Búngiu luágu luweírigun, ayúmuragua wagía lun, ába waríñagun “ítaralá” lun warúfuduni wafíñerun luágu ladügüwaba lan lídan líri Jesucrístu. ²¹ Búngiu adügübei lun derégüdagu wamá, wagía júma, lídan wafíñen luágu Jesucrístu, ligía anúadajabaliwa lun wesériwidun lun. ²² Rúlaali Sífiri Sándu wádoun lun larúfuduni luágu lánigu wamá. Sífiri Sándu le wádaanbei, ligía queísibeí lasúbudiraja le lúnbei weresibiruni queísi lánigu Búngiu. Queísi ítara líña lubeí, ¿gayáraati funásan ítara wamá queísi gürígia ja aríñagubaña ában cátei áni magúnfuliruntiña láu? Siñáti.

²³ Mídingidina Corínto aríjaün luágu nuweíyasun ñájoun Macedónioun quei yebe narítaguni lugúndunrügü mabúseerun nan nírudaguagüdünün láu ában ébechuni, geféenti Búngiu luágu líra. Ánjein máma lubeí líña, aráansetina lun nounabun láu nibágari guánarügü. ²⁴ Máma jamúgatia wabúseeruña waríñagun jun. “Nijánba jafíñera”, derégüdaguaadün lídan jafíñen, busénrügütiwa wíderagunün lúntima lagánwoundun jagúndaarun.

2

¹ Ligía mídinya nubeí bisídaün lun nírudaguagüdünün. ² Lugúndun ¿ída lubásan gayára lan jamúga nagúndaarun lárigiñe níchuguni íruni joun gürígia ja agúndaaraguagüdúbalina? Siñáti jamúga. ³ Ligía nabürüjanbei jun ítara, lun gayára lan jaráanseruni cátei le mégeibeí jídaangua lubáragiñe nachülürün júmoun, dánme lámuga nachülürün, mibíjin námuga íruni júmagiñe, jugúya le lúnbei nibíjin ugúndani júmagiñe. Subúdi numúti luágu láu lan jamúga nasándirun ugúndani, jasándiruña lan jamúga gíñe ugúndani. ⁴ Dán meja le nabürüjanbarun gárada tugúya jun, weíriti meja nidíjeri juágu dari lun nayájun lídan le nabürüjararun. Máma meja lun nírudaguagüdünün nabürüjoun jun ítara, nabürüjanun lun jasúbudiruni luweírin nínsifějabu jun.

Ferúduun lun lé meja afígounjabei

⁵ Le rújalibei íruni láu luríban leménerun, máma rügüñein nun líchiga íruni, rúlumuti gíñe jun lídan ában luwúyeri. Nariñagunbei “lídan ában luwúyeri” lun maweírín lan naweíridaguagüdüni jun. ⁶ Abeíchuni lé meja jariñagubei lídan jadámurin lun líchugúniwa luágu gürígia ligía, buídurügaali. ⁷ Guetó, lúnti ferúduna jumáni, ru jugúyame gurásu lun luei ladügün sarágu íruni wuríbati lun. ⁸ Ligía nayúmuragunbei jun lúnya jarúfuduni jínsiñejabu lun. ⁹ Abürüjatina jun luágu cátei le lun gíñe nasúbudiruni ánjein aráanse jubei lun jadügüni le nubeíbei jun. ¹⁰ Guetóti, le únti ferúduna jumá furúmieguarügü cátei, ferúduna nubei gíñe, ánjein gíñe níjein lubei cátei le lúnti ferúduna náni gürígia ligía luágu, ferúduna numúti ligíbugiñe Crístu, jueigiñe. ¹¹ Lídan ában cátei líbe líra, mabúseerúntiwa wíchugun lúgaaru lun Máfia lun lanügün ában gürígia le máma láni lárigoún lídoun lubáfu, subúdiwati lumáñaan Máfia buídu buídu.

Madárangilan lan larítangun Páblo ubúruqu Tróas

¹² Dán meja le nachülürünbei ubúruqu Tróas lun napúrichijani ugánu luáguti Crístu, ába nibjín ában oúnwenbun cháansi ñi lun nuwádigimaridun luágu Wabúreme. ¹³ Madárangilaanti narítangun lugúndun madári náni wadúje Títo Tróas lun nagáambun lúma juágu. Ligía nayoúragunbei joun wadújeñu ja Tróasbaña, ába nídin loúbawagun Macedónia lun nadúnragun lúma Títo ñi.

Gáñeitiwa láu lubáfu Crístu

¹⁴ Buíti lasálirun sun cátei. Teínqui wamúti Búngiu le anügüwaliwa lídoun sun fulásu, amáhareina wagía lábugiñe lagúmadijan Wábuti Jesucrístu, le súnwandanbei lagáñeiragüdüniwa lídan sun lénreengúnga. Yúsu lumútiwa Búngiu lídan sun fulásu lun wasúbudiragüdüni ugánu luáguti Crístu, queísi lirímichúniwa líjeme cupáli. ¹⁵ Lugúndun ítara waña quei cupáli le lágudajabei Crístu lun Búngiu, ñüdüntiwa láu ugánu luáguti Crístu, le queíbei líjeme cupáli, joun ja lúnbaña jerésibiruni ugánu ligía lun jasálbarun, jáma gíñe ja lúnbaña merésibirun jamáni ugánu ligía lun jeféridirun. ¹⁶ Joun ja merésibirunbalin ugánu ligía, ítara líña quei ában íjemeni le gáfarajati, ánjein joun ja erésibirubalin, ítara líña quei ában árani le areídaguagüdüti. ¿Cáti gabáfubei lun lasúbudiragüdüni ugánu luáguti Crístu? ¹⁷ Wagía le loúnajabei Crístu, gabáfutiwa, ladúga mítaran wamá queísi arúfudajatiña yéetiña jagánagua, ja asáansiragubalin linárün Búngiu quei jabúseerun lun jaríjin cába lan jagáñeira lídaangiñe. Lubáragiñe líra, apúrichija wamúti Lerérun Búngiu quei lubei, ligíbugiñe Búngiu, wagía queísi loúnajan Búngiu ja lídaanbaña ában lúma Crístu.

3

Ugánu luáguti iséri darádu

¹ Dan le waríñaguni cátei le, ¿genége lumúti jun luágu wagúmeseruñaya lan adímureja buídu wawougua? ¿Ódi gásu funági warúfudun gárada jámagiñetu ámu mútu jun to adímurejatu luágu lubuídun wagáburi lun gayára lan jerésibiruníwa, o wamúriañan lan gárada jámagiñetu joun ámu mútu, quei jadúga jíbiri mútu? ² Uá, lugúndun jugúya afñiñetiña, ítara jíña queísi ában gárada to adímurejatu luágu lubuídun wawádigimaridun jagánagua, ítara jíña quei ában gárada to bürüwañutu tídan wanígi, to gayáraaboun jalíjanun sun gürígia, asúbudiragüdei cátawa lan. ³ Ítara jíña queísi ában gárada to labürüjan Crístu guánarügü, to wedéregeruboun, ában

gárada jugúya to abürüjouboun láu lání Búngiu le wínwanbei Espírítu, máma láu t́nta, áni t́dan janígi ladúgei Espírítu ligía wadágimanu, máma luágu dúbü.

⁴ Gayáraati waríñagun luágu buídu lan wesériwidun lun Crístu ladüga wadügüni jeménigiñu luágu Búngiu lun líchuguni ubáfu woun lidaangiñe Jesucrístu. ⁵ Mabáfutiwa lun ni cáta láu wáni woúngua, sun le wayáraabei adüga, lúmagiñe Búngiu liábin. ⁶ Rújali ubáfu woun lun wesériwidun lun láu wasúbudiragüdüni iséri lidáradun jáma gürígia lun jasálbarun. Iséri darádu ligía, mítaraanti quei lé meja binádu, lé meja lánina lúrudu bürüwati le lúnbei lagúnfulirúniwa láu, lánina ában ibágari le erésibirúti lúmagiñe Sífiri Sándu. Lúrudu ligía, le lilúrudun Moisés, arúfudarügü lumúti wafígoun ligíbugiñe Búngiu, figoú ligía, ouweni lafáyeijabei. Anjeinti Sífiri Sándu, rúti ibágari joun sun ja ánjabaña lun.

⁷ Lilúrudun Moisés le, abürüjouati luágu dúbü. Dan le lerésibirubalin lúrudu ligía lúmagiñe Búngiu lun líchuguni joun Israelítagu, ñíñein ában oúnwenbun larúgounga lúmagiñeti Búngiu ligíbuagu darí lun siñá lán meja jaríaguni gürígia jagía ligíbu Moisés, lugúndun weíríti lámiridun ligíbu. Láu sun líra, ába éñegucheina lan larúgounga ligía murúsun murúsun. Anjein láu lubei sarágu uweíríguni liábin lúrudu ligía le asíadjabei gürígia lun oúweni, ⁸ jweírítimaati luweírígoun ugánu le lanügübei Sífiri Sándu woun luágu Wasálbaragüle! ⁹ Anjein weíri lubei luweírígoun meja lúrudu le esériwidubei lun larúfuduni wadúnrun ligíbugiñe Búngiu woun, jweírítimaati luweírígoun ugánu luágu Wasálbaragüle le adügübalíwa richágua ligíbugiñe Búngiu! ¹⁰ Ni cáta luweírígoun lilúrudun Moisés ligíbugiñe luweírígoun Wasálbaragüle. ¹¹ Anjeinti weírígu lubei meja darádu le lúnbei ladúrarun murúsunrügü dan, weírítimaati luweírígoun darádu le lúnbei ladúrarun lun sun dan.

¹² Ladüga níjein lan eménigini le wawágu, luágu siñá lan leferídiruni ugánu luáguti Crístu luweírígoun, wapúrichijánbei furáangu. ¹³ Madügüntiwa quei meja Moisés, adáuragua láu ligíbu táu ában bélu lun maríjin jamáni Israelítagu léñeguchun larúgounga ligía le siñábei ladúrarun, marámudaguntiwa láu ugánu lánina wasálbarun ni murúsun. ¹⁴ Derétu janígi Israelítagu jagía lun laníchigu lilúrudun Moisés joun, queísigubeirügü jamúga núrein lan bélu darúgu láu jasáminan. Íbini guetó, dan le jalíjan tídaangiñe líburu to lilúrudun Moisés, bélu méme tugúya to luáguboun jasáminan, mígirun tumútiña lun gunfaráanda jamáni laníchigu binádu lidáradun Búngiu joun, siñáti jasúbudiruni luágu gúnfuliwa lan sun laníchigu binádu darádu ligía lídan Crístu le Wasálbaragüle. ¹⁵ Chülü lúmoun dan le, dan le jalíjanun líburu buri to labürüjaboun Moisés, darúguatu ában bélu láu jachügü luei gunfaráanda jamá. ¹⁶ Anjeinti dan le lígiruni ában gürígia binádu ligáburi lun leíbugun lúma Crístu, ába tagídarún bélu tugúya luei. ¹⁷ Wabúreme Crístu, ligía Espírítu le íchugubei ibágari. Láu Espírítu ligía (le méme Sífiri Sándu) wádan, sálbatiwa, máfaagunga wagía lun wagúnfulirun láu lilúrudun Moisés. ¹⁸ Ligía sun lubei wagía afíñetiña luágu Crístu, gidáwaaru bélu luei wasáminan, subúdi wamúti Crístu furáangu, láu sun luweírígoun. Ítara wáña quei ában isúbusein to arúfudubalin luweírígoun Wabúreme Crístu, áni láu wasígirun íchigei warítagn luágoun, sáansiguagüda lumútiwa lání Espírítu murúsun murúsun lun ítara wamá quei ligía.

4

1 Mábujurálá lubeíti warüna, lugúndun rúlaali Búngiu wadágimanu le lábun wariaajan, láu lareíni. ² Mayúsuruntiwa íbíbuni lun wafiñeragüdüniña gürígia luágu Crístu, rúwamuti wanágan luágun cátei le adügübei arámudaguarügü, le nibúsigarídünabei. Masáansiragun wameí Lerérun Búngiu, inárüni rügüñein waríñaga. Ítara líña jasúbudiruni sun gürígia cátawa lan ligíbugiñe Búngiu. ³ Ánjein mafúraangun lubeí werérun luáguti Wasálbaragüle, joun rügüñein ja lúnbaña jefédirun mafúraangun lan. ⁴ Quei mafiñen jabeí luágu werérun, darúlaali Máfia, le lubúngiutebei ubou le, jaríjin lun siñá lan larúgoungadagüdüni ugánu luáguti Crístu le weírigubei, le liyáwabei Búngiu wínwanti, jasáminan. ⁵ Dan le wapúrichijanbei, máma wawougua wapúrichija, luágu Jesucrístu wapúrichija, queisi Wabúreme, waríñagati wawougua luágu esériwidutiñarügü lan wagía jun, luágu wínsiñejabu lun Jesúsu. ⁶ Lugúndun Búngiu, le méme íchugubalin lámpu siélu lun lagídarúniwa lubúriga, ligía giñe adúnraaguagüdúbalin lilámpun tídan wanígi, lun gayáraabei lan wasúbudiruni luweírigun Búngiu le waríjibeí lídan Jesucrístu.

Abágariduni láu eméniqi luágu Búngiu

⁷ Larúgounga le wibíjubei luágu luweírigun Búngiu le lídaanbei Crístu, ítara líña quei ában irisini woun. Barü wamuti irisini ligía lídan fugiábu wágubu, le ítarabei quei ában soudieru, lun laríjiniwa luágu lumagiñe lan Búngiu liábin ouñwenbun ubáfu le wawágubei, máma wámagiñe. ⁸ Ítara, láu sun súfuri wamá sun luwúyeri lénreengúnga, súnwandan larúfudun Búngiu ában üma woun lun wáfuridun lídaangiñe furúmieguarügü lénreengúnga. Níjein dan, weíruti wadíjeri luágu cába lan wadüga, máburujaanti warüna, lugúndun íderagua lániwa Búngiu. ⁹ Eíbaajoúatiwa, mígirun lumútiwa Búngiu joun wáganiñu. Gayáraati jájuchuruniwa, ígira jamáwa múarugu quei jiláaña, siñáti jagúmchaguagüdüniwa. ¹⁰ Le ñílumuti wouúdin, buséñtiña wáganiñu jáfaraguniwa jilágubei quei jáfaruni láganiñu Jesúsu jilágubei. Lúnti ítara lúba lan lun gayáraabei lan laríjiniwa lubáfu Crístu le wínwanbei wádaangiñe. ¹¹ Wagía, sun awánja lan abágarida, yaráfañu wáña lun wouñwen furúmieguarügü wéyu lueígiñe Jesúsu, lun gayára lan laríjiniwa libágari Jesúsu wádaangiñe. ¹² Ítara líña lubeíti, láu yaráfañu wamá lun ouweni lun wíchuguni ugánu jun luágu Wasálbaragüle, resíbi jumúti íbágari magúmchaditi.

¹³ Laríñajare David tídan Lerérun Búngiu. “Afiñetina, ligía nadímurejánbei”, ítara giñéti afiñetiwa luágu Búngiu láu méme ligáburi afiñeni le meja luágubei David. Ligía wapúrichijánbei luágu. ¹⁴ Lugúndun subúdi wamúti luágu Búngiu lan le ásaaragüdúbalin Jesúsu lídaangiñe ouweni, lásaaragüdúbalíwa lan giñe lúnya wabágaridun, úara lúma Jesúsu, ábame lanügüniwa úara júma ligíbugiñoun. ¹⁵ Luágu jáni fuleísei nasúfurirei sun cátei lun gayára lan jagíbedun ja ánjarubaña lun lareíni Búngiu joun, gíbe jamámuga giñe íchugutiña eteíngiruni lun luágu lareíni. Ítara lúba iñurúañu lan líri Búngiu.

¹⁶ Ligía máburujan lubeí warüna. Oúwedaina líña wágubu murúsun murúsun, wawáni, tedérebuguduña ságü wéyu. ¹⁷ Ni cáta le wasúfurirubei lídan íbágari le, lídan le wasáminarun luágu ouñwenbun ugúndani le lúnbei wibíjini yágüta siélu dánne le ñi wamá lúma Crístu lídan luweírigun. Maweírinti lidáani wasúfurirun woun ya ubouágu dan le wasáminarun

luágu lúntibei lan dan magúmuchaditi wagúndan siélu. ¹⁸ Marítaguntiwa sarágu luágu cátei lánina ubouú le, ladüga murúsuraü lan dan ladúrarun. Le uágubei wíchigei warítagun, luágu cátei lánina siélu, ladüga cátei ligía, lúnbei sun dan ladúrarun.

5

¹ Subúdi wamúti lubeíti luágu gayára lan woúnwen lubáragiñe lagíribudun Jesucrístu ubouúagun, gayáraati loúnwen wágubu quei teíguadun ában múna weíyaaru. Ánjein asúsereda, subúdi wamúti luágu aráanseeli lan Búngiu lun líchugun ában iséri úgubu woun lun wabágaridun láu, siélu, lun sun dan. Úgubume ligía, mámabei lánina ubouú quei ában múna adügütu láu újabu, ábanbei úgubu lánina siélu. ² Buchá wawágu láu úgubu le wawágubei guetó, buséntiwa jamúga tadáurawagún wawáni láu iséri wágubu le lánina siélu. ³ Láume iséri úgubu ligía wawágu, mítaranbádiwa quei uwáni to úati úgubu táu. ⁴ Sun awánja lan abágarida láu úgubu le wawágubei, darítiwa mégeiti luágu, sandígua wagía woúngua láu idíjeri. Mára jamúga wabúseeruña woúnwen lun weréderun quei uwáni úouga úgubu táu, le wabúseerubei, lun lasáansiragun wágubu le gagúmuchadibei furése furése lídoun wágubu le magúmuchadibei, moúnwenga wagía. ⁵ Búngiu aráanserubaliwa lun gabágari wamá le magúmuchaditi, áni rúlaali Sífiri Sándu woun queísi larúfudajan luágu ítara lúba lan.

⁶ Gúndaatiwa lubeíti súnwandan, láu sun subúdi wamá luágu sun lan awánjagua lan ubouúagu abágarida lídan wágubu, bougudiñadiwa lan tueí wában yágüta siélu, máma lan lúmañadiwa Wabúreme. ⁷ Ya ubouúagu, siñáti waríjini Crístu, gayáaarügüti wafíñerun luágu. ⁸ Gúndaatiwa láu furúmieguarügü cátei le gádaanbaliwa, láu sun jamúga jímeín wamáni lun wígiruni íbágari le ya ubouúagu lun woúdin agánawa lúma Wabúreme Jesucrístu siélu. ⁹ Ligía wáfaagunbei lun wadügüni lugúndan Wabúreme súnwandan, ya wagía yebe ubouúagu, yágüta wagía yebe siélu. ¹⁰ Lugúndun sun wagía, waráramuba ligíbugiñe Crístu lun werésibiruni cáda ában le lúnbei werésibiruni, según buíti o wuríbati lé meja wadügübei dán meja le ubouúagugidiwa.

Ugánu lánina darángilaiü

¹¹ Ligía, quei subúdi wabálin lanúfudewa lueí lagúseragüdün Wabúreme, áfaaguatiwa lun wafíñeragüdüniña sun gürígia. Subúdi láali Búngiu cátawa lan, áni agúrabatina lun giñe subúdi jumáni. ¹² Mára wadímurejañaya buídu wawouúgua, wíchuguña ában cháansi jun lun jasándiragun júngua gúndaañu wáu, lun gayára lan joúnabuniña arúfudajatiña jagánagua ja apántajabaña luágu lubuídun jarúfudagun joúngua bougudi jabíti, áni tídan janígi mabuíduntiña. ¹³ Ánjein weíri lubeí wesériwidun lun Búngiu darí lun waríjín camá lülüñein wáu, ladüga luweírin wínsiñejabu lun Búngiu lasúsereda. Ánjein genége lubálin luágu wesériwiduña lan lun Búngiu láu ában lidíli ichügü, ladüga luweírin wínsiñejabu jun wadügei. ¹⁴ Mósu nesériwidun lun Crístu táu sun nanígi lárigiñe larúfuduni luweírin línsiñejabu woun láu loúnwen lídan wafúlasun súngebei. Queísigubeirügü jamúga jilá jamá sun gürígia úara lúma dán meja le loúnwenbei. ¹⁵ Jiláti Crístu jawágu súngebei, lun sun lan ja ánjabaña lun jerésibiruni íbágari lídaangiñe, mámaali lámuga joun guánarügü jabágarida, lun jabágaridun lun Crístu le ouwebei jawágu, sará ligía lídaangiñe ouweni. ¹⁶ Ligía manügün

wabeí ni ában quei janügün lirájüñü ubou güri gia, según bougudi jabíti. Luágu méja ában dan, barú wamuti meja Crístu quei janügüni lirájüñü ubou, mítaranjaali guetó. ¹⁷ Le lubeíti lídaanbei ában lúma Crístu, ábanjali güri gia iséri, gumúja sun cátei le lánina binádu ligáburi, labágariduña ában iséri íbágarí lúma Crístu.

¹⁸ Adúga lumúti Búngiu sun cátei le. Gáganiguatiwa meja lúma ladúga wafígoun, ába louñajani Crístu lun lachíbuni wafígoun, gayára lámuga gamádagua wamá luma. Rúlumuti wadágimanu ligía woun lun waráandaragüdüniña sun güri gia lúma. ¹⁹ Le nariñagubei, láu louñwen Crístu lídan wafúlasun, arúfudati Búngiu ában úma woun lun gayára lan lagídarúniwa wadúnrun luágu wafígoun ligíbugiñe, gayára lámuga gamádagua wamá lúma. Oúnaja lumútiwa lun waríñaguni le joun sun güri gia. ²⁰ Wayábiña lubeíti queisi wügüriña ja louñajabaña Crístu, queísigubeirügü jamúga layúmuragun Búngiu guánarügü jun wádaangiñe. Ayúmuraguatiwa lubeíti jun lueígiñe loubadina Crístu. aráandara jumá lúma Búngiu. ²¹ Madügünti Crístu ni ában figou, rúlumuti Búngiu sun lidúnrun wafígoun luágun Crístu lun láu lan lídan wamá ában lúma, lun wachülürün abágaridei íbágarí lánina ísuruni le labúseerubei Búngiu lun wabágaridun.

6

¹ Wagía, queisi ñadágimeintiña úara lúma Búngiu, ayúmuraguatiwa jun lun jarúfuduni láu lubuídun jigáburi luágu máma lan luágu ni cáta jerésibirei lareíni Búngiu jun. ² Lariñajare Búngiu tídan Lerérun.

Nagáambubei bagúajan nun lídan nidáani lun fuleíseijabu nan joun güri gia, níderagubadibu lídan nuwéyuri lun nasálbarun güri gia.

Chülújali lidáani Búngiu lun fuleíseijabu lan joun güri gia, niján buri wéyu le luwéyuribeí Búngiu lun lasálbaruniña güri gia.

³ Áfaaguatiwa lun úaragua lan wagáburi lúma wapúrichijan, lueí jamúga jeréderúniwa güri gia lueí jagáambuniwa. Mabúseerúntiwa jamúga wanügün minébesei lun luwádigimari Búngiu láu wagáburi, ⁴ busénrügütiwa warúfuduni lídan sun cátei luágu esériwidutiña lan lun Búngiu wagía, láu luweírín wagúraasun lun wawánduni asúfuriruni, mégei, lúma lénreengúnga. ⁵ Beíjamaadíwa, dáüjamáwa, ínchajouátiña güri gia lun jeíbaajaniwa, jéreti wawádigimari lun Búngiu darí lun wasándirun ouñwenbun lubúcha uágu. Reídejadiwa marúmugunga, áfaaga wagía ílámaü. ⁶ Arúfuda wamúti giñe luágu esériwidutiña lan lun Búngiu wagía láu larúman wabágarí, láu lisúbudin linárün Búngiu woun, láu wagúraasun lúma wareíni, láu warúfuduni lubáfu Sífiri Sándu le wádaanbei, láu wínsiñejabu le tímatimaati, ⁷ láu wáni ugánu le lánina inárüni, lúma láu lubáfu Búngiu wádan. Yúsu wamúti lárumatena lubuídun íbágarí, dándu lun wóudin jabároun wáganiñu quei lun waráramuniña dan le jayábin wabároun. ⁸ Níjein dan íbíjatiwa inébesei, níjein dan anábawaguatiwa. Níjein dan adímurejouáti buídu wawágu, níjein dan adímurejouáti wuríbati. Níjein dan, ousera jamútiwa quei yéetiña, níjein dan quei wügüriña ja aríñagutiña inárüni. ⁹ Níjein dan, ousera jamútiwa quei íbídiñewatiña, níjein dan quei subúdiwatiña buídu, níjein dan, agúrabañu wáña lan wounwen, awánjagua wínwanlu, ígirati Búngiu lun wasúfurirun, lun wafúnrendeirun lídaangiñe, ¹⁰ mouñwentiwa lídaangiñe asúfuriruni ligía. Láu sun níjein lan cátei lun lírudaguagüdüniwa, níjein giñe ugúndani lúmagiñe Búngiu tídan wanígi. Láu sun gudéme wamá según ubou, aríñagatiwa joun güri gia luágu írisini inárüni le gayáraabei

jadáriruni lídan Jesucrístu, láu sun úa lan ni cáta wáma según jarítangun lánigu uboú, ibíja wamúti sun cátei lídaangiñe Crístu.

¹¹ Wadújeñu Coríntona, adímurejaadina jun láu furáangu, dará náaru nanígi jun le gumúti, le luweírín jínsiñe nun. ¹² Masáansiragúnti wínsiñejabu jun, láu sun afíñetina luágu sáansigua lan jínsiñejabu woun. ¹³ Ayúmuruagatina jun quei layúmurgun ában úguchili joun lirájüñü lun jínsiñejabu jumá woun le gumúti, queísi wínsiñejabu jun.

Aganoúati Búngiu wádan

¹⁴ Magámarida jumá gürígia ja mafíñetiña luágu Crístu, lugúndun janúgüba ában ibágarí le múaraanti. Mamádagwati ísuruni lúma wuríbani, siñátí giñe gamádagua lan larúgounga lúma lubúriga. ¹⁵ Siñátí níjein lan úarani lídan Crístu lúma Máfia, siñátí giñe lúaradun ában afíñeti luágu Crístu lúma ában le mafíñeti. ¹⁶ Siñátí gadúnama jamá sándu tídan lúban Búngiu, áni lúban Búngiu le wíwanbei wagía, quei laríñagun Búngiu guánarügü.

Naganoúba jagánagua, eíbuga áume jagánagua, áuba Jabúngiute, jagíame nánigu.

¹⁷ Ligía giñe laríñagunbei Wabúreme Búngiu.

Furíjuma jagánaguagiñe ja mafíñebaña nuágu, díse jumá jaweí, líña Jabúreme.

Mádaragua jumá júngua lídoun le wíyebei.

Ábame nerésibirunün,

¹⁸ ábame ában nan úguchili jun,

jugúyame nirájüñü, líña laríñagun Jabúreme, le Súnti Gabáfu.

7

¹ Ítara líña lubeíti, nidújeñu jínsiñetiña nun, niján buri dimúrei le líchugubei Búngiu woun. Ligía lúnti lubeí wachíbuni sun luwúyeri iwíyeni wawáriu, dándu lueí wágubu quei tueí wawáni. Áluaja wamá lun jarúma lan wémeri le gumúti lúma Búngiu, ladüga luweírín inébesei le wawágubei lun Búngiu.

Lasáansiragun jagáburí Coríntona

² ¡Rújuma ában ubáraü woun tídan janígi! Madügüngidiwa dáñu lun ni ában, maríbadagüdün wagía ni ában, mayéedagun. ³ Mára naríñaguñein le lun níchugun jidúnrun, lugúndun quei buga naríñaguni jun, tídaañadün nanígi, lídaañadiwa ában ínsiñejabúni le mébejati, lídan yebe ibágarí o lídan yebe ouweni. ⁴ Weírítí nafíñen lúma nugúndan jáu, labádinagua sun le nasúfurirubei, sandítina dügüdaguaü, áni buin níña giñe láu ugúndani, jueígiñe.

⁵ Lúmagiñe meja wachülürün Macedónioun, meméraagüngidiwa, darírügütiwa lénreengünga lídan sun fulásu geyéguá wáu, geyéguati wuríbu wáu, weírítí wadíjeridun juágu. ⁶ Ánjeinti Búngiu, le íchugubei gurásu joun ja magúraasunbaña, ába líchugun gurásu woun láu lachülürün Títo, ⁷ áni mámarügü láu lachülürün, lugúndun giñe gagúraasun lan juágu. Aríñagati woun luágu luweírín jabúseerun jaríjiniwa, abájüdagua ligía woun luágu írúni le juágubei luágu le asúseredubei lúma luágu luweírín jabúseerun lun jóúdin láu nerérun jun. Ábatima nagúndaarun láu líra.

⁸ Láu sun jírúgua jumá tadüga gárada to nabürüjaboun jun, maságüríjaantina luágu, guetó. Aságüríjatiná meja furúmiñe láu nasúbudiruni luágu jírúgua jumá tadüga gárada tugúya luágu murúsun

dan. ⁹ Guetó gúndaatina, máma ladüga jírudagun, ladüga sáansiguagüda láni írudaguni ligía jigáburi. Áfaga jumúti íruni ligía lídan ában igáburi le áubei lagúndaara Búngiu, ítara líña lubeíti madügüntiwa ni murúsun dáñu jun. ¹⁰ Lugúndun dan le wíchugun üma lun Búngiu lun layúsuruní íruni le wawágubei ladüga luríban wagáburi lun lasáansiraguni wagáburi, barü lumútiwa lídoun asálbaruni le magúmuchaditi, maríbaanti íruni ligía woun. Ánjein wanüga íruni ligía queísi janügüni lirájüñü ubou, magáragunga wagía lun Búngiu, lanügúbadiwa lídoun féridi lun sun dan. ¹¹ Awánda jumúti íruni queísi labúseeruni Búngiu, áni jaríja jumeíti le asúseredubei guetó lídaangiñe jawánduni íruni ligía! Tadüga gárada tugúya, ába jatátirun asáminara buídu cába lan jadüga láu wügüri le afígounjabei jagánagua. Arúfuda jumúti luágu magúndan jumá láu figou le ladügübei, áni gáñitün luágu busíganu le líchugubei jun, janúfudetün lueí jamuga jabeichúniwa lueigiñe. Ába jabúseerun jaríjinina lun nasúbudiruni jínsiñejabu nun. Weíriti jabúseerun lun jadügüni le richábei, lun jabeichuni le adügübalin figou, adüga jumáli sun le lúnbei jadügüni lun jaráanseruni cátei le. Madúnrunjadün guetó. ¹² Dan lubeíti le nabürjanbarun meja gárada tugúra jun, mámadügüya jamúga ladüga nasáminaruña lan sarágu luágu gürigia le adügübalin wuríbani, ni luágu le asúfurirubalin lueigiñe, nabürjanbarun lun geféen júma ligíbugiñe Búngiu luágu luweírín jínsiñejabu woun. ¹³ Ligía ragüguuadiwa lubeí woúngua.

Lánwoun sun gurásu le barü wamáalibei juágu, ouñwenbun wagúndan láu waríjini luágu gúnda lan Títo, íderagua jumáli sun jugúya lun lasándirun darángilau. ¹⁴ Adímurejatina bugája buíti juágu lun Títo, áni gúnfuli jumúti nererun juágu. Quei sun lan le aríñaga wamáalibei jun, inárüni, ítara líña giñe inárüni lan le waríñagubei lun Títo, luágu gunda wamá jáu. ¹⁵ Áni weírítimaati jínsiñe lun dan le larítangun luágu jadügüni sun jugúya le lamúriajabei júma, lúma luágu jerésibiruni láu ában inébesei lúma idíjeri lueí jamúga jemégeiruba lan lídan jagúnfulirun láu lerérun. ¹⁶ Gúndaatina láu gayára lan nafiñerun juágu le gumúti.

8

Wíchugun joun gudémetiña

¹ Guetó, nidújeñu, buséntina nabájüdagun jun luágu lareíni Búngiu joun tílana sun ligílisi buri to loubwaguboun Macedónia. ² Láu sun ában lan ouñwenbun ouchwaguni lun jafiñen lénreengúnga le jadárirubei, gúndaatiña buídu, áni láu sun gudéme jamá, rújaña lídan jíderawagún ja gudémebaña Jerusalén camá jamuga rísitiña. ³ Geféentina luágu rújamaali lan sun le jayáraabei láu sun tarúman janígi, ru jagía sügü láu lé yebe jayáraabei. ⁴ Ayúmuruatiña sarágu woun lun wígiruniña lun jíchuguni jafáran lídan jíderawagúniwa idújeñu lueigiñe Jesucristu. ⁵ Adügatiña sügü láu lé yebe wagúrabubei jadügün, furúmiñe, ába jedéregeragun jóungua le gumúti lun Wabúreme Jesucristu, lárigiñe ába jedéregeragun jóungua woun, queísi lugúndan Búngiu. ⁶ Weíriti jabúseerun jíchugun, darí lun wayúmuragun lun Títo lun lagíribudun júmoun lun gayáraabei lan lagúmuchaguagüdüni labúdajoñ seínsu lé meja lagúmeserubei jídan. ⁷ Jugúya ubáraubei lídan sun cátei—lídan jafiñen, lídan jisúbudin luágu Lerérun Búngiu lúma jubáfu lun jaráfudajani furáangu joun ámu, lídan jabúseerun jesériwidun lun Crístu,

lúma lídan ínsiñejabuni woun—lúnti lubeíti giñe ubáraü jumá lídan ídejani le.

⁸ Mára nariñaguñein le jun quei ában gumádi, busénrügütina jasúbudiruni jabúseeruni ja jíbiri jídejan, lun gayáraabei lan giñe jarúfuduni jínsiñejabu láu jíchugun táu sun janígi quei jagía. ⁹ Jarítagua jumá luágu lareíni Wabúreme Jesucristu woun. rísiti bugája dan le siélu lan, ába lagúdemedun láu liábin ubouágun ladüga línsiñejabu woun, lun gayáraabei lan wayábin lun warísidun lídaangiñe lugúdeme.

¹⁰ Luágu jáni fuleísei nariñagei narítangun jun luágu cátei le. Gumésetün buídu lídan irúmu le ásügürübei, mámarügü láu jatátirun abúdaja seínsu joun, adüga jumúti giñe táu sun janígi. ¹¹ Guetó lubeíti, ítara méme jumá darí jagúmuchuni abúdajani luágu, láu méme ugúndani lé meja juágubei lúmagiñe furúmiñeti, íchigeina según le júmati. ¹² Lugúndun ánjein íchiga ában gürígia sun le liyáraati según le lúmabei, láu sun lugúndan, gúndaati Búngiu láu, áni resíbi lumúti le líchugubei gürígia ligía, mamúriajan lumúti Búngiu le úati jáma gürígia.

¹³ Mára lun jáfagun mégei ladüga jíderagun ámu, ¹⁴ le busénwabei, lun ñi lan úarani jídan. Guetó, níjein júma lun jabuínchagüdüni le jemégeirubei ámu, lídaanme ámu dan, níjeinbei jáma lun jabuínchagüdüni le jemégeirubei. Ítara lúba ñi lan úarani, ¹⁵ quei tariñagun Lerérun Búngiu. “Le gíbebei úma, mígiragunti lúma, le míbebei úma, memégeirunti lun.”

Títo jáma líbirigu

¹⁶ Teínqui numúti Búngiu luágu líchuguni ayúmajani méme le líchugubei nídoun tídoun lanígi Títo lun líderagunün. ¹⁷ Gúndaati Títo lúnya lídin aríjaün quei namúriajani lúma, áni afíñetina luágu weíri lan labúseerun lúnya laríjinün darí jamúga lun lídin láu láni lúngua mariñagunga áu ni cáta lun.

¹⁸ Úara lúma Títo, wounajaña ában idújei le uágubei buídu lan jadímurejan tílana sun ligílisi, luágu lubuídun luwádigimari lun labúruchagun ugánu luágu Wasálbaragüle. ¹⁹ Áni mámarügü líra, anúdaja jamúti giñe tílana buri ligílisi idújei ligía lun ladügün weíyaasu wáma lun líderagun lídan loundarún seínsu le. Wadügüñein wadágimanu le, le lánina ídejani, lun wíchugun ugúndani lun Búngiu, lun giñe warúfuduni luágu busén jamá afíñetiña lun jíderaguniña jadújeñu ja gudémebaña. ²⁰ Waráanseruñein sun cátei lébei lun míchugun wamá lúgaaru lun ladímurejoún wuríba wawágu lueígiñe loundarun seínsu le wadügübei. ²¹ Wáfaaguña lun wadügüni sun cátei láu arúmani, mámarügü ligíbugiñe Wabúreme, jagíbugiñe giñe gürígia.

²² Wounajaña giñe ábanya jádaangiñe wadújeñu lúma Títo lúma le ában. Wügüri le, arúfuda lálalíbei luweírin labúseerun lesériwidun lun Crístu woun lídan sarágu luwúyeri, guetótima láu ouñwenbun afíñeni le luágubei luágu jíchuguba lan sarágu seínsu láu sun jugúndan. ²³ Le álügüdajati libügürü Títo, aríñaga jumá lun luágu nouba lan, luágu luwádigimariña lan núma lun wesériwidun jun. Ánjaña álügüdaja jabügürü bíama idújeñu lueígiñe Jesucristu ja lúmabaña, jariñagame joun luágu jóunajan lan tílana ligílisi buri, luágu jíñúrügüdüñein lan líri Crístu láu lubuídun jagáburi. ²⁴ Ítara líña lubeíti, resíbi jumáña láu ában ínsiñeni le tímatimaati lun gayáraabei lan jaríjini wügüriña jagía luágu inárüni lan lubuídun werérun juágu, áni lun giñe jasúbudirun sun jíbiri tílana buri ligílisi luágu ínsiñejabuni le juágubei jádaangiñe wügüriña jagía.

9

Loúndarún seínsu joun idújeñu ja gudémebaña

¹ Luágu loúndarún seínsu joun idújeñu lídan afiñeni, memégeirunwati lun nabürüjan jun, ² lugúndun subúdi náali lubuídun jugúndan lun jídejan. Súnwandan naríñagun joun loúbawaguna Macedónia láu ugúndani luágu jugúya lan Acáyana aráanseñu jíña lan lun jídejan lúmagiñe lídan irúmu le sügüjalibei, áni jíbe-ágei Macedóniana ragüjaña giñe dügüdaguaü láu jagáambun luágu luweírin jáfaagun luágu ídejani le. ³ Láu sun líra, noúnajaña idújeñu jun nubáragiñe lun jaráanseruni luágu labúdajoún seínsu, lun mámabei lan iyéeni, buíti le naríñagubei juágu libügürü cátei le, lun abúdajoúali lan sun seínsu lubáragiñe nachülürün jumóun, ⁴ ñüdüdügü jañeín jádaangiñe Macedóniana núma, jadáriraünme maráanserunga. Líchuguña jamúga líra busíganu woun, jüntima, lárigiñe rúwamaali lan sarágu wafiñen juágu. ⁵ Ligía narítangunbei namúriajan jáma idújeñu ja lun jóúdin bisídaün nubáragiñe, lun giñe jíderagunün abuínchagüdei seínsu le uágubei jariñaga jóúndarun. Ítara, aráanseñu lúba seínsu le jóúndarubei lun jarúfuduni jareíni, máma quei ában cátei le lúnti wafósurunün luágu.

⁶ Jarítagua jumá luágu cátei le. Le loúguati lábunagun, loúguabei giñe lalúbajan, le gíbete lábunagun, gíbebei giñe lalúbajan. ⁷ Cáda ában jídaangiñe, lúnti líchugun queísi ligáburí larítangun, máma láu magúndani ni ladüga aríñawagúya lan jun lun jíchugun, lugúndun jínsiñejabuti Búngiu lun le íchugubei láu ugúndani. ⁸ Gayáraati líchugun Búngiu sun luwúyeri abíniruni jun gíbe, lun ñi lan le jabúseerubei júma súnwandan lun jabágaridun, ñi ligíame giñe sarágu júma lun jídejan. ⁹ Tariñajare Lerérun Búngiu luágu gürígia le íchugubei sarágu.

Rújali sarágu joun gudémetiña,
áni reídeiti cátei buíti le ladügübei lun sun dan.

¹⁰ Búngiu, le íchugubalin ílaü lun lábunún, ában lalúbajagüdün sarágu lídaangiñe lun gayára lan weígin buídu, líchuguba giñe jun lun gayáraabei lan jedéweejan sarágu joun gudémetiña queísigubeirügü ílaü le ábunúbei. Ábame laweíridagüdüni Búngiu murúsun fuleíse le jadügübei joun, daríme lun jabíjin oúnwenbun abíniruni lúmagiñe Búngiu queísi ában oúnwenbun alúbajani. ¹¹ Jugúya, jibíjuba sarágu súnwandan lun gayáraabei lan jíchugun sarágu, áni dánme le jerésibiruni wadújeñu seínsu le lúnbei jóúnajani joun wáma, weírubei jateíngiruni Búngiu. ¹² Lugúndun láu wíchuguni íderawaguni le joun wadújeñu, máma wíchiga rügüñein seínsu le jemégeirun joun, wadügüña giñe lun jíchugun sarágu eteíngiruni lun Búngiu láu líra. ¹³ Jíchuguba uweíriguni lun Búngiu lugúndun arúfuda lumúti ídejani le joun luágu adüga jumáni le lubeíbei Crístu, jíchuguba giñe uweíriguni lun Búngiu luágu íderawaguni le jíchugubei joun lúma joun súngubei. ¹⁴ Ábame jayúmuragun lun Búngiu juágu láu sarágu ínsiñejabuni jun luágu luweírin lareíni Búngiu le larúfudubei jídaangiñe. ¹⁵ ¡Teínqui wáña lun Búngiu, luágu rújali lan ában oúnwenbun cátei woun le siña wabei adárira dimúrei le buídurügüti ubuídun lun wadímurejan luágu! Cátei ligía, Liraü.

10

Lubáfu Páblo queísi apóstolu

¹⁻² Aríñawagúati luágu gudémege nan dan le júma nan, ánjein lan dan le díse nan jueí, derégüda lan noúserun júma. Áu Páblo, ayúmuraguatina jun

láu ában ünabuni lúma ában areíni líbe le larúfudubei Crístu, lun mafósurun jubádina lan lun narúfuduni nubáfu láu nafáyeigüdünün luágu wuríbati le jadügübei, dánme le nachülürün júmoun. Sáansi jumei ligáburu jarítangun wawágu, jugúya le aríñagubei luágu lun lan waríjin cába lan waságara lídaangiñe wesériwidun lun Crístu. Ánjein madügün jumá, aráansetina lun nagágibudagun júma. ³ Inárüni luágu ubouáguna wamá láu sun jadébilin gürígia ubouáguna, máma queísi wügüríña lánina ubou le wawúribuja luágu wuríbani. ⁴ Máma ubouáguna áruma to áuboun wawúribuja, larúmate Búngiu wayúsuruboun lun tagünrinchagun érei. ⁵ Ítara líña lubeíti, láu lubáfu Búngiu güríngua wamúti sun arítangun le múaraanbei lúma linárün Búngiu, lúma sun cátei le abúseerúbei leréderuni lasúbudirúniwa Búngiu. Sun gíñe jasáminan gürígia ubouágu rúwamuti lábugiñoun lubáfu Crístu lun lúaraduba lan láu le lubeíbei. ⁶ Áni lárigiñe jíchaagun júngua le gumúti lábugiñoun lagúmadijan Crístu, aráanseñu wáña lun wasúfuriragüdüniña ja magáambadigiñabaña lun.

⁷ Barü jumuti cátei quei laríjiniwa bougudigiñe libíti. Aríñagatina jun luágu ánjein lan choúrúgua lubei ában gürígia lúngua luágu lánigu lan Crístu, lúnti gíñe lasúbudiruni luágu ítara méme líña lan lánigu wamá gíñe Crístu. ⁸ Fágua jarítangun luágu néredun murúsun luei le lubúdubu luágu nubáfu queísi láni Crístu apóstolu, úabei nibúsigari nan luágu líra, lugúndun Búngiu guánarü rúlaali ubáfu le nun lun nawáanseragüdünnün lídan cátei lánina Búngiu, máma lun nagünrinchaguni jafíñen, queísi jadügüni arúfudajatiña jagánagua guetó. ⁹ Mabúseerúntina lun jarítangun luágu náluguña lan nebélaagüdünnün anúfudei jídoun táu nigáradan. ¹⁰ Aríñagatiña náganiñu luágu abürüja nánun gárada queísi ában gürígia láuti sarágu ubáfu, áni derégudatí nege nerérun jun tídan, dan le júma nan, débilitíná nege, áni mínsifegu lán nege ligáburu nadímurejan. ¹¹ Furúmieguarügü le aríñagubalin cátei le, lúnti gíñe lasúbudiruni luágu ítara lan quei nubei láu dimúrei díse jueí, ítara núba lan gíñe dánme le júma nan.

¹² Míchaaguntiwa woúngua jámoun ja adímurejabaña buídu jawouúgua, mítaraantiwa quei jagía. Jagía, adügatiña ában libídiouniga áu láu jamísuraagun jóúngua láu guánarügü jamísuraagüle lúma láu jíchaagun jóúngua jámagua. ¹³ Wagía, mapántajaanbadiwa luágu wawádigimaridun lun Búngiu lídan ában fulásu le ñílumuti míchugun lan Búngiu úma woun lun wesériwidun lun ñi, queísi jadügüni arúfudajatiña jagánagua guetó. Búngiu arúfudubalin lébeja fulásu le lúnbei wawádigimarini lun, áni ligía áñarubei lun wachülürün júmoun ubúrúgun Corínto. ¹⁴ Ligía mídin wabeí sügü láu le labúseerubei Búngiu wadüga lídan le wáfaagun lun wíderagunün, ladüga wagía anügübalin ugánu luáguti Crístu jun furúmiñe. ¹⁵ Mapántajaanantiwa láu wadágimanu le jadügübei ámu, camá jamuga wadüga. Agúrabarügütiwa lun quei lan lagánwoundun jafíñen, gayáraabei lan wawádigimaritima jagánagua, súnwandan quei lugúndan Búngiu. ¹⁶ Lárigiñeme, jarítaguatiwa wadiseduntima lun wapúrichijani ugánu lánina asálbaruni lídan buri fulásu le díseti jueí, le nílumuti magáambungiña lan luágu Crístu, luei wapántajan luágu wadágimanu le jadügübei ámu, camá jamuga wadüga.

¹⁷ Le busénti ladímurejan luágu uweíríguni, ladímureja luágu luweírígün Crístu, máma luágu luweírígün guánarü. ¹⁸ Lugúndun gürígia le buídubei, máma le adímurejabei buídu luoúgua, le uágubei buídu lan ladímurejan

Wabúreme Crístu, ligía buídubei.

11

Páblo jáma yéetiña ja aríñagubaña luágu apóstolugu jamá

¹ ¡Buséntina jamúga lun jawánduni libídiouniga náu murúsun! Awánda jumá, ² lugúndun eméendütina jáu láu ában eméendüni le lúmagiñeti Crístu, lueí jamuga jígiruni Crístu. Áu asúbudiragüdúbalin Crístu jun, ába júaradun lúma, áni le nabúseerúbei, lun gayáraabei lan nedéregerunün lun quei ában irájü jarúmatu to amárieidutu lúma ábanrügü wügüri. ³ Ítara quei layéedunun Máfia Éva, janúfudetina lueí giñe jígiraguagüdün júngua lun jeyeedún lídan jarítangun, lueí jesériwidun lúnrügü Crístu táu sun tarúman janígi. ⁴ Nariñagubalin le, ladüga resíbi jumáaña ja ñübintiña adímureja iyéeni jun luágu Crístu, áni bulleiguatün lueí cátei inárüni le warúfudajabei jun. Resíbitün giñe ában espíritu láu ugúndani ámu lueí Sífiri Sándu le resíbi jumáalibei láu warúfudajan jun, resíbitün giñe ában ugánu lánina asálbaruni jámagiñe le ámu lueí ugánu lánina asálbaruni le agáamba jumáalibei wámagiñe. ⁵ ¡Affiñetina luágu múnabun nan sügü jáu súperapóstolugu ja jafálarubaña! ⁶ Fágua ibídiouguati láu ligáburi nadímurejan, mabídiounigati láu nisúbudin, áni arúfuda wamáali le jun súnwandan lídan sun le adüga wamáalibei.

⁷ ¿Ódi wuríbati nadüga napúrichijani ugánu lánina asálbaruni jun magúburajanga áu ni cáta, ünabudaguagüda núngua ítara lun niñúragunün lídaangiñe binádu jigáburi? ⁸ Barútina seínsu jámagiñe títana ámu buri ligílisi láu nerésibiruni le jafáyeirubei nun, lun nayúsurun esériwida jun magúburajanga naün. ⁹ Áni dan lé meja níjein lan nemégeirun dan le júma nubeí, merédetina quei ijürügu lun ni ában, idújeñu ja ñübinbaña Macedóniagiñe, jagía íchugubalin le nemégeirubei nun. Ítara líña náfaagun lun mámadadina lan ijürügu jun lídan ni cáta, áni ítara méme lúba nadüga. ¹⁰ Ítara quei chóuru náni luágu subúdi náni linárün Crístu, ítara líña giñe nasúbudiruni luágu manügübadina lan seínsu lúmagiñe ni ában lídan sun Acáya, lueí jamuga lagídarúniwa lébuna ugúndani le nuágubei, lun gayára lan nesériwidun jun magúburajanga. ¹¹ ¿Cásan uágu nadímureja ítara? ¿Ladüga funásan jimisiñe nun? Subúditi luweirin jínsiñe nun lun Búngiu.

¹² Nadüga mémebei le nadügübei lun míchugun nan lúgaaru joun arúfudajatiña jagía ja áluajabaña lun gayáraabei lan jariñagun luágu ítara méme líña lan jesériwidun jun queisi wagía. ¹³ Máma Crístu oúnajabaliña yéetiña jagía jagánaguouún láu sun jafámurun camá lánigu Crístu apóstolu jagía. ¹⁴ Áni máma cátei terénchati le, lugúndun Máfia guánarügü arúfudaguati lúngua quei ánjeli le íchugubalin larúgounga, ¹⁵ ligía giñéti jafámurubei ja esériwidubaña lun queisi güriúa ja adügütiña buíti. Wel, lachülürüba wéyu lun jerésibiruni le jadúnabei luágu wuríbani le jadügübei.

Lasúfurirun Páblo luágu lesériwidun lun Crístu queisi apóstolu

¹⁶ Nariñaguñaya jun. Úa la ni ában arítaguti luágu ladüga lan lülü lan náu nadímurejanbei jun ítara, ánjein jarítagua jubálin ítara, ígira jumána lun nadímurejan jun quei ában lülü táu, lun giñe gayára lan napántajan murúsun. ¹⁷ Dan le nadímurejan buíti nuougua, madímurejaantina láu ában ünabuni quei ligáburi ladímurejan Crístu, nadímurejan quei jadímurejan

ibídiouguatiña áu. ¹⁸ Queísi japántajan arúfudajatiña jagánagua láu buri cátei le lánina ubou le, napántajaba gíñe. ¹⁹ ¡Quei lanáremebei lichú jáu, awánda jumútiña lülü táu láu ugúndani! ²⁰ Lugúndun awánda jumútiña ja afósurubalün lun jeséridun joun, jáma gíñe ja aságarubalin le júmati, ja anügubalün jánime, ja oúserubalün quei ni cáta, ja agáyuajabaña jigíbuagun. ²¹ Láu sun nibúsigari nan lun naríñaguni, ¡weírítí buga wedébilin lun wadügüni cátei líra!

Ánjeinti le uágubei gayára lan janáangun joúngua, gayáraati gíñe nanáangun núngua luágu (nadímurejaña méme queísi ában lülü táu). ²² ¿Jarásan Hebréona jagía? Áu sun. ¿Linásiñuna Israél jagía? Áu sun. ¿Linébaanfaangu Abrahám jagía? Linébaanfan gíñe áu. ²³ ¿Eséridutiña lun Crístu jagía? Sügútimaatina jáu láu sun nadímurejaña lan queísi ában lülü táu dan le naríñaguni. Ñadágimeinjaadina sügü jáu, beíwaadina sügü jáu, dáúwaadina sügü jáu, sarágujali weíyaasu yaráfa nan lun nouñwen. ²⁴ Seíngüjali weíyaasu jabeíchunina juríu láu darándi-néfu beíti. ²⁵ Ūrúwa weíyaasu jíchaagun Rómána wéwe nuágu, ában weíyaasu jachüragun juríu dübü nuágu. Ūrúwa weíyaasu tabúluchun ugúnein to ídaanboun náfayaja náu, ában weíyaasu sügútina ában áriebu lúma ában wéyu anágü baránaja lárigiñe tabúluchun ugúnein náu. ²⁶ Aweíyasujaadina sarágu luágu luwádigimari Wabúreme, áni luágu buri weíyaasu ligía daríguaadina núngua lídan pelíguru dúnarugu, jádan jíwerutiña, jádan nupaísanu, lúma jádan teréncha. Daríguaadina núngua lídan pelíguru ubúruugu, áraabu, lúma baránaja, lúma lídan pelíguru jádan gürígia aríñagutiña luágu idújeñu jamá lueígiñe Jesucrístu, le jayéeni. ²⁷ Deréti nuwádigimaridun láu sarágu lénreengúnga, reídeijadina marúmugunga sarágu weíyaasu, súfurijadina ilámaü lúma mágürabu, ayúnaraadina gíbe, súfurijadina lidíliga lúma tilougua anáangun.

²⁸ Bougudi lueí buri cátei le lúma buri ámu cátei, ságü wéyu nasándiruni lijürü nidíjeri jawágu tílana sun ligílisi. ²⁹ Ánjein débili lubeí ában gürígia, sandítina camá jamuga áu débilibei. Ánjein áburuja ában gürígia lídoun figou, weírítí nigárigu luágu. ³⁰ Ánjein lúnti lubeí napántajan lun gayáraabei lan jerésibirunina queísi apóstolu, napántajaba láu buri cátei le, le arúfudubalin nidébilin. ³¹ Búngiu, le Lubúngiute áni Lúguchi Wabúreme Jesucrístu, le únbei lúnti lan líchugúniwa uweíríguni lun sun dan, subúdi lumúti luágu inárúni lan naríñagubei. ³² Dán meja le ubúruugu nubeí Damáscu, ába líchugun gumádimati le eséridubei lun urúei Aréetas oúnigrutiña luágu buri lubéneri fulásu ligía lun janügünina adáúra. ³³ Ába jaráriragüdünina numádagu lídan ában faníñe lídaangiñe ában funédere láni lubárierun ubúruugu, ítara líña neséfurun jájaburugugiñe náganiñu.

12

Labájüdagun Páblo luágu buri cátei le larúfudubei Jesucrístu lun

¹ Magáñeirunti gürígia ni cáta láu ladímurejan buídu luouúgua. Láu sun líra, nabájüdagua jun guetó luágu buri cátei lé meja larúfudubei Jesúsú nun. ² Catoúrusu irúmu guetó lueígiñe nanügüniwa lídoun lürüwan siélu, áu le afíñebei luágu Crístu. Ibídiñeti nun ánjein láu sun lubeí nügubu nídin, lúmoun máma lan láu, Búngiu asúbudirubalin. ³ Subúdi numúti luágu barüwa nan lídoun lürüwan siélu, le méme gíribei paraíso, ibídiñeti nun

ánjein láu sun lubei núgubu o máma lan láu sun núgubu, Búngiu rügüñein asúbudirei. ⁴ Ñi siélu, arúfudati Búngiu cátei nun lé buri uágubei siñá lan nadímurejan ni ca un ladüga arámudaguati buri cátei ligía luei jasúbudin gürígia. ⁵ Gayáraati jamúga napántajan luágu naríjini buri cátei líra, láu sun líra, siñáti napántajan nuóúgua, nadímurejanrügü luágu luweírin mabáfu nan nurúmawagua. ⁶ Láu sun ánjana lan jamúga busén nadímurejan buídu nuóúgua, máma jamúga libídiouniga áu líra, lugúndun inárüni lan jamúga le naríñagubei luágu le asúseredubei nun. Madügün nubei lun úa lan ni ában anügütina weíri sügü láu laríjinina o sügü lan láu le lagáambubei naríñagun.

⁷ Buídu buríti bugája cátei lé buri larúfudubei Búngiu nun siélu darí jamúga lun gayára lan napántajan luágu. Lun mámabei lan lúba, ába líchugun ában sándi nuágu camá jamuga ában jíyu charúñu nuágu, liábin quei ában lumégen Máfia lun lasúfuriragüdünina. ⁸ Ürüwaali weíyaasu namúriajan lúma Nabúreme Crístu lun lagídaruni sándi ligía nuei, ⁹ laríñaga Nabúreme nun. “Anájein búma láu nínsiñejabu, áni buídurügüti líra lun bawánduni sun asúfuriruni, buítimaati laríjín nubáfu jawágu gürígia dan le débili jamá.” Gúndaatina lubeíti láu nidébilin, lun larúfuduni Crístu lubáfu nuágu. ¹⁰ Ligía nagúndaarünbei láu débili, anabúni, mégei, eíbaaóuni, lúma buri lénreengúnga le nasúfurirubei luágu nesériwidun lun Crístu, lugúndun dántima le débili nan, weírítimaabei nasándiruni lubáfu Crístu nuágu.

Lidíjeri Páblo jawágu títana ligílisi Coríntona

¹¹ Ábanjadina lülü táu láu nadímurejan buíti nuóúgua, áni jugúya adügagüdúbalin nun, lugúndun jugúya yebe lúnbei jadímurejan buídu nuágu, máma áu. Múnabuntina sügü jáu súper-apóstolugu ja jafálarubaña, láu sun ni cáta nan. ¹² Lídan wadágimanu le nadügübei láu sarágu gurásu jagánagua, arúfudúati láu seíni lúma miláguru weíríti le nadügübei luágu ában lan apóstolu tímatimaati áu. ¹³ Mouserun numútün ünabu jawei títana tíbiri ligílisi, ánjein gubeírügü láu lubei meréde nan quei ában ijürügu jun. ¡Ferúduna jumána luágu líra!

¹⁴ Guetó aráanseeraga lun nídin bisídaün lürüwan weíyaasu, áni mámabadina ában ijürügu jun. Máma náluguñein le júmabei, jugúya nálugubei lun jedéregeragun júngua le gumúti lun Crístu. Ítara jíña nun queísi isáanigu, áni agübürigu lúnbaña jóundarun seínsu jabá jasaanigu, máma isáanigu jabá agübürigu. ¹⁵ Nagástarubei le númabei láu ugúndani juágu, daríme lun nichaagun núngua le gumúti luágu jufúleisein lun gayáraabei lan jeíbugun buídu lúma Crístu, láu sun genége láni luágu dántima lan le jínsiñe jumá nun, mínsiñetimaatina jun.

¹⁶ Añájein, láu sun subúdi jamáni luágu meréde nan quei ában ijürügu jun, aríñagatiña luágu barú nan seínsu júmagiñe lídan ámu luwúyeri láu íbbuni. ¹⁷ ¿Ayéeda numútün funági láu ában jádaangiñe gürígia ja noúnajabaña jun lun lanügüni seínsu júmagiñe nubá? ¹⁸ Amúriajatina lúma Títo lun lídin bisídaün, oúnaja áu ában idújei lúma. ¿Yéegua lumútün funági Títo? ¿Ma ában láu wóuserun wagía biángubei, áni ában méme Sífiri Sándu abúgurubalíwa?

¹⁹ Fágua jarítaguatün luágu weséfuraguña lan woúngua jigíbugiñe, máma líña. Lubáragiñe líra, wadímurejaña ligíbugiñe Búngiu queísi lánigu Crístu. Sun le aríñaga wamáalíbei, waríñaguñein lúnrügü jawáanserun lídan jeíbugun lúma Búngiu, nidújeñu jínsiñetiña nun. ²⁰ Nidíjeritina luei dan lánme nídin aríjaün, fágua madárirun nubádün agáburida queísi nabúseerun

jamúga nadárirunün, ábame magúndaanbadün lan láu ébechuni le lúnbei níchuguni juágu. Nidíjeritina lueí nadárirunün ageíndagua, láu gimúgaü, lúma igáñi tídan janígi, láu jáfaagun lun jawáanserun láu júnabudagüdúniña jidújeñu lueígiñe Jesucrístu, láu marásualugu, agúseragüdúña jidújeñu, láu pántaü, lúma lídan chagáguä. ²¹ Nidíjeritina lueí lídan lánme nídinya bisídaün, lanügagüdünina Nubúngiute busíganu jáu, lueí gíñe nayájun jawágu sarágu jídaangiñe ja afígounjañabaña lúmagiñe binárü áni mígirun jamágili iwíyei, salúfuri, lúma buri ámu luwúyeri wuríbani.

13

Ewéridijani lúma lagúmujoún buri mábugaü

¹ Nijánme lürüwan weíyaasu nídín bisídaün. Dánme le nachülürün júmoun, lagúseragüdúwaba cáda ában le gadúnrunti ánjein añájein lubéi biáma o úrúwa geféentiña luágu lidúnrun. ² Luágu meja libíaman nuweíyasun júmoun, wéridi numútiña meja ja adáagubaña wuríbani lun jasáansiraguni jagáburí. Láu sun díse nan jueí guetó, naríñaguñaya joun sun ja asígirubaña adáagua wuríbani, luágu dánme lan nídín bisídaün lürüwan weíyaasu, nasúfuriragüdúbaña lan láu ában érei weírítí. ³ Narúfudubeiti jun luágu adímureja lan Crístu nídaangiñe. Áni medébilinti Crístu lídan ligáburí louuserunün, arúfudarügü lumúti luweírín lubáfu jagánagua. ⁴ Inárüni luágu jílá lan luágu gurúwa queísi débiliti, ába labágaridun láu lubáfu Búngiu. Débilitiwa gíñe queísi ligía dán meja le laganounbei ya ubouágu, áni queí sará lan Crístu lídaangiñe ouweni láu sun lubáfu Búngiu luágu, wachülürüba júmoun láu sun lubáfu Búngiu wawágu ladüga lídaañadiwa lan ában lúma Crístu.

⁵ Jouchagua jumá júngua lun jaríjini ánjein lánigu jubeí Crístu le tímátimaati, jouchagua jumá júngua, mouchagua jumána. ¿Ibídíñeti jun luágu níjein lan Crístu jídan ánjein afíñe jubeí le tímátimaati luágu? ⁶ Agúrabatina jasúbudiruni luágu afíñe wamá luágu Crístu le tímátimaati, áni níjein lan agánawa wádan láu sun lubáfu, ⁷ ladüga mabúseerun wamá warúfuduni wabáfu queí apóstolugu láu wasúfuriragüdünün luágu luríban jigáburí. Busénrügütiwa lun buídu lan jeíbugun lúma Búngiu láu sun jamúga ígirúa wamá marúfudunga wabáfu queí apóstolugu. ⁸ Dan rügüñein múaran lan lagáburidun gürígia lúma linárün Búngiu, labúseerúa larúfudúniwa nubáfu queísi apóstolu lun nasúfuriragüdúni gürígia luágu lífígoun, dan le buídu lan jóudin lúma Búngiu, mabúseerúnwati narúfuduni nubáfu láu abeíchuni. ⁹ Gúndaatina lun naganoun queí mabáfuti ánjein buídu lubéi jigáburí, áni wayúmuraguamémeba lun jíábin lun jabuídurun le gumúti. ¹⁰ Nabürüjañoun gárada to jun lubáragiñe nídín aríjaün, lun gayáraabei lan jasáansiruni jigáburí lubáragiñe nachülürün júmoun, lun memégeirúniwa lan narúfuduni nubáfu juágu queí apóstolu láu nasúfuriragüdünün. Lugúndun rúlumuti Búngiu ubáfu nun queísi apóstolu lun nawáanseragüdünün lídan jeíbugun lúma, máma lun neréderunün lueí.

¹¹ Guetóti, nidújeñu, buídulá lídin jun. Áluga jumá lun jabuídurun le gumúti lídan jigáburí, ragújuma dügüdaguaü, abágarida jumá lídan úarani lúma darángiláü. Ítara lúba júmabei lan Búngiu láu lidárangilan lúma línsiñejabu. ¹² Chúgua jumá júngua lídan líri Wabúreme lun jarúfuduni luágu lídaañadiwa lan ában wámagua. ¹³ Mábuga jáña sun wadújeñu lídan afíñeni jun.

¹⁴ Resíbi jumeí labíniragüle Jesúsu, lúma línsiñejabu Búngiu, sandí jumeíme Sífiri Sándu júmagua. Ítaralá.

LIGÁRADAN PÁBLO JOUN GALÁCIANA

Labürüjan Páblo joun títana liglísi buri to Galáciaboun

¹ Anája áu Páblo, le lání Jesucrístu apóstolu. Máma gürígia anúadirubalina lun apóstolu nan, máma gíñe gürígia oúnajabalina apúrichija luágu, Jesucrístu guánarügü lúma Wáguchi Búngiu le ásaaragüdúbalin lídaangiñe ouweni, jagía oúnajabalina quei apóstolu. ² Áu jáma sun wadújeñu lueígiñe Jesucrístu ja númabaña ya, wabürüjañoun gárada to jun, jugúya le títana sun liglísi to Galáciaboun. ³ Binílaün Wáguchi Búngiu lúma Wabúreme Jesucrístu, íbija jumá gíñe darángilaü jámangiñe. ⁴ Rulumuti Jesúsu libágari wawágu lun lachíbuni wafígoun, gayára lámuga wasálbarun lídaangiñe lubáfu wuríbani le lánina uboué le, queísi labúseeruni Búngiu. ⁵ ¡Uweírighuni lun Búngiu lun súnwandan! Ítaralá.

Ában rügüñein luwúyeri ligáburi wasálbarun

⁶ ¡Weíríti nanígi láu lufúresen jígiruni Búngiu le agúarubei jun lun lánigu jumá luágu le ladügübei Crístu juágu, láu luweírín línsiñejabu! Furéseti jasáansiruni jafíñerun afálara ámu arúfudajani lún nege jadáriruni jasálbarun lídaangiñe, ⁷ iyéeni arúfudajani ligía. Chülújaña wügüriña jagánaguouñ, ja buséntiña jañáwurijani jarítangun lun jafálarun ában úma le maríchatí—ámu lueí jafíñerunrügü luágu Jesucrístu lun jasálbarun. ⁸ Wel, furúmieguarügü gürígia le ñübinbei adímureja jun luágu ámu luwúyeri asálbaruni lueí le arúfudaja wamáalibeí jun, cáteñein lan gürígia ligía, ¡reídeílá lábugiñe líñaragun Búngiu lun sun dan, áu yebe, ában yebe ánjeli siélugiñe! ⁹ Aríñaga náali meja áni nariñagayaali guetó. Ánjein ñübin ában gürígia arúfudaja ámu luwúyeri ligáburi asálbaruni lídaangiñe figou jun lueí le resíbi jumáalibeí, ¡reídeílá lábugiñe líñaragun Búngiu!

¹⁰ Dan le nariñaguni le, ¿náluguña neréderun buídu jagíbugiñe gürígia, ódi neréderun buídu ligíbugiñe Búngiu? ¿Buséntina funági neréderun buídu jagíbugiñe gürígia? Lun jamúga ligía lan nabúseerúbei, mámaadina jamúga ában esériwiduti lun Crístu.

Ligáburi lachülürün Páblo lun ábanbei lan lání Jesúsu apóstolu

¹¹ Buséntina jasúbudiruni, nidújeñu, luágu ugánu lan le luáguti asálbaruni le uágubei nadímureja, máma jádaangiñe gürígia liábin, ¹² máma lúmangiñe ni ában gürígia nibíjei, máma gíñe larúfudajan ni ában gürígia nun, Jesucrístu guánarügü asúbudiragüdúbalin nun.

¹³ Agáamba jumáali ida líña lán meja nigáburi dán meja le gúnfuligidina lúma Búngiu láu luwúyeri jagúnfulirun juríu, subúdi jumáali ida líña lán meja lanárime neíbaajaniña títana lílígílisin Búngiu, áfaagua áu lun nagúmuchaguagüdüniña. ¹⁴ Lídan ligáburi jagúnfulirun juríu lúma Búngiu, furésetina meja sügü jáu sarágu jádaangiñe nupaísanun ja madíseguati jagüriajouñ núma, ladüga derégüdatimáatina meja lídan nagúnfulirun láu jagáburi binádu nagübürigu. ¹⁵ Ánjeinti Búngiu, anúadira láadina méja lubáragiñe nagüriajouñ lun nesériwidun lun, ába lagúarun nun luágu luweírín línsiñejabu lun lánibadina lan. ¹⁶ Lídan lidáani, ligía lugúndaanbei Búngiu lun lasúbudiragüdüni Liraü nun lun gayáraabei lan napúrichijani lubuidun ugánu joun ja mámabaña juríu luágu ligía lan Wasálbaragülebei.

Lárigiñe nasúbudiruni Jesucrístu, mídintina álügüdaja ni ca úma, ¹⁷ mídin áu Jerusalén aríjaña ja apóstolubaña nubáragiñe, lubáragiñe líra, ába nídin furése loúbawagun Arábia. Lárigiñe, ábaya nagíríbudun ubúrugun Damáscu.

¹⁸ Darí úruwa irúmu lárigiñe, ligía nídin Jerusalén, ligíati nasúbudiruni Pédro, ába neréderagun queínsi wéyu lúma. ¹⁹ Maríjintina ámu jádaangiñe apóstolugu lueídügüya Jacóbo, le lamúlen Wabúreme Jesúsu. ²⁰ Ninárün jáu ligíbugiñe Búngiu luágu inárüni lan le nabürüjabei jun.

²¹ Lárigiñe líra, ába nídin loúbawagun Síria lúma Cilícia. ²² Ja wadújeñu lueígiñe Crístu ja tídaanbaña lilígílisin Crístu to loúbawaguboun Judéa, maríjin jamágidiná meja lídan dan ligía, ²³ agáambarügütiña laríñawagún. “Wügüri lé meja eíbaajabaliwa, lapúrichijañein ugánu le lánina afiñeni luágu Crístu queísi Wasálbaragüle guetó, áni ligía lé meja busénbei lagünrinchaguni wafiñen luágu Crístu.” ²⁴ Ába jíchugun uweíríguni lun Búngiu luágu lasáansiraguni nigáburi ítara.

Resíbi jamúti jíbiri apóstolugu Páblo

2

¹ Catoúrusu irúmu lárigiñe, ábaya nídin Jerusalén úara lúma Bernabé, barú numuti giñe Títo númagua. ² Nídinbei ñi ladüga arúfuda láali lan Búngiu nun luágu lúnti lan nídin. Ñi Jerusalén, ába nadámuridagun jáma ábutigu afíñetiña, ába nabájüdaguni joun ída líña lan narúfudajan joun ja mámabaña juríu luágu wasálbarun, nadügünbalin líra lun gayára lan jánjarun lun le narúfudajabei, lueí leréderun le adüga náalibei lúma le nadügübei quei ni cáta. ³ Resíbi jamúti, áni ni Títo, le nouíbabei, mafósurun jamúti lun lerésibirun circuncisión, láu sun máma lan juríu. ⁴ Inárüni luágu añájein lan eyéejatiña luágu idújeñu jamá lueígiñe Jesucrístu, ádaragutiña jóungua wagánaguóun arámudaguarügü, buséntiña lun líchugúniwa gumádi luágu lúnti lan lerésibiruni Títo circuncisión ánjein busén lubei lun láni lan Búngiu. Belútiña yéetiña jagía quei aríaaajatiña lun jaríjini ída líña lan wagáburi bougudi lueí lilúrudun Moisés lídan woúndaragun lúma Jesucrístu, buséntiña jamúga lúnya wayábin lun idámunime lun lúru luágu. ⁵ Mígiraguagüdüntiwa woúngua joun ladüga busén wamá lun ñi méme lan inárüni le lánina ugánu luáguti asálbaruni júma, jugúya le mámabei juríu, meméterunga ámu buri cátei lánwoun le lúnbei jadügüni lun jasálbarun lueídügüya lun jafíñerun luágu Jesucrístu.

⁶ Ja asúbudirúabaña queísi ábutigu—láu sun, mebérese nan láu cátañañanu lan ladüga magúseragüdünti Búngiu luágu cátei le genégerügüti—míchuguntiña ábutigu jagía ni ában iséri luwúyeri arúfudajani nun lun níchuguni jun lánwoun le napúrichijabei. ⁷ Lubáragiñe líra, ábarüga jasúbudiruni luágu Búngiu lan íchugubalin wadágimanu le lánina lapúrichijoún ugánu luáguti asálbaruni joun ja mámabaña juríu nun, ítara queí buga líchuguni wadágimanu lun Pédro lun lapúrichijani ugánu méme ligía joun juríu. ⁸ Aríja jamáli luágu le méme lan Búngiu le ñadágimeinbei lídaangiñe Pédro quei apóstolu jádan juríu, ligía méme lan giñe ñadágimeinbei nídaangiñe quei apóstolu jádan ja mámabaña juríu.

⁹ Queísi subúdi jamáni Jacóbo, Pédro lúma Juan, ja anügübaña quei weírígutimaatiña, luágu Búngiu lan fuleíseibalina lun líchuguni ubáfu le nun, ába jíchuguni jájabu woun, áu lúma Bernabé, quei jánigu lídan luwádigimari Crístu, luágu giñe gúnda jamá lun woúdin ñadágimein lídan

jageíra ja mámabaña juríu, sun añája lan jagía ñadágimein lídan jageíra juríu. ¹⁰ Amúriajarügütiña wáma lun warítagn jawágu gudémetiña, áni nijánti cátei le nouchubei nadügün láu sarágu goúnigi.

Ladeínjan Páblo lun Pédro ubúruqu Antioquía

¹¹ Dan le lídinbei Pédro ubúruqu Antioquía, ába nadeínjan lun ligíbuagn, lugúndun mabuídun lan le ladügübei. ¹² Furúmiñe meja, jóuti meja jáma afiñetiña luágu Crístu ja mámabaña juríu (ja mebéresenbaña láu circuncisión lúma buri ámu gumádi lídan lilúrudun Moisés). Ánjeinti lárigiñe jachúlürün gürígia louñajan Jacóbo, ligía lagúmeserun Pédro adíseda jawei ja mámabaña juríu, ába meíginjali lan jáma ladüga lanúfude luei le gayáraabei jariñagn ja afiñebaña luágu lúnti lan jerésibiruni wügüriña circuncisión lun jasálbarun, lun giñe meígin jamá juríu lídan ában jáma ja mámabaña juríu. ¹³ Játi jíbiri juríu ja afiñebaña luágu Crístu, ába júaradun lúma Pédro lídan cátei mabuídunti le ladügübei, ába giñe lúaradun Bernabé jáma lídan cátei ligía. ¹⁴ Dan le naríjinbei luágu meíbuagn jamá úara lúma inárüni le larúfudajabei ugánu luáguti asálbaruni (luágu man lan asálbaruni ni cátei lúma lilúrudun Moisés), ába nariñagn lun Pédro ligíbugiñe sun adámurini. “Amürü le juríu, berédera abágarida quei ja mámabaña juríu, mabágariduntibu quei juríu. ¿ída liñáti babúseerúnbei bafósuruniña ja mámabaña juríu lun jabágaridun quei juríu?”

Sálbawatiña juríu, queísigubeirügü sun gürígia, luágurügü jafiñen luágu Jesucrístu

¹⁵ Ába nasígirun aríñaga joun.

—Juríu wagía lúmagiñe wagüriajóun, aríñagatiwa luágu mafígoun wamá, luágu mítaran wamá quei ja mámabaña juríu ja agüriajóubaña bougudi luei lilúrudun Búngiu. ¹⁶ Láu sun líra, subúdi wamúti luágu úabei lan ni ában eréderuti richágu ligíbugiñe Búngiu luágu ladügüni le lubeíbei lilúrudun Moisés, láurügübei lafiñerun luágu Jesucrístu lerédera richágu ligíbugiñe Búngiu. Ligía giñe lébubei wafiñerun luágu Jesucrístu, wagía le juríubei, lun gayáraabei lan weréderun richágu ligíbugiñe Búngiu lídaangiñe afiñeni le, máma lídaangiñe wadügüni le lubeíbei lilúrudun Moisés, lugúndun úabei ni ában eréderuti richágu ligíbugiñe Búngiu lueigiñe ladügüni le lubeíbei lilúrudun Moisés.

¹⁷ Ítara líña lubeíti, quei wáluajan weréderun richágu ligíbugiñe Búngiu lídaangiñerügü Jesucrístu, ába waríjin luágu gafígoun méme wamá queisi ja mámabaña juríu ladüga wabágariduña lan giñe guetó bougudi luei lilúrudun Moisés, ¿gayáraati wariñagn lueigiñe líra luágu Crístu lan gaffigoungüdübaliwa? ¡Ni cátei líbe líra! ¹⁸ Lubáragiñe líra, lun jamúga wagíribudun lun weménigidun luágu wagúnfulirun lúma lilúrudun Moisés lun wasálbarun lárigiñe weménigidun luágurügü wafiñerun luágu Crístu, warúfuduñein luágu magúnfulirun wamá lúma linárün laníchigu lúru luágu ligía, áni gaffigountiwa. ¹⁹ Áu, queígubeirügü jiláadina lan lun lilúrudun Moisés, lúru méme ligía ouwedagüdübadina lun, lun gayára lan nabágaridun lun Búngiu. ²⁰ Rúguatina nungua quei jiláadina lun figou, dáwaguañu luágu gurúwa lúma Crístu. Mámaadina lubeíti áu méme abágaridubei nídaangua, Crístu abágaridubei nídan. Ibágarí le nabágaridubei lídan núbubu, nabágariduñein láu sun nafiñen luágu Líraü Búngiu le jinsíñejabúbei nun, ába ledéregeragn lúngua lun louñwen nuágu. ²¹ Mabúseerúntina lubeí namájarun lun lareíni Búngiu láu nagíribudun

lún buri igáburi lánina lilúrudun Moisés, lugúndun lun jamúga gayára lan leréderun gürígia richágu ligíbugiñe Búngiu láu lagúnfulirun lúma lúrudu ligía, úati jamúga ju lan loúnwen Crístu.

Lúrudu ódi afñeni

3

¹ ¡Jugúya Galáciana, magáambaditün gíñe! ¿Ca abíñaragubadün lun magáambun jubeí lan ugánu le inárünibei libügürü wasálbarun? Lídan meja wapúrichijan jun, arúfuda wamúti laníchigu loúnwen Crístu luágu lugúruwan jun, furáangu. ² Aríñaga jumeí cátei le nun. ¿Lueígiñe jagúnfulirun lúma lilúrudun Moisés jerésibirei Sífiri Sándu ódi lueígiñe jafñerun luágu le jagáambubei luágu Crístu? ³ ¿Ída líña ítara lubeí jumágaambadi? Gumésetün eibuga lúma Crístu láu lubáfu Sífiri Sándu, ¿guetó jarítaguatün funágu luágu buítimaabei lan jeíbugun lun jígiruni Sífiri Sándu lun jagúnfulirun lúma jagáburi juríu? ⁴ ¿Marúfudajaangili sun le jasúfurirubei jun? ¡Arúfudajaali lámuga jun! ⁵ Dan le líchuguni Búngiu láni Espírítu jun, adúga ligía miláguru jagánagua, ¿cásan uágu ladúgei líra? Máma lugúndun adúga jumáni le lubeíbei lilúrudun Moisés ladúgei, ladügünbalin lugúndun afñe jumá luágu le jagáambubei luágu Liraü.

⁶ Jarítagua jumá luágu Abrahám. Rúlumuti meja sun lafñen luágu Búngiu, luágu lafñen, ába lerésibiruni Búngiu queísi ában wügüri richáguati. ⁷ Ligía lubeíti jugúya, lúnti jasúbudiruni luágu ja lan afñebaña, jagía lan linébaanfaanbaña Abrahám tímatimaatiña. ⁸ Queísi subúdi láni Búngiu lubáramegiwa luágu ñíbaña lan jádaangiñe ja mámabaña juríu lun jayábiba lan lun jeréderun richágu ligíbugiñe láu jafñerun luágu Jesucrístu, ába lariñaguni ugánu buíti lun Abrahám lubáramegiwa, queísi bürüwañu lan tídan lilíburun. “Jabínirúaba sun gürígia ubouágu bídaangiñe.” ⁹ Ítara líña lubeíti, ja afñebaña, biníwatiña úara lúma Abrahám le afñerubei luágu Búngiu.

¹⁰ Ja afñerubaña luágu jasálbaruba lan láu jagúnfulirun lúma lilúrudun Moisés, buléiguatiña, lábugiñeñanu líñaragun Búngiu, lugúndun tariñajare Lerérun Búngiu. “Sun ja magúnfulirunbalin sun le bürüwañubei tídan lilíburun nilúrudun le níchugubei lídaangiñe Moisés, lábugiñeñanu níñaragun.” ¹¹ Furánguti lubeíti luágu úa lan ni ában eréderuti richágu ligíbugiñe Búngiu luágu ladügüni le lariñagubei lilúrudun Moisés, lugúndun tariñajare Lerérun Búngiu. “Láu lafñerun gürígia luágu Búngiu lerédera richágu ligíbugiñe, ibíjaleíme ibágari magúmuchaditi.” ¹² Ánjein lilúrudun Moisés máma cátei lánina afñeni, lánina cátei le adügüwarügüti ladúga lariñajare lúrudu ligía. “Láu rügüñein jamúga lagúnfulirun gürígia láu sun igáburi lánina lúrudu le, libíjei ibágari magúmuchaditi.”

¹³ Wagía queísi gürígia garaüwarügütiña, mabáfutiwa lun wagúnfuliruni sun lúrudu ligía. Ába laséfuruniwa Crístu lídaangiñe líñaragun Búngiu lé lúnbei yebe láburujan wawágun lueígiñe magúnfulirun wamáni sun lilúrudun Búngiu le líchugubei woun lídaangiñe Moisés. Barú lumuti Crístu líñaragun Búngiu luouágu wewéñagua lídan le loúnwenbei luágu gurúwa, lugúndun tariñajare Lerérun Búngiu. “Íñarawagúati sun le ádarawagúti luágu gurúwa.” ¹⁴ Adúga lumúti loúnwen Crístu lun liábinba lan abíniruni le uágubei lariñaga Búngiu lun Abrahám, lídaangiñe Jesucrístu joun gíñe ja

mámabaña juríu, lúma lun werésibiruni, sun wagía, Sífiri Sándu le uágubei laríñaga Búngiu, láu wafíñen.

Lilúrudun Moisés, lúma lerérun Búngiu lun Abrahám

¹⁵ Nidújeñu, níchiga ában jémpulu jun lídaangiñeti jabágari gürígia. Dan le ladügün wügüri ában darádu, ába laseíniruni, úati ni ában lun gayára lan lagúluuduni ni lun líchugun ni cátei lánwoun. ¹⁶ Ítara líña gíñe, rúlumuti meja Búngiu lerérun lun Abrahám lúma lun linébaanfan. Mariñaguntu Lerérun Búngiu “binébaanfaangu”, camá jamuga jawáguti sarágu gürígia, tariñajare “lun binébaanfan”. Lanichigu líra, “ábanrügü gürígia”, le Cristu. ¹⁷ Niján le naríñagubei. Adügati Búngiu ában darádu lúma Abrahám, ába lachoúruruni, gádürü-san darándi irúmu lárigiñe, ába líchuguni lilúrudun lun Moisés lun lafúnraanguagüdüni joun gürígia. Ligía darádu lubei lé meja ladügübei Búngiu lúma Abrahám siñáti lagúluudúniwa láu ában lúrudu le ñübinbei gádürü-san darándi irúmu lárigiñe, lun lígiruni lerérun Búngiu lun Abrahám mebégiga. ¹⁸ Lun jamúga lídaangiñeti lan agúnfuliruni lúma lilúrudun Moisés cátei le líchugubei Búngiu, mámaali jamúga ában cátei le líchugubei lun lagúnfulirún láu lerérun. Ánjeinti le laríñagubei Búngiu lun Abrahám, luágu líchugubei lan lun, míni lan líra, libíjibeí cátei ligía madügünga ni cátei lun lagáñeiruni.

¹⁹ ¿Cáti un ju lan lilúrudun Moisés ánjein siñá lubei lasálbaruniwa? Ñübinti lúrudu ligía sarágu irúmu lárigiñe lídarádun Búngiu lúma Abrahám lun larúfuduni jafígoun gürígia joun, lúntirügü ladúrarun darí liábin linébaanfan Abrahám, le Cristu, le gíñe úmabeí ladügüwa darádu ligía. Rúlumuti Búngiu lilúrudun joun ánjeligu lun jíchuguni lun Moisés, liábin Moisés, ába lafúnraanguagüdüni lúrudu ligía joun gürígia. ²⁰ Ánjeinti dán meja le ladügübalin Búngiu lídarádun lúma Abrahám lun labíniruniña sun gürígia lídan, mayúsurunti ánjeligu, mayúsurun ligía gürígia, ligía adügübalin sun cátei.

Ca lan uágu níjein lubei lilúrudun Moisés

²¹ ¿Laríñaguña funági le luágu múradun lan lerérun Búngiu lúma lilúrudun le líchugubei lídaangiñe Moisés? Máma líña. Lun jamúga rúa lan ában lúrudu le íchugubei ubáfu woun lun wagúnfulirun láu, gayáraati jamúga jayábin gürígia lun jeréderun richágu ligíbugiñe Búngiu láu jagúnfuliruni le lubeíbei lúrudu ligía. ²² Lídan linárün cátei, mabáfutiwa lun wagúnfulirun lúma lilúrudun Búngiu, le líchugubei lídaangiñe Moisés, queísi laríñagun Búngiu tidan Lerérun. “Sun gürígia lábugiñeñanu lubáfu figou.” Ítara líña lun lídaangiñerügü lan afíñeni luágu Jesucristu gayára lan jáfuridun gürígia lábugiñegiñe lubáfu figou lun jeréderun richágu ligíbugiñe Búngiu láu jafíñen luágu Jesucristu, queísi meja laríñagun Búngiu lun Abrahám.

²³ Lubáragiñebei liábin Cristu lun gayáraabei lan wafíñerun luágu lun wasálbarun, lábugiñeñadiwa buga lubáfu lúrudu agúrabaja liábin. ²⁴ Ába lubeíti lanügüniwa lilúrudun Moisés lánime camá jamuga irájüñü wagía lun latoúnigiruniwa lueí wuríbani darí liábin Cristu lun dánme lan wafíñerun luágu, gayáraajalíme weréderun richágu ligíbugiñe Búngiu. ²⁵ Guetóti, quei chülüjali lubei Cristu, mámaadiwa lábugiñe louñigirun lilúrudun Moisés.

²⁶ Guetóti lirájüñü Búngiu sun jugúya luágu jafíñen luágu Cristu, lídaañadün ában lúma. ²⁷ Sun jugúya le belújalibeí lídoun ában lúma Cristu

láu jabásterun, íbijaadün ában igáburi líbe ligáburi Crístu. ²⁸ Mámaali cátei lánina lun juríu jumá o máma jumá juríu, o idámuni o máma idámuni, wügüri o würi, ladüga láu lídaañadün lan ában lúma Crístu Jesúsu, sun jugúya ábanrügüñadün. ²⁹ Ánjein lánigu jubei Crístu, linébaanfaangu Abrahám jugúya, jerésibirubei le uágubei laríñaga Búngiu lun Abrahám quei jalágaante.

4

¹ Niján cátei le nabúseerúbei naríñagun. Dan le loúnwen ában úguchili áni ñúraügili liraü le lúnbei lerésibiruni alágan, mabuíduntimaati dan lun irájü ligia sügü jáu lumúsuniña lúguchi, láu sun ligia lan labúremebei alágan, ladüga siñágili lan layúsuruni. ² Añájein güriquia oúnigiruti, aríja jagia láu lalágaante darí lachülürün dan le líridubei lúguchi lun lerésibiruni. ³ Ítara líña lasúseredun wáma. Lubáragiñebei liábin Crístu uboúagun, lábugiñeñadiwa meja lúrudu lúma buri igáburi le mámabei lúnti ladúrarun lun sun dan. ⁴ Dan le lagúnfulirunbei dan, ába loúnajani Búngiu Liraü, le agüriajoubei tídaangiñe ában würi, ába liábin quei juríu lábugiñe lilúrudun Moisés. ⁵ Liábinbei itara lun laságaruniwa lábugiñeigiñe lúrudu ligia, lun lerésibiruniwa Búngiu queisi lirájüñü.

⁶ Lúnti larúfuduni Búngiu luágu lirájüñüjadiwa lan, ába loúnajani láni Liraü Espíritu, le méme Sífiri Sándu, tídoun wanígi, áni agúajati Espíritu ligia wádaangiñe lun Búngiu. “¡NÚguchi!” ⁷ Lirájüñü lubeiti Búngiu wagía, mámaadiwa idámuni, áni ladüga lirájüñü wamá Búngiu, líchugubei alágan woun lídaangiñe Crístu.

Labúseeruni Páblo le buídubei joun ja afñebaña

⁸ Dán meja le íbídiñegili Búngiu jun, jadámuñadün meja “búngiugu” ja mámabaña búngiugu lídan linárün cátei. ⁹ Ánjein guetó, láu subúdi jumáli lan Búngiu, —lídan lirícha cátei, láu subúdi láadün lan Búngiu — jída lubáyasan gayára lan jarítagun lúnya jíchaagun júngua queisi idámuni lábugiñoun lúrudu lúma buri igáburi le mabáfubei lun ladügün ni cáta jun? ¹⁰ Adáaguatün buri fédu itaga wéyu, itaga játi, itaga dan, itaga írúmu queisi laríñaguni lilúrudun Moisés lun jeréderun richágu ligibugiñe Búngiu, lídan jarítagun. ¹¹ Janúfudetina luei masériwidun lan wadágimanu le nadügübei jagánagua lun ni cáta.

¹² Nidújeñu, ayúmuraguatina jun lun jarítagun queisi áu luágu buri cátei le, ladüga furíjadina lun mámaadina lan lábugiñe lilúrudun Moisés queisi meja mámañadün lan lábugiñe lúrudu ligia. Madügüntün ni ában wuríbani nun lídan meja júma nan, ¹³ quei subúdi jumáni, ladüga meja ában sándi le nuágubei gayára lubei neréderun júma furúmiñeti dan lun napúrichijani ugánu lánina asálbaruni jun. ¹⁴ Sándi ligia lé meja nuágubei, ában meja ouchúni nun, múnabunti janügünina luágu líra. Lubáragiñe líra, ába jerésibirunina queisi ában láni Búngiu ánjeli, camá jamuga Jesucrístu guánarügü áu. ¹⁵ ¿Ca susérebei lun ugúndani lé meja jasándirubei náu? Gayáraati naríñagun luágu jáni fuleisei luágu ánjein lan jamúga meja lúnti, jaságaruñein lan jamúga jágu lun jíchuguni nun. ¹⁶ Guetó, zjáganijadina funági lueigiñerügü naríñaguni inárüni jun?

¹⁷ Weírítu juwámaan joun mútu ja, mabuídunti jarítagun jubá. Le jabúseerubei, lun jadísedagüdünnün waweí lun ában lánme jawámaadun jun. ¹⁸ Buíti lun juwámadirun joun ámu, ñi áu yebe júma o úaadina lan júma,

ánjein láu lubei lubuídun arítaguni ladügüwa. ¹⁹ Nirájüñü, nasúfuriruñaya igárigu juágu quei ában úguchuru dan le tagáridun, áni ítara méme núba asúfurira daríme lun jarúfuduni luágu níjein lan Crístu jídan. ²⁰ ¡Buséntina jamúga lun anájein lan júma guetó lun gayára lan nadímurejan jun láu ámu luwúyeri, ibídiñeti nun cába lan narítagua juágu!

Jémpulu tuáguti Agár túma Sára

²¹ Jugúya le busénbei jíchaagun júngua lábugiñoun lilúrudun Moisés, aríñaga jumei cátei le nun. ¿magáambun jumágili le laríñagubei lilúrudun Moisés? ²² Laríñajare luágu garájüñü lán meja Abrahám bián irájüñü, ában táu lidámun, le ában táu lúmarí to ában würi to máma idámuni. ²³ Le tiraü idámuni, ítara líña lagüriajóun quei jagüriajóun sun irájüñü, ánjein le tiraü to máma idámuni, lagüriajóun lun lagúnfuliruba lan le uágubei laríñaga Búngiu lun Abrahám. ²⁴ Ítara líña cátei le queisi ában jémpulu. Bián würiña ja, ítara jáña queisi bián darádu le ladügübei Búngiu. Adügati ában darádu lúma Moisés dan le líchugunbalin lilúrudun lun luágu wübü Sinaí. Darádu ligía, ítara líña queisi Agár ladüga sun lan gürigia ja lábugiñebaña lúrudu ligía idámuni lun jagúnfulirun lúma, queisi idámuni jamá sun tirájüñü Agár. ²⁵ Wübü le Sinaí lídaañein fulásu le giríbei Arábia (le ní lubei jagánoua ladügawagun tiraü Agár). Agár liyáwaboun wübü ligía lúma lúrudu le íchugübei ní. Ubúru le Jerusalén le guetóbei, ítara líña quei wübü Sinaí lídan dan le sügüjalíbei, ladüga ubúru le ligía jáu sun lílana, ítara jáña quei idámuni lun igáburi lánina lilúrudun Moisés. ²⁶ Ánjeinti Jerusalén le siélubei, máma lánina idámuni queisi máma lan idámuni lúmarí Abrahám, áni lirájüñü Jerusalén le siélubei wagía. ²⁷ Tariñajare Lerérun Búngiu. Gúndaaguabá, würi maraüjeitu, amürü to maraüboun, wáguabá láu ugúndani, amürü to ibídiñebei agáriduni bun, lugúndun amürü to áuboun mebéresenwa lan, gíbetimaabaña birájüñü sügü táu würi to garaüboun láu búmarí.

²⁸ Nidújeñu, queisigubeirügü Isáac lan irájü le líchugubei Búngiu lun Abrahám lun lagúnfulirun láu lerérun lun, wagía affíñetiña ladügawagunbaña Abrahám ja uágubaña laríñaga Búngiu lun. ²⁹ Ítara quei meja dan ligía, isáani le agüriajóubei lídan ában igáburi quei furúmieguaügü agüriajóuni eíbaaja lumúti meja isáani le agüriajóubei láu lubáfu Sífiri Sándu, ítara líña gíñe lasúseredun guetó—ja lábugiñebaña lilúrudun Moisés eíbaaja jamútiña ja mámabaña lábugiñe lúrudu ligía. ³⁰ ¿Cáteisán tariñagunbei Lerérun Búngiu? Tariñajare. “Bugáboun idámuni láu sun tiraü, lugúndun siñáti gafánran lan tiraü idámuni lídan alágan lúma tiraü to mámaboun idámuni.” ³¹ Nidújeñu, mítaraantiwa lubeíti quei tirájüñü idámuni, ítara wáña quei tirájüñü würi to mámaboun idámuni.

5

Míchaaguaya jumá júngua idámunime

¹ Furígüda láadiwa Crístu lídaangiñe idámuni wamá lun lúrudu buri lúma igáburigu. Reidei jumá lubeíti le ní lubei líchugaün Crístu, míchaaguaya jumá júngua idámunime.

² Agáamba jumána. Áu páblo aríñagatina jun luágu ánjaün lan íchaagua júngua lábugiñoún igáburi le lánina circuncisión lún nege jeréderun richágu ligíbugiñe Búngiu, mesériwidunbei Crístu lun ni cáta jun. ³ Nariñagayaali lun furúmieguaügü wügüri le resíbinbalin circuncisión luágu lúnti lan

ladügüni sun líbiri le lubeíbei lilúrudun Moisés lun gayáraabei lan leréderun richágu ligíbugiñe Búngiu. ⁴ Jugúya le jarítaguabei luágu richágua jumá ligíbugiñe Búngiu láu jagúnfulirun lúma lilúrudun Moisés, ígira jumáli Crístu, díseedün lueí asálbaruni le láurügüti lareíni Búngiu. ⁵ Wagía, láu lubáfu Sífiri Sándu lúma láu wafíñen luágu Jesucrístu, jeménigitiwa luágu weréderuba lan richágu ligíbugiñe Búngiu. ⁶ Ánjein lídaañadiwa lubeí ában lúma Crístu Jesúsú, málati werésibiruni circuncisión lúmoun merésibirun wamáni. Le busénwabei, lun afíñe wamá luágu Jesucrístu lúma lun warúfuduni afíñeni le wawágubei láu wínsiñejabu joun gürígia wáledi.

⁷ Buíti meja jeíbugun lúma Crístu, ¿ca ígiragüdúbalin lagaambúniwa inárüni jun? ⁸ Mára Búngiu le agúarubei jun adügúbalin líra. ⁹ Mabúlieida jumeí luágu furése lan lawáraüdagun arúfudajani le maríchatí lun lagünrinchaguni jafíñen sarágu gürígia queísigubeirügü résigüda lánun murúsun ísi sun to añóundawaguboun láu. ¹⁰ Neménigiduña luágu Wabúreme Crístu lúnya lasáminaragüdünün queísi áu luágu buri cátei le. Áni cáteíñein lan gürígia le añáwurijabei jun, labeíchubei Búngiu.

¹¹ Ariñagatiña arúfudajatiña yéetiña jagía luágu apúrichija nan luágu lúnti lan jerésibirun wügüriña circuncisión lun jasálbarun. Nidújeñu, ánjein jamúga apúrichija nubálin cátei líra, ¿cámesan jeíbaajana meme juríu? Lun jamúga napúrichijani circuncisión, maríbaanti jamúga lábúrujan dimúrei luáguti loúnwen Crístu luágu gurúwa joun. ¹² Ánjeinti jawágu ja abúseerúbaña jádaruni jídoun luágu lúnti lan jerésibiruni circuncisión, ígúndaatina jamúga lun jíbugunun jawáriua gumúgubei!

¹³ Ánjeinti jugúya, nidújeñu, agúajati Búngiu jun lun lagídarunün lábúgiñegiñe igáburi lánina lilúrudun Moisés, manúga jumeírügü líñáti líra lun lébume gayára lan jasígiruni ugúndani buri le lánina ubouú le. Lubáragiñe líra, seríwigua jumá júniwagua láu ínsiñejabuni le jídaanbei jubáruagua, ¹⁴ lugúndun láu jagúnfulirun lúma lúrudu le ariñagubei. “Jínsiñelá gürígia bíledi bun queísi bísiñegua búngua”, gúnfuljadün láu sun lilúrudun Moisés. ¹⁵ Goúnigi jumá, ánjaün ageíndagua júmagua, jagúmuchaguagüdüba júniwagua.

Ugúndani le lánina ubouú, lúma eíbuguni lúma Sífiri Sándu

¹⁶ Niján cátei le nariñagubei jun. Abágarida jumá quei labúseeruni Sífiri Sándu, ítara lúba mafála jumáni jugúndan guánarügü le lánina ubouú. ¹⁷ Ugúndani le lánina ubouú máma lúmagiñeñein Sífiri Sándu, áni Sífiri Sándu, máma lúmagiñeñein ugúndani le lánina ubouú. Gáganiguati ában lúma le ában, ligía lásiñerunbei jadügüni jugúya cátei le jabúseerúbei yebe jadügün. ¹⁸ Ánjein Sífiri Sándu lubeí abúgurubadün, mámaadün giñe lábúgiñe lilúrudun Moisés.

¹⁹ Ménreengúnti larijiniwa cátei lán buri cátei le jadügübei ja afálarubalin ugúndani lánina ubouú. Gámariguatiña jámagua mamárieidunga, adáaguatiña buri cátei wíyeti, úati nibúsígari jamá láu jasálufurin, ²⁰ judúguatiña joun sándu, abíñaraja jagía. Níjein iyéreejabuni jádan, gáganiguaü, lúma eméendüni. Ménreengúnti jagáñidun, jawougua rügüñein jarítagua súnwandan, fánreinguagüda jamúti adámurini. ²¹ Gimúgatiña, gáfarajadi, gátadi, weínamu jeígin, adúga jagía ámu buri cátei lenége líra. Nariñaguñein jun quei nariñaguni lubáramegiwa luágu ja lan adügúbalin cátei le, mebélurunbaña lídoun larúeijan Búngiu.

²² Niján buri igáburi le líchugubei Sífiri Sándu. Ínsiñejabuni, ugúndani, darángilaü, gagúraasuni, areíduni, lubuídun igáburi, úaraguni, ²³ manáanguni únguaü, ragüguaü únguaü. Úaraguati buri igáburi le lúma furúmieguaüügü lúrudu. ²⁴ Ja lánigubaña Crístu, dágua jamáli sun luwámaan cátei le lánina ubouú le joun luágu lugúruwan Crístu. ²⁵ Ítara quei wabágaridun lídaangiñe Sífiri Sándu, lúnti giñe wígirun lun labúguruníwa Sífiri Sándu lídan le wadügübei.

²⁶ Moún lumuti wanáangun woúngua, añáwurijatiwa joun wíbirigu ítara, rúti giñe gimúgaü wádaangua.

6

Íderagua jumá júmawagua

¹ Nidújeñu, ánjaün aríja luágu áburujaali lan ában jídaangiñe lídoun figouú, jugúya le eíbugubei lúma Sífiri Sándu lúnti jíderaguni lun lagídarun lídaangiñe figouú ligía, adüga jumei láu maweiriguni. Lúnti giñe goúnigigua jumá júngua lueí giñe jáburujan lídoun figouú queísi ligía. ² Ídaragua jumá júmawagua lun jawánduni jijürügu, ítara lúba jagúnfulirun lúma lilúrudun Crístu, le lánina ínsiñejabuni.

³ Lúnti wíderaguniña wíbirigu lugúndun ánjein anáangua gürígia lúngua áni ni cáta ligía, leyéedaguña lúngua. ⁴ Cáda ában gürígia lúnti lagúserun lúmagua ída líña lan ladíñurun. Ánjeinti adáriragua lúngua buíduñu, ligíaba buídu guánarü lúngua, máma ámu, ⁵ lugúndun sun gürígia geféenbaña lun Búngiu jawouúgua, máma jawágu ámu.

⁶ Le únbei larúfudajoüa Lerérun Búngiu lúnti lafánreinjani sun luwúyeri ibíjini lúma le arúfudajabei lun.

⁷ Mayéedagua jumá júngua, siñáti jéjerajan láu Búngiu. Le lábunagubei gürígia, ligíaba giñe lalúbaja. ⁸ Ánjein ábunagua ában gürígia cátei le íchugubei ugúndani le lánina ubouú lun, le méme lábunagubei, líchuguba ában alúbajani le lánina féridi lun. Ánjein ábunagua ában gürígia cátei le íchugubei ugúndani lun Sífiri Sándu, líchuguba Sífiri Sándu ában alúbajani le lánina íbágarí magúmchaditi lun. ⁹ Moún lumuti lubeíti labúchadun wawágu adügei cátei le buídubei, lugúndun ánjawa ítara méme adügei, walúbajaba buíti dánme le lachúlürün dan lun werésibiruni. ¹⁰ Ligía, adüga wameí lubei le buídubei joun súngubei ságü gayára lan, joúntima wadújeñu lueígiñe Crístu.

Ewéridijani lúma lagúmujoún ayoúraguni

¹¹ Aríja jumá luweínamu létera le áubei nabürüja jun guetó láu nújabu guánarügü. ¹² Ja abúseerúbaña jafósurunün lun jíchaagun júngua lábugiñoun igáburi le lánina circuncisión jadügüñein lúnrügü jeréderun buídu jagíbugiñe juríu, lun meíbaajoúniwa jamá lueígiñe jamúga jaríñagun luágu lídaangiñe rügüñein lan loúnwen Crístu wasálbara. ¹³ Ni ja íchaagubaña joúngua lábugiñoun igáburi le lánina circuncisión, madügün jamúti sun le laráñagubei lilúrudun Moisés, busénrügütiña lun jerésibiruni jugúya circuncisión lun gayára lan japántajan luágu jafósurunün lun jibíjini circuncisión. ¹⁴ Ánjeinti áu, mabúseerúntina napántajan ni ca uágu, ában rügüñein cátei uáguti nadímureja weíri—luágu loúnwen Wabúreme Jesucrístu luágu lugúruwan wawágu. ¡Lídaangiñe lugúruwan Crístu jiláañu líña cátei le lánina ubouú nun áni jiláañu níña giñe lun cátei le lánina ubouú! ¹⁵ Lun Búngiu, ni cáta ánjein íbíja wabálin circuncisión lúmoun mibíjin wamáni,

le busénwabei, lun iséri wamá gürígia. ¹⁶ Sun ja abágaridubaña ítara, jagía lánigubaña Búngiu le tímatimaati, resíbi jamá lubeíti darángilaü lúma gudémejabu lúmagiñe.

¹⁷ Lúmagiñe dan le ugúñe, mabúseerúntina lun nibíjin lénreengúnga ni ca úmagiñe. Arúfuda lumúti lárigi buri bíti le nuágubei luágu ában nan esériwiduti lun Nabúreme Jesúsu.

¹⁸ Nidújeñu, binílaün Wabúreme Jesucrístu, sun jugúya. Ítaralá.

LIGÁRADAN PÁBLO JOUN ÉFESONA

Labürüjan Páblo joun tílana liglísi to Éfesoboun

¹ Anája áu Páblo, le lání Jesucrístu apóstolu láu lugúndan Búngiu, nabürüjañoun gárada to jun, jugúya le lánigubei Búngiu ja afiñebaña luágu Cristu Jesúsu lídan ubúругu le Éfeso. ² Binílaün Wáguchi Búngiu lúma Wabúreme Jesucrístu, ibíja jumá giñe darángilau jámagiñe.

Abíniruni le wánibei lugúndun lídan wamá ában lúma Jesucrístu

³ Rúwama uweíriguni lun Búngiu, Lúguchi Wabúreme Jesucrístu, lugúndun láu lídan wamá ában lúma Wabúreme Jesucrístu, biní laadiwa láu sun luwúyeri abíniruni le lánina siélu. ⁴ Lubáragiñebeí meja ladügüni Búngiu ubou, anúadira lumútiwa lun lánigubadiwa lan láu le lúnbei ladügüni Cristu wawágu, lun weréderun madúnrunga ligíbugiñe, derégeguñu woungua lun. ⁵ Fánrein lumútiwa lúmagiñe binárü, láu línsiñejabu, lun lerésibiruniwa queísi lirájüñü lídaangiñe Jesucrístu, ladüga ligía lan lugúndaanbei woun. ⁶ Ligía súnwandan lubeí wíchugun uweíriguni lun Búngiu luágu luweírín lareíni le áubei labínirawa dan le lídan wamá ában lúma Liraü le jínsiñebeí lun. ⁷ Láu luweírín lareíni Búngiu, sálba láadiwa láu líta Liraü le áwiyurubei wawágu dan le louñwenbei luágu gurúwa, ferú dunaleí wafígoun. ⁸ Arúfuda láali Búngiu lareíni woun le tímátimaati láu líchugun sun luwúyeri subúdi lúma gunfaráandaü woun, ⁹ subúdigüda láali layúmajan lé meja arámudaguabei woun, o arítaguni lan le lasáminarubei ladügün. ¹⁰ Según arítaguni le, le lúnbei lagúnfulirun quei lubúdubu dánme le lachülürün lidáani, ladúnraguagüdübei Búngiu sun cátei lábugiñe lagúmadijan Cristu, dándu lé buri siélubei quei le ubouágubei.

¹¹ Láu lídaañadiwa lan ában lúma Cristu, anúadira lumútiwa Búngiu lúmagiñe binárü lun werésibiruni wafánran lídan le lúnbei líchuguni, áni sun le, lídaañein lugúndan Búngiu le adügübalin sun cátei quei labúseeruni. ¹² Anúadira lumútiwa lun wabágaridun, wagía le afiñebeí luágu Cristu furúmiñe, lun líñurúniwa líri Búngiu luágu luweírigin. ¹³ Jugúya giñe, dan le jagáambunbalin ugánu le lánina inárüni—ugánu le anügübalin asálbaruni jun—ába jafiñerun luágu Cristu queísi jasálbaragüle, ába lídan jumá ában lúma, ába larúfuduni Búngiu luágu lánigu jumá láu líchuguni Sífiri Sándu le uágubei lariñaga, jun. ¹⁴ Sífiri Sándu ligía ában lichoúrún Búngiu woun luágu werésibirubei lan alágan le lúnbei líchuguni Búngiu woun dánme lagúmuchuni lasálbaruniwa, wagía le lánigubei, lun líñurúniwa líri luágu luweírigin.

Lamúriajan Páblo lúma Búngiu lun líchugun subúdi joun afiñetiña

¹⁵ Ligía dan le lubeí nagáambunbei luágu afiñeni le jídaanbei luágu Wabúreme Jesúsu, lúma luágu ínsiñejabuni le juágubei joun sun ja lánigubaña Búngiu, ¹⁶ másuti neteíngiruni Búngiu juágu dan le narítagun juágu lídan nayúmuragun lun. ¹⁷ Amúriajatina lúma Lubúngiute Wabúreme Jesucrístu, Úguchili Weírigitu, lun líchugun subúdi íñugiñeti jun lun gunfaráanda jumáni le lasúbudiragüdübei jun, lun giñe jasúbudirunitima Búngiu buídu. ¹⁸ Amúriajatina lúma Búngiu lun larúgoungadagüdüni jisáminan lun jasúbudiruni ca lan uágubei lagúara jun lun jeménigidún luágu, lúma lun

jasúbudiruni ída líña lan luweírigun lúma lirísín alágan le líchugubei Búngiu joun lánigu. ¹⁹ Amúriajatina gíñe lúma lun lasúbudiragüdüni jun ída líña lan luweírín lubáfu le mébejabei le ñadágimeinbei wádan, wagía le affíñebei luágu. ²⁰ Ubáfu le, ligía méme le larúfudubei Búngiu láu sarágu érei dan le lásaaragüdünbalin Crístu lídaangiñe ouwéni, ába lañúuragüdüni lueígiñe loúnwenren yágüta siélu. ²¹ Rúlumuti lougiñe sun gumádi, ubáfu, érei lúma arúejani lé buri siélubei, lúma lougiñe sun le gayáraabei liridún, dándu lídan dan le queísi lídan le lúnbei liábin. ²² Rúlumuti sun cátei lábun lubáfu Crístu, rúlei gíñe Crístu guánarügü lun ligíaba lan ichügüdinaü joun sun gürígia ja lánigubaña, ja giribaña lilígilisin. ²³ Gürígia jagía, ja méme lúgububaña Crístu, buin jáña láu libágarí Crístu (láu lubáfu lání Espíritu), áni Crístu guánarügü adügübalin sun catei áni ágüdjaleí.

2

Sálbaadiwa láu lareíni Búngiu

¹ Rújali Búngiu íbágarí magúmuchaditi jun úara lúma Crístu le lásaaragüdübei lídaangiñe ouwéni, láu sún meja jiláñugídün lan lun cátei le luáguti Búngiu, lurúma wuríbani lúma figou buri le gádaanbalün. ² Lídan meja dan ligía, falá jumuti lání ubou le jémpulu, adügei lugúndan Máfia, le agúmadirubaliña espíritugu garábalirugu, le ñadágimeinbei jádaangiñe ja magáambadibaña lun Búngiu. ³ Ítara líña meja gíñe wabágaridun, sun wagía, luágu ában dan, afálarei wayúmajan, agúnfulira lúma lugúndan wagáburi lúma lugúndan wasáminan, queísi gürígia garaúwarügütiña. Ligía lúnti lubei yebe láburujan lanárimé ligáñi Búngiu wawágun queísi ja jíbiri. ⁴ Weíríti lugúdemejabu Búngiu, ⁵ ába larúfuduni luweírín línsiñejabu woun láu sún meja jiláñugídiwa lan lun cátei le luáguti Búngiu lurúma wafígoun. Ába ladáraruni lubéneri íbágarí magúmuchaditi woun láu lásaaragüdüni Crístu lídaangiñe ouwéni. Sálbatiwa lubeíti láu lareíni Búngiu. ⁶ Sarágüda lumútiwa gíñe Búngiu lídaangiñe ouwéni lánina figou láu lásaaragüdüni Crístu lídaangiñe ouwéni, ába líchuguni wabára woun lúma Crístu yágüta siélu, lúma uweíriguni lánina ubáraü ligía. ⁷ Ladügünbalin líra lun larúfuduni luweírín wínsiñe lun lúma lareíni woun lídan Crístu Jesúsu lídounme dan le lúnbei liábin. ⁸ Sálbawádiwa luágu lareíni Búngiu, luágu wafíñen luágu. Máma jamúga ában cátei le wagía guánarügübei adügübalin, Búngiu íchugubalin wasálbarun woun. ⁹ Máma lídaangiñeti cátei le jamúga ladüga mútu, lun úa lan ni ában apántajati lueígiñe. ¹⁰ Lugúndun Búngiu adügübañiwa, iséri gürígia wagía lídan Crístu Jesúsu lun wadügün cátei buíti, quei larítaguni lúmagiñe binárü.

Waráandarun lúma Búngiu lídaangiñe Crístu

¹¹ Jarítagua jumá lubeíti luágu ída jíña lán meja furúmiñe. Máma meja lídaangiñetün jarásan juríu, ligía lébubei gürígia ja juríu, ja erésibirubalin circuncisión, ába jagúarunün, “gürígia ja merésibirubalin circuncisión”, o gürígia ja mámabaña lánigu Búngiu. ¹² Lídan meja dan ligía, íbídiñegili meja Crístu jun, mámagídün meja lílana linásiñun Israél, ja lumútuniñabaña Búngiu, bougudiñadün meja lueí lídarádun Búngiu joun lánigu lúma sun le lúnbei líchuguni joun lábugiñe darádu ligía. Jabágariduná meja ubouágu meménigiga, íbídiñega Búngiu le inárütibeí jun. ¹³ Ánjeinti guetó, quei lídaañadün lan ában lúma Crístu Jesúsu, jugúya meja le dísebei lueí Búngiu, guetó yaráfaadün lun, láu loúnwen Crístu. ¹⁴ Barü laadiwa Crístu lídoun

aráandaruni, ladüga adüga láaña juríu jáma ja mámabaña juríu lun ában méme jamá mútu, güríngua lumúti gáganiguaü lé meja afánreinragubaliña. ¹⁵ Gumúguagüda lumúti cátei le lilúrudun Moisés láu sún buri gumádi lánina lúrudu ligía láu loúnwen, adügeina láña juríu jáma ja mámabaña juríu lun ában mémebaña lan lídan. Ítara líña ladügüni aráandaruni wádaangua. ¹⁶ Láu loúnwen Crístu luágu gurúwa, ába lagúmuchaguagüdüni wuríbu lé meja jádaanbei juríu jáma ja mámabaña juríu, ába laráandaragüdüniña biángubei lúma Búngiu, adügeina láña biángubei lun ábanrügü lan mútu—lumútuniña Búngiu jagía.

¹⁷ Nübinti Crístu, ába lapúrichijani ugánu buíti luáguti aráandaruni lúma Búngiu joun sun gürígia, dándu jun, jugúya le mámabei juríu já meja dísebaña lueí Búngiu, quei woun, wagía juríu já meja yaráfabaña lun Búngiu. ¹⁸ Lídaangiñe Crístu, sun wagía, juríu máma juríu, gayáraati wayárafadun lun Búngiu láu lubáfu ában méme Espíritu, le Sífiri Sándu. ¹⁹ Ligía mámaadün lubeí teréncha lun larúeijan Búngiu, lílanaadün larúeijan quei sun ja lánigubaña. Lufámiliangu Búngiu jugúya. ²⁰ Sun wagía afiñetiña, dándu juríu quei máma juríu, ítara wáña quei ában ligílisi to ligíbuagouboun wagábu le jábunubei apóstolugu jáma profétagu. Cátei lé buri jarúfudajabei, ligía wagábubei, Jesucrístu meme ligía dübü le weírgutimaabei lídan ébuu ligía. ²¹ Luágu ébuu ligía le Crístubei tiñúrawagua múna tugúya (wagía afiñetiña), aráanseñu sun tumégegün buídu darí lun tiábin lun ában tan ligílisi to derégewatu lun Crístu, to giñe lídaantu ában lúma. Ítara wáña wagía le afiñebeí luágu Crístu. ²² Ítara líña lubeíti, jugúya giñe le mámabei juríu, lídaañadün ában lúma Crístu, oúndaraguatün jáma súngubei ja jíbiri lun wayábin sun wagía lun ítara wamá quei ában múna to ñí lubei lagánawa Búngiu láu lání Espíritu.

3

Luwádigimari Páblo lun lapúrichijani luágu Crístu joun ja mámabaña juríu

¹ Ligía lúbubei nayúmuragun, áu Páblo, lun Búngiu juágu. Daüwañu níña lueígiñe luwádigimari Crístu le adüga náalibeí jagánagua, jugúya le mámabei juríu. ² Mósu subúdi jumáali lan luágu rúlaali lan Búngiu wadágimanu le nun láu lareíni, luágu jáni fuleísei. ³ Queísi nabürüjan jun, adüga lumúti meja Búngiu ában aráansejani juágu, jugúya le mámabei juríu, arámudaguati aráansejani ligía, ába lasúbudiragüdüni nun. ⁴ Láu jalíjani le nabürüjabei, jasúbudirubei luágu gunfaráanda náni laráansejan Búngiu luágu Crístu, lé meja ligíarügübei asúbudirei. ⁵ Masúbudirawagüdünti aráansejani ligía lun ni ában lídan meja dan le sügüjalibeí, ánjeinti guetó, láu lubáfu Sífiri Sándu, arúfuda láali Búngiu joun lání apóstolugu jáma profétagu ja derégeguabaña jóngua lun le gumúti. ⁶ Niján aráansejani ligía. Lídaangiñe ugánu le lánina asálbaruni, jerésibirubei ja mámabaña juríu alágan le méme lúnbei jerésibiruni juríu, áni líbirigu méme lúgubu Crístu, gafánraantiña giñe lídan méme dimúrei le líchugubei Búngiu joun juríu luágu gayára lan weréderun richágu ligíbugiñe Búngiu lídaangiñe Jesucrístu. ⁷ Fuleísei láadina Búngiu láu líchugunina lun napúrichijani ugánu ligía láu lubáfu, laú sun madüna náni yebe fuleísei ligía. ⁸ Ünabutimaatina sügü láu le ünabutimaabei jádan lánigu Búngiu, láu sun líra, rúlaali ubáfu le nun lun napúrichijan joun ja mámabaña juríu luágu luweírin jarísín lídan Crístu le mébejabei. ⁹ Rúlaadina Búngiu, le adügübalin sun cátei, lun nafúraanguagüdüni joun

sun gürígia ída líña lan lanügün aráansejani ligía lé meja arámudaguabei fulásu. ¹⁰ Arámudaguati meja aráansejani ligía lun guetó lan gayára lan jayábin sun láni Búngiu ánjeligu ja arúejabaña siélu lun jasúbudiruni lichú láu Búngiu lídan sun luwúyerigu jádaangiñe affñetiña, ja lilígilisinbaña Crístu. ¹¹ Úaraguati sun le lúma larítagun Búngiu le larítaguabei lúmagiñe lubáragiñe lagúmeserun sun cátei, le lagúnfulirubei lídaangiñe Wabúreme Jesucrístu. ¹² Lídaangiñe Crístu, gayáraati wayárafadun lun Búngiu láu eménigini le líchugubei wafíñen luágu Jesucrístu woun. ¹³ Ligía nayúmragunbei jun lun máburujan lan jarúna lueígiñe le nasúfurirubei juágu, lugúndun weírirügüti cátei líra jun.

Línsiñejabu Crístu

¹⁴ Ligía lubeíti lébubei nájuduragun ligíbugiñe Lúguchi Wabúreme Jesucrístu, ¹⁵ le Jáguchibeí sun lufámilian Búngiu uboúagu lúma siélu. ¹⁶ Amúriajatina lúma Búngiu lun líchugun érei lúma ubáfu jun según luweírín ubáfu le lúmabei, lun jídin jubáruaguouún láu Sífiri Sándu le jídaanbei. ¹⁷ Amúriajatina giñe lúma lun jíchugun fulásu tídan janígi lun laganouún Crístu ñi, láu sun jafíñen luágu, ¹⁸ lun giñe láu lan ában ínsiñeni weíríti, derégüdagu jídan, gayára lan gunfaráanda jumáni lítulen, limígifen, lujúlilin lúma líñun línsiñejabu Crístu buídu, jáma sun jíbiri affñetiña. ¹⁹ Amúriajatina lubeíti lun jasúbudiruni ínsiñejabuni le, le weírítimaabei lueí sun le wayáraabei asúbudira, lun lúma jumá Búngiu le gumúti.

²⁰ Guetóti, iñurúalá líri Búngiu le gabáfubei lun ladügün gíbe sügü láu le wamúriajabei o le lan wasáminarubei, láu lubáfu le ñadágimeinbei wádan. ²¹ ¡Arijúalá luweírigan Búngiu lídaangiñe sun le ladügübei jádan lánigu lúma lídan Crístu Jesúsu luágu sun sígulu lúma sun dan! Ítaralá.

4

Lídaañadiwa ában láu lubáfu Sífiri Sándu

¹ Ladüga sun le adüga láalibeí Búngiu jun, ligía namúriajabei júma, áu le adaürübei lueígiñe luwádigimari Crístu, lun jóuseragun júngua quei lúnti lan jadügüni ja únbaña wájali lan Búngiu lun lánigu jamá quei lagúarun jun. ² Ünabugu jumá, jínsiñejabu, gagúraasun jumá, areída jugúyame joun jíbiri. ³ Jóucha jumá lun lídan jumá ában súnwandan láu lídejan Sífiri Sándu, eíbuga jumá lídan darángilaü júmagua, ítara lúba lídaanbadün lan ában súnwandan. ⁴ Lúnti wanáangun woúngua lídan ában, lúma jáma jíbiri lánigu Búngiu ladüga lumégegun lan ában méme úgubu le gíribei lúgubu Crístu sun wagía, ligía méme Sífiri Sándu le lídaanbei cáda ában wádaangiñe, wájali Búngiu woun lun wabíjini ában meme eménigini luágu walágaante lídaangiñe. ⁵ Ligía méme Abúremein Wabúreme súngubei, ligía méme wafíñen luágu Jesucrístu, badíseitiwa sun wagía lídan líri Abúremein ligía. ⁶ Ában rügüñein Búngiu Jáguchi súngubei, jóúgiñeñein súngubei, ñadágimeinti jáu súngubei, áni níjein jádan súngubei.

⁷ Rújali Crístu sarágu luwúyeri ubáfu joun lánigu, rúlaali ubáfu le labúseerubei líchugun lun cáda ában wádaangiñe, woun. ⁸ Ligía laríñawagunbei tídan Lerérun Búngiu luágu Crístu. Múdeiti siélun barúina láña adaürütiña lúmagua, ába buri líchugun ubáfu joun gürígia.

⁹ ¿Cáti míni lan “múdeiti”? Míni lan luágu rarí lan furúmiñe lídoun ubáraü buri le únabutimáabei uboúagu. ¹⁰ Crístu le arárirubei lun

ubouágun, ligía méme giñe le amúdeirubei lídoun líñun-ágei siélu láu sun luweírigun lun labuínchagüdüni súngubei láu guánarügü. ¹¹ Ába líchugun ubáfu lun cáda ában jádaangiñe afiñetiña luágu. Añájein rúti joun lun apóstolugu jamá, jíbiri lun ladímurejan Búngiu jayúmulugugiñe, jíbiri lun jóudin apúrichijei ugánu buíti lánina asálbaruni joun ja magáambun jamágilibei ugánu ligía, jíbiri lun jafádirijan lúma lun jarúfudajani Lerérun Búngiu. ¹² Ítara líña laráanseruniña lánigu lun gayáraabei lan jesériwiduni buídu, ¹³ lun jedérebudagüdüniña jíbirigu lídan Crístu daríme wachülürün sun wagía lun lídan wamá ában lídan wafiñen luágu Jesucrístu, le Liraü Búngiu, lúma lídan lisúbudinwa. Ítara lúba gürígia wamá weínamujaña lídan weíbugun lúma Crístu, ítara lúba wagáburidun queísi lagáburidun Crístu. ¹⁴ Mitaraanjádiwame quei irájüñü lun ménreengun lan wasáansijan lun ladúurujaniwa ligáralin furúmieguaügü iséri luwúyeri arúfudajani lun wáburujan lídoun jayéeni gürígia bíbutiña ja abúseerúbaña janügüniwa lídoun üma le maríchabei. ¹⁵ Lubáragiñe líra, wadímurejabei inárüni láu ínsiñeni lun wawáanserun lídan sun luwúyeri lídan ában lúma Crístu le ichügüdináübei joun sun lánigu ja gíribaña lúgubu. ¹⁶ Sun wagía le lúgubu Crístu, úraguatiwa lídan ában lábugiñe lagúmadijan Crístu, cáda ában wádaangiñe gayáraati wíderaguniña ja wíbirigu. Ítara lúba gayára lan wawáanserun súngubei lídan weíbugun lúma Crístu, awáanse wagiame lídan ínsiñeni.

Iséri ibágarí lídan Crístu

¹⁷ Niján lubeíti cátei le nariñagubei jun lídan líri Wabúreme. lun jebé lan jabágaridun quei ja ibídiñejabubaña lun Búngiu, ja abágaridubaña úragua lúma jasáminan le málabei. ¹⁸ Darúgu líña láu jasáminan, úati ibágarí le ñübinbei lúmagiñe Búngiu jádan lugúndun ibídiñeti ni cáta joun lurúma tidére janígi. ¹⁹ Féridi jamáali jabúsigari, derégeguaña jóungua lun wuríbani, adúgatiña sun luwúyeri iwíyei láu ugúndani. ²⁰ Anjeinti jugúya, máma líña jafúnrendeirun lúmagiñe Crístu, ²¹ ladúga inárüni lan luágu agáamba jumá luágu Crístu, arúfudajoúati inárüni lé meja larúfudajabei, jun. ²² Anjeinti luágu binádu ligáburí jabágaridun, arúfudajoúati jun lun jígiruni binádu meja jigáburí le mabuídunjalibei láu jagúnfulirun lúma luríban ayúmajani le gayéeraguadibei, ²³ arúfudajoúati jun lun iséri jumá lídan jáni espíritu lúma lídan jisáminan, ²⁴ lun iséri lan jigáburí, buíduñu, jarúmañu le gumúti queísi ligáburí Búngiu.

²⁵ Ligía jebé lubei jayéjean, adímureja jumeí inárüni jáma jíbirigu lugúndun lánigu ában méme úgubu sun jugúya, le lúgubu Crístu.

²⁶ Moún lumuti jagáñidun le lánina affigoujani, moún lumuti giñe jálüdüñ sarágu dan arítağa luágu cátei le agáñidagüdübalün— ²⁷ míchiga jumá lúgaaru lun Máfia ítara.

²⁸ Le jíwerubei, jebé líwerujan, luwádigimarida láu ában arúmani lun lagüriaragun lúngua, lun giñe gayára lan líderaguniña ja gudémebaña.

²⁹ Madímureja jumá liwíye dimúrei, jarúmalá jadímurejan lun gayára lan jíderaguniña ja agáambubalün, ibíja jagíame abíniruni lídaangiñe jerérun. ³⁰ Majírudaguagüda jumeí Sífiri Sándu, lugúndun níjein Sífiri Sándu jídan lun jasúbudirúniwa queísi lánigu Búngiu daríme lachülürün wéyu lun jasálbarun le gumúti.

³¹ Ígira jumeí sun magúndani, sun iyéreejabuni, sun agúaraguní lánina igáñi, sun anábajani, lúma sun wuríbani. ³² Buídu jumá, gudémejabu jugúyame júmagua, ferúdunagua jumá júmagua ítara quei ferúduna lánün Búngiu lídan Crístu.

5

Ída lúba lan ligáburi jabágaridun lirájüñü Búngiu

¹ Quei lirájüñü jubeí Búngiu ja jínsiñetiña lun, jóucha jumá lun ítara lan jigáburi quei ligáburi. ² Jínsiñegua jumá júniwagua ítara quei wínsiñedun lun Crístu, ába ledéregeragun lúngua wawágu queísi ában mudún le adágarawagüdüti lun Búngiu. Ítara líña línsiñejabu Crístu woun queísi cupáli le buíti líjeme, le águdajóubei lun Búngiu, resíbi lumúti láu ugúndani.

³ Quei lánigu jumá Búngiu, moún lumuti ni lun jadímurejan luágu salúfuri, ni ámu luwúyeri iwíyei, ni luweínamu águu. ⁴ Mawíyelá jiyúma, maríñagun jugúyame libídiouniga áu, ni dimúrei málati, ladüga mabuídunti buri cátei le. Lubáragiñe jadímurejan cátei líbeina líra, yúsu jumeí jiyúma lun jíchugun eteíngiruni lun Búngiu. ⁵ Subúdi jumúti luágu le lan agámariduti mamárieidunga, o ladügün lán buri cátei wíyeti, o labágaridun lídan luweínamu águu—le queísigubeirügübei lanügüni irisini lisándunme—siñáti gafánran lan lídan jarúeijan Crístu lúma Búngiu. ⁶ Mayéedagualaün ni ában láu lagübüri buri dimúrei, lugúndun ladüga buri cátei wuríbati le, láburuja lanárime ligáñi Búngiu jawágun ja magáambadibaña lun. ⁷ Dírei jumá jaweí jíbe gürígia jára.

⁸ Lídaañadün meja lubúriga, ánjein guetó, quei lídaañadün lan ában lúma Wabúreme, lídaañadün larúgounga. Ítara líña lubeíti agáburida jumá queísi gürígia ja eíbugubaña lídan larúgounga. ⁹ Gürígia jagía, areídatiña, surúti jabágarí, jínsiñeti inárüni joun. ¹⁰ Jóucha jumá jafúnrendeiruni ca lan jínsiñebeí lun Wabúreme. ¹¹ Mádanlaün buri cátei málati le jadügübei ja lánigubaña lubúriga, sagárügü jumeí lídoun larúgounga láu lubuídun jigáburi. ¹² Rúti busíganu íbini lun ladímurejoúniwa luágu buri cátei le jadügübei arámudaguarügü, ¹³ dan le larúfuduni larúgounga luágu wuríba lan jagáburi, ába jasúbudiruni luágu inárüni lan, gayáraati jayábin ja lídaanbaña lubúriga lun lídoun larúgounga. ¹⁴ Ligía laríñawagünbei.

Agáguduabá, bugúya le arúmugubei,

sarába jádaangiñe jiláaña,

ábame larúgoungadágüdü Crístu báu.

¹⁵ Touñigi jumá lubeíti buídu ída líña lan jóuserun. Mabágarida jumá quei íbidiougu táu, jabágarida quei chu táu. ¹⁶ Yúsu jumeí jidáani lídan cátei buíti, lugúndun níjein sarágu wuríbani lídoun buri dan le. ¹⁷ Ligía mabídiouniga lubeí jáu, jóucha jumá gunfaráanda jumáni ca lan lugúndaanbei Wabúreme. ¹⁸ Mabácharuada jumá, lugúndun barü lumútiña líra gürígia lídoun féridi, lubáragiñe líra, buínjuma láu Sífiri Sándu. ¹⁹ Adímureja jumá júmagua luágu luweírigan Búngiu, erémuja jumá luágu, jerémuja táu sun janígi lun Wabúreme. ²⁰ Rújuma eteíngiruni lun Búngiu Úguchili súnwandan luágu sun cátei lídan líri Wabúreme Jesucrístu.

Igáburi le lúnbei wagáburiduni jáma ja wábiñebaña

²¹ Derégegua jumá júniwagua, ítara lúba jarúfuduni linében Crístu jun.

²² Lúnti derégeguñu tan würi túngua lun túmari quei lun Wabúreme Jesucrístu, ²³ lugúndun wügüri tichügüdinabei lúmari ítara quei Crístu lan tichügüdinabei lilígilisin. Crístu giñe Jasálbaragülebei güriía ja gíribaña lilígilisin, ja méme giñe gíribaña lúgubu Crístu. ²⁴ Ítara quei jagáambadi affiñetiña lun Crístu, ítara líña giñe lúnti lan gagáambadi jamá würiña joun jámarigu lídan sun cátei.

²⁵ Jínsiñetá lúmari wügüri lun quei luweírin wínsiñe lun Crístu, wagía le lilígilisin, ába líchuguni libágari wawágu. ²⁶ Ladügünbalin líra lun larúmadagüdúniwa lídaangiñe le binádubei láu wabásterun lúma giñe láu lerérun, ²⁷ lun larúfuduníwa ligíbugiñe queísi ában würi to ayárafaduboun lun túmari—buídumeraütu, jarúmañu, aráanseñu, ni cáta mégeiti tuágu, ában würi derégüdaguatú, úraguatú. ²⁸ Ítara líña lúnti lan tínsiñedun lúmari wügüri lun quei línsiñe lúgubu guánarügü lun. Le jínsiñejabuti tun lúmari jínsiñeguati lúngua ladüga ábanjali lan láu jágubu. ²⁹ Úati güriía mebéresenti láu lúgubu guánarügü, jóugüdarügü lumúti, toúnigileí. Ítara líña giñe ladüga Crístu tun lilígilisin, ³⁰ ladüga lúgubu tan, áni wagía líbiri úgubu ligía, ábanjadiwa lúma. ³¹ Lariñajare tídan Lerérun Búngiu. “Ligía lígirubei lubeí wügüri lúguchi túma lúguchu lun lamárieidun túma lúmari, ábame jayábin jagía bíangubei lun camá jamá ábanrügü.” ³² Níjein ában oúnwenbun inárüni arámudaguati lídan dimúrei ligía. Aríñagatina luágu luáguti lan lúaradagun Crístu jáma lánigu ja gíribaña lilígilisin. ³³ Lariñaguña giñe dimúrei ligía luágu cáda lan ában jídaangiñe lúnti lan jínsiñe tan lúmari lun quei línsiñegua lúngua, lun giñe inébe lan túmari würi tun.

6

¹ Isáanigu, le lúnbei jadügüni queísi affiñetiña lun gagáambadi jumá joun jagübürigu, lugúndun ligía richábei. ² Niján ában gumádi weíriti lídaangiñe ligúmadin Búngiu le anügübei buíti woun láu wagúnfuliruni. “Inébelá búguchi túma búguchu bun lun buídu lan dan bun, ³ gabágari amürüme migífe ya ubouágu.”

⁴ Jugúya agübürigu, magañidagüda jumáña jisáanigu, agüriajarügü jumáña buídu lun gagáambadi jamá, arúfudajeina joun lun jaffínerun luágu Wabúreme.

⁵ Músu, gagáambadi jumá joun jiyúbudirigu ya ubouágu láu inébesi, láu anúfudei, lueí ñi lan mégeiti lídan jesériwidun joun. Juwádigimarida buídu láu sun tarúman janígi camá jamuga lun Crístu jesériwida. ⁶ Seríwi jumáña buídu, mámarügü dan le ariágu jáña lan jun lun jeréderun buídu jáma, seríwi jumáña buídu súnwanan quei esériwidutiña lun Crístu, adúgeina lugúndan Búngiu táu sun janígi. ⁷ Adüga jumeí juwádigimari láu ugúndani, camá jamuga lun Wabúreme jadügei máma joun güriía, ⁸ ladüga subúdi jumáli luágu cáda lan ában jídaangiñe, dándu idámuni quei máma idámuni, lafáyeirubei Wabúreme según buíti le ladügübei.

⁹ Jugúya iyúbudirigu, buídulá giñe jóuseruniña jumúsuniña, masíadira jumáña. Jarítagua jumá luágu dándu lan jugúya quei jagía, lábugiñeñadün lagúmadijan Wabúreme le siélubei, áni ában lan láu lanügüniña Búngiu sun güriía.

Cátei lé buri áubei wageíndagua lúma Máfia

¹⁰ Guetóti nidújeñu, jére jumá lídaañu ában lúma Wabúreme, láu lére le gabáfubei. ¹¹ Daújumoun sun daüguaü to líchuguboun Búngiu joun

sun lánigu lun derégüdagu jumá lueí leyéedagunün Máfia. ¹² Lugúndun máma jáma gürígia ja láutiña ügürügü lúma ábuu wageíndagua, jáma buri espíritugu gabáfutiña ja lánina wuríbani yágüta íñu lúma jáma espíritugu ja gáambaña gumádi, lúrudu lúma érei luágu buri cátei lánina lubúriga lídan ubou le wageíndagua. ¹³ Ligía ragújumoun lubeí sun daüguaü to líchuguboun Búngiu jun lun gayára lan jawánduni wuríbani lídan wéyu le jabúseerubei espíritugu jagía jageíndagun júma, áni lárígíñeme jawánduni, ábame jeréderun derégüdagu. ¹⁴ Derégüdagu jumá lubeíti, daügu táu láni Búngiu daüguaü queísi ában lisúdaaran. Daügua jumá láu inárüni queísi láu ában béliiti le gürágu umúti buídu luágu jiránaagua, areidúañu láu ísuruni quei láu cátei le adáuragubei láu laníguagu súdeara. ¹⁵ Aráanseñu jumá lun japúrichijani ugánu luágu Wasálbaragüle, le íchuguti darángilaü, queísi laráanserun súdeara dan le ladáürunun lisábadun. ¹⁶ Lougíñe sun cátei, barújumei jafiñen quei lárügüdüni súdeara cátei láuti gürábu ligíbugiñe, lun jaráramunun sun gimára durúnguatu to lachüüjaboutn Máfia juágun. ¹⁷ Barújumei jeménigidun luágu jasálbarun quei ladáüruni súdeara lubúnidin lun latoúnigiruni lálbulugu, barü jumeíme Lerérun Búngiu quei efeñu to líchuguboun Sífiri Sándu jun. ¹⁸ Adüga jumeí sun le láu sarágu ayúmuraguni lun Búngiu lun líderagunün, ayúmuragua jumá lun Búngiu súnwandan láu lubáfu Sífiri Sándu. Agágudúañu jumá, máburujalá jarüna, ayúmuragua jumá jawágu sun ja lánigubaña Búngiu. ¹⁹ Ayúmuragua jumá gíñe nuágu lun líchugun Búngiu dimúrei nun dan le nadímurejan, lun gíñe nadímurejan láu manúfudei lun nasúbudiragüdüni ugánu luagu gayára lan gíñe jasálbarun ja mámabaña juríu queísi ja juríubaña. ²⁰ Oúnaja láadina Búngiu lun napúrichijani ugánu le, le ueígiñebei nadaürüwa guetó. Ayúmuragua jumá lun napúrichijani ugánu le láu manúfudei, queísi lubúdubu.

Lagúmujoún buri mábugaü

²¹ Tíquico, wadúje jínsiñeti woun, le íderagubaliwa buídu lídan luwádigimari Wabúreme, ligíaba íchiga ugánu jun nuágu lúma luágu le nadügübei. ²² Ligía nouúnajaanbalin jun lun laríñaguni jun ída wáña lan, lun líchugun gurásu jun.

²³ Rúlá Búngiu Üguchili lúma Wabúreme Jesucrístu darángilaü lúma ínsiñeni láu afiñeni jun, wadújeñu lueígiñe Jesucrístu, ²⁴ biní láñame Búngiu sun ja jínsiñejabúbaña lun Wabúreme Jesucrístu láu ában ínsiñeni le masáansiraguati. Ítaralá.

LIGÁRADAN PÁBLO JOUN FILÍPOSNA

Labürüjan Páblo furísunrugugiñe joun tílana liglísi to Filíposboun

¹ Anája áu Páblo lúma Timotéo, esériwidutiña wagía lun Jesucrístu, wabürüjañoun gárada to jun, sun jugúya fádirigu jáma esériwidutiña ligílisirugu ja ubúrugubaña Filípos, jáma jíbiri lánigu Búngiu ja lídaañabaña giñe ában lúma Crístu Jesús. ² Binílaün Wáguchi Búngiu lúma Wabúreme Jesucrístu, ibíja jumá giñe darángilau jámagiñe.

Layúmuragun Páblo jawágu afñetiña

³ Ságü narítangun juágu neteingiruni Nubúngiute. ⁴ Súnwandan nayúmuragun lun Búngiu juágu láu ugúndani, ⁵ Láu narítangun luágu luweírín jíderagunina abúrchaguagüdei ugánu le lánina asálbaruni lúmagiñe wéyu le jagáambubalin chülü lúmoun wéyu le ugúñebe. ⁶ Choúru numúti luágu Búngiu lan le agúmeserubei adúgei lubuídun luwádigimari jídan, lasígira mémeba lan adúgei daríme wéyu le liábingüle Jesucrístu. ⁷ Richáti lun narítangun juágu ítara lugúndun weírítí jínsiñe nun, lugúndun giñe gafánran jumá lídan abíniruni le nánibe dan le furísunrugunadina lan luágu nesériwidun lun Crístu, o dan lan le naráramun ligíbugiñe lúruudu lun nadímurejan lueígiñe loubadina ugánu le lánina asálbaruni lun nachoúruruni joun luágu inárüni lan. ⁸ Subúdi lumúti Búngiu luágu weíri lan nálugun juágu lugúndun jínsiñetün nun queísigubeirügü jínsiñe jumá lun Jesucrístu.

⁹ Amúriajatina lídan nayúmuragun lun Búngiu juágu lúntima laweírídun jínsiñejabu láu sarágu subúdi lúma gunfaráandaü lídan sun cátei, ¹⁰ lun gayára lan janúadajani cátei le buídubei súnwandan. Ítara lúba jabágaridun ában íbágarí jarúmati, madúnrun jumámuga dánme liábin Crístu. ¹¹ Amúriajatina lúma Búngiu lun buin jumá láu lubuídun igáburi, láu lubáfu Jesucrístu le jídaanbei, lun líchugúniwa uweíríguni lun Búngiu luágu.

Crístu íbágaribeí nun

¹² Nidújeñu, buséntina jasúbudiruni luágu cátei lán buri le suséreelibeí nun, ñübinjali lídan linárün lun líderagun lídan lapúrichijoún ugánu le lánina asálbaruni. ¹³ Subúdi jamúti lubeítí sun tisúdaraana lúban urúei jáma sun ja jíbiri luágu nadaürüña lan lueígiñe nesériwidun lun Crístu. ¹⁴ Játi jíbiri idújeñu, láu jaríjin luágu nadaürüña lan lueígiñe napúrichijani ugánu luágu Crístu, ragújaña anígi lun japúrichijani méme ugánu ligía manúfudeiga, láutima afñeni luágu Crístu.

¹⁵ Inárüni luágu añájein lan adímurejatiña luágu Crístu ladüga jagímugan, busén jagía janügüniña gürígia jánigume. Ánjaña jíbiri, japúrichijan luágu Crístu láu lubuídun arítaguni. ¹⁶ Gürígia jagía, luágu ínsiñejabuni japúrichija, lugúndun subúdi jamáni luágu lueígiñe lan nadímurejani ugánu le lánina asálbaruni nadaürüña lan. ¹⁷ Ánjaña ja jíbiri, máma láu janárün japúrichija, lun jaríjiniwa weírigo jadúgei, lúma lun jíchugun líbe samínaü nun guetó le nadaürüña lan. ¹⁸ Wel, úati cátei luágu líra, lídan sun luwúyeri, láu yebe janárün o máma lan láu, luágu Crístu jadímureja, áni gundaatina luágu líra.

Áni nagúndaarúba giñe, ¹⁹ lugúndun subúdi numúti luágu buídubei lan nasálirun lídan sun cátei le, ladüga jayúmuragun lun Búngiu nuágu lúma ladüga líderagunina láni Jesucrístu Espíritu. ²⁰ Cátei le nabúseerúbei

lúma le nagúrabubei, lun madügün nan ni cáta lun jamúga nanügün busíganu luágu, gayáaraügü lámuga nadímurejan manúfudeiga, arijúa mémetima lámuga luweírigun Crístu nuágu guetó quei súnwandan, wínwañu áu yebe, jiláñu áu yebe. ²¹ Lugúndun ánjana abágarida méme, lúnba Crístu nabágarida, ánjana ouwe, buítimaabei nun lugúndun lúmounbadina Crístu. ²² Ánjein gayára lubei nasígirun ñadágimein luágu láni nabúreme Crístu fuleísei láu nasígirun abágarida, ibídiñeti nun ca lan buítimaabei, ánjein lun lubei nasígirun wínwañu ódi lun noúnwen. ²³ Jénrenguti nun lun nanúadajan lídan bián cátei le. lídan ában oubaü, buséntina jamúga noúnwen lun nídin erédera lúma Crístu, lugúndun buítimaati jamúga líra nun, ²⁴ lídan le ában oubaü, buítimaati jun lun nasígirun abágarida. ²⁵ Áni quei choúru náni cátei le, subúdi numúti luágu nerédera mémeba lan júma lun níderagunün lun jasígirun jubáruaguouün, lun giñe jagúndaaruntima lídan jafiñen. ²⁶ Ítara lúba jiñúragüdüni líri Crístu Jesúsu luágu lagíribudagüdüna júmoun.

²⁷ Joucha jumá lun úragua lan ligáburu jabágaridun lúma larúfudajan Crístu. Ítara lúba, ánjana ñüdüñ aríjaün o ánjein díseñu níña lubei jueí lun agáambarügü nan juágu, gayára lámuga nasúbudiruni luágu derégüdagu meme jiña lan áni lídaañadün lan giñe ában, áfaagua súngubei lídan ában lun labúruchagun afiñeni luágu Jesucrístu queiísi Wasálbaragüle, ²⁸ mígiraguagüdünga júngua lun janúfudedagun jaweí jáganiñu. Ladüga jáganiñu lan güriquia jagía, arúfuda lumúti líra furáangu luágu joudíña lan lídoun güriñguaü, arúfuda lumúti giñe jasálbarun jugúya le afiñebei, áni lúmagiñe Búngiu liábin cátei le. ²⁹ Ladüga Crístu, gayáraati mámarügü lun jafiñerun luágu, gayáraati giñe jasúfurirun lueigiñe. ³⁰ Jugúya núma, lídaañadiwa ában méme áfaaguni. Aríja jumáali meja ída líña lan náfaagun, guetó agáambatün luágu ída líña méme lan náfaagun.

2

Lünabugun Crístu lúma luweírigun

¹ ¿Sandítünsan dügüdaguaü ladüga lídaañadün lan ában lúma Crístu? ¿Barütünsan gurásu luágu línsiñejabu jun? ¿Eíbugatünsan sun jugúya lúma Sífiri Sándu? ¿Subúdi jumútisan lugúdemejabu Crístu jun lúma lareídun? Afiñetina luágu ítara líña lan. ² Ligía lébubei namúriajan júma lun jaganoún lídan úarani lúma ínsiñejabuni júmawagua, lun ában lan jarítagun, ában lan giñe jáfaagun luágu buri cátei le láni Crístu. Láu jabágaridun ítara, buin lúba nugúndan jáu. ³ Madüga jumá ni cáta juouguarügü lun janügüniwa weíri, ni luágu pántaü, adüga jumei cátei láu ünabuguni. Buídulá janügüniña ámu güriquia jueí guánarügü. ⁴ Mámarügüla cátei le buídubei jun jáluaja, áluaja jumei giñe le buídubei joun ámu.

⁵ Ítaramemelá ligáburu jasáminarun quei meja ligáburu lasáminarun Crístu Jesúsu. ⁶ Láu sún meja Búngiu Irájü lan ligía, málugunti larügüdüni lirícha quei Búngiu. ⁷ Lubáragiñe líra, ába lígiruni le lánibei, ába ladügün quei músu láu lagüriajouün quei wügüri. ⁸ Dánti le ítarajali quei wügüri, ába lünabudaguagüdüntima lúngua, áni ladüga lagáambadi, ába louñwen luágu gurúwa láu sun nibúsigarídüna lan ouweni luágu gurúwa. ⁹ Ligía lichugunbalin Búngiu líñun-ágei uweíriguni lun lúma íri le weírigutimaabei lídaangiñe súngubei, ¹⁰ lun dan lan jagáambuni sun ja siélubaña, ja múarugunbaña, jáma ja lábugiñebaña múa líri Jesúsu, lun jájuduragun lun,

11 lun giñe jasúbudiruni súngebey, aríñaga jagíame luágu Jesucrístu lan Wabúremebei, lun líñurún líri Búngiu Úguchili.

Ítara jáña lánigu Crístu quei larúgounga ubouágu

12 Ítara líña lubeíti nidújeñu jínsiñetiña nun, ítara quei agáamba jumánina súnwandan dan lé meja júmañadina lan, agáambatima jumána guetó dan le díse nan. Eíbuga meme jumá jubáruaguoun lídan lémeri Crístu láu únabuguni lúma inébesey lun Búngiu daríme jebélurun siélun. 13 Búngiu íchugubalin lubuídun ayúmajani jun lun jeíbugun lúma, íderagualaún lun jadúgüni quei labúseeruni.

14 Adúga jumeí sun cátey láu ugúndani, masígenejaanga, 15 madárirúniwa lámuga dúru juágu, ni mégeiti, lirájüñü jumámuga Búngiu jarúmatiña jagánagua gürígia wuríbatíña, magáambaditiña lun Búngiu. Jugúya, jarúgoungadagúdatün jagánagua gürígia jagía quei warúguma lídan ában fulásu búrigati, 16 íchigeina ugánu luáguti íbágari magúmuchaditi joun. Láu jigáburidun ítara, gúndaabadina juágu dánme le lachülürün wéyu le líabingüle Jesucrístu, láu nasúbudiruni luágu máma lan luágu ní cáta nuwádigimarida jagánagua. 17 Íbini lun lan níchugun nibágarí guánarügü lun loustarun jafiñen, le queísibey ában edéweejani buíti lun Búngiu, gúndaabadina úara júma luágu lubuídun wedéweejan lun Búngiu. 18 Lun jamúga lasúseredun ítara lun nouñwen luágu nesériwidun lun Crístu, lúnti giñe jagúndaarun úara núma.

Timotéo lúma Epafrodító

19 Ánjein busén lubei Wabúreme Jesucrístu, nouñajabei Timotéo aríjaün madíse, lun gayáraabei lan nagúndaarun dánme le lagíribudun láu ugánu nun juágu. 20 Úati ámu núma le asáminaruti quei áu, le áfaaguti lun buídu lan lídin jun, 21 súngebey jawougua rügüñein jarítagua, mebéréseguntiña láu le labúseerubei Crístu Jesús. 22 Ánjeinti Timotéo, subúditi ligáburí jun, ída líña lan lesériwidun núma lídan lapúrichijoún ugánu le lánina asálbaruni queísi ában isáani le íderaguti lúguchi. 23 Agúrabatina lubeíti nouñajani aríjaün lárígiñeme nasúbudiruni ánjein náfuriduba lubeí furísunrugugiñe, 24 láu sun afiñe nan luágu niján lan lugúndaanbey Búngiu, lun nídin aríjaün núngua madíse.

25 Genége lumúti giñe nun luágu lúnti lan nouñajani nibíri Epafrodító lárigoún júmoun. Quei jasúbudirun, ligía nouábey lídan luwádigimari Crístu lúma lídan áfaaguni, le jóñajabei jugúya guánarügü nun lun leténirun lun le nemégeirubei. 26 Weírity labúseerun laríjinün áni gíbeti larítapun ladúga jagáambun luágu lasándirun. 27 Inárüni luágu sándi lán meja, yaráfa lun louñwen, ába gudémejabu lan Búngiu lun lúma nun lun mabíjin nan írúni lánwoun le núagubei, ába lareídaguagüdüni. 28 Ligíatima nabúseerünbey nouñajani lun jagúndaarun láu jaríjini. 29 Resíbi jumeí láu sun ugúndani queísi idújei lueígiñe Wabúreme Jesucrístu, áni jínsiñe jagíame sun ja ítarabaña quei ligía jun súnwandan, 30 quei chülü lubei yaráfa lun louñwen ladúga lesériwidun lun Crístu. Deréguati lúngua, mebérésegunga cába lan asúsereda lun, lun lesériwidun nun, cátey le jásiñerubei adúga lugúndun díseñu jíña lan nueí.

3

Úma le inárüti lun weréderun richágu ligíbugiñe Búngiu

¹ Lagúmujoún cátei, nidújeñu, gúnda jumá lídan Wabúreme. Mabúchati nuágu abürüjei le abürüja náalibei jun, lugúndun buíti jun. ² Cátei ligía, lun toúnigigua jumá júngua jawei ja ítarabaña oúserun quei oúnli, ja adúgúbalin le wuríbabei, ja íbagubalin úgubu. ³ Aríñagatiña yéetiña jagía luágu lúnti lan jerésibiruni wügüríña circuncisión lun lánigu jamá Búngiu, iyéeni líra. Lirájüñü Búngiu le tímataati wagía le agúnfulirubei lúma láu lubáfu láni Espíritu le wádaanbei, wagía le gúndaabei láu lánigu wamá Crístu Jesúsú áni míchu wamúti weménigi luágu cátei bougudinti luei lun wasálbarun. ⁴ Lun jamúga gayára lan wasálbarun luágu cátañañadiwa lan bougudin luei Jesucrístu, garíchatina jamúga lun neménigidun luágu buri cátei ligía, úati jamúga ni ában garíchati nuei lun leménigidun luágu buri cátei ligía. ⁵ Widü wéyu lueígiñe nagüriajoún, ligía nerésibiruni circuncisión lugúndun jarásan israelítagu áu, jádaangiñetina lufámilian Benjamín, hebréo áu lúmagiñe nagüriajoún, hebréogu giñe nagübürigu. Fariséo meja áu lídan ligáburi gunfaráanda náni jalúrudun juríu, ⁶ janárimeti meja neméendün darí neíbaajaniña afñetiña luágu Jesucrístu. Luáguti lísurun íbágarí según jalúrudun juríu, úati meja ni ában lun gayára lan laríñagun ni cáta nuágu. ⁷ Ánjeinti guetó, sún buri meja cátei le, lé meja weíritibei cátei nun, barü numuti quei ni cáta lun gayáraabei lan nasígiruni Crístu. ⁸ Sügü láu líra, sun cátei le gayáraabei jamúga nñein lan núma, rúnnumuti quei ni cáta ligíbugiñe oúnwenbun agáñeiruni le luágubei nasúbudiruni Wabúreme Crístu Jesúsú. Féridi náali sún buri cátei le ladúga nasúbudiruni Crístu, áni barü numuti sun le quei ífei lun nagáñeiruni Crístu, ⁹ lun nadáriragun núngua lídan ában lúma. Guetó, gumúja náfaagun lun neréderun richágu ligíbugiñe Búngiu luágu lubuídun nagúnfulirun lúma lilúrudun, lugúndun barülaadina Búngiu richágu ligíbugiñe láu naffñerun luágu Jesúsú. Richáguau ligía ában cátei le lídaangiñeti afñeni, máma adúgüni. ¹⁰ Le nabúseerúbei, lun nasúbudiruni Crístu buídu buídu, lun nasándiruni lubáfu meme Búngiu le ásaaragüdúbalin Jesúsú lídaangiñe oúweni nuóugua, lúma lun nasúfurirun luágu queisi lasúfurirun nuágu, ¹¹ lun ítara nan quei ligía lídan loúnwen láu eménigini luágu násaaruba lan lídaangiñe oúweni quei ligía.

Áfaaguni lun lachülürün lídoun lébeja

¹² Máma naríñaguña luágu chülújadina lan lúmoun lébeja lídan sun cátei le, maríñaguntina giñe luágu buídujali lan nigáburi lídan sun cátei, le nadügübei, nubáruaguouñadina méme lun ítarabadina lan queisi meja labúseerun Crístu lun ítarabadina lan dán meja le lasálbarúnbalina. ¹³ Nidújeñu, maríñaguntina luágu íbja náali lan sun cátei le, le nadügübei, nabúleiduni sun le eréderubei árigi lun náfaagun lun nárügüdüni le nigíbugiñebei, ¹⁴ lun nachülürün lúmoun lébeja eíbaaguni ligíbuagu ubou le, lun nagáñiruni le lúnbei líchuguni Búngiu siélu joun sun ja lídaanbaña ában lúma Crístu Jesúsú.

¹⁵ Sun wagía le weínamujalibei lídan wafñen, lúnti wasáminarun ítara. Ánjaün asáminara lídan ámu luwúyeri lídan som cátei, larúfudubei giñe Búngiu cátei le jun. ¹⁶ Luágu sun luwúyeri, lúnti wasáminarun lúma lun wabágaridun úaragua lúma cátei le furéndeí wamáalibei.

¹⁷ Nidújeñu, amúriajatina júma lun ában lan jarítagnun lun jafálaruni náni jémpulu, aríja jumáña giñe ja abágaridubaña según jémpulu le wíchugubei jun. ¹⁸ Aríñaga náali jun sarágu weíyaasu áni naríñagayaali jun láu águiraü, luágu añájein lan sarágu ja aríñagatiña luágu afñe jamá luágu Crístu,

abágaridutiña queísi láganiñu Crístu le ouwebei lun larúmadagüdüniwa. ¹⁹ Lídaanme lagúmujoún dan, güriñguabei cátei joun—jasúfuriruba luágu jafígoun lun sun dan. Lé buri cátei le wámaabei joun, ligía jabúngiutebei, apántajatiña láu buri cátei le jamúga lúnbei nibúsigari jamá láu. Luágu rügüñein buri cátei uboúaguna jarítagua. ²⁰ Ánjein wagía, siéluna wagía, áni wagúrabuña liábin Wabúreme Jesucrístu le Wasálbaragüle siélugiñe. ²¹ Lídaanme wéyu ligía, lasáansirubei wágubu le emégeirubei sarágu lun itara lan quei lúgubu, le úabei lemégeirun. Áni ladügübei láu méme ubáfu le luágubei lun líchuguni sun cátei lábugiñe lagúmadijan.

4

Gúnda jumá súnwandan lídan Wabúreme

¹ Ligíati nidújeñu jínsiñetiña nun, itara méme jumá derégüdagu lúma Wabúreme.

Oúnwenbun nabúseerun naríjinün, jugúya nugúndanbei lúma nafáyeiruaja luágu nesériwidun lun Crístu.

² Ayúmuraguatina tun Evódia túma Síntique lun jebélurun lídoun úarani queísi idújeñu lueígiñe Crístu. ³ Ánjein bun, nouba buíti lídan wadágimanu, amúriajatina búma lun bíderaguniña ítunu ja lun gamádagua jamá, lugúndun áfaaguatiña noubagiñe lídan lapúrichijoún ugánu le lánina asálbaruni, úara lúma Cleménte jáma buri jíbiri ja ñadágimeinbaña meja núma. Bürüwaali jíri sun jagía tídan lílburuna íbágarí magúmuchaditi.

⁴ Gúnda jumá súnwandan ladüga lídaañadün ában lúma Wabúreme. Aríñagaya numúti. ¡Gúnda jumá! ⁵ Subúdiwa jumá quei güriñgia areídatiña ladüga madíseeli liábin Crístu.

⁶ Magíbedalá jarítapun luágu ní cáta, aríñagarügü jumeí sun cátei lun Búngiu súnwandan dan le jayúmurapun lun, amúriaja jumá lúma, mabúlieidaguna lun jíchugun eteingiruni lun. ⁷ Ábameti líchuguni Búngiu lídarangilan jun, darángilaü le weírítimaabei lubáfu lun lagídarun jídíjeri sügü láu jubáfu lun jarítapun cátei le lúnbei jadügüni, áni darángilaü ligía, loúnigiruboun jarígi lúma sun jisáminan lueí idíjeri lídan le jeménigidun luágu Búngiu lídaangiñe Crístu Jesús.

Samína jumá luágu le buídubei

⁸ Lagúmujoún cátei nidújeñu, samína jumá luágu sun le inárütibeí, sun le gadúnabei inébeséi, sun le richábei, sun le jarúmabei, sun le gúndaawabei láu, sun le uágubei buídu lan ladímurejoúa. Samína jumá luágu sun le buídubei lúma sun le gadúnabei uweíríguni.

⁹ Falájumei sun le arúfuda náalibeí jun lúma sun le resíbi jumáalibeí númagiñe. Gúnfuli jumá láu le naríñagubei jun, áyeija jumeí nigáburi. Ábame júma lan Búngiu láu lídarangilan le líchugubei.

Jedéweejan Filíposna seínsu lun Páblo

¹⁰ Oúnwenbun nugúndan lídan Wabúreme luágu jarítaguayaadün lan nuágu. Maríñaguntina luágu bulíei jumáadina lán yebe, madárirügü jíñáalin ligáburi ída lúba lan líderagunina. ¹¹ Mabúseerúntina jamúga jarítapun luágu nadímurejañein lan lueígiñe nemégeirun, lugúndun furéndeijadina lun gúndaañu nan láu le númati, ¹² subúdi numúti labágaridúniwa lídan gudémein, subúdineí giñe gámawa lan gíbe. Furéndeijadina lawandúniwa furúmieguarügü igáburi, ilámaü yebe o

quimúle, níjein lan darí lun lígiragún o úa lan ni cáta. ¹³ Úati cátei jénreenguti nun ladüga lídaañadina ában lúma Crístu le íchugubei ubáfu nun. ¹⁴ Láu sun líra, buítí jadüga láu jíderagunina lídan lénreengünga nun.

¹⁵ Queísi giñe jasúbudiruni, jugúya Filíposna, lárigiñe meja napúrichijani ugánu le lánina asálbaruni jun, ába náfuridun Macedóniagiñe, jugúya rügüñadün tílana ligílisi oúnaja seínsu nun quei ateíngiragülei luágu nesériwidun jun. ¹⁶ Sun meja anájagua lan ubúrugu Tesalónica, oúnajatün edéweejani nun, mámarügü ában weíyaasu, lun le nemégeirubei. ¹⁷ Máma jamúga nasáminarun lun gubeírügü nibíjin som cátei, le nabúseerúbei, lúntima lagánwoundun le lúnbei jibíjini lúmagiñe Búngiu. ¹⁸ Áu, resíbi náali súnigubei lúma sügü láu lé yebe lúnbei nerésibiruni, láu le jóunajabei nun lúma Epafrodíto ígiraguaali núma. Le jóunajabei nun, ítara líña quei líjeme cupáli le águdajoúti lun Búngiu, ában edéweejani le lerésibirubei láu ugúndani. ¹⁹ Líchugubei lubeítí Nubúngiute sun le jemégeirubei jun queísi buri luweírigun lírísín, lídaangiñe Crístu Jesúsu. ²⁰ ¡Uweíriguni lun Wáguchi Búngiu lun sun dan!

Lagúmujoún buri mábugaü

²¹ Rújumei numábugaü lídan líri Jesucrístu joun sun ja lánigubaña Búngiu. Mábuga jáña wadújeñu lueígiñe Jesucrístu ja yábaña núma jun. ²² Sun ja yábaña Róma ja lánigu Búngiu, játima tílana lúban urúei, mábuga jáña giñe jun.

²³ Binílaün Wabúreme Jesucrístu sun jugúya. Ítaralá.

LIGÁRADAN PÁBLO JOUN COLÓSASNA

Labürüijan Páblo joun tílana liglisi to Colósasboun

¹ Anája áu Páblo, le ában láni Jesucristu apóstolu láu lugúndan Búngiu. ² Úara lúma Timotéo le wadúje lueígiñe Jesucristu nabürüjañoun gárada to jun, jugúya le lánigu Búngiu ja gúnfulibaña lúma Crístu le uágubei jafiñera, ja ubürugubaña Colósas. Binílaün Wáguchi Búngiu, íbija jumá giñe darángilaü lúmagiñe.

Layúmuragun Páblo jawágu afiñetiña lun Búngiu

³ Súnwandan weteíngiruni Búngiu, le Lúguchi Wabúreme Jesucristu, dan le wayúmuragun lun juágu. ⁴ Agáambaadiwa luágu jafiñen luágu Crístu Jesús lúma luágu jínsiñejabu joun sun ja lánigubaña Búngiu, ⁵ ladüga eménigini le juágubei luágu le areidúañubei jubá siélu. Chülütün árügüdei eménigini le lárigiñe jagáambuni ugánu le inárütibeí, ugánu le luáguti asálbaruni. ⁶ Ugánu méme le, lé meja apúrichijóubei jun, labúrchaguña lídan sun ubouú, lasáansiraguña jagáburi gürígia ítara quei lasúseredun jídan lúmagiñe jagáambuni ladímurejóun luágu línsiñejabu Búngiu, ába jasúbudiruni luágu inárüti lan ínsiñejabuni le. ⁷ Ligía cátei le larúfudajabei Epáfras jun, le ñadágimeinjalibeí wáma. Jínsiñeti woun, subúdi wamúti luágu gayára lán meja weménigidun luágu lun lesériwiduni Crístu buídu jagánagua wawéñegua. ⁸ Barújali ugánu woun juágu lúma luágu jínsiñejabu le rúlaalíbeí Búngiu jun.

⁹ Ligía lúmagiñe lubeí wéyu le wasúbudirunbalin cátei le, merédeti wayúmuragun lun Búngiu juágu, lúma wamúriajan lúma lun lasúbudiragüdüni lugúndan jun buídu, ru ligíame sun luwúyeri subúdi lúma gunfaráandaü jun luágu cátei le larúfudajabei láni Espíritu jun. ¹⁰ Ítara lúba gayára lan jagáburidun queísi lúnti lan jagáburidun lánigu Wabúreme, adúgei le áubei lagúndaara súnwandan, arúfudeina ában alúbajani le lánina sun luwúyeri cátei buíti, lun giñe jasúbudirunitima Búngiu. ¹¹ Amúriajatiwa lúma lun léredagüdünün láu luweírin lubáfu lun gayára lan jawánduni sun cátei láu sarágu gurásu lúma ugúndani, ¹² lun giñe jeteíngiruni Wáguchi Búngiu luágu aráanse láadiwa lan lun werésibiruni wafánran lídaangiñe le lúnbeí líchuguni joun lánigu lídaanme larúeijan le lánina larúgounga. ¹³ Séfu lumútiwa Búngiu lídaangiñe lubáfu lubúriga, ába líchuguniwa lídoun larúeijan Liraü le jínsiñebeí lun, ¹⁴ le asálbarubaliwa láu loúnwen, chibálei wafígoun.

Aráandaruni lúma Búngiu láu loúnwen Crístu

¹⁵ Wáguchi Búngiu le siñábeí jaríjini gürígia, ába liábin ubouúagun lídan ában luwúyeri le gayáraati jaríjini gürígia lídan Liraü le Jesucristu, le weírigutimaabei lídaangiñe sun cátei le níjeinbeí. ¹⁶ Lídaangiñe Crístu ladúgei Búngiu sun cátei le siélurugubei lúma le ubouúagubei, dándu buri cátei le marijínbeí quei le arijúabei. Lídaangiñe Crístu ladúgei arúejani, gumádi, lúrudu buri lúma buri ubáfu le jáni ánjeligu, áni lun giñe Crístu ladügüwa. ¹⁷ Lubáragiñebeí sun cátei, níjeinjali meja Crístu, áni láu lubáfu, níjein lubeí sun cátei lídan lubára. ¹⁸ Lougíñe sun líra, Crístu jachügüdinabeí lánigu, ja giribaña lúgubu, ja giñe giribaña lilígilisin. Ligía le íchugubei íbágari lun úgubu ligía, ligía furúmiñebeí ásaara lídaangiñe ouweni lun mouñwendügüyaali lan,

lun ligía lan láu furúmiñeti ubáraü lídan sun cátei. ¹⁹ Ítara líña labúseeruni Búngiu lun níjeinbei lan sun le ligíabei lídan Crístu. ²⁰ Lídaangiñe Crístu, ába laráandaragüdüni Búngiu sun ubouú dayárugubei lúmagua, dándu buri cátei le ubouágubei quei lé buri siélubei, ladügüni aráandaruni ligía láu louñwen Crístu luágu gurúwa.

²¹ Jugúya, teréncha buri meja jugúya lun Búngiu, lágani buri meja Búngiu jugúya tídan janígi ladüga buri cátei wuríbati le jadügübei. ²² Ánjeinti guetó, aráandaragüda láadün Búngiu lúmagua láu louñwen Crístu lun larúfudunün jarúmañu, madúrunga, queísi lánigu ligíbugiñe. ²³ Ítara méme lúba giñe ánjaün asígira derégüdagu lídan jafiñen, ragüñu buídu luágu Crístu, migirunga jumei eménigini le juágubei le íchugubalin ugánu lánina asálbaruni le jagáambubei. Ligía ugánu le apúrichijoubei lídan sun ubouú, le giñe napúrichijabei, áu Páblo.

Rúlumuti Búngiu Páblo lun lesériwidun joun tílana buri ligílisi

²⁴ Guetó gúndaatina láu le nasúfurirubei juágu, lugúndun láu igáburi le, gayáraati níderagun láu núgubu guánarügü lun loustaragüdüniwa le lúngilíbei lasúfuriruni Crístu jawágu lánigu, jawágu lilígilisin ja lúgubu. ²⁵ Núbínjadina lun ábanbadina lan jádaangiñe ja esériwidubaña joun lánigu Crístu luágu wadágimanu le líchugubei Búngiu nun luágu jufúleisein, jugúya le mámabei juríu, lun napúrichijani ugánu le láni Búngiu jun quei lubúdubu. ²⁶ Ugánu ligía, cátei lé meja arámudañu lubei Búngiu lúmagiñe sarágu dan, áni guetó subúdigüda láali joun lánigu. ²⁷ Joun lánigu Búngiu labúseera lasúbudiragüdüni luweírín irisini le lídaanbei cátei arámudaguati le, le júnbei jugúya le mámabei juríu dándu joun ja juríubaña. Cátei arámudaguati ligía, luágu níjein lan Crístu jídan, juríu yebe, máma yebe juríu, áni ligía le ídaanbei jíchigei jeménigi luágu uweíríguni le lúnbei jibíjini siélu.

²⁸ Luágu Crístu wapúrichija, aríñagatiwa joun sun gürígia lun járügüdüni lémeri Crístu, arúfudaja wagía luágu, lun gunfaráanda jamá buídu buídu, faráragua jagía buídu lídan ában lúma Crístu. ²⁹ Ligía nuwádigimaridunbei, áfaagueina láu sun érei lúma ubáfu le líchugubei Crístu nun.

2

¹ Buséntina lubeíti lun jasúbudiruni luágu luweírín lidíjari narítangun juágu, lúma jawágu afíñetiña ja Laodicéabaña, lúma jawágu sun jibirigu afíñetiña ja maríjin jamágidinabaña. ² Weíríti nayúmajan lun gagúraasun jumá tídan janígi, lun lídan jumá ában láu línsiñejabu Crístu juágu joun jibirigu, lun gunfaráanda jumáni linárün Búngiu buídu buídu lun derégüdagu jumá lídan le uágubei jafiñera, gayára lámuga jasúbudiruni laráansejan Búngiu lé meja arámudaguabei, le luáguti Crístu guánarügü. ³ Lídaañein Crístu sun linárün Búngiu lúma ubáfu lun gunfaráanda wamáni sún buri inárüni le, le queísibeí ában oúnwenbun irisini woun. ⁴ Naríñaguñein buri cátei le jun lun mayéedun lánün ni ában láu buri dimúrei buíduburiti. ⁵ Láu sun úa nan jigíbugiñe lun gayára lan jamúga jaríjinina, anájein júma lídan espíritu, áni gúndaatina láu naríjini luágu lídaañein lan dan sun cátei jurúma áni derégüdagu jíña lídan jafiñen luágu Crístu.

⁶ Ligía, ítara queísi jerésibiruni Wabúreme Jesucrístu láu sun jafiñen luágu, lúnti ítara lan jabágaridun lídan ában lúma, ⁷ lun ragüñu lan jibágarí

luágu lídan le jídin jubáruaguóun lúma, derégüdagü lídan jafíñen ítara queísi larúfudajoúniwa jun, láu eteíngiruni lun Búngiu súnwandan.

Iséri ibágari lídan Crístu

⁸ Tóunigi jumá, mígiraguagüda jumá júngua joun ja busénbaña jayéjean láu buri arúfudajani málali. Máma lúmagiñeti Crístu cátei le jarúfudajabei, lúmagiñeti jagáburi binádu mútu lúma buri ligáburi jarítangun gürígia lánina ubouú le luágu cátei.

⁹ Níjein sun le Búngiubei lídan Crístu, ¹⁰ áni jugúya, buin jíña láu Búngiu lugúndun lídaañadün ában lúma Crístu. Jéreti Crístu lueí sun lúrudu lúma ubáfu le ubouúagubei lúma le siélubei. ¹¹ Láu gíñe lídaañadün lan ában lúma Crístu, queísigubeirügü resíbi jumáli lan circuncisión lé meja jerésibirubei binádu juríu lun jarúfuduni luágu lánigu jamá Búngiu. Circuncisión le jíbíjubei, máma le adügübei láu bíti luágu úgubu, jáni circuncisión, láu jasálbarun lídaangiñe figouú le áubei jiábin ubouúagun. Niján luwúyeribeí ladügüniwa Crístu lun lánigu wamá Búngiu. ¹² Láu jabásterún, arúfuda jumúti luágu bunáwa jumá lúma Crístu lun ibágari le binádubei, sarátún gíñe lúma lun ibágari le iséribei ladüga jafíñerun luágu lubáfu Búngiu le ásaaragüdübalin lídaangiñe ouweni. ¹³ Luágu meja ában dan, jiláñu jíña meja lun cátei lánina Búngiu ladüga jifígoun, ladüga gíñe jabágariduña lan queísi gürígia bouguditiña lueí lilúrudun Búngiu, agúnfulireina lúma sun luríban layúmajan júra. Ánjeinti guetó, rújali Búngiu iséri ibágari jun úara lúma Crístu. ¹⁴ Láu loúnwen Crístu, ferúduna láali Búngiu sun wafígoun, ába lagúmchaguagüdüni Búngiu lilúrudun Moisés lúma buri sun gumádi le lánina lúrudu ligía le áubei mabáfu wamá lun wagúnfulirun, queígubeirügü jamúga dágua láni Búngiu lúrudu ligía luágu lugúruwan Crístu. ¹⁵ Dan le loúnwenbei Crístu luágu gurúwa, gáñei lumúti Máfia lúma buri líbiri ubáfu wuríbati, ába lúnabudagüdüniña ligíbugiñe guríriguaü, ába lanügüniña quei adaürütiña lun.

Áluaja jumeí buri cátei le lánina siélu

¹⁶ Úa la ni ában añáwaríjati jarítangun luágu buri arúfudajani lánina cátei le lúnbei jeígini o le lan lúnbei játuni lun jagúnfulirun lúma Búngiu, o luágu lán buri fédu le jarítaguagüle luágu iséri írúmu, lúma iséri játi, o luágu lan wéyu le eméraaguagülei. ¹⁷ Sún buri cátei le, lúntirügü lagúnfulirúniwa lúma darí meja liábin Crístu ubouúagun, liyáwa rügüñein le lúnbei liábin, Crístu ligía linárünbei. ¹⁸ Mígiraguagüda jumá júngua joun ja afámurubaña quei ünabugutiña, ja ájuduragubaña joun ánjeligu, lun janügüni jagáñirun jueí. Weíríti jadímurejan luágu nege buri cátei le ayáwadaguti joun, ába buri janáangun jóungua luágu ligáburi jasáminan, le jáni gürígia. ¹⁹ Mámañanu lídan ában lúma Crístu, le ichügüdünaü joun sun lánigu ja gíribaña lúgubu, le ágüdjabalin úgubu ligía, le awáanseragüdübadiwa lídan cátei le lánina Búngiu, ru ligía ubáfu woun lun gayáraabei lan lídan wamá ában queísi labúseeruni Búngiu. ²⁰ Jugúya, ígira jumáli binádu jigáburi, queísi lídaañadün lan ában lúma Crístu, gidáadün lídaangiñe ligáburi jarítangun gürígia luágu buri cátei. ¿Cáti uágu jabágaridunbei camá jamuga lánigugidün ubouú, ²¹ íchaagua júngua lun ligáburi ubouú lun jagúnfulirun lúma Búngiu queí buri jamúga lúrudu le aríñagubei. “Magúurabei le, meígabei líra, márügüdüabei cátei ligía”? ²² Sún buri gumádi le, luáguti buri cátei le gagúmchaditi láu layúsurún, áni máma ámu cátei lueí gumádi buri lúma arúfudajani le jáni

gürígia. ²³ Inárüni luágu gayára lan genége láni buri cátei lánina subúdi lugúndun labúseerúniwa agúnfuliruni lúma ünabuni lun lagúnfulirúniwa láu, áni deréti líra woun. Láu sun líra, mabáfuti lúrudu buri ligía lun lídejan luágu luríban jayúmajan gürígia.

3

¹ Queísiti jabágariduña lan ában ibágari iséri ladüga lídaanjadün lan ában lúma Crístu, áluaja jumei buri cátei le lánina siélu, le ñí lubei Crístu ñun lueígiñe loúnwenren Búngiu. ² Samína jumá luágu buri cátei le lánina siélu, máma luágu buri le lánina ubou. ³ Jilátün lúma Crístu lun ubou le, guetó, níjein jibágari le tímatisaati lúma Crístu le yágütabei siélu lúma Búngiu. ⁴ Dánme lagíribudun Crístu, le úmabei lídan wamá ában, wachülaaguba giñe lúma, ábame gafánran wamá lídan luweírigan.

Binádu ibágari lúma iséri ibágari

⁵ Ígira jumei sun le jigáburibe le láninabei ubou le. Úa la ni ában jídaangiñe agámariduti mamárieidunga, madügün jugúyame cátei wiyeti, mafálara jumei luríban ayúmajani, maweínamulá jágu luágu cátei le máma jáni, le méme ájuduraguni joun sándu. ⁶ Lueígiñe buri cátei le, láburujan lanátime ligáñi Búngiu jawágun ja madügünbaña gásu láu. ⁷ Jugúya, adüga buri jumúti meja cátei le lídan meja binádu jibágari, ⁸ ánjeinti guetó, ígira jumei sún buri cátei le. igáñi, iyéreejabuni, wuríbani, anábajani, lúma buri dimúrei wiyeti. ⁹ Maríñaga jumá iyéeni júmagua quei ígira jumáli lan binádu jigáburi lúma lé buri meja jadügübei. ¹⁰ Isérijali jigáburi le isérideinábei quei méme ligáburi Búngiu guánarügü le adügübalin, daríme jasúbudiruni Búngiu buídu buídu. ¹¹ Iséri ibágari ligía, mámaali cátei lánina juríu jumá o máma jumá juríu, ni lánina jerésibiruni circuncisión lúma merésibirun jumáni, ni lánina teréncha jumá o máma jumá teréncha, machülaaguntiña, idámuni, máma idámuni, Crístu, ligía sun cáteibe, áni níjein giñe jádan sun lánigu láu láni Espíritu.

¹² Jínsiñetün lun Búngiu, anúadaja láadün lun lánigume. Ítara líña lubeiti, abágarida jumá queisi lánigu, láu gudémejabu, areíduni, manáanguni únguaü, gagáambadi, lúma gagúraasuni. ¹³ Gagúraasun jumá jubáruagua, ferúdnagua jugúyame júmawagua, ítara quei ferúduna lánün Crístu, ítara lá giñe jadüga. ¹⁴ Lougiñe sun cátei, jínsiñejabu jumá, ligía cátei le íchugubalin sun cátei lídan ában, áni joustagüdaleí lubuídun jigáburi. ¹⁵ Abúguraleí lidárangilan Búngiu sun le jadügübei, ladüga ligía lagúarunbei Búngiu jun lun ábanrügü jumá úgubu, abágarideina láu darángilaü. Geteíngiradi jumá giñe.

¹⁶ Buíngüdalouñ láni Crístu ugánu janígi le gumúti. Arúfudaja jumá júmawagua, aríñagagua jugúyame júmawagua láu lichú áu. Jerémuja luágu luweírigan Búngiu láu eteíngiruni lun tídan janígi. ¹⁷ Furúmieguarügü cátei le jadüga o le lan jaríñagun, adüga jumei lídan ában luwúyeri le íchuguti inébesi lun Wabúreme Jesucrístu, eteíngireina Búngiu Úguchili lídaangiñe Jesucrístu.

Igáburi le lúnbei wagáburiduni jáma ja wábiñebaña

¹⁸ Würíña, gagáambadi jumá joun jumarigu, ligía cátei buíti le lúnbei jadügüni queisi afiñetiña luágu Wabúreme Crístu. ¹⁹ Wügüríña, jínsiñe jamá jumarigu jun, magáñida jumá jáma. ²⁰ Isáanigu, agáamba jumáña jagübürigu lídan sun cátei, ladüga ligía jínsiñebe le lun Búngiu. ²¹ Agübürigu,

másügüragualá jagúmadiruniña jisáanigu, ragü jáñein magúraasuni.
 22 Esériwidutiña, gagáambadi jumá joun jiyúbudirigu lídan sun cátei, mámarügü dan le ariagu jáña lan jun lun jeréderun buídu jagíbugiñe, adüga jumei súnwandan táu sun janígi ladüga luweírin linében Búngiu jun. 23 Furúmieguarügü cátei le jadüga, adüga jumei láu ugúndani, camá jamuga jadügüñein lun Wabúreme Crístu máma joun güri-gia. 24 Subúdi jumáli luágu líchugubei lan Búngiu alágan jun queísi jafáyeiruaja, ladüga lun Wabúreme Crístu le Jabúreme le tímatimaati jesériwida. 25 Ánjeinti le adügüti wuríbatí, lerésibirubei lafáyeiruaja wuríbatí le ladügübei, áni ában láu lanügüniña Búngiu sun güri-gia.

4

1 Iyúbudirigu, lúnti buídu lan jigáburi jáma jumúsuniña, oúsera jumáña láu úarani lúma íríchaü, jarítagua jumá luágu níjein lan giñe ában Jabúreme yágüta siélu.

2 Ítara méme jumá ayúmuragua lun Búngiu sarágu, agáguduañu, eteíngireinei Búngiu. 3 Ayúmuragua jumá giñe wawágu lun ladáranun Búngiu béna wabá lun wapúrichijani ugánu le lánina asálbaruni lúma lun wasúbudiragüdüni laráansejan Búngiu le luáguti ñi lan Crístu jádan lánigu, juríu yebe, máma yebe juríu. Lueígiñe napúrichijani cátei le, nadaúrúwa. 4 Ayúmuragua jumá lun nasúbudiragüdüni furáangu quei lubúdubu.

5 Buídulá jóúserun jáma ja mafíñebaña, yúsu jumei jidáani lídan cátei le buídubei. 6 Lúnti gúndaawa lan láu jiyáanu súnwandan, lúnti giñe semé lan, lúnti giñe jasúbudiruni ída lúba lan jóúnabuniña güri-gia.

Lagúmujoín buri mábugäi

7 Laríñaguba wadúje Tíquico nuágu jun. Jínsiñeti wügüri ligía woun sarágu, ligía ában ídejati buíti le giñe esériwidubei lun Wabúreme Crístu núma. 8 Ligía nouñajaanbalin jun lun laríñagun jun ída wáña lan, lun giñe líchugun gurásu jun. 9 Níngira giñe Onésimo lúma, wadúje úaraguati le jínsiñebeí woun, le jupaísanun. Jagíaba abájüdagua jun luágu sun le asúseredubei ya.

10 Mábuga líña Aristárco le nouba furísunrugu jun, mábuga líña giñe Márcos le lidúje Bernabé jun. Aríñawagúaaali jun luágu Márcos, ánjein ñüdüñ aríjaün, resíbi jumei buídu. 11 Mábuga líña giñe Jesús, le giñe gíríbei Jústó, jun. Jagía rügüñanu jádaangiñe juríu affíñetiña ja ñadágimeinjáñabaña núma luágu larúeijan Búngiu, áni jayábin nun quei ában oúnwenbun dügüdaguaü. 12 Mábuga líña Epáfras le jupaísanun, le esériwidubei lun Crístu, jun. Ligía, súnwandan layúmuragun juágu lídan layúmuragun lun Búngiu lun derégüdagu jumá lídan jaffíñen áni derégeguñu júngua buídu buídu lun jadügüni lugúndan Búngiu. 13 Geféentina luágu jarítagua lan Epáfras juágu, lúma giñe jawágu ja ubúrugubaña Laodicéa lúma Hierápolis. 14 Mábuga líña Lúcas, le wasúrúsián, le jínsiñebeí woun, jun, lúma giñe Démas.

15 Mábuga níña joun idújeñu lueígiñe Crístu ja ubúrugubaña Laodicéa. Rújuma giñe mábugäi tun Nínfas lúma joun sunagun juágu lídan layúmuragun lun Búngiu lun derégüdagu jumá lídan jaffíñen áni derégeguñu júngua buídu buídu lun jadügüni lugúndan Búngiu. affíñetiña ja oúndaragubaña túbíñe lun jájuduragun lun Búngiu. 16 Lásunme jalíjanun gárada to júmagua, jóúnajounme lun jalíjanun túlana ligílisi Laodicéa, alíja jumoúnme giñe gárada to achülürúboun jun Laodicéagiñe to nabürüjáboun.

17 Aríñaga jumá lun Arquípo lun ladügüni wadágimanu le rúlaalíbei Wabúreme Crístu lun, buídu.

18 Niján numábugaü le nabürüjabei jun láu nújabu guánarü—áú Páblo. Jarítagua jumá luágu nadaürüña lan. Binílaün Búngiu. Ítaralá.

FURÚMIÑETU LIGÁRADAN PÁBLO JOUN TESALÓNICANA

Labürüjan Páblo jáma líbirigu joun tílana ligílisi to ubúruguboun Tesalónica

¹ Áu Páblo lúma Silváno láu Timotéo, wabürüjañoun gárada to jun, jugúya tílana ligílisi to Tesalónicaboun, ja lánigubaña Wáguchi Búngiu lúma gíñe Wabúreme Jesucrístu. Resíbi jumeí abíniruni lúma darángilaü jámagiñe.

Jémpulu lánina afiñeni lé meja jarúfudubei Tesalónicana

² Súnwandan weteíngiruni Búngiu juágu, sun jugúya, jarítagua wagía juágu súnwandan lídan wayúmuragun lun Búngiu. ³ Jarítaguatiwa ligíbugiñe Wáguchi luágu lubuídun jesériwidun lun Jesucrístu ladüga jafiñen luágu, lúma lubuídun jouseruniña wánigu ladüga buin tíña lan janígi láu ínsiñejabuni, lúma lubuídun jawánduni sun asúfuriruni ladüga jeménigidun luágu Wabúreme Jesucrístu le ídaangiñebei lan jachülúra siélu. ⁴ Nidújeñu, jínsiñetün lun Búngiu, áni subúdi wamúti luágu anúadaja láadün lan. ⁵ Lugúndun dán meja le wapúrichijanbalin ugánu luáguti asálbaruni jun, merésibirun jumúti queísirügü dimúrei, ñadágimeinti tídan janígi, láu lubáfu Sífiri Sándu, lun lasáansiraguni jigáburi. Resíbi jumúti meja ugánu ligía láu ichoúruni le tímatimaati luágu inárüni lan. Subúdi jumúti lubuídun wouserun jagánagua, lun ábanbadiwa lan jémpulu buíti jun.

⁶ Ába jáyejiani wagáburi, lúma ligáburi Wabúreme Jesucrístu, resíbi jumúti ugánu luágu láu ában ugúndani le líchugubei Sífiri Sándu jun, láu sun barü lan jerésibiruni Crístu asúfuriruni jun. ⁷ Ítara líña jiábin lun ábanbadün lan jémpulu joun sun afiñetiña ja loúbawagubaña Macedónia lúma Acáya. ⁸ Burúguaali ugánu luágu Wabúreme Jesucrístu jámagiñe, mámarügü loúbawagu Macedónia lúma Acáya, burúguaali lídan sun fulásu, áni subúdiwaali luágu afiñeni le jibíjubei luágu Búngiu lídan sun fulásu. Memégeirunwati wabájüdagun luágu jafiñen joun gürígia, ⁹ lubáragiñe líra, jagía guánarügü adímurejatiña woun luágu webélujan júmoun, abájüdagua jagía luágu lubuídun jerésibiruníwa, lúma luágu jígiruni jájuduragun joun sándu lun jafálaruni Búngiu, ába jagúmeserun esériwida lun Búngiu le wínwanbei, le gíñe tímatimaatibei. ¹⁰ Abájüdaguatiña gíñe juágu luágu jagúrabajañein lan lagíribudun Liraü Búngiu siéluigiñe—Jesúsu le lásaaragüdübei Búngiu lídaangiñe oúweni, le asálbarubáliwa lueí lanáreme afáyeiruajaü luágu figoú le lúnbei liábin.

2

Luwádigimari Páblo Tesalónica

¹ Jugúya guánarügü, nidújeñu, subúdi jumúti luágu máma lán meja luágu ni cáta wóudin aríjaün. ² Queísi jasúbudiruni, wuríbati meja jouseruníwa gürígia ja Filíposbaña, ába wayábin júmoun ladügarügü líchugun Búngiu anígi woun lun wadügüni. Ába wapúrichijani ugánu le lánina asálbaruni jun, mebésenga wagía láu le lúnbei wasúfuriruni jámagiñe gürígia ja mísiñejabubaña lun ugánu ligía. ³ Máma wapúrichijaña ladüga jamúga bulífeiguaü, queísi jariñaguni wáganiñu, ni láu luríban aritaguni, ni lun wayéedagunün. ⁴ Lubáragiñe líra, aríja lumúti Búngiu luágu buídu wamá,

ába líchuguniwa lun wapúrichijani ugánu le lánina asálbaruni, ítara líñati wadímurejan lun wagúnfulirun lúma eménigini le lánbei Búngiu wawágu. Máfaaguntiwa lun gúnda jamá gürígia wáma, wáfaagun lun gúnda lan Búngiu wáma, le asúbudirubarun wanígi. ⁵ Queísi jasúbudiruni, siñáti laríñawagún luágu adímureja wamá meja jun láu dimúrei buíduburiti, mayúsu wagía ni cátei lébuname wagáñeirun seínsu. Geféenti Búngiu luágu cátei le. ⁶ Máluajantiwa lun wibíjin uweíriguni jámagiñe ámu gürígia, ni júmagiñe, láu sun gayára lan jamúga wasándiragüdüni lijürü wagúmadijan queísi láni Crístu apóstolugu. ⁷ Lubáragiñe líra, ouserarügü wamútün láu ában uálini queísi ában úguchuru to agüriajabaliña tirájüñü, ouñigira táña. ⁸ Weíríti jínsiñe woun darí lun máma rügüñein lan jamúga láni Búngiu ugánu wabúseera wíchugun jun, buséntiwa jamúga wíchuguni wabágari guánarügü jun, le luweírin jínsiñe woun. ⁹ Nidújeñu, jarítagua jumúti ligáburi wawádigimari lúma ligáburi wáfaagun lun wawínwandun. Nádágimeintiwa meja wéyuagu áriebu lun mámabadiwa lan ijürügu lun ni ában jídaangiñe, sun awánja lan apúrichijei láni Búngiu ugánu jun.

¹⁰ Geféentün, geféenti giñe Búngiu luágu reidei wamá meja láu ában igáburi le jarúmati áni surú jídan, jugúya le afiñebei, míchugunga wagía lúgaaru lun ni ában lun líchugun wadúnrun. ¹¹ Subúdi jumúti giñe ída líña lan wíchugun gurásu jun lúma derégüdaguaü lun jafiñen, cáda ában jídaangiñe, quei ladüga ában úguchili joun lirájüñü. ¹² Aríñagaadiwa jun lun buídu lan jóuserun quei lúnti lan jóuserun lánigu Búngiu le agúarubei jun lun gafánran jumá lídan larúeijan lúma luweírigun.

¹³ Ligía, súnwandan lubei weteíngiruni Búngiu, lugúndun dán meja le jagáambunbalin láni Búngiu ugánu le wapúrichijabei jun, resíbi jumúti queísi ugánu láni Búngiu, máma queísi ugánu jáni wügüriña. Áni inárüni luágu láni lan Búngiu ugánu, le íchugubalin ubáfu jun lun jagáburidun buídu, jugúya le afiñebei. ¹⁴ Nidújeñu, dan le jeíbaajanbalün jupaísanun, suséreti jun quei méme le asúseredubei joun tílana buri ligílisi to Judéaboun, ja lánigu Búngiu lídaangiñe Jesucrístu, eíbaaja jamútiña giñe juríu ja japaísanun. ¹⁵ Juríu, jagía áfarubalin Wabúreme Jesúsu jilágubei, áfaragua jamáña profétagu, áni bugá jamutiwa giñe bougudin luei jageíra. Magúndaanti Búngiu jáu, jáganiñu giñe sun gürígia. ¹⁶ Dan le wabúseerun wadímurejan joun ja mámabaña juríu lun giñe jasálbarun, májatiñá yebe juríu lun wadügüni. Láu igáburi le, gánwounguaüda jamúti jafígoun. Ánjeinti guetó, liábindügürüga lanárime ligáñi Búngiu jawágun.

Busényati Páblo lídin aríjaña Tesalónica

¹⁷ Nidújeñu, murúsun dan lárigiñe wígirunün (láu sun ajünja méme lan tídan wanígi) ouñwenbun wabúseerun woúdinya aríjañ. ¹⁸ Jóuchatiwá yebe woúdin, áu Páblo, sarágu weíyaasu yebe nouchun nídin, áni ságü nouchun nadügüni, mígirun lumútina Máfia. ¹⁹ Ladüga jugúya guánarü íchugubalin ugúndani woun, jugúyaba arúfudei lubuídun wesériwidun lun Wabúreme Jesucrístu le uágubei gayára lan wemenigidun lun werésibiruni wafáyeiruaja dánme le lagíribudun, áni jugúyaba wagúndaaragüle dánme le jaráramun ligíbugiñe. ²⁰ Jugúya lébunabei wagúndan, áni rújadün lébuna wadímurejan buíti joun ámu júagu.

3

¹ Dán meja le siñá wamaali awánda masúbudirunga ída líña lan sun cátei júma, ába waritagun luágu buidutima lan lun werederun Aténas, áu lúma Silváno, ² lúma lun lídin wadúje Timotéo, le ában esériwiduti lun Búngiu lídan lapúrichijoún ugánu luágu Crístu le Wasálbaragüle, aríjaün. Oúnaja wamúti júmoun lun líderagunün arárama buídu lídan jafíñen, ru ligía gurásu jun, ³ lun úa lan ni ában eíquaduti larüna lueígiñe buri lénreengúnga le lasúfurirubei luágu lafíñerun luágu Crístu. Jugúya guánarügü subúdi jumúti luágu lúnti lan wagúrabajani asúfuriruni líbe le. ⁴ Dán meja le awánjagua lan júma, aríñagatiwa meja jun luágu lúnti lan wagúrabajani asúfuriruni luágu líri Jesucrístu, áni ítara líña lasúseredun, quei jasúbudiruni. ⁵ Ligía lébubei dán meja le siñánaali lan awánda, ába nouñajan álügüdaja ída jíña lan lídan jafíñen, ladüga nanúfude luei jamuga línchajanün Máfia lun jígiruni jafíñen luágu Crístu, ába jamúga liábin wawádigimari jídan lun ni cáta me.

⁶ Guetó, giríbujali Timotéo Tesalónicagiñe, áni barúti ugánu buíti woun luágu jafíñen lúma jínsiñejabu. Lariñajare woun luágu jaritagua jumá wawágu láu insiñeni súnwandan, luágu gíñe luweírin jabúseerun jaríjiniwa, ítara gíñe quei buséni wamá waríjinün. ⁷ Ítara líña lubeíti, nidújeñu, rújali ugánu le sarágu gurásu woun labádinagua sun lénreengúnga lúma idíjeri le wasúfurirubei guetó. ⁸ Ítara líña quei iséri ibágari woun wasúbudiruni luágu derégüdagu jíña lan lúma Búngiu. ⁹ ¿Ída lubá funasan wíchugun eteíngiruni buídurügüti lun Búngiu juágu, lúma luágu sarágu ugúndani le rújumaalíbei woun? ¹⁰ Wéyuagu, árieibu, wayúmuragun lun Búngiu lun gayáraaya lan waríjinün, gúnfuli lámuga le mégeíbei lídan jafíñen.

¹¹ Buséntiwa lun líderaguniwa Wáguchi Búngiu lúma Wabúreme Jesucrístu lun gayára lan wouídin aríjaün, ¹² lun gíñe laweíridagüdüni Búngiu jínsiñegua júngua lúma jínsiñejabu joun sun gürígia, ítara quei jínsiñe jumá woun. ¹³ Derégeguagüda lámugaün Wabúreme Búngiu júngua lun le gumúti, madúnrunga jugúyame ligíbugiñe dánme liábin Wabúreme Jesúsú jáu sun lánigu.

4

Igáburi le áubei lagúndaara Búngiu

¹ Nidújeñu, subúditi luwúyeri igáburi le áubei lagúndaara Búngiu jun, queísi warúfuduni jun, jagáburiduña ítara. Guetó, nidújeñu, ayúmuraguatiwa jun láu líri Wabúreme Jesucrístu lun ítaramemetima lan jagáburidun queísi labúseeruni Búngiu.

² Jaritaguatün luágu arúfudajani le wíchugubei jun láu lugúmadin Wabúreme Jesúsú. ³ Le labúseerúbei Búngiu, lun jabágaridun derégeguañu júngua lun, lun úa lan ni ában agámariduti mamárieidunga, ⁴ lun cáda lan ában lálujanun lúmari lau lubúidun arítaguni queísi labúseeruni Búngiu, lídan lubúdubu, ⁵ máma láu luríban ayúmajani quei jadügüni gürígia ja ibídiñejabubaña lun Búngiu. ⁶ Úa la ni ában adügüti wuríbani lun lidúje láu lagámaridunun lúmari, jéreti labeíchuni Búngiu le adügüti cátei le, queísi waríñaguni jun. ⁷ Máma lun wabágaridun lídan iwíyeni lagúara Búngiu woun lun lánigu wamá, busénti lun wabágaridun derégeguañu woungua lun. ⁸ Ítara líña lubeíti, le amájaruti lerésibiruni arúfudajani le, máma lun ni ában wügüri lamájara, lun Búngiu lamájara, Búngiu le íchugubalin Sífiri Sándu woun.

⁹ Luágu jínsiñejabu joun lánigu Búngiu, úati ni cáta lun nabürüjani jun lugúndun arúfudajaali Búngiu guánarügü jun lun jínsiñegua jumá, ¹⁰ áni ítara líña jadügüni joun sun jidújeñu lueígiñe Jesucristu ja lídaanbaña sun ubúruge Macedonia. Láu sun líra, nidújeñu, ayúmuraguatiwa jun lúntima lagánwoundun jínsiñejabu. ¹¹ Joúcha jumá jabágaridun darángilañu, beréseguñu lídan le lúnbei jadügüni. Ñadágamein jumá lun janúriragun júngua, quei waríñaguni jun, ¹² inébe jumámuga joun ja mafiñebaña luágu Jesucristu, úa lámuga gíñe jemégeirun.

Liábin Crístu

¹³ Nidújeñu, mabúseerúntiwa lun jeréderun ibídiñounga jun cába lan asúsereda joun jiláaña, lueí jajírudagun quei ja meménigidunbaña luágu níjein lan ában ibágari lárigiñe ouweni. ¹⁴ Ítara quei afiñe wamá luágu jilá lan Jesúsu áni sará ligía lídaangiñe ouweni, ítara líña gíñe afiñe wamá luágu lásaaragüdübaña lan Búngiu ja ouwegubaña afiñeñu luágu Jesúsu.

¹⁵ Ligía waríñagunbei jun queisi larúfudajan Wabúreme Jesúsu, luágu wagía lánme le wínwangilibei dánme liábin, mámaba wagía ñúdün jabáragiñe ja jiláguaañabaña. ¹⁶ Dánme le arárireina lan Wabúreme Jesúsu siélugiñe, ábame lagúarun joun jiláaña lun jásaarun, lagaambúba lumálali jábuti ánjeligu, lúma lumálali lifídun Búngiu. Gürígiamei ja ouwegubaña afiñeñu luágu Crístu, jagíaba ásaara furúmiñe. ¹⁷ Lárigiñeme, ábame wásaarun, wagía afiñetiña ja wínwangiñabaña, ábame wanügüniwa úara jáma lídoun juánriñu lun wadúnragun lúma Wabúreme Jesúsu garábalirugu. Ábame weréderun lúma Wabúreme Jesúsu lun sun dan. ¹⁸ Ligíati rújuma lubei gurásu júngua láu dimúrei buri le.

5

¹ Ánjeinti luágu cába lan dan lasúsereda buri cátei le, nidújeñu, mabúseerúnwati nabürüjan jun. ² Subúdi jumáli buídu buídu luágu lachúlürüba lan wéyu ligía dánme magúrabúniwa lan, queisi liábin ában íwerujati áriebe. ³ Dánme añája lan gürígia aríñaga. “Lídaañein dan sun cátei áni úati mégeiti”, ligíame liábin gürínguaü jawágun sódini quei liábin agáriduni tun würi dageínatu, siñábeiti jeséfurun. ⁴ Ánjeinti jugúya, nidújeñu ja afiñebaña luágu Jesucristu, máma lídaañadün lubúriga luágu cátei lánina Búngiu lun lárügüdünün luwéyuri liábin Crístu quei lárügüdün ában jíweruti. ⁵ Lídaañadün larúgounga sun jugúya, máma wagía lánina áriebe lúma lubúriga. ⁶ Ligía mouñ lubei lun maráanserun wamá quei ja mafiñebaña luágu Jesucristu, lúnti deréñuma wamá lubá lagíribudun, lídan wagíame lubuídun wachügü. ⁷ Ja arúmugubaña, áriebe jarúmuga, ja abácharuadubaña, áriebe jabácharuada. ⁸ Ánjein wagía le lánina wéyuagu, lúnti lídan wamá lubuídun wachügü. Lúnti wadáuragun woúngua láu afiñeni lúma láu ínsiñeni queisi ladáuragun súdaara láu lanúguagu lun loúnigiruni. Lúnti gíñe jeméni wamá luágu wasálbarun le ítaraabei quei bunídi le áubei ladáurei súdaara lábulugu lun loúnigiruni. ⁹ Máma lun labeíchuniwa Búngiu lanúadajawa, lun wibíjini asálbaruni lídaangiñe Wabúreme Jesucristu lanúadajawa. ¹⁰ Jiláti Jesucristu wawágu lun wabágaridun úara lúma, wínowaño wagía yebe, jiláñu yebe wéyume le liábin. ¹¹ Ligía rúmeme jumá lubei gurásu lúma érei júniwagua ítara quei jadügüni guetó.

Laríñaguni Páblo joun afiñetiña ída lúba lan jagáburidun

¹² Nidújeñu, ayúmuraguatiwa jun lun inébe jamá ja ñadágimeinbaña jagánagua jun, ja abúgurubalün, adímureja jagía jun lídan líri Cristu. ¹³ Lúnti jínsiñe jamá jun sarágu luágu wadágimanu le jadügübei. Abágarida jumá lídan dan jáma jibirigu.

¹⁴ Aríñagatiwa gíñe jun, nidújeñu, lun jerérun joun ja májatiña jawádigimaridun, lun jíchugun gurásu joun ja magúraasunbaña, lun jídérasiuníña ja débilibaña lídan jafiñen, lun gíñe gagúraasun jumá jabá súngubei.

¹⁵ Úa la ni ában afáyeiruti wuríbani luágu wuríbani. Joucharügü jumá jadügün buíti jagánagua, lúma joun sun gürígia.

¹⁶ Gúnda jumá súnwandan. ¹⁷ Ayúmuragua júma lun Búngiu sun dan. ¹⁸ Teínqui jumeí luágu sun le asúsereduti—buíti, wuríbati, niján le labúseerübei Búngiu júmagiñe, queísi afiñetiña luágu Jesucristu.

¹⁹ Merédera jumeí luwádigimari Sífiri Sándu tídan janígi. ²⁰ Mamájara jumá lun dimúrei le laríñagubei Búngiu jayúmulugugiñe jidújeñu lueígiñe Jesucristu. ²¹ Joucha jumeí sun arúfudajani aríja jumeíme ánjein lúmagiñeti lubeí Búngiu, ábame jeréderun lau le inárünibeí. ²² Dise jumá lueí sun luwúyeri wuríbani.

²³ Búngiu guánarügü, le íchugubei darángilaü, derégeguagüdalaün júngua lun le gumúti, areída loume juwáni, janígi luma júgubu dayáru, jarúmañu, lubá liábin Wabúreme Jesucristu. ²⁴ Úaraguati Búngiu le agúarubei jun lun lánigu jumá, lagúmuchubei ladügüni sun cátei buíti le jídan.

Lagúmujoún buri mábugäü lúma abíniruni

²⁵ Nidújeñu, ayúmuragua jumá lun Búngiu wawágu.

²⁶ Chúgua júma júngua lídan líri Wabúreme, arúfuda jumámugei luágu lídaañadiwa lan ában wámagua.

²⁷ Aríñagatina jun láu lugúmadin Wabúreme, lun jalíjanun gárada to joun sun wadújeñu lueígiñe Jesucristu.

²⁸ Binílaün Wabúreme Jesucristu. Ítaralá.

TIBÍAMAN LIGÁRADAN PÁBLO JOUN TESALÓNICANA

Labürüjan Páblo jáma líbirigu joun títana ligílisi to Tesalónicaboun

¹ Áu Páblo lúma Silváno láu Timotéo, wabürüjañoun gárada to jun, jugúya títana ligílisi to ubúruguboun Tesalónica ja lánigubaña Wáguchi Búngiu lúma Wabúreme Jesucristu. ² Resíbi jumeí abíniruni lúma darángilaü jámagiñe.

Lagúseragüdübaña Búngiu gafígountiña dánme liábin Crístu

³ Nidújeñu, teínqui wamúti Búngiu súnwandan juágu, queisi lúnti lan wadügüni, lugúndun laweíríduña jafiñen sarágu, áni ínsiñeni le jídaanbei jubáruagua aweírdeinatima líña súnwandan. ⁴ Adímurejatiwa buíti juágu títan buri lilígilisin Búngiu, luágu gurásu lúma afiñeni le jarúfudubei lídan sun eíbaajouñi lúma idíjeri buri le jasúfurirubei lueígiñe Crístu. ⁵ Arúfuda lumúti lubuídun jawándun luágu úaragua lan Búngiu lídan ligáburi lagúseragüdÜn, láu lanügünün quei garíchatíña lun jebélurun lídoun larúeijan, le uágubei jasúfurira.

⁶ Ladüga giñe úaragua lan Búngiu, lachülürüba wéyu lun lasúfuriragüdüniña ja asúfuriragüdübalün, ⁷ lúma giñe lun líchugun eméraaguni jun, jugúya le asúfurirubei ítara quei wagía, lídaanme wéyu le lúnbei lachülaagun Wabúreme Jesúsú siélugiñe lídan wátu geméti jáu lání ánjeligu ja gabáfubaña. ⁸ Liábinba lun labeíchuniña ja masúbudirunbalin Búngiu, madügün jagía gásu láu ugánu luáguti asálbaruni le wabíjibeí lídaangiñe Wabúreme Jesúsú. ⁹ Agünrinchawagúni le magúmuchaditi, ligíaba jabeichúagüle, jabugúba díse lueí larijin Búngiu lúma luweírigin lúma lubáfu. ¹⁰ Dánme le liábin Crístu, larijúba luweírigin jádan lánigu, ábame laweírídun janígi sun ja afiñeñabaña luágu, áni jugúya, jádaanbadün gürígia jagía queisi afiñeedün lan luágu le wariñagubei jun luágu.

¹¹ Ligía lébubei súnwandan lan wayúmuragun juágu, amúriaja wagía lúma Wabúngiute lun jarúfuduni luágu garícha jumá lun jádaanbadün lan ja únbaña lagúara. Ayúmuraguatiwa giñe lun Búngiu lun lagúnfulirun sun jayúmajan lun buídu lan jigáburi, láu lubáfu, lúma buri sun wadágimanu le jadügübei ladüga jafiñen. ¹² Láu igáburi le, líchugúba uweíriguni lun líri Wabúreme Jesúsú lídan jibágari, ábame líchugún uweíriguni jun luágu lareídun Wabúngiute lúma Wabúreme Jesucristu.

2

Le lúnbei lasúseredun lubáragiñe lagíribudun Jesucristu ubouágun

¹ Guetóti, nidújeñu, libügürü liábin Wabúreme Jesucristu, dánme liábin oúndaraguawa lúma, ² amúriajatiwa júma lun masáansirun jumáni ligáburi jarítangun ítara uménrengun, masústárun jugúyame luágu ni ában ugánu, o dimúrei buri le uáguti lariñawagua luágu lúmagiñeti lan Búngiu, ni tuágu gárada to uáguboun jariñaga luágu wámagiñetu lan, to aríñaguboun luágu chülüjali lan luwéyuri Wabúreme lun lagíribudun ubouágun. ³ Mígiraguagüda jumá júngua lun jeyeedüniwa ítara. Lugúndun lubáragiñeme lachülürün wéyu ligía, níjeinbei awúribujani lúma Búngiu, lachülaaguba giñe lágani Crístu, le lunbei lagünrinchawagún. ⁴ Ligía

láganibei Búngiu, liñúraguba lúngua luágu sun cátei le luáguti Búngiu, lachülürüba gíñe añúura tidan lilígilisin Búngiu, camá jamuga Búngiu ligía, ligía guánarügü aríñagati luágu Búngiu lan.

⁵ ¿Marítapun jumútisan luágu aríñagañaja náni méja buri cátei le jun dán meja le anájeingua lan júma? ⁶ Subúdi jumúti gíñe ida líña lán meja nadímurejan luágu ában ubáfu le lúnbei leréderuni liábin lágani Crístu lubáragiñe lidáani. ⁷ Luwádigimariña wuríbani guetó, arámudagu, áni lúnti lagídarúniwa le eréderubalin lágani Crístu ligía lubáragiñe gayára lan láfuridun lídoun larúgounga. ⁸ Ligíaba larijóuniwa, áni lagünrinchagubei Wabúreme Jesúsu ágani ligía láu ában dimúrei, lúma láu luweírigun le áubei liábin. ⁹ Ladügaba Máfia liábin lágani Crístu ligía, lachülürüba láu sarágu ubáfu, ladügüba buri miláguru yéeti lun layéedaguniña gürígia. ¹⁰ Layúsuruba sun luwúyeri wuríbani lun layéejaniña ja lídaanbaña üma lun gürínguaü, quei mája jabeí lun jerésibiruni inárüni luáguti Crístu lun jasálbarun. ¹¹ Ligía líchugunbáliña Búngiu lídoun bulíeiguaü lun jeyeedúniwa lúma lun jafiñerun luágu iyéeni, ¹² lun jasiadirúniwa lun máfiougati sun ja májabaña jafiñerun luágu Crístu, jínsiñerügü ligía wuríbani joun.

Anúadajóutiña lun jasálbarun

¹³ Ánjein jugúya, wadújeñu jínsiñetiña lun Crístu, súnwandan teínqui wamúti Búngiu juágu lugúndun anúadaja lumútün lúmagiñe lagúmeserun dan lun jasálbaruba lan láu Sífiri Sándu le arúmadagüdúbarun janígi, lúma inárüni luágu wasálbarun lídaangiñe Jesucrístu, le uágubei jafiñera. ¹⁴ Ligía lagúarunbei Búngiu jun, lun jasálbarun láu ugánu le wapúrichijabei, lun gafánraanbadün lan lídan luweírigun Wabúreme Jesucrístu.

¹⁵ Ítara líña lubeíti nidújeñu, derégúdagu meme jumá, mabúlieidagun jugúyame lueí buri arúfudajani le rúwamaalíbei jun láu dimúrei lúma táu gárada. ¹⁶ Wabúreme guánarügü Jesucrístu lúma Wáguchi Búngiu, le arúfuda láalíbei línsiñejabu woun láu lareídun, ¹⁷ ru ligía ámalijouni le magúmuchaditi woun lúma ában eménigini buíti, rúla dügúdaguaü tun janígi, derégúdaguaüda laünme lun jariñaguni lúma lun jadügüni sun le buídubei.

3

Amúriajati Páblo jáma lun jayúmuragun lun Búngiu luágu

¹ Lagúmujoún cátei, nidújeñu, ayúmuragua jumá wawágu, burúgua lámuga ugánu luáguti Wasálbaragüle furése lídan sun fulásu, resíbiwa ligíame láu ugúndani queísi lasúseredun jagánagua. ² Ayúmuragua jumá gíñe lun gayára lan weséfurun jaweí wügüriña wuríbatiña, lugúndun máma sun gürígia ubouágu affñetiña luágu Crístu. ³ Ánjeinti Búngiu, gayáraati wafiñerun luágu, luágu lagúnfuliruba lan láu lerérun, lárügüdúbadün derégúdagu, goúnigilaünme tueí lisádarán Máfia. ⁴ Jeménigitiwa luágu Wabúreme Búngiu luágu adüga jumáni le waríñagubei jun áni luágu jadüga mémebei lan. ⁵ Íderagualaün Búngiu lun jasándiruni lísiñejabu jun, lúma lun gagúraasun jumá quei Crístu luágu jasúfurirun.

Lúnti wawádigimaridun

⁶ Nidújeñu, aríñagatina jun lídan líri Wabúreme Jesucrístu lun jadísedun lueí furúmieguarügü jídaangiñe le májati luwádigimaridun, le mabágaridunti úragua lúma arúfudajani le jibíjubei wámagiñe. ⁷ Subúdi jumúti ida lúba lan

luwúyeri wabágaridun jagánagua lun jafálaruni wáni jémpulu, merédetiwa mawádigimariga jagánagua. ⁸ Meígin wamúti jeígin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebe, lun mámabadiwa lan ában ijúrúgu lun ni ában jídaangiñe. ⁹ Láu sun garícha wamá yebe lun wamúriajan júma lun jíderaguniwa, ñadágimeinrügütiwa lun wíchugun ában jémpulu jun lun jafálaruni. ¹⁰ Dán meja le júma wamá, rúwamuti meja gumádi le jun. “Le májabei luwádigimaridun, meígalá.”

¹¹ Agáambatiwa luágu añájein lan jídaangiñe májatiña jawádigimaridun, jerédera madügünga ni cáta, eténira lun le moún lubei jeténirun lun.

¹² Waríñaguña joún buri gürígia jagía láu lugúmadin Wabúreme Jesucrístu lun jawádigimaridun darángilañu lun jagáñeirunun jeígan fein.

¹³ Nidújeñu, mabúchadalá juágu adüga buíti. ¹⁴ Ánjein ñi ában le madügünti gásu láu le waríñagubei tídan gárada to, aríja jumeí cátei lan, memétera jumá lúmoun, barú lámuga busíganu. ¹⁵ Manüga jumeí quei ágani, erérarügü jumá lun queísi idújei.

Lagúmujoún abíniruni

¹⁶ Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

¹⁷ Áu Páblo, nabürüjañein mábugaü le jun láu guánarü nújabu lúma nilétüran. Ítara lúba jasúbudiruni luágu áu lan oúnajabarun gárada to.

¹⁸ Binílaün Wabúreme Jesucrístu sun jugúya. Ítaralá.

FURÚMIÑETU LIGÁRADAN PÁBLO LUN TIMOTÉO

Labürüjan Páblo lun Timotéo

¹ Áu Páblo, láni Jesucrístu apóstolu áu, noúnajóun láu lugúmadin Búngiu le Wasálbaragüle lúma Wabúreme Jesucrístu, le uágubei weménigida lun webélurun siélun. ² Nabürüjañoun gárada to bun, Timotéo, niraü le tímatimaati lídan wafiñen luágu Jesucrístu. Resíbibeí abíniruni, gudémejabu lúma darángilaü lúmagiñe Wáguchi Búngiu lúma lúmagiñe Jesucrístu le Wabúreme.

Ewéridijani lueí arúfudajani le maríchabei

³ Queí meja nayúmragun bun dán meja le nídinbei Macedónia, reídeimembá ubúrgu Éfeso lun baríñagun joun ítaga gürígia lun marúfudajan jamá cátei le maríchabei, ⁴ meténi jagíame lún buri úraga le magúmchaditi jawágu jenébaanfaangu binádu mútu. Cátei buri le, barürügüti sigénei le málati, ani míderagun lumútiña gürígia lun jesériwiduni Búngiu láu jafiñerun luágu.

⁵ Le lúnbei barúfudajani joun afiñetiña jagía, lun jínsiñegua jamá jámagua lugúndun jarúmaaru tan janígi, míchujali jarítangun duru jawágu, ani buídujali jafiñerun. ⁶ Añájein, adíreirutiña lueí buri cátei le, ába jíchaangun jóungua lídoun buri sigénei málati. ⁷ Buséñtiña buri lun arúfudajatiña jamá lídan lúru le líchugubei Búngiu lun Moisés, úati gunfaráanda jamáni ni le guánarügü jaríñagubei ni le jarúfudajabei luágu lúru ligía láu sarágu afiñeni.

⁸ Subúdi wamúti luágu buídu lan lúru, yúsuwarúgaali ligía quei lubúdubu. ⁹ Lúnti lasúbudirúniwa luágu máma lan joun ja adügúbalin le buídubei ladügüwa lúru, lúru jóunti ja wuríbabaña, ja magáambadibaña, ja mebéresenbaña láu Búngiu, ja gaffigounbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchi jilágubei, joun sun ja gáfarajadibaña, ¹⁰ joun ja agámaridubaña mamáriedunga o ja agámaridubaña wügüríña jáledigu, joun ja íwerujabaña gürígia, joun ja yéebaña, jáma ja áfiñurubaña luágu iyéeni. Jóunti giñe sun ja adügübaña ámu cátei múaradunti láu arúfudajani jarúmati. ¹¹ Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei láalibeí gürígia, apúrichija.

Eteíngiruni luágu lugúdemejabu Búngiu

¹² Teínqui numúti Wabúreme Jesucrístu, le íchugubei ubáfu nun lun wadágimanu le, luágu lanügünina queísi ában wügürí derégüdaquati, lúma luágu líchugunina lun nesériwidun lun. ¹³ Adüga láali sun cátei lé buri nun láu sún meja anábagua náni, eíbaaja numútiña meja ja afálarubalin, adüga numúti meja sun le nuáraati lun nagúmchaguagüdüni jafiñen. Ába gudéme nan lun Búngiu lugúndun mámagidina meja afiñeti luágu Jesucrístu ani ibídiñeti meja nun ca lan nadüğübei. ¹⁴ Ligía luweírinbei nasándiruni labínirunina Búngiu, úara lúma afiñeni lúma ínsiñejabuni le giñe wawágubei luágu lídaañadiwa lan ában lúma Jesucrístu.

¹⁵ Inárüni cátei le, le tímatimaati, áni lúnti jafíñerun súnqubei luágu inárüni lan. luágu “liábin lan Jesucrístu ubouágun lun lasálbaruniña gaffigountiña”, áu furúmiñeti jádaangiñe. ¹⁶ Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gaffigountiña. Ítara líña niábin lun ábanbadina lan jémpulu joun ja lúnbaña jafíñerun luágu, lun jabíjini ibágari magúmuchaditi. ¹⁷ ¡Ligía rúwama lubei uweíríguni lúma inébesei lun Búngiu le Warúeitebei lun sun dan, súnwandan, le mouwedadibei, siñá ligía larijíniwa, le Búngiu le ábanrügüti, le sábiu! Ítaralá.

¹⁸ Timotéo, niraü, rúnumuti gumádi le bun lun bageíndaguni luwúribun Búngiu buídu, queí meja laríñaguni Búngiu jayúmulugugiñe wadújeñu lueígiñe Jesucrístu bun, ragúñubei inárüni lánina asálbaruni, adúgeina le basúbudirubei luágu richá lan. ¹⁹ Añájein gürígia, féridi jamúti jafíñen ladüga madügün jamá gásu láu le jasúbudirubei luágu richá lan. ²⁰ Ítara líña lasúseredun lun Himenéu lúma Alejandro ja nederegerubaña lun Máfia lun jafúnrendeirun lun manábagun jamáni Búngiu.

2

Arúfudajani libügürü ayúmuraguni lun Búngiu

¹ Furúmiñeti cátei, amúriajatina lun ladügüniwa ayúmuraguni lun Búngiu jawágu sun gürígia. ² Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágari darángilati, le derégewati lun Búngiu, le gíñe inébewati lídan sun luwúyeri. ³ Buíti cátei le, gúndaati gíñe Búngiu le Wasálbaragüle láu, ⁴ le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun. ⁵ Ában rügüñein Búngiu, ában rügüñein gíñe gayára ladímurejan waweígiñe ligíbugiñe Búngiu, wügüri le Jesucrístubei. ⁶ Derégeguati Jesucrístu lúngua lun loúnwen lun lafáyeiruni lebégi jasálbarun sun gürígia, ában lasúbudirawagüdün cátei le lídan lidáni. ⁷ Lun cátei le, loúnajana Búngiu lun narúfudajan joun ja mámabaña juríu libügürü inárüni le, lun gayára lan jafíñerun luágu Crístu queísi Jasálbaragüle. Áu, queísi ában afíñeti luágu Crístu, inárüni naríñagubei, mayéejatina.

⁸ Ligía nabúseerúnbei lun jayúmuragun wügüriña lídan sun fulásu, inúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmuragun lun Búngiu. ⁹ Manárimelá tuwéndegun jadáuragun würiña, lun máma lan láu amúriguni janárimeguti jaráanseragua jóungua, ni láu gólu, pérlas, o daúguaü séruburitu, ¹⁰ lun láu lan lubuidun igáburi jadáuragua jóugua queí lúnti lan jadügün würiña ja derégeguañabaña jóungua lun Búngiu. ¹¹ Lúnti maní jamá würiña dan le larúfudajóuniwa joun, lúnti jerésibiruni arúfudajani ligía láu ában únabuni. ¹² Májatina lun tarúfudajan würi lídan jadámurin afíñetiña, ni lun tagúmadiruni würi wügüri, lúnti teréderun maníñu. ¹³ Lugúndun Adán ladügübei Búngiu furúmiñe, lárigiñe, ladügoun Éva. ¹⁴ Máma gíñe Adán leyéedubei Máfia, würi ayeedúabun, áni láu tayeedúniwa, ába táburujan lídoun figoú. ¹⁵ Láu sun líra, jasálbaruba würiña láu jagúnfulirun láu le lúnbei jagúnfuliruni queísi úguchuru, ánjein ítara méme jafíñerun luágu Crístu, arúfuda jagía ísiñejabuni lúma arúmani láu igáburi buíti.

3

Ligáburi ída lúba lan jóuserun fádirigu

¹ Inárüni cátei le. Ánjein abúseera ában gürígia lun fádiribeí lan, ában wadágimanu buíti labúseerúbei ladügün. ² Lun fádiribeí lan ában gürígia, lúnti labágaridun ában ibágari le míchuti lúgaaru lun ladeinjouániwa lun. Lúnti túmari lan ábanrügü würi, lúnti gíñe lanügün ában ibágari sériuti, buíti lichügü, inébewa. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan, ³ moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, dilí ligíame, manígi ligíame seínsu. ⁴ Lúnti gayára láníña tílana lúban agúmadira buídu, lun gíñe ladügün lun gagáambadi jamá lirájüñü, inébejabu. ⁵ Lugúndun ánjein magúmadirun lubáliña wügüri tílana lúban, ¿ída lubági gayára lan laríjin jáu tílana lilígilisin Búngiu? ⁶ Moún lumuti lubeíti fádiri lan ában iséri afiñeruti lueí lanáangun lúngua sarágu luágu lubára, ábame láburujan lábugiñoun íñarawaguni le gádaanbalin Máfia. ⁷ Lúnti buídu lan ligáburi, lúnti gíñe inébe lan joun ja mafiñebaña lueí ladímurejóun wuríba luágu, ábame láburujan tidoun lisádarán Máfia lun lagúnrinchawagúniwa lubuídun líri.

Ligáburi ída lúba lan jóuserun ja esériwidubaña ligílisirugu

⁸ Ja gíñe esériwidubaña ligílisirugu lúnti wügüriña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun. ⁹ Lúnti jarúgüdüni inárüni lánina afiñeni le arúfuda láalibeí Búngiu woun, buídu, lun gíñe jarúma tan janígi. ¹⁰ Lúnti jouchún, lárigiñeme, ánjein úa lubeí mégeiti luágu lubuídun jagáburi, ligíaba gayára lan jesériwidun ligílisirugu. ¹¹ Würíña ja esériwidubaña ligílisirugu, lúnti gíñe inébewa jamá, moún lumuti marásualugu jamá, lúnti sériu jamá, derégüda lídan sun cátei. ¹² Ában esériwiduti ligílisirugu, lúnti túmari lan ábanrügü würi, lúnti gíñe lagúmadiruniña lirájüñü buídu jáu sun tílana lúban. ¹³ Lugúndun esériwidutiña ligílisirugu ja adügübalin jawádigimari buídu, buídubei ladímurejóuniwa jawágu, áni ragútimaatiña anígi lun jadímurejan luágu jafiñen luágu Jesucrístu.

¹⁴ Agúrabatina nídin aríjabu madíse, ¹⁵ nabürüjaní buri cátei le bun lun ánjana lan adárasaragua, lun subúdi báni ída líña lan lun loúserun gürígia jádan lufámilian Búngiu, to lilígilisinboun Búngiu le wínwanbei lun sun dan. Lilígilisin Búngiu ágüdajabalin linárün, toúnigiteí inárüni ligía buídu. ¹⁶ Siñáti lasígenerúniwa luágu weírigu lan Wasálbaragüle Jesucrístu, le subúdigüda láalibeí woun.

Arúfudaguati Búngiu lúngua queísi gürígia lídan Jesucrístu, arúfudaleí Sífiri Sándu luágu úaragua lan Jesucrístu.

Aríja jameí ánjeligu.

Apúrichijouáti luágu joun lílana sun fulásu,

afiñewa luágu lídan sun fulásu,

resíbiwa ligía siélu.

4

Ja lúnbaña jígiruni jafiñen

¹ Furáanguti laríñaguni Sífiri Sándu luágu lídoun lánme lagúmujóun dan, añájeinbaña lan gürígia ígiruti jafiñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu. ² Jagáambajaba

arúfudajani jámagiñe gürígia bíangua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu súti. ³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eíginí moún lumuti leigín, láu sun ladúga lan Búngiu eíginí buri ligía lun jeigini ja afíñebaña jáma ja subúdíbalin inárüni, láu ateíngiruni lun Búngiu luágu. ⁴ Sun cátei le ladúgübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adúga láalíbei, teínqui wameíme luágu. ⁵ Lugúndun láu wamúriajan lúma Búngiu lun labíniruni sun weígin, ñúbinti lun labuídurun láu lerérun, lúma láu wayúmuragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágúdajouba buwáni láu buri dimúrei le lánina wafíñen, lúma arúfudajani buíti le falábaalíbei. ⁷ Meféridirabeí bidáani asígeneja luágu buri libídiegun úraga le ni cáta ligíbugiñe Búngiu, lubáragiñe líra, áfaaguabá lun bagúnfulirun lúma Búngiu. ⁸ Láu sun ju lan lánjingichún úgubu, jútimaati bánjingichagun búngua lídan bagúnfulirun lúma Búngiu, lugúndun barúti cátei buíti woun lídan ibágari le lúma lídan ibágari le lúnbei wabíjini. ⁹ Inárüni cátei le, áni lúnti jafíñerun súngebui luágu. ¹⁰ Ligía lébubei wawádigimaridun, súfuri wagía anabúni, lugúndun rúwamaali lan weménigi luágu Búngiu le wínwanbei, le aráansejaalíbei asálbaruni joun sun gürígia, áni ja afíñebaña luágu, jerésibirubei asálbaruni ligía.

¹¹ Ligía buri cátei lúnbei barúfudajani lun jagúnfulirun gürígia láu. ¹² Sériulá bigáburí lun manúgüniwa ban quei ni cáta lueígiñe ñúraügidibu lan, lubáragiñe líra, lúnti ában ban jémpulu buíti joun ja afíñebaña, lídan ligáburí badímurejan lúma bouserun, lídan ínsiñejabuni, lídan bafíñen luágu Búngiu, lúma lídan larúma bíbágari. ¹³ Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachúlürün. ¹⁴ Yúsubei ubáfu le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

¹⁵ Deréguabá búngua lún buri cátei le, lun gayára lan larijíníwa bawáanserun lídan cátei láni Búngiu. ¹⁶ Góuniguabá búngua, lúma láu le barúfudajabei, ítaramembá derégúdagu lídan sun cátei. Ánjein badúga ítara, basálbaruba, sálba jagíame gíñe ja agáambubalibu.

5

Ída lúba lan ligáburí louserun Timotéo jáma afíñetiña

¹ Madeínjabá lun ában weírei mútu, lubáragiñe líra, adímurejabá lun camá jamuga lun búguchi, ousera báñame wügüríña ñúbürigiña queísi bamúleni. ² Oúsera báña weíyaaña würíña quei bouserunun búguchu, ousera báñame würíña irájüñü quei bitunu, láu lubuídun arítaguni.

³ Íderagua báña würíña ja jiláañabaña úmari, ja arijúabei luágu mégei jamá iderúni. ⁴ Ánjein garájüñü tubeí ában würi to jiláali túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámilian lúma lun jáguyugüdüni ínsiñejabuni le jadúweirubei joun jagúbürigu, lugúndun buíti cátei le, gúndaati gíñe Búngiu láu. ⁵ Würi to

jiláali túmari, to eréderuboun tábugua le túmatimaati, rútumuti teménigi luágu Búngiu, merédeti giñe tayúmuragun lun Búngiu áriebu, wéyuagu. ⁶ Ánjounti to ederegeraguboun túngua lun ugúndani lánina ubou le, jiláñu tíña lun cátei lánina Búngiu láu sun wíngangiru lan. ⁷ Aríñagabei buri giñe cátei le joun, úa lámuga ni cáta lun ladeinjouñ joun luágu. ⁸ Le marítagunti jawágu lánigu, játima lidújeñu, magúñfulinjali lúma lafiñen, wuríbatimáatiti sùgú láu ában gürígia le mafiñeti.

⁹ Lun labürüdúniwa tíri würi to jiláalibei túmari tídan gárada lánina íderawagúni, to rügúboun níjeinjali lúmagiñe ürúwa-wein irúmu táu, lun giñe ábanrügügili lán meja túmari. ¹⁰ Lúnti tasúbudirúniwa luágu buíti le tadügübei queí buri jamúga ánjein meja agüriaja tubáliña tirájüññu buídu, ánjein buídu lubei touserun jáma ja achülürübaña túbiñe, ánjein seríwi tubáliña idújeñu lueigiñe Cristu manáangunga túngua, ánjein íderagua tubáliña ja asúfurirubaña, o ánjein adúga tubei furúmieguaugü ámu cátei buíti.

¹¹ Würíña ja jiláaña úmari ja ñübürigiña, mabürüdabei jíri tídan gárada, lugúndun lachülürüba dan lúnya jabúseerun jámari. Ábameti jígiruni jesériwidun lun Búngiu ligílisirugu lúnya jamárieidun. ¹² Ábameti jadímurejan gürígia jawágu ladúga jadúraaguni jadáradun lúma Búngiu le lánina jesériwidun lúnrügü súnwandan. ¹³ Ába jayábin lun jamágualigudun, mámarügü jamágualigudun, ába giñe marásualugu jamá, eméteja lídoun sun cátei, adímureja cátei le moún lumuti. ¹⁴ Ligía nabúseerúnbei lun jamárieidunya ja ñübürigiñabaña, lun garájüññu jamá, lun jouñgurunun jában, lun míchugun jamá lúgaaru joun ja mafiñebaña lun jadímurejan wuríba jawágu. ¹⁵ Añájein würiña, ígira jamáali Búngiu, ába jafálaruni Máfia.

¹⁶ Ánjein añájein jabei würiña ja jiláalibei jámari jádan lufámilian ában afiñeti würi o wügüri, lúnti lideraguniña, mígirun ligíame lun ában jamá ijürügu tun ligílisi, ítara lúba gayára lan jíderaguniña tilana ligílisi würiña ja busénbaña jíderawagún.

¹⁷ Fádirigu ja labugiñeñounboun jaríajaan ligílisi, ja adügübalin jawádigimari buídu, lúnti inébewa jamá sarágu, játima gafisiutebalin apúrichijani lúma arúfudajani. ¹⁸ Tariñajare Lerérun Búngiu. “Magüragua jumei liyúma jilügün bágasu le lánina wadágimanu luei lásiñerun leígin lídaangiñe tubúñe fulúwaaru le uágubei ladügüragua lun lagídaruni túra.” Aríñagatu giñe. “Garíhati ñadágimeinti lun libíjin lafáyeiruaja.”

¹⁹ Madügabá gásu luágu líchugún lidúnrun ában fádiri ánjein úa jabei biáma o ürúwa lun jíchugun fe luágu lidúnrun. ²⁰ Ánjaña ja asígirubaña lídan figou, lúnti badeñjan joun jagíbugiñe sun afiñetiña lun janúfudedun súngebuei luei jafígounjan. ²¹ Ayúmuraguatina bun ligíbugiñe Búngiu lúma Wabúreme Jesucrístu, lúma jagíbugiñe ánjeligu ja lanúadirubaña, lun bagúñfulirun lúma buri gumádi le, lun ában lan láu janügüniwa sun gürígia. ²² Míchigabádügabá gásu luágu líchugún lidúnrun ában fádiri ánjein úa jabei biáma o ürúwa lun jíchugun fe luágu lidá ni ában queísi fádiri tídan ligílisi lídan loufudagun, lúnti batúriajani ligáburu buídu lueidügü gafígoun lan, larijwameti camá gúndaatibu láu lífígoun. Dísebá luei sun le wuríbabei.

²³ Quei súnwandan lan gári lan burágeirugu, mátabá dúnarügü, gurába giñe murúsun diweín.

²⁴ Lídan le báluajaniña wügüriña lun jesériwiduni Búngiu ligílisirugu, jarítaguabá luágu añájein lan gürígia arijúati jafígoun furáangu lubáragiñe

jagúserun, añájein giñe, marijinti jafígoun darí lárigiñe. ²⁵ Ítara méme líña giñe, cátei buíti le jadügübei gürígia, arijúati furáangu, áni íbini marijín lan, siñáti leréderun arámudagu lun sun dan.

6

¹ Afñetiña ja músubaña, lúnti weíri lan jinében jayúbudirigu joun, lun madímurejoún lan wuríba luágu líri Búngiu, ni luágu cátei le warúfudajabei. ² Ánjein añájein lubei esériwidutiña gayúbudiritiña afñetiña, moún lumuti lougua lan jinében joun ladügarügü jadújeñu jamá lueígiñe Crístu. Lubáragiñe líra, lúnti jesériwiduniña buíditima, lugúndun ja erésibirubalin lubuídun jesériwidun, afñetiña, idújeñu giñe jínsiñegutiña. Arúfudajabei cátei le, apúrichijabeíme.

Arúfudajani maríchatí lúma irísini inárüni

³ Ánjein arúfudaja ában gürígia cátei maríchatí áni múaraanti lúma larúma arúfudajani le láni Wabúreme Jesucrístu le íderagubaliwa agúnfulira lúma Búngiu, ⁴ ában barügua túngua gürígia ligía, le ibidiñeti ni cáta lun. Ganígiti lasígenejan luágu buri dimúrei, lídaangiñeti asígenejani le liábin buri gimúgaü, gáñiguaü, anábajani, mafñeni joun gürígia, ⁵ lúma buri wuríbu magúmchaditi. Jíbiri gürígia ja, wuríbati jasáminan, ibidiñejabutiña lun inárüni, jarítaguatiña luágu lébuna lan lagáñeirun irísini agúnfuliruni lúma Búngiu. Disebá jawei gürígia ja ítarabaña. ⁶ Inárüni luágu ában lan oúnwenbun irísini agúnfuliruni lúma Búngiu lun le gufúrumabei láu le lúmabei. ⁷ Manügüntiwa ni cáta yágiñe, ⁸ ánjein geígin wabei, ganáangun, lúnti gufúruwanügün ni cáta yágiñe, ⁹ ánjaña ja busénbaña jarísidun, mawándun jamúti oucháwagüni, ába jáburujan tídoun lisádaraana sarágu lagübüri ayúmajani le málati, le ásiñeragüdübei gürígia jebélurun siélun, ába jóudin máfiougatin. ¹⁰ Línsiñegu seínsu ligía lílagülebei sun luwúyeri wuríbani, áni añájein sarágu gürígia ladüga jóuchun jabíjin seínsu, ába jígiruni jafíñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le láni afñeni

¹¹ Ánjabuti amürü, Timotéo, queísi ában ban wügüri derégeñuti lun Búngiu, anúrajabá luei buri cátei le. Barüba ában ibágari le lánina ísuruni, le lánina gúnfuli lúma Búngiu, le lánina afñeni, le lánina ínsiñeni, le lánina gagúraasuni lúma areíduni. ¹² Áfaaguabá buídu luágu láni wafñen fuleísei, ábame bagáñeiruni ibágari le magúmchaditi, lun líra lagúara Búngiu bun dán meja le barúfudunbalin jagíbugiñe sarágu gürígia luágu aráanseñu bíña lan lun bafálaruni Crístu. ¹³ Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja giñe geféenbei luágu le inárünibeí ligíbugiñe Piláto, ¹⁴ buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoúa bun, darí liábin Wabúreme Jesucrístu. ¹⁵ Dánme lachülürün dan ligía, le lanúadajabei Búngiu, lagíribuduba Crístu ubouágun, Búngiu rügüñein weírigu, Súnti Gabáfu, Jarúeite urúeigu, Jabúreme abúremeingü. ¹⁶ Ligía rügüñein móúwedadi, le abágaridubei lídan larúgounga le ñíjin lubei mayárafadun lan ni ában. Maríjin lágili ni ában gürígia Búngiu, siñáti giñe larijiniwa. ¡Rúalá uweíriguni lun, arúfudualá lubáfu lun sun dan! Ítaralá.

¹⁷Ja gámabaña irísini lánina ubou le, aríñagabá joun lun manáangun jamá jóungua luágu, míchugun jameíme jeménigi luágu irísini ligía, lugúndun machourunti, lun jíchuguni jeménigi luágu Búngiu, le wínwanbei, áni rúleí sun cátei woun gíbe lun wagúndaarun luágu. ¹⁸Aríñagabá joun lun jadügüni le buídubei, lun buídu lan jóuserun le timatimaati, lun aráanseñu jamá lun jíchuguni lúma lun jafánreinruni le jámabei. ¹⁹Ítara lúba jóúndaragun irísini jóungua siélu le adúrarubei lun sun dan, ítara lúba jabíjini íbágari timatimaati le magúmuchaditi.

Lagúmujoún dimúrei lun Timotéo tídan gárada to

²⁰Timotéo, toúnigibeí le íchugúbei lábugiñe baríaajan. Magáambabá dimúrei buri le lánina lisúbudin ubou, ni sigénei le lánina cátei le gíridügübei subúdi, ²¹añájein jádaangiñe ja afálarubalin luwúyeri subúdi le, ígira jamáali jafíñen.

Biní lábu Búngiu. Ítaralá.

TIBÍAMAN LIGÁRADAN PÁBLO LUN TIMOTÉO

Labürüjan Páblo lun Timotéo

¹ Áu Páblo, láni Jesucrístu apóstolu áu, loúnajañadina Búngiu láu lugúndan lun gayáraabei lan nídin aríñagei ugánu buíti joun gürgia luágu ibágari le líchugubei joun ja lídaanbaña ában lúma Jesucrístu. ² Nabürüjañoun gárada to bun, Timotéo le nanügübei queísi niraü le jínsiñebei nun, resíbibá abíniruni, gudémejabu, lúma darángilaü lúmagiñe Wáguchi Búngiu, lúma lúmagiñe Wabúreme Jesucrístu.

Adímurejani luágu Crístu

³ Dan le nayúmuragun lun Búngiu buágu ságü nayúmuragun áriebu lúma wéyuagu, teínqui numúti Búngiu le únbei nesériwida láu tarúma nanígi quei jadügüni binádu nagübürigu. ⁴ Súnwandan narítangun luágu bayájun dán meja le nígirunibu, buséntina jamúga naríjinibu lun nabuínchun láu ugúndani. ⁵ Jarítaguatina luágu afíñeni inárúnti le buágubei, Lóida to bagütü, túma Eunice to búguchu, jagía meja gawágubalin afíñeni le furúmiñe, áni choúru numúti luágu níjein lan giñe buágu.

⁶ Ligía nariñagunbei bun lun bayúsuruni méme ubáfu le líchugubei Búngiu bun dán meja le níchugunbalin nújabu bábulugu. ⁷ Rúlaali Búngiu Sífiri Sándu woun, áni máma anúfudei le líchugubei Sífiri Sándu, ubáfu lun wadügüni furúmieguarügü cátei, ínsiñeni, lúma ubáfu lun wasáminarun buídu líchugubei woun. ⁸ Mabúsigaribá lubeíti lun bapúrichijani le larúfudajabei Crístu, mabúsigaribá giñe náu, áu le adaürübei lueígiñe. Lubáragiñe líra, aráanseñubá lun basúfurirun wáma luágu ugánu le lánina wasálbarun, lugúndun líchuguba Búngiu érei bun lun bawánduni. ⁹ Sálba lumútiwa Búngiu, wa ligía woun lun wanügün ában ibágari le derégewati lun, máma jamúga lueígiñe níjein lan cátei buíti wadüga, ladüga ítara líña lan laráanseruni lubáragiñe ladügüni ubouú lun larúfuduni lareídan lúma línsiñejabun woun lídaangiñe Jesucrístu. ¹⁰ Guetó larúfudei ínsiñeni le láu loúnajani Jesucrístu le Wasálbaragüle lun lagünrinchaguni lubáfu ouweni, ru ligía ubáfu woun lun wibíjini ibágari magúmchaditi láu werésibiruni ugánu buíti luágu.

¹¹ Rúlumutina Búngiu lun napúrichijani ugánu le, ouñaja lána quei apóstolu lun narúfudajan joun ja mámabaña juríu. ¹² Ligía nasúfurirunbalin sun cátei le. Láu sun líra, úati nibúsigari nan, lugúndun subúditi nun ca lan uágu níchigei nafíñen, áni choúru numúti luágu gabáfu lan lun loúnigiruni le líchugubei lábugiñe naríajaan daríme lachúlürün wéyu ligía lun lagiribudun Crístu ubouágün.

¹³ Mígirabei luwúyeri arúfudajani jarúmati le níchugubei bun, abágaridabá láu bafíñen luágu Crístu, arúfudeina ínsiñeni joun súnugubei ladüga lídaañadiwa ában lúma Jesucrístu. ¹⁴ Láu lubáfu Sífiri Sándu le wádaanbei, goúnigibeí arúfudajani le líchugubei Búngiu lábun baríajaan lun madarúniwa lan iyéeni lídoun.

¹⁵ Queísi basúbudiruni, ígira jamáadina sun afíñetiña Ásiana nábugua, níjein Figélo jádan, lúma Hermógenes. ¹⁶ Gudémejabulá Búngiu joun lufámilian Onesíforo, lugúndun barújeiti gurásu nun sarágu weiyaasu, úati giñe nibúsigari lan láu nadaürüña lan, ¹⁷ lubáragiñe líra, dan le liábinbei

ubúругu Róma, merédeti láluajanina darí ladárirunina. ¹⁸ Darí lámugei lugúdemejabu Búngiu lídaanme wéyu ligía le lagribudagüle Wabúreme Crístu ubouágun. Subúsiti giñe bun buídu ída líña lan líderaguníwa ubúругu Éfeso.

2

Ában lisúdaaran Jesucrístu buíti

¹ Ánjeinti amürü, niraü, resíbibá érei lídaangiñe abíniruni le wibíjibeí láu lídaañadiwa lan ában lúma Jesucrístu. ² Le cátei lánina wafíñen le agáamba báalibeí nariñagun jagíbugiñe sarágu geféentiña arúfudajabeí joun wügüríña ja afíñewati jawágu, ja gayáarati jarúfudajani joun ámu.

³ Awándabeí lubeíti sáfuri quei ában lisúdaaran Jesucrístu buíti. ⁴ Úati súdeara le esériwiduti ádaraguti lúngua lídoun ámu cátei lueí le lánina súdeara, lugúndun gásu leréderun dayáругu lábugiñe lerénjan lugúmandan. ⁵ Ítara líña giñe, ában gürígia le ádaraguti lúngua lídoun juráraü, siñábei lagáñeirun ánjein máfaagun quei lubúdubu. ⁶ Le ábunagubei, garíchatu lun ligía lan furúmiñe íbjei lufánran lídaangiñe alúbajani. ⁷ Samínabá luágu ürüwa jémpulu le, ábame gunfaráandagüda láni Wabúreme súngubei bun.

⁸ Jarítaguabá luágu Jesucrístu. ligía ában gürígia wáledi, jádan linébaanfaangu urúei David, áni sarágüda lumúti Búngiu lídaangiñe ouweni. ⁹ Niján ugánu le lánina asálbaruni le napúrichijabeí, áni lueígiñe napúrichijani, awándatina asúfuriruni darí lun nagúrurawagún láu güríngüri camá ában gürígia wuríbati áu. Siñáti leréderúniwa labúruchagun láni Búngiu ugánu, ¹⁰ ligía nawándunbalin sun cátei, luágu jáni ja anúadaja láñabaña Búngiu fuleisei, lun giñe jayábin lun jabíjini asálbaruni lúma uweíríguni magúmchaditi siélu ladúga lídan jamá ában lúma Jesucrístu.

¹¹ Inárüni cátei le.

Ánjein jiláadiwa lubeí lúma Crístu, wabágariduba giñe lúma,

¹² ánjawa awánda sáfuri lueígiñe, gafánraanbadiwa lídan larúeijan.

¹³ Ánjawa múaran, ligía úaramemebei, lugúndun ítara líña ligáburi Búngiu.

Ában ñadágimeinti buíti

¹⁴ Jarítaguagüdebeí cátei le joun ja afíñebaña, áni aríñagabá joun ligíbugiñe Wabúreme lun masígenejan jamá luágu buri cátei luáguti dimúrei. Mabuídun buríti sigénei le lun ní cáta, añáwurijarügü lumútiña ja agáambajabaña. ¹⁵ Jouchabeí sun bubáfu lun barúfudagun búngua ligíbugiñe Búngiu queísi ában ñadágimeinti buíti, le úati cába lan uágu labúsigarida, le ayúsurbalin ugánu lánina inárüni quei lubúdubu. ¹⁶ Dísebá lueí dimúrei buri málati le lánina ubou le, lugúndun ja adímurejabaña ítara, jóúdimtaaña lídoun wuríbani, ¹⁷ ábame labúruchagun jarúfudajan quei cánser. Niján le susérebei lun Himenéu lúma Filéto, ¹⁸ ígira jamáali inárüni, jaríñaga luágu sügüjali lan lidáani ásaaruni lídaangiñe ouweni, jagúnrinchaguñeiti jafíñen sarágu gürígia ítara. ¹⁹ Wagía afíñetiña, wagía liliígilisin Búngiu láu ébuu derégüdati le rúlaalíbei Búngiu, siñáti lánjingichúniwa. Bürüwati dimúrei lébei luágu ébuu ligía. “Subúdi lumútiña Wabúreme Búngiu lánigu”, áni. “Sun ja aríñagabaña luágu lánigu jamá Crístu, lúnti jadisedun lueí wuríbani.”

²⁰ Tídan ában múna weírítu, máma rügüñein umégeni gólu o pláta ñi, níjein giñe le láuti fulánsu lúma láuti múa, níjein lúnti luweírín-ágei ayúsuruni, níjein lúnti furúmieguarügü yúsu. ²¹ Lun lúnti lan ában ayúsuruni weíríguti ában gürígia le deréreguati lúngua lun Búngiu, ju ligía lun, lúnti jarúma lan

libágari, díse ligía lueí sun le wíyebey, ítara lúba ju lan lun furúmieguaugü wadágimanu buíti.

²² Anúrjabá lubeíti lueí jayúmajan wügüríña ñübürigiña, barüba ában ibágari le lánina ísuruni, affíñeni, ínsiñejabuni, lúma darángilaü, úara jáma sun ja agúarubalin Wabúreme Crístu táu anígi jarúmatu lun líderaguniña. ²³ Madügabá gásu láu sigénei málati, subúdi báali luágu barü lan líra wuríbu. ²⁴ Moún lumuti gádan láni wuríbu ában esériwiduti lun Crístu, lubáragiñe líra, lúnti buídu lan jáma sun gürígia. ²⁵ Lúnti ában lan arúfudajati buíti ligía, lúnti gagúraasun lan jáma ja múaradúntiña lúma, lúnti larúfuduni joun táu anígi únabugutu luágu marícha jamá, ladüga gayára lan lasáansiruni Búngiu ligáburi jasáminarun lun gayáraabei lan jánjarun lun le inárünibeí. ²⁶ Gayáraati jadáriragun joúngua lun jeséfurun tídaangiñe sádara to gádaanbaliña lurúma Máfia lun ladüguni labúseerun jáu.

3

Ída jába lan gürígia lídoun búrime lagúmujoún wéyu

¹ Lúnti giñe basúbudiruni luágu liábin buríba lan wéyu jénreenguti lídounme lagúmujoún dan. ² Joúngua rügübei buri gürígia jabúseera buíti, jínsiñe seínsu joun, pánta jagía, barügua joúngua. Jadímurejaba wuríba luágu Búngiu, magáambun jabáña jagübürigu, meteíngiradibaña, minébeme cátei lánina Búngiu joun. ³ Mínsiñejabubaña joun jarájüñü, magúdemejabu, marásalugubaña, siñábei jarügüdagun joúngua, janárimebaña, láganibaña sun le buídubeí. ⁴ Jalúgurubaña jamádagu, jadügüba buri cátei mabuídunti mebéresenga jagía cába lan asúsereda lárigiñe, janárimebei janáangun joúngua, jáluajabei jagúndan guánarügü lubáragiñe jamúga jáluajani Búngiu. ⁵ Jafámuruba camá gúnfulitiña lúma Búngiu áni larijúba luágu iyéeni lan láu ligáburi jabágaridun.

Meméterabá jámoun jíbe gürígia ja. ⁶ Jádán buri gürígia ja, añájein já buri ebélurubaña jábiñoun mútu ayéedaña würíña ja débilitiña, já buri buínbaña láu figou lúma láu sun luwúyeri ayúmajani. ⁷ Ába jafálaruniña yéetiña jagía lun jafúnrendeirun iséri cátei, siñáti jayábin lun gunfaráanda jamáni inárüni. ⁸ Ítara quei jawügürijoun Jánes lúma Jámbres, ja gabíñarajadibaña, lun Moisés, ítara líña giñe jawügürijoun wügüríña ja lun inárüni. Wügüríña buri ja, wuríbati jasáminan, garábaguaaña luágun waffíñen. ⁹ Mawáanserunbaña sarágu, ladüga geféenbei sun ubou luágu ibídiougua lan jáu, quei lasúseredun joun bián jagüra ja awügürijoúbaña lun Moisés.

Lagúmujoún dimúrei lúmagiñe Páblo lun Timotéo tídan gárada to

¹⁰ Anjein amürü, falábaali narúfudajan buídu lúma ligáburi nagáburidun. ¹¹ Subúdi báali narítangun lúma nafíñen, aríja báali nugúraasun lúma nísíñejabu, lúma ída líña lan nawánduni eíbaajoúni lúma súfuri lúma líbiri lénreengun le nasúfurirubei lídan buri fulásu quei buri ubúrugu Antioquía, Icónio lúma Lístra. Subúsiiti giñe bun ída líña lan leséfurunina Wabúreme Búngiu lídaangiñé buri sun cátei le. ¹² Inárüni luágu jeíbaajoúba lan sun ja busénbaña jabágaridun derégeguañu joúngua lun Jesucrístu. ¹³ Anjaña ja wuríbabaña jáma ja gayéejadibaña, jaríbatatimaaba, ítara mémejaba ayéeya lúma ayeedúa.

¹⁴ Anjein amürü, ítaramemebá derégüdagu lídan le bafúnrendeirubei, le uágubei affíñeedibu lan. Subúdi bumúti luágu inárüni lan le

bafúnrendeirubei ladüga gayára lan bafíñerun jawágu ja arúfudajabalin bun. ¹⁵ Subúdi bumúti Lerérun Búngiu lúmagiñe ññraügidibu. Tídan Lerérun Búngiu, ladárirúa sun lichú áu le busénwabei lun gayára lan jasálbarun gürígia, láu jafíñerun luágu Jesucrístu. ¹⁶ Sun le bürüwañubei tídan Lerérun Búngiu, Búngiu guánarügü ichugubalin jarítangunrugun wügüríña lun jabürüdüni. Jútu líburu tugúya lun tarúfuduni le inárünibeí lúma gíñe lun tarúfuduni le maríchabei, adügatu lun jígiruni gürígia cátei le mabuídunbei luágu le buídubei, arúfudajatu joun gürígia lun jabágaridun surúñu. ¹⁷ Líburu tugúya, jemégenboun gürígia ja esériwidubaña lun Búngiu lun jadügüni sun luwúyeri wadágimanu le lúnbei jadügüni lun.

4

¹ Ligíbugiñe Búngiu lúma Wabúreme Jesucrístu, le lúnbei liábin quei urúei agúseragüdaña wínwangiña jáma jiláguaaña, nariñaguña bun lun bapúrichijani Lerérun Búngiu, ² aráanseñubá lun bapúrichijani, busén jagía gürígia jagáambuni, mabúseerun. Afíñegüda bña, adeínjabá, eréra amürüme, arúfudajabá joun láu gurásu. ³ Lugúndun lachülürüba dan dánme le mawándun jamáni gürígia arúfudajani jarúmati, lubáragiñeme líra, jáluajabei arúfudajani le gúnfulibeí lúma luríban jayúmajan, ábame jálugun sarágu arúfudajatiña lun jarúfudajani lérügü jabúseerúbei jagáambun joun. ⁴ Jíchugubei janágan luágun inárüni, ábame jadügün gásu láu sun luwúyeri úraga. ⁵ Ánjein amürü, buídulá bisáminan súnwandan, awándabeí asúfuriruni, rúguabá búngua lun bapúrichijani ugánu le lánina asálbaruni, gúnfulibá buídu láu buwádigimari.

⁶ Áu, sandíguatina núngua luágu nadügüñein lan lagúmujoún le nuáraati lun Búngiu, yaráaali lórate noúnwen. ⁷ Ageíndagua náali luwúribun Crístu buídu, eibaguaadina chülü lúmoun lébeja, adüga náali sun le rúlaalíbei Búngiu nun lun nadügüni, areída náali arúfudajani le lánina wafíñen jarúmañu. ⁸ Guetó, lagúrabuñadina nafáyeiruaja le lebégi ában ibágarí le lánina ísuruni, afáyeiruajaú le lúnbei líchuguni Nabúreme nun, le agúseragüdüti le úraguabei, lídaanme wéyu ligía. Áni mámarügüba nun líchigei afáyeiruajaú ligía, líchugubei gíñe joun sun ja agúrabajabaalin liábin láu insíñejabuni lun.

⁹ Jouchabá biábin aríjana furése. ¹⁰ Ígira láadina Démas, jínsíñetimaati cátei le lánina ubou le lun, ññdünjati ubúrugun Tesalónica. Ññdünja Crescénate louábawagun Galácia, ññdün Títo louábawagun Dalmácia. ¹¹ Lúcas rügüñein núma ya. Áluajabeí Márcos, banügeime búmagua, gayáraabei líderagunina lídan wadágimanu. ¹² Oúnaja nan Tíquico ubúrugun Éfeso. ¹³ Dánme biábin, banügounme cápa to nígiruboun lúbiñe Cárpo yágüta Tróas nun, barúbounme gíñe buri líburu, nigáradan burítima. ¹⁴ Adügaali Alejándro, le ñadágimeinbei gürábu, sarágu wuríbani nun, lafáyeirubei Búngiu quei ligáburí cátei le ladügübei. ¹⁵ Touñigiguabá búngua lueí, lugúndun garábaguaali luágun ugánu le wapúrichijabei.

¹⁶ Dan le furúmiñeti nadímurejan nueígiñegua ligíbugiñe lúrudu, úati ní ában íderagutina, ígira jamútina súngubei. Agúrabatina lun mabájüdün láni Búngiu cátei le joun. ¹⁷ Láu sun líra, íderagua lumútina Wabúreme Jesucrístu, ába líchugun érei nun, ítara líña lubeíti gayára lan napúrichijani ugánu le lánina asálbaruni, agáambagüdaneeí joun sun gürígia ja mámbabaña juríu. Ítara líña leséfurunina Nabúreme lueí yebe ouweni, ¹⁸ áni leséfurubadina lueí

sun wuríbani, areída láname lubá larúeijan siélu. ¡Rúalá uweíriguni lun súnwandan! Ítaralá.

Lagúmujóún buri mábugäü lúma abíniruni

¹⁹ Mábugäü tun Prisca lúma lun Aquila lúma joun lufámilian Onesíforo.
²⁰ Reídeija Erásto ubúru gu Corínto, ígira numúti Trófimo láu sándi Miléto.
²¹ Joúchabá biábin lubáragiñe laríbougadun. Mábuga líña Eubúlo bun, Pudénte, Líno, Cláudia jáma sun wadújeñu lueígiñe Jesucrístu. ²² Búma lámuga Wabúreme Jesucrístu, biní laúnme Búngiu sun jugúya ja alíjabarun gárada to. Ítaralá.

LIGÁRADAN PÁBLO LUN TÍTO

Labürüjan Páblo lun Títo

¹ Áu Páblo, le abürüjabarun gárada to, ában esériwiduti lun Búngiu áu, ában giñe láni Jesucrístu apóstolu. Oúnaja lumútina lúntima níchugun dügüdaguaü lun jafiñen ja anúadaja láñabaña Búngiu quei lánigu, lun giñe gayáraabei lan jasúbudiruni inárüni lánina wafiñen, gayára lámuga jabágaridun ában ibágari derégewati lun. ² Ítara lúba gayára lan jeménigidun lun jabágariduba lan súnwandan lúma Búngiu. Búngiu, le mayéejanbei, aríñaga lumúti luágu líchugubei lan ibágari magúmuchaditi le woun lúmagiñe lubáragiñe ladügüni ubou. ³ Guetóti, queisi chülüjali lan dan, subúdigüda láali ugánu lánina asálbaruni woun, ábati loúnajanina Búngiu le Wasálbaragüle, lun napúrichijani ugánu ligía. ⁴ Nabürüjañoun gárada to bun, Títo, le nanügübei queisi niraü le tímatimaati, lídan ában wafiñerun luágu Crístu. Ayúmajatina lun bibijin abíniruni lúma darángilau lúmagiñe Wáguchi Búngiu, lúma lúmagiñe Wabúreme Jesucrístu le Wasálbaragüle.

Luwádigimari Títo luágu ubouju Créta

⁵ Léububei nígirunibu luágu ubouju le gíribei Créta, lun baráanseruni le mégeigilibei lun laráanserún, lúma lun bíchugun fádirigu lídan ságü fulásu queisi naríñaguni bun. ⁶ Ában fádiri lúnti labágaridun buídu, úa lámuga ni cáta uáguti lererúa lun. Lúnti ábanrügü tan lúmari, lúnti afiñe jamá lirájüñü luágu Crístu, gagáambadi, lun giñe buídu lan jouserun lirájüñü luei gayára lan líchugúniwa jadúnrun. ⁷ Lábugiñeñein laríaajan fádiri luwádigimari Búngiu, ligía lúnti lubei labágaridun ában ibágari le úraguati. Lúnti derégeguañu lan lúngua joun ámu, maríbanme lijéniute, moún lumuti gátadi lan, manígi ligíame wuribu, mínsiñelá seínsu lun sarágu. ⁸ Lubáragiñe líra, lúnti aráanseñu lan súnwandan lun lerésibirun bisídatiña lúbiñe, lúnti ában lan wügüri le jínsiñejabuti lun le buídubei, lun buídu lan lichügü, buídume louseruniña sun güriña, derégeguañu lúngua lun Búngiu, láu ubáfu lun lárügüdagun lúngua. ⁹ Lúnti lárügüdün luágu ugánu inárüniti le uágubei gayára lan weménigidun, le arúfudajoubei lun, lun gayára lan líchugun dügüdaguaü joun ámu láu arúfudajani le richábei, lun giñe lafiñeragüdüniña ja asígenerubalin.

¹⁰ Lugúndun añájein sarágu magáambaditiña, jádaantima jarásan juríu, ja arúfudajabaña libídiouniga áu, ayéeda jamáña güriña. ¹¹ Lúnti ladaurúniwa jayúma ja, ladüga chagáguagüdatiña sarágu família láu jarúfudajani le moún lubei, lun jagáñeirun seínsu láu múarani.

¹² Aríñagatí meja ában chu táu Crétana, le ñí bubei guetó, jawágu lupáisanun. “Güriña Crétana, súnwandan yé jama, machúlaaguntiña, jalíluatiña, magúali.” ¹³ Áni inárÜni laríñagubei. Ligía lubeiti, badeínja joun jere, lun jóudin láu arúfudajani le richábei luágu wafiñen, ¹⁴ lun giñe mebéresen jamá láu buri úraga le jadágun juríu, ni láu le jaríñagubei güriña, játima íchugubalin janágan luágun inárüni.

¹⁵ Queisi laríñawagúniwa, jarúmati sun cátei joun ja jarúmabaña anígi, ánjein joun güriña ja íchugubalin janágan luágun inárüni áni marúma tugúya janígi, madárirun jamúti ni cáta jarúma, wíyeti jasáminan, wíyetu giñe janígi. ¹⁶ Aríñagatiña luágu subúdi lan Búngiu joun, láu buri cátei

le jadüğübei, arúfuda jamúti luágu ibídiñe lan Búngiu joun, lugúndun mínsiñejabutiña, magáambaditiña, mayáraatiña lun jadüğüni le buídubei.

2

Arúfudajani inárüni rúti ibágari buíti

¹ Anjeinti amürü, Títo, lúnti barúfudajani luwúyeri igáburi le lúnbei jagáburiduni afñetiña luágu Crístu, ában ibágari le úraguabei lúma inárüni le lúmagiñebei Búngiu. ² Lúnti mátun jamá wüğüriña weiyaaña mútu, inébeba jagíame, buídu jachüğü, derégüdagu lídan jafñen luágu Crístu, buin láu ínsiñejabuni lúma gurásu. ³ Würíña giñe ja weiyaaña, lúnti giñe buídu lan jóuserun queísi lánigu Búngiu, lúnti mamárasualugu jamá, mabácharuadun jagíame. Lúnti íchugun jémpulu buíti láu jabágaridun lúma jerérun, ⁴ lun jarúfudajan joun würiña ñübürigiña jawei lun jínsiñe jamá jámari joun, jínsiñe jarájüñü joun, ⁵ lun buídu lan jachüğü, jarúma jagía, aráanseja jagía jábiñe, areída jagía, gagáambadi jagíame lun jámari. Lúnti ítara lan jabágarí würiña, lun úa jamá ni ában adímurejatiña wuríba luágu ugánu le láni Búngiu luágu asálbaruni láu afñeruni luágu Jesucristu.

⁶ Arúfudajabá joun wüğüriña irájüñü lun buídu lan jachüğü, ⁷ rúba ában jémpulu buíti joun lídan sun cátei. Arúfudajabei lérüğü inárünibeí joun láu ában igáburi derégüdati, ⁸ adímurejeina láu ában igáburi magádieta le uáguti lásiñera ladárirún mégeiti. Ítara lúba janüğüba báganiñu busíganu luágu luríban jóuserun áni siñábei jadímurejan wuríba buágu.

⁹ Aríñagabá joun esériwidutiña lun gagáambadi jamá joun jayúbudirigu lídan sun cátei, moúnabagun jamáñame, lun buídu lan jesériwidun joun, ¹⁰ lun míwerujan jamá, lun jarúma lan jagáburi le gumúti jáma jayúbudirigu lun larijiniwa lídan ligáburi jabágaridun luágu buídu lan arúfudajani le luáguti Búngiu Wasálbaragüle.

¹¹ Arúfudajabei cátei le, Títo, lugúndun arúfuda láali Búngiu lareídun woun, le ídaangiñebei gayára lan jasálbarun sun gürgía lídaangiñe luríban jagáburi. ¹² Arúfudaja láali Búngiu woun láu lareídun lun wígiruni wuríbani lúma ayúmajani lánina ubou, lun wabágaridun ában ibágari le buíti ligíbuagu ubou le, ragüguañu woúngua, derégeguañu woúngua lun Búngiu. ¹³ Niján luwúyeri igáburi le lúnbei wagáburidun lídan le wagúrabajaña lan lagúnfulirun lubuidun cátei le uágubei lariñaga Búngiu—lagíribudun Wabúngiute, Wasálbaragüle Jesucristu ubouágun láu sun luweírigun. ¹⁴ Deréguati lúngua lun loúnwen wawágu, lun lasálbaruniwa lídaangiñe sun wuríbani lúma lun larúmadagüdüniwa le gumúti, lun láni wamá, aráanseñu lun wadüğüni le buídubei.

¹⁵ Ligía buri cátei le lúnbei barúfudajani, íchigeina dügüdaguaü, arérejeina láu sun ubáfu. Míchigabá lúgaaru lun banüğüniwa quei ni cáta.

3

Cátei lé buri lúnbei jadüğüni afñetiña

¹ Jarítaguagüda báña afñetiña luágu Crístu, luágu lúnti lan jagúnfulirun jáma gumádimatiña lúma jáma ja oúnajabaliña, lun gagáambadi jamá joun, aráanseñu jagíame lun jadüğüñ furúmieguarüğü cátei buíti, ² lun madímurejan jamá wuríba luágu ni ában, lun díli lan jóuserun, areída jagíame, lun únabugu jamá lídan jóuserúniwa sun gürgía.

³ Lugúndun wagía afiñetiña, ibídiouguati meja gíñe wáu, magáambadi wagía meja lun Búngiu, barütiwa meja ában úma wuríbati, lidámun meja sun luwúyeri ayúmajani wuríbati lúma ugúndani wagía. Jéchutiwa meja adüga wuríbani joun ámu, wabágariduña meja lídan gimúgaü, iyéreejabutiwa meja, iyéreegutiña meja wíbirigu woun. ⁴ Ánjeinti dan le larúfudunbalin Búngiu Wasálbaragüle lareíni lúma línsiñejabu joun gürígia, ⁵ ába lasálbaruníwa, máma jamúga ladüga wadügün som cátei buíti, ladüga wagúdeme lun. Sálba lumútiwa láu lachíbuni wafígoun, rúti Sífiri Sándu iséri ibágari woun lun gayáraabei lan wabágaridun queísi labúseerun. ⁶ Lugúndun rúlaali Búngiu Sífiri Sándu woun lídaangiñe Wasálbaragüle Jesucristu, lun wámabei lan láu sun luweírin lubáfu. ⁷ Láu larícharaguagüdüniwa Búngiu ligíbugiñe láu lareíni, gayáraabei werésibiruni ibágari magúmuchaditi le wagúrabajabei lúmagiñe Búngiu siélu. ⁸ Inárüni cátei le.

Buséntina lun harúfudajani buri cátei le láu ában éregu, lun ja lan afiñebaña luágu Búngiu, lun súnwandan lan jíchaagun jóungua lun jadügüni cátei le buídubei. Buíti cátei le, áni buíti lanügün joun sun gürígia. ⁹ Dísebá lueí sigénei buri le málati, úraga buri jawáguti binádu mútu, fáreinguaü buri, lúma buri wuríbu lueígiñe lilúrudun Moisés. Sún buri cátei líra, manügünti buíti lun ni ában.

¹⁰ Ánjein ñí lubei ában tílana ligílisi le adügübalin fáreinguaü, ererabá lun ában o bián weíyaasu, ánjein madügün gásu báu, ígirabeí lúngua. ¹¹ Subúdi báali luágu ígira láali lan wügüri ligía úma le surúbei láu luwúyeri labágaridun.

¹² Dánme nouñajani Artémas o Tíquico lan lun lárügüdüni bubára ñi, buséntina biábin aríjana Nicópolis lugúndun ñíba násügürei lidáani luríbouga. ¹³ Íderaguabeí Zénas, le subúdijabúbei lun lúrodu, lúma Apólos lídan sun le buáraati, rubeíme le jemégeirubei joun lun jasígiruni jaweíyasun. ¹⁴ Furéndeí jamá gíñe sun wánigu lun jadügüni cátei le buídubei, ídeja jagíame dan le mégeiwa lan, ju lámuga jabágari lídan Crístu.

Mábugaü

¹⁵ Mábuga jáña sun ja núbabaña bun, mábuga wáña joun ja jínsiñejabúbaña woun queísi idújeñu lueígiñe Crístu. Binílaün Búngiu sun jugúya ja alíjabarun gárada to. Ítaralá.

LIGÁRADAN PÁBLO LUN FILEMÓN

Labürüjan Páblo lun Filemón

¹ Áu Páblo, le nadaürüñabei lueígiñe napúrichijan luágu Jesucrístu, nabürüjañoun gárada to, úara lúma Timotéo, le wadúje lueígiñe Crístu, bun, Filemón, le weírubei Ínsiñe woun, le gíñe woúba lídan wadágimanu. ² Gárada to, joúntu gíñe tílana ligílisi ja oúndaragubaña búbiñe, queísi tun wadúje Ápia, lúma lun Arquípo, le wámabei lídan áfaaguni lídan luwádigimari Crístu. ³ Resíbi jumá abíniruni lúma darángilaü lúmagiñe Wáguchi Búngiu lúma lúmagiñe Wabúreme Jesucrístu.

Línsiñejabu Filemón lúma lafñen

⁴ Teínqui numúti Búngiu súnwandan lídan le narítangun buágu lídan nayúmuragun lun, ⁵ lugúndun agáambaadina luágu ínsiñejabuni lúma afñeni le buágubei lun Jesúsú lúma joun sun ja lánigubaña Búngiu. ⁶ Amúriajatina lúma Búngiu lun ja lan afñeñabaña luágu Crístu ladüga bafñen, lun jayábin lun gunfaráanda jamáni sun abíniruni le wabíjubei lúmagiñe Jesucrístu, buídu. ⁷ Nidúje, oúnwenbun nugúndan lúma dügüdaguaü le nídaanbei luágu bínsiñejabu, lugúndun darángilajaru janígi ja afñebaña luágu Crístu, bugúndun.

Lamúriajan Páblo ában fuleísei lun idámuni Onésimo

⁸ Láu sun garícha nan queísi ában láni Crístu apóstolu lun naríñaguni le lúnbei badügüni bun, ⁹ jímein numúti ayúmuraguarügü nan bun luágu ínsiñejabuni le wádaanguabei woúniwagua. Áu Páblo, weíyaadina, guetó nadaürüña lueígiñe napúrichijan luágu Jesucrístu. ¹⁰ Amúriajatina ában fuleísei búma lun Onésimo, le ítarajalíbei queísi niraü lídan Jesucrístu lárigiñe lerésibiruni Crístu láu nadímurejan lúma ya furísunrugu.

¹¹ Lídan meja dan le sügüjalíbei, ában meja idámuni moúnti Onésimo bun, ánjeinti guetó, gebégiti bun queísi nun. ¹² Noúnajañein bun lárigoún, resíbibeí lubeíti láu ugúndani lugúndun láu noúnajani bun, queígubeirügü jamúga noúnajañoun lan nanígi, le luweírín línsiñe nun. ¹³ Gúndaatina jamúga lun leréderun núma ya, lún jamuga lesériwidun nun bewéñegua, sun anája lan adaürüwa lueígiñe napúrichijani ugánu le lánina asálbaruni. ¹⁴ Mabúseerúntina nadügün ni cáta magúndaga amürü láu, lun máma lan láuti afósuruní fuleísei le badügübei nun láu jamúga bígiruni núma, lun láuti lan bugúndan guánarügü. ¹⁵ Fágua lanúrunbei Onésimo bueí luágu átiri dan lun búmabei lan guetó lun sun dan, ¹⁶ guetó mámarügü queísi ában idámuni, queísi cátei buítimaati lueí idámuni—queísi ában idújei jínsiñeguti. Weíríti línsiñe nun, lúnti jínsiñetima lan bun, mámarügü queísi wügüri, queísi gíñe ában idújei lueígiñe Crístu.

¹⁷ Ánjein lubeíti barü bubáline queísi ában boúba lídan wesériwidun lun Crístu, resíbibeí queísigubeirügü jamúga áu lan berésibirubei. ¹⁸ Ánjein adügaali lubeí dáñu bun, o ánjein dúwei lubálibu, agúburaja bána. ¹⁹ Áu Páblo, nabürüjañein murúsun cátei le láu nújabu lúma niléturan. nafáyeyirubei bun, láu sun, gayára lan jamúga narítaguagüdünibu luágu dúweigua ban gíñe búngua nun lugúndun áu lan asúbudiragüdúbalin

Wasálbaragüle bun. ²⁰ Ánja, nidúje, adügabei fuleísei le nun queísi afíñeti luágu Crístu, ámalijaboún nanígi queísi idújei lueígiñe Crístu.

²¹ Nabürüjaña bun lugúndun choúru nan luágu bagáambadi, áni subúditi nun luágu badügüba lan sügü láu le uágubei namúriaja búma. ²² Aráansejabá gíñe ubáraü nubá, lugúndun agúrabatina luágu lídan lánme loúnabuni Búngiu jayúmuragun lun náfuridun furísunrugugiñe, lánjaruba lun nídin aríjaün.

Mábugaü lúma lagúmujoún abíniruni

²³ Mábuga líña Epáfras bun, le nouba furísunrugu lueígiñe lapúrichijan luágu Jesucrístu, ²⁴ mábuga líña gíñe Márcos bun, Aristárcos, Démas, lúma Lúcas, ja ñadágimeinbaña úara núma.

²⁵ Binílaün Wabúreme Jesucrístu. Ítaralá.

GÁRADA JOUN JA ADÍMUREJABALIN HEBRÉO

Adímurejaali Búngiu lídaangiñe Liraü

¹ Lídan meja dan le sügüjalibei, adímurejati meja Búngiu joun binádu wagübüriugu sarágu weíyaasu lúma lídan sarágu luwúyeri, jádaangiñe profétagu, ² guetó, lídoun buri lagúmujoún dan le, adímurejaali woun lídaangiñe Liraü. Lídaangiñe Liraü le, ladügei uboú, áni rúlaali sun cátei lun. ³ Arúfuda lumúti Liraü Búngiu luweírigan Lúguchi luouguá, ligía méme Búngiubei, ligía ágüdajabalin sun cátei láu lerérun le gabáfubei. Lárigiñe lachíbuni wafígoun, ába lañúurun lueígiñe loúnwenren lála Búngiu, le Súnti Gabáfu, siélu.

Weíriguti Liraü Búngiu sügü jáu ánjeligu

⁴ Nübinjali Liraü Búngiu lun weírigubei lan jaweí ánjeligu, resíbiali ában ubáraü ñnugutimaati jaweí queísi lalágaante queísi Liraü Búngiu. ⁵ Maríñagunti Búngiu ni ában weíyaasu lun ni ában ánjeli.

Niraü amürü,
rúnaali ubáraü le bun ugúñe,
maríñagun ligía luágu ni ában ánjeli.

Áuba Búguchi,
amürüme nisáani.

⁶ Ánjeinti dán meja le loúnajaabalin Liraü le ábanrügüti uboúagun, aríñagati. Judúgua jamá sun náni ánjeligu lun.

⁷ Laríñaga jawágu ánjeligu.
Adúgatina lun ítara jamá náni ánjeligu camá garábali,
adúga áu lun ítara jamá camá wátu geméti,
oúnagüleigu jagía ja esériwidubadina.

⁸ Ánjeinti lun Liraü aríñagati Búngiu ítara.
Búngiu, lúntibei súnwandan bañúurun luágu bála lun barúejan,
láu ában úraguni bagúmadija.

⁹ Jínsiñeti le richáguabei bun, iyéreeguti le wuríbabei bun,
ligía níchugunbei, áu le Bubúngiute, gíbetima ugúndani bídoun sügü jáu
bíbirigu.

¹⁰ Aríñagati gíñe.
Amürü le Abúremein, lídan lagúmeseja, adúga bumúti uboú,
láu bújabu badügei siélu.

¹¹ Lagúmuchuba siélu lúma uboú, ánjein amürü, beréderuba lun sun dan.
Liábiba siélu lúma uboú lun laweíyadun quei anáanguni,

¹² babáruchagubaña quei ában daúguaü,
jasáansirúaba quei anáanguni.

Ánjein amürü, ában mémebadibu, magúmuchunbei bíbágari.

¹³ Maríñagunti Búngiu ni ában weíyaasu lun ni ában ánjeli.

Ñurúba lueígiñe noúnwenren darí lun nagáñeiragüdünibu jawágu báganiñu,
ru náñame bújaburugun.

¹⁴ Sun ánjeligu, esprítugu esériwidutiña lun Búngiu jagía, oúnajoútiña lun jíderaguniña ja lúnbaña jerésibiruni asálbaruni lídaangiñe jaffígoun.

2

Lúnti wouñigiruni wasálbarun

¹ Queí itara líña lubeí luweírigun Liraú Búngiu, lúnti lubeí weténiruntima lun ugánu le agáamba wamáalibei luágu, lun madíreirun wamá lueí ũma. ² Chourúati lilúrudun Búngiu lé meja íchugúbei joun gürígia jádaangiñe ánjeligu lídan meja ámu dan, áni ja adúraagubalin, madügün jagía gásu láu, áburujati ligáñi Búngiu jawágun láu írichaü. ³ Gúbuméti wafáyeija luágu wafígoun ánjein mouñigirun wamá ouñwenbun asálbaruni le resíbi wamáalibei lúmagiñe Jesucrístu le Wasálbaragüle. Wabúreme Jesucrístu guánarügü adímurejabei luágu asálbaruni le furúmiñe, lárigiñe, ja agáambubalin, ában jásügüragüdüni woun láu ában achoúruruni luágu inárüni lan. ⁴ Ñurúgüda láali gíñe Búngiu ugánu ligia woun láu buri seíni lúma sarágu buri miláguru lúma láu Sífiri Sándu le líchugubei woun láu amúñegueinarügü luwúyeri ubáfu queísi labúseeruni.

Jesucrístu quei libíriña

⁵ Míchugun lumúti Búngiu ubouí líte le uágubei wadímureja lábun jagúmadijan ánjeligu, ⁶ lubáragiñe líra, lariñajare tídan Lerérun. Búngiu, ¿cáteiñeinsan wügüri lun barítaguba lan luágu?

¿Cáteiñein wügüri gouwedaditi badíjeridunbei láu?

⁷ Rúbumuti ünabu jaweí ánjeligu luágu murúsun dan, daüguagüda bumúti láu uweíriguni lúma inébesei, ru amürü ubáfu lun luágu sun cátei le badügübei,

⁸ rúbumuti sun cátei lábugiñoun lagúmadijan.

Dan lubeíti le líchuguni Búngiu sun cátei lábugiñoun lagúmadijan gürígia, mígirunti ni cáta lun mámabei lan lábugiñe. Láu sun líra, aríja wamúti luágu mámagili lan sun cátei ñüdünti láu le lubeíbei wügüri. ⁹ Ánjeinti lídan Jesucrístu, aríja wamúti lagúnfulirun sun dimúrei le, ligia meja ában gürígia le líchugubei Búngiu ünabu jaweí ánjeligu luágu murúsun dan. Láu luweírin línsiñejabu Búngiu woun, ánjati lun loúnwen Crístu jawágu sun gürígia, áni guetóti, daügu líña láu uweíriguni luágu ouweni le lasúfurirubei.

¹⁰ Sun cátei níjein lun Búngiu, áni lídaangiñeti gíñe, áni busénti Búngiu lun gafánran jamá sun lirájüñü lídan luweírigun. Ligia lúnti lubeí buga lasúfurirun Liraú Búngiu, le Jesucrístu, queísi ában gürígia lun ligiaba lan ában asálbaragülei gumúti láu asúfuriruni. ¹¹ Ja edéregertúabaña jarúma lun Búngiu lúma Liraú le edégerubaliña itara, sun jagía ában meme Úguchili—Búngiu. ¹² Ligia úa lubeí nibúsigari lan Liraú Búngiu lun lagúaruniña lámulenu jáma lítunu dan le lariñagun lun Búngiu, queísi bürüwañu lan tídan Lerérun Búngiu.

Nadímurejaba buágu joun namúlenu jáma nítunu, nerémujaba luágu buweírigun lagánagua adámurini.

¹³ Aríñagati gíñe.

Neménigiduba luágu Búngiu.

Aríñagati gíñe.

Anája, jáma isáanigu ja líchugubaña Búngiu nun.

¹⁴ Ja jasáanigu ában família, ában meme jitaü jagía, itara gíñe, wügüri meja gíñe garaüwarügüti Jesús, lun meja gayáraabei lan loúnwen, gayára lámuga lagünrinchaguni lubáfu Máfia le ídaangiñebei liábin ouweni joun gürígia. ¹⁵ Ítara líña gidá lumuti Jesucrístu janúfude gürígia, já meja

aganoúbaña quei idámuni lun anúfudei lueí ouweni. ¹⁶ Masáiragunti Crístu queísi ánjeli lun líderaguniña ánjeligu, salíti queísi wüğüri garaúwarügüti lun líderaguniña güriáia líledi, ja linébaanfaangu Abraham, ja lúnbaña jafiñerun luágu. ¹⁷ Lúnti líra, gásu meja ítara lúba lan queísi libiriña, lun liábinba lan lun ábanbei lan fádiri íñutimaati, le úraguati, láu gudémejabu joun güriáia, lun gíñe lachíbuni jafígoun güriáia láu ledéregeragun lúngua luágu gurúwa. ¹⁸ Áni queíti súfuri lan, áni ouchagualeí Máfia, guetó gayáraati gíñe líderaguniwa lídan le wouchawagún.

Weírigutimaati Jesúsu lueí Moisés

3

¹ Ítara líña lubeíti, nidújeñu derégeguatiña joungua lun Búngiu, quei jádaangiñetün lan ja únbaña wájali lan Búngiu lun jaganoún lúma siélu, téni jumá buídu lun Crístu le loúnajabei Búngiu, le gíñe fádiri íñutimaati le lánina afíñeni le wawágubei. ² Úraguati Jesúsu lúma Búngiu lídan sun wadágimanu le únbei lanúadirei, queísi meja gíñe úragua lan Moisés lídan sun lesériwidun jádan lufámilian Búngiu. ³ Gadúnatimaati Jesúsu uweíriguni sügü láu Moisés ítara quei resibitima lan le adügübei ában múna uweíriguni sügü táu múna to ladügüboun. ⁴ Sun múna adúgarügü lumútu som güriáia, áni Búngiu adügübalin sun cátei le níjeinbei. ⁵ Ítara liñáti, úraguati meja Moisés lídan lesériwidun jádan lufámilian Búngiu queísi ában esériwiduti lun Búngiu, wadágimanu lé meja ladügübei, ában liyáwa inárüni le lúnbei lasúbudiragüdüniwa lídan dan le lúnbei liábin. ⁶ Ánjeinti Crístu, úraguati queísi isáani jádan lufámilian Búngiu, áni jádaangiñetiwa familia jagía ánjawa derégüdagu méme, ánjawa gíñe afiñe darí lúmoun wounwen, gúndaañu lídan eménigini le wawágubei.

Eméraaguni joun lumútuniña Búngiu

⁷ Ligía lubeíti, lúnti wagáambuni le lariñagubei Sífiri Sándu tídan Lerérun Búngiu.

Ánjein jagáamba le lariñagubei Búngiu ugúñe,

⁸ medéreratá janígi quei meja tedérerun janígi

magáambaditiña ja ouchagubalin Búngiu lídan fulásu mageírawati.

⁹ Lídan bián-wein irúmu le jáubei ñi,

jouchagua jamútina binádu jagübürigu lídan fulásu ligía, líña Búngiu,

láu sun aríja jamáni buri cátei le nadügübei.

¹⁰ Ligía nagáñidunbei jáma güriáia jagía,

ába nariñagun. “Súnwandan charárañu jamá tídan janígi,

májatiña jafálaruni úma le narúfudubei joun.” ¹¹ Ligía nagáñidunbei jáma,

ába náfiñurun luágu mebélubaña lan lídoun fulásu lé yebe aráanse náalibei jabá lun jeméraagun ñi.

¹² Nidújeñu, toúnigi jumá lueí tedérerun janígi lun jadisedun lueí Búngiu le wínwanbei láu mafíñerun jumá luágu. ¹³ Lubáragiñe líra, rújuma gurásu júniwagua ságü wéyu, sun níjangua lan dan. Toúnigi jumá lueí

leyéedagunün figou, edéreragüdonme janígi, ¹⁴ lugúndun ánjawa ítara méme derégüdagu darí wounwen lídan afíñeni le wawágubei lúmagiñe furúmiñeti, gafánraanbadiwa lúma Crístu.

¹⁵ Níjangua dimúrei le, le gíñe wounbei, wagía le wínwanbei lídoun buri dan le.

Ánjein jagáamba le laríñagubei Búngiu guetó,

medéreratá janígi quei jagüra ja magáambadibaña lun Búngiu.

¹⁶ ¿Cátañati agáambubalin lumálali Búngiu, lárigiñe, ába jagáñidagüdüni láu luríban jagáburi? Sun ja laságarubaña Moisés Ejiptogiñe. ¹⁷ ¿Cáti úma lagáñida Búngiu bián-wein irúmu? Jáma ja afígounjabaña, ja ówegubaña lídan fulásu mageírawati, ába ligirúniwa jábu ñi. ¹⁸ ¿Cáti un láfiñura Búngiu luágu mebélubaña lan lídoun fulásu lé yebe aráanse láalibei joun lun jeméraagun ñi? Joun ja adüraagubalin le lubeíbei. ¹⁹ Ítara líña lubeíti, goúnigi jumá lun jafiñerun meme darí lúmoun jóunwen, lugúndun ladüga maffiñeni le jawágubei binádu wagübürigu, siñá lubeí meja jebélurun lídoun fulásu le aráanse láalibei yebe Búngiu jabá.

4

¹ Guetó lubeíti níjeingua béna júnren woun lun gayára lan webélurun lídoun eméraaguni le aráanse láalibei Búngiu woun siélu, lúnti goúnigi wamá, siñádügü liñeín lebélorun ában wádaangiñe, dánme lachülürün óra lun wounwen. ² Lugúndun apúrichijoáli gíñe ugánu luáguti asálbaruni woun queísigubeirügü joun binádu wagübürigu, mesériwinti lun ni cáta joun jagáambuni ugánu ligía lugúndun agáamba jamúti, maffiñerunga luágu.

³ Ánjeinti wagía le afiñeelibei, wagíaba ebélura lídoun eméraaguni le, le uágubei laríñaga Búngiu.

Ligía nagáñidunbei jáma,

ába náfiñurun joun luágu mebélubaña lan lídoun fulásu le aráanse náalibei yebe jabá lun jeméraagun.

Ítara líña lerérun Búngiu jawágu binádu wagübürigu. Aráanserúati fulásu lánina eméraaguni joun lúmagiñe wéyu le lagúmuchuni Búngiu ladügüni uboú, ⁴ queísi labürüdüniwa tídan Lerérun Búngiu luágu lisédün wéyu.

Ába leméraagun Búngiu lídaangiñe sun luwádigimari luágu lisédün wéyu.

⁵ Ariñawagúaya ligía tídan Lerérun tugúya ítara.

Mebélubaña lídoun fulásu le aráanse náalibei yebe jabá lun jeméraagun.

⁶ Láu dimúrei buri le, subúdi wamúti luágu aráanserúañu lan fulásu lánina eméraaguni jabá gürigia, ja binádu wagübürigu, ja furúmiñebaña agáambeí ugánu lánina asálbaruni, mebélutiña ladüga maffiñeni le jawágubei lun Búngiu. ⁷ Ligía laráanserunbei Búngiu ámu dan lun gayáraabei lan jebélurun iséri gürigia lídoun jeméraagun, lugúndun adímurejati Búngiu lídaangiñe lé meja laríñagubei Davíd sarágu dan lárigiñe, tídan Lerérun Búngiu.

Ugúñe, láu jagáambuni le laríñagubei Búngiu,

medéreratá janígi lun.

⁸ Lun jamúga fulásu lan lé meja ñjin lubeí lanügaña Josué Israelítagu fulásubei lánina eméraaguni le uágubei ladímureja Búngiu, madímurejaanyati jamúga Búngiu sarágu irúmu lárigiñe jebélurun Israelítagu lídoun jageíra luágu “ugúñe lan dan” lun jagáambuni Búngiu, gayára lámuga jebélurun lídoun jeméraagun. ⁹ Ítara líña lubeíti, níjeingua ában eméraaguni le gumúti joun lánigu Búngiu, ¹⁰ lugúndun le ebéluruti eméraagua lúma Búngiu siélu, eméraaguati lueí luwádigimari ítara quei leméraagun meja Búngiu lueí luwádigimari lárigiñe ladügüni uboú. ¹¹ Lúnti lubeíti wafiñerun le tímatimaati luágu Jesucrístu lun gayára lan webélurun lídoun eméraaguni siélu, faládügü liñálin ában wádaangiñe jáni já meja maffiñerunbaña jémpulu, ábame leféridirun.

¹² Lugúndun mítaraantu Lerérun Búngiu queísi ában cátei le jiláalibei, lubáragiñe líra, gabáfuti lun lasáansiraguni wagáburi. Belútu tídoun wanígi queísi ában efein to biángua tamána, belú tugúya chülü tímoun wawáni lúma wáni espíritu. Furáangugüda tumúti sun warítagan lúma sun wayúmajan, arúfuda tugúya cátañañadiwa lan. ¹³ Úati ni ában gürígia le ladügübei Búngiu lun gayára lan larámudagun lueí laríjin Búngiu, furáanguti sun cátei lun, le únbei lúmaba lan wagúsera.

Jesúsu wafádiriñebei le tímatimaati

¹⁴ Jesúsu le Liraü Búngiu, ligía wafádiriñebei le tímatimaati, le belújalibei siélun lun laráramun ligíbugiñe Búngiu abúyeija luágu wafúleisein. Ligía lúnti lubeí derégüdagu méme wamá lídan ligáburi wafíñen. ¹⁵ Gayáraati gudémejabu lan Jesucrístu le wafádiriñebei woun luágu wadébilin, lugúndun ligía guánarügü súfuriti sun luwúyeri ouchwaguni quei wagía, mafígounjaanti. ¹⁶ Ligía lúnti lubeí wayarafadun lun Búngiu le jínsiñejabúbei woun, láu afíñeni, lun gudémejabu lan woun, íderagua lówame láu lareíni lídan wemégeirun.

5

¹ Según wagáburi, wagía juríu, ságü ában fádiri le íñutimáabei anúadajóati wadaangiñe lun ligíaba lan wachügüdüna ligíbugiñe Búngiu, lun gíñe líchuguni edéweejani lun Búngiu lueígiñe jóubadina gürígia, lúma adágaragüdüni luágu lifígoun lúma luágu jafígoun jíbiri gürígia. ² Quei débili lan fádiri guánarügü quei furúmieguarügü gürígia, gayáraati gudémejabu lan joun gafígountiña jáma acháragadutiña, ³ áni ladüga lidébilin guánarügü queísi furúmieguarügü gürígia, gásu gíñe ladágaragüdüni luágu lifígoun guánarügü queígubeirügü luágu jafígoun jíbiri gürígia.

⁴ Siñáti ladáagun ában gürígia lúngua fádirime le íñutimaabei láu láni lúngua, Búngiu anúadirubalin, rúleí ubáraü le lun queísi meja lasúseredun lun Aarón lé meja furúmiñeti fádiri le íñutimaabei. ⁵ Ítara líña lasúseredun lúma Crístu, máma ligía íchaagubei lúngua fádirime íñutimaati láu láni lúngua, Búngiu íchugubalin ubáraü weíriguti le lun quei buga laríñaguni lun.

Niraü amürü,
rúnaali ubáraü le bun ugúñe.

⁶ Aríñagati gíñe tídan méme líburu to Lerérun Búngiu.

Fádiri amürü lun sun dan,
le líbe Melquisedéc.

⁷ Dán meja le laganounbei Crístu ya ubouágu, ayúmuraguati meja láu umálali jéreti lúma sarágu águiraü lun Búngiu le gabáfubei lun leséfuruni lídaangiñe ouweni le lúnbei lasúfurirun. Ába lagáambuni Búngiu ladüga derégeguñu líña lan Crístu lúngua lun lugúndan Búngiu. ⁸ Láu sun Liraü lan Búngiu Crístu, chülüti dan lun laráfuduni lagáambadi láu lawánduni asúfuriruni. ⁹ Nübinti lun ábanbei lan asálbaragülei le gumúti láu lasúfurirun, lun gíñe ligíaba lan íchigei asálbaruni le magúmuchaditi joun sun ja ñüdüntiña láu le lubeíbei. ¹⁰ Ába lanügüni Búngiu Crístu quei fádiri íñutimaati líbe Melquisedéc.

Wuríbani le líchugubei lígirúniwa afíñeni

¹¹ Gíbeti lúnti waríñaguni jun luágu Crístu lúma Melquisedéc, jénreenguti laríñawagún furáangu, lugúndun siñá lan gunfaráanda jumáni. ¹² Sügújali sarágu dan lúmagiñe jasálbarun, lúnti jamúga gayáraajali lan jaráfudajani

Lerérun Búngiu joun ámu, áni busén mémegidün narúfudajaniya buri cátei létima ménreengünbei lídaangiñe Lerérun Búngiu jun. Irájüñügídün lídan jafiñen, queísi irájüñü ja gásubaña játun míligi lubáragiñe jamúga jeígin eígin le dügúdati. ¹³ Afíñetiña ja buséngiñabaña larúfudajoúniwa cátei létima ménreengünbei tídaangiñe Lerérun Búngiu joun, ítara jáña quei irájüñü ja gurágiña—úgagli gunfaráanda jamáni Lerérun Búngiu buídu. ¹⁴ Ja weínamujañábaña lídan jafiñen, subúdi Lerérun Búngiu joun buídu, subúdi jamei arúfudajani le buídubei lúmoun le mabuídunbei.

6

¹ Queímoun méme lubeíti wabáruaguóun lídan wasúbudin luágu Lerérun Búngiu, ígira wamámugei arúfudajani le ménreengünbei libügürü Crístu lun watúriajani lujúlilin-ágei. Marítagua wamá luágurügü lébu wafiñen, quei buri ligirün binádu igáburi le málati, lúma buri afiñeni luágu Búngiu, ² arúfudajani luágu badísei, líchugúniwa újabu jábulugú afiñetiña, jásaarun jiláaña lídaangiñe ouweni, lúma lagúmujóun lagúseragüdüniña Búngiu gürígia, ³ queímoun wabáruaguóun lídan wasúbudiruni lujúlilin-ágei Lerérun Búngiu, láu lubáfu wawágu.

⁴ Gürígia ja resíbi jamáalibei larúgounga ában weíyaasu, resíbi jameí Crístu queísi jasálbaragüle, resíbi jameí giñe Sífiri Sándu, ⁵ geféentiña luágu ugúndani le jasándirubei láu jalíjanun Lerérun Búngiu, lúma lubáfu Búngiu le siélubei jawágu ya ubouágu— ⁶ ánjein jíchiga janágan luágun Crístu lárigiñe sun cátei líra, ába jagíríbudun járigóun lídoun binádu jagáburi, siñáalime jaságüríjan, siñáalime giñe lánigu jamá Crístu. Lun jamúga jíchuguni janágan luágun Liraü Búngiu lárigiñe jafiñerun luágu, queisígubeirügü jamúga jádaraguñeinya lan luágu gurúwa, jéjerajaña giñe láu jagíbugiñe gürígia. ⁷ Gürígia ja eíbugubaña buídu lúma Crístu, ítara jáña quei múa le achúurubalin júya le áburujabei luágun, ában líchugun múa ligía ában alúbajani buíti joun ja ñadágumeinbalin, ladüga binílaali lán buga Búngiu múa ligía. ⁸ Gürígia ja íchugubaña janágan luágun Crístu, ítara jáña quei múa le ñí lumuti lájücha jíyu lúma lagübüri jíduru, úati ju lan lun ni cáta. Lábujuraba lábun líñaragun Búngiu, ábame lagudún.

Eménigini le adügübei lun derégüdagu wamá

⁹ Láu sun wadímurejan ítara, nidújeñu jínsiñetiña nun, afiñetiwa luágu ítara júba lan quei múa le íchugubei inádiri buíti, áni jibíjubei sun abíniruni le ñübinbei woun luágu wasálbarun. ¹⁰ Lugúndun úaraguati Búngiu, áni mabúlieidun lubeí le adüga jumáalibei, lúma ínsiñejabuni le arúfuda jumáalibei lun láu jíderaguniña jidújeñu luágu afiñeni, cátei le anjünjaguabei adügei. ¹¹ Buséntiwa lun ítara méme lan cáda ában jídaangiñe, arúfudei afiñeni le darí lúmoun jóunwen, lun gayáraabei lan jibíjini le jagúrabubei—lun jebélurun siélun. ¹² Mabúseerúntiwa lun jamáqualigudun lídan cátei le láni Búngiu, busénrügütiwa lun jáyeijani jagáburi já meja afiñebaña buídu buídu luágu Búngiu, awánda jameí sun asúfuriruni luágu, ába jerésibiruni le uágubei laríñaga Búngiu luágu líchugubei lan jun.

¹³ Dán meja le laríñagubei Búngiu lun Abrahám luágu labínirubei lan, fiñúti luágu guánarügü líri ladüga úa lan ámu weírigutimáati lueí lun láfiñurun luágu, ¹⁴ ába laríñagun. “Nabínirubadibu sarágu, níchuguba giñe sarágu adügawaguni bun.” ¹⁵ Agúrabajati Abrahám láu gurásu, ába lerésibiruni le uágubei laríñaga Búngiu lun. ¹⁶ Dan le jáfiñurun gürígia, luágu

ában le weírigutimáati jaweí jáfiñura, áni choúrujaña ligíati ában cátei láu fiñún, úaali ámu cátei lun lariñawagún. ¹⁷ Ligía lachouúrurubalin Búngiu lerérun láu fiñún, lugúndun busén lan larúfuduni furáangu woun, wagía le lúnbei werésibiruni lalágaante Abrahám, luágu lagúñfulirubei lan lerérun luágu wasálbarun, masáansirunga ni cáta lídaangiñe. ¹⁸ Rúlaali Búngiu lerérun woun, rúleí láfiñurun luágu, bián cátei ligía, gayáraati weménigidun luágu, ladüga siñá lan leyéjean Búngiu. Áni láu cátei ligía, sun ja ñübinbaña lun Búngiu lun jasálbarun, gayáraati janügün gurásu, gayáraati jasúbudiruni le tímatisaati luágu jasálbaruba lan áni jebéluruba siélun. ¹⁹ Ágüdaja lumútu eménigini le wawáni derégüdagu, choúruña, queísi lágüdanun oúnguru ugúnein derégüdagu. Choúruwañu líña eménigiruni le wabíjibe buídu buídu, ragüñu líña luágu Búngiu lídan fulásu sándutimáati siélu, ²⁰ le ñíjin lubei lebelura Jesúsu ában weíyaasu wawágu lun ladáruni úma wabá. Níjein ñi guetó afádirija wawágu ligíbugiñe Búngiu queísi ában fádiri íñutimáati le líbe Melquisedéc.

7

Jesúsu fádiri líbe Melquisedéc

¹ Melquisedéc le, urúei lídan meja fulásu le gíribei Sálem, lufádiríñein gíñe Búngiu le íñutimáabei. Dan le lagíribudunbei Abrahám wuríburugugiñe lárigiñe lagáñeiruni wuríbu jawágu urúeigu, ába láfuridun Melquisedéc lubároun, ába labíniruni, ² ába líchuguni Abrahám ában lídaangiñe cáda díisi lídaangiñe le lagáñeirubei lídan wuríbu lun. Míni lan íri Melquisedéc lídan furúmiñeti cátei, “urúei richáguati” queí mejati lurúeite lubei Sálem, áni “darángilaü” míni lan Sálem, itara líña lubeiti “lurúeite darángilaü” Melquisedécbei. ³ Ibídiñewati ca lan lagübürigubaña, ibídiñeti gíñe ca lan linébaanfaangubaña, ibídiñewati ni cáta libügürü lagüriajoun ni libügürü lounwen, liyáwa Liraü Búngiu ligía, ában fádiri lun sun dan.

⁴ Aríja jumeiti luágu weírigu lán meja Melquisedéc. Abrahám guánarügü lé meja binádu wadúje, rúlumuti ában lídaangiñe cáda díisi lun lídaangiñe le lagídarubei jaweí urúeigu lídan wuríbu. ⁵ Según lilúrudun Moisés, fádirigu ja linébaanfaangu Leví lúnti jagúburajani ában lídaangiñe cáda díisi jámagiñe gürigia lídaangiñe sun cátei, láu sun jadújeñu jamá, linébaanfaangu Abrahám jáledi. ⁶ Ánjeinti Melquisedéc, láu sun máma lan linébaanfan Leví, agúburaja lumúti ában lidíisin cátei lueí Abrahám, lé buga erésibirubalin dimúrei lúmagiñe Búngiu. Ítara líña labíniruni Melquisedéc Abrahám, ⁷ áni siñáti lasígeneruni ni ában luágu weírigutima lan le abínijabei sügü láu le abínirúabei. ⁸ Ya wádan, fádirigu ja erésibirubalin cáda lidíisin cátei, wügüríña goúwedaditiña, ánjeinti luágu Melquisedéc, tadímurejan Lerérun Búngiu luágu queí luágu ában le winwangili. ⁹ Áni gayáraati lariñawagún luágu Leví jáu sun fádirigu ja linébaanfaangu ja agúburajabalin cáda lidíisin cátei guetó, luágu fáyei jamáni gíñe lun Melquisedéc lídan óra le lafáyeirubalin Abrahám lun, ¹⁰ lugúndun lídan ában oúbaü, barü lumutiña buga Abrahám linébaanfaangu ja magüriajoungiñabaña lídan lúgbu dan le láfuridunbei Melquisedéc lubároun.

¹¹ Jádaangiñe fádirigu ja linébaanfaangu Leví jerésibirei Israelítagu lilúrudun Moisés, áni Aarón furúmiñetibeí jafádirin. Gürigia ja afálarubalin lúrudu ligía, lun jamúga gayára lan jasálbarun le tímatisaati lueigiñe, memégeirunwali jamúga lachülaagun ámuya fádiri, máma líbe Aarón,

líbe Melquisedéc. ¹² Lugúndun dan le liábin fádiri lídaangiñe ámu adügawaguni, sáansiwati giñe lúru lué buga lábugiñebei lafádirija. ¹³ Wabúreme Jesucrístu, queisi fádiri lídaangiñe ámu adügawaguni queisi Melquisedéc, sáansiguati giñe lúru lué lábugiñebei lafádirija. Taríñajare Lerérun Búngiu luágu lídaangiñeti lan ámu liraü Israél lueí Leví liábin Crístu—ában adügawaguni le úagilibei ni ában jádaangiñe afádirijati. ¹⁴ Lugúndun subúdiwati buídu luágu jádaangiñe lan linébaanfaangu Judá liábin Wabúreme Jesucrístu, áni maríñagunti Moisés ni cáta jawágu adügawaguni ja dan le ladímurejaanbei jawágu fádirigu.

¹⁵ Áni furángutimáati le dan le liábin Jesucrístu lun lafádirijan queisi Melquisedéc, ¹⁶ máma láu ában lúru lué aríñagubei cába lan ídaangiñe adügawaguni liábin, liábin lun fádiribei lan lugúndun gabáfu lan lun labágaridun lun sun dan. ¹⁷ Niján le laríñagubei Búngiu luágu Jesucrístu.

Ában fádiri amürü lun súnwandan,
le líbe Melquisedéc.

¹⁸ Gumúguati lubeíti binádu gumádi le lilúrudunbei Moisés, le lábugiñebei jafádirijan Levítagu, lugúndun nírein lan mégeiti luágu, ¹⁹ mabáfuti lúru lué ligía lun lasálbaruniña güriá lídaangiñe jafígoun. Lewéñeguati, nijein ában iséri aráanseruni le buitimaati, le ídaangiñebei gayára lan wayárafadun lun Búngiu.

²⁰ Áni láu ában fiñún ladügei Búngiu aráanseruni le lun Jesúsuba lan wafádiríñe. ²¹ Ja jíbiri fádirigu, máfiñurunwati dan le líchugunbei jafúlasun joun, ánjeinti luágu Jesúsú, le láubei fiñún líchugúa lufúlasun lun, laríñajare tídan Lerérun Búngiu.

Áu Búngiu le Abúremeinbei, fiñújadina bun,
masáansiragun nubeí narítangun.

“Ában fádiri amürü lun súnwandan,
le líbe Melquisedéc.”

²² Ligía Jesúsú lubeí achoúrurubei ában darádu buitimaati lueí le furúmiñeti. ²³ Já meja jíbiri fádirigu, chülütiña agíbedagua lugúndun quei ába lán buri jounwen, siñáti jasígirun, ²⁴ ánjeinti Jesúsú, quei mounwen lan, másügürünbei lifisiute queisi fádiri lúmoun ámu. ²⁵ Ligía gayára lubeí lasálbaruniña ja ayárafadubaña lun Búngiu lídaangiñe le tímátimaati lun súnwandan, lugúndun gabágariti súnwandan lun layúmuragun lun Búngiu jawágu.

²⁶ Jesúsú lubeíti fádiribei íñutimáati le wabúseerúbei. Jarúma ligía, úati wuríbani lídan, ni figou, máma ligía ában jáma gáfígountiña, iñurúa ligía íñutima lueí sun cátei siélu lun lañúurun luma Búngiu. ²⁷ Mítaraanti quei jíbiri fádirigu íñutimaatiña ja gásubei jáfarun anímaalu lun jadágaragüdüniña quei sacrificsiu ságü wéyu, furúmiñe luágu jafígoun guánarügü, lárigiñe luágu jafígoun jíbiri güriá. Lubáragiñe líra, adüga lumúti Jesúsú sacrificsiu ábanrügü weiyaasu dan le líchaagunbei lúngua lun loúnwen luágu jafígoun güriá. ²⁸ Wügüríña ja débilibaña, jagía líchugubaña lilúrudun Moisés queisi fádirigu, ánjeinti lárigiñe lidáni lúru lué, ába láfiñurun Búngiu luágu Liraü lun ladügüni fádirime, le buídubei adügün le gumúti lun súnwandan.

Jesúsú búyei lun ában iséri darádu

8

¹ Le buítimaabei lídaangiñe sun le waríñagubei, luágu ítara líña lan wafádirin le íñutimaabei, áni ñurújali lueígiñe loúnwenren Búngiu siélu, ² áni lesériwiduña queísi fádiri lídan fulásu le sándutimáabei le ladügübei Wabúreme Búngiu yágüta siélu, máma fulásu le sándutimáabei le jadügübei gürígia ya ubouágu. ³ Sun fádiri íñutimaati líchugúniwa lun líchugun edéweejani lúma adágaragüdüni lun Búngiu, ligía gásu lubei giñe níjein lan som cátei lúnti ladágaragüdüni Jesucrístu lun Búngiu. ⁴ Lun jamúga yáñein lan Jesucrístu ubouágu, mámañein jamúga fádiri, lugúndun añájeingua fádirigu adágaragüdütiña le uágubei laríñaga lilúrudun Moisés. ⁵ Fádirigu ja, jadügüni jawádigimari láu buri cátei le liyáwarügüti lé buri siélubei. Subúdi wamúti luágu iyáwaü lan, lugúndun le lubábei ladügünun Moisés lúban Búngiu, ába laríñagun Búngiu lun. “Adügabeitia sun cátei queísi iyáwaü to narúfuduboun bun luágu wübü.” ⁶ Weíriguti lafádirijan Jesucrístu sügü láu jafádirijan fádirigu ubouágu, queísigubeirügü buítima lan darádu le uágubei labúyeija lúma Búngiu luágu jáni gürígia fuleísei ubouágu, áni buítimaati cátei le líchugubei iséri darádu ligía.

⁷ Lugúndun lun jamúga meja buídu lan furúmiñeti darádu le gumúti, le ladügübei Búngiu jáma binádu wagübürigu lídaangiñe Moisés, memégeirúnwati jamúga ábanya libíaman darádu. ⁸ Magúndaatí buga Búngiu laú furúmiñeti darádu ladüga mabáfu jamá binádu wagübürigu lun jagúnfulirun lúma darádu ligía. Ába laríñagun tídan Lerérún.

Laríñajare Jabúreme Búngiu. Lachülürüba wéyu lun nadügün iséri darádu jáma buri linásiñun Judá lúma Israél. ⁹ Mítaraanbei quei darádu le nadügübei jáma binádu jagübürigu le wéyu le nárügüdünbalin jájabu lun naságaruniña Ejíptogiñe, magúnfulirun jamúti meja nidáradun ligía, ligiati nígirunbáliña jóungua, líña laríñagun Búngiu.

¹⁰ Niján darádu le lúnbei nadügüni jáma linásiñun Israél lárigiñeme buri wéyu ligía, líña laríñagun Jabúreme.

Níchugubei nugúmadin lídoun jarítangun,
ábame nabürüjani tídan janígi.

Áubati Jabúngiute, jagíame nánigu.

¹¹ Memégeirúnwabei lun larúfudajoúniwa nuágu,
maríñagunbei wügüri ni lun lidúje ni lun libíri lun jasúbudiruni Búngiu le Jabúremebei,

lugúndun jasúbudirubadina súngubei,
lúmagiñe le ñúraütimaabei darí lúmoun le weíritimaabei jádaangiñe.

¹² Ferúduna nubei wuríbani le jadügübei,
nabúlieidubei jaffigoun lun sun dan.

¹³ Adímurejaali ligía Búngiu luágu ában iséri darádu, rúlaalírgü líña le furúmiñeti quei binádu, áni cátei le binádujalibei, mayúsurunwadügüyaali.

9

Lúban Búngiu to ubouáguna túma Lúban Búngiu to siéluna

¹ Lídan meja le furúmiñeti darádu le ladügübei Búngiu jáma binádu wagübürigu, rúlumuti meja gumádi joun ída lúba lan jájudurangun lun, ñíñoun giñe ában múna to sánduboun ya ubouágu to lúbanboun Búngiu.

² Ítara líña ligáburi taráanserún múna tugúya. Múnada, ñíñein bían rúmu,

lidan furúmiñeti rúmu le gíribei Fulásu Sándu, ñíñein lébu sanúdelu lúma dábula le ñí tubei fein to biníwaboun. ³ Ñíñoun ában bélu labádinagua bián rúmu ligía, Fulásu le Sándutimáabei líribei libíaman rúmu. ⁴ Lidan rúmu ligía, ñíñein ában latárü gólu lun lágudajoún cupáli ñi, túma bágüsi to lánina darádu, gólu sun touba. Turágeirugu bágüsi tugúya, ñíñein ában ágeidinañ gólu le gádaanbalin eíginí le gíribei maná, ñíñein gíñe luwénwen Aarón le ájüchagubei, lúma dübü le uágubei labürüjoúa díisi gumádi le líchugubei Búngiu lun Moisés. ⁵ Tougiñe bágüsi tugúya, ñíñoun jayáwa querubínes, ja queísigubeirügübaña ánjeligu, arúfuda jamúti querubínes jagía luágu ñíñein lan Búngiu lidan fulásu ligía. Darúguatiña táu bágüsi tugúya, le ñí lubei ferúdunawa lan figou, láu jarüna. Mabúseerúntiwa wadímurejan sarágu luágu buri cátei le guetó.

⁶ Aráanseñu líña buri cátei ítara, belútiña fádirigu lídoun Fulásu le Sándubei ságü wéyu lun jafádirijan. ⁷ Ánjeinti lídoun Fulásu le Sándutimáabei, fádiri rügüñein íñutimáati ebélura ñíjin ában weíyaasu lidan irúmu, áni dan le lebéllurun, gásu lanügün játa anímaalu lun ladágaragüdün luágu lifígoun guánarügü lúma luágu jafígoun gürígia. ⁸ Láu cátei le, larúfudajaña Sífiri Sándu woun luágu sun lan seríwigili lan Fulásu le Sándubei lúma buri sun igáburi le adügübei ñi, madárarúngili úma lídoun Fulásu Sándutimáati. ⁹ Sun igáburi lé meja adügüwabei lábugiñe binádu lidáradun Búngiu, liyáwa iséri lidáradun Búngiu wáma le seríwigilíbei lidan dan le. Cátei lé buri meja íchugúbei lun Búngiu, lúma cátei le adágarawagüdüwabei lun lábugiñe binádu darádu, siñáti meja larúmadagüdünun jawáni ja agúnfulirubaña lúma Búngiu ítara. ¹⁰ Lúrudu buri lánina binádu darádu luágu jagúnfulirun lúma Búngiu, luáguti eíginí le lúnbei jeígin gürígia, uníñein le lúnbei játuni, lúma buri igáburi lánina arúmaduni, mabuíduragüdün lumútu buri cátei líra uwáni, lúntirügü lesériwidun darí lasáansiruni Búngiu sun cátei láu liábin Crístu.

¹¹ Láu liábin Crístu, guetó ligía fádiri íñutimáabei luágu iséri darádu le íchugubei ubuíduni woun sügü láu le binádubei. Lúban Búngiu le ñí lubei lafádirija, buítimaatu sügü táu tó meja ubouáguboun. úati mégeiti tuágu, ladüga máma jadüga gürígia múna to siéluboun, to uáguboun nadímureja. ¹² Belújali Crístu lídoun Fulásu Sándutimáati siélu le ñí lubei Búngiu, máma lun ladágaragüdün játa gábara jáma bágasu ñübürigiña luágu jafígoun gürígia, dagágüda lumúti líta guánarügü. Láu ábanrügü lebéllurun, ligía íbjaali asálbaruni magúmchaditi woun. ¹³ Inárüni luágu lábugiñe lan binádu darádu, gabáfuti meja játa bágasu jáma gábara, lúma jabálgín bágasu ñübürigiña, lé buri áturawagúbei jawágun ja marúmanbaña, lun ledéregeruniña lúma lun larúmadagüdüniña bougudigiñe jabíti ligíbugiñe Búngiu. ¹⁴ Áni ánjein ítara líña lubei, ¡gúbumégia gabáfutima lan líta Crístu! Lídaangiñe Sífiri Sándu le magúmchadíbei, rúguati Crístu lúngua lun Búngiu quei ában adágaragüdüni luágu wafígoun le úati dáseiti luágu, áni jarúmagüda lumútu líta wawáni, gidá lumútiwa lídaangiñe lidíjeri aritaguni luágu wagúnfulirun lúma binádu darádu, adüga lumútiwa lun wabúseerun wesériwidun lun Búngiu le wínwanbei.

¹⁵ Ligía Jesucrístu lubei búyeíbei lun ában iséri darádu le adüga láalíbei Búngiu wáma. Louñwenbei Crístu lun ferúdunawa lan figou le adügübei lábugiñe binádu darádu, lun gíñe ja lan únbaña wájali lan Búngiu lun lánigu jamá, gayára lámuga jerésibiruni labínirun Búngiu le laríñagubei

luágu líchugubei lan queisi alágan. ¹⁶ Lugúndun dan le líchugun ában gürígia lújabu árigi tuágu ában gárada luágu alágan, mabáfutu gárada tugúya darí lun lasúbudirúniwa luágu jiláali lan gürígia ligía. ¹⁷ Mebégitu gárada tugúya dan le winwangili gürígia ligía, darí dan le jiláali. ¹⁸ Ligía gíñe láu lubei léserun jítaü ladügüwa furúmiñeti lidáradun Búngiu jáma lumútuniña. ¹⁹ Subúdigüda lumúti Moisés sun lugúmadina lúruđu joun sun gürígia, lárigiñe, ába lanügün gamísa funátu lúma lilímun isópo, ába ladüdüragüdüni lídan dúna lúma játa bágasu ñübürigiña jáma gábara, ába labájichagunun lilíburuna lúruđu jáma gíñe sun gürígia. ²⁰ Ábati laríñagun joun. “Niján jítaü le achoúrurubalin lidáradun Búngiu júma.” ²¹ Bajígua lumútu gíñe Moisés Lúban Búngiu lúma sún buri cátei le ayúsurubei lídan jájuduragun lun. ²² Según lúruđu ligía, jarúmagüdüwati sun líbe-ágei cátei láu jítaü, áni úati ferúduñawa lan figóu ánjein úa láwiyrun jítaü.

Lachíbuni loúnwen Crístu wafígoun

²³ Busénwati lubei mejai ladágaragüdüniwa játa anímaalu lun larúmadawagüdüni buri cátei le, sun líra, iyáwaü rügüñein lun cátei le inárúnti le siélubei, le ñí tubei Lúban Búngiu tímatimaatu, áni busénwati ladágaragüdüniwa jítaü le buídutimaati sügü láu játa anímaalu luágu cátei lánina siélu. ²⁴ Mebéluti Crístu tídoun Lúban Búngiu tugúra to jadüga wügüríña ya ubouágu, to meja tiyáwarügüboun Lúban Búngiu to tímatimaatu siélu, siélun méme lebélu, le ñí lubei larúfudagua lúngua guetó ligíbugiñe Búngiu lun lafádirijan luágu wafúleisein. ²⁵ Belúti fádiri íñutimaati le juríu lídoun Fulásu Sándutimaati ában weíyaasu lídan irúmu lun ladágaragüdüni jítaü le máma líta, ánjeinti Crístu, míchaagunti lúngua quei adágaragüdüni sarágu weíyaasu lun lachíbuni figóu. ²⁶ Lun jamúga ítara líña lan, gásu jamúga loúnwen sarágu weíyaasu lúmagiñe ladügün ubou. Masúsereduntí ítara, lubáragiñe líra, dan le lagúnfuliruña lán buri dan, chülüguaali Crístu ábanrügü weíyaasu, íchaagueina lúngua lun lagídaruni figóu. ²⁷ Ítara quei sun lan gürígia lúnti lan jóunwen ábanrügü weíyaasu, lárigiñeme ábame jagúserawagüdüni, ²⁸ Ítara líña gíñe líchaagun Crístu lúngua ábanrügü weíyaasu lun lagídaruni jafígoun gürígia. Lachülürüba wéyu lun lagiribudun Crístu ubouágun, mámaalime lun lagídaruni figóu liábin, liábinba lun lanügüniña sun ja agúrabubalin liábin siélun lun jabíjimi sun cátei lánina jasálbarun.

10

¹ Lilúrudun Moisés liyáwa rügüñein méja buri cátei buíti lé meja lúnbei lanügüni Crístu joun gürígia, le lásiñerubei lúruđu íchiga joun. Ja lubeíti ayárafadubaña lun Búngiu lídaangiñe játa anímaalu le adágaragüdüwabei lun Búngiu según lilúrudun Moisés, lé buri adágaragüdüwabei ságü irúmu, siñátí meja jadáriruni jabuídurun le gumúti ítara. ² Lun jamúga gayára lan labuíduragüdüniña lúruđu le gumúti ligíbugiñe Búngiu, ába jamúga madügünjali lan adágaragüdüni buri le, lugúndun ja adügübalin, láu jamúga jarúmadun ában weíyaasu lídaangiñe jafígoun lun súnwandan, masándirangunjaña jamúga jóungua láu dúru luágu figóu. ³ Seríwiti adágaragüdüni buri le lun larítaguagüdüniña luágun jafígoun ságü irúmu, ⁴ quei siñá lubei lagídaruni játa bágasu lúma játa gábara figóu.

⁵ Ligía laríñagunbei Crístu lun Búngiu dan le lebéluñunbei ubouágun. Mabúseerúntibu adágaragüdüni ní anímaalu íchugúti bun,

aráanserügütibu ában úgubu nun lun nedéregeruni bun.

⁶ Magúndaantibu láu buri jagudún anímaalu luágu latárú bun, ní buri láu adágaragüdüni lun ladáuragun figou.

⁷ Ábati naríñagun. “Ñübinjadina ubouágun lun nadügüni bugúndan, Nubúngiute,

ítara queísi bürüwañu líña lan nuágu tídan Berérun.”

⁸ Furúmiñe, laríñaga luágu mabúseerun lan Búngiu, magúndan ligía, láu adágaragüdüni, ní jáu anímaalu íchugúti lun, ní anímaalu gudáwati luágu latárú, ní adágaragüdüni lun ladáuruni figou, láu sun lán buri cátei le uágubei laríñaga Búngiu lídaangiñe Moisés joun gurígia lun jadügüni.

⁹ Laríñaga Crístu lárigiñe. “Ñübinjadina lun nadügüni bugúndan, Búngiu.” Laníchigu líra, ñübinjali Crístu ubouágun lun lagúmuchaguagüdüni igáburi le ladágaragüdüniwa anímaalu, lun líchaagun lúngua lewéñegua. ¹⁰ Ligía lugúndanbei Búngiu, lun larúmadagüdüniwa ligíbugiñe láu loúnwen Jesucrístu ában weíyaasu lun sun dan luágu wafígoun.

¹¹ Sun fádirigu juríu, ságü wéyu jadügüni buri ában méme adágaragüdüni, láu sun siñá lan lagídaruni adágaragüdüni ligía figou. ¹² Ánjeinti Jesucrístu, ában rügüñein weíyaasu líchaagun lúngua luágu figou lun sun dan, ábati lagíribudun siélun, ába lañúurun lueigiñe loúnwenren Búngiu.

¹³ Níjein ñi guetó agúrabaja líchuguniña Búngiu láganiñu lábugiñoun lubáfu.

¹⁴ Láu loúnwen ábanrügü weíyaasu, ába labuíduragüdüniña lánigu Búngiu, le gumúti, lun sun dan. ¹⁵ Choúru lumúti giñe Sífiri Sándu cátei méme ligía woun, lugúndan laríñaga le laríñaganbei Búngiu.

¹⁶ Darádu le lúnbei nadügüni jáma lárigiñeme buri wéyu ligía, ítara lúba, líña laríñagun Búngiu.

Níchugubei nugúmadin tídoun janígi,

ábame nabürüdüni jarítaganrugu.

¹⁷ Lárigiñe laríñaga.

Marítagundügüyaadináme luágu jafígoun ní luágu wuríbati buri le jadügübei.

¹⁸ Dan lubeíti le ferúdunawaali figou lun sun dan, memégeirunwali ámu adágaragüdüni luágu figou.

Lúnti wayárafadun lun Búngiu

¹⁹⁻²⁰ Ligía lubeíti nidújeñu, láu loúnwen Crístu luágu wafígoun, gayáraajali wayábin ligíbugiñe Búngiu manúfudeiga. Úaaru bélu lun teréderuniwa lueí webélurun lídoun Fulásu le Sándutimáabei, le ñi lubei Búngiu, gidá lumutu Crístu bélu tugúya láu loúnwen. Junrénti ában iséri úma woun lúmoun Búngiu, ában úma le anügübalíwa lídoun ibágari magúmuchaditi.

²¹ Jesúsu wafádiriñebei íñutimaati tídan Lúban Búngiu siélu, ²² ligía lúnti lubeí wayárafadun lun Búngiu láu tarúma wanígi, lúma láu sun wafíñen derégüdagu luágu. Jarúmagüda láaru wanígi lun masándiragun wamá woungua láu dúru luágu figou lárigiñe lachibúniwa, badísejajiwa láu dúna jarúmati. ²³ Ítara méme wamá derégüdagu lídan wafíñen, masáansiragúnga, lugúndan gayára lan weménigidun luágu Búngiu lun lagúnfuliruni lerérun lun líchuguni ibágari magúmuchaditi woun. ²⁴ Lúnti giñe wáfaagun wíderaguniña wíbirigu lun jínsiñejabu jamá, lúma lun jadügüni le buídubei.

²⁵ Mouñ lumuti wafálaruni jémpulu jáni ja jéchubaña lun mídin jamá lídan wadámuridagun, wagía affíñetiña, le lúnbei wadügüni, lun wíchugun gurásu

joun wíbirigu, guetótima láu arija wamáni luágu yaráfaali lan luwáyuri Wabúreme Jesucrístu lun lagíribudun uboúagun.

²⁶ Lugúndun ánjawa affígounja láu wíchuguni wanágan luágu Crístu lárigiñe wasúbudiruni luágu ligía rügüñein lan agídarei figoú, úaali ámu luwúyeri lun wasálbarun lídaangiñe waffígoun. ²⁷ Ában rügáli cátei lun wagúrabajani, lun lagúseragüdüniwa Búngiu láu ában lanárime igáñi, ábame wagúnrichawagún jáu sun jíbiri láganiñu Búngiu lídan wátu geméti. ²⁸ Dan le ladúraaguni ában gürígia lilúrudun Moisés, áni añájein biáma o ürüwa geféentiña luágu, ába lariñagun lilúrudun Moisés luágu lúnti lan lounwen gürígia ligía, magúdemejabuti lúrudu lun. ²⁹ Weírítimaati súfuri le jadúnabei ja mebéresenbaña láu Liraü Búngiu, mebéresen jagía láu líta, anába jameí Sífiri Sándu le jínsiñejabubei joun. Líta Jesucrístu, ligía achoúrurubalin lidáradun Búngiu wáma, le adügüwaliwa jarúma ligíbugiñe. ³⁰ Subúdi wamúti ligáburu Wabúreme Búngiu le aríñagubei. “Áu le lúnbei labeíchaguniña gürígia, áu le lúnbei lafáyeigüdüniña luágu jafígoun.” Aríñagati giñe. “Nagúseragüdübaña numútuniña.” ³¹ ¡Fugiábu gürígia le uágunti láburuja ligáñi Búngiu le wínwanbei lun sun dan!

³² Jarítagua jumá luágu buri wéyu le sügüjalbei dán meja le jerésibirubalin larúgounga luágu Jesucrístu. Weíríti meja jasúfurirun lídoun meja dan ligía, áni awánda jumúti sun cátei láu gurásu. ³³ Añájein jídaangiñe, anabúatiña, ouserúa jagía wuríba ligíbugiñe guríriguau ladüga jeibugun lúma Crístu, jíbiri, súfuritiña ladüga gamádagua jamá jáma ja wuríbabaña ouserúniwa. ³⁴ Gudémejabutün meja joun ja furísunrugubaña, ásta láu ugúndani ígiraguagüdatün júnga lun lagidarún le júmabei jueí, subúdiñu jumeín luágu níjein lan cátei júma siélu le buítimaati, le siñábei lagidarún jueí. ³⁵ Guetóti, meféridira jumeín lubeíti jeménigi luágu Búngiu, lugúndun jerésibiruba lan ában oúnwenbun afáyeiragülei siélu. ³⁶ Gagúraasun jumá, lun lárigiñeme lan jawánduni asúfuriruni queísi labúseerun Búngiu, gayára lámuga jerésibiruni le lúnbei líchuguni Búngiu jun, siélu. ³⁷ Tariñajare Lerérun Búngiu luágu lagíribudun Crístu uboúagun.

Málüjali ánjein ñübin le lúnbei liábin, madárasarunbei sarágu dan.

³⁸ Le nerésibirubei queísi richáguati nigíbugiñe, labágariduba láu lafiñerun nuágu, líña lariñagun Búngiu.

Ánjein leféridira lafiñen, magúndaanbadina lúma.

³⁹ Wagía, mítaraanbádiwa queí gürígia ja eféridirubalin jafiñen luágu Búngiu, ába jefédirun, wasígiruba láu sun wafiñen luágu daríme wounwen, belú támuga wawáni siélun.

Luáguti afiñeni

11

¹ ¿Cáteigi afiñenibei? Afiñeni, achoúrurúni le gumúti luágu wabíjibei lan le wagúrabubei, lúma wachoúruruni le gumúti luágu nírein lán buri cátei láu sun maríjin wamáni. ² Niján luwúyeribei meja jafiñen jádaangiñe binádu wagúbúrigu luágu Búngiu, ába lagúndaarun jáma.

³ Láu wafiñen, wasúbudirei luágu Búngiu lan adügübalin uboú láurügü lerérun, le lubeíti uboú le waríjubei guetó, máma lídaangiñe cátei lé meja arijúabei ladügüwa.

⁴ Láu lafiñen Abél, dagágüda lumúti le labúseerúbei Búngiu sügü láu le ladágaragüdúbei Caín, ligía lerésibirunbalin Búngiu queísi richáguati, ába lerésibiruni ladágaragüdün lun. Láu sun lubeíti jilá lan Abél, nijángua luwýeri lafiñen queísi jémpulu woun.

⁵ Láu lafiñen Enóc, lanüğüwa siélun moúnwenga, áni madárirúnwati lúgubu lugúndun barú lani meja Búngiu. Áni tariñajare Lerérun Búngiu luágu, luágu lubáragiñebei lán meja lanüğüñ Enóc, gúndan lan Búngiu láu ya ubouágu. ⁶ Ánjeinti wagía, siñáti gúndan lan Búngiu wáu ánjein maffiñen wabeí luágu, lugúndun lun wayárafadun lun, gásu wafiñerun luágu níjein lan áni líchuguba jafáyeiruája ja áluajabalin.

⁷ Láu lafiñen Noé, dan le lawíсарunbalin Búngiu luágu ladágaruba lan ában oúnwenbun gúnran, láu sun maríjiñajagili lan gúnran, ába ladüğüni le lubeíbei Búngiu, ába ládaragun ában oúnwenbun ugúnein lun lasálbarun jáu lufámilian. Arúfuda lumúti lafiñen Noé oúnwenbun maffiñeni le jawágubei jíbiri güriğia ubouágu. Ába lanüğüni Búngiu Noé queísi ában wüğüri richáguati lúma, luágu lafiñen.

⁸ Láu lafiñen Abrahám, dan le lagúarunbei Búngiu lun lun lígiruni lageíra lun lídin lídoun ámu fulásu le lúnbei lání lan, ába ladüğüni le lubeíbei Búngiu, ába láfuridun lageíragiñe, ibídiñounga lun jalíñounbei lan. ⁹ Ába laganouñ lídan iséri fulásu ligía, láu sun teréncha lan ñi, ladüga lafiñen luágu lerérun Búngiu lun luágu líchugubei lan fulásu ligía lun. Laganouá tidan múna adüğütu láu jára anímaalú, ligía méme giñe jadüğübei Isáac, le liraü, lúma Jacób, le libári, ladüga jalágaante lan fulásu ligía lúmagiñe Búngiu. ¹⁰ Adüga lumúti Abrahám sun líra ladüga agúrabaja lan lebélorun lídoun lubuídun ubúruğu siélu le ladüğübei Búngiu, le adúrarubei lun sun dan.

¹¹ Láu giñe tafiñen Sára, láu sun meja weíyaaru tan lun tagáraüdüñ, resíbi tumúti ubáfu lúmagiñe Búngiu lun tagáraüdüñ, garaütu ában irájü ladüga tafiñerun luágu lagúnfulirubei lan Búngiu le laríñagubei. ¹² Láu sun lubeíti weíyaali lan Abrahám lun garaü lan, ñúbinti lun ganébaanfaangubei lan sarágu, quei warúguma ja siélubaña, quei giñe lágu buri ságoun le lárubei béya le siñábei labájüdüñ.

¹³ Jiláguatiña Abrahám jáma lirájüñü láu jafiñen luágu Búngiu, merésibirunga jameí sun le uágubei laríñaga Búngiu luágu líchugubei lan joun, subúdi jamúti luágu lídaanme lan dan le lúnbei liábin, lagúnfuliruba lan Búngiu láu lerérun, ába jagúndaaragun luágu. Subúdi jamúti luágu máma lan jageíra ubou le, jayábin rüğüña ebéluja queísi teréncha ya. ¹⁴ Güriğia ja arítagubaña ítara, arúfuda jamúti luágu jáluaja mémeña lan ában ageíraü lun jageírame. ¹⁵ Lun jamúga fulásu lan le ñígiñe lubeí jáfurida ageíraübei le jáluajabei, gayáraayati jamúga jagíribudun járiğouñ ñijin. ¹⁶ Ában buga ageíraü buítimaati jabúseerúbei, ageíraü le siélubei. Ladüga níjein lan jarítagun luágu cátei le lánina siélu, ligía úa lubeí nibúsigari lan Búngiu lun Jabúngiutebei lan, ába laráanserun ában fulásu joun siélu.

¹⁷ Dán meja le louchagunbalin Búngiu Abrahám láu laríñagun lun lun láfaruni liraü le Isáac jilágubei lun ladágaragüdüni lun, afiñe mémeti luágu Búngiu, rúguatí yebe lúngua lun ledéregeruni liraü le ábanrüğüti, ¹⁸ láu sun aríñagaali lán buga Búngiu lun luágu sarágubaña lan linébaanfaangu lídaangiñe Isáac. ¹⁹ Subúdirüğü liñáali Abrahám luágu gabáfu lan Búngiu ásta lun lásaaragüdüni Isáac lídaangiñe oúweni, áni itagaraüyebe ladüğüni Búngiu láu líchuguni Isáac lárigoún lun Abrahám lubáragiñe yebe láfaruni.

²⁰ Afíñeti Isáac luágu ladügübei lán Búngiu le laríñagubei, ába laríñagun joun lirájüñü ja Jacob lúma Esaú luágu labínirubaña lan Búngiu lídan dan le lúnbei liábin. ²¹ Lau lafiñen Jacob, dán meja le louwe lan, biní lumuti cáda ában jádaangiñe lirájüñü José, ába ladímurejan luágu luweirigun Búngiu, ragüñu luágu lígiri lubádun. ²² Lau lafiñen José, lubáragiñe louñwen, aríñagati luágu jáfuriduba lan Israelítagu Ejiptogiñe, aríñaga ligía lun janügüni lábu jáma dánme le jígiruni fulásu ligía.

²³ Lau jafiñen lagübürigu Moisés, dan le lagüriajounbei, ába jarámuduni luágu ürüwa játi, ladüga jaríjin luágu buídumeraü lan, janúfudetiña lueí lúru du le líchugubei urúei lun jañáradawagüdüniwa wügüriña irájüñü. ²⁴ Lau lafiñen Moisés, dan le wügürjali, májati lun lanügüniwa queísi tiraü liraü lurúeite Ejipto, ²⁵ jímein lumúti lasúfurirun jáma lánigu Búngiu lubáragiñe laganouñ buídu tidan lúban urúei, to lánina figou. Subúdi lumúti luágu madúra lan luwúyeri ugúndani ligía sarágu dan. ²⁶ Rísitimaati lasándiragun lúngua láu lasúfurirun ünabuni lueígiñe Crístu le lúnbei liábin, sügü láu laganouñ lídan sun lirísin Ejipto, lugúndun luágu afáyeiruañü le lúnbei líchuguni Búngiu lun, líchigei larítagun. ²⁷ Lau lafiñen Moisés luágu Búngiu, ába lígiruni Ejipto, manúfudeiga lueí ligáñi urúei, reídeiti derégüdagu lídan larítagun camá jamuga aríagu líña lun Búngiu le maríjñbei.

²⁸ Lau lafiñen Moisés ladügei fédu le gíribei páscua, ába louñajan abájichagui tubéneri jában Israelítagu láu jítaü lun dánme lan le lásügürün ánjeli le lánina ouweni, máfarun lámuga ni ában jaraü Israelítagu le íbugañü. ²⁹ Ladüga jafiñen Israelítagu luágu Búngiu, ába ladügün Búngiu üma joun lídaangiñe dúna le gíribei Barána Funáti, lun gayára lan jásügürün eíbugeina camá jamuga múa le mábeiti. Dánti le jabúseerúnbei Ejiptona lun gíñe jásügürün quei jagía, ába ladáuragun dúna jáu, ába jañáradagun.

³⁰ Lau jafiñen Israelítagu luágu Búngiu, ába jamácharun geyégua láu lubárierun ubúru gu Jericó ságü bináafin luágu sédü wéyu, ába leíguadun louba lubárierun ubúru gu ligía. ³¹ Afíñetu Raháb, tó meja jóru, luágu Búngiu, ába tarámuduniña Israelítagu aríajatiña túbiñe. Ladüga cátei le, máfarúnwatu lídan le jáfarawagún magáambaditiña lun Búngiu lídan fulásu ligía.

³² ¿Cába ámu cátei naríñaga? Louguabei dan nun lun nabürüjan luágu Gedeón, Bárac, Sansón, Jefté, Davíd, Samuél luma jawágu profétagu. ³³ Lau jafiñen, siríguatiña buri fulásu, agúmadija jagía buídu, íderagua lumútiña Búngiu queísi laríñaguni joun. Darú lumuti Búngiu jayúma líñún jaweí, ³⁴ ñegútiña wátu geméti janárimeti, séfutiña lueí jáfarawagún jilágubei táu efeín. Ába jeredun ja mérebaña, ñübintiña lun gabáfubaña lan wuríburugu, ába jásiiragüniña jáganiñu. ³⁵ Ñíñanu würiña ásaaragüdüwatiña jadújeñu lídaangiñe ouweni joun.

Añájein gíñe jíbiri, jiláguatiña lídan luweírin asúfuriruni ladüga jamájan jíchuguni janágan luágun Búngiu lun jamúga gayáraabei lan jígirawagüdüniwa. Jímein jamúti jáfarawagún jilágubei luágu líri Búngiu lun gayáraabei lan jásügürün lídaangiñe ouweni lídoun ában íbágari le buídutimaati siélu. ³⁶ Jíbiri, áfagatiña léjerajouñ jáu, abeichúni, agürawagúni láu güríngüri, lúma adaürüni furisunragu. ³⁷ Áfarawagúatiña láu dübü, asiarajouátiña jamídan jámagua, ouchwagúatiña lun jígiruni Búngiu, áfarawagúatiña táu efeín, anúrajatiña jábiñegiñe, ába jeréderun

eibugañajádügü, darúgu jóúgua láurügü jára mudún lúma jára gábara, fugiábugu, láu idíjери, oúserúa wuríba. ³⁸ Gürígia buri jagía ja ní lubei ubou madúna lumútiña, eibugañajádügü jáña buga lídan buri fulásu mageírawati, áraabu, lídan buri lilúlun dúbü weínamuti lúma lídan buri júyu le múaruguti. ³⁹ Sun jagía, láu sun buídu lan afíñeni le jawágubei ligíbugiñe Búngiu, merésibirun jamúti lé buga uágubei laríñaga Búngiu luágu líchugubei lan joun lumútuniña, ladúga machülü lan Wasálbaragüle ubouágun lídan jadáni, ⁴⁰ labúseerun Búngiu lun lídaanrügüba lan ában wáma jayábin lun jerésibiruni abíniruni le líchugubei Crístu joun lánigu.

12

Rúwamei waríjin luágun Jesúsu

¹ Ítara líña meja jagáburidun sun jíbe gürígia jagía lídan dan le sügüjalibe, láu jafíñen luágu Búngiu. Ában jémpulu jagía woun lun ítara méme lan wagáburi. Ibágarí le, queísigubeirügü ában eíbaaguni, gidáwamei sun le erédejabiliwa wawáriua, lúma figou le agüragubaliwa, adúga wameí eíbaaguni le wabáragiñebei láu gurásu, láu sun wafíñen luágu Jesucrístu. ² Rúwamei waríjin luágun Jesúsu, le ídaangiñebei líabin wafíñen, le gíñe abuíduragüdúbalin wafíñen le gumúti. Súfuriti Jesúsu luágu gurúwa, mebéresenga ligía láu nibúsigarídúna lan luwúyeri ouweni ligía, lugúndun subúdi lání luágu lásun lánme lasúfurirun, lagúndaaruba lan, ába lañúurun lueígiñe loúnwenren Búngiu.

³ Lídan le jóuchawagúniwa, samína jumá lubeíti luágu lání Jesúsu jémpulu, luágu lawánduni sarágu súfuri jámagiñe gafígountiña, ligía mabúchadalá lubeí juágu, máburujan ligíame jarúna. ⁴ Machülügídün lúmoun ouweni lídan jageíndagun lúma figou queí ligía. ⁵ ¿Bulíei jumásan dimúrei le líchugubei Búngiu jun queísi lirájüñü? Láriñajare tídan Lerérun.

Niraü, míchigabá mabájüdüni luágu abeichúni le líchugubei Babúreme Búngiu buágu lídan le wuríba lan bigáburi, máburujan ligíame barúna dan le ladeínjan bun.

⁶ Lugúndun arúfudajati Búngiu joun ja jínsiñebaña lun, beílumutiña gíñe ja lerésibirubaña queísi lirájüñü.

⁷ Áfaga jumeí abeichúni lúmagiñe Búngiu, lugúndun louseruñadün queísi lirájüñü. ¿Níjein funági isáni mabeíchun lumúti lúguchi?

⁸ Ánjaün mabeíchun lan Búngiu, queísi labeíchuniña sun lisáanigu, mámarügü jíña lisáanigu ja tímatisaatiña, bástadi jugúya. ⁹ Dán meja le ñübürigidiwa, beíjamutiwa meja wagübürigu, áni inébetiña meja woun. Lúntimaati wagáambuni Wáguchi le siélubei, lun gabágaribadiwa lan.

¹⁰ Jabeíchuniwa meja wagübürigu ya ubouágu lúnrügü murúsun ibágarí le, lun jagüriajaniwa buídu según jabáfu, ánjeinti Búngiu, lun waságarun buíti lídaangiñe labeichúniwa, labeíchawa lun ladügiñiwa lun buídu wamá ítara queí buídu lan. ¹¹ Inárüni luágu úa lan abeichúni áuti wagúndaara lídan le werésibiruni, gárirügüti woun, ánjeinti ja afúrendeirubaña lídaangiñe abeichúni, ibíjatiña ában ibágarí lánina ísuruni lúma darángilaü lídaangiñe abeichúni ligía, lárigiñe.

Mamájara wamá lun Búngiu

¹² Rújuma lubeíti iséri erei lun jarúna le bucháalibe uágu lárigi asúfuriruni, lúma lún buri jigáchürügü le débílijalibe, ¹³ áluaja jumeí úma le surúbei. Mígira jumá lébuna chugéguau lídan úma lueí jeíguadun ja

débiligiñabaña lídan jaffiñen, íderaguarügü jumáña lun jóudin jabáruaguóun lídan jaffiñen.

¹⁴ Jóucha jumá lun lídan jumá darángilaü jáma sun gürígia, abágarideina ában íbágari le jarúmati, lugúndun le wíyebeli igáburi, siñábei lachülürün lúmoun Búngiu. ¹⁵ Toúnigi jumá luei níjein lan ában jídaangiñe meíbugunti buídu lúma Búngiu, ábame lefériðiragüdüni jaffiñen jíbiri queisi ladügüni jíduru gífiti le abíñaragubalin sun le agúurubei luágu. ¹⁶ Úa la ni ában jídaangiñe agámariduti mamárieidunga, míchugun ligíame mebéreseni luágu cátei le lánina Búngiu. Ligía cátei le meja ladügübei Esaú, ába lalúguruni lirícha queisi íbugañaü luágu ában asíedu eíginini. ¹⁷ Subúsiiti jun luágu lárigiñe lán buga ladügüni, buséngili yebe lerésibiruni labínirun lúguchi queisi íbugañaü, mabíjin lálali, siñáali lasáansiraguni lúguchi le adüga lálalibei láu sun layájuajan Esaú láu igárigu.

¹⁸ Jugúya, mayárafaduntün lun cátei le gayáraabei jasándiruni queisi lasúseredun joun Israelítagu dán meja le jerésibiruni binádu lidáradun Búngiu jáma. Yaráfatiña meja lun wübü le Sión, le durúngubei láu wátu geméti, le ñí lubei níjein lán meja lubúriga lúma luríbouga, ¹⁹ magáambun jumúti gíñe lamúri fidu lúma lumálali Búngiu le adímurejabei joun. Ja agáambubalin umálali ligía, ayúmuraguatiña lun jebé lan ladímurejan joun. ²⁰ Jadügünbalin líra lugúndun luweírin janúfude luei lagúmadijan Búngiu, ladüga laríñajare. “Le íchuguti lugúdi luágu wübü, afarúalá jilágubei láu dübü o táu lan ában efeín, íbini ában lan ánimaalu”, ladüga fulásu ligía, níjein Búngiu ñi. ²¹ Weíriti lanúfunejabu cátei le jaríjubei, darí lun laríñagun Moisés guánarügü. “Nadádagaruña láu anúfudei.”

²² Ánjein jugúya, lábugiñe iséri darádu, ñübinjadün lun cátei weíriti sügü láu le únbei jayábin já buga lábugiñebaña binádu darádu. Yaráfaadün lun wübü Sión le siélubei, lílanaadün lubúrugute Búngiu le winwanbei, le ában Jerusalén le siélubei, le ñí lubei jagánawa sun ánjeligu, ja ájuduragubaña lun jíchugun uweiriguni lun Búngiu. ²³ Lídaañadün jadámurin lirájüñü Búngiu ja bürüwañubaña íri siélu. Lun Búngiu le agúseragüdübaliña sun gürígia jayárafada, lídaañadün ában jáma ja ouwegaña ja buídubaña igáburi ubouágu, áni buíngüda lumúti Búngiu lubuídun jagáburi siélu. ²⁴ Ñübinjadün lun Jesúsu, le búyei lun iséri darádu, bajíwaguadün láu líta Jesúsu lun lachibúniwa jifígoun, le ábanbei cátei weíritimaati sügü láu le labúseerúbei líta Abél—lun lagúseragüdüniwa Caín luágu láfaruni Abél jilágubei.

²⁵ Ligía mamájara jumá lubei jagáambuni Búngiu. Meséfujaña ligía meja Israelítagu ja mebéresenbaña láu Búngiu, dán buri meja lerérunbei joun lídaangiñe Moisés, le ábanbei lílana ubou, gúbume siñá lan weséfurun ánjein wíchiga wanágan luágun Búngiu lídan le ladímurejan woun lídaangiñe Liraü, le lílana siélu. ²⁶ Jíngigüda lumúti meja lumálali Búngiu ubou lídan dan ligíra, ánjeinti guetó laríñajare. “Nánjingichagüdübeiya mámarügü ubou, ásta gíñe siélu.” ²⁷ Dan le laríñagun “nánjingichagüdübeiya”, míni lan luágu lagídarúba lán buri cátei le márügüdünbei luágu ébuu derébuguti, ábame leréderun le siñábei lánjingichúniwa. ²⁸ Arúejani le líchugubei Búngiu woun siñáti lánjingichún. Rúwama lubeíti eteingiruni lun Búngiu luágu líra, judúgua wamá lun láu inébeseli lúma gúnfuli queisi labúseerun, ²⁹ lugúndun lagúmuchaguagüdübei Wabúngiute sun cátei le mabuidunti queisi lagúmuchaguagüdüni wátu geméti cátei.

13

Ída lúba lan wagúndaaragüdüni Búngiu

¹ Jínsiñegua méme jumá júmagua queísi idújeñu lueígiñe Jesucrístu.

² Mabúlieida jumeí lun jebélaagüdüniña achülürütiña júbiñoun láu ugúndani. Sarágu jáña gürígia, rújaña ubáraü joun ánjeligu láu jadügüni cátei le, ibídiñoun joun.

³ Jarítagua jumá jawágu adaürütiña, queísigubeirügü jamúga giñe jadaürüña lan jáma. Jarítagua jumá jawágu ja ouserúabaña wuríba, quei níjein lan giñe ában úgubu juágu le gayáraati lasúfurirun.

⁴ Buíti cátei lun jagámaridun, áni lúnti júmagua jumá darí lun joúnwen. Ja asáansijatiña jámari lagúseragüdúbaña Búngiu, lagúseragüdúbaña giñe ja adügúbaña salúfuri.

⁵ Míchiga jumeí jínsiñejabu luágun seínsu, gúnda jumá láu le júmati, lugúndun lichugubei Búngiu le jemégeirubei jun. Ariñagaali. “Natoúnigirubadibu, mígirun nábume.” ⁶ Gayáraati lubeíti waríñagun láu affíneni. Nabúreme Búngiu íderagubalina, manúfudebadina.

Siñáti jadügün gürígia ni cáta náu ánjeingubeirügü busén Búngiu.

⁷ Jarítagua jumá jawágun ja arúfudajañabaña jun, ja apúrichijabalin ugánu láni Búngiu jun, samína jumá luágu buíti le ñúbinjalibei lídaangiñe jabágari, falájumei jémpulu le láni jaffínen.

⁸ Masáansiragunti ligáburi Jesucrístu, ligía meme gúñaarü, ugúñe, lúma súnwandan. ⁹ Mafálara jumá arúfudajani le ámuñegueinarügüti lueí le larúfudajabei Jesúsú. Resíbitá wawáni érei lúmagiñe línsiñejabu Búngiu, siñáti terésibirun wawáni ni cáta lúmagiñe lúrudu buri luáguti eígini. Igáburi ligía, miábinti lun ladügüba lan buíti joun ja afálarubalin.

¹⁰ Wagía affíñetiña luágu Crístu, ibíjatiwa giñe ában latárü, le gurúwabei le uágubei louwe Crístu luágu wafígoun. Ja asígirubaña láu binádu jagáburi juríu, siñáti gafánran jamá lidan le lichugubei loúnwen Crístu.

¹¹ Jafádirin juríu le íñutimaabei belügüda lumúti játa anímaalu lídoun Fulásu Sándutimaati quei adágaragüdüni luágu figoú, jágubu anímaalugu jagía, bougudi lueí ubúruгу lágudúa. ¹² Ítara líña giñe jiláti Jesúsú bougudi lueí ubúruгу lun lachíbuni wafígoun láu líta guánarügü. ¹³ Queímoun lubeíti lun Jesúsú, bougudin lueí fulásu, bougudin lueí binádu igáburi, asúfurireína únabuni luágu líri queísi lasúfurirun wawágu. ¹⁴ Lídan uboú le, úati ni ában fulásu wáma le adúraruti lun sun dan, wáluajañein ubúruгу le lúnbei ñíjinbadiwa lan lárigiñe ibágari le. ¹⁵ Ligía lúnti lubeí wíchugun eteíngiruni lun Búngiu súnwandan lídaangiñe Jesucrístu le wafádiriñebei. Eteíngiruni ligía, ligía luwúyeribei adágaragüdüni le labúseerúbei Búngiu wámagiñe. ¡Rúwama lubeíti uweíriguni lun láu wayúma! ¹⁶ Mabúlieida jumá jadügüni le buídubei, lúma lun jafánreirunni júmati jádan ja mabíjinbaña, lugúndun niján buri cátei le áubei lagúndaara Búngiu.

¹⁷ Gagáambadi jumá joun ja arúfudajabaña jun, derégegua jumá júngua joun, lugúndun jagía oúnigirubarun juwáni, áni quei jasúbudiruni, gásu jagúserun ligíbugiñe Búngiu luágu jatoúnigirunün. Joúcha jumá lun medéreragüdüni jumáni jawádigimari, lugúndun mabuídunbei jamúga giñe líra jun.

¹⁸ Ayúmuragua jumá lun Búngiu wawágu, choúru wamúti luágu darángilañu líña lan warítangun quei busén wabeí buídu lan woúserun

lidan sun cátei. ¹⁹ Amúriajatina júma lun jayúmuragun lun Búngiu lúnya gayáraabei lan nídin aríjaün madíse.

Abíniruni buri lúma lagúmujoún buri mábugaü

²⁰ Ayúmuruaguatina lun Búngiu, le íchugubalin darángilaü, le gíñe ásaraagüdübalin Wabúreme Jesucrístu lídaangiñe ouweni, lun líchuguni sun ubáfu le busénwabei jun, lun jadügüni lugúndan. Wabúreme Jesucrístu ában le atoúnigiruti lumútuniña buídu queísi ában atoúnigiruti mudún. Ítara líña ladüga líta, le achoúrurubalin lidáradun Búngiu, le adúrarubei lun sun dan, wáma. ²¹ Ayúmuruaguatina gíñe lun Búngiu lun luwádigimaridun jídan, lídaangiñe Jesucrístu, lun gayáraabei lan jíchugun ugúndani lun. ¡Uweíriguni lun Crístu lun sun dan! Ítaralá.

²² Nidújeñu, ayúmuruaguatina jun lun jerésibiruni dimúrei le abürüja náalibeí jun tídan murúsun gárada to. ²³ Niján ában ugánu jun— ¡furíjali wadúje Timotéo furísunrugugiñe! Ánjein ñübin yájoun, nanügübei númagua dánme le nídin aríjaün.

²⁴ Mábuga níña joun sun tábutigu ligílisi lúma joun sun jíbiri wadújeñu lidan wafíñen. Mábuga jáña wadújeñu ja Itálianu jun.

²⁵ Binílaün Búngiu sun jugúya, ítaralá.

LIGÁRADAN SANTIÁGO

Labürüjan Santiágo joun tĺana ligĺisi buri ja chagágubaña

¹ Áu Santiágo, esériwiduti lun Búngiu luma lun Wabúreme Jesucrístu áu, mábuga níña joun ja jadúgawagubaña dúusu lirájüñü Israél ja chagágubaña lídan sun ubouú.

Subúdi le ñübinbei lúmagiñe Búngiu

² Nidújeñu, lúnti gúndan jumá dan le jasúfurirun furúmieguarügü ouchwagúni. ³ Subúdi jumáli luágu dan lan le louchwagún jafiñen, furéndeitimaatün gagúraasuni. ⁴ Ítara líña lubeíti, maríbadalá jarítangun lueigiñe jouchwagún, lubáragiñe líra, ígira jumei ouchwagúni ligía lun líchugun lánwoun jugúraasun, lun loustarun lubuídun jigáburi, úouga mégeiti luágu.

⁵ Dan le ibídiñe lan jun cába lan jadúga lídan ában lénreengunga, amúriaja jumá luma Búngiu, ábame lasúbudiragüdüni jun cába lan jadúga. Rúlumuti Búngiu subúdi le jamúriajan lánigu luma joun, quei jamúriajani, maríñagunga ni cáta joun luágu. ⁶ Lúnti jamúriajan láu afiñeni luágu líchugubei lan Búngiu le jemégeirubei jun, máma láu liloúguan afiñeni, le lougua tafiñen, ítara líña quei ában lugúdi barána le lanügubei garábali lueigiñe ában oubaü lun luágun ámu. ⁷ Gürigia le medéraguagüdünti lafiñen, marítagonalá luágu libíjuba lan ni cáta lúmagiñe Wabúreme. ⁸ Lugúndun gürigia le afiñe líñabei, mafiñen, siñáti lasígirun ában igáburi le derégüdagwati luágu ni cáta.

⁹ Idújei le gudémebei, majírudalá luágu, gúndaalá luágu irisini le siélubei lubá. ¹⁰ Léti idújei le rísibei, manáangualá lúngua luágu, gúndaalá luágu larúfuduni Búngiu lun luágu mebégi lan lirisin lun ni cáta lídan cátei le lánina siélu. Lugúndun ítara líña rísiti quei lufúlurin jíduru, le siñábei ladúrarun. ¹¹ Dan le láfuridun wéyu, ába lásüdüñ sarágu, ába lásáürün jíduru, ába leiguadun lufúlurin, ába lagúmichun lubuídunmeraü. Ítara lúba giñe rísiti. Iachúlürüba wéyu lun louñwen, ábame lígiruni sun láfaagun luágu seínsu.

Oúchwagúni luma adúndeijoúni lun wuríbani

¹² Gúndaati gürigia le awándubalin ouchwagúni láu gurásu, lugúndun dánme le láfuridun láu buídu, libíjubei ibágari magúmichaditi le uágubei lariñaga Búngiu luágu líchugubei lan joun ja jínsiñejabúbaña lun, queisi ában afáyeiruaajaü, queisi ában rídi. ¹³ Dan le lebélorun lun ában gürigia lun ladügün cátei wuríbati, marítagonalá luágu Búngiu lan ádarubalin cátei ligía lídoun, lugúndun mebéluti lídoun Búngiu lun ladügün wuríbani, máda lumúti giñe jádoun gürigia lun jadügüni. ¹⁴ Lubáragiñe líra, dan le lacháwajani luríban layúmajan mútu, ligía láburujan lídoun ladügün le wuríbabei. ¹⁵ Lídaangiñe buri luríban ayúmajani le, liábin figouú, ában ibágari lánina figouú barüti ouweni.

¹⁶ Nidújeñu jínsiñetiña nun, mayéedagua jumá júngua arítagua luágu lúmagiñe lan Búngiu liábin wuríbani. ¹⁷ Lubáragiñe líra, sun buíti le íchugubei woun, le úabei mégeiti luágu, lúmagiñe Búngiu le adügübalin lilámpuna siélu liábin. Búngiu súnwandan ligía méme lan, úati sáansiguauú

lidan quei lilámpuna siélu le gabúlubudadíbei. ¹⁸ Ligía lugúndaabei lun ladügüniwa lirájüñüme láu wafíñerun luágu lerérun le inárünibei, lun ítara wamá quei furúmiñeti alúbajani le íchugúti lun Búngiu lídaangiñe buri cátei le ladügübei.

Ligáburi agúnfuliruni lúma Búngiu le áubei lagúndaara

¹⁹ Ligía lubeíti, nidújeñu jínsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagáñidun, ²⁰ lugúndun gürígia le gáñibei, madügün lumúti le áubei lagúndaara Búngiu. ²¹ Ígira jumeí lubeíti sun iwíyeni lúma luríban igáburi le jídaangilibei, resíbi jumeí ugánu le bunáwalibei tidan janígi láu ünabuni, lugúndun gabáfuti ugánu ligía lun lasálbarunun juwáni.

²² Adúga jumeí le taríñagubei Lerérun Búngiu, máma lun agáambarügü jumáni. Ánjein jarítagua jubeí luágu buídurügü lan lúnrügü jagáambuni Lerérun Búngiu, jeyéedaguña júngua. ²³ Le agáambarügübalin, madügün lumúti le lubeíbei, ítara líña quei ában gürígia le aríagubei lúngua tidan ában isúbusein. ²⁴ Aríja lumúti ída líña lan, áni quei lídin, ítara labúlieiduni ída líña lán buga. ²⁵ Ánjeinti gürígia le jéchubei atúriaiei Lerérun Búngiu le úabei mégeiti lidan, áni furáangugüda láwa lueígiñe figou, mabúlieidun lubeí le lubeíbei, adúga lumúti le laríñagubei Lerérun Búngiu áni gúndaati le tímatimaati.

²⁶ Gürígia le jarítagubei luágu gúnfuli lan lúma Búngiu áni siñá lumutu líñeñe erédera, leyéedaguña lúngua áni úati ju lan ligáburi lagúnfulirun lun ni cáta. ²⁷ Niján agúnfuliruni le jarúmabei, le áubei lagúndaara Wáguchi Búngiu. lun wíderaguniña magúbürigujaaña jáma wúriña ja jílaaña úmari lidan jadíjeri, lúma lun madáseirun wamá láu buri cátei wuríbati le láni ubou le.

2

Lúnti ában lan láu janügün sun gürígia

¹ Nidújeñu, queisi jugúya lan gürígia ja afíñebaña luágu Wabúreme Jesucrístu le weírigubei, moún lumuti ámu lan janügün ában gürígia jaweí jíbiri. ² Queí buri jamúga, lun jamúga lebélorun ában wügüri lídoun jadámurin láu bágü gólu túma anáanguni finutu, belú ligía giñe ában gudémeti táu anáanguni juchécheeru, ³ ánjaün eténira lun le finubei anáangun buídu, lun jaríñagun lun. “Ñurúba ya lidan ubáraü buíti”, jaríñaga lun le gudémebei. “Amürü, reideibá rára, o ñurúba ya múarugu”, ⁴ janügüña ában gürígia ámu lueí le ában, áni jagúseragüdüña láu luríban arítaguni.

⁵ Nidújeñu jínsiñetiña nun, agáamba jumeí cátei le. anúadaja láaña Búngiu ja gudémebaña lidan ubou le lun rísi jamá lidan jafíñen, lun giñe jerésibiruni arúejani le uágubei laríñaga Búngiu joun ja jínsiñejabúbaña lun luágu líchugubei lan joun queisi jalágaante. ⁶ Ánjeinti jugúya, rújumutiña gudémetiña lídoun busíganu. ¿Máma funági rísitiña ja wuríbabei joúserunün, áni barújamaün adúruujeina ligibugiñoun lúrudu? ⁷ ¿Máma jagía adímurejabaña wuríba luágu líri Crístu, le inébebei jun, le ünbei jedéregeragua júngua?

⁸ Ánjein inárüni lubeí luágu gúnfuli jumáni líñun-ágei lúrudu queisi taríñaguni Lerérun Búngiu. “Jínsiñelá gürígia bíledi bun quei bínsiñegua búngua”, buíti jadúga. ⁹ Ánjein máma lubeí ában láu janügüniña sun gürígia, jadügüña figou, dúrügua jumúti lílúrudun Búngiu. ¹⁰ Lugúndun ánjein

agúnfulira ában gürígia láu sun lúruđu, ígira lagúnfulirun ában lídaangiñe, gadúnrunti luágu ladúraaguni sun lugúmadin lúruđu. ¹¹ Lugúndun Búngiu méme le aríñagubei. “Madúgabá salúfuri”, aríñagati giñe. “Máfarajabá.” Ánjein lubeíti madúgün gürígia salúfuri, áni áfarajati, mídinti láu le lubeíbei lúruđu. ¹² Jugúya, lúnti jadímurejan, agáburida jugúyame queísi lúntiña jagúserawagúdüñ láu lúruđu le furáangugüdadaliwa lueí lubáfu figoú. ¹³ Ja magúdemejabubaña joun ámu, magúdemejabubei giñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáni agúseruni.

Afiñeni lúma wadágimanu

¹⁴ Nidújeñu, ¿cásan ju lan laríñagun gürígia luágu afiñe lan luágu Crístu ánjein madúgün ni cáta lun larúfuduni? ¿Gayaraati funági lasálbaruni afiñeni ligía? ¹⁵ Quei jamúga guetó, níjein ában idújei wügüri o würi emégeiruti anáanguni lúma eígini, ¹⁶ laríñaga ában jídaangiñe lun. “Buídulá lídin bun, darúguabá boúgua, jou amürüme,” áni míchu lumúti le lemégeirubei lun, ¿cági ju lan líra? ¹⁷ Ítara líña lasúseredun lúma afiñeni. ánjein marúfudun jamá gürígia láu cátei le jadügübei, afiñeni lábugarügü, ítara líña quei ában cátei jiláali.

¹⁸ Fágua níjeinbei aríñaguti. “Amürü afiñetibu, áu adúga numúti le buídubei.” Áu Santiágo aríñagatina lun idújei ligía. “Arúfudabeíti bafiñen nun boúgudin lueí buíti le badügübei, narúfudeime nafiñen bun láu buíti le nadügübei.” ¹⁹ Afiñetibu luágu ában rügüñein lan Búngiu, buíti badúga, afiñetiña giñe máfianu luágu líra, adádagara jagía láu anúfudei lueí. ²⁰ ¿Májatibu bafiñerun, ibídiougua táu amürü le, luágu jiláñu líña lan lafiñen gürígia ánjein marúfudun lan láu le ladügübei? ²¹ Resíbi lumúti Búngiu Abrahám, le binádu wáguchi, queísi richáguati ligíbugiñe luágu le ladügübei dan le lánjarun lún yebe láfaruni Isáac le liraü jilágubei queísi adágaragüdüni lun Búngiu. ²² Aríja báali luágu arúfuda láni Abrahám lafiñen láu cátei le ladügübei, áni ñúbinti lafiñen lun dayárubei lan láu cátei le ladügübei. ²³ Ítara líña lagúnfulirun le bürüwañubei tidan Lerérun Búngiu. “Afiñeti Abrahám luágu Búngiu, áni luágu lafiñen, ába lerésibiruni Búngiu queísi wügüri richáguati ligíbugiñe.” Áni aríñawagúati luágu Abrahám, “lumáda Búngiu.”

²⁴ Aríja jumáali lubeíti, luágu resíbi láni giñe Búngiu wügüri luágu buíti le ladügübei, úara lúma lafiñen, áni mámarügü luágu lafiñen. ²⁵ Ligía méme meja asúseredubei tun Raháb, to jóru lídan dan le sügüjalibei. resíbi lumútu Búngiu queísi richáguatu ligíbugiñe dán meja le tarúfuduni tafíñen luágu láu cátei le tadügübei—safá tumútiña loúnagülegu Josué, ába tíderaguniña lun jagíribudun lídaangiñe ámu üma. ²⁶ Ítara quei jiláñu líña lan úgubu ánjein úa tubeí uwáni lídan, jiláñu líña giñe jafiñen ánjein marúfudun jumá láu cátei buíti le jadügübei.

3

Lúnti wabúgurunun wañéñe wayúmulugu

¹ Nidújeñu, moún lumuti añájein lan sarágu jídan ja adáagutiña jóungua arúfudajatiñame lánina Lerérun Búngiu lugúndun subúdi jumáali luágu wagía lan le arúfudajabei, derégüdatimaabei lan wagúserawagüdüñ. ² Sun wagía adúgatiwa cátei charáti, ánjein níjein lubeí ában gürígia madúgünti

ni murúsun charáti lídan le lariñagubei, ában wügüri buíti le gumúti ligía, le gíñe gayáraabei labúguruni sun lúgubu. ³ Dan le wagürüni jayúma anímaalugu lun jagáambuniwa, gayáraati wabúguruni sun jágubu. ⁴ Aríja jumóun buri gíñe ugúnein, láu sún buri weínamu tan áni jéreburi garábalí le ádajabarun, abúgura lumútu abúguruti láu ában liraúraü simúnu le ñíjin lumúti labúseera. ⁵ Ítara líña gíñe lasúseredun lúma wayúma, ában cátei ñúraúraüti, áni gayáraati ladügün sarágu buri cátei weínamuti. ¡Láu murúsun wátu geméti, gayáraati lágudún ában oúnwenbun áraabu! ⁶ Ítara líña wayúma quei ában wátu geméti. Gayáraati wadügün sarágu wuríbani láu, gayáraati lagádeiruni sun le wagiabei. Gayáraati líchuguniwa lídoun wuríbani lídan sun wabágari, Máfia guánarü lébunabei sun le. ⁷ Gayáraati lagídaruni wügüri jagáñi sun jawúyeri anímaalugu gáñitiña—dunúru, jéwe, jáma anímaalugu baránajana—áni adúga láali. ⁸ Úati ni ában lun gayára lan lagídaruni ligáñi wayúma. Ában wuríbati ligía le mígiraguagüdünbei lúngua, áni buin líña láu peísini le gáfarajati. ⁹ Láu méme wayúma wadímureja buíti luágu Wáguchi Búngiu, láu gíñe wíñaraguaña gürígia ja ladúga Búngiu lenége. ¹⁰ Lídaangiñe méme ában iyúmaü láfurida dimúrei buíti lúma íñaraguni. Nidújeñu, moún lumuti ítara lan cátei le. ¹¹ ¿Gayáraati funági láfuridun dúna bímeti lúma dúna básuati lídaangiñe méme ában? Siñáti. ¹² ¿Gayáraatisan tagíindun ában tídibu fígi fáluma, ódi gayáraati tagíindun tídibu beíbei fígi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibeí

¹³ Ánjein níjein lubeí ában chu táu jídan, gunfaráanda ligía, arúfudaleí láu lubuídun louuserun, láu ünabugubuni le líchugubei lisúbudin lun. ¹⁴ Ánjein níjein lubeí gimúgaü tídan janígi, áni jadügüni cátei láu jarítagnun juágun guánarügü, moún lumútiti janáangun júngua luágu jisúbudin, lugúndun iyéeni líra. ¹⁵ Máma niján luwúyeri subúdi le ñübinbei lúmagiñe Búngiu, ában subúdi le lánina ubou líra, le lánina jasáminan gürígia, le láni méme Máfia. ¹⁶ Lugúndun le ñí lumuti gimúgaü lúma marítawaguni jawágun ámu, níjein chagáguaü ñi lúma sun luwúyeri wuríbani. ¹⁷ Ánjaña ja gámabalin subúdi le lúmagiñebeí Búngiu, furúmiñe níjein ában ibágari jarúmati jawágu, gálumatiña, areídatiña, gagáambaditiña, gudémejabutiña, adúga jamúti le buídubei, ában lábu janügüniña sun gürígia, furáangutiña. ¹⁸ Ja áluajabalin darángilaü, bunáguatiña ílaü lun lalúbajouniwa ában ibágari le richáguati jádan, lúma jádan ámu.

4

Gamádaguaü lúma ubou

¹ ¿Cá buri ueígiñe jabúseera jawúribujan, lúma jageíndagnun? Ladúga buri lagübüri ayúmajani le jídaanbei súnwandan. ² Buséntün som cátei, queíti siñá jumani ibíja, ába jáfarajan. Gimúgatün luágu som cátei, queíti siñá jumani ibíja, ába jageíndagnun. Mibíjin jumúti le jabúseerúbei lugúndun mamúriajan jumáni lúma Búngiu. ³ Ánjein jamúriaja, mibíjin jumúti lugúndun luríban jamúriajani, jabúseeruni lun jagástaruni luágu lagübüri jugúndan. ⁴ ¡Gürígia múaraantiña! ¿Ibídíñetísan jun luágu ánjein lan gamádagua jubeí lúma ubou, jáganiñein lan Búngiu? ⁵ ¿Jarítaguatúnsan luágu mála lan le tariñagubei Lerérun Búngiu luágu buri cátei le?

¿Jarítaguatün funági luágu Espíritu lan le lagánawagüdübei Búngiu wádan ában lan espíritu le lánina gimúgaü? Uá. ⁶ Íderagua lumútiwa Búngiu láu lareíni, láu líchuguni ubáfu woun lun wáfaruni gimúgaü le wádaanbei jilágubei. Tariñajare Lerérun Búngiu. “Rúlumuti Búngiu lanágan jawágun ja barúguabaña jóungua, áni íderagua lumútiña ja ünabugubaña, láu lareíni.” ⁷ Rúgua jumá júngua lábugiñoun leréreejan Búngiu, rára jumá derégüdagu láu lubáfu Búngiu, mabáfu lámuga Máfia juágu, ábame lanúrajan jueí. ⁸ Yaráfa jumá lun Búngiu, ábame gíñe layárafadun jun. Jugúya le busénbei jesériwidun lun Búngiu lúma lun ubouú, gafígounjadün, ítara líña lubeíti, jarúmagüda jumeí jigáburí túma gíñe janígi. ⁹ Lídan le jayárafadun lun Búngiu, aságüríja jumá luágu jifígoun láu águiraü. Gáritá janígi luágu luríban jigáburí lúma Búngiu, sáansigualá jugúndan lun íruni luágu jifígoun. ¹⁰ Ünabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹ Nidújeñu, madímureja jumá wuríba jawágu jíbiri. Le adímurejati wuríba luágu lidúje, o ladárirun lan lidúnrun, ladímurejaña wuríba luágu lilúrudun Crístu le aríñagubei luágu moun láni ladügüniwa, áni ladáriruña mégeiti luágu. Ánjein jadúga líra lubáragiñe jadügüni le lubeíbei lúru, jíchaaguña júngua queísi agúseragüdüti. ¹² Ában rügüñein agúseragüdüti, le íchugubalin lúru ligía, le Crístubei méme, lérügü gabáfubei lun lasálbajan o lun lagúnrinchagun. Ánjein bugúya, ¿cátabuñadíbugi lun badárirun lidúnrun ámu?

Machouúrurunwalá luágu jarúga

¹³ Guetó, agáamba jumeí cátei le, jugúya le aríñagubei. “Ugúñe o jarúga wouídiba lídan ítaga fulásu, ábame webélujan ñi ában írúmu, wawádigimaribei waseínsun lun wabíjin lánwoun.” ¹⁴ ¿Ída líñásan jasúbusiruni cába lan asúsereda jarúga? ¿Cáteiñeigi jibágari? Ítara líña quei jeméreedu le asálrágubei luágu murúsun dan, lárígiñe ába lagúmuchagun. ¹⁵ Aríñagarügütün jamúga. “Ánjein busén Búngiu, wabágariduba, ábame wadügüni le o líra.” ¹⁶ Ánjeinti jugúya, jadímurejan láu pántaü luágu cátei le jarítagubei lun jadügüni, áni sun pántaü le, mabuíduinti. ¹⁷ Afíñetina luágu ánja jumá lun sun le, wel, le subúdíjabubei lun ladügün buíti áni madügün lumúti, ladügüña figou.

5

Ewéridijani joun rísitiña

¹ ¡Agáamba jumeí cátei le, jugúya rísitiña le wuríbabei igáburí! Chülújali óra lun jayájuañan, wágu jugúyame luágu buri lamíselu le lúnbei jasúfuriruni. ² Naláali buri jírísini, jou jamáaru jamútiri janáangun to fínuboun. ³ Gájújali jigólun lúma jáni pláta, áni láu cátei méme le, arijúati jarügüren, ábame jagúnrinchawagün lueígiñe camá jamuga láu wátu geméti. Oúndaraguaadün sarágu írísini lídoun buri lagúmujoun dan le. ⁴ ¿Ánti fáyeiti le míchu jubeí joun ja ñadágimeinbalin jíchári? Ánjein jamúga gayáraati, lagúajaña jamúga fáyeiti ligía luágu jidúnrun, agáamba láali Búngiu jamúriajan ñadágimeintiña jagía juágu. ⁵ Rúguaadün júngua lun ában íbágari lánina wéndeí lúma ugúndani ya ubouágu, íbíja jumáali sun le jabúseerúbei quei jadíbunedagüdüniwa anímaalu lubá jáfarun, yaráfaali

gíñe jagünrinchawagün sun jugúya. ⁶ Rújadün jadúnrun ja madúnrunbaña, áfaragua jumáña jilágubei, madügünga jagía ni cáta le lébuna jáfaraguniña.

Gurásu lúma ayúmuraguni lun Búngiu

⁷ Ligía lubeíti, nidújeñu, gagúraasun jumá daríme liábin Wabúreme Jesúsu. Ábunaguti le agúrabubei ladügün alúbajani buíti, lúnti lagúrabajani furúmiñeti júya luágun líla linádirigu lúma lagúmujoún júya luágun lun láfunadun. ⁸ Gagúraasun jumá gíñe, máburujan ligíame jarüna, lugúndun madíseeli liábin Wabúreme. ⁹ Nidújeñu, mequéjera jumá jawágu jidújeñu lueígiñe Jesucrístu, magúserawagüdün jumámuga, yaráfaali lidáni Búngiu lun lagúseragüdün. ¹⁰ Nidújeñu, barü jumaña profétagu já meja adímurejabaña lídan líri Wabúreme queísi ában jémpulu lánina gurásu luágu asúfuriruni. ¹¹ Wagía, barü wamutiña ja awándubalin asúfuriruni queísi gürígia gúndaatiña. Agáambaadün luágu lugúraasun Job, áni subúdi jumáli gíñe ída líña lan fuleísei láni Búngiu lagúmujoún óra, lugúndun areídati Búngiu, gudémejabu.

¹² Lougiñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachoúruruni jerérun. Dánme le jaríñagun “ánja”, lun ánja lan, dánme gíñe le jaríñagun “uá”, lun gíñe uá lan, míchugun lámuga Búngiu jidúnrun.

¹³ Ánjein lasúfuriruña lubeí ában jídaangiñe, lúnti layúmuragun lun Búngiu. ¹⁴ Ánjein sándiñein lubeí, lúnti lagúarun joun tábutigu ligílisi lun jayúmuragun lun Búngiu luágu, lúma lun jájurudaguni láu áili lídan líri Wabúreme. ¹⁵ Dánmeti le jayúmuragun láu afíñeni, ábame lareídagun sánditi, áni ánjein gíñe afígounjaali lubeí, ferúdnawabei lifígoun. ¹⁶ Ligía, gúfese jumeí lubeí jifígoun joun jidújeñu lueígiñe Jesucrístu, áni ayúmuragua jugúyame jawágu lun jareídagun. Weíriti lubáfu ayúmuraguni lun Búngiu le ladügübei gürígia le buíti táu sun lanígi. ¹⁷ Proféta Elías ában meja wügüri quei wagía, dan le lamúriajanbei lídan layúmuragun lun Búngiu lun májuyun lan júya, reídeiti júya májuyunga úrúwa-irúmu-dimí. ¹⁸ Lárigiñe, dánya le layúmuragun, ábaya lájuyun júya, ábaya tájüchün sun inádirigu uboúagu.

¹⁹ Nidújeñu, ánjein egéyeda ában jídaangiñe lueí üma le richábei, liábin ámu lun lagíribudagüdüni, ²⁰ subúdi jumeí luágu furúmieguarügü lan agíribudagüdüti le afígounjabei lídaangiñe luríban lémeri, lasálbaruboun lan luwáni afígounjati ligía lueí tídin máfiougati, áni ferúdnagüdaleíme sarágu lifígoun gürígia lé yebe acháragadubei.

FURÚMIÑETU LIGÁRADAN PÉDRO

Labürüjan Pédro joun afiñetiña ja chagágubaña bougudi luei jageira

¹ Au Pédro, ában láni Jesucristu apóstolu áu, nabürüjañoun gárada to jun, jugúya lánigu Búngiu ja chagágubaña bougudi luei jageira louúbawagu Pónto, Galácia, Capadócia, Ásia, lúma Bitínia. ² Nidújeñu, anúadaja láadün Búngiu Úguchili lúmagiñe meja binárü lun lánigu jumá, áni subúdi lumúti meja luágu lachülürüba lan ában wéyu lun ítara lúba lan, ladüga ligia lan lugúndaanbei. Ligia larúmadagüdañajañoun lubei Sífiri Sándu janígi láu líta Jesucristu, adügalaün lun gagáambadi jumá. Ibíja jumá lubeiti sarágu abíniruni lúma darángilaü lúmagiñe Búngiu.

Louchawagúba jafiñen, ábame liábin buíti lídaangiñe

³ Rúwama uweíriguni lun Búngiu, le Lúguchibe Wabúreme Jesucristu, luágu luweírin lugúdemejabu woun. Rújali iséri ibágari woun queísi lirájüñü láu lásaaragüdüni Crístu lídaangiñe ouweni lúnya labágaridun. ⁴ Queísi lirájüñü wabeí, gayáraati weménigidun le gumúti luágu wabíjubei lan ubuíduni le aráanse lálalibe wabá, gayáraati weménigidun luágu werésibirubei lan alágan le areidañu lubei Búngiu wabá, siélu—ában alágan le lúnbei ladúrarun lun sun dan, le siñábei ladáseirun, le siñábei leféri-diruni lubuídun. ⁵ Góunigi lumútiwa Búngiu láu lubáfu lugúndun afiñe wamá luágu, lun gayáraabei lan wabíjini asálbaruni lídaangiñe asúfuriruni lánina ubouú le, le aráanseñu lubei wabá lárigiñeme lagúmuchun ubouú.

⁶ Ligia lébubei buin jíña lan láu ugúndani, láu sun lúnti lán funa jasúfurirun sarágu ouchawagúni luágu murúsun dan. ⁷ Lúnti jasúfuriruni ouchawagúni ladüga ítara líña lan jafiñen quei gólu—lúnti louchúniwa láu wátu geméti lun laríjiniwa ca lan luwúyeribeí. Afiñeni le awánduti ouchawagúni ligia, buíti sügü láu gólu, lugúndun gagúmuchaditi gólu. Láu lubeiti jawánduni louchawagún jafiñen, ladímurejaba Jesucristu buíti juágu dánme le lagíribudun ubouúagun, jibíjuba gíñe uweíriguni lúma inébesi lúmagiñe.

⁸ Jínsiñeti Jesucristu jun láu sun maríjin jumágili lan, áni láu sun maríjin jumágili lan, rújumaali jeménigi luágu, áni gúndaatün láu ában ouñwenbun ugúndani le siñá jumuti aríñaga láu dimúrei. ⁹ Ladüga méme luweírin jafiñen luágu Crístu, jerésibiruñein tasálbarun juwáni.

¹⁰ Lídan meja dan le sügüjalibeí, adímurejatiña meja profétagu luágu cátei le lúnbei líchuguni Búngiu jun láu lareíni, ába jáfaagun lun gunfaráanda jamáni luáguti asálbaruni le, le uágubei ladímureja Sífiri Sándu jádaangiñe. ¹¹ Subúdigüda lumútija láni Crístu Espíritu joun wügüriña jagia le lúnbei lasúfuriruni Crístu lubáramegiwa, lúma uweíriguni le lúnbei liábin lárigiñe. Jagiati, ábaja jouchun jasúbudiruni cátei lan gürígia ligia, lúma ídaba lan lasúsereda cátei le, le uágubei laríñaga Sífiri Sándu le jádaanbei joun. ¹² Ába lasúbudiragüdüni Búngiu joun luágu mámaba lan lídan jadáni lagúnfulirúa buri cátei le, luágu lídaanba lan wadáni. Asálbaruni lé meja uágubei jadímureja, ligia méme le uágubei japúrichija gürígia jun lídoun buri dan le, láu lubáfu Sífiri Sándu le nübinbei siélugiñe. Asta ánjeligu, buséntiña jamúga gíñe gunfaráanda jamáni buri cátei le.

Busénti Búngiu lun wabágaridun ában ibágari le jarúmati

¹³ Quei jagúrabajañein lubeí jerésibiruni jalágaante siélu, gidájumei samínaü málati jaritagunrugugiñe, lubáragiñe líra, derégüdagulá jarítangun, rújumei sun jeménigi luágu asálbaruni le lúnbei líchuguni Búngiu jun láu lareíni dánme le lagíribudun Jesucrístu uboúagun. ¹⁴ Queísi isáanigu gagáambaditiña, mabágarida jumá quei meja ligáburí jabágaridun lubáragiñe meja jasúbudiruni Búngiu. ¹⁵ Lubáragiñe líra, abágarida jumá ában ibágari jarúmati le gumúti, lugúndun Búngiu le agúarubei jun lun lánigu jumá, jarúmati lídan sun cátei. ¹⁶ Tariñajare Lerérun Búngiu. “Jarúma jumá, lugúndun áu, jarúmatina.”

¹⁷ Queíti janügüni Búngiu quei Júguchi, Búngiu le ábanbei lábu ligáburí lagúseragüdüni jagáburí sun gürígia, lúnti júaradun lúma láu ában goúnigi sun dan le lúnbei jabágariduni ya uboúagu. ¹⁸ Sálba láadün Búngiu lídaangiñe lagübüri ibágari lé meja jafúnrendeirubei jámagiñe binádu jagübürigu, áni subúdi jumúti buídu luágu máma lan láu cátei gagúmuchaditi lafáyeirúa lebégi asálbaruni le, queísi burí gólu o pláta, ¹⁹ láu líta Crístu le gebégibeí sügü láu sun cátei lafáyeirúa. Derégewati Crístu lun loúnwen luágu wafígoun quei ában mudún le buídubei lídan sun luwúyeri, sálba wamámuga. ²⁰ Lúmagiñe lubáragiñe buga ladügüni Búngiu uboú, ába laráanserun lun Crístuba lan Wasálbaragüle, luágu lubeíti wafúleisein lachúlaagua Crístu lídoun lagúmujoún dan le, lun lasálbaruníwa. ²¹ Lídaangiñe Crístu, ába jiyábin lun jafiñerun luágu Búngiu le ásaaragüdübalin Crístu lídaangiñe ouweni, ru ligía uweíriguni lun, ítara líña jiyábin lun jafiñerun luágu, rújumeíme sun jeménigin luágu.

²² Guetó, láu gagáambadi jumá lun linárün Búngiu láu lubáfu Sífiri Sándu, jarúmaaru janígi lun gayáraabei lan jínsiñedun jidújeñu lueígiñe Jesucrístu jun le tímatisaati. Lúnti lubeíti jínsiñegua jumá júngua láu sun tarúman janígi, lúma láu sun jére, ²³ lugúndun iséri gürígia jugúya. Mámaadün jasáanigu agübürigu ja goúwedaditiña, lirájüñüjadün Búngiu láu jagáambuni lerérun le íchugubei ibágari, le gíñe adúrarubei lun sun dan. ²⁴ Tariñajare Lerérun Búngiu.

Ítara jáña sun gürígia quei jíduru,

liábin jaweírigun quei lufúlurin jíduru.

Dan le lásaurün jíduru, ába láburujan lufúlurin,

²⁵ ánjein Lerérun Búngiu, duráti lun sun dan.

Áni dimúrei le, ligía ugánu le lánina asálbaruni le uágubei laríñawagúa jun.

2

¹ Ligía, queísi lirájüñüjadün lubeí Búngiu, ígira jumeí lubeíti sun luwúyeri wuríbani, sun eyéeni, biángua lan igíbu, gimúgaü, lúma sun luwúyeri marásualugu. ² Ítara quei jabúseeruni irájüñü figígiña míligi jarúmati lun gayáraabei lan jaweínamudun, ítara lá gíñe busén jumá lun jatúriajani Lerérun Búngiu buídu lun gayáraabei lan ledérebugudun jafiñen luágu Crístu. ³ Subúdiadün murúsun luáguti luweírin lubúidun louseruníwa Crístu, lúnti líchugun subúdi ligía ában oúnwenbun ayúmajani jídoun lúntima jasúbudiruni Crístu.

⁴ Ayárafajoúa jumá lubeíti lun Crístu le gabágaribeí. Rútiña gürígia mebéreseni luágu, ánjeinti lun Búngiu, ítara líña Crístu quei ában dübü le gebégiti sarágu, le lanúadirunbei lun ligíaba lan ébuu tun lilígilisin, áni sun

ja afiñebaña luágu Crístu, jagía lilígílisinbaña Búngiu. ⁵ Ítara líña lubeíti, ígiraguagüda jumá júngua lun Crístu le rúlaalíbei ibágari magúmuchaditi jun, lun tadügüniwa ában témpulu buítu lun Búngiu júdaangiñe, lun gíñe ítara jumá quei fádirigu ja derégeguaña joúngua lun Búngiu, ja íchugubalin cátei le áubei lagúndaara lun, lidaangiñe Jesucrístu. ⁶ Ligía gíñe tariñagunbei Lerérun Búngiu.

Nóunajañe Crístu lun ligiaba lan dübü le weírigutimaabei tuágu nilígílisin lídan fulásu le gíribei Sión.

Áni ja afiñerutiña luágu, buídubei lídin joun.

⁷ Weíríti lebégi Crístu jun, jugúya le afiñebei luágu, ánjeinti joun ja mafiñebaña, mebégiti quei dübü le únbei jamájara ábunagutiña. Láu sun líra, gúnfulijali le tariñagubei Lerérun Búngiu.

Dübü le únbei jamájara ábunagutiña,

ñübinja lun ligiaba lan furúmiñeti lídan bunáguai.

⁸ Joun ja mafiñebaña luágu Crístu, gúnfuliti gíñe le aríñawagübei.

Ában dübü achúgeraguágülei ligía, le eíguadagüdüti gürígia.

Ja madügünbaña gásu láu ugánu lánina asálbaruni lídaangiñe Crístu, chugéguatiña luágu, fériditiña gíñe lun sun dan, queísi laráanseruni Búngiu.

Ja lánigubaña Búngiu

⁹ Ánjeinti jugúya le afiñebei luágu Crístu, ában família anúadajoúatiña jugúya, fádirigu ja esériwidutiña lun urúei le Búngiu, gürígia lánigu Búngiu ja derégeguaña joúngua lun. Ítara líña cátei le, lun jadímurejan luágu buri cátei buíti le ladügübei Búngiu, le aságarubalün lídaangiñe lubúriga lun lídoun luweírin larúgounga le líchugubei Búngiu. ¹⁰ Mibíjintün meja ában abúremein lun latoúnigirunün, guetó lánigujadün Búngiu. Úatiña meja gudémejabutiña jun, ánjein guetó, gudémejabuti Búngiu jun.

Abágarida jumá lun jesériwidun lun Búngiu

¹¹ Nidújeñu jínsiñetiña nun, jugúya queísi teréncha lídan uboué le, aganóutiña bougudi luei jageíra, ayúmuraguátina jun lun mígiraguagüdün jumá júngua lun lagübüri buri ayúmajani le ageíndagubei túma juwáni. ¹² Buídulá jóuserun jádan ja ibídiñejabubaña lun Búngiu, ítara lúba, láu sun lan adímureja jamá wuríba juágu guetó camá jamuga wuríbatün, jaríjubei buíti le jadügübei, ábame jíchugun uweíríguni lun Búngiu dánme lachülürün wéyu lun lagúseragüdün.

¹³ Queísi lánigu jumá Wabúreme Crístu, ayúmuraguatina jun lun úaragua jumá lúma sun gumádi ya ubouágu. Gúnfuli jumá lúma lugúmadin urúei, quei ligía lántima íñubei ufúlasun, ¹⁴ gúnfuli jumá gíñe lúma jagúmadin gumádimatiña ja loúnajabaña lun jafáyeiragüdüniña ja múaradúnbaña lúma lúrudu, lúma lun jíchugun uweíríguni joun ja adügübaña buíti. ¹⁵ Busénti Búngiu lun jadügüni le buídubei, lun jámanichagüdüniña ja ibídiouguabaña áu, ja busénbaña jadímurejan wuríba juágu.

¹⁶ Queísi lirájüñü jumá Búngiu, ousera jumá queísi gürígia ja mámabaña idámuni lun ni ában gürígia, máma lueígiñe líra lun jadügüni le wuríbabei, lubáragiñe líra, abágarida jumá queísi lidámun Búngiu. ¹⁷ Inébe jamá sun gürígia jun queísi lubúdubu, jínsiñe jamá jidújeñu lueígiñe Jesucrístu jun, inébelá Búngiu jun, inébelá urúei jun.

Jémpulu luáguti lasúfurirun Crístu

18 Umúsuniña, inébe jamá jiyúbudirigu jun queisi lubúdubu, mámarügü ja buídubaña júma, ásta gíñe ja wuríbabaña. 19 Lugúndun labínirubei Búngiu gürígia le awándubei asúfuriruni le mébunati láu larítangun luágu Búngiu. 20 Ánjaün adüga cátei wuríbati, jafáyeira luágu, málati gagúraasun jumá luágu líra, ánjaün asúfurira lueígiñe jadügün cátei buíti, ába jawánduni láu gurásu, buíti líra ligíbugiñe Búngiu. 21 Lun luwúyeri igáburi le lagúara Búngiu juágu, quei sáfuri lubei Crístu juágu láu gurásu, íchiga ában jémpulu jun lun jafálaruni. 22 Madügünti Crístu ni ában figoú, meyéerangun ligía gürígia ni ában weíyaasu. 23 Dan le janábuni, moúnabunti láu anábajani, dan le jasúfuriragüdüni, masíadirun lumútiña, lubáragiñe líra, derégeguaügüti lúngua lun Búngiu le agúseragüdübei lau ísuruni. 24 Barü lumuti Crístu guánarügü wafígoun luógu luágu gurúwa lun weréderun quei jiláñu lun figoú, lun wabágaridun ában ibágari le lánina ísuruni. Buleíseiwati lun wareídangun. 25 Ítara jíña meja quei mudún ja féridijaña, ánjein guetó, ñübinjadün lun Crístu le oúnigirubalün queisi jóuniri mudún, toúnigiloún juwáni.

3

Ligáburi jabágaridun maríetiña

1 Ítara gíñe jugúya würiña gámaritiña, derégegua jumá júngua joun júmarigu, lun ánjein lan mánjagiña lubei lun ugánu lánina asálbaruni, gayára lámuga jayábin lun jafíñerun luágu Crístu, maríñagunga jugúya ni cáta joun luágu asálbaruni, 2 láurügü jaríjini lubuidun jóuseruniña láu inébesi lúma larúman igáburi. 3 Mámala láu buri cátei bouguditi jibíti jewéndeda, quei buri lanátime aroúraguni, arígeilaü lúma buri bángüli le gólu, anáanguni wéndegutu, 4 tídaanlá janígi jewéndeda, le ábanbei ubuiduni le meféridirawadibei. Ában igáburi bímeti, darángila, ligía cátei gebégibei sarágu ligíbugiñe Búngiu. 5 Ítara líñá meja ligáburi jewéndedun würiña já meja derégeguañabaña jóungua lun Búngiu lídan meja dan le sügüjalibei. Jeménigitiña meja luágu Búngiu, derégegua jagía jóungua joun jámarigu. 6 Ítara tiñá meja Sára. gagáambaditu lun Abrahám, ába tagúarun lun, “nabúreme” lun tarúfuduni linében tun. Jiyábinba lun ítara jumá quei tugúya ánjein jadüga le buídubei, manúfudeiga luei ni cáta.

7 Jugúya gíñe wügüriña, áfaagua jumá lun gunfaráanda jumániña júmarigu. Rújumei jafúlasun joun, mámarügü lueígiñe mére tántima würi, lugúndun gíñe rúlaani Búngiu ibágari méme magúmuchaditi le líchugubei jun láu lareíni, joun. Adüga jumei ítara, úa lámuga ni cáta lun leréderunün luei jayúmurangun lun Búngiu.

Ja asúfurirubaña lueígiñe jadügüni le buídubei

8 Abágarida jumá sun jugúya lídan úarani lúma láu gudémejabu jídaangua, jínsíñegua jugúyame júngua queisi idújeñu lueígiñe Jesucrístu. Areída jumá, únabu ligíame janáangun júngua. 9 Máguyugüda jumá wuríbani luágu wuríbani, ni anabúni luágu anabúni, lubáragiñe líra, águyugüda jumá abíniruni, lugúndun lun jerésibirun abíniruni lúmagiñe Búngiu lagúaraün. Lugúndun tariñajare Lerérun Búngiu.

10 Le busénti labágaridun ában ibágari buíti, lúma gíñe ában ibágari lánina ugúndani, lúnti loúnigiruni liyúma luei ladímurejan wuríbani,

maríñagun ligíame iyéeni.

¹¹ Lúnti ladísedun lueí wuríbani lun ladügüni buíti, láluajani darángilaü lun labágariduni súnwandan.

¹² Lúnti ítara lan ligáburí, ladüga toúnigi lumútiña Wabúreme Búngiu ja richáguabaña ligíbugiñe, agáambaleí jayúmuragun lun.

Ánjein ja adügübaña wuríbati, magúndaati Búngiu jáu.

¹³ ¿Cábagi gayára ladügün wuríbati jun, ánjaün íchaagua júngua lun jadügüni buíti súnwandan? ¹⁴ Áni íbini jasúfurirun ladüga lísurun jibágarí, gúnda jumá ladüga fuleiseiwa jumá lídan le jasúfurirun luágu Crístu. Manúfude jumá lueí ní ában, madíjeri ligíame jarítagun. ¹⁵ Derégeguarügü jumá júngua le gumúti lun Crístu quei Jabúreme, aráanseñu jumá súnwandan lun jounabuniña ja álügüdütün ca lan ueígiñe jeménigida luágu Crístu, láu maweíríguni lúma láu inébesi. ¹⁶ Buídulá jóuserun, darángilañu támuga janígi, lun ja lan adímurejabaña wuríba luágu lubuídun jigáburí queísi afíñetiña luágu Crístu, nibúsigari jamámuga luágu jerérun guánarügü. ¹⁷ Buítimaati lun jasúfurirun lueígiñe jadügün buíti, ánjein ítara líña lubeí labúseeruni Búngiu, sügü láu lun jasúfurirun lueígiñe jadügün wuríbati.

¹⁸ Jarítagua jumá luágu luweírín lasúfurirun Crístu dán meja le loúnwenbei luágu wafígoun ában weíyaasu lun sun dan. Buíti meja Crístu, ába lasúfurirun wawágu, wagía le wuríbabei, lun lanügüniwa lun Búngiu. Áfarúati jilágubei, wínwantu láni Espíritu. ¹⁹ Quei Espíritu, ñüdúnti gíñe apúrichija joun espíritugu ja lídaanbaña jafúlasun jiláaña. ²⁰ Espíritugu jagía, gürígia ja wínwanbaña lídan meja lídáani Noé, magáambaditiña meja gürígia jagía lun Lerérun Búngiu láu sun arúfuda láni Búngiu luweírín lugúraasun joun lídan le lagúrabajani tagúmuchún árcá to ladügúboun Noé. Mánjatiña jagáambuni Búngiu, ába jasálbarun wídürügü gürígia lídaangiñe luweírín gúnran ligía. ²¹ Dúna ligía, ítara líña quei lidúnarina badísei guetó, le ídaangiñebei wanügüwa lun wasálbarun. Máma lun larúmadun úgubu abásteruni, arúfudarügü lumúti luágu jarúmaaru tan wanígi ligíbugiñe Búngiu láu wafíñerun luágu Crístu, luágu gíñe sálbaadiwa lan láu lásaarun Crístu lídaangiñe ouweni lúnya labágaridun. ²² Múdeiti Crístu siélun, áni níjein guetó ñun lueígiñe loúnwenren Búngiu jáu sun ánjeligu jáma sun jíbiri ubáfu siélu lábugiñe lubáfu.

4

Wesériwidun láu ubáfu le líchugubei Crístu woun

¹ Ligía, ítara quei sífuri lubeí Crístu ya ubouágu wawágu, lúnti gíñe aráanseñu wamá lun wasúfurirun láu gurásu luágu. ² Le sífurijalíbei luágu Crístu, ígira láali figoú lun labágariduni líbiri libágarí queísi lugúndan Búngiu, máma lun líchugun ugúndani lun lagübüri ayúmajani. ³ Lídan meja dan le sügüjalíbei, adüga jumúti meja luríban buri cátei le jínsiñebei joun ja íbídiñejabubaña lun Búngiu, jaganouñña meja lídan íbágarí nibúsigarídunati, gúnfulitün meja lúma luríban jayúmajan, abácharuada, adáagua fédu, átagua sarágu, ájuduragua joun sándu, le moúnbei ladügüniwa. Buídürügaali dan le abágarida jumáalíbei ítara. ⁴ Guetó, weíríti janígi já meja jumádagubaña láu mafála jumáaña lan lídan lagübüri íbágarí le, ligía jadímurejanbei wuríba juágu. ⁵ Ánjeinti jagía, jagúfesseruba ligíbugiñe Búngiu, le aráanseñubei lun lagúseragüdüniña wínwangiña jáma jiláguaaña, madíse. ⁶ Ligía apúrichijoúa

lubei meja luáguti asálbaruni joun ja jiláguañábaña guetó, lun gayáraabei lan gabágari tan jawáni láu libágari Búngiu, láu sun jilá lan jágubu queísi lasúseredun joun sun gürígia.

⁷ Yaráfaali lagúmuchun uboú, ligía lúnti lubei aráanseñu jumá, ragügua jugúyame júngua, derégegua jugúyame júngua lun ayúmuraguni lun Búngiu. ⁸ Lougiñe sun cátei, níjeinlá sarágu ínsiñeni jídan joun jibirigu, lugúndun ánjaün jínsiñejabu, ferúduna jubei jafígoun ámu juágu, láu sun gíbe lan. ⁹ Resíbi jumáña gürígia júbiñe láu sun jugúndan. ¹⁰ Rújali Búngiu ában ubáfu lun ságü afñeti luágu Crístu, ítara liña lubeíti, seríwi jumá joun jibirigu láu ubáfu le rúlaalíbei Búngiu jun, queísi oúniri buítiña lánina ubáfu buri le líchugubei Búngiu. ¹¹ Le gabáfubei lun lapúrichijan, lúnti ladügüni queísi ában le adímurejati dimúrei lúmagiñe Búngiu. Le esériwiduti, adügalei láu sun érei le líchugubei Búngiu lun. Sun cátei le jadügübei, adüga jumei lídan ában igáburi le lúnti líchugúniwa uweiriguni lun Búngiu láu, lídaangiñe Jesucrístu. Búngiu le Súnti Gabáfu, ligía le lúnbei lerésibiruni uweiriguni lun sun dan. Ítaralá.

Wasúfurirun queísi lánigu Crístu

¹² Nidújeñu jínsiñetiña nun, maweíridalá janígi láu buri lidíjeri ouchwagüni le jibíjubei, camá jamuga ába cátei ámuti asúseredubei jun. ¹³ Lubáragiñe líra, gúnda jumá luágu gafánran jumá lídan lasúfurirun Crístu, lun gayáraabei lan jabuínchun láu ugúndani dánme le lagíribudun Crístu uboúagun láu sun luweirigun. ¹⁴ Fuleiseiwatün ánjaün anabúa lueígiñe lánigu jumá Crístu, lugúndun arúfuda lumúti líra luágu níjein lan Sífiri Sándu, le weirigubei, jídan. ¹⁵ Ánjein asúfurira ában jídaangiñe, lun máma lan lueígiñe láfarajan, o lueígiñe lan líwerujan, ni lueígiñe ladúraaguni líbiri lúrudu, ni lueígiñe leméterun lídoun cátei le miábinti lun, mídin. ¹⁶ Ánjeinti asúfurira mútu lueígiñe lánigu lan Crístu, moún lumuti lanügün busiganu, lúnti líchugun eteíngiruni lun Búngiu luágu lánigu lan Crístu.

¹⁷ Chülújali dan lun lagúmeserun luweirín asúfuriruni, jámagiñe guánarügüba lánigu Búngiu lagúmesera. Ánjeinti lagúmeseruña lubei asúfuriruni ítara wámagiñe, weiritimaabei jasúfurirun ja mánjabaña jerésibiruni lerérun Búngiu. ¹⁸ Ánjeinti jénreengu lubei jasálbarun ja buídubaña, ¿cábago asúsereda joun ja wuríbabaña, jáma ja gafígounbabaña? ¹⁹ Ja lubeíti asúfurirubaña queísi labúseeruni Búngiu, lúnti ítara méme jamá adügei le buídubei, derége jamoúnme jawáni lújaburugun Búngiu le adügübaliña, lugúndun gayáraati weménigidun luágu Búngiu lun lagúnfulirun láu lerérun.

5

Lerérun Pédro joun afñetiña

¹ Níchuguñein nerérun jun, jugúya ja ábutigubaña lídan jadámurin afñetiña, queísi ábuti lan gíñe áu quei jugúya, áni geféentina gíñe luágu lasúfurirun Crístu, áni gabáradadina gíñe quei jugúya lídan uweiriguni le lúnbei líábin. ² Tounígi jumáña lirájüñü Búngiu ja lábugiñeabaña jaríajaan queísi jounigiruniña jouniri mudún mudún. Adüga jumei láu ugúndani queísi labúseeruni Búngiu, máma ladüga jafósuruña lan, adüga jumei ladüga busén jumá jesériwidun lun Búngiu, máma ladüga línsiñegu seínsu. ³ Mousera jumá camá jamuga jabúriña ja lábugiñeabaña jaríajaan jugúya, joucharügü jumá lun ában jumá jémpulu buíti joun. ⁴ Ítara lúba, dánmeti le

liábin Jesucrístu, le joúniri mudún le tímatimaati, jibíjuba ában uweírighuni le weírighuti le ladúraruba lun sun dan, le mítaraanbei quei rídi le láuti ubánaü le gásaürati.

⁵ Jugúya gürígia ñübürigiña, rúgua jumá júngua lábun jagúmadin weíyaaña mútu. Lúnti jesériwidagun súngubei joúnigua láu manáanguni únguaü, lugúndun taríñajare Lerérun Búngiu.

Magúndaanti Búngiu jáu ja barüguabaña joúngua, áni íderagua lumútiña ja manáangunbaña joúngua, láu lareíni.

⁶ Rúgua jumá lubeíti júngua ünabu lábugiñe lújabu Búngiu le gabáfubei, lun gayára lan lichuguni uweírighuni jun dánme le lachúlürün dan ligía.

⁷ Madíjeri jumá luágu ni cáta, ígira jumeí sun cátei lun Búngiu, lugúndun laríjiña jáu le tímatimaati.

⁸ Agáguduañu jumá, ragüguañu jumá júngua, lugúndun eíbugañajádügü líña Máfia le jágani queísi líñún gáñiti áluaja cába lan lagünrinchagua.

⁹ Mígiraguagüda jumá júngua lun, derégüdagu jumá lídan jafíñen, subúdiñu jumeí luágu ligía méme lan gíñe jasúfurirubei jidújeñu lueígiñe Crístu lídan sun fulásu. ¹⁰ Lárigiñeme súfurijadün lan luágu murúsun dan, ladügübadün Búngiu lun úa lan mégeiti luágu lubuídun jigáburí, derégüdagu lídan jafíñen, surúñu, láu ubáfu lun jawánduni sun cátei. Ligía méme Búngiu le íchugubalin sun abíniruni woun, le gíñe agúarubei woun lun gafánran wamá lídan luweírighun le magúmuchadibei, lídan ában lúma Jesucrístu. ¹¹ Ligía le Súnti Gabáfu lun súnwandan. Ítaralá.

Lagúmujoún buri mábugäü

¹² Noúnajañoun tiraüraü gárada to jun lúma Silváno, le nanügübei queísi ában idújei úaraguati, lun níchugun dügüdaguaü lun jafíñen, geféen áume jun luágu abíniruni lan le jerésibirubei, larúfuduñsun cátei. Ligía méme Búngiein lan línsiñejabu Búngiu jun le tímatimaati. Madísedagua jumá lueí línsiñejabu Búngiu ligía.

¹³ Mábuga jáña affíñetiña ja Babilóniabaña jun, ja gíñe lanúadajabaña Búngiu lun lánigu jamá queísi lanúadajanün. Mábuga líña gíñe Márcos jun, le ítarabei camá jamuga niraü. ¹⁴ Chúgua jumá júngua lídan líri Wabúreme, arúfuda jumámugei luágu lídaañadiwa lan ában wámagua.

Darángila jumá sun jugúya le lánigu Jesucrístu. Ítaralá.

TIBÍAMAN LIGÁRADAN PÉDRO

Labürüijan Pédro joun afñetiña

¹ Áu Simón Pédro, ában esériwiduti lun Jesucrístu áu, ában giñe láni apóstolu. Nabürüjañoun gárada to jun, jugúya le ñübinjalibei lun gafánran jumá lídan luweírin asálbaruni le wabíjubei lídaangiñe Wasálbaragüle Jesucrístu, le méme Wabúngiute, lugúndun úaragua lan. ² Ibíja jumá sarágu abíniruni lúma darángilaü lueígiñe jasúbudiruni Wáguchi Búngiu lúma Wabúreme Jesúsú.

Igáburi le lúnbei jóuseruni afñetiña

³ Rúlaali Búngiu sun le wemégeirubei woun lun wabágaridun lúma lun wesériwidun lun, láu lasúbudiragüdüni Jesucrístu le agúarubei woun lun gafánran wamá lídan luweírigun lúma lubuídun cátei le ladügübei. ⁴ Gúnfuliti Búngiu láu lerérun, lídaangiñe Jesucrístu, láu líchuguni le buídutimaabei lúma le weíritimaabei woun. Láu líra, gabáfu wamá lun wanúrjan lueí lagübüri ayúmajani lánina uboú le, ibíja wamámugei ligáburi Búngiu wádan. ⁵ Ligía lúnti lubei jáfaagan lun jíchugun lubuídun igáburi lánwoun jafiñen, ⁶ subúdi luágu Búngiu lánwoun lubuídun jigáburi, ragüguaü únguaü lánwoun jisúbudin luágu Búngiu, gurásu lánwoun ragüguaü únguaü, edéregeraguni únguaü lun Búngiu lánwoun gurásu, ⁷ areíduni lánwoun edéregeraguni únguaü lun Búngiu, ínsiñejabuni lánwoun areíduni.

⁸ Ánjein níjein buri lubei igáburi líra jídan le tímatimaati, mámabei luágu ní cáta jisúbudin luágu Crístu, áni líchuguba jibágari sarágu cátei buíti lun Crístu. ⁹ Ánjeinti le mítaraanbei ligáburi, ítara líña queísi ában maríjinti o ában lan madíse taríjin, bulíeilá luágu chibáwaali lan binádu lífígoun. ¹⁰ Ligía lubeíti nidújeñu, quei wájali lubei Búngiu jun, anúadajalaün lun lánigu jumá, áfaagua jumá lun lájüchün buri cátei le jídan, ánjein jadüga ítara, máburujabadün lídoun féridi. ¹¹ Ítara lúba úa lan ní cáta ásiñeragüdüti jebélurun lídoun larúeijan Wabúreme Wasálbaragüle Jesucrístu, le magúmuchadibei.

¹² Ligía narítaguagüda mémebadün lubei luágu, láu sun subúdi jumáli lan, áni jeíbuguña lan lídan inárüni ligía. ¹³ Láu sun líra, sun wínwangidina lan, afñetina luágu buídu lan lun nagúaruni jarítagan lun luwýeri ibágari le lúnbei jabágariduni queísi lánigu Crístu. ¹⁴ Subúdigüda láali Wabúreme Jesucrístu nun luágu yaráfaali lan wéyu lun noúnwen, ¹⁵ ítara líña lubeíti, nadügübei nuáraati lun íbini lánme lárigiñe jiláadina lan, lun súnwandan lan jarítagan luágu buri cátei le.

Já buri aríjubalin luweírigun Crístu

¹⁶ Arúfudajani le wíchugubei jun luágu lagíribudun Wabúreme Jesucrístu uboúagun láu sun luweírin lubáfu máma meja úraga, aríja wamúti meja luweírigun láu wágu. ¹⁷ Aríja wamúti dan le líchugunbei Búngiu Úguchili inébesi lúma uweíriguni lun, ába laríñagun lumálali Búngiu lun lídaangiñe uweíriguni lánina siélu. “Niraü le jínsiñebeí nun le, le áubei oúnwenbun lan nugúndan.” ¹⁸ Agáamba wamúti ladímurejan Búngiu ítara luágu Wabúreme Jesucrístu dán meja ñíñadiwa lan lúma Wabúreme luágu wübü le biníwabei.

¹⁹ Níjein giñe ában cátei choúrutimaati wáma luágu liábin Wasálbaragüle uboúagun—ligía ugánu le jabürüjabei profétagu. Buíti jadüga lun jatúriajani jerérun wügüríña jagía, ladüga líchuguba lan larúgouna tun janígi queísi ában lámpu le adúnraaguti lídan ában fulásu le búrigati. Lesériwiduba jerérun woun ítara daríme dan le lagíribudun Crístu uboúagun, le ítara lúbabei queísi larúgadun dan le táfuridun warúguma to lánina bináafin—wasúbudirubei sun cátei lídaanme dan ligía. ²⁰ Lougiñe sun cátei, lúnti jasúbudiruni luágu úa lan ni ában gayáraati ladáriruni laníchigu cátei le bürü jamaalíbei profétagu láu lání lúngua. Busénwati lubáfu Sífiri Sándu lun gunfaráandawa lan, ²¹ lugúndun madímurejaantiña meja wügüríña jagía láu jáni jóungua. Jagía, queí meja wügüríña jabei derégeguatiña jóungua lun Búngiu, dimúrei buri lúmagiñeti Búngiu jadímurejabei lugúndun Sífiri Sándu lan adúndejabaliña.

2

Ja arúfudajabaña iyéeni

¹ Añájein meja yéetiña jádan warásan ja aríñagubaña luágu profétagu jamá, ítara lúba giñe añájeinbaña lan jídan, jádaruba iyéeni lagánagua arúfudajani le inárünibeí lun lagádeiruni jafiñen. Jarúfudubeiti yéetiña jagía láu luwúyeri jabágaridun luágu máma lan Crístu Jabúremebei, láu sun jilá lan Crístu lun lasálbaruniña. Láu cátei líra, janügüba agúnrichaguni furése joun guánarügü. ² Gíbeebaña afálarutiña lídan liwíye jémeri, áni ladímurejóuba wuríba luágu úma le inárünibeí jadüga. ³ Láu línsiñe seínsu joun, jaságaruba seínsu jueí láu jarúfudajan le málabei, le ñúbinbei lídaangiñerügü jachügü, choúruti luágu jagúseragüdúwaba lan luágu luríban jadüga, yaráfati jeféridirun queísi laráanserúniwa jabá lúmagiñe binárü.

⁴ Úati ferúduna láníña Búngiu ánjeligu já meja afígounjabaña, ába lachágaraguniña máfiougatin, ába lígiruniña adaürüwa lídan lubúriga ñi agúrabajeí wéyu lánina lagúseragüdúniña. ⁵ Úati giñe ferúduna láníña Búngiu mútu wuribatiña já meja aganoúbaña uboúagu lídan lidáni Noé. Ába loúnajani gúnran jawágu gürígia jagía, Noé rügüñein le apúrichijabei joun gaffigountiña lun jasáansiruni jagáburi, jámaya sédü gürígia lánwoun asálbara. ⁶ Darí lumuti giñe meja jadúnrun gürígia ja aganoúbaña ubúругu Sodóma lúma Gomórra. Ába láguduni fulásu buri ligía darí lun ladáagun balígime, lun larúfudajan joun gürígia wuríbatíña ja lúnbaña jayábin járigiñe ca lan lafáyeijabei figou. ⁷ Séfu lumúti meja Lot, ában meja wügürí buíti, le weíribei lidíjeri luágu liwíye jagáburi gürígia wuríbatíña lídan fulásu ligía. ⁸ Ságüja wéyu lasúfurirun wügürí buíti ligía tidan lanígi láu laríjini lúma lagáambuni cátei buri wuríbati le jadügübei. ⁹ Sun le, ában jémpulu luágu ligáburi lasálbaruniña Búngiu ja derégeguabaña jóungua lun lueí oúchawagúni, ígira láña ja wuríbabaña lábugiñe asúfuriruni lubá jasiadirúniwa lun sun dan lídaanme wéyu lánina agúserawagüdúni.

¹⁰ Lasúfuriragúdátimabaña Búngiu ja afálarubalin liwíye jayúmajan, ru jagía mebéreseni luágu le lubeíbei Búngiu. Arúfudajatiña magáambaditiña ja jagánaguabaña, barúguatiña jóungua, mebéresentiña láu ni cáta, marúfudun jagía inébesei joun ja weírigubaña, anábarügü jamáña. ¹¹ Ánjañati ánjeligu, láu sun jéretima jamá, gabáfu jagía sügü jáu arúfudajatiña jagía, míchuguntiña jadúnrun ánjeligu wuríbatíña ligíbugiñe Búngiu, láu anabúni.

¹² Ánjaña arúfudajatiña ja, ítara jáña queísi anímaalugu úati gunfaráanda jamá, jagüriajoun lun járügüdün lun jafarún. Adímurejatiña wuríba luágu buri cátei le úati gunfaráanda jamáni, jouweguba queísi jouwegun anímaalugu, ¹³ asúfurireina lueígiñe jasúfuriragüdün ámu. Nibúsigarídünati jabágaridun, adáagua jamúti lagúburi jayúmajan lídan larúgounga, ligíbugiñe laríjin sun ubou, darí lun júaradagun júma lídan jufédun queísi jamúga gürígia buítiña, wíyeti jabágarí.

¹⁴ Siñáti jaríjin ában würi lun úa lan suámei jamánun, mabúchati jawágu adáagua figou. Acháwaja jamútiña débilitiña lídoun figou, bíbutiña luágu meménijabuni. Chouruti luágu jagünrinchagúba lan. ¹⁵ Féridiña jáña, lugúndun jígiruni úma le surúbei. Falá jamuti láni proféta Baláam, le liraú Beór, jémpulu, lé meja álugubei lagáñeirun seínsu láu ladügüni le wuríbabei. ¹⁶ Ábati ladeínjan ában burígü maríñagaditi lun luágu lifigoun, adímureja ligía lun láu jamálali gürígia, ába mígirun láni lun lasígirun láu lilülün láu.

¹⁷ Ítara jáña arúfudajatiña yétiña ja queísi w-élu mábeiti, queísi buri juánriñu le lanügün garábali, siádiwaaña lun jásiügürün sun dan lídan luweírín-ágei lubúriga máfiougati. ¹⁸ Lugúndun aríñagatiña dimúrei buíduburiti, le málati, aríñaga jagía luágu gayára lan jagúnfulirun, ja afálarubaliña, lúma luríban jayúmajan, adüga jamei furúmieguarügü iwíyei le jabúseerúbei. Ítara líña jacháwajaniña ja sun líñabei jaséfurun lídaangiñe binádu luwúyeri jabágaridun lánina buléiguau, lun jagíribudun járiagoun lídoun liwíye ibágarí. ¹⁹ Aríñagatiña joun jánigu luágu jabágariduba lan ában ibágarí le ní lumuti gayára lan jadügüni le jabúseerun, ánjeinti jagía guánarügü idámuniñanu lun Máfia, lugúndun sun gürígia lidámuñein cátei le árügüdúbalin. ²⁰ Ja subúdi jamáalibei Wabúreme Jesucrístu le Wasálbaragüle, aní séfujaña lídaangiñe iwíyei le lánina ubou le, ánjañaya áburuja lídoun buri cátei le lúnya lárügüdüniña, wuríbatimaabei le lúnbei gádan lánina sügü láu meja furúmiñe. ²¹ Buítimaati jamúga meja joun lun masúbudirungubei jamáni úma le surúbei, sügü láu lárígiñe lan jasúbudiruni, ába jígiruni lerérun Búngiu joun. ²² Jawágu lagúnfulira linárün dimúrei le. “Léchun oúnli lun leíginiya lewérijan, léchun búiruju le sun liñabei lágoun jarúmati, lúnya lágoun lídan gubégubeti.”

3

Lagíribudun Wabúreme Jesucrístu ubouágun

¹ Nidújeñu jínsiñetiña nun, nuján tibíaman gárada nabürüjan jun. Tídan biángubei gárada, jouchatina lun narítaguagüdünün luágu arúfudajani inárüniti le furéndeí jumáalibei, lun gayáraabei lan jasáminarun buídu luágu. ² Jarítagua jumá luágu buri cátei lé meja jaríñagubei profétagu, lúma luágu lugúmadin Wabúreme Jesucrístu le Wasálbaragüle, lé meja warúfudajabei wagía apóstolugu jun.

³ Lídaangiñe sún buri cátei le waríñagubei, rútima jumei le jarítagunrugun. luágu lídoun lánme lagúmujoún dan, añajeinbaña gürígia éjerajatiña láu buri cátei luáguti Búngiu, jabágariduba queísi laríñaguni luríban jayúmajan joun, ⁴ ábame jaríñagun. “¿Másan jaríñajare luágu liábinyaba lan Crístu ubouágun? ¿Jalíñañeinsan? Lúmagiñe jouwegun furúmiñetiña afiñetiña luágu Jesucrístu, ítara memégili sun cátei quei meja lúmagiñe ladügünbei ubou.” ⁵ Mabúseeruntiña jasúbudiruni luágu ladügüni Búngiu sun cátei lídan lidáni lun ladügüniwa. Adüga lumúti meja siélu lúma ubou

lúmagiñe binárü láu lugúmadin, adüga lei múa lídaangiñe dúna, geyégu líña giñe múa ligía láu dúna. ⁶ Ába lachülürün dan lun lagünrinchaguni Búngiu ubou meja ligira láu lidúnarina gúnran. ⁷ Ánjeinti siélu lúma múa le guetóbei, lareíduñein Búngiu lubáme wéyu dánme le lagúseragüdün. Lídaanme wéyu ligía, lágudubei Búngiu siélu lúma ubou le gumúti láu lugúmadin. Ja madügünbaña gásu láu Búngiu, jágudúba lídan wátu ligía.

⁸ Mabúlieida jumei giñe, nidújeñu jínsiñetiña nun, luágu ítara líña lan ában wéyu ligíbugiñe Búngiu quei mílu irúmu, mílu irúmu quei ában wéyu. ⁹ Máma jamúgata lugúndun ladárasarun lagúnfulirun Búngiu láu lerérun, queisi jarítagun sarágu, gagúraasunrügüti jabá güriña lugúndun mabúseerúnti lun leféri dirun ni ában jádaangiñe, labúseerun lun jaságürrijan sun güriña lídaangiñe jaffigoun, gayára lámuga jasálbarun.

¹⁰ Lachülürüba wéyu ligía lun lagíribudun Wabúreme Jesucristu ubou agun dánme le magúrabúniwa lan, queisi lachülürün jíweruti árie bu. Ábanmeti lagúmuchagun siélu láu ában lanárime ireíni, rürüguagüdaleíme wátu geméti sun cátei le ñíbei—játi, warúguma, wéyu—gudáme ubou láu sun cátei le lídaanbei.

¹¹ Queisiti lagünrinchaguba lan sun cátei ítara, lúnti lubeíti jarúma lan jabágaridun, derégeguañu júngua lun Búngiu le gumúti, ¹² agúrabañu jumei lachülürün luwéyuri Búngiu, adügañu jumei le juáraati lun jóufudajani. Lídaanme wéyu ligía, lagünrinchaguba siélu láu wátu geméti, ábame larürüdagun sun cátei. ¹³ Ánjeinti wagía, agúraba wamúti iséri siélu lúma iséri ubou le uágubei lariñaga Búngiu woun, sun cátei ñi, úraguabei, áni buídubei giñe.

¹⁴ Ligía lubeíti, nidújeñu jínsiñetiña nun, sun anjünja lan agúrabajé buri cátei le, jóucha jumá lun ladárirunün Búngiu lídan úraguni ligíbugiñe, jarúmañu, úouga mégeiti juágu. ¹⁵ Subúdi jumeítia luágu lagúrabaja rügüña lan Wabúreme Jesucristu jasálbarun güriña lubá lagíribudun ubou agun. Ítara líña giñe labürüjan wadúje Páblo le jínsiñebei woun sarágu, jun, láu subúdi le líchugubei Búngiu lun. ¹⁶ Adímurejati tídan sún buri ligáradan luágu buri cátei le, láu sun nújein buri lan tídaangiñe, jénreenguti gunfarándawa tan. Játi ibídouguabaña áu jáma ja louguabaña afiñe, garábaguati laníchigu labürüjan Páblo según jagía, ítara quei jadüga tún buri tibiri líburu to Lerérun Búngiu. Jeféri diruba lun sun dan ladüga cátei le.

¹⁷ Ligía lubeíti, nidújeñu jínsiñetiña nun, queisi subúdi jumáli lubei buri cátei le lubáramegiwa, toúnigüa jumá júngua luei jeyéedunün güriña wuríbatiña, ígiragüdei arúfudajani le inárüniti luáguti Búngiu jun. ¹⁸ Jóucha jumá lúntima jasúbudiruni Wabúreme Jesucristu le Wasálbaragüle, awáanse jugúyame lídan línsiñejabu. ¡Uweiriguni lun, guetó lúma súnwanda! Ítara lá.

FURÚMIÑETU LIGÁRADAN APÓSTOLU JUAN

Dimúrei le lánina ibágari

¹ Wabürüjaña jun luágu Búngiu Irájü lé buga nñejnalibei dan le lagúmeserunbei sun cátei. Ába liabin Búngiu Irájü ubouágun queísi ában gürígia, aríja wamúti láu wágu, agáamba wameí ladímurejan. Aríja wamúti sun le ladügübei, gurú wagía luágu láu wájabu. Ligía le ídaangiñebei liábin sun ibágari, ligía gíñe le gíribei “Dimúrei”. ² Ába liábin ubouágun, quei nubeíbei jun, aríja wamúti, geféen wagía luágu, áni guetó wabürüjaña jun luágu. Níñein Búngiu Irájü lúma Búngiu Úguchili lúmagiñe furúmiñeti dan, ába liábin ubouágun queísi gürígia lun gayáraabei lan wasúbudiruni. ³ Wafúraanguagüdüñein lubeíti jun le aríja wamáalibei ladügün, lúma le agáamba wamáalibei laríñagun, lun gayáraabei lan jafiñerun le tímatiati, lídan jumámuga ában wáma lídan cátei lébei, lídaañadünme gíñe ában lúma Búngiu Úguchili lúma Jesucrístu le Búngiu Irájü, queísi wagía. ⁴ Ítara lúba dayarubei lan wagúndan, sun wagía.

Ítara líña Búngiu queísi lámpu

⁵ Niján ugánu le larúfudajabei Crístu woun, le gíñe wíchugubei jun guetó. luágu itara líña lan Búngiu queísi ában lámpu, mánti ni cáta lúma lubúriga. ⁶ Ánjawa aríñaga luágu lídaañadiwa lan ában lúma áni madügün wamúti le laríñagubei, lídaañagidiwa lubúriga, áni weyéedaguña woúngua láu waríñagun luágu lídaañadiwa lan ában lúma, lugúndun múaran lan wagáburi lúma linárün. ⁷ Ánjein úaragua lubei wagáburidun lúma linárün, lídaañadiwa larúgounga, áni inárüni luágu lídaañadiwa lan ában wámagua, áni chibá lumuti líta Jesucrístu sun wafígoun.

⁸ Ánjawa aríñaga luágu mafígoun wamá, weyéedaguña woúngua, maríchati le waríñagubei. ⁹ Ánjein wagúfesera wafígoun, gayáraabei weménigidun luágu Búngiu luágu ladügübei lan le úaraguabei—ferúduna lubei wafígoun, jarúmagüda lówame lídaangiñe sun wuríbani. ¹⁰ Ánjawa aríñaga luágu madügüngidiwa lan figou, wadügüñein Búngiu camá yéeti, áni merésibirun wamágili lerérün tídan wanígi.

2

Adímurejati Crístu lueígiñe wafúleisein ligíbugiñein Búngiu

¹ Nirájüñü, nabürüjañein buri cátei le jun lun mafígounjan jumá. Láu sun líra, ánjawa afígounja, ladímurejaba Wabúreme Jesucrístu lueígiñe wafúleisein ligíbugiñe Wáguchi Búngiu, ladüga ligía rügüñein richágua ligíbugiñe Búngiu. ² Lídaangiñe Jesucrístu ferúdnawa lan wafígoun, áni mámarügü wafígoun, ferúdnawati gíñe jafígoun sun ja afíñebaña luágu.

³ Ánjein wagúnfulira lugúmadin Búngiu, wasúbudirubei luágu chülüjadiwa lan asúbudirei Búngiu. ⁴ Ánjein aríñaga ában gürígia. “Subúdi numúti Búngiu”, áni magúnfulirunti táu lugúmadin, yéeti gürígia ligía, ibídiñegili Búngiu lun. ⁵ Ánjeinti gürígia le adügübalin le lubeíbei Búngiu, chülüjali Búngiu ínsiñeda lun buídu buídu, itara líña wasúbudiruni luágu

lídaañadiwa lan ában lúma. ⁶ Le aríñaguti luágu lídaañein lan ában lúma Búngiu, lúnti labágaridun queí meja labágaridun Jesucrístu ya ubouágu.

Le iséri gumádi

⁷ Nidújeñu, mámatia iséri gumádi le nabürüjabei jun, ligía méme binádu gumádi le júmabei lúmagiñe dan le jagáambubalin ugánu luáguti Crístu, lun jagáburidun úragua lúma ugánu ligía. ⁸ Guetó narítaguagüdüñadün luágu gumádi le lagúarubei Jesucrístu iséri gumádi, áni gumádi ligía, lun jínsiñegua wamá woúniwagua. Ítara líña meja labágaridun Jesucrístu, jabágariduña giñe ítara lugúndun jeíbuguña lan lídan larúgounga le linárünbei Búngiu, mámaañadün lídan lubúriga.

⁹ Le aríñaguti luágu leíbuguña lan lídan larúgounga áni iyéreeguti lidúje lun, lídaangili lubúriga, ibídiñegili Crístu lun. ¹⁰ Le jínsiñejabuti joun lidújeñu lueígiñe Jesucrístu, lídaañein larúgounga, subúdi Crístu lun, áni úati ní cáta lun láburugüdüni lídoun figoú. ¹¹ Ánjeinti le iyéreejabuti lun lidúje, ítara líña queísi gürígia le eíbugubei lídan lubúriga, ibídiñeti lun jalíñounbei lan lugúndun darú lani lubúriga laríjin.

¹² Nirájüñü, nabürüjaña jun lugúndun ferúduna láali Búngiu jifígoun ladúga Crístu. ¹³ Agübürigu, nabürüjaña jun lugúndun subúdi jumáli lan Jesucrístu lé meja níjeinjalíbei lúmagiñe furúmiñeti dan. Nñübürigiña, nabürüjaña jun lugúndun gáñei jumáli lan wuríbu luágu Máfia.

Nabürüjanbei jun, nirájüñü, lugúndun subúdi jumáli lan Búngiu Úguchili. ¹⁴ Nabürüjaña jun, agübürigu, lugúndun subúdi jumáli lan Jesucrístu lé meja níjeinjalíbei lúmagiñe furúmiñeti dan. Nabürüjanbei jun, nñübürigiña, lugúndun jére jumá, áni resíbi jumáli lerérun Búngiu tídan janígi, lugúndun giñe gáñei jumáli lan wuríbu luágu Máfia.

¹⁵ Mínsiñedalá ligáburi ubouú jun, ní buri cátei le lánina ubouú. Siñáti lajínsiñedun cátei lánina ubouú jun, jínsiñeme Búngiu jun, ¹⁶ lugúndun úati ní cáta lídaangiñe cátei le líchugubei ubouú nñübinti lúmagiñe Búngiu, lúmagiñe guánarügü ubouú liábin. Luríban jayúmajan gürígia, ayúmajani lun jabíjini cátei le jaríjibe le uágubei jarítagua luágu buídu lan, lúma pántaü luágu cátei le jabíjibe, ligía buri cátei le líchugubei ubouú. ¹⁷ Áni ubouú, agúmucheina líña láu buri sun luríban ayúmajani le lídaanbei, ánjeinti le adügüti lugúndan Búngiu, labágariduba lun sun dan.

Inárüni lúma iyéeni

¹⁸ Nirájüñü, chülüjali lagúmujoún dan. Agáambaadün luágu ínite lan Lágani Crístu, queí chülüguaaña lubei sarágu láganiñu Crístu guetó, ligía wasúbudirunbalin luágu lagúmujoúnjali lán buri dan le. ¹⁹ Wádaangiñe jáfurida, láu sun, lídan lan linárün cátei máma meja wánigu jagía, lugúndun lun jamúga meja wánigu jamá, jeréderuña jamúga meja wáma. Jíchugunbalin janágan luágu Crístu ítara lun larijiniwa furáangu luágu máma lan wánigu le tímatimaati.

²⁰ Ánjeinti jugúya, rúlaali Crístu Sífiri Sándu jun, áni subúditün sun jugúya lun. ²¹ Nabürüjanbei lubeíti jun, lugúndun subúdi jumáni inárüni lánina wasálbarun, máma lugúndun ibídiñe lan jun, áni subúdi jumúti luágu siñá lan liábin ní murúsun arúfudajani múaraanti lídaangiñe inárüni.

²² Ja arúfudajabalin le múaraanbei, ja aríñagubaña luágu máma lan Jesús Crístubei le loúnajabei Búngiu ubouúagun lun lasálbaruniña gürígia, jagía láganiña Crístu, mafiñetiña ní luágu Búngiu Úguchili, ní luágu Búngiu

Irájü. ²³ Sun ja májabaña lun jasúbudiruni Jesúsu queísi Búngiu Irájü, ibídiñegili Búngiu Úguchili joun, ja aríñagubaña luágu Jesúsu lan Búngiu Irájü, subúdiți gíñe Búngiu Úguchili joun.

²⁴ Ligía, areída jumei lubei ugánu le jagáambubei lúmagiñe furúmiñeti, tídan janígi. Ánjein jadüga ítara, jeréderuba gíñe lídan ában lúma Búngiu Irájü lúma lúma Búngiu Úguchili, ²⁵ jerésibiruba gíñe ibágari le magúmuchaditi, queísi laríñaguni Jesúsu woun. ²⁶ Ligía nerérunbei jun jawágu láganiñu Crístu jagía ja yebe busénbaña jayéedagunün. ²⁷ Níjein Sífiri Sándu júma le líchugubei Crístu jun, memégeiruntün lubeíti ámu lun larúfudajan jun luágu linárün Búngiu, lugúndun arúfudaja lumúti Sífiri Sándu sun cátei jun, áni inárüni larúfudajabei, máma iyéeni.

²⁸ Ítara líña lubeíti, nirájüñü, ítara méme jumá lídan ában lúma Crístu lun dánme lan le liábin, gayára lámuga wasúbudiruni luágu buídu wamá lúma, úa lámuga busíganu wawágu ligíbugiñe. ²⁹ Queísi subúdi jumáni luágu richágu lan Crístu lídan sun cátei, lúnti gíñe jasúbudiruni luágu lirájüñü lan Búngiu sun ja richáguabaña ligíbugiñe.

3

Lirájüñü Búngiu

¹ Arija jumá luweírín wínsiñe lun Búngiu Úguchili, darí lun gayára lan lagúarúniwa woun “lirájüñü Búngiu”, áni inárüni luágu lirájüñü wamá. Ligía siña jabáliwa lánigu ubou gunfaráanda lugúndun ibídiñeti meja Jesucrístu joun lídan linárün cátei dán meja le ya lan ubouágu. ² Nidújeñu jínsiñetiña nun, lirájüñüjadíwa Búngiu guetó, áni marúfudúngili woun cátabadiwa lan lídaanme lagúmujoún, subúdirügü wamúti luágu dánme lan le lagíríbudun Crístu, ítara wába lan quei ligía, lugúndun warijubei ítara quei lubei. ³ Áni sun le agúrababálin buri cátei le, jarúmagüda lumúti ligáburi ítara quei jarúma lan ligáburi Crístu.

⁴ Ánjeinti sun le afigounjabei, dürügua lumúti lilúrudun Búngiu, lugúndun luágu cátei figoubei ladúraawagún lilúrudun Búngiu. ⁵ Subúdi jumáli luágu lun lan lagídaruni Jesucrístu wafígoun liábin ubouágun, luágu gíñe úa lan ni murúsun figou luágu. ⁶ Sun lubeíti le lídaanbei ában lúma, máma lídaañein figou, áni sun le lídaanbei figou, maríjin lágili Jesucrístu, masúbudirun lágili gíñe. ⁷ Nirájüñü, mayéedawagua jumá, ában gürígia richáguati ligíbugiñe Búngiu adüga lumúti le richábei, queísi richágu lan Jesucrístu. ⁸ Ánjeinti le eíbugubei lídan figou, lánigu Máfia, lugúndun afigoujati Máfia lúmagiñe furúmiñeti dan, ába liábin Liraü Búngiu lun lagúnrinchaguni luwádigimari Máfia.

⁹ Úati ni ában le liraüti Búngiu asgíruti lídan figou, lugúndun níjein ibágari le líchugubei Búngiu lun lídan, siñáti lasígirun lídan figou lugúndun liraü lan Búngiu. ¹⁰ Subúdiwati cátaña lan lirájüñübaña Búngiu lúma cátaña lan lirájüñübaña Máfia, lugúndun furúmieguarügü le madügünbalin le buídubei, o mínsiñejabu lan lun lidúje lueígiñe Jesucrístu, máma lánigu Búngiu.

Jínsiñe jamá wíbirigu woun

¹¹ Níjan ugánu le jagáambubei lúmagiñe furúmiñeti dan. lun jínsiñegua wamá wámagua. ¹² Mouñ lumuti ítara wamá quei Caín, lé meja lánigubei Máfia, ába láfaruni lamúlen. ¿Cági ueígiñe láfarei? Lugúndun wuriba lán meja le ladügübei Caín, áni buíti le ladügübei lamúlen, ligía lagímugajanbei.

¹³ Nidújeñu, maweíridalá janígi ánjaün eyéereguda joun lánigu ubou. ¹⁴ Wagía, ítara wáña meja queísi jiláaña, guetó ibjaadiwa ibágari magúmuchaditi, áni subúdi wamúti líra lugúndun jínsiñetiña wadújeñu lueígiñe Jesucristu woun. Le mínsiñejabuti lun lidúje, jiláñu memegili. ¹⁵ Sun le iyéreejabubei lun libíri, gáfarajati, áni subúdi jumúti luágu úa lan ni ában gáfarajati lun gayára lan gabágari lan le magúmuchaditi. ¹⁶ Subúdi wamúti cátei lan ísiñenibei. luágu lichuguni Jesucristu libágari wawágu. Lúnti giñéti wánjarun lun wíchuguni wabágari jawágu wíbirigu. ¹⁷ Ánjein níjein lubei lúma ában gürígia lun lawínwandun, áni laríja luágu níjein lan lemégeirun lidúje áni míderagun lumúti, ¿ída lubági níjein lan ínsiñeni tídan lanígi lun Búngiu? ¹⁸ Nirájüñü, moún lumuti wayumárurügü lan wínsiñejabu, lúnti ában lan ínsiñejabuni le gumúti, lun laríjin lídan cátei le wadúgübei.

Eménigini ligíbugiñe Búngiu

¹⁹ Ánjawa jínsiñejabu le gumúti, gayáraabei wasúbudiruni luágu lánina wamá afíñeni le inárüntibei, gayáraabei giñe wasúbudiruni luágu buídu lan weréderun ligíbugiñe Búngiu. ²⁰ Ánjoun jamúga íchiga wanígi dúru wawágu luágu som cátei, subúditimaati luáguti dúru ligía lun Búngiu, lugúndun subúdi lan sun cátei lun. ²¹ Ánjoun madárirun wanígi dúru wawágu, nidújeñu, gayáraabei wayábin ligíbugiñe Búngiu láu wemenígi luágu, ²² luágu líchugubei lan sun le wamúriajabei lúma woun, lugúndun gúnfulijadiwa láu lugúmadin áni adúga wamáali le áubei lagúndaara. ²³ Lugúmadin Búngiu, lun wafíñerun luágu Jesucristu le Liraü, lun giñe jínsiñegua wamá wámagua queísi meja laríñaguni Jesúsú woun. ²⁴ Ja agúnfulirubaña láu lugúmadin Búngiu agánawatiña lídan Búngiu, agánawa ligía Búngiu jádan. Subúdi wamúti luágu agánawa lan wádan luágu Sífiri Sándu le rúlaalíbei woun.

4

Láni Búngiu Espíritu lúma láni lágani Crístu espíritu

¹ Nidújeñu jínsiñetiña nun, mafíñera jumá joun sun ja aríñagubaña luágu Búngiu lan adímurejabei jayúmulugugiñe, jóucha jumáña lun jaríjini ánjein Sífiri Sándu lubei le jádaanbei o máma lan ligía. Lugúndun labuínchuña ubouú jáu yéetiña ja aríñagubaña luágu Búngiu lan adímurejabei jayúmulugugiñe áni jayéeni. ² Láu igáburi le, gayáraati jasúbudiruni le gámabalin Sífiri Sándu. sun le aríñaguti luágu quei lan gürígia le tímatimaati liábin Crístu ubouúagun, níjein Sífiri Sándu lídan áni láu lubáfu Sífiri Sándu ladímureja. ³ Ánjeinti le aríñaguti luágu iyéeni lan, luágu mayábin lan Crístu ubouúagun queísi gürígia, úati Sífiri Sándu lídan, espíritu le láganibei Crístu, ligía espíritu le lídaanbei gürígia ligía. Agáambaadün luágu liábinba lan espíritu ligía, níjeinjali ubouúagu.

⁴ Nirájüñü, lánigu Búngiu jugúya, gáñei jumáña yéetiña jagía ja busénbaña jagáraguagüdüñun lueí arúfudajani le inárüntibei, gáñei jumáña lugúndun gabáfutimaati Sífiri Sándu le jídaanbei sügü láu láni Máfia espíritu le jádaanbei. ⁵ Lánigu ubouú jagía, lánina ubouú cátei le jarúfudajabei, ligía lébubei jagáambuniña ja giñe lánigubaña ubouú. ⁶ Ánjein wagía, lánigu Búngiu wagía. Le subúdiabubei lun Búngiu, agáamba lumútiwa, le mámabei lánigu Búngiu, májati lagáambuníwa. Ítara líña lubeíti gayáraati

wasúbudiruni cátaña lan erésibirubalin linárün Búngiu lúmoun cátaña lan erésibirubalin iyéeni.

Ligáburí Búngiu lun larúfuduni ínsiñejabuni

⁷ Nidújeñu jínsiñetiña nun, lúnti jínsiñegua wamá wámagua lugúndun lúmagiñe Búngiu liábin ínsiñejabuni. Sun le jínsiñejabubei, liraü Búngiu, áni subúdiiti giñe Búngiu lun. ⁸ Le mínsiñejabuti, ibídiñegili Búngiu lun, lugúndun ligáburí Búngiu lun larúfuduni ínsiñejabuni. ⁹ Arúfuda lumúti Búngiu wínsiñe lun láu loúnajani Liraü le ábanrügüti ubouágun lun loúnwen, lun gabágari wamá lídaangiñe. ¹⁰ Niján ínsiñenibeí. máma luágu wagía lan jínsiñejabubei lun Búngiu, luágu ligía lan jínsiñejabubei woun, ába loúnajani Liraü le ábanrügüti lun loúnwen, lun lébuname ferúdnawa lan wafígoun.

¹¹ Nidújeñu jínsiñetiña nun, ánjein jínsiñeediwa lubeí lun Búngiu ítara, lúnti giñe jínsiñegua wamá wámagua. ¹² Úgali ni ában aríjiti Búngiu, láu sun líra, ánjava jínsiñegua wámagua, níjein Búngiu wádan, áni ítara líña warúfuduni wínsiñejabu le gumúti lun Búngiu láu wínsiñejabu wámagua buídu. ¹³ Rúlaali Búngiu Sífiri Sándu woun lun lachouúrurun luágu lídaañadiwa lan, áni wádaañein lan giñe. ¹⁴ Wagía guánarügü aríja wamáali Liraü Búngiu, aríñaga wameí luágu lun lan lasálbaruníwa loúnajeí Búngiu ubouágun. ¹⁵ Furúmieguarügü le affínerubei luágu Liraü lan Búngiu Jesúsú, labágariduña lídan Búngiu, áni labágariduña giñe Búngiu lídan.

¹⁶ Ítara líña wayábin asúbudirei lúma affínera luágu jínsiñe wamá lun Búngiu. Ligáburí Búngiu lun larúfuduni ínsiñejabuni, le abágariduti lídan ínsiñejabuni, labágariduña lídan Búngiu, áni labágariduña giñe Búngiu lídan. ¹⁷ Ítara líña wayábin lun jínsiñe lan Búngiu woun le gumúti, ábame manúfude wamá lídaanme wéyu le lúnbei lagúseragüdüniña Búngiu sun gürígia ladüga wagáburiduña lan ya ubouágu queísi Jesucristu. ¹⁸ Ánjein jínsiñe Búngiu woun le gumúti, manúfudebadíwa luágu le lúnbei ladügüni woun, láu luweírín línsiñe Búngiu woun, gidáti sun anúfudei waweí. Ánjein janúfude wabeí lueí Búngiu, ladüga wagúrabajaña lan láburujan ligáñi wawágun. Ligía, ánjein janúfude lubeí ában gürígia, machülügilirügü líña Búngiu ínsiñeda lun le tímatimaati.

¹⁹ Wagía, jínsiñeti Búngiu woun lugúndun wínsiñedun lun furúmiñe. ²⁰ Ánjein aríñaga ában gürígia. “Jínsiñeti Búngiu nun”, áni mínsiñeti libíri lun, yéeti gürígia ligía, lugúndun ánjein mínsiñe libíri ában gürígia lun, le aríja lumúti, siñábei giñe jínsiñe lan Búngiu lun, le maríjin lubeí. ²¹ Rúlaali Cristu gumádi le woun. le jínsiñejabuti lun Búngiu, lúnti giñe jínsiñe lan libíri lun.

5

Wagáñeiruni wuríbu lúma ubou

¹ Sun ja afíñebaña luágu Jesúsú lan Crístubei le loúnajabei Búngiu, jagía lirájüñübaña Búngiu, áni sun ja jínsiñejabubaña lun Wáguchi Búngiu jínsiñejabubaña giñe joun lirájüñü Wáguchi Búngiu. ² Subúdi wamúti luágu dan lan le jínsiñe lan Búngiu woun áni adüga wameí le lubeíbei, jínsiñe jamá giñe lirájüñü Búngiu woun. ³ Ladügüniwa le lubeíbei Búngiu, ligía ínsiñejabunibeí lun, áni majúrüti lugúmadin, ⁴ lugúndun sun le liraübei Búngiu, mabáfuti cátei lánina ubou luágu. Wafíñen, ligía cátei le íchigubei ubáfu woun lun wagáñeirun luágu cátei lánina ubou. ⁵ Le afíñebeí luágu

Jesúsu lan Liraübei Búngiu, ligía rügüñein gayára lagáñeirun luágu cátei lánina ubou.

Geféenwa lan luágu Liraü Búngiu

⁶ Jesucristu ligía ñübinbei láu bián seíni luágu ligía lan Liraübei Búngiu. bián seíni ligía, dúna le lánina labásterun, lúma jítaü le lánina loúnwen. Mámarügü láu dúna, láu dúna lúma jítaü. Áni Sífiri Sándu guánarügü geféenti luágu cátei le, ligía arúfudubalin sun inárüni woun. ⁷ Añájein ürüwa geféentiña luágu cátei le siélu. Búngiu Úguchili, Búngiu Irájü, lúma Búngiu Sífiri Sándu, áni ában méme jagía, ⁸ njein gíñe ürüwa cátei geféenti múarugu luágu Jesúsu lan Liraübei Búngiu. Sífiri Sándu, dúna le lánina labásterun Jesúsu, lúma jítaü le lánina loúnwen. ⁹ Resibi wamúti le jaríñagubei wügüriña, gúbuméti lúnti lan werésibiruni le laríñagubei Búngiu guánarügü luágu Liraü lan Jesucristu. ¹⁰ Le afíñeti luágu cátei le, choúru lumúti tidan lanígi luágu inárüni lan, le mafiñebei, adúga lumúti Búngiu camá yéeti, lugúndun mafiñen lan luágu le laríñagubei Búngiu luágu Liraü. ¹¹ Le laríñagubei Búngiu, luágu rújali lan ibágari magúmuchaditi woun, áni lídaangiñe lan Liraü liábin ibágari ligía. ¹² Le njeinbei Liraü Búngiu lúma, njein gíñe ibágari le lúma, ánjeinti le úabei Liraü Búngiu lúma, úati gíñe ibágari le lúma.

Lagúmujóun buri lerérun Juan tidan gárada to

¹³ Nabürüjañein cátei le jun, jugúya le afíñebei luágu Liraü Búngiu, lun jasúbudiruni luágu gabágari jumá le magúmuchaditi.

¹⁴ Jeménigitiwa luágu Búngiu, lugúndun subúdi wamúti luágu ánjava lan amúriaja furúmieguarügü cátei queísi labúseerun, lagáambubadiwa. ¹⁵ Áni ítara quei wasúbudiruni luágu agáamba láni Búngiu wayúmuragun, subúdi wamúti gíñe luágu loúnabubadiwa lan.

¹⁶ Ánjein aríja ában gürígia luágu ladügüña lan ában libíri ában figou le mámabei lúnti lanügüni lídoun féridi lun sun dan, lúnti layúmuragun lun Búngiu, ábame líchugun Búngiu ibágari lun gürígia ligía. Níjein figou anügüti gürígia lídoun féridi magúmuchaditi, málati lun layúmurawagúniwa lun Búngiu luágu figou ligía. ¹⁷ Sun wuríbani figou, máma sun figou lun lanügüni gürígia lídoun féridi magúmuchaditi.

¹⁸ Subúdi wamúti luágu gürígia lan le anügübalin Búngiu queísi Lúguchi, meíbugunti lídan figou, lugúndun toúnigi lumúti Liraü Búngiu, siñáti ladügün Máfia ni cáta lun.

¹⁹ Subúdi wamúti luágu lánigu wamá Búngiu, luágu lábugiñeñanu lan lubáfu Máfia sun ja lánigubaña ubou.

²⁰ Subúdi wamúti gíñe luágu ñübinjali lan Liraü Búngiu ubouagun, áni rújali lan gunfaráandaü woun lun wasúbudiruni Búngiu le tímatimaati. Wabágariduña le tímatimaati lídan ában lúma Búngiu, queísi lídaañadiwa lan ában lúma Liraü, le Jesucristubei. Ligía Búngiubei le tímatimaati, ligía gíñe le ichugubei ibágari le magúmuchaditi woun. ²¹ Nirájüñü, mafálara jumáña búngiugu ja mámabaña Búngiu. Ítaralá.

TIBÍAMAN LIGÁRADAN APÓSTOLU JUAN

Ináruini lúma ínsiñeni

¹ Áu le weíríei mútu, nabürüjañoun gárada to bun, nítu to lanúadiruboun Búngiu lun lániguboun lan, lúma joun birájüñü. Jínsiñetün nun le tímatimaati, áni mámarügü áu, sun gíñe ja afálarubalin Crístu, jínsiñetün gíñe joun sarágu. ² Jínsiñetün woun ladúga jínsiñe lan larúfudajan Crístu le lúnbei wáma lan súnwandan, woun, áni níjein arúfudajani ligía tídan wanígi. ³ Búngiu Úguchili, lúma Wabúreme Jesucrístu le Liraü Úguchili, jabínirubadün, jíchugubei jagúdemejabu lúma jadárangilan jun lídan jabúruchaguagüdüni larúfudajan Crístu lúma ínsiñejabuni.

⁴ Oúnwēnbun nugúndan láu nadárirun jádaangiñe birájüñü abágarida queísi lubúdubu, ítara queísi laríñagun Wáguchi Búngiu woun lun wabágaridun. ⁵ Guetóti nítu, ayúmuraguatina bun lun jínsiñegua wamá wámagua. Máma gumádi iséri le nabürüjabei bun, ligía méme le wámabei lúmagiñe furúmiñeti dan, dan le wagáambubei luágu Crístu. ⁶ Míni lan ínsiñeni, lun wabágaridun según lugúmadin Búngiu, áni lugúmadin Búngiu lun wabágaridun lídan ínsiñeni, queísi wagáambuni lúmagiñe furúmiñeti dan.

Ja ayéejabaña

⁷ Añájein sarágu ayéejatiña ubouágu ja mafíñebaña luágu quei lan gürígia tímatimaati liábin Jesucrístu ubouágun. Le ítarabei, ligía le yéebei, le láganibei Crístu. ⁸ Duári jumá jaweí, lueí jeféridiruni le ñübinbei jun lídaangiñe juwádigimari luágu Crístu, resíbi jumeíme fáyeiti le gumúti luágu, siélu.

⁹ Furúmieguarügü le oufudajati sarágu lídoun iséri arúfudajani, áni merédeti láu le larúfudajabei Crístu lun, úati Búngiu lúma, ánjeinti le eréderuti láu larúfudajan Crístu, níjein Búngiu Úguchili lúma Búngiu Irájü lúma. ¹⁰ Ánjein achülúra ában gürígia júmoun máma láu arúfudajani le, merésibira jumeí júbiñe, mabúsurun jugúyame lun, ¹¹ lugúndun le abúsuruti lun, gádan lumúti gíñe wuríbani le ladügübei.

Lagúmujoún buri dimúrei

¹² Níjein sarágu cátei lúnti naríñaguni jun, mabúseerúntina abürüjarügü náni jun, agúrabatina nídin aríjaün lun nayánujan júma, lun lagúnfulirun wagúndan.

¹³ Mábuga jáña tirájüñü bamúlelua bun, to gíñe lanúadiruboun Búngiu. Ítaralá.

TÜRÜWAN LIGÁRADAN APÓSTOLU JUAN

Buíti ladímurejoún luágu wüğüri le gíribei Gáyo

¹ Áu le weíríei mútu, nabürüjañoun gárada to bun, numáda Gáyo, le jínsiñebei nun le gumúti.

² Numáda jínsiñeti nun, nayúmuragun lun Búngiu lun buídu lan lídin sun cátei bun, lun gíñe magádie ban ítara queísi buídu lan lídin bun lídan beíbugun lúma Crístu. ³ Oúnwenbun nagúndaarun dan le jayábinbei jádaangiñe wadújeñu lueígiñe Jesucrístu, ába jabájüdagun nun luágu bugúnfulin quei babágariduña lubei úragu lúma larúfudajan Crístu.

⁴ Úati ámu cátei agúndaaraguagüdütina queísi dan le nagáambun luágu jabágariduña lan nirájüñü lídan úarani lúma larúfudajan Crístu.

⁵ Numáda jínsiñeti nun, buíti bouuserun lídan esériwiduni le badügübei joun wadújeñu lueígiñe Jesucrístu, joúntima ja lílana ámu fulásu.

⁶ Abájüdaguaña ligíbugiñe adámurini le yábei luágu bínsiñejabu joun. Adügabei fuleísei le. íderagua báña láu le jemégeirubei lun jasígiruni jaweiyasun lídan ában igáburi le áuti lagúndaara Búngiu. ⁷ Furítíña lun jesériwidun lun Crístu, merésibiruntiña ni cáta jámagiñe ja ibídiñejabubaña lun Búngiu. ⁸ Ligía lúnti lubei weténirun joun, lun wíderaguniña lídan lapúrichijoún lerérun Búngiu.

Luríban louuserun Diótfrefes

⁹ Abürüjatina buga ában gárada joun tílana ligílisi, májati Diótfrefes lídin láu le wabeíbei lugúndun busénti ábuti lan jádan súnwandan. ¹⁰ Ánjana lubeíti ñüdüñ, neréruba lun luágu le ladügübei, adáagua marásualugu lúma iyéeni wawágu. Bougudin luei líra, merésibirun lumútiña wadújeñu ja achülürütiña, áni mája ligía lun jerésibiruniña ámu, ja erésibirutiña, ába labúguniña lídaangiñe adámurini le táni ligílisi.

¹¹ Numáda jínsiñeti nun, mafálarabei jémpulu wuríbati le, adügamemebei le buídubei. Le adügüti buíti, lánigu Búngiu, ánjein le adügüti wuríbati, ibídiñegili Búngiu lun.

Lubuúduñ láni Demétrio jémpulu

¹² Buíti jadímurejan súngubei luágu Demétrio, áni inárüni luágu buídu lan ligáburi. Geféentiwa gíñe luágu cátei le, áni subúdi jumúti luágu inárüni lan le waríñagubei.

Lagúmujoún buri dimúrei

¹³ Gíbeti yebe lúnti naríñaguni bun, mabúseerúntina abürüjarügü náni, ¹⁴ lugúndun agúrabatina naríjinibu madíse, ábameti wayánujan.

¹⁵ Darángilabá. Mábuga jáña umádagu yána bun, rúbei wamábugaü lun cáda ában jádaangiñe wamádagu ja ñíbaña.

LIGÁRADAN JÚDAS

Labürüjan Júdas joun ja únbaña wájali lan Búngiu lun lánigu jamá

¹ Áu Júdas, esériwiduti lun Crístu áu, áni lamúlen gíñe Jacóbo, nabürüjañoun gárada to joun ja únbaña wájali lan Búngiu lun lánigu jamá, ja jínsiñebaña lun, ja areídañu lubáña Jesucrístu séfuñu lueí buri cátei lánina uboú le. ² Resíbi jumá sarágu gudémejabu, darángilaü, lúma ínsiñeni lúmagiñe Búngiu.

Ja arúfudajabaña iyéeni

³ Nidújeñu jínsiñetiña nun, weírjali nabúseerun nabürüjan jun luágu asálbaruni le wabíjibei, dándu jugúya queísi áu, guetó sandíguatina núngua luágu lúnti lan nabürüjan jun lun nayúmragun jun lun jáfaagun luágu afiñeni le lederegerubei Búngiu ában weíyaasu lun sun dan joun lánigu. ⁴ Naríñagubalin le jun lugúndun añájein lan arúfudajatiña yéetiña ádaragutiña joúngua jagánaguouñ. Gürígia buri jagía, arúfuda táña Lerérun Búngiu lúmagiñe binárün luágu lúnti lan jasúfuriruni lafáyeiragüle jariban, buídu. Wügüríña wuribatiña jagía, minébenti Búngiu joun, arúfudaja jagía luágu gayára lan jadügün gürígia furúmieguarügü cátei mabuídunti, mabeichun lubáña lan Búngiu lueígiñe, ladúga luweirin lafeíni, ayéedagua jagía gíñe luágu Jesucrístu, Wabúreme le ligiarügüti, le únbei wesériwida.

⁵ Láu sun subúdi jumáli lan, buséntina narítaguagüdünün luágu láu lan sun sagá láníña meja Búngiu lumútuniña Israelítagu Ejíptogiñe, lárigiñe, ába lagúmchaguagüdüniña ja mafíñerunbaña jádan. ⁶ Ánjeligu ja mareídunbalin jabára, ígirarügü jameí jábiñe siélu lun jagárabaagun luágun Búngiu, añájein adaürüwañu lurúma Búngiu, gürágu lídan lubúriga láu güríngüri magúmchaditi, agúrabajei oúnwenbun wéyu le lánina agúseruni. ⁷ Ja lílana buri ubúrugu Sodóma luma Gomórra, lúma fulásu buri le yaráfabei lun, ába jagárabaagun luágun Búngiu queísigubeirügü ánjeligu ja, ába jíchaagun joúngua lun salúfuri, ába jígiraguagüdün joúngua lun sun luwúyeri wuríbani darí lun lagámaridun wügüri wügüri líledi, würi würi tíledi. Ába lagúmchaguagüdüniña Búngiu láu wátu geméti. Reídeitiña queísi ewéridiruni joun sun gürígia, arúfudei ligáburi ída lúba lan lafáyeijan Búngiu luágu figóu.

⁸ Ánjeinti láu sun jémpulu líra, wügüríña buri gíñe ja jagánaguabaña, láu jafálaruni arúfudajani le maríchabei, wíyedaguatiña joúngua, májatiña lun lugúmadin Búngiu, anába jamáña ubáfu buri ja íñugutimaabaña. ⁹ Ánjeinti arcánjel méme Miguél, dan le lasígenejanbei lúma Máfia lueígiñe lúgubu Moisés, moúchunti lun líñaragun láu anabúni, aríñagarügüti lun. “Ébecha lábu Wabúreme Búngiu.” ¹⁰ Ánjaña wügüríña ja, adímurejatiña wuríba luágu buri cátei le úabei gunfaráanda jamáni, lé buri cátei le jasúbudirubei luágurügü jasándiruni queísi jasúbudiruni anímaalu úouga gunfaráanda jamá, ligía buri cátei le jadügübei, ába janügün gürínguaü jawoúguouñ láu joúserun.

¹¹ ¡Fugiábugu jagía! Falá jamaali láni Caín jémpulu, arúfudajatiña iyéeni quei Baláam lun jagáñeirun seínsu, áni magáambaditiña, féridi jagía queísi Coré le oúwebei luágu lumágaambadin lun lerérun Búngiu.

12 Nibúsigaridünatiña lídan buri jufédun le lánina jínsiñegua júmagua, le ñí lubei jeíga, gurá jagía láu ugúndani, minébenejábuga. Ítara jáña queísi jouniri mudún ja jóunguarügübei jóunigiragua. Ítara jáña queísi juánriñu magánati dúna le lanügübei garábali, tídibu wéwe to magínduntu lídan tidáani, ítara jáña queísi tídibu wéwe to ájulutu láu sun tílagüle, úaali ju jamá. 13 Ítara jáña queí lanárima buri lugúdi barána, arúfudei jagáburigu le nibúsigaridünati quei jacútaü. Ítara jáña quei warúguma buri ja féridi jamáali jémeri, íñarawagúaaña lun jeréderun lídan líwurin-ágei lubúriga lun sun dan.

14 Enóc gíñe le jasédün gürígia lárigiñe Adán, adímurejaali dimúrei lúmagiñe Búngiu jawágu arúfudajatiña yéetiña ja dan le laríñagunbei. “Arija numúti Nabúreme liábin jáma sarágu mílu jádaangiñe láni ánjeligu 15 lun lagúseragüdüniña sun ja wuríbabaña luágu sun wuríbani le adüga jamáalibe, lúma luágu buri dimúrei deréti le aríñaga jamáalibe luágu. Lasiadirubaña sun gafígountiña jagía luágu le jadügübei.” 16 Arúfudajatiña yéetiña jagía ja jagánaguabaña, magúfurumaditiña, ganígi jagía jadímurejan luágu cátei le jadügübei ámu, lún rügüñein jagúnfulirun lúma lagübüri jayúmajan jabúseera. Aríñagatiña dimúrei buri íñuguti, adímureja jagía buíti jawágu buri gürígia lún rügü jaságarun cátei buíti jóungua jádaangiñe.

Lererún joun afíñetiña

17 Jugúyati nidújeñu jínsiñetiña nun, jarítagua jumá luágu le laríñagubei Jesucristu jádaangiñe láni apóstolugu luágu buri cátei le lúnbei lasúserehun. 18 Jaríñajare. “Lídoun buríme lagúmujoún dan, añájeinbaña gürígia éjerajatiña láu buri cátei le láni Búngiu, agánawa jagíame úaragua lúma jagúndan le wíyebei.” 19 Jadüga buri ja, níjein lubei fánreinguaü, falá jamuti jagúndan le lánina ubou, úati Sífiri Sándu jádan.

20 Ánjaün jugúya, nidújeñu jínsiñetiña nun, derégüdagu méme jumá lídan jafíñen le jarúmabei. Ayúmuragua jumá lun Búngiu láu lubáfu Sífiri Sándu. 21 Mabúlieida jumei luágu jínsiñe jumá lun Búngiu, agúraba jumei wéyu le lúnbei líchuguni Wabúreme Jesucristu íbágaru magúmuchaditi woun láu lugúdemejabu.

22 Afíñegüda jumáña ja louguabaña afíñe. 23 Sálba jumáña jíbiri gu camá jamuga jaságaruñanu lídaangiñe wátu geméti lánina máfiougati, gudéme jamá jíbiri gafígountiña jun, láu sun, goúnigi jumá luei jadügüni wuríbani le jadügübei, iyéereegulá jaríban jun queísi gamísa wíyetu, luei gíñe jeíguadun lídoun luríban úma quei jagía.

Lagúmujoún buri ladímurejoún luágu luweírigan Búngiu

24-25 Búngiu le ábanrügübei, le sábiubei, le Wasálbaragüle lídaangiñe Wabúreme Jesucristu, gabáfuti lun loúnigirunün luei jeíguadun lídoun figou, lun gíñe larúfudunün jarúmañu, buin láu ugúndani ligíbugiñe, le weírigubei. Rúwalá íñuguni lun, lúma uweíriguni, ubáfu lúma gumádi lídaangiñe Wabúreme Jesucristu, méja, guetó, lúma súnwandan. Ítaralá.

CÁTEI LÉ BURI LARÚFUDUBEI BÚNGIU LUN JUAN

Cátei arúfudúati buri lun Jesucristu

¹ Niján buri cátei le larúfudubei Búngiu lun Jesucristu lun lasúbudiragüdüni joun lánigu cátei lé buri lúnbei lasúseredun madíse. Subúdigüda láali Jesucristu cátei le lun Juan le esériwidubei lun, láu loúnajani láni ánjeli lúmoun lun larúfuduni lun. ² Aríñaga láali Juan inárüni luágu sun le laríjubei, geféenti luágu láni Búngiu ugánu lúma luágu le aríñaga láalibei Jesucristu.

³ Gúndaatiña güriá ja alíjabin jáma ja agáambubalin laliijóun ugánu le, le erésibirúabei lúmagiñe Búngiu, adüga jagía gásu láu cátei le bürüwañubei ya, ladüga yaráfaali dan lun lasúseredun.

Labürüjan Juan joun tılana sédügubei liglisi

⁴ Áu Juan, nabürüjaña joun tılana sédü liglisi to Ásiaboun. Resíbi jumá abíniruni lúma darángilaü lúmagiñe Búngiu le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan. Resíbi jumá giñe abíniruni lúma darángilaü jámagiñe sédü espíritugu ja ligíbugiñebaña lála, ⁵ lúma lúmagiñe Jesucristu le aríñagubalin cátei le inárüti, le furúmiñebebei ásaaruti lídaangiñe ouweni áni gabáfu ligía jawágu urúeigu ja ubouágubaña. Jínsiñetiwa lun Cristu, áni chibá laadiwa lídaangiñe wafígoun láu líta, ⁶ adüga láadiwa urúeigumé lúma fádirigumé lun wesériwidun lun Lubúngiute, le méme Lúguchibe. ¡Rúalá uweíríguni lúma ubáfu lun, lun súnwandan! Ítaralá.

⁷ ¡Aríja jumá, liábinba Cristu juánriñurugu, jaríjubei sun güriá ásta giñe ja áfarubalin! Jayájuba sun güriá ja ubouágubaña dánme le jaríjini luágu wuríbani le adüga jamáalibe. Ítara lúba.

⁸ “Áu lagúmesejabe sun cátei, áu lagúmuchagülebei, quei létüra ‘A’ lúma ‘Z’”, líña lariñagun Búngiu le Súnti Gabáfu, le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

Layáwadagun Cristu lun Juan

⁹ Áu Juan, jidúje lueigiñe Jesucristu áu, gafánraantina júma lídan larúeijan Búngiu, súfurijadina úara júma luágu Cristu, resíbijadina giñe gurásu lúmagiñe Cristu. Reídeitina adaürüwa luágu ubouju le giribei Pátmos lueigiñe napúrichijani Lerérun Búngiu, lúma lueigiñe napúrichijan luágu Jesucristu. ¹⁰ Luágu ában wéyu dimáasu, ába neréderun lábugiñe lubáfu Sífiri Sándu, ába nagáambun ában umálali reínti nanáangiñe quei lumálali fídu, ¹¹ lariñaga umálali ligía nun.

—Áu furúmiñebebei lúma agúmujoúni, quei létüra ‘A’ lúma ‘Z’. Abürüjabeí sun le baríjubei, ábame bouñajanun gárada tugúya joun tılana sédü liglisi to loubawaguboun Ásia. Éfeso, Esmírna, Pérgamo, Tiatúra, Sárdis, Filadélfia lúma Laodíceá.

¹² Ába nagáraragun lun naríjin ca lan adímurejabeí nun, ába naríjin sédü lébu sanúdelu gólu, ¹³ labádinagua sédü lébu sanúdelu ligía ába naríjin ában camá jamuga Wügüri Garaüwarügüti—le Jesucristubei—táu ában anáanguni chÜlütu luágun lugúdi, lúma ában béliti gólu yaráfa lun

laníguagu. ¹⁴ Jarúti lídiburi quei líyu mudún, quei mouúru, ítara líña lágu quei wátu geméti. ¹⁵ Miríti lugúdi quei brónse le íríchawagúaaali, le dáwaali lídoun órno, reínti lumálali quei lireín leíbaagun sarágu dúna. ¹⁶ Níñanu sédü warúguma lídan lújabu le loúnwenren, níñoun ában efeín gágiritu liyúmulugugiñe, biángua tamána. Ítara líña ligíbu quei wéyu dan le lásüdün láu sun lére.

¹⁷ Dan naríjnbalin, ába náburujan lubádu lugúdi camá jiláadina. Ába líchuguni lújabu le loúnwenren nuágu, ába laríñagun nun.

—Manúfudedaguabá, áu le lagúmesejabei sun cátei, áu lagúmuchaja. ¹⁸ Áu le wínwanbei, jilátina, guetó wínwantina lun sun dan. Níjein ligélen ouweni núma, lúma ligélen fulásu le ní jabei jiláguaaña. ¹⁹ Abürüjabei lubeíti le baríjubei, le guetóbei lúma le lúnbei liábin. ²⁰ Niján laníchigubei jawáguti sédü warúguma ja baríjubaña lídan nújabu le noúnwenren, lúma sédü lébu sanúdelu gólu. sédü warúguma, jagía sédü jouniri tílana sédü ligílisi, sédüti lébu sanúdelu, jagía sédü ligílisi.

2

Ugánu joun tílana sédü ligílisi. Ugánu joun tílana ligílisi Éfeso

¹ ‘Babürüja lun jouniri tílana ligílisi to Éfesoboun, baríñagame lun lun laríñagun joun gürígia jagía. “Ítara líña nariñagun, áu le jáubei sédü warúguma lídan nújabu le noúnwenren, le gíñe eíbugubei labádinagua sédü lébu sanúdelu le gólu. ² Subúdi numúti sun le jadügübei, subúdi numúti lidére juwádigimari lúma jagúraasun, áni subúdi numúti luágu siñá lan jáfaguniña ja wuríbabaña. Subúdi numúti luágu jóuchagua jumáaña lan ja aríñagubaña luágu apóstolugu jamá áni máma apóstolugu jagía, áni darí jumaali luágu ye jamá. ³ Gagúraasunjadün, áni súfuri jugúya sarágu lídan juwádigimari nuágu, mabúcharunga juágu. ⁴ Láu sun líra, níjein ában cátei jadúga magúndaantina láu. maweírinjali nínsiñe jun quei meja furúmiñe. ⁵ Ligía lubeíti, jarítağa jumá ída jíña lán meja, sáansi jumeí jigáburí, adúga jumeí cátei lé meja jadügübei furúmiñe. Ánjein madügün jumá ítara, nídinba juágu furése, ábame nagídaruni lébu jisáandelun lídaangiñe lufúlasun, ábame mámaadün lan tílana nilígílisin, ánjein gubeírügü jasáansira jigáburí, ligíaba madügün náni ítara. ⁶ Láu sun líra, luáguñein jáni fuleísei, liyéeregun cátei lé buri jarúfudajabei nicoláitagu jun lúma buri cátei le jadügübei, le gíñe iyéreegubei nun. ⁷ Le garígeirugubei lun lagaámbun, agáambaleí le laríñagubei Sífiri Sándu joun tílana buri ligílisi. Ja ásiiragúbalin wuríbani, neígagüdübaña lídaangiñe lin tídi bu wéwe to lánina íbágarí, to lufúlasunruguboun Búngiu.”

Ugánu joun tílana ligílisi to Esmírnaboun

⁸ ‘Babürüja lun jouniri tílana ligílisi to Esmírnaboun, baríñagame lun lun laríñaguni joun gürígia jagía. “Ítara líña nariñagun, áu le furúmiñeti lúma agúmujóuni, lé meja ouwebei áni wínwanyaali. ⁹ Subúdi numúti sun le jadügübei, subúdi numúti jasúfurirun lúma jugúdeme, láu sun lídan lan linárün cátei, rísi jumá. Subúdi numúti gíñe luágu adímureja jamá ja aríñagubaña luágu juríu jamá wuríbati juágu, máma ámu cátei jagía lueídügüya lánigu jamá Máfia. ¹⁰ Manúfude jumá lueí le lúnbei jasúfuriruni, ládaraguba Máfia fiú jídaangiñe furísunrugun lun loúchawagúniwa jafíñen sun jugúya, áni jasúfuriruba sarágu luágu díisi wéyu. Derégúdagu jumá

lidan jafiñen nuágu darí jounwen, ábame níchuguni ibágari magúmuchaditi jun, jafáyeiruájame. ¹¹ Le garígeirugubei lun lagáambun, agáambaleí le lariñagubei Sífiri Sándu joun buri tílana ligílisi. Ja ásiiragúbalin wuríbani, másügürünbaña lídaangiñe libíaman ouweni.”

Ugánu joun tílana ligílisi to Pérgamoboun

¹² ‘Babürüja lun jouniri tílana ligílisi to Pérgamoboun, bariñagame lun lun lariñagun joun gürígia jagía. “Ítara líña nariñagun, áu le gámabarun efeín to gágiriboun, to biánguaboun amána. ¹³ Subúdi numúti sun le jadügübei, subúdi numúti giñe luágu Máfia lántima gabáfubei jádan gürígia ja ñi lubei jagánawa, áni láu sun líra, númamemeñadün. Mígirun jumágili jafiñen nuágu, ni íbini lidan dan le láfarúnbei Antipás le geféenbei buíti nuágu ñi lidan fulásu le ñi jubei, le ñi lubei lagúmadija Máfia. ¹⁴ Láu sun líra, níjein buri cátei jadüga, magúndaantina láu. luágu añájein lan fiú gürígia júma yára Pérgamo ja májabaña jígiruni cátei lé meja larúfudajabei Baláam, le íchugubei dimúrei lun Balác lun lafigoungüdüniña Israelítagu láu jeigin eígini le adágarawagüdüti joun sándu, lúma láu jabágaridun lidan salúfuri. ¹⁵ Ítara méme giñe, añájein ja májabaña jígiruni cátei lé buri jarúfudajabei nicoláitagu júma ñi, cátei le iyéreegubei nun. ¹⁶ Ligía, sáansi jumei lubei jigáburi, ánjein madügün jumá ítara, nídiba juágu madíse, ábame nageíndagun jáma gürígia ja adügübalin cátei buri le, táu efeín to áfuriduboun niyúmulugugiñe. ¹⁷ Le garígeirugubei lun lagáambun, agáambaleí le lariñagubei Sífiri Sándu joun buri tílana ligílisi. Le ásiiraguti luágu wuríbani, neígagüdüba lídaangiñe maná le arámudúañubei lun lun líchugun érei tun luwáni, ábame níchugun ában dübü jarúti lun láu ában íri iséri búrwañu luágu le ibídiñeti ni ca un lueídügüya lun le erésibirubalin.”

Ugánu joun tílana ligílisi to Tiatíraboun

¹⁸ ‘Babürüja lun jouniri tilana ligílisi to Tiatíraboun, bariñagame lun lun lariñagun joun gürígia jagía. “Ítara líña nariñagun, áu le Liraü Búngiu, le ítarabei águu quei wátu geméti, liábin lugúdi quei brónse le írichawagúaaali. ¹⁹ Subúdi numúti sun le jadügübei, subúdi numúti jísiñejabu, jafiñen, jesériwidun láu jugúraasun, subúdi numúti giñe luágu jadügüña lan cátei buíti guetó luei meja furúmiñe. ²⁰ Láu sun líra, níjein ában cátei jadüga magúndaantina láu. Jígirunun Jezabél to ariñaguboun luágu proféta tan áni máma líña, lun teyéeduniña gürígia láu tarúfudajan joun nánigu lun jaganoun lidan salúfuri lúma lun jeigin eígini le adágarawagüdüti joun sándu. ²¹ Rújadina dan tun lun tasaansiruni tigáburi, májagiru tígiruni tisálufurin. ²² Ninárün jáu luágu náburugúdaaru lan láu sándi lun jasúfurirun ja adáagubaña salúfuri túma ánjein mígirun jamá jadáaguni cátei lé buri tadáagubei, ²³ ábame náfaraguniña tirájüñü jílagubei, ítara lúba jasúbudiruni sun nánigu luágu subúdi náni lében arítagni lúma tében anígi, ábame nafáyeiruni cára ában jídaangiñe según le ladügübei. ²⁴ Ja jíbiri ja Tiatíraña, ja mafálarubalin arúfudajani ligía, machülügiña giñe asúbudirei le únbei jagúara lujúlilin láni Máfia cátei le arámudaguabei, míchubadina ámu anügüni jawágu. ²⁵ Ragújumei lubúidun jigáburi darí niábin. ²⁶ Ja ásiiragúbalin wuríbani, adüga méme jameíme le nabúseerúbei ladügün darí lun jounwen, níchuguba ubáfu joun luágu buri fulásu, ²⁷ ítara quei líchugun Núguchi Búngiu ubáfu nun. Ábame jedéraagüdüni jagúmadiruni fulásu buri quei láu ában murúsun gürábu, ábame jamúrugudaguni wuríbani queísi soudíeru le

láuti múa. ²⁸ Níchuguboun gíñe warúguma to lánina bináafin joun. ²⁹ Le garígeirugubei lun lagáambun, agáambaleí le lariñagubei Sífiri Sándu jóun buri tílana ligílisi.”

3

Ugánu joun tílana ligílisi to Sárdisboun

¹ ‘Babürüja lun jóuniri tílana ligílisi to Sárdisboun, baríñagame lun lun lariñagun joun. “Ítara líña nariñagun, áu le jáubei sédü espíritugu láni Búngiu jáma sédü warúguma. Subúdi numúti sun le jadügübei, subúdi numúti luágu jiláñu jíña lan lún buri cátei le nuáguti, láu sun aríñawagúala lan luágu wíñwan jumá. ² Agágudúa jumá, rújuma érei lún buri cátei le níjeinguabei, lubáragiñe loúnwen, aríja náali luágu múaran lan le jadügübei ligíbugiñe Búngiu. ³ Jarítaqua jumeí lubeíti le arúfudajoúbei jun, falájumei, sáansi jumeíme jigáburyi. Anjaün magágudun, nídba juágu quei liábin ában jíweruti íbídiñoun óra jun. ⁴ Láu sun líra, añájein fiú gürígia jagánagua ñi Sárdis ja múaradungiñábaña lúma wuríbani, jagía jeíbuguba numa táu anáanguni jarútu ladúga yúuti joun. ⁵ Ja ásiiragúbalin wuríbani, jadáuraguba anáanguni jarútu, áni magídarun nubeí jíri tídaangiñe líburu to gáubalin jíri ja lúnbaña jabíjini íbágarí magúmchaditi, arúfudarügü nubáña quei nánigu ligíbugiñe Núguchi Búngiu lúma jagíbugiñe láni ánjeligu. ⁶ Le garígeiruguti lun lagáambun, agáambaleí le lariñagubei Sífiri Sándu joun tílana buri ligílisi.”

Ugánu joun tílana ligílisi to Filadélfiaboun

⁷ ‘Babürüja lun jóuniri tílana ligílisi to Filadélfiaboun baríñagame lun lun lariñagun joun. “Ítara líña nariñagun, áu le sándubei, le gíñe inárünibeí, le gámabalin ligélen urúei Davíd, le úabei ni ában gayáraati ladáuruni le nánjunrenchubei, siñá lánjunrenchuni ni ában le nadáurubei. ⁸ Subúdi numúti sun le jadügübei. Rújadina ában béna júnren jigíbugiñe le lásiñerun ni ában adáura, ladúga láu sun lougua lan jére, adúgaadün gásu láu nugúmadin, áni meyéeraguntün luágu nánigu jumá. ⁹ Aríja jumá, nadügüba lun jayábin lánigu Máfia ja yéebaña, ja aríñagubaña luágu juríu jamá áni mabágariduntiña queísi lánigu Búngiu, ábame nájuduraguagüdüniña jigíbugiñe lun jasúbudiruni luágu jugúya lan numútuniñabaña jínsiñetiña nun, ninárün jáu. ¹⁰ Areída jumáali nugúmadin lun gagúraasun jumá, ligía nareídubadün lubeí lueí lidáani ouchwagúni le lúnbei liábin luágu sun ubou lun jouchúniwa sun ja ubouagubaña. ¹¹ Madísebeí niábin, mígra jumeí ni ában lun lagídaruni jafiñen nuágu, meféridirun jumámuga ni cátei lídaangiñe le lúnbei níchuguni jun. ¹² Ja ásiiragúbalin wuríbani, níchugubaña quei wagábu tídan Lúban Nubúngiute, máfuridundügüyaañame ñígiñe, ábame nabürüdüni líri Nubúngiute jawágu lun lasúbudirúniwa luágu lánigu jamá, lúma líri ubúrugu le láni Nubúngiute, le iséri Jerusalén le ñúbinbei siéluigiñe lúmagiñe Nubúngiute, nabürüdübei gíñe iséri níri jawágu. ¹³ Le garígeiruguti lun lagáambun, agáambaleí le lariñagubei Sífiri Sándu jóun buri tílana ligílisi.”

Ugánu joun tílana ligílisi to Laodicéaboun

¹⁴ ‘Babürüja lun jóuniri tílana ligílisi to Laodicéaboun, baríñagame lun lun lariñagun joun. “Ítara líña nariñagun, áu le inárünibeí, le gaféenbei buídu, le aríñagubalin inárüni, le ídaangiñebei liábin sun cátei le ladügübei

Búngiu. ¹⁵ Subúdi numúti sun le jadügübei, subúdi numúti luágu madíli jumá lídan jesériwidun nun, másü jugúya. ¡Dilígubeijadün jamúga o sùjuma! ¹⁶ Quei bachárügü jubeí, madílitün, másü, newérejabadün niyúmulugugiñe. ¹⁷ Aríñagatün luágu rísi jumá, luágu buídu lan dan jun, luágu memégeirun jumá ni cáta, áni maríjin jumúti luágu fugiábu jumá, gudémetün, maríjintün, surúsu jíña. ¹⁸ Ligía níchugunbei dimúrei jun lun jagáñijan gólu le afínujóuaali láu wátu geméti númagiñe, lun rísi jumá le tímatimaati, lun giñe jagáñijan anáanguni jarútu núma lun jadáuragun láu jasúrusujan, lúma árani lun jíchuguni lídoun jágu lun jaríjin. ¹⁹ Ébecha numútiña ja jínsiñebaña nun láu idérei, arúfudaja áu joun. Lúnti lubeíti sériu jumá, sáansi jumeíme jigáburí. ²⁰ Anája bénabu, nagúajaña, le agáambuti numálali, ába lánjunrenchuni béna nubá, nebéluruba lúmoun, ábame neígin lúma, jou ligíame núma. ²¹ Ja ásiiragúbalin wuríbaní, níchuguba ubáraü joun númagua luágu nála le lála urúei, ítara quei násiiraguni wuríbaní, ába nañúurun lúma Núguchi luágu lála. ²² Le garígeiruguti lun lagáambun, agáambaleí le laríñagubei Sífiri Sándu joun tílana burí ligíli.”

4

Ájuduraguni lun Búngiu, siélu

¹ Lárígiñe sun cátei le, ába naríjin ában béna júnren siélu, liábinti umálali le ítarahei quei lumálali fídu, lé buga adímurejabei nun, ába laríñagun nun.

—Weínba ñájoun, narúfudaali cátei lé burí lúnbei lasúseredun lárígiñe burí le bun.

² Lídan óra ligía, ába neréderun lábugiñe lubáfu Sífiri Sándu, ába naríjin ában lála urúei siélu láu Búngiu ñun luágu. ³ Ítara líña camá ában dübü mirítí, le jáspe o cornalína, ñíñoun ában jerémuuru geyégu láu jalaü ligía, mirítu quei ában dübü le esmerálda. ⁴ Geyégu láu lála urúei ligía aríjayatina ában wein-gádürü lála urúei, ñíñanu wein-gádürü güriá ja weirigutiña ñun luágu, táu jadáuragun jarútu lúma rídi gólu jábulugu. ⁵ Lueígiñe lála Búngiu ligía áfurijati labírijanouga lúma wayújururu, ligíbugiñe lála, ñíñein sédü lámpu geméñu, jagía sédü láni Búngiu Espíritugu. ⁶ Níñein giñe ában cátei ligíbugiñe lála camúga ában barána le láuti bídiriu jarúgoungati.

Lamídaangua, geyégu láu lála Búngiu, ñíñanu gádürü cátaña gabágaritiña buin láu águu, dándu jagíbugiñe quei janáangiñe. ⁷ Le furúmiñeti jádaangiñe, ítara líña quei ában líñún, le jabíaman, ítara líña quei ában bágasu wügüri, le jürüwan, ítara líña ligíbu quei ligíbu ában wügüri, le jagádürün, ítara líña quei ában ágila ájamajatu. ⁸ Gádürügubei jagía, sísiñein arúnaü luágu cáda ában jádaangiñe, buin jáña láu águu jawágu, dándu bougudigiñe quei múnadagiñe jabíti, wéyuagu áriebru jáu agúaraja.

Sándu, sándu, sándu,

Wabúreme Búngiu, le Súnti Gabáfu,

le wínwanbei lúmagiñe lubáragiñe furúmiñeti dan, wínwan ligía guetó, wínwan ligíame sun dan.

⁹ Ságüti jíchugun cátaña gabágaritiña ja inébesi lúma eteíngiruni lun Búngiu le ñúnbei luágu lála, le gabágaríbei lun sun dan, ¹⁰ ábaja jájuduragun wein-gádürü weíyaaña mútu jagía ligíbugiñe, ába jarúfuduni jínsiñejabu lun Búngiu le gabágaríbei lun sun dan, ába jíchuguni jarídin ligíbugiñe, ába jagúarajan.

11 Wabúreme, Wabúngiute, garíchatibu lun berésibiruni uweíriguni, inébesei, lúma ubáfu, ladüga Amürü adügübalin sun cátei, láu bugúndan badügei, láu gíñe bugúndan níjein lubei sun le níjeinbei.

5

Líburu lúma Mudún

¹ Ábati naríjin ában líburu lújaburugu Búngiu le ñúnbei luágu lála, abürüjóuatu líburu tugúya turágeirugu lúma tigíbuagu, darúatu láu sédü séyu. ² Ába naríjin ában ánjeli gabáfuti, ába lálügüdajan láu umálali reinti.

—¿Ca garíchabei lun ladáranunun líburu lúma lun lajeíridunun tiséyun?

³ Úati ni ában garíchatu lun ladáranunun líburu tugúya, ni íbini lun laríjin tuágun, ni siélu, ni múarugu, ni lábugiñe múa, úati ni ában garíchatu. ⁴ Ába nayájun sarágu ladüga úa lan ni ában garíchatu lun ladáranunun líburu tugúya, ni lun lalíjanun, ni íbini lun laríjinun. ⁵ Ábati laríñagun ában jádaangiñe weíyaaña mútu nun.

—Jebé bayájun, ladüga Jesucrístu, le “liñún” le jádaangiñebei ladügawagun Judá, le linébaanfan urúei Davíd, sirígua láali wuríbani lun gayára lan ladáranunun líburu lúma lun lajeíriduni sédü tiséyun.

⁶ Lamídaanguati lála Búngiu jáma gádürü cátaña gabágaritiña jagía jáma weíyaaña mútu jagía, ába naríjin ában Mudún rára, camá jamuga áfarúaaali. Sédüñein ligáanchun, sédü lágu, águu buri ligía, láni Búngiu sédü Espíritugu ja oúnajoúbaña lídoun sun ubou. ⁷ Ñúbinti Mudún ligía, le Jesucrístubei, ába lanügünun líburu tugúya lújaburugugiñe Búngiu. ⁸ Dan le lárügüdünbarun líburu, ába jájuduragun gádürü cátaña gabágaritiña jagía jáma wein-gádürü weíyaaña mútu jagía ligíbugiñe. Cáda ában jádaangiñe weíyaaña mútu jagía, ñíñoun ában gidára lúma, lúma cópu le gólu buin láu cupáli, le liyáwabei jayúmuragun lánigu Búngiu. ⁹ Niján urému iséri le jerémujabei.

Garíchatibu lun banügünun líburu, lun bajeíridunun tiséyun, ladüga áfarúa ban, ába bagáñijaniña gürígia lídaangiñe sun rása, sun luwúyeri dimúrei, fulásu lúma néchaani.

¹⁰ Adüga báña urúeigumé jáma fádirigumé

lun jesériwidun lun Wabúngiute,

lúma lun jagúmadijan ubouágu.

¹¹ Lídan le nariágun, ába nagáambuni jamálali sarágu ánjeligu geyégu láu lála lúma geyégu jáu cátaña gabágaritiña jagía, jáma weíyaaña mútu jagía. Ñíñanu míñun míñun ánjeligu, ¹² jaríñaga láu umálali jéreti.

Yúuti ubáfu lúma irisini, subúdi lúma érei,

uweíriguni lúma inébesei, lúma eteíngiruni lun Jesucrístu, Mudún le áfarúbei.

¹³ Agáamba numúti gíñe jaríñaguni sun cátei le ladügübei Búngiu siélu, le múarugubei, le lábugiñebei múa, lúma le baránajabei, lúma sun cátei lé buri lídaanbei.

Rúalá eteíngiruni, inébesei, uweíriguni, lúma ubáfu

lun Búngiu le ñúnbei luágu lála,

lúma lun Mudún, lun sun dan.

¹⁴ Ába jaríñagun gádürü cátaña gabágaritiña jagía.

—¡Ítaralá!

Ába jájuduragun wein-gádürü weíyaaña mútu jagía ligíbugiñe le gabágaribei lun sun dan.

6

To sédù séyu

¹ Ábati naríjin dan le lajeiridúnbarun Mudún furúmiñetu tídaangiñe sédù séyu tugúya, ába nagáambun laríñagun ában jádaangiñe cátaña gabágaritiña jagía láu ában umálali camá lumálali wayújururu.

—¡Jigábu baríja!

² Ába naríjin ában gabáyu jarúti, le waríñubei luágu, ñíñoun ában arco lújaburugu to áuboun lageíndagua. Rúati ában rídi lánina ásiiraguni lun ladüga lúnbei lan lagáñeiruniña láganiñu. Furíti ageíndagua, ába lásiiragun lídan sun cátei.

³ Dan lajeiridunbarun Mudún tibíaman séyu, ába nagáambun laríñagun jabíaman cátaña gabágaritiña jagía.

—¡Jigábu baríja!

⁴ Ába láfuridun ában gabáyu funáti, ába líchugúniwa ubáfu lun le waríñubei luágu gabáyu ligía lun lagídaruni darángilaü ubouáguigiñe, lúma lun láfaraguágüdüniña wügüríña jámagua jilágubei, ába tíchugún ában ouñwenbun efeín lun.

⁵ Dan lajeiridúnbarun Mudún türüwan séyu, ába nagáambun laríñagun jürüwan cátaña gabágaritiña jagía.

—¡Jigábu baríja!

Ába naríjin ában gabáyu wuríti, ñíñein ában baláansu lújaburugu le waríñubei luágu. ⁶ Ába nagáambun laríñagun ában umálali jamídaanguágiñe cátaña gabágaritiña jagía.

—Ábanrügüla kilo türígu luágu lebégi ában wéyu wadágimanu, ürüwa kilo sebáda ligía méme ebégi, áni touñigi jumeíme aili lúma bínu buídu.

⁷ Dan lajeiridúnbarun Mudún tigádürün séyu, ába nagáambun laríñagun jagádürün cátaña gabágaritiña jagía.

—¡Jigábu baríja!

⁸ Ába naríjin ában gabáyu amariyu, le waríñubei luágu, ouweni líribei, lárigi lárigi liábin jafúlasun jiláaña. Ába libíjin ubáfu luágu ligádürün murúsun lídaangiñe ubou lun láfarajan láu wuríbu, láu ilámaü, láu sándi, lúma jáu anímaalugu janárimetiña ja ubouáguabaña.

⁹ Dan lajeiridúnbarun Mudún tiseíngün séyu, ába naríjinun jawáni ja áfarawagúbaña lueígiñe japúrichijani Lerérun Búngiu, lúma luágu jadímurejan buíti luágu Jesucrístu, lábugiñeñanu latárü. ¹⁰ Jaríñaga láu umálali jéreti.

—¿Darísan ídame, Wabúreme le gúnfuliti láu lerérun, darísan ídame bagúseragüdaña ja mísiñejabúbaña bun ubouágu, luágu wounwen? ¿Ídamésan bafáyeigüdaña luágu jáfaruníwa jilágubei?

¹¹ Ába jabíjin anáanguni jarútu, ába laríñawagún joun lun jeméraagun luágu murúsun dan dari jóústarun jabíriña lídan esériwiduni lun Crístu ja lúngiñabaña jáfarawagúniwa quei jagía.

¹² Lídan le naríjinbei, ába lajeiridunun Mudún tisisin séyu, ába ladágarun ában ouñwenbun járbaganáli. Ába láuridun wéyu quei lúdu, ába láfunadun játi camá jitaü, ¹³ ába jeíguadun warúguma ja siélubaña lun múarugun quei táburujan mángu tueígiñe tídibu dan le lánjingichunun garábali.

14 Ába lagúmuchagun siélu quei ában gárada dan le tabáruchawagún, ába ladiñuragunga sun wübü lúma ubouju lídáangiñe jabára. ¹⁵ Ába jarámudagun urúeigu ja lánina ubou lídan júyu lúma buri labádinagua dübü le luágubei wübü, úara jáma ja weírígubaña, gurúnelugu, rísitiña, gabáfutiña, jáma sun idámuni, jáma wügüríña ja mabúremetiña. ¹⁶ Jaríñagati lun wübü lúma lun dübü.

—Jeígua jumá wawágun, arámuda jumáwa luei laríjin Búngiu le ñúnbei luágu lála, lúma luei lanárime ligáñi Mudún.

¹⁷ Chülújali weíríti wéyu le lúnbei larúfuduni Búngiu ligáñi. ¿Cábasan gayára lawánduni?

Seíni jawáguti Israelítagu

7

¹ Lárigiñe sun cátei le, ába naríjin gádürü ánjeligu rára luágu gádürü larígei ubou, ágüdaajei gádürügubei garábali lun máfurun lan ni murúsun luágun múa, ni luágun barána, ni luágun ni ában tídibu wéwe. ² Aríjatina gíñe ábanya ánjeli ñübinti lueigiñe oubaü le ñígiñe lubei láfuara wéyu láu liséyun Búngiu le wíwanbei. Ába lagúaragun ánjeli ligía láu umálali jéreti joun gádürü ánjeligu ja abíjubaña ubáfu lun jadügün wuríbani lun múa lúma barána.

³ —Madüga jumá wuríbani lun múa, ni lun barána, ni lún buri tídibu wéwe daríme wíchuguni liséyun Búngiu luágu jerébe lánigu.

⁴ Agáamba numúti átiriñanu lan. san bián-wein-gádürü mílu jádaangiñe linébaanfaangu Israel.

⁵ Dúusu míluñanu jádaangiñe ladügawagun Judá,

dúusu mílu jádaangiñe ladügawagun Rubén,

dúusu mílu jádaangiñe ladügawagun Gad,

⁶ dúusu mílu jádaangiñe ladügawagun Áser,

dúusu mílu jádaangiñe ladügawagun Neftalí,

dúusu mílu jádaangiñe ladügawagun Manasés,

⁷ dúusu mílu jádaangiñe ladügawagun Simeón,

dúusu mílu jádaangiñe ladügawagun Leví,

dúusu mílu jádaangiñe ladügawagun Isacár,

⁸ dúusu mílu jádaangiñe ladügawagun Zabulón,

dúusu mílu jádaangiñe ladügawagun José,

jáma dúusu mílu jádaangiñe ladügawagun Benjamín.

Sarágu gürígia jarútu jadáüragun

⁹ Lárigiñe cátei le, ába naríjin sarágu gürígia lídaangiñetiña sun fulásu, sun rása, sun luwúyeri dimúrei lúma néchaani, rára jáña ligíbugiñe lála Búngiu ligíbugiñe Mudún. Gíbetiña gürígia jagía darí lun siñá lan jabájüdün, jarútu jadáüragun táu tubána fáluma jájaburugu. ¹⁰ Ába jagúarajan sun jagía láu umálali jéreti, ába jaríñagun.

Weíríti Búngiu, le ñúnbei luágu lála,

weíríti Mudún, luágu asálbaruni le rújamaalíbei woun.

¹¹ Rára jáña sun ánjeligu geyégu láu lála lúma geyégu jáu weíyaaña mútu, jáma gádürü cátaña gabágaritiña jagía, ába jelémuchun dagá jagibu múarugu ligíbugiñe Búngiu, ába jájuduragun lun, ¹² ába jaríñagun.

¡Ítaralá! Rúalá uweírigu, lichú áu, eteingiruni, inébesei, ubáfu lúma érei

lun Wabúngiute lun sun dan. Ítaralá.

¹³ Ábati lálügüdünina ában jádaangiñe weíyaaña mútu jagía.

—¿Cátañasan ja, ja jarúbaña adáüragan? ¿Jalágiñésan jayábin?

¹⁴ Nariñaga lun.

—Amürü jamúga aríñagei nun.

Lariñaga nun.

—Ja súfuriñaña sarágu ja, ja chibá jamaalbei jafígoun láu líta Mudún, jarúmagüda jamóun janígi láu. ¹⁵ Ligía ligíbugiñeñanu lubeí lála Búngiu esériwida lun, wéyuagu áriebu tídan lúban to siéluboun, loúnigirubaña Búngiu láu leréderun jáma. ¹⁶ Máfagun jáñame ilámaü, ni mágürabu, másürün láñame wéyu, mañáurijan láñame láruga, ¹⁷ ladüga loúnigirubaña lan Mudún le lubádubei lála Búngiu, ábame lanügüniña lárún dúna le íchugubei íbágari magúmchaditi, ábame larágajani Búngiu sun águiraü lueigiñe jágu.

8

Tisédün séyu lúma lágei cupáli le gólu

¹ Dan lajeiridúnbarun Mudún tisédün séyu to tuáguboun líburu, ába ñi lan maníguaü siélu queí buri luágu dimí óra. ² Ába naríjiniña sédü ánjeligu ja ráraña ligíbugiñe Búngiu, ába líchugúniwa sédü fidu joun. ³ Lárigiñe, ábaya líábin ában ánjeli, ába laráramun ligíbugiñe latárü, ñíñein ában lágei cupáli gólu lújaburugu, ába líchugún búrübün cupáli lun, lun ladágaragüdüni úara lúma jayúmragun sun ja lánigu Búngiu ligíbuagu latárü gólu le ligíbugiñebei lála Búngiu. ⁴ Ába lamúdeirun lugúmulalin cupáli ligía úara lúma jayúmragun lánigu Búngiu lun ligíbugiñoún Búngiu. ⁵ Ábati lanügüni ánjeli ligía lágei cupáli, ába labuínchagüdüni láu leñégura wátu lídaangiñe wátu geméti le luágubei latárü, ába lachürüni luágun ubou, ába lagaambún wayújururu, ireíni, labírjaníga, lúma ában jarabaganáli.

Lé buri fidu

⁶ Ábati jaráanserun sédü ánjeligu ja láubaña sédü fidu lun jínwiruni.

⁷ Ába línwiruni furúmiñeti ánjeli lifídun, ába lasáliragun lúbara júya le deréguati lúma wátu geméti, láu giñe jítaü, ába lachágarúniwa luágun ubou. Ába lágudun lürüwan murúsun lídaangiñe ubou, ígirúati bián murúsun mágudúnti, gudáwati giñe lürüwan murúsun lídaangiñe buri tídibu wéwe lúma jiduru.

⁸ Ába línwiruni jabíaman ánjeli lifídun, ába lachágarúniwa ában cátei camá jamuga ában oúnwenbun wúbü durúnguati baránajoun, ába lasáliragun lürüwan murúsun lídaangiñe barána jítaüme. ⁹ Jiláguatiña sun úduraü ja lídaanbaña barána le asáliragubei lun jítaüme, gürínguatu giñe sun ugúnein to ñíboun lídan barána ligía.

¹⁰ Ába línwiruni jürüwan ánjeli lifídun, ába teíguadun ában oúnwenbun warúguma siéluigiñe, durúngu quei ában tóchi. Táburuja luágun lürüwan murúsun lídaangiñe dúna lúma líseesen dúna. ¹¹ Igífi tíribei warúguma tugúya, ába lagífidun lürüwan dúna, ába jóüwegun sarágu gürígia ladüga lagífidun dúna ligía.

¹² Ába línwiruni jagádürün ánjeli lifídun, ába lagürinchagun lürüwan murúsun lídaangiñe líbiri wéyu, láu sun játi, jáma warúguma. Le oúbaü le agürinchagubei jawágu, ába labúridun, marúgoungadunti wéyuagu ni áriebu.

¹³ Lárigiñe, ába naríjin ában dunúru weíríti ájamaja lamídaangua siélu, aríñageina ligía láu umálali jéreti.

—jFugiábugume ja aganóubaña ubouágu luágu úrúwa lanárimeníga lé buri lúnbei láburuja jawágun dánme jínwiruni ja jíbiri úrúwa ánjeligu jafidun!

9

¹ Ába línwiruni jaseíngün ánjeli lifidun, ába naríjin ában warúguma eíguadutu siélugiñe lun múarugun, ába líchugún ligélen júyu le mébejabei tun. ² Ába tánjunrenchuni júyu ligía, ába láfuridun gumúlali ñígiñe camá lídaangiñe ában oúnwenbun órno, ába labúrigadagüdüni gumúlali ligía wéyu lúma garábali. ³ Lídaangiñe gumúlali ligía ába jachülaagun chigángaru, ába jájamajani sun ubou, ába jabíjin chigángaru jagía ubáfu líbe jabáfu águru ja ubouágubaña. ⁴ Ába laríñawagún joun lun madügün jamá wuríbani lun jíduru le ubouágubei, ni lún buri nádü, ni lun tídibu wéwe, lueidügü joun gürígia ja úabei liseíni Búngiu jeréberugu. ⁵ Majouáti lun jáfaraguniña chigángaru jagía gürígia, lueidügü lun jásjüjaniña gürígia luágu seíngü játi, ítara líñati ligári jásjüjan quei jásjüjan águru. ⁶ Lídaanme buri wéyu ligía, jáluajabei gürígia ouweni, madárijabei, busén jagía yebéme jóúwegun, ladíseduba ouweni jaweí.

⁷ Chigángaru jagía, jenége gabáyu ja aráanseñubaña lubá wuríbu, ñíñein ában cátei jábulugu camá jamuga ában rídi le gólu, ítara líña jagíbu quei ligíbu wügüri. ⁸ Ítara líña jádiburi quei jádiburi würiña, liábin jári, quei lári liñún. ⁹ Darúgu líña jágubu láu ában cátei camá gürábu, ítara líña lamúri jarúna quei tamúri sarágu cárü to jáutu gabáyu dan le teíbaagun wuríburugu. ¹⁰ Gálitiña quei jáli águru le gágiriti. Ñíñein ubáfu luágu jáli lun jadügün wuríbani joun gürígia luágu seíngü játi. ¹¹ Ñíñein ában jábuti chigángaru jagía, le ánjeli le láni júyu le mébejabei. Abadón líribei ánjeli ligía lídan hebréo, lídan güriégu, Apolión o Agünrinchaguti.

¹² Sügüja furúmiñeti lanárimeníga, mégeigili bián.

¹³ Ába línwiruni jasísin ánjeli lifidun, ába nagáambun ában umálali lídaangiñe gádürü larígei latárü gólu le ligíbugiñebei Búngiu. ¹⁴ Ába laríñagun umálali ligía lun jasísin ánjeli le láubei fidu.

—Farára baña gádürü ánjeligu ja güráñubaña láru oúnwenbun dúna le Eufrátes.

¹⁵ Ába jafáragadún gádürü ánjeligu jagía lun jáfaragun ában jádaangiñe cáda úrúwa gürígia jilágubei, ladüga aráanserúaña lubá óra ligía, wéyu ligía, játi ligía, lúma irúmu ligía. ¹⁶ Ába nagáambuni átiriñanu lan jasúdaaranigu ja luágutiña gabáyu. bián-san míñun.

¹⁷ Ítara líña ligáburi jayáwadagun gabáyu jagía jáma ja waríñubaña jawágu nun. Ñíñein ában cátei janíguagu, funáti licólorun, dínguti, lúma amaríyu. Ítara líña jábulugu gabáyu jagía quei jábulugu liñún, áfurijati wátu geméti, gumúlali, lúma súfuru jayúmulugugiñe. ¹⁸ Ába láfaraguniña úrúwa wuríbani le áfuridubei jayúmulugugiñe gabáyu jagía ában jádaangiñe cáda úrúwa gürígia jilágubei, úrúwa wuríbani ligía. wátu geméti, gumúlali, lúma súfuru. ¹⁹ Jayúmuluguñein gabáyu jagía jabáfu, lúma luágu jáli, ítara líña jáli camá jéwe gábuluguti, láu giñe jadüga wuríbani.

²⁰ Ja jíbiri gürígia ja mouwegunbaña láu wuríbani le, mígirun meme jamúti jadáguni cátei lé buri meja jadügübei, mígirun jamei jájuduragun joun

espíritugu wuríbatíña lúma joun sándu ja gólu, pláta, brónse, dúbü, wéwe— ja siñáti jarijin, ni jagáambun, ni jebugun. ²¹ Mígirun jamei jáfarajan, jabíñarajan, jasálufurijan, lúma jíwerujan.

10

Ánjeli táu tiraüraü líburu

¹ Ábati naríjin ábanya ánjeli gabáfuti, ába larárirun siéluigiñe lídan juánriñu táu ában jerémuru lougiñe lichügü. Miríti ligíbu quei wéyu, liábin lúruna camá durúngu líña. ² Níñoun ában tiraüraü líburu junréngu lújaburugu. Ába líchuguni lugúdi le louñwenren lougiñe barána, le lubaüna lougiñe múa. ³ Ábati lagúaragun láu umálali jéreti quei ában liñún dan le láwoujan, dánti le lagúaragunbei, ába lagaambúniwa ladürügüdün sédü wayújururu. ⁴ Lárigiñe ladürügüdün sédü wayújururu ligía, ába yebe nabürüjaali lan le laríñagubei, ába nagáambun laríñagun ában umálali nun siéluigiñe.

—Maríñagabeí le laríñagubei sédü wayújururu, mabürüjabeí giñe.

⁵ Ánjeli bugáti le naríjubei lougiñe barána lúma lougiñe múa, ába liñúruni lújabu le louñwenren siélun. ⁶ ába láfiñurun luágu le gabágaribeí lun sun dan, le adügübalin ubou láu sun siélu, barána lúma sun cátei le lídaanbei, ába laríñagun.

—Úadügüyáali darásaü. ⁷ Dánme le lachülürün dan lun lagúmeserun jasédün ánjeli ínwirei lífidun, gúnfuljalíme laráansejan Búngiu lé meja arámudaguabei, quei le laríñaguni meja joun profétagu ja esériwidubalin.

⁸ Ábaya ladímurejan umálali lé buga nagáambubei siéluigiñe, ába laríñagun nun.

—Beíba, banügounme tiraüraü líburu to daráguboun, to lújaburuguboun ánjeli le rárabei lougiñe barána lúma múa.

⁹ Ába nídin, ába namúriajanun líburu tugúya lúma ánjeli ligía, ába laríñagun nun.

—Jan, jouboun, bímebei basándirunun biyúmulugu, tagífidame burágeirugu.

¹⁰ Ába nanügünun tiraüraü líburu tugúya lújaburugugiñe ánjeli ligía, ába neíginun, bímeti nasándirunun niyúmulugu camá síruudu, lárigiñe neíginun, ába tagífidun nurágeirugu. ¹¹ Ába laríñawagúniwa nun.

—Lúnti bídinya aríñagei le lúnbei lasúseredun lun sarágu fulásu, néchaani, luwúyerigu dimúrei, lúma joun urúeigu.

11

Ja bián geféentiña

¹ Ábati líchugúniwa ában mabúru nun lenége ában wéwe le amísuraagúlei, ába laríñagun Búngiu nun.

—Sarába, amísurajaboun lilígilisin Búngiu lúma latárü, abájüda báñame átiriñanu lan ja ájuduragutiña ñi. ² Mamísurajabeí бүрүрү le bougudibeí tibíti ligíli si ladüga derégewaali joun ja terénchabaña lun Búngiu, ja lúnbaña jagünrinchaguni ubúru le sándubei luágu bián-wein-bián játi. ³ Ábame nouñajan bián geféentiña lun jadímurejan nuágu luágu mílu bián-san ürüwa-wein wéyu, táu jadáüragun lúdu.

⁴ Bián geféentiña jagía, jagía gayáwabalin bián tídibu wéwe to olívo lúma bián lébu sanúdelu le ligíbugiñebei Búngiu, le Labúremebei sun

ubou. ⁵ Anjein ñi abúseerúti ladügün wuríbani joun, ába jígiragüdün wátu geméti jayúmulugugiñe, ába jáguduniña jáganiñu gumúgubei. Ítarati louweba furúmieguarügü le busénti ladügün wuríbani joun. ⁶ Gabáfutiña geféentiña jagía lun jadáuruni siélu lun májuyun lan júya sun dan niján lan Búngiu adímureja jayúmulugugiñe, gabáfutiña giñe lun jadügüni duna jítaüme, lun giñe jasúfuriragüdüni ubou láu sun luwúyeri wuríbani, ságü jabúseerun. ⁷ Dánme le gumú jamaali jawádigimari, lageíndaguba anímaalu le áfuridubei lídaangiñe júyu le mébejabei jáma, ábame jeféridiruni wuríbu, ábame láfaruniña jilágubei. ⁸ Ábame jeréderun riwágu lídan lémeri oúnwenbun ubúrugü le Jerusalén le ñí lubei ládarawagúa Jesúsu luágu gurúwa, fulásu meme le, camá Sodóma lúma Ejipto. ⁹ Ábame jaríaguniña gürígia ja lídaangiñetiña sun fulásu, sun rása, sun luwúyeri dimúrei, lúma néchaani luágu ürüwa wéyu dimí, mígirunbaña lun jábunún. ¹⁰ Ábame jagúndaaragun ja ubouagubaña láu jóúwegun, daríme lun jedéweegun cátei jámagua, le jagúndan, ladüga berése jamá meja bián lánigu Búngiu jagía joun. ¹¹ Ába naríjin, áu Juan, luágu lárigiñe lan ürüwa wéyu dimí ligía, ába láguyuguagüdüniña Búngiu, ábaya jásaarun, áni sun ja aríjubaliña, weíríti janúfudedagun. ¹² Ába jagáambun bián geféentiña jagía ában umálali jéreti siélugiñe le aríñagubei.

—Weínjuma ñájoun siélu.

Ába jamúdeirun siélu lídan ában juánriñu, aríagu jáganiñu joun. ¹³ Lídan óra ligía, ába ladágarun ában oúnwenbun jarabaganáli, ába tagúluludun ában muna tídaangiñe ságü díisi to ubúruguboun, ába jóúwegun sédú mílu gürígia ladüga jarabaganáli ligía. Ja jíbiri gürígia, ába jichugun inébesi lun Búngiu le siélubei ladüga luweirin janúfude.

¹⁴ Sügüja libíaman lanárimeníga, madísebei le ában.

Le lisédün fídu

¹⁵ Ába línwiruni jasédün ánjeli lífidun, ába lagaambúniwa laríñagun umálali buri jéreti siélugiñe.

Chülújali lidáani Wabúreme Búngiu lúma lidáani Crístu lun jarúeijan lídan sun ubou, áni jarúeijaba sun dan.

¹⁶ Ábati jélemuchunga weín-gádürü gürígia ja weírigutiña, ja ñúnbaña luágu jála le lála urúei, láu jagíbu múarugu, ába jájuduragun lun Búngiu. ¹⁷ Ába jaríñagun.

Teínqui wáña bun, Wabúreme Búngiu, amürü le Súnti Gabáfu, amürü le wínwanbei lúmagiñe lubáragiñe furúmiñeti dan, wínwan amürü guetó, wínwan amürüme sun dan.

Teínqui wamútibu ladüga ragúbaali lan oúnwenbun bubáfu. áni guméseedibu arúeija.

¹⁸ Gáñiburija néchaanigu, chülúja wéyu lun babeíjan, chülúja giñe dan lun bagúseragüdüniña jiláguaaña, ábame bíchuguni jafáyeiruaja báni profétagu joun, jáma jíbiri ja deréguabaña jóungua bun, jáma sun jawúyerigu gürígia ja íchubaña inébesi lun bíri. Chülúja óra lun bagúnrinchaguniña ja agúnrinchagubalin ubou.

¹⁹ Ábati tánjunrenchun lúban Búngiu to siéluboun, ába tarijín gáfu to lágei lidáradun Búngiu jáma lumútuniña ñi tídan lúban. Ába ñi lan labírjaníga, ireíni, wayújururu, ában járabaganáli, lúma láburujuan lúbara júya deréguati le weínamuti.

12

Würi lúma anímaalu le dragón

¹ Ábati lasáliragun ában oúnwenbun seíni siélu. ában würi darúgu líña wéyu táu camá jamuga ában dínugu, láu játi lábugiñe tugúdi, lúma ában rídi jáu dúusu warúguma tábulugu. ² Würi tugúya dageínañoun, tagúaraja láu igári le lánina agáriduni, ladüga súfuritu lun tagüriajan. ³ Ábaya lasáliragun ábaya seíni siélu. ában oúnwenbun anímaalu le dragón funáti, sédũñein lálbulugu, dísi ligáanchun, lúma ában rídi luágu cáda lálbulugu. ⁴ Ába ladúrugudun dragón ligía ában jádaangiñe ságü ürüwa warúguma láu líli, ába lajúnruniña múarugun. Ába laráramun dragón ligía tigíbugiñe würi to lúnboun tagüriajan, lun leígini tiraü dánme le tagüriajan. ⁵ Ába tagüriajan würi tugúya ában wügüri irájü le lúnbei ledéraagüdün lagúmadijan lídan sun fulásu queísi láu ában murúsun gürábu. Ába lagídarúniwa tiraü tueí, ába lanügüniwa lun Búngiu luágun lála. ⁶ Ába tanúrajan würi tugúya lídoun fulásu mageírawati le ñí lubei aráanseeli lan Búngiu ubáraü tubá, lun toúnigirúniwa ñi luágu mílu bián-san ürüwa-wein wéyu.

⁷ Lárigiñe, ába ñi lan ában wuríbu siélu, ñí lubei lageíndagua árcanjel Miguél jáu láni ánjeligu lúma dragón. Ageíndaguati dragón jáu láni ánjeligu, ⁸ ába jeféridiruni wuríbu, ába mabáraaña lan siélu. ⁹ Ába lubeíti laságarún oúnwenbun dragón, le binádu jéwe ligíra le gírubei Máfia, o Satanási, le ayéejabalin sun ubouú, siéluigiñe. Ligía jáu sun láni ánjeligu, ába jachágarún múarugun.

¹⁰ Ábati nagáambun laríñagun ában umálali jéreti siéluigiñe.

—Gáñei láali Búngiu Máfia láu luweírin lubáfu. Chülújali asálbaruni joun gürígia ubouúagun, chülújali larúeijan Búngiu lúma lagúmadijan Crístu, ladüga sagáwaali le íchugubei jadúnrun wadújeñu lueigiñe Jesucrístu, le íchigañajábei jadúnrun wéyuagu, áriebu ligíbugiñe Wabúngiute. ¹¹ Sirígua jamáali láu loúnwen Mudún, le Jesucrístubei, lúma láu jíchugun fe luágu láni Búngiu ugánu luágu asálbaragülei, manúfudeduntiña lueí jeféridiruni jabágari, aráanseñu rügütiña lun jóunwen. ¹² Gúndaalá lubeíti siélu, gúnda jumá jugúya le aganoubei ñi. ¡Áni fugiábugu ja aganoubaña ubouúagu, lúma baránaja! Ñüdünja Máfia júmoun láu oúnwenbun igáñi, ladüga subúdi lumúti luágu murúsun rügáli lan lidáni.

¹³ Dánti laríjinbei dragón luágu fíwaali lan ubouúagun, ába leíbaajanun würi tó buga agüriajaboun. ¹⁴ Ába líchugún bián larúna dunúru le weínamuti tun würi tugúya lun gayára lan tájamarun lídoun fulásu mageírawati díse lueí dragón ligía, le ñíba lubeí toúnigirúa luágu ürüwa irúmu dimí. ¹⁵ Ába lewérajan dragón ligía sarágu dúna liyúmulugugiñe lun lañáradaguagüdünun würi tugúya. ¹⁶ Ába líderagunun múa würi tugúya, ába lánjunrenchun múa, ába lachúruni sun dúna le lígiragüdübei dragón liyúmulugugiñe. ¹⁷⁻¹⁸ Gáñitimaati dragón túma würi tugúya, ába lídin ageíndagua jáma tirájüñü ja ñüdübaña láu le lubeíbei Búngiu, falájamei ugánu le láni Jesucrístu.

13

Ja mónsturugu

¹ Ába naráramun láru béya, ába naríjin lamúdeirun ában mónsturu baránajagiñe, sédüñein lábulugu, díisi ligáanchun. Níñein rídi luágu cáda ligáanchun lúma ában íri le áubei lanábaguei Búngiu luágu cáda lábulugu. ² Mónsturu ligía lenége geígusi, ítara líña lugúdi queísi lugúdi óso, liábin liyúma camá liyúma liñún. Ába líchuguni dragón lubáfu lúma lála lun, lúma sarágu ubáfu lun lagúmadijan. ³ Níñein ában chaünti luágu ában lídaangiñe lábulugu mónsturu ligía, weíriti lún yebe láfaruni jilágubei, ába lareídagun lichaüntin. Weíriti janígi sun gürígia láu mónsturu ligía. ⁴ Ába jájuduragun lun dragón luágu líchugun gumádi lun mónsturu, ába giñe jájuduragun lun mónsturu, ába jaríñagun.

—Úati ni ában quei mónsturu le, ¿cába gayára láfaruni?

⁵ Ígirúati giñe mónsturu ligía lun ladímurejan dimúrei buíti luouúgua lúma lun lanábaguni Búngiu, lúma lun lagúmadijan luágu bián-wein-bián játi. ⁶ Ába ladügün ítara, adímurejati wuríbati luágu Búngiu, anábalei líri, lúban, jáma ja siélubaña. ⁷ Ígirúati giñe lun lageíndagun jáma lánigu Búngiu darí lásiiragúniña, ába líchugúniwa ubáfu lun jawágu sun rása, fulásu, luwúyerigu dimúrei lúma néchaani. ⁸ Ába jájuduragun sun ja aganoubaña ubouágu lun mónsturu ligía, ja úabaña jíri bürüwañu lúmagiñe ladügün ubouú tídan líburu to lánina ibágarí, to lúmaboun Jesucrístu, le Mudún le ouwebei.

⁹ Le garígeiruguti lun lagáambun, agáambalá. ¹⁰ Ja adáürütiña ámu, jadáürawagúba giñe, ja áfarajatiña táu efeín, jáfarawagúba giñe táu efeín. Ligía busén jabeí lánigu Búngiu gurásu lúma afíñeni.

¹¹ Lárigiñe, ábaya naríjin ábanya mónsturu lamúdeirun múarugugiñe. Níñein bián gánchu luágu camá ligáanchun mudún, áni ítara líña ladímurejan camá ában dragón. ¹² Níñein sun ubáfu le láni furúmiñeti mónsturu lúma lun ladügüni cátei lueígiñe loubadina furúmiñeti mónsturu. Ába ladügün lun jájuduragun sun gürígia ja ubouágubaña lun furúmiñeti mónsturu, le lareídagugüdübei lueígiñe chaünti le luágubei. ¹³ Adügati giñe ouñwenbun buri miláguru, áburujagüdati wátu geméti siéluigiñe lun múarugun jagíbugiñe gürígia. ¹⁴ Lídaangiñeti miláguru buri le únbei líchugúa ubáfu lun ladügüni lueígiñe loubadina furúmiñeti mónsturu, ába leyéeduniña ja aganoubaña ubouágu, ába ladügagüdün ában liyáwa mónsturu le gawágubalin chaünti ába lareídagun, joun. ¹⁵ Ába libíjin jabíaman mónsturu ubáfu lun líchugun ibágarí tun liyáwa furúmiñeti mónsturu lun tadímurejan lúma lun táfaraguniña sun ja májuduraguntiña tun. ¹⁶ Adügati giñe lun sun lan gürígia—weinamujaña, ñübürigiña, rísitiña, gudémetiña, idámuni, máma idámuni—lun labürüdün líri mónsturu luágu jájabu le jounwenren o luágu lan jerébe. ¹⁷ Úati ni ában gayáraati lagáñijan ni cáta ni lalúgurajan ánjein úa líri mónsturu o linúmerun líri luágu. ¹⁸ Buséntitia cátei le lichú áu, le gunfaráandati, atúriajaleí linúmerun mónsturu, le ábanbei quei líri wügüri, áni niján número le asálrubei lídaangiñe lilétürana íri ligía. sísi-san ürüwa-wein-sísi.

14

Jerémujan ja san bián-wein-gádürü mlú

¹ Lárigiñe líra, ába naríjini Jesucrístu, le Mudún, rára lábulugu wübü le Sión, le siélubei. Níñanu san bián-wein-gádürü mílu gürígia lúma, ja bürüwañubei líri Mudún lúma líri Lúguchi jeréberugu. ² Lárigiñe, ába nagáambun ában amúri ñübinti siélugiñe camá lamúri barána, camá giñe ladürügüdün ában wayújururu le jéreti, ítara líña giñe camá jamuga tamúri sarágu gidára. ³ Ába jerémujan gürígia jagía ában urému iséri ligíbugiñe lála Búngiu lúma jagíbugiñe gádürü cátaña gabágaritiña jagía, lúma jagíbugiñe gürígia ja weírigutiña. Úati ni ában gayára lumúti laníchigu lerérun urému ligía gunfaráanda jaweídügüya san bián-wein-gádürü mílu ja asálbarúabaña jádaangiñe ja uboúagubaña— ⁴ jagía ja mádaragúnbaña jóungua jámoun würíña, reideitiña jarúmañu, falájamei Mudún le ñíjin lumúti lídin, sálbawatiña jádaangiñe gürígia quei furúmiñeti edéweejani lun Búngiu lúma lun Mudún. ⁵ Madárirúnwati ni murúsun iyéeni luágu jayumáru ladüga jarúmatiña ligíbugiñe Búngiu.

Ugánu buri le jíchubei ürüwa ánjeligu

⁶ Ábati naríjin ábaya ánjeli ájamaja lamídaangua siélu, níñein ugánu le magúmuchaditi lúma lun lapúrichijani joun ja aganoúbaña uboúagu—joun sun néchaanigi rása, luwúyerigu dimúrei lúma sun fulásu. ⁷ Laríñaga láu umálali jéreti.

—Inébelá Búngiu jun, ru jugúyame uweírigu lun, chülüja dan lun lagúseragüdün. Judúgua jumá lun le adügübalin siélu lúma uboú, barána lúma líseesen dúna.

⁸ Ába liábin ábanya ánjeli lárigi, ába laríñagun.

—Jeígua, jeígua Babilónia to weíriguboun, ladüga tabácharuadágüdüni sun néchaani láu bínu le lánina liwíye tayúmajan.

⁹ Ába liábin ábanya jürüwan ánjeli, ába laríñagun láu umálali jéreti.

—Le ájuduraguti lun mónsturu lúma tun liyáwa, ígira ligíame lun labürüdüniwa líri mónsturu luágu lújabu o leréberugu, ¹⁰ látubei bínu le lánina lanárime ligáñi Búngiu le lúnbei láburujan le gumúti luágun, ábame lasúfurirun láu wátu lúma súfuru ligíbugiñe Jesucrístu lúma jagíbugiñe ánjeligu ja sándubaña. ¹¹ Laweínruba lugúmulalin wátu le asúfuriragüdübañi lun sun dan, úabei eméraaguni ni wéyuagu ni áriebu joun ja ájuduragubaña lun mónsturu lúma tun liyáwa, o ja bürüwañubei líri jawágu. ¹² Ligía lébubei lúnti lan gagúraasun jamá lánigu Búngiu ja ñüdünbaña láu le lubeíbei áni falájamei Jesúsú surúñu, lun ítara meme jamá derégüdagu lídan jafíñen darí lúmoun jóúnwen.

¹³ Ábati nagáambun laríñagun ában umálali ñübinti siélugiñe nun.

—Abürüjabeí le. “¡Gúnda jamá ja ouwetiña láu jafíñen luágu Jabúreme Jesucrístu!” Lúmagiñe óra ligía, jeméraaguba lídaangiñe jawádigimari, ábame lídin le jadügübei úara jáma, líña Sífiri Sándu.

Lalúbajoúniwa múa

¹⁴ Ábati naríjin ában juánriñu jarúti, ligíbuagu juánriñu ligía, ñun líña ában lenége Jesucrístu, le Wügüri Garaúwarügüti. Níñein ában rídi gólu lábulugu túma ában alúbagülei jamánatu lújaburugu. ¹⁵ Ába láfuridun ában ánjeli tídaangiñe lúban Búngiu to siéluboun, ába lagúaragun láu umálali jéreti lun le ñúnbei ligíbuagu juánriñu.

—Dáboun balúbagüle, ladüga chülüja dan lun alúbajani, ladüga funáli nádü.

¹⁶ Ába lásügüragüdünun le ñúnbei luágu juánriñu lalúbagüle múarugugíñe, ába lalúbajan.

¹⁷ Ábayati láfuridun ábaya ánjeli tídaangiñe lúban Búngiu to siéluboun táu gíñe lalúbagüle jamánatu. ¹⁸ Ábaya láfuridun ábanya ánjeli lídaangiñe latárü, ánjeli ligía, gabáfuti luágu wátu geméti le luágubei latárü ligía. Ába lagúarun lun le táubei lalúbagüle láu umálali jéreti, ába laríñagun lun.

—Dáboun balúbagüle to jamánaboun, alúbajaboun tirésini beíbei to múaruguboun, ladüga funáaru.

¹⁹ Ába lásügüragüdünun ánjeli ligía lalúbagüle múarugugíñe, ába lalúbajanun beíbei to múaruguboun, ába líchugunun lídoun ában ágei weíruti lun taríbichawagúniwa. (Míni lan líra, lanárima abeichúni le lúnbei liábin lúmagiñe Búngiu.) ²⁰ Ába taríbichawagún beíbei bougudi libíti ubúru, ába láfuridun jítaü lídaangiñe tágei chülü lúmoun líñun jafúrenun gabáyu, úrúwa-san kilómetro geyéga.

15

Ánjeligu jáma jagúmujoún sédü ígei

¹ Ába naríjin ábanya oúnwenbun seíni siélu, weírigüdati anígi. sédü ánjeligu jáu jagúmujoún sédü ígei, ja áubaña lagúmucha ligáñi Búngiu.

² Arijatina gíñe camá jamuga ában barána le bídiriu láu wátu geméti lídan, ñúñanu ja agáñeirubaliña luágu mónsturu, túma liyáwa, lúma luágu linúmerun líri, rara jáña lubádu barána le bídiriu ligía táu gidára to líchuguboun Búngiu joun. ³ Ába jerémujani lerémun Moisés lé meja esériwidubei lun Búngiu, lúma lerémun Mudún, le ítarabei.

Weíruti áni buíti sun le adüga báalibei,

Wabúreme Búngiu, Súnti Gabáfu,

surúñu líña sun le badügübei, úragua,

amürü le Lurúeitebei sun néchaani.

⁴ ¿Cábasan manúfude bueí, Wabúngiute?

¿Cábasan madímurejan buíti buágu?

Amürü rügüñadibu mafígounjan,

jayábinba lílana sun fulásu, ábame jájuduragun bun,

ladüga arijúaali luágu buídu lan sun le badügübei.

⁵ Lárígíñeti sun cátei le, ába naríjini fulásu le sándutimaabei tídan lúban Búngiu siélu, fulásu le ñí lubei lerédera Búngiu, júnren lubéneri. ⁶ Ába jáfuridun sédü ánjeligu ja jáubaña sédü ígei jagía, ñígíñe. Táuñanu janáangun líno to jarúmatu, mirí, liábin jabélitin, gólu luágu janíguagu. ⁷ Ába liábin ában jádaangiñe cátaña gabágaritiña jagía, ába líchugun ában cópu gólu lun cáda ában jádaangiñe sédü ánjeligu jagía, buin líña cáda cópu láu luweírin ligáñi Búngiu le gabágaribei lun sun dan. ⁸ Ába labuínchun fulásu le sándutimaabei láu gumúlali le ñúbinbei lídaangiñe luweírigun Búngiu lúma lubáfu. siñátiti lebélorun ní ában ñíjin darí jagúmuchun sédü ígei ja jámabaña sédü ánjeligu jagía.

16

Cópu buri le lágei ligáñi Búngiu

¹ Ábati nagáambun laríñagun ában umálali jéreti joun sédü ánjeligu jagía lídaangiñe fulásu le sándutimaabei.

—Jeíba áturei cópu buri láu lanárime ligáñi Búngiu ubouágun.

² Ába lídin furúmiñeti ánjeli, ába láturuni licópun ubouágun, ába lasálrirun gumeín gáriti jawágu sun ja gawágubalin líri mónsturu, judúgua jagía lun.

³ Ába láturuni jabíaman ánjeli licópun baránajoun, ába lasálriragun barána queísi játa jiláaña, ába jouwegun sun cátaña ja gabágaribaña lídan.

⁴ Ába láturuni jürüwan ánjeli licópun luágun buri dúna lúma líseesen dúna, ába lasálriragun jítaüme. ⁵ Ába nagáambun laríñagun láni dúna ánjeli.

—Úraguatibu láu bagúseragüdün ítara, Búngiu sándu, amürü le wínwanbei lúmagiñe lubáragiñe furúmiñeti dan áni wínwan amürü guetó, ⁶ ladüga jagía, aseíñeigüda jamúti játa profétagu jáma ja deréguabaña joungua bun, guetóti gurágüdaadibu jítaü joun, yúuti joun.

⁷ Agáambatina giñe laríñawagun lueígiñe latárü.

—Ánja Wabúreme Búngiu le Súnti Gabáfu, agúseragüdaadibu láu ísuruni lúma úraguni.

⁸ Ába láturuni jagádürün ánjeli licópun luágun wéyu, ába libíjin wéyu ubáfu lun lachúraruniña gürígia láu lísü, ⁹ ába jachúrarun síngubei. Láu sun lira, masáansiragunti jagáburu, madímurejan jagía buíti luágu Búngiu, anábaguearügü jamei Búngiu le gabáfubei jawágu ígei ja.

¹⁰ Ába láturuni jaseíngün ánjeli licópun luágun lála mónsturu, ába leréderun larúeijan lábugiñe lubúriga. Ába buri jágüragunun gürígia jañéñe láu igári.

¹¹ Ni ítara, masáansiragunti jagáburu lun jígiruni wuríbati léñaja jadügübei, anábaguearügü jamei Búngiu le siélubei luágu jagárigu lúma jagúmein.

¹² Ába láturuni jasísin ánjeli licópun luágun oúnwenbun dúna le Eufrátés, ába lamábeidun lun ñi lan úma lun jasügürün urúeigu ja ñübinbaña lueígiñe oubaü le ñígiñe lubei labouácha wéyu.

¹³ Ábati naríjin jáfuridun ürüwa espíritugu wuríbatiña liyúmulugugiñe dragón, liyúmulugugiñe mónsturu, lúma liyúmulugugiñe proféta le yébebi, ítara jáña espíritugu wuríbatiña jagía quei júa. ¹⁴ Espíritugu jagía máfianu ja adáagubaña miláguru, ába buri jáfuridun oúndaragúaña sun urúeigu ja ubouagubaña lubá wuríbu le lánina oúnwenbun luwéyuri Búngiu le Súnti Gabáfu. ¹⁵ (“Tounigi jumátia ladüga sódinibeí niábin quei liábin jíweruti áriebe. Gúndaabeí le agágudúañubei, nuján lanáangun luágu, lun meíbugun lan surúsu lueí jaríjini gürígia le mabúseerun lubei lun jaríjini luágu,” líña laríñagun Jesucrístu.) ¹⁶ Ábati joundaraguniña urúeigu lídan fulásu le gíribei Armagedón lídan dimúrei le hebréo.

¹⁷ Ábati láturuni jasédün ánjeli licópun garábalirugun, ába láfuridun ában umálali lídaangiñe fulásu le sándutimaabeí le siélubei. Lumálali Búngiu ligía, le ñünbei luágu lála ñi, laríñaga.

—Adügüwaali.

¹⁸ Ába ñi lan labírijaníga, ireíni, lúma wayújururu, ába lánjingichun múa láu ában járabaganáli, jéreti sügü láu sun járabaganáli le dagáalibeí lúmagiñe ñi jamá gürígia ligíbuagu ubou. ¹⁹ Ába lafánreinragun ubúru gu weíruti le Babilónia lídan ürüwa murúsun, ába buri lagúluludun ubúru gu le ubouagubei, ába larítagun Búngiu luágu ubúru gu weíruti le Babilónia lun lájuluchagüdüni bínu le lánina abeichúni le loúnajabeí lun lídan ligáñi. ²⁰ Sun ubouju lúma sun wúbü, ába lagúmuchagun. ²¹ Ába giñe láburujan oúnwenbun buri lúbara júya deréguati siélugiñe jawágun gürígia, jürüburiti chülü lúmoun san líburu, ába janábaganu gürígia Búngiu luágu, ladüga ában lan abeichúni janárimeti.

17

Tasíadirúniwa Oúnwenbun jóru

¹ Ábati liábin ában jádaangiñe sédü ánjeligu ja láubaña sédü cópu, ába laríñagun nun.

—Jigábu, narúfudaali tabeichún oúnwenbun jóru to ñúnboun ligíbuagu barána bun. ² Agánawaaña urúeigu ja ubouágubaña lídan salúfuri túma, bachárua jagía ja ubouágubaña láu bínu le lánina tisálufurin.

³ Ába lanügünina ánjeli ligía lídoun ában fulásu mageírawati le ayáwadagubei nun láu lubáfu Sífiri Sándu, ába naríjin ában wúri waríñu luágu ában mónsturu funáti, bürüwañu líña sun luwúyeri dimúrei le anábaguti Búngiu tuágu, sédüñein lichügü mónsturu le uágubei tañúura, díisi ligáanchun. ⁴ Wúri tugúya, gúchu lúma funáti ticólorunbei tanáangun, liábin tuwénden, gólu, dübü buíduburiti, lúma pérla. Ñíñein ában cópu gólu tújaburugu buin láu tisálufurin lúma liwíye tadáagun. ⁵ Bürüwañu líña ában íri teréberugu láu ában aníchigu arámudaguati. Íri le teréberugubei. “Babilónia to weiriboun, jáguchu jóru lúma sun luwúyeri iwíyeni ubouágu.”

⁶ Ába nasúbudiruni luágu bacháruañoun lan wúri tugúya láu játa ja lánigu Búngiu jáma ja áfarawagúbaña lueígiñe jadímurejan luágu Jesucrístu. Dan naríjinbalin cátei le, ába laweíridun nanígi. ⁷ Ábati laríñagun ánjeli ligía nun.

—¿Cá uágu laweírda banígi? Nasúbudiragúdaali míni tan wúri to bun, láu sun mónsturu le anügübarun, le sédübei ichügü, díisi ligáanchun. ⁸ Mónsturu le baríjubei, gabágariti meja, áni guetó úaali, láu sun líra, lamúdeiruba lídaangiñe júyu le mébejabei lubáragiñe lídin lídoun lagúmujóun loúnwen. Ja aganoubaña ubouágu, ja úabei jiri bürüwañu tídan líburu to lánina ibágari lúmagiñe ladügün ubou, laweíriduba janígi dánme jaríjini mónsturu lé meja gabágaribeí áni úaali, ábaya liábin.

⁹ Níjein cátei ya joun ja gayáraabei gunfaráanda jamáni. Sédü ichügü ligía, míni lan sédü wübü le uágubei ñun tan wúri tugúya, ¹⁰ sédü méme ichügü ligía, míni lan giñe sédü urúeigu. Seíngü jádaangiñe urúeigu jagía, gumújali jarúeijan, ában jádaangiñe, larúeijaña guetó, le ában, miábingili. Dánme liábin jagúmujóun, larúeijaba murúsurügü dan. ¹¹ Le mónsturu lé meja gabágaribeí áni úaali guetó, ligía jawídünbei urúeigu, láu sun ligía lan ában jádaangiñe sédü, lárigiñeme, ábame lídin lídoun lagúmujóun loúnwen.

¹² Díisi gánchu le baríjubei, díisi urúeigu ja magúmeserungiñabaña arúeija, jabíjuba jabáfu urúeigu luágu ában óra úara lúma mónsturu. ¹³ Ában lábu jarítangun urúeigu jagía, jíchugubei jabáfu lúma jarúeijan lun mónsturu. ¹⁴ Jageíndaguba lúma Jesucrístu, láfaragubaña jilágubei, ladúga Jabúreme sun abúremein ligía, Jarúeite giñe sun urúeigu, áni jagáñeiruba giñe sun lánigu ja lanúadajabaña Búngiu áni derégüdagu méme jáña lídan jafíñen luágu, úara lúma.

¹⁵ Ába giñe laríñagun ánjeli ligía nun.

—Barána le baríjubei, le igíbuagubei tañúura jóru, fulásu buri, luwúyerigu dimúrei, lúma néchaani. ¹⁶ Áni díisi gánchu le baríjubei luágu mónsturu, le méme díisibeí urúeigu, teyéeregudaba jóru joun, ábame jígirunun fiwañu, surúsu, jeígubei tügürügü, ábame jágudunun láu wátu gemetí. ¹⁷ Rúlaali Búngiu tídoun janígi lun jadügüni le labúseerubei láu júaradun lun jedéregeruni jabáfu queisi urúeigu lun jíderaguni mónsturu daríme

lagúnfulirun le lariñagubei Búngiu. ¹⁸ Würi to baríjuboun, tugúya weíriti ubúru le agúmadirubaliña lurúeitegu ubou, le gíríbei Babilónia.

18

Teíquadun Babilónia

¹ Lárígiñe sun cátei le, ába naríjin ábanya ánjeli larárirun siéluigiñe láu sarágu ubáfu, ába larúgoundun ubou láu límirin. ² Lagúaraguati láu umálali jéreti.

—Gumúgua, gumúgua Babilónia to weírriboun, guetó jábiñejaru máfianu, jarámudaguagüle sun jawúyeri espíritu wuriñe, jádibu dunúru wíyetiña queisi wadúbi. ³ Ladúga sun lan néchaanigu bacháruaaña láu bínu le lánina tisálufurin, áni agánawaaña lurúeitegu ubou túma lídan tisálufurin, alúgurajatiña buri ja ubouagubaña, rísijaña lídaangiñe luwénden touseragun túngua.

⁴ Ábayati nagáambun lariñagun ábanya umálali ñübinti siéluigiñe.

—Furíjuma Babilóniagiñe, jugúya le nánigu, mafánran jumámuga lídan tifígoun lúma lídan tabeichúniwa. ⁵ Gíbeguaali tifígoun dari lun lachúlürün siélu, áni jarítaguaali Búngiu luágu luríban touserun. ⁶ Adúga jumá tun Babilónia quei tadúga joun ámu, fáyei jumouñ dóbüli luei le tadügübei. Rújuma ában uníñein le jéretimaati bián weíyaasu tun sügü láu le tíchugubei joun ámu. ⁷ Súfurigüda jumouñ quei méme tederegeragun túngua lun anáanguni únguaü lúma lun agünrinchaguni, ladúga aríñaga tan tídan tanígi. “Ñun nína ya quei ában urúei, máma nugúya ában jíñáru mámaritu, masúfurirubadina gíñe.” ⁸ Ligía liábinba lubei tabeichún lídan ában meme wéyu—ouweni, íruni, ilámaü—ábame tagudún láu wátu geméti, ladúga gabáfuti Wabúreme Búngiu le asiadirubarun.

⁹ Lurúeitegu ubou ja aganoubaña túma lídan salúfuri lúma irisini, jayájuba, gudémegua tugúyame joun dánme jaríjini gumúlali le lánina tagudún.

¹⁰ Ábame jeréderun díse, le janúfudei luei tabeichún, ábame jariñagun.

—¡Fugiábu Babilónia, ubúru le weíríbei, Babilónia ubúru le gabáfubei, lídaanrügü murúsun óra liábin babeichun!

¹¹ Ja alúgurajatiña buri ja ubouagubaña, ayájuatiña gíñe, gudémegua ligía ubúru ligía joun ladúga úaaña lan cába lan agáñjei ebégidinaü le janáajabei— ¹² ebégidinaü lé buri gólu, pláta, dübü buíduburitu, pérlas, gamísa to líno to finutu, séda, colóru buri gúchu lúma funáti, lúma gíñe sun luwúyeri fuláansu le jémeti, ílagu láuti jári léfan, fuláansu buíduburiti, brónse, gürábu, lúma dübü miríti, ¹³ canéla, cátei lé buri jémeti, cupáli, mírra, ibíñei, bínu, aáli, fulúwaaru finutu, lúma türígu, barútiña gíñe anímaalugu ja lúntiña janáajan ílagu, mudún, bágasu, gabáyu, cárü, ásta músu, o gürígia lun jalúgurajoún. ¹⁴ Jariñaguba lun ubúru ligía.

—¡Úaarú frúta buri to seméboun búma to jínsiñeñajáboun bun sarágu, féridi báali gíñe sun irisini lúma wéndei le búmañajabei, féridiwaali lun sun dan!

¹⁵ Jáñaja alúgurajabálin buri cátei le áni rísijaña lídan ubúru le, jeréderuba díse le janúfude luei labeichún, ayájuajaina, aságüríjeina.

¹⁶ Ábame jariñagun.

—¡Fugiábu ubúru weíríti! Ítara líñá meja quei ában würi táu tadáuragun to líno finutu túma anáanguni to colóru gúchu lúma funáti, láu tuwénden

gólu, dübü buíduburiti lúma pérla. ¹⁷ ¡Lídan murúsun óra gumúja sarágu irísini!

Sún buri tarüne ugúnein, pasajéru, mádulungu, jáma sun ja ñadágimeinbaña baránaja, díseti jeréderun. ¹⁸ Dánti le jaríjini lugúmulalin lágudun ubúru, ába jagúaragun.

—¿Cásan meja ámu ubúru ñíbei quei oúnwenbun ubúru le?

¹⁹ Ába jíchaagun múa jábulugu, ayájuaja, aságüríja, agúaragua.

—¡Fugíabu Babilónia lé buga weíribei! Rísijañá yebe sun ja gagúnebaña wapóru baránaja láu lirísini, áni lídaanrügü murúsun óra gürínwagua.

²⁰ Gúnda jumá láu le asúseredubei lun Babilónia, amürü siélu, júma jugúya apóstolugu, jáma profétagu, jáma sun ja lánigu Búngiu, ladüga adügaali Búngiu gúsei jun láu lasiadiruni.

²¹ Ábati liñúrún ában ánjeli gabáfuti ában dübü le ítarabei quei ában mulí, ába láguruni baránajoun, ába laríñagun.

—Ítara lúba laráriragüdüniwa Babilónia, ubúru le weíribei, maríjindügüyáwalime. ²² Magaambündügüyáwalime tamúri gidára, fídu, bémerirugu, úaañame gíñe ñadágimeintiña bídan ni ca uwúyeri, magambúnjalime gíñe lamúri dübü le mulí bídan. ²³ Madúnraagúnjalime larúgounga lámpu bídan, magaambündügüyáwalime areínjani le lánina maríei bídan, láu sun gabáfugüda bániña meja báni alúgurajatiña lídan sun ubou, eyéedagua baña sun néchaani láu babíñarajan.

²⁴ Dariwaali játa profétagu, jáma ja lánigu Búngiu, lúma játa sun ja áfarawagúañabaña ubouagu, dariwaali játa sun jagía lídan ubúru lé meja Babilónia.

19

¹ Lárigiñe cátei le, ába nagáambuni jamálali sarágu gürígia, jagúarajan. ¡Alelúya! Weíruti Wabúngiute le Súnti Gabáfu, ligía asálbarubaliña lánigu.

² Agúseragüdati láu úarani lúma ísuruni, siádi láaru oúnwenbun jóru to agádeirubalin ubou láu tisálufurin, águuyüda láali jáfarawagún lánigu tuágu.

³ Ábaya jagúarajan.

—¡Alelúya! Magúmubei lamúdeirun tugúmulalin.

⁴ Játi weín-gádürü gürígia ja weírigutiña, jáma gádürü cátaña gabágaritiña jagía, ába jélemuchun chülü múarugun, judúguatiña lun Búngiu le ñúnbei luágu lála, ába jaríñagun.

—¡Ítaralá! ¡Alelúya!

⁵ Ábati lagaambún laríñagun ában umálali yaráfa lueígiñe lála Búngiu. Rújuma uweíríguni lun Búngiu, sun jugúya ja esériwidubalin, áni inébelá jun, weíyaaña, ñübürigiña.

Fédu siélu

⁶ Agáambayatina camá jamuga jamálali sarágu gürígia, camá lamúri sarágu duna lúma wayújururu jéreguti, agúaraja.

¡Alelúya! Guméseeli Wabúreme Búngiu le Súnti Gabáfu agúmadija.

⁷ Gúndaagua wamá, buínwama láu ugúndani, ru wagíame uweíríguni lun, ladüga chülüja óra lun lídan jamá ában lánigu Jesucristu lúma, le gumúti. Aráanseña quei ában adári lubá tamárieidun,

⁸ táu tanáangun líno to fínutu, jarúma, áni mirí.

Míni tan líno fínutu, ibágari le surúti, le jabágari lánigu Búngiu.

⁹ Ábati laríñagun ánjeli nun.

—Babürüja. “Gúnda jamá ja amísurajoúbaña lídoun fédu le lánina lúaradun Jesucrístu jáma lánigu.”

Ába laríñagun nun.

—Dimúrei buri inárüni le laríñagun Búngiu le.

¹⁰ Ába nájuduragun ligíbugiñe ánjeli ligía, ába laríñagun nun.

—Madügabei le, esériwiduti áu lun Búngiu quei amürü jáma bibíriña ja afálarubalin láni Jesúsu ugánu derégüdaguñu, lun Búngiu lun bájuduragun.

Ugánu le lanügübei Jesúsu lídoun larúgouna, ligía lébubei sun le jaríñagubei profétagu.

Le aweínjabalin gabáyu jarúti

¹¹ Ábati naríjini siélu junréñu, ába lasálriragun ában gabáyu jarúti, léti aweínjabalin, Gúnfuliti lúma Inárüni, ligía líribei, ladüga láu ísuruni lagúmadija, láu gíñe ísuruni lageíndagua. ¹² Ámirijati lágu camá ligémeri wátu, ñíñein sarágu rídi lálulugu, ñíñein gíñe ában íri bürüwañu luágu, ligía rügüñein asúbudirei. ¹³ Anáanguni to luáguboun, feíndiwatu láu jítaü. Lerérun Búngiu líribei. ¹⁴ Jafálareiti súdaara ja siélubaña táu jadáüragun líno to fínutu, jarútu, jarúma, wariñu jagía jawágu gabáyu jarútiña. ¹⁵ Níñoun ában efeín jamánatu liyúmulugugiñe lun láchaünguniña néchaani táu, ábame ledéraagüdüni lagúmadijan quei láu ában gürábu. Lagúseragüdübaña quei le aríbichagubarun beíbei láu lugúdi, gurágüdaleíme bínu le lánina lanárime ligáñi Búngiu joun. ¹⁶ Bürüwañu líña íri le tuágu lanáangun lúma luágu liyáda. “Jarúeite sun urúeigu, Jabúreme sun abúremeigu.”

¹⁷ Ába naríjin ában ánjeli rára lídan wéyu, le agúaragubei láu érei joun sun dunúru ja ájamajabaña juánriñurugu.

—Jigoúgu, oúndaragua jumá lun oúnwenbun ladíneragüdüni Búngiu, ¹⁸ jou jumámuga jágürügü urúeigu, gumádimatiña, jáma wügüríña ganígitiña, jágürügü gabáyu jáu sun ja aweínjabaliña, jágürügü sun jawúyeri wügüríña dándu ja jóunguatiña quei ja idámuni, dándu ñübürigiña quei weínamujaña.

¹⁹ Ábati naríjini mónsturu jáma lurúeitegu ubou jáu jánigu oúndaraguaaña lun jageíndagun lúma le wariñubei luágu gabáyu jarúti jáma lánigu. ²⁰ Ába ladaürün mónsturu úara lúma proféta yéeti lé buga adügübei miláguru ligíbugiñe mónsturu. Láu buri miláguru ligía, ayéeda láaña proféta ligía ja ígiraguagüdübaña jóungua lun labürüdün líri mónsturu jawágu, judúgua jagía tun liyáwa. Dánduti mónsturu quei proféta yéeti ligía, ába jagurún winwañu lídoun lagúnu le láubei wátu geméti lúma súfuru. ²¹ Ja jíbiri, ába jáfarawagún táu efeín to liyúmuluguboun le wariñubei luágu gabáyu, ába jaquímuledun sun dunúru buídu láu jágürügü.

20

Le mílu irúmu

¹ Lárigiñe, ába naríjin ában ánjeli larárirun siélugiñe láu ligélen júyu le mébejabei, lúma ában oúnwenbun güringüri lújaburugu. ² Ába lárügüdüni ánjeli ligía dragón, le binádu jéwe, le Máfiabei áni Satanási, ába lagüraguni luágu mílu irúmu. ³ Ába láguruni lídoun júyu le mébejabei le ñí lubei ladaürei. Ába lichugún ában séyu luágu béna lun mayéejandügüya láaña

lan néchaanigu darí lásügürün mílu irúmu. Lárigiñeme mílu irúmu ligía, lígiragüdúwaba luágu murúsun dan.

⁴ Ába naríjini jála buri ja ibíjubaña ubáfu lun jagúseragüdün, ñun jáña luágu. Aríja numútiña giñe jawáni já meja adürürübaña ichügü lueigiñe japúrichijani Lerérun Búngiu lúma lueigiñe jadímurejan luágu Jesucrístu, ja májuduragunbaña lun mónsturu ni tun liyáwa, mígirun jagía lun lichugún líri luágu jerébe o luágu lan jarúna. Ába naríjin jásaarun lídaangiñe oúweni lúnya jabágaridun, ába jagúmadijan úara lúma Crístu luágu mílu irúmu. ⁵ Anjeinti ja jíbiri jiláguaaña, másaaruntiña lídaangiñe oúweni daríme lárigiñe mílu irúmu. Niján furúmiñeti beí ásaaruni lídaangiñe oúweni. ⁶ ¡Gúndaatiña áni lánigu Búngiu jagía ja gafánraanbaña lídan furúmiñeti ásaaruni lídaangiñe oúweni! Mabáfuti libíaman oúweni jawágu, lubáragiñe líra, fádirigubaña lání Búngiu lúma lání Crístu, ábame jagúmadijan úara lúma Crístu luágu mílu irúmu.

⁷ Dánme sügüjali mílu irúmu ligía, ligíame lígirawagüdün Máfia lídaangiñe júyu le mébejabei, ⁸ ábame láfuridun lun layéejaniña néchaanigu lídan sun ubou. Láfuriduba ayéedaña ubáfu buri le Gog lúma Magóg, ábame loundaraguniña jánigu, ja gíbebaña quei liságounte barána, lun wuríbu. ⁹ Ítara líña lubeíti, ába jáfuridun súdeara jagía lídaangiñe sun ubou, ába jegéyedaguni fulásu le ñi jabei lánigu Búngiu lúma ubúrugu le jínsiñebei lun Búngiu, le Jerusalénbei. Ába louñajan Búngiu wátu geméti siélugiñe, ába láguduniña gumúgubei. ¹⁰ Máfiati le ayéedubaliña, ába lágurúniwa lídoun lagúnu le láubei wátu geméti lúma sáfuru, le ñíjin lubei jágurúa mónsturu lúma proféta yéeti. Jasúfuriruba ñi wéyuagu, áriebe lun sun dan.

Wísiyu ligíbugiñe oúnwenbun jalaü jarúti

¹¹ Ábati naríjin ában oúnwenbun jalaü jarúti, ñíñein Búngiu ñun luágu. Ába lagúmuhagun siélu lúma ubou ligíbugiñe, ába marijínjali lan. ¹² Ába naríjiniña jiláguaaña, weínamujaña jáma ñúbürigiña rára ligíbugiñe Búngiu, ába tadárawagún líburu buri túma ábanya líburu to líburu to lánina ibágarí. Ába jagúserawagüdün jiláguaaña luágu buri cátei lé meja jadügübei, según le bürüwañubei tídan líburu buri tugúya. ¹³ Sarátíña sun ja añáradagubaña dúnarugu, sun ja jiláguañabaña, ába jásaarun lídaangiñe oúweni, ába jagúserawagüdün luágu buri cátei lé meja jadügübei. ¹⁴ Ába lágurúniwa oúweni lúma jabára jiláguaaña lídoun lagúnu le láubei wátu geméti. Lagúnu láuti wátu geméti ligía, ligía libíamabei oúweni, ¹⁵ ñíjin jagurúa ja úabei jiri tídan líburu to lánina ibágarí lun jasúfurirun ñi gumúgua dan.

21

Iséri siélu lúma iséri ubou

¹ Lárigiñe, ába layáwadagun iséri siélu lúma ában iséri ubou nun, gumúgua buga furúmiñeti siélu lúma furúmiñeti ubou áni úaali buga barána. ² Áu Juan, aríja numúti ubúrugu biníwati le iséri Jerusalén, larárirun siélugiñe lúmagiñe Búngiu. Aráanseñu líña quei ában adári dáüguañu lubá tadári. ³ Ába nagáambun laríñagun ában umálali jéreti siélugiñe.

—Aríjabá, agánawati Búngiu jádan gürígia guetó. Laganouba jáma, jagíaba lánigu, Búngiu mémeba jáma lun ligía lan Jabúngiute. ⁴ Larágajabei sun jáguira, úaalíme oúweni ni ayájuni ni íruni ni igárigu, ladúga sügüja sún meja cátei le níjeinbei.

⁵ Ábati laríñagun Búngiu.

—Arijabá, adüga numúti sun cátei isérime.

Aríñagati gíñe.

—Babürüja, ladüga inárüniti dimúrei buri le, áni gayáraati lafiñerún luágu.

⁶ Lárigiñe, ába laríñagun nun.

—Súnja nadügüni sun cátei le. Áu lagúmesejabei sun cátei, áu gíñe lagúmujoúnbei, quei létüra ‘A’ lúma ‘Z’. Le mágürabuti, níchuguba lun lun látun lídaangiñe líseesen dúna le íchugubei íbágari, mafáyeijaanga luagu. ⁷ Ja ásiiragúbalin wuríbani jerésibirubei sun le lúnbei jabíjini quei jalágaante quei nirájüñü, áume Jabúngiute, jagíame nirájüñü. ⁸ Ánjañati ja janúfudebaña, ja mafíñebaña, ja iyéreejabúbaña, ja gáfarajadibaña, ja adágubaña salúfuri, ja abíñarajabaña, ja ájuduragubaña joun sándu, jáma ja yéebaña, jágurúba lídoun lagúnu le sübei láu wátu geméti lúma sáfuru, le libíamabei ouweni, ligíaba jalágaante.

Iséri Jerusalén

⁹ Ábati líábin ában jádaangiñe sédü ánjeligu ja láubaña sédü cópu buin jáu sédü jagúmujoún ígei, ába laríñagun nun.

—Jigábu, narúfudaali jageíra lánigu Jesucrístu bun.

¹⁰ Ába layáwadaguagüdüni Sífiri Sándu ában wübü nun, weíriti, íñu, ába larúfuduni oúnwenbun ubúругu biníwati le Jerusalén nun, larárirun siéluigiñe lúmagiñe Búngiu. ¹¹ Ámirijati ubúругu ligía láu larúgounga Búngiu, ítara líña límirin quei límirin ában dübü buídumeraüti, quei dübü le jáspe, jarúgoungati quei bídiriu. ¹² Níñein ában baríeru weíriti, íñu, láu dúusu béna geyégu láu ubúругu ligía, ában ánjeli luágu cáda béna, lúma jíri dúusu türíbu ladügawagun Israél бүрүwаñu luágu buri béna. ¹³ Ürüwañein béna lueigiñe le ñigiñe lubei labouúcha wéyu, ürüwa lueigiñe nórte, ürüwa lueigiñe sur lúma ürüwa lueigiñe oúbaü le ñigiñe lubei lálüda wéyu. ¹⁴ Baríeru ligía, ligíbuaguñein dúusu dübü lidérebuguñein, láu jíri dúusu lání Crístu apóstolugu бүрүwаñu luágu.

¹⁵ Níñein ában mabúru gólu lúma ánjeli le adímurejabei núma lun lamísurajani ubúругu, lubéneri, lúma lubárierun. ¹⁶ Ubúругu ligía, ába lábu lidábuberen lúma limígífen. Ába lamísurajani ánjeli ligía ubúругu láu lumáburu, bián-mílu bián-san kilómetros luweírín, ába lábu limígífen lúma líñun, lúma lidábuberen. ¹⁷ Lárigiñe, ába lamísurajani baríeru, ürüwa-weingádürü métrós luweírín según jamísuraagüle gürígia le layúsurubei ánjeli ligía.

¹⁸ Láu dübü le jáspe ladügüwa baríeru ligía, ubúругuti ligía, láuti gólu le tímátimaati, miríti queisi bídiriu le jarúmati. ¹⁹ Wéndegüdáwati lébu baríeru ligía láu sun luwúyeri dübü buíduburiti. le furúmiñeti, láu jáspe, le libíaman, láu saffro, le lürüwan, láu ágata, le ligádürün, láu esmerálda, ²⁰ le liseíngün, láu ónise, le lisísín, láu cornalína, le lisédün, láu crisólito, le liwídün, láu berílo, le linéfun, láu topásio, le lidíisin, láu crisoprása, le liúnsun, láu jasínto, léti lidúusun, láu amatísta. ²¹ Dúusugubei béna ligía, dúusu pérlas, cáda béna láu ábanrügü pérla ladügüwa. Léti üma buri lání ubúругu ligía, láuti gólu jarúgoungati quei bídiriu.

²² Maríjintina ní ában ligílisi lídan ubúругu lídan, ladüga añájein Wabúreme Búngiu le Súnti Gabáfu lúma Jesucrístu ñi, mabúseerúnwatu

ligílisi le ñi jabei. ²³ Memégeirunti ubúru gu ligía larúgounga lúmagiñe wéyu ni lúmagiñe játi, ladüga le guánarü larúgounga Búngiu rúti larúgounga lun, léti Jesucrístu, ligía lilámpunbei ubúru gu ligía. ²⁴ Jeíbuguba sun néchaanigu ja sálbawañabaña lídan lilámpun ubúru gu ligía, ábame janügüni lurúeitegu ubou jaweirigun ñíjin, lun jíchuguni lun Búngiu. ²⁵ Madáurawangunbei lubéneri wéyuagu, úabei gíñe áriebe ñi. ²⁶ Lanügüba jaweirigun néchaanigu ñíjin, láu sun jarísín, ²⁷ mebelubei ni cáta wíyeti ñíjin, ni le adügüti cátei le wuríbati o gayéeraguati. Ja rügübaña bürúwañubaña íri tídan líburu to lánina ibágari to lúmaboun Jesucrístu, jagía rügübaña ebélura.

22

¹ Ábati larúfudun ánjeli ligía ában dúna jarúmati nun, le íchugubei ibágari, jarúgoungati quei bídiri, lídaangiñe lála Búngiu lúma lála Jesucrístu láfurida. ² Ñíñein dúna ligía lamídaangua lémeri ubúru gu ligía, áni luágu bián louba dúna ligía ñi laweírda buri tídibu wéwe le íchugubei ibágari, le agíndubei dúusu weíyaasu lídan irúmu. Ságü játi lagíndun, léti lubána, seríwiti lun lagáranijoún joun néchaanigu. ³ Úaalíme ni cáta ñi lun lábugiñe lan líñaragun Búngiu. Ñíbei lála Búngiu lúma lála Jesucrístu lídan ubúru gu ligía, ábame jájuduragun lánigu lun. ⁴ Jagágibudaguba lúma Búngiu, ñíbei gíñe líri jeréberugu. ⁵ Úaalíme áriebe ñi, ja aganoúbaña ñi, memégeirunbaña ligémeri lámpu ni ligémeri wéyu, ladüga larúgoungadagüdüba Wabúreme Búngiu jáu, ábame jagúmadíjan sun dan.

Madíseeli liábin Jesús

⁶ Lárigiñe, ába laríñagun ánjeli ligía nun.

—Inárüni dimúrei buri le, áni gayáraati lafiñerúniwa luágu, áni Wabúreme Búngiu méme le íchugubei dimúrei joun profétagu oúnaja láadina lun narúfuduni le lúnbei lasúseredun joun lánigu madíse.

⁷ —¡Aríja jumál! ¡Anáte madíse! líña laríñagun Jesucrístu.

¡Gúndaalá le adügübei gásu láu ugánu le láni Búngiu le bürúwañubei tídan líburu to!

⁸ Áu Juan, agáamba numúti, aríjaneí buri cátei le, áni lárigiñe naríjini lúma nagáambuni, ába nájuduragun lubádu lugúdi ánjeli le arúfudubalin nun. ⁹ Ába laríñagun nun.

—Madügabei le, esériwiduti lun Búngiu áu quei amürü jáma bibíríña ja profétagu, jáma sun ja adügübaña gásu láu le bürúwañubei tídan líburu to, lun Búngiu lun bájuduragun.

¹⁰ Aríñagati gíñe nun.

—Marámudabei láni Búngiu ugánu le bürúwañubei tídan líburu to ladüga yaráfaali dan lun lagúnfulirún. ¹¹ Ígirabei le wuríbabei lun lasígirun adáagua wuríbani, le wíyebei, lun lasígirun lídan liwíye, ánjeinti le buídubei, buídumemelá, áni le wügüri le derégeguabei lúngua lun Búngiu, gúnfulimemelá.

¹² —Ánja, madíseeli niábin, líña laríñagun Jesucrístu, áni barü numuti afáyeiruajaü le lúnbei níchuguni lun cáda ában segün buri cátei le ladügübei. ¹³ Áu furúmiñetibeí lúma agúmujoúni, lagúmeseja sun cátei lúma lagúmujoún quei létüra ‘A’ lúma ‘Z’.

¹⁴ Gúndaatiña ja achíbubalin jafígoun lun garícha jamá lun jeígin lídaangiñe lin tídibu wéwe le íchubei ibágari, gayára lámuga jebélurun

lueigiñe lubéneri ubúru. ¹⁵ Ánjaña ja mafiñeradibaña luágu Jesucristu, ja abíñarajabaña, ja adáagubaña salúfuri, ja gáfarajadibaña, ja ájuduragubaña joun sándu, jáma sun ja jinsiñejabúbaña lun eyéeraguni, jeréderuba bougudi.

¹⁶ —Áu Jesúsu, oúnaja náali náni ánjeli lun lasúbudiragüdüni sún buri cátei le joun buri títana ligílisi. Áu linébaanfan urúei Davíd, áu giñe queísi warúguma to lánina bináafin.

¹⁷ Aríñagati Sífiri Sándu jáma ja lánigubaña Jesucristu.

—Jigábu lun Jesucristu lun basálbarun.

Le giñe agáambubei, aríñagalá.

—Jigábu lun Jesucristu, sálba bámuga.

Le mágürabubei, ánjein busén, ñübinlá, gurála lídaangiñe dúna le íchugubei íbágari, mafáyeijaanga luágu.

¹⁸ Sun ja agáambubalin láni Búngiu ugánu le bürüwañubei tídan líburu to, wéridi numútiña lueí cátei le. le íchuguti lánwoun cátei le, lagánwoundagüdúbaña Búngiu ígei ja uágubaña labürüjóua tídan líburu to, luágu. ¹⁹ Le giñe agídaruti som cátei lídaangiñe láni Búngiu ugánu le bürüwañubei tídan líburu to, lagídarubei giñe lufánran lídaangiñe lin tídibu wéwe le íchugubei íbágari, lúma lídaangiñe ubúru gu sándu lé buri bürüwabei uágu tídan líburu to.

²⁰ Le asúbudiragüdúbalin buri cátei le, aríñagati.

—Ánja, madíseeli niábin.

Ítaralá. ¡Jigábu Wabúreme Jesúsu!

²¹ Binílaün Wabúreme Jesucristu sun jugúya. Ítaralá.